

陸放翁全集

陸游著

陸放翁全集

世界書局印行

# 傳

陸游字務觀。越州山陰人。年十二能詩文。隆補登仕郎。鎖廳薦送第一。秦檜孫埴適居其次。檜怒。至臯主司。明年試禮部主事。復置游前列。檜顯黜之。由是爲所嫉。檜死。始赴福州寧德簿。以薦者除敕令所刪定官。時楊存中久掌禁旅。游力陳非便。上嘉其言。遂罷存中。中貴人有市北方珍玩以進者。游奏。陛下以損名齋。自經籍翰墨外。屏而不御。小臣不體聖意。輒私買珍玩。虧損聖德。乞嚴行禁絕。應詔言。非宗室外家。雖實有勛勞。毋得輒加王爵。頃者有以師傅而領殿前都指揮使。復有以太尉而領閣門事。瀆亂名器。乞加訂正。遷大理寺司直。兼宗正簿。孝宗卽位。遷樞密院編修官。兼編類聖政所檢討官。史浩黃祖舜薦游善詞章。詣典故。召見。上曰。游力學有聞。言論剴切。遂賜進士出身。入對。言。陛下卽卽位。乃信詔令以示人之時。而官吏將帥一切翫習。宜取其尤沮格者。與衆棄之。和議將成。游又以書白二府曰。江左自吳以來。未有捨建康他都者。駐蹕臨安。出於權宜。形勢不固。饋餉不便。海道逼近。凜然意外之憂。一和之後。盟誓已立。動有拘礙。今當與之約。建康臨安。皆係駐蹕之地。北使朝聘。或就建康。或就臨安。如此。則我得以暇時建都立國。彼不我疑。時龍大淵曾覲用事。游爲樞臣張震言。覲大淵招權植黨。熒惑聖德。公及今不言。異日將不可去。震遽以聞。上詰語所自來。震以游對。上怒。出通判建康府。尋易隆興府。言者論游交結臺諫。鼓唱是非。力說張浚用兵。免歸。久之。通判夔州。王炎宣撫川陝。辟爲幹辦公事。游爲炎陳取進之策。以爲經略中原。必自長安始。取長安。必自隴右始。當積粟練兵。有覆則攻。無則守。吳玠子挺代掌兵。頗驕恣。傾財結士。屢以過誤殺人。炎莫誰何。游請以玠子拱代挺。挺曰。拱怯而寡謀。遇敵必敗。游曰。使挺遇敵。安保其不敗。就令有功。愈不可駕馭。及挺子曦僭叛。游言始驗。范成大帥蜀。游爲參議官。以文字交。不拘禮法。人譏其頹放。因自號放翁。後累遷江西常平提舉。江西水災。奏撥義倉賑濟。檄諸郡發粟以予民。召還。給事中趙汝愚駁之。遂奉祠。起知嚴州。過闕陛辭。上諭曰。嚴陵山水勝處。職事之暇。可以賦詠自適。再召入見。上曰。卿筆力回幹甚。非他人可及。除軍器少監。紹熙元年。遷禮部郎中。兼寶錄院檢討官。嘉泰二年。以孝宗光宗兩朝寶錄成。三朝史未就。詔游權同修國史寶錄院同修撰。免奉朝請。尋兼秘書監。三年書成。遂陞寶章閣待制。致仕。游才氣超逸。尤

長於時。晚年再出。爲韓侂胄撰南園閣古泉記。見譏清議。朱熹嘗言其能太高。迹太近。恐爲有力者所牽挽。不得全其晚節。蓋有先見之明焉。嘉定二年卒。年八十五。



陸放翁全集總目

傳

渭南文集目錄

渭南文集卷一至卷五十一

渭南文集跋

劍南詩藁序

劍南詩藁目錄

劍南詩藁卷一至卷八十五

劍南詩藁跋

放翁逸藁目錄

放翁逸藁二卷

南唐書序

南唐書目錄

南唐書十八卷

南唐書音釋

老學菴筆記十卷

家世舊聞

齋居紀事

一一二

一一三

一一三八

三一九

一

一一六〇

一一二五三

一一二五五

一一二

一一一四

一

一一二

一一七七

七九一八四

一一六八

六九一七一

七三一一七五

# 渭南文集目錄

## 卷一

### 表二十首

天申節賀表	一
會慶節賀表二	一
瑞慶節賀表	一
光宗冊寶賀表	二
皇帝御正殿賀表	二
皇太子受冊賀表	二
賀明堂表	二
謝明堂赦表	三
謝赦表	三
謝賜曆日表二	三
福建到任謝表	三
江西到任謝表	四
嚴州到任謝表	四
除寶謨閣待制謝表	五
轉太中大夫謝表	五
謝致仕表	五
落職謝表	六

### 逆職授首稱賀表

### 牋七首

光宗冊寶賀太皇太后牋	六
皇帝御正殿賀皇后牋	七
皇帝御正殿賀皇太子牋	七
皇太子受冊賀皇后牋	七
賀皇太子受冊牋	七
逆職授首賀太皇太后牋	七
逆職授首賀皇后牋	八

## 卷二

### 南宮表牋二十五首

丞相率文武百僚請建重明節表二	八
立皇后丞相率文武百僚稱賀壽皇表	九
賀皇帝表	九
賀皇太后牋	九
賀壽成皇后牋	九
賀皇后牋	九
文武百僚謝春衣表	一〇
重明節明慶寺丞相率百僚啓建道場疏	一〇

開起……………一〇

滿散……………一〇

進疏……………一〇

會慶節明慶寺丞相率百僚啓建道場疏……………一

開起……………一

滿散……………一

進疏……………一

文武百僚謝冬衣表……………一

會慶節丞相率文武百僚賀壽皇表……………一

丞相率文武百僚賀至尊壽皇聖帝冬至表……………一

丞相率文武百僚賀皇帝冬至表……………一

丞相率文武百僚請皇帝聽樂表……………一

丞相率文武百僚賀皇太后受冊牋……………一

丞相率文武百僚賀壽成皇后受冊牋……………一

丞相率文武百僚上皇帝賀三殿受冊表……………一

丞相率文武百僚賀壽皇正旦表……………一

丞相率文武百僚賀皇帝正旦表……………一

卷二

劄子十首

蠟彈省劄……………一四

論選用西北士大夫劄子……………一四

代乞分兵取山東劄子……………一五

上二府論事劄子……………一五

上殿劄子三首……………一六

擬上殿劄子……………一七

上二府乞勿受慶雲圖劄子……………一八

上二府論都邑劄子……………一八

卷四

劄子十二首

上殿劄子三……………一九

乞祠祿劄子……………二一

上殿劄子二……………二一

上殿劄子二……………二二

除修史上殿劄子……………二三

乞致仕劄子三……………二四

卷五

奏狀八首

天申節進奉銀狀……………二五

辭免賜出身狀二……………二五

條對狀七條……………二五

奏筠州反坐百姓陳彥通訴人吏冒役狀……………二八

除寶謨閣待制舉會黜自代狀……………二八

辭免轉太中大夫狀……………二九  
薦舉人材狀……………二九

卷六

啓十二首

謝解啓……………二九  
賀台州曾直閣啓……………三〇  
賀曾祕監啓……………三〇  
賀謝提舉啓……………三〇  
賀禮部曾侍郎啓……………三一  
賀辛給事啓……………三一  
答福州察推啓……………三一  
賀何正言除左司諫啓……………三一  
賀湯丞相啓……………三一  
除刪定官謝丞相啓……………三二  
謝內翰啓……………三三  
謝諫議啓……………三四

卷七

啓十六首

謝曾侍郎啓……………三四  
刪定官供職謝啓……………三五  
賀黃樞密啓……………三五

除編脩官謝丞相啓……………三六  
謝參政啓……………三六

謝賜出身啓……………三六

答人賀賜第啓……………三七

賀張都督啓……………三七

問候洪總領啓……………三七

答鈐轄啓……………三八

問候葉通判啓……………三八

答吳提宮啓……………三八

賀葉提刑啓……………三八

賀呂知府啓……………三九

上陳安撫啓……………三九

上史運使啓……………三九

卷八

啓十六首

答發解進士啓……………四〇  
答廖主簿發解啓……………四〇  
上二府乞宮祠啓……………四〇  
賀吏部陳侍郎啓……………四〇  
賀莆陽陳右相啓……………四一  
謝王宣撫啓……………四一

通判夔州謝政府啓

四二

賀龔參政啓

四八

謝洪丞相啓

四二

答交代陳太丞啓

四九

上王宣撫啓

四三

與錢運使啓

四九

謝晁運使啓

四三

答南劍守林少卿啓

四九

謝夔路監司列薦啓

四三

與建寧蘇給事啓

五〇

答薛參議啓

四四

與本路郡守啓

五〇

答衛司戶啓

四四

福建謝史丞相啓

五〇

與何蜀州啓

四四

卷十

答交代楊通判啓

四四

啓十七首

與趙都大啓

四五

上趙參政啓

五一

卷九

啓十六首

與成都張閣學啓

四五

上安撫沈樞密啓

五一

答勾簡州啓

四六

賀泉州陳尙書啓

五一

與蜀州同官啓

四六

答建寧陳通判啓

五一

賀薛安撫兼制置啓

四六

答漳州石通判啓

五一

與李運使啓

四六

江西到任謝史丞相啓

五一

上鄭宣撫啓

四七

謝趙丞相啓

五二

賀葉樞密啓

四七

謝王樞使啓

五三

除制司參議官謝趙都大啓

四八

謝錢參政啓

五三

賀葉丞相啓

四八

謝侍從啓

五三

賀葉丞相啓

四八

謝臺諫啓

五四

賀葉丞相啓

四八

與本路監司啓

五四

答本路郡守啓……………五四

答寄居官啓……………五四

賀葛正言啓……………五五

賀周參政啓……………五五

賀謝樞密啓……………五五

卷十一

啓二十三首

賀禮部鄭侍郎啓……………五六

答撫州發解進士啓……………五六

賀施中書啓……………五六

上丞相參政乞宮觀啓……………五七

知嚴州謝王丞相啓……………五七

謝梁右相啓……………五八

謝周樞使啓……………五八

謝黃參政啓……………五八

謝施參政啓……………五九

謝臺諫啓……………五九

謝葛給事啓……………六〇

答交代陳判院啓……………六〇

嚴州到任謝王丞相啓……………六〇

謝梁右相啓……………六一

謝周樞使啓……………六一

謝臺諫啓……………六一

謝監司啓……………六一

答方寺丞啓……………六一

賀王提刑啓……………六一

與汪郎中啓……………六一

與沈知府啓……………六三

賀留樞密啓……………六三

賀蔣中丞啓……………六三

卷十一

啓十五首

賀賈大諫啓……………六四

賀謝殿院啓……………六四

賀周丞相啓……………六五

賀施知院啓……………六五

賀丘運使啓……………六六

賀蔣尚書出知婺州啓……………六六

除直華文閣謝丞相啓……………六六

修史謝丞相啓……………六六

賀謝丞相除少保啓……………六七

賀張參政修史啓……………六七

除寶謨閣待制謝丞相啓.....六八

謝費樞密啓.....六八

致仕謝丞相啓.....六九

答權提刑啓.....六九

答胡吉州啓.....六九

卷十二

書九首

代二府與夏國主書.....七〇

上執政書.....七〇

上虞丞相書.....七一

上辛給事書.....七一

答邢司戶書.....七二

答劉主簿書.....七三

與尉論捕盜書.....七三

答陸伯政上舍書.....七四

答王樵秀才書.....七五

卷十四

序十七首

容齋燕集詩序.....七六

京口唱和序.....七六

送關漕詩序.....七七

雲安集序.....七七

送范西叔序.....七七

東樓集序.....七八

范待制詩集序.....七八

持老語錄序.....七八

師伯渾文集序.....七九

晁伯各詩集序.....七九

長短句序.....八〇

徐大用樂府序.....八〇

呂居仁集序.....八〇

佛照禪師語錄序.....八一

趙秘閣文集序.....八一

方德亨詩集序.....八一

會稽志序.....八二

卷十五

序十七首

施司諫註東坡詩序.....八三

達觀堂詩序.....八四

梅聖俞別集序.....八四

楊夢錫集句杜詩序.....八四

陸伯政山堂類稿序.....八五



普燈錄序……………八五

澹齋居士詩序……………八六

傅給事外制集序……………八六

聞聲錄序……………八七

周益公文集序……………八七

宣城李虞部詩序……………八七

曾裘父詩集序……………八八

送巖電道人入蜀序……………八八

邢芻甫字序……………八八

曾温伯字序……………八九

天童無用禪師語錄序……………八九

陳長翁文集序……………八九

卷十六

碑六首

成都府江濱廟碑……………九〇

行在寧壽觀碑……………九一

殿州烏龍廣濟廟碑……………九二

德勳廟碑……………九二

泰州報恩光孝禪寺最吉祥殿碑……………九三

洞霄宮碑……………九四

卷十七

記十三首

雲門壽聖院記……………九六

寧德縣重修城隍廟記……………九六

灑亭記……………九七

煙艇記……………九七

復齋記……………九八

青州羅漢堂記……………九八

鎮江府城隍忠祐廟記……………九九

黃龍山崇恩禪院三門記……………九九

王侍御生祠記……………〇〇

東屯高齋記……………〇〇

樂郊記……………〇一

對雲堂記……………〇一

靜鎮堂記……………〇一

卷十八

記十一首

藏丹洞記……………〇二

籌邊樓記……………〇三

銅壺閣記……………〇三

彭州貢院記……………〇四

撫州廣壽禪院經藏記……………〇四

成都犀浦國寧觀古楠記

一〇五

書業記

一〇五

景迂先生祠堂記

一〇六

圓覺閣記

一〇六

能仁寺捨田記

一〇七

常州開河記

一〇七

卷十九

記十首

明州育王山買田記

一〇八

建寧府尊勝院佛殿記

一〇九

紹興府脩學記

一一〇

重修天封寺記

一一〇

嚴州重修南山報恩光孝寺記

一一一

會稽縣重建社壇記

一一二

廣德軍放生池記

一一二

鎮江府駐劄御前諸軍副都統廳壁記

一一三

法雲寺觀音殿記

一一三

會稽縣新建華嚴院記

一一四

卷二十一

記十首

居室記

一一五

邵武縣興造記

一一六

諸暨縣主簿廳記

一一七

婺州稽古閣記

一一七

智者寺興造記

一一八

常州奔牛閘記

一一九

盱眙軍翠屏堂記

一一九

上天竺復菴記

一二〇

東籬記

一二〇

嚴州釣臺買田記

一二一

卷二十一

記十首

仁和縣重修先聖廟記

一二二

湖州常照院記

一二二

法慈懺殿記

一二三

東陽陳君義莊記

一二四

廬帥田侯生祠記

一二四

吳氏書樓記

一二五

靈秘院營造記

一二六

橋南書院記

一二七

心遠堂記

一二七

萬卷樓記

一二七

卷二十一

銘七首

梅子真泉銘……………一二八

司馬溫公布被銘……………一二八

金崖硯銘……………一三九

延平硯記……………一二九

蠻谿硯銘……………一二九

錢侍郎海山硯銘……………一二九

桑澤脚碑硯銘……………一二九

贊二十四首

崔伯易畫像贊……………一二九

東坡像贊……………一三〇

王仲信畫水石贊……………一三〇

鍾離真人贊……………一三〇

呂真人贊二……………一三〇

僧師源畫觀音贊……………一三〇

宏智禪師真贊……………一三〇

大慧禪師真贊……………一三〇

已菴禪師真贊……………一三一

塗毒策禪師真贊二……………一三一

佛照禪師真贊……………一三一

大洪禪師贊……………一三一

中巖圖老像贊……………一三一

奉聖淳山主年八十有四放翁為作真贊……………一三一

芋菴宗慧禪師真贊……………一三一

廣慧法師贊……………一三一

敷淨人求僧贊……………一三一

錢道人贊……………一三一

放翁自贊四……………一三一

記事一首

記太子親王尹京故事……………一三一

卷二十二

傳三首

姚平仲小傳……………一三三

族叔父元襄傳……………一三四

陳氏老傳……………一三四

青詞六首

紹興府衆會黃籙青詞……………一三五

江西祈雨青詞……………一三五

謝雨青詞……………一三五

嚴州祈雨青詞……………一三六

謝雨青詞……………一三六

保安青詞……………一三六

疏二十一首

天申節樞密院開啓道場疏……………一三六

滿散道場疏……………一三六

天申節功德疏二……………一三七

瑞慶節功德疏七……………一三七

祈雨疏……………一三八

謝雨疏……………一三八

道宮謝雨疏……………一三八

嚴州祈雨疏三……………一三八

嚴州施大斛疏……………一三九

嚴州謝雨疏……………一三九

嚴州謝雪疏……………一三九

嚴州久雪祈晴疏……………一三九

卷一十四

疏二十九首

法雲寺建觀音藏殿疏……………一三九

開元寺重建三門疏……………一四〇

安隱寺修鐘樓疏……………一四〇

重修光孝觀疏……………一四〇

圓通寺建僧堂疏……………一四〇

重建大善寺疏……………一四〇

道像五藏疏……………一四〇

鷲峯寺重建三門疏……………一四一

重修大慶寺疏……………一四一

福州請仁王堅老疏……………一四一

福州請九峯圖老疏……………一四一

福州請聖泉穎老疏……………一四一

能仁請昕老疏……………一四一

雍熙請最老疏……………一四一

鄉士請妙相講主疏……………一四一

千秋觀修造疏……………一四一

光孝請廓老疏……………一四一

雍熙請機老疏……………一四一

雍熙請錫老疏……………一四一

求僧疏二……………一四二

紫霄宮女童徐居慶求披戴疏……………一四二

成都大聖慈寺念經院僧法慧爲行者雷

印定求度牒疏……………一四三

雍熙請倫老疏……………一四三

梁氏子求僧疏……………一四三

孫餘慶求披戴疏……………一四三

陶山菴行者求化度牒疏……………一四四  
傅妙蘇求僧疏……………一四四  
葉可忻求僧疏……………一四四  
祝文二十三首……………一四四  
嚴州廣濟廟祈雨祝文……………一四七  
嚴州謝雨祝文……………一四七  
嚴州戊申謝蠶麥祝文……………一四七

祝文二十三首

卷一十五

勸農文三首

鎮江謁諸廟文……………一四四  
祭富池神文……………一四四  
夔州勸農文……………一四八  
丁未嚴州勸農文……………一四八

福建謁諸廟文……………一四四  
福州城隍昭利東嶽廟祈雨文……………一四四  
戊申嚴州勸農文……………一四八

福州謝雨文……………一四五  
雜書十二首……………一四八

福州準赦禱諸廟文……………一四五  
書通鑑後二……………一四八

福州歐冶池龍輝谿河口五龍祈雨祝文……………一四五  
書賈充傳後……………一四九

福州閩王闔忠懿王祈雨祝文……………一四五  
書郭崇韜傳後……………一四九

嚴州謁諸廟文……………一四五  
書安濟法後……………一五〇

謁大成殿文……………一四六  
書空青集後……………一五〇

謁社稷神文……………一四六  
書浮屠事……………一五一

嚴州秋祭祝文……………一四六  
書渭橋事……………一五一

嚴州祈雨祝文三……………一四六  
書包明事……………一五一

嚴州馬目山祈雨祝文二……………一四七  
書神僊近事……………一五一

嚴州祈晴祝文……………一四七  
書屠覺事……………一五一

嚴州謝雪祝文……………一四七  
書二公事……………一五二

嚴州久雪祈晴祝文……………一四七

卷一十六

跋四十首

真僊賜馮侍中詩……………一五三

高宗聖政草……………一五三

高宗賜趙延康御書……………一五三

高皇御書二……………一五四

今上皇帝賜包道成御書崇道菴額……………一五四

跋尹耘師書劉隨州集……………一五四

跋唐御覽詩……………一五五

跋文武兩朝獻替記……………一五五

跋吳禪師蒙泉銘……………一五五

跋修心鑑……………一五五

跋邵公濟詩……………一五五

跋坐忘論……………一五六

跋查元章書……………一五六

跋高象先金丹歌二……………一五六

跋天隱子二……………一五六

跋造化權輿……………一五六

跋老子道德古文……………一五六

跋已菴語……………一五七

跋武成先生語錄……………一五七

跋關著作行記……………一五七

跋司馬子微餌松菊法……………一五七

跋周茂叔通書……………一五七

跋岑嘉州詩集……………一五八

跋二賢像……………一五八

跋山谷先生三榮集……………一五八

跋硯錄香法……………一五八

跋唐修撰手簡……………一五八

跋蔡君謨帖……………一五八

跋瘞鶴銘……………一五九

跋西崑酬唱集……………一五九

跋歷代陵名……………一五九

跋温庭筠詩集……………一五九

跋王君儀待制易說……………一五九

跋崔正言所書書法要訣……………一五九

跋後山居士詩話……………一五九

跋佛智與升老書……………一六〇

跋古柏圖……………一六〇

卷二十七

跋四十九首

跋中和院東坡帖……………一六〇

跋漢隸……………一六〇

跋晁百谷字詩	一六〇	先太儻遺像	一六四
跋陵陽先生詩草	一六〇	跋高康王墓誌	一六四
跋荆公詩	一六一	跋半山集	一六四
跋續集驗方	一六一	跋李深之論事集	一六五
先左丞使遼語錄	一六一	跋李莊簡公家書	一六五
跋朝制要覽	一六一	跋之眾先生稟	一六五
跋東坡問疾帖	一六一	跋吳夢予詩編	一六五
跋東坡詩草	一六一	跋松陵集三	一六五
跋孫府君墓誌銘	一六一	跋王仲言乞米詩	一六六
跋蘇魏公百韻詩	一六一	跋金奩集	一六六
跋家藏造化權輿	一六一	跋韓非子	一六六
跋三蘇遺文	一六一	跋卻掃編	一六六
跋兼山先生易說二	一六一	跋彩選	一六六
跋鄭虞任昭君曲	一六二	跋陝西印章二	一六七
跋傅正議至樂菴記	一六三	跋詩彙	一六七
跋中興間氣集二	一六三	跋秘閣續帖張長史率意帖	一六七
跋齊驅集	一六三	跋王深甫先生書簡二	一六七
跋柳柳州集	一六三	跋郭德誼墓誌銘二	一六七
跋說苑	一六四	跋郭德誼書	一六八
跋章氏辨誣錄	一六四		
跋釣臺江公奏議	一六四		

卷二十八

跋四十一首



跋後山居士長短句……………一六八

跋蘇氏易傳……………一六八

跋資暇集……………一六八

跋法帖二……………一六八

跋蘭亭樂毅論并趙歧王帖……………一六九

跋蔡肩吾所作蘧府君墓誌銘……………一六九

跋原隸……………一六九

跋京本家語……………一六九

跋李徂徠集……………一七〇

跋劉文老使君義居遺戒……………一七〇

跋無逸講義……………一七〇

跋東坡帖……………一七〇

跋東坡祭陳令舉文……………一七一

跋劉凝之陳令舉騎牛圖……………一七一

跋東坡七夕詞後……………一七一

跋張監丞雲莊詩集……………一七一

跋淵明集……………一七一

跋陸史君廟籤……………一七一

跋巴東集……………一七二

跋呂侍講歲時雜記……………一七二

跋許用晦丁卯集……………一七二

跋李涪刊誤……………一七一

跋歸去來白蓮社圖……………一七二

跋釋氏通記……………一七二

跋毛仲益所藏蘭亭……………一七二

跋魏先生草堂集……………一七三

跋王輔嗣老子……………一七三

跋前漢通用古字韻編……………一七三

跋胡少汲小集……………一七三

跋曉師顯應錄……………一七三

跋范巨山家訓……………一七三

跋張安國家問……………一七四

跋坐忘論……………一七四

跋唐盧肇集……………一七四

跋居家雜儀……………一七四

跋皇甫先生文集……………一七五

跋南堂語……………一七五

跋注心賦……………一七五

跋朱新仲舍人自作墓誌……………一七五

跋黃魯直書……………一七五

卷二十一

跋四十一首

跋蘭亭序	一七五	跋洪慶善帖	一七九
跋李少卿帖	一七六	跋蒲浪中易考解	一七九
跋樂毅論	一七六	跋陸子彊家書	一七九
跋李朝議帖	一七六	跋子聿所藏國史補	一七九
跋東方朔畫贊	一七六	跋火井碑	一八〇
跋李虞部與范忠宣公啓	一七六	跋韓晉公牛	一八〇
跋范文正公書	一七六	跋畫橙	一八〇
跋京坡帖	一七七	跋臨帖	一八〇
跋盧衷父絕句	一七七	跋米老畫	一八〇
跋四三叔父文集	一七七	跋潘幽老帖	一八〇
跋王右丞集	一七七	跋薊林帖	一八〇
跋歐陽文忠公疏草	一七七	跋陳魯公所草親征詔	一八一
跋盤澗園	一七七	跋蔡忠懷送將歸賦	一八一
跋爲琛師書維摩經	一七八	跋東坡書隨	一八一
跋東坡諫疏草	一七八	跋范元卿舍人書陳公實長短句後	一八一
跋東坡代張文定上疏草	一七八	跋謝師厚書	一八一
跋楊處士村居感興	一七八	跋雲丘詩集後	一八一
跋朱氏易傳	一七八	跋呂舍人九經堂詩	一八一
跋晁以道書傳	一七八	跋韓忠獻帖	一八一
跋嵩山景迂集	一七九	跋高大卿家書	一八一
跋任德翁乘桴集	一七九		

跋四十首

跋諸晁書帖……………一八三

跋南城吳氏社會書樓詩文後……………一八三

跋六一居士集古錄跋尾……………一八三

跋林和靖詩集……………一八三

跋米元暉書先左丞海岱樓詩……………一八三

跋蘇丞相手澤……………一八四

跋韓幹馬……………一八四

跋羲松……………一八四

跋林和靖帖……………一八四

跋東坡集……………一八四

跋陶靖節文集……………一八五

跋三近齋餘錄……………一八五

跋望江麴君集……………一八五

跋吳越備史二……………一八五

跋僧帖……………一八五

跋卿師帖……………一八五

跋松陵倡和集……………一八五

跋潛虛……………一八六

跋呂成叔和東坡尖叉韻雪詩……………一八六

跋花間集二……………一八六

跋韓晉公子母懷……………一八六

跋韓立道所藏蘭亭序……………一八七

跋龔氏金花帖子……………一八七

跋曾文清公奏議稿……………一八七

跋曾文清公詩稿……………一八七

跋魚針賦……………一八七

跋徐待制詩稿……………一八八

跋周益公詩卷……………一八八

跋樊川集……………一八八

跋周侍郎奏稿……………一八八

跋周侍郎尋姊妹帖……………一八九

跋鮑參軍文集……………一八九

跋南華真經……………一八九

跋與周監丞書……………一八九

再跋皇甫先生文集後……………一八九

跋漢文帝後元年三月詔……………一八九

跋張魏公與劉察院帖……………一九〇

跋世父大夫詩稿……………一九〇

卷二十一

跋四十七首

跋魯直書大戴踐阼篇……………一九〇

跋唐昭宗賜錢武肅王鐵券文	一九〇	跋尼光語錄	一九四
跋司馬端衡畫傳燈圖	一九一	跋程正伯藏山谷帖	一九五
跋呂伯共書後	一九一	跋張待制家傳	一九五
跋張敬夫書後	一九一	跋柳氏訓序	一九五
跋劉戒之東歸詩	一九一	跋祠部集	一九五
跋秦淮海書	一九二	跋消災頌	一九五
跋柳書蘇夫人墓誌	一九二	跋肇論	一九五
跋朱希真所書雜鈔	一九二	先楚公奏檢	一九五
跋爲子適書詩卷後	一九二	跋宗元先生文集	一九五
跋呂文靖門銘	一九二	跋韓子蒼語錄	一九五
跋傅給事竹友詩稿	一九二	跋孟浩然詩集	一九六
跋陳伯予所藏樂毅論	一九三	跋出疆行程	一九六
跋伯予所藏黃州兄帖	一九三	跋李衛公集	一九六
跋詹仲信所藏詩稿	一九三	跋徐節孝語	一九六
跋陳伯予所藏蘭亭帖	一九三	跋趙渭南詩集	一九六
跋坡谷帖	一九三	跋石鼓文辨	一九六
跋山谷書陰真君詩	一九四	跋西崑酬唱集	一九七
跋呂尙書帖	一九四	跋兼山家學	一九七
跋傅給事帖	一九四	跋淮海後集	一九七
跋熊舍人四六後	一九四	跋張季長中庸辨擇	一九七
跋臨汝志	一九四	跋法書後	一九七

跋李太白詩……………一九七

跋重廣字說……………一九七

跋巖壑小集……………一九七

跋王元澤論語孟子解……………一九七

卷二十一

墓誌銘四首

右朝散大夫陸公墓誌銘……………一九八

陳君墓誌銘……………一九九

費夫人墓誌銘……………二〇〇

曾文清公墓誌銘……………二〇〇

卷二十二

墓誌銘五首

宵陽夫人墓誌銘……………二〇四

陸孺人墓誌銘……………二〇五

浙東安撫司參議陸公墓誌銘……………二〇六

山陰陸氏女公墓誌銘……………二〇七

傅正議墓誌銘……………二〇七

卷二十四

墓誌銘四首

尚書王公墓誌銘……………二〇八

楊夫人墓誌銘……………二一三

陸郎中墓誌銘……………二二三

知興化軍趙公墓誌銘……………二二四

卷二十五

墓誌銘三首

夫人孫氏墓誌銘……………二二六

奉直大夫陸公墓誌銘……………二二七

中丞蔣公墓誌銘……………二二八

卷二十六

墓誌銘六首

呂從事夫人方氏墓誌銘……………二三一

夫人陳氏墓誌銘……………二二二

承議張君墓誌銘……………二二三

朝奉大夫石公墓誌銘……………二二三

方伯善墓誌銘……………二二四

留夫人墓誌銘……………二二五

卷二十七

墓誌銘五首

朝議大夫張公墓誌銘……………二二六

王季嘉墓誌銘……………二二九

石君墓誌銘……………二三〇

夫人陸氏墓誌銘……………二三一

程君墓誌銘……………二二二

卷二十八

墓誌銘四首

朝奉大夫直秘閣張公墓誌銘……………二二二

山堂陸先生墓誌銘……………二二五

監丞周公墓誌銘……………二二六

夫人樊氏墓誌銘……………二二九

卷二十九

墓誌銘二首

求志居士彭君墓誌銘……………二四〇

吏部郎中蘇君墓誌銘……………二四〇

墓表五首

陸氏大墓表……………二四二

詹朝奉墓表……………二四三

孫君墓表……………二四四

何君墓表……………二四五

孺人王氏墓表……………二四六

壙記一首

令人王氏壙記……………二四六

卷四十

塔銘八首

祖山主塔銘……………二四七

定法師塔銘……………二四七

良禪師塔銘……………二四八

高僧猷公塔銘……………二四八

別峯禪師塔銘……………二四九

海淨大師塔銘……………二五一

松源禪師塔銘……………二五一

退谷雲禪師塔銘……………二五二

卷四十一

祭文二十一首

皇太后靈駕發引祭文……………二五四

祭梁右相文……………二五四

祭翼參政文……………二五四

祭魯國太夫人文……………二五四

祭王侍御令人文……………二五四

祭祝永康文……………二五五

祭劉樞密文……………二五五

祭蔣中丞夫人文……………二五五

祭趙提刑文……………二五五

祭勤首座文……………二五五

祭許辰州文……………二五五

祭韓无咎尙書文……………二五六

祭胡監丞文……………二五六

祭丘運使母夫人文……………二五六

祭曾原伯大卿文……………二五六

祭大姪文……………二五七

祭十郎文……………二五七

祭朱元晦侍講文……………二五七

祭方伯蕃文……………二五七

祭張季長大卿文……………二五七

祭周益公文……………二五七

哀辭二首

尤延之尙書哀辭……………二五八

沈子壽母趙夫人哀辭……………二五八

卷四十一

天彭牡丹譜

花品序第一……………二五九

花釋名第二……………二六〇

風俗記第三……………二六一

致語六首

天申節致語三……………二六二

徐稚山給事慶八十樂語……………二六三

致語二……………二六三

卷四十二

入蜀記第一 乾道五年十二月六日起六年六月二十九日止……………二六四

卷四十四

入蜀記第二 七月一日起十六日止……………二七〇

卷四十五

入蜀記第三 七月十七日起八月七日止……………二七五

卷四十六

入蜀記第四 八月八日起二十六日止……………二八一

卷四十七

入蜀記第五 八月二十七日起十月五日止……………二八七

卷四十八

入蜀記第六 十月六日起二十七日止……………二九三

卷四十九

詞六十七首

赤壁詞……………二九八

浣沙溪二首……………二九九

青玉案……………二九九

水調歌頭……………二九九

浪淘沙……………二九九



定風波	二九九	烏夜啼八首	三〇七
南鄉子二首	二九九	真珠簾	三〇八
滿江紅二首	三〇〇	好事近	三〇八
感皇恩二首	三〇〇	卷五十一	
好事近十二首	三〇〇	詞六十三首	
鷓鴣天七首	三〇二	柳梢青二首	三〇八
驀山溪二首	三〇三	夜遊宮二首	三〇九
木蘭花	三〇三	安公子	三〇九
朝中措二首	三〇三	玉蝴蝶	三〇九
臨江仙	三〇四	木蘭花慢	三〇九
蝶戀花二首	三〇四	蘇武慢	三〇九
釵頭鳳	三〇四	齊天樂二首	三一〇
清商怨	三〇五	望梅	三一〇
水龍吟	三〇五	洞庭春色	三一〇
秋波媚二首	三〇五	漁家傲	三一〇
采桑子	三〇五	繡停針	三一〇
卜算子	三〇五	桃園憶故人五首	三一〇
於園春三首	三〇五	極相思	三一〇
憶秦娥	三〇六	一叢花二首	三一〇
漢宮春二首	三〇六	隔浦蓮近拍二首	三一〇
月上海棠二首	三〇七	昭君怨	三一〇

雙頭蓮	三二二
南歌子	三二三
豆葉黃二首	三二三
醉落魄	三二三
鵲橋仙二首	三二三
長相思五首	三二四
菩薩蠻二首	三二四
訴衷情二首	三二四
生查子二首	三二五
破陣子二首	三二五
上西樓	三二五
點絳脣	三二五
謝池春二首	三二五
一落索二首	三二六
杏花天	三二六
太平時	三二六
戀繡衾二首	三二六
風入松	三二七
真珠簾	三二七
風流子	三二七
雙頭蓮	三二七

鷓鴣天	三二七
蝶戀花	三二七

# 渭南文集

## 卷一

### 表二十一首

#### 天申節賀表

化國之日舒以長。運啓千齡之盛。天子有父母之至心。均萬萬之驪。敢卽昌期。虔申壽祝。中賀恭惟太上皇帝陛下。宅心清靜。受命傳將。協氣熏爲太平。華夷銜莫報之德。孫謀以燕翼子。宗社後無疆之休。誕敷錫於下民。丕靈承於上帝。臣方馳使傳。阻綴朝班。望睟表於雲霄。敢恨微蹤之遠。被頌聲於金石。尙希薄技之陳。

#### 會慶節賀表

有王者興。爰啓丕平之運。使聖人壽。敢忘胥戴之誠。中賀恭惟皇帝陛下。蕩乎無名。建其有極。干戈載戢。恩加遠碣之區。囹圄一空。治格成康之上。斂時百福。享國萬年。臣迹滯遐陬。心馳魏闕。紀虹燭電樞之慶。莫廁諸儒。演龍宮蕊笈之文。徒修故事。

又

帝生商而立子。有開必先。民戴舜以同心。無遠弗屆。乾端肇闢。嶽貢交修。中賀臣早以湖海之微生。親見唐虞之盛典。蓬轉逾二十年之久。每注想於冕旒。蒿呼上千萬壽之時。獨阻陪於簪笏。茲膺郡寄。復在王畿。目瞻佳氣之鬱葱。耳聽驪聲之洋溢。永言疎賤。已極光榮。恭惟皇帝陛下。煥乎其有堯文。粲然而興周道。三朝圖籍。將還榮河。溫洛之都。萬里車書。已軼碣石榆林之壤。以仁政廣華夷之德澤。以豐年奉郊廟之牲粢。凡曰含齒戴髮之傳。均被淪肌浹髓之賜。光御無疆之曆。益培有永之年。臣猥以分符。莫遑造闕。蕭韶方奏。徒傾就日之心。歌頌可陳。尙刻齊天之石。

#### 瑞慶節賀表

虹流電繞。適當聖作之辰。龍抃蒿呼。共效壽祺之祝。敢傾丹悃。仰扣睿聰。中賀恭惟皇帝陛下。德當乾符。躬有聖

瑞。東漸西被。偉聲教之混同。上際下蟠。極仁恩之滲漉。帝生商而立子。民戴舜以同心。歷考前聞。孰逾盛際。臣生逢千載。仕歷四朝。嶽貢川珍。猥預駿奔之末。鶩飛魚躍。承依洪造之中。

光宗冊寶賀表

龜食筮從。考廟方嚴於典冊。仗全樂備。都人咸覲於禮容。聖教茂昭。驪聲旁達。中賀恭惟皇帝陛下。道參穹壤。德肖祖宗。稽周王小。茲之求躬。虞帝終身之慕。父傳歸子。有光盛舉於兩朝。天定勝人。果見太平於今日。乃咨元老大臣之參訂。兼采議郎博士之討論。勒崇垂鴻。極高蟠厚。臣在列觀。龍飛之旦。紬書奏麟趾之篇。際遇特殊。等夷罕及。既莫預曲臺之議。又阻從屬車之塵。徒有悃誠。形於夢想。

皇帝御正殿賀表

肅傳清蹕。端御昕朝。德上際而下蟠。澤東漸而西被。中賀恭惟皇帝陛下。體天廣覆。如日正中。率禮無違。永歎歲月遷流之速。嚮明而治。勉答臣民愛戴之心。諷太史涓吉之辰。采奉常絲籥之議。對揚宗社之福。爰舉公卿之觴。兩曜清明。四方抃舞。臣農疇齒耄。帝所夢逸。華袞光臨。雖莫望火龍黼黻之盛。黃麾備設。尙想聞金石絲竹之音。

皇太子受冊賀表

明詔建儲。永爲宗社之本。正衙發策。顯答神祇之心。國勢奠安。輿情閭懌。中賀恭惟皇帝陛下。若稽古訓。駿惠先猷。壽考億年。誕膺不蔽之福。本支萬世。坐擁無疆之休。存心養性之事。天修身齊家而治國。迨舉有邦之慶。益昭知子之明。臣跡遠周行。心馳魏闕。命大史卜日之吉。徒聞播告之傳。遣上公持節以行。莫預觀瞻之盛。儻未辭於聖代。尙自力於聲詩。

賀明堂表

農扈屢豐。協氣方流於縣宇。合宮大享。曠儀遂舉於中天。驛置星馳。嵩呼雷動。伏以聖神在御。祈報間行。肆嚴長至之祠。一舉上辛之典。惟茲宗祀。實在季秋。既得萬國之驩心。宜罄一精之嘉薦。中賀恭惟皇帝陛下。範圍元化。斧藻太平。采皇祐之舊章。茂建中和之極。稽紹興之新制。用適古今之宜。上帝顧歆。殊休叢委。臣官廢退。微心繫明廷。考漢家紋上之圖。嗟莫陪於潤色。繼周頌我將之作。尙自力於形容。

謝明堂赦表

明堂總章。舉曠儀於定寢。鈞陳羽衛。敷大號於端闈。德協穹祇。春回海縣。中謝恭惟皇帝陛下。道繩祖武。政酌民言。乾文仰法於房心。聲稱鉅典。解澤默符於雷雨。一洗衆愆。統和天人。空虛囹圄。臣適乘使傳。遠在遐陬。奉五百里之驛書。徒深龍抃。上千萬年之聖壽。莫綴覺趨。

謝赦表

宣布仁恩。發揚孝治。觀人心之鼓舞。知天意之協從。中謝恭惟皇帝陛下。躬舜禹之資。履曾閔之行。損又損而至道。老吾老以及人。一日三朝。雖極寧親之大養。四方萬里。尙憂庶獄之亡辜。內廣惠心。旁流霈澤。雨露所被。囹圄一空。臣適以守藩。恭聞孚號。雖與民欣戴。如瞻咫尺之天。然受命禱祈。實勞方寸之地。

謝賜曆日表

春秋以王而次春。丕顯體元之妙。閏月定時而成歲。適當頒曆之辰。治象一新。歡聲四溢。中謝恭惟皇帝陛下。道兼倫制。化被堪輿。念王業之艱難。每急農桑之務。察天心之仁愛。尤深水旱之憂。誠意既孚。嘉生並應。呼嵩高之萬歲。幸覩昌期。陳泰階之六符。不勝大願。

文

詔班新曆。雖舉彝章。地近清都。獨先下拜。恩光旁燭。小已知榮。中謝臣聞堯授人時。實前民用。獲得天統。克協帝心。方當重熙累洽之盛時。宜謹體元居正之大典。恭惟皇帝陛下。凝圖丕赫。受命傳將。齊七政於璿璣。昭示太平之象。調四時之玉燭。用待來歲之宜。爰勅有司。以幸天下。臣偶叨牧養。獲與布宣。職思其憂。勸課誓殫於綿力。年運而往。功名更感於初心。

福建到任謝表

咸造在廷。甫遂朝宗之願。奉使有指。遽叨臨遣之榮。大造難名。餘生曷報。中謝伏念臣么然薄命。起自窮閭。偶以元祐之黨家。獲與紹興之朝土。真人有作。景運方開。適當守歎息人才之寶難。願一時豪傑號召而未至。首蒙引對。面錫殊科。遭逢稀闊之知。聳動邇遐之聽。豈期遽薄。旋因沉綿。卒繁全度之恩。俾獲退藏之分。侵尋半世。轉徙

兩川三爲別乘之行。再忝專城之寄。五十之年已過。非復壯心。八千之路來歸。恍如昨夢。救陳淺拙。應對參差。惟謹黜之是宜。豈超遷之敢望。此蓋伏遇皇帝陛下。道兼倫制。澤被堪輿。念臣留落有年。尙未除於狂慙。憐臣馳驅無地。空竊抱於愚忠。願雖末路之孤蹤。猶玷外臺之高選。臣謹當力思守道。深戒瘵官。禮樂遠有光華。旣大踰於素望。靖英好是正直。庶少答於鴻私。

## 江西到任謝表

疏恩趣召。摩待一人之言。改命遽行。猶備四方之使。丹衷欲敘。雪涕先傾。中謝伏念。臣稟資迂愚。立身羈貌。偶竊犁鉏之餘暇。妄窺述作之淵源。纍然自力於簡編。老之將至。過矣見稱於流輩。轉而上聞。頃入對於燕朝。實親承於睿獎。然而異恩賜第。弗由場屋之選掄。特旨造廷。非出公卿之論薦。已分亟投於閑散。豈期重累於生成。此蓋伏遇皇帝陛下。立賢無方。用人唯己。一洗拘攣之積弊。廣收魁傑之遺才。施及妄庸。亦蒙省錄。甫停追詔。還畀使旌。凡曰自結於上知。皆俾無蹈於後害。海嶽之內。織塵墜露。何所不用之。父母之愛幼子童孫。蔑以加此。驅馳入境。感懼填膺。重念臣樸學守株。孤身弔影。素乏蚍蜉蠅子之助。孰爲輪囷蟠木之容。愴餘日之安歸。抱微誠而永歎。方天子建中和之極。用告成功。雖文史近卜祝之間。亦思自效。尙憑長育。不遂棄捐。所願預草漢家檢玉之文。未敢遽同堯民擊壤之作。剝肝自訴。伏鎮何辭。疾痛飢寒。仰而呼天。誓靡求於世俗。齋戒沐浴。可以事帝。冀終望於清光。

## 嚴州到任謝表

穿延和之細仗。面咫尺之天。佩新定之左符。秩二千石。叨塵過分。感懼交懷。中謝臣聞明主恩深。書生命薄。唐帝之知李白。一官不及於生前。漢皇之念相如。遺稿徒求於身後。況如臣輩。莫望昔人。猥緣一技之卑。嘗綴百僚之末。雖筭筭久違於昕謁。乃姓名猶在於淵衷。乘傳來歸。兩奉召還之旨。懷章欲上。亟蒙趣對之榮。親降玉音。俯憐雪鬢。勞其久別。蓋寵嘉近侍之所宜。勉以屬文。實臨遣守臣之未有。茲蓋伏遇皇帝陛下。睿謨冠古。英斷如神。肆筆成書。千載獨高於聖學。刺經作制。諸儒絕企於清光。以臣夙被化於明時。憐臣未廢書於晚歲。將激昂其素志。故闡略於往愆。臣敢不戴使愚使過之恩。念有社有民之寄。憩棠陰而聽訟。期無墜於家聲。及瓜戍而代歸。尙少酬

於君賜。

除寶謨閣待制謝表

陪衆雋以登瀛。已慙薄陋。扈六飛而上雍。遂踐高華。恩重命輕。感深涕賢。中謝伏念。臣材非異稟。家本至寒。蒼雅遺書。守先臣之孤學。莊騷奇作。誦諸老之舊聞。竊慕隱居求志之風。尤恥譁世取名之事。年運而往。道阻且長。仕止爲貧。適遇四朝之盛際。老猶不死。遂爲六聖之遺民。豈期垂蓋之時。更被非常之遇。置之儒館。命以書信。特寬尸素之重誅。不待汗青而加賞。茲蓋伏遇皇帝陛下。道兼倫制。學備誠明。體穹穹厚厚之仁。躋蕩蕩巍巍之治。風行霄動。號令靡隔於幽遐。魚躍鳶飛。人材不遺於疏賤。雖耄期之已迫。尙覆育之愈深。臣敢不口誦訓辭。心銘德澤。入預甘泉之筆彙。儻效微勞。歸尋杜曲之桑麻。終祈洪造。

轉太中大夫謝表

信史奏篇。獲紀兩朝之盛。恩書馳驛。躡躡四品之崇。方醴賞之既行。欲牢辭而弗敢。始終忝幸。俯仰兢慙。中謝伏念。臣身出窮閭。家承孤學。披肺肝而自力。雖有素懷。賜骸骨以歸休。已更累歲。昨被出綸之命。起參載筆之遊。強旣昏廢。忘之餘。均筆削討論之責。食常忘事。但憂尸素之當誅。成本因人。乃以汗青而受寵。茲蓋伏遇皇帝陛下。奉先思孝。守位曰仁。夙受命於皇天。克肖其德。肆纂圖於列聖。無疆惟休。永懷弓劍之藏。每切築牆之慕。爰求遺老。俾誦舊聞。而臣猥以耄期。恭承削勉。愴大父詩書之業。久已寂寥。讀元豐文獻之言。至於感泣。雖迫蓋棺之日。敢忘結草之酬。

謝致仕表

持囊甘泉。已竊逢辰之幸。挂冠神武。又叨歸老之榮。加恩俯念於耄年。延賞特頒於申命。伏讀絲綸之語。曷勝犬馬之情。中謝伏念。臣家本窮閭。世承孤學。雖遇千齡之盛際。初無一日之微勞。白首光陰。躡冠登瀛之選。青雲步武。亟陪上雍之班。屬預奏於信書。遂祈歸於故里。奉祠雖佚。竊食靡安。茲游貢於忱辭。始恭承於俞旨。至於特捐異數。增賁賈門。願令么微。獲被榮耀。茲蓋伏遇皇帝陛下。仁參化育。道極範圍。繼粟繼肉。以養賢才。祝鯁祝噎。以禮耆耄。思正元之朝士。寤寐不忘。念山陰之老人。生存無幾。越拘攣於令甲。聳觀聽於薦紳。簡編有光。世類知勸。



而臣抱病牀第。絕望闕廷。賤患何能。亦忝及親之祿。素風未墜。豈無報國之期。

落職謝表

叨榮罪大。念舊恩深。僅鐫筆橐之華。猶保桑榆之景。仰慙鴻造。下愧公言。中謝伏念。臣本出故家。初無他技。每自求於遠宦。豈有意於虛名。命之多艱。動輒爲累。強起僅餘於數月。退歸又閱於六年。齒豁頭童。心勤形瘵。叫闕請命。蒙恩久許。其乞骸飾巾待終。視世已同於逆旅。敢謂寬平之邦憲。尙令斲盡於里居。此蓋伏遇皇帝陛下。勵精大猷。惠養遺老。念臣生當全盛。被六聖之涵濡。憐臣仕遇中興。荷三宗之識拔。雖名薄責。益示殊私。臣敢不祗誦訓詞。痛懲宿負。尸居餘氣。永無再瞻軒陛之期。老生常談。莫敘仰戴丘山之意。

逆職授首稱賀表

天無私覆。實均父母之仁。邦有大刑。爰下風雷之令。英斷若神明之速。成功無晷刻之淹。氣稜澄清。頌聲洋溢。中賈臣伏以高皇有作。王室中興。方犬戎窺蜀。以憑陵。賴驍將奮身而守衛。念功無已。分閭相承。仰累朝寵數之非常。雖舉族糜捐而曷報。豈圖小醜。自取參夷。僭服自如。攻元無憚。受封割地。已北通獯鬻之庭。置戍奪符。欲東扼瞿唐之險。罪不勝於擢髮。誅寧貸於闔門。肆推曠蕩之恩。實自聖神之造。恭惟皇帝陛下。德配天地。功光祖宗。覽圖籍而動容。每念兩京之未復。奉廟祧而竇涕。不忘九世之深讐。蠢茲雛卵之微。自投鼎鑊之地。人情共憤。天討遂加。蒞醢以賜諸侯。雖特寬於漢法。頭顱之行萬里。已大震於戎心。遙知羣醜宵遁之餘。無復竝塞秋防之警。臣身歸南陌。名寓西清。馳驛四傳。徒快鯨鯢之戮。造朝旅賀。莫趨鸞鷲之班。

牋七首

光宗冊寶賀太皇太后牋

諏穀旦於清臺。著龜允協。奉鴻稱於考廟。典冊有嚴。慶饗重闈。驪騰函寓。恭准太皇太后殿下。道同先后。德著累朝。闡天下義理之深。體坤元光大之盛。密扶睿斷。纂修列聖之治功。備述先猷。啓迪一人之達孝。舉時大典。紹國成規。臣斂迹還東。馳心拱北。紳綏雜遝。遙瞻濟濟之賀班。宮闕岩峩。徒寄區區之夢境。

皇帝御正殿賀皇后牋

聖治聿新。爰正路朝之御。邦儀丕舉。實繫內助之功。盛典告成。函生胥慶。恭惟皇后殿下。道隆任嬖。化洽邦家。方當寧之朝羣臣。惟聖時克。宜中壺之介萬壽。與天同休。內騰六寢之驪。外副萬方之望。臣久遠近著。獲遇昌辰。聽九賓之臚。莫陪抃舞。望五雲之宮闕。徒極傾輸。

皇帝御正殿賀皇太子牋

清蹕肅九賓之儀。方臨當守。寶觴奉萬壽之祝。允屬儲宮。邦家有光。華裔同慶。恭惟皇太子殿下。道隆孝友。性極誠明。以大學爲家傳。一洗俗儒章句之陋。以密贊爲子職。豈獨寢門櫛緝之恭。相此多儀。實先百辟。某久嬰沉疾。已迫頽齡。想廣殿之崇嚴。莫陪稽翼。占前星之明潤。徒極傾馳。

皇太子受冊賀皇后牋

壺政憂勤。協贊上聖。登三之治。母慈願復。遂開東宮。明兩之祥。汗簡光華。函生鼓舞。恭惟皇后殿下。道光圖史。化被宮闈。嗣先后之德音。體柔祇之厚載。媯汭之降二女。允謂盛時。周臣之止九人。實資內助。迨此建儲之命。益知儷極之尊。臣自去通班。久安故里。頽齡耄矣。莫陪執玉之趨。鉅典煥然。不勝拭目之喜。

賀皇太子受冊牋

父慈子孝。集大慶於我家。日吉時良。發正衙之顯冊。國勢重於九鼎。驪聲達於四方。恭惟皇太子殿下。秉德淳明。宅心虛靜。英姿達識。事洞照於幾先。強記博聞。言必稽於古訓。躬守累朝仁恕之訓。日侍兩宮。粹穆之顏。歷考古初。實爲創見。某夙叨四品。垂及九齡。爲國老農。莫筮濟濟。鸞之列。逢時盛典。尙懷區區犬馬之心。

逆職授首賀皇太后牋

叛臣干紀。敢萌負固之心。密詔行誅。不待崇朝之久。慶關宗社。喜溢宮庭。臣伏以參井之墟。古今重地。方高帝東巡之始。竇羣胡南牧之秋。爰有驍雄。服勞疆圉。惟列聖念功之意。每示優隆。度故臣誓報之心。豈有窮已。蠢茲微孽。亦荷異恩。入居宿衛之聯。出任師干之寄。天所助者順。乃懷悖逆之圖。人不食其餘。自撥殲夷之譴。尙全遺族。實出上恩。恭惟皇太后殿下。坤厚資生。母儀燕翼。每道先朝之家法。助成聖主之性仁。慰在天之靈。故誅其孽。

而無赦。廣及物之澤。故宥其族而弗疑。臣久屏窮閭。猶叨近侍。用三有宅。欣逢湯德之寬。於萬斯年。莫預堯封之祝。

逆職授首賀皇后牋

逆臣負固。上貽正守之憂。密詔行誅。不待靈旗之指。勳高古昔。喜溢宮庭。伏以分闈專征。本倚世臣之舊。野心巨測。輒干邦憲之嚴。妖禽自取於覆巢。靡草獨枯於長夏。尙加矜貸。曲示涵容。故雖同產之親。止用徙鄉之典。恭惟皇后殿下。道光媯汭。德配坤元。侍膳慈闈。克謹晨昏之奉。焦心中壺。每分宵旰之勞。及此成功。允爲大慶。聳裔夷之觀聽。增竹帛之光華。臣久已歸耕。莫陪入賀。身修家齊。國治實由內助之功。天時地利。人和行覩外攘之烈。

卷二

南宮表牋一二十五首

丞相率文武百僚請建重明節表

飛龍在天。方仰君臨之德。流虹繞楮。實開聖作之祥。宜記昌辰。用彰盛際。恭惟皇帝陛下。承謨丕顯。受命禪將。致養三宮。備本朝之家法。參決萬務。得率土之民心。正午初臨。積陰頓解。於赫明離之象。益昭出震之符。臣等不勝大願。請以九月四日爲重明節。伏望皇帝陛下。俯察羣情。亟頒俞旨。施尊名。建顯號。俟穹昊發祥之期。披皇圖。稽帝文。仰臣民歸美之報。著之令甲。副在有司。邦家增光。天下幸甚。

又

受命若帝之初。宜邦彛之悉舉。盛德如天之覆。豈人欲之或違。比罄忱辭。願標令節。未回聰聽。曷慰羣情。伏以紀千秋之名。雖由唐舊。允長春之請。則在宋興。況今非獨循累代之成規。蓋亦以此侈重華之大慶。顯號缺而未請。盛旦鬱而弗彰。謙雖益光。禮則未稱。伏望皇帝陛下。茂昭鉅典。亟發德音。漢殿尊榮。親奉玉卮之壽。周行拊蹈。各陳金鑑之書。豈惟光簡冊之傳。實以副天下之望。

又

淵聽未回。確爾執謙之意。忱辭屢叩。款然歸美之誠。彝典不可以久稽。衆心不可以屢拂。敢控鳴喙之請。再干穆穆之光。竊以民之戴君。自古有訓。禮之飾治。後世尤詳。惟大德得其名。故因誕彌而紀節。雖先王未之有。亦容增益之。隨時。當睹虹樞電之辰。受岳貢川珍之集。乃同常日。夫豈人情。今者博士議郎。固執於廷。秩宗奉常。各揚其職。必期得請。疇敢自安。伏望皇帝陛下。聖度兼容。大明委照。帝辭三祝。足昭挹損之懷。臣同一心。終冀允俞之命。

### 立皇后丞相率文武百僚稱賀壽皇表

北宮修仗。方瞻與子之明。中禁正名。復奉齊家之訓。化行縣宇。驪動羣心。中賀恭惟至尊壽皇皇帝陛下。盛德日新。聖圖天廣。雖名持守。躬創業垂統之艱。不憚憂勤。示詒謀燕翼之法。乃者獨觀道妙。將就葆頤。猶崇朝親發於德音。謂初政莫先於內治。茂建靈則。所以垂萬世之典常。大明人倫。所以移四方之風俗。臣等獲塵朝著。親奉睿謨。發冊昕廷。共仰光華之典。稱觴廣殿。益深抃舞之情。

### 賀皇帝表

寶運紹開。椒塗首建。典冊以時而告具。蕃龜協吉而弗違。慶集宮庭。懽傳海宇。中賀伏以聖人有作。追參堯舜禹之盛時。靈範增光。上配姜任。似之至德。矧惟內助。始自初潛。稽女史彤管之言。廣周南關雎之化。茲正中宮之位。號實出壽皇之訓。謨。玉音誕敷。汗簡登載。求於前世。邈矣未聞。顧家國之榮懷。宜神祇之安樂。恭惟皇帝陛下。仁參蒼昊。德被黔黎。永惟大學齊家之端。先誠其意。推原春秋謹始之義。以御千邦。故當天臨之初。務先坤載之厚。臣等身逢華旦。目覩彌文。燕至和謀。行慶則百男之祐。雞鳴問寢。敢祝於萬年之休。

### 賀皇太后后牋

聖子問安。方極蘭陔之養。神孫正內。聳新椒掖之華。母道彌尊。人情溢喜。中賀恭惟皇太后殿下。抱神以靜。藏心於淵。德修螭蟠。蠅渡之中。化行崑崙。崑崙磅礪之外。唐虞盛際。迺出一家父子之親。任姒徽音。仍見三朝婦姑之法。方且享宗社奠安之福。視本支蕃衍之祥。於古有光。與天無極。臣等幸逢熙運。獲綴清班。至哉坤元。寶首彝倫之敘。養以天下。益觀孝治之隆。

### 賀壽成皇后牋

盛德繼承。爰本親傳之妙。中宮崇建。式光就養之尊。慶集禁庭。驪傳海宇。中賀恭惟壽成皇后殿下。婦功飭備。母道含洪。躬老氏之儉慈。享周家之福祿。密贊乾剛之斷。神器有歸。助成離照之明。天心允答。惟每思於靜順。故備極於安榮。袞龍兼綵服之紵。綸翟煥玉卮之奉。貴無倫敵。日以舒長。簡冊燁其有光。風俗爲之丕變。臣等偶逢熙運。獲相多儀。坤順承天。喜徵音之克嗣。孫又有子。知壽祉之無窮。

賀皇后儀

誕受丕基。方正寧凝。旒之始。協修陰教。舉路朝發冊之儀。厚載有光。羣情咸悅。中賀恭惟皇后殿下。慶鍾勳閭。道媿皇家。輔佐積勤。實自龍潛之日。休祥有衍。早符熊夢之占。壽皇所以親發於德音。聖主所以深資於內助。副笄奉三殿之養。大練受六宮之朝。震耀簡編。感移風俗。臣等預聞鉅典。實激歡悰。法地所以法天。仰戴坤儀之至德。事母同之事父。曷勝繫抃之微誠。

文武百僚謝春衣表

寶運紹開。方謹人時之授。寵光下逮。俾均春服之成。榮被簪紳。歡騰拜舞。中謝恭惟皇帝陛下。凝圖丕赫。撫運重熙。租稅所儲。靡專一己之奉。寒暑有賜。式厚羣臣之恩。所以恤其澣濯之私。蓋將責其忠嘉之報。雖舊章之是舉。實初政之當先。臣等獲綴班聯。恭承錫予。去女工之蠶。已觀府庫之充。遺天下之衣。願廣乾坤之施。

重明節明慶寺丞相率百僚啓建道場疏

開起

乾端澄肅。時爰及於杪秋。離照光明。運方隆於中夏。敢輸誠悃。仰祝壽齡。皇帝陛下。恭願宜君宜王。時萬時億。泰元增漢帝之筮。配天其休。洪範錫禹之嘏。與民同福。

備敬

肅霜協令。方觀萬寶之成。繞電告祥。實契千齡之會。飭供既周於月律。殫誠爰集於廷紳。冀憑薰被之勤。仰報照臨之德。皇帝陛下。恭願政敷有截。壽格無疆。天地人之三才。共扶輿運。嘉舜禹之一道。永芘函生。

進疏

大易明兩作離。允符繼照之盛。太極函三爲一。誕擁無疆之休。壽何待於禱祠。運自臻於熙洽。恭瀆仙真之秘旨。寶輸臣子之至情。皇帝陛下。恭願化冒羣倫。洽偕邃古。奉親備天下之養。履位處域中之尊。至誠之道。可以前知。方卜億萬年之永命。諸福之物。莫不畢至。豈止百千所之上聞。

### 會慶節明慶寺丞相率百僚啓建道場疏

開起

有開必先。天地肇興於景運。無遠弗屆。華夷畢効於貢琛。況在周行。敢稽壽祝。至尊壽皇聖帝陛下。伏願道超古昔。化洽黔黎。端居無黃屋之心。既高揖遜。萬乘致綵衣之養。彌極尊榮。

滿散

電樞肇紀。適逢震夙之期。月琯告周。沅罄延鴻之禱。雖嘉祥之自至。願歸美之敢稽。至尊壽皇聖帝陛下。伏願福等河沙。壽踰劫石。堯仁舜孝。治功永煥於青編。天大佛尊。晬表長臨於黼辰。

進疏

天爲羣物之祖。可謂極尊。壽居五福之先。實歸上聖。脫屣親傳於大寶。頤神方御於殊庭。敢率羣倫。恭培睿算。至尊壽皇聖帝陛下。伏願誕膺戩穀。端拱穆清。以八千歲而爲春。永享舒長之景。卜七百年而過曆。茂隆貽燕之祥。

### 文武百僚謝冬衣表

霜露既降。著孟冬始裘之文。法制具存。舉九月授衣之令。進趨檐翼。拜舞光華。中謝恭惟皇帝陛下。大度并包。至仁滲漉。及是月也。初有祁寒之虞。念無衣兮。俾膺好賜之厚。疏恩榮於在列。斥府庫之餘藏。臣等誤荷選掄。獲露錫予。覩萬界農桑之業。共樂時平。誦羣臣幣帛之詩。誓圖忠報。

### 會慶節丞相率文武百僚賀壽皇表

錫羨無疆。丕顯生商之旦。成功不處。適當命禹之時。熙運親逢。羣情胥慶。中賀恭惟至尊壽皇聖帝陛下。仁涵動植。道配堪輿。詩書所稱。何有加。卓爾規模之大。唐虞之際。斯爲盛。超然揖遜之風。積勤致王業之成。端拱視天民之阜。豈特極高而蟠厚。固已勒崇而垂鴻。臣等誤冀周行。久陶聖化。蓬萊隔弱水三萬里。獲進謁於殊庭。上古有

大椿八千秋。冀默符於睿算。

丞相率文武百僚賀至尊壽皇聖帝冬至表

化國之日舒以長。一陽初復。天子之父母之至。萬壽維祺。亞歲肇新。羣心胥悅。中賀恭惟至尊壽皇聖帝陛下。道兼倫制。化極範圍。剛長而亨。周測土圭之景。功成則退。堯無黃屋之心。薰然慈孝之兼隆。允矣古今之莫及。方且內享視膳問安之大養。外騰重熙累洽之頌聲。風動華夷。光昭竹帛。臣等幸逢盛際。獲造斯廷。斗建子以定時。是爲嘉會。星拱辰而在列。同罄丹誠。

丞相率文武百僚賀皇帝冬至表

一之日以授時。黃鐘合律。萬斯年而介福。赤伏膺符。慶集邦家。驪騰海寓。中賀恭惟皇帝陛下。仁同乾覆。道協時乘。且復日以重光。邦圖有永。新又新而不倦。帝德難名。默觀造化之機。自得財成之妙。清心省事。成歸根本之功。任賢去邪。體進陽消陰之象。臣等幸逢熙運。獲適威顏。和氣先回。豈待葭灰之應。豐年已兆。敢陳雲物之占。

丞相率文武百僚請皇帝聽樂表

祖廟寧神。歲序更於燧火。禮經有制。時當備於簫韶。敢控微衷。上千淵聽。伏以中月而禪。壽皇已循不易之規。逾年改元。聖主方受惟新之命。儻未舉鈞天之奏。何以慰率土之懷。伏望皇帝陛下。俯察忱辭。仰稽故典。欲聞五聲八音六律。以復朝廷之常。親帥三公九卿諸侯。共致慈闈之請。笙鏞以間。而人神喜。琴瑟在御。而心體安。茂昭庶政之惟和。孰謂太平之無象。奉萬年之觴於廣殿。及此首春。撞千石之鐘於大庭。震於四海。

丞相率文武百僚賀皇太后受冊牋

獻歲發春。太史奏元龜之吉。展采錯事。東朝慶大典之成。佳氣一新。驪聲四溢。中賀恭惟壽聖皇太后殿下。聰明睿智。壽富康寧。踐履艱難。佐高廟廓清之烈。遵行恭儉。啓壽皇詒燕之圖。肆因初元。祇奉顯冊。覆篆蟲魚之古。樂陳鐘磬之和。內而百官有司。方屏息而觀盛事。外則萬方黎獻。咸拜手而頌閔休。載稽前聞。可謂盡美。臣等偶叨在列。獲際升平。有子而又有孫。共仰本支之盛。視今猶之視昔。前知竹帛之傳。

丞相率文武百僚賀壽成皇后受冊牋

宮壺塗椒。德配重華之盛。冊書鑲玉。禮行路寢之嚴。聖孝益隆。輿情交慶。中興恭惟壽成皇后殿下。儉慈性稟。柔順躬行。至哉坤元。象服早光於內治。養以天下。寢門方奉於母儀。今者稽參六籍之文。博盡諸儒之議。建此顯號。邁於前聞。仰惟貴無敵而富無倫。是謂仁之至而義之盡。臣等偶緣在列。獲遂逢時。紀媯汭塗山之與。幸窺簡牘。繼生民思齊之作。尙播聲詩。

丞相率文武百僚上皇帝賀三殿受冊表

重慶有光。仰東朝之慈愛。雙親竝奉。極北內之尊榮。正歲肇新。彌文告備。邦家之喜。夷夏所同。中贊伏以堯舜禹之相承。蓋非一姓。姜任姒之善繼。又不同時。參稽前聞。孰擬昭代。恭惟皇帝陛下。奄有萬寓。統和三靈。由至公大義。膺寶運之傳。講祿威盛容。伸天下之養。太史灼龜而獻兆。曲臺縣絕而具儀。黃麾之仗。夙陳。簪紳在列。白玉之冊。時舉。金石充庭。既已隆孝道而通神明。固將禮高年而厚風俗。新又新而進德。老吾老以及人。臣等誤被選掄。獲塵班著。雖潤色討論於大典。每慙稽古之疎。然登降跪拜於路朝。實竊逢辰之幸。

丞相率文武百僚賀壽皇正旦表

道妙混成。太極著兩儀之本。天端更始。三朝受萬國之歸。慶集有邦。歡騰率土。中贊恭惟至尊壽皇聖帝陛下。濬哲稽古。清明在躬。握乾符。闡坤珍。難名蕩蕩之德。系唐統。接漢緒。誕受丕丕之基。以海宇之富。而蹈巢由高世之風。以父子之親。而行堯舜曠代之事。迨此獻歲發春之日。實繫考圖數亥之時。史冊增華。搢紳太息。臣等幸承睿獎。獲覩昌期。鵬行畢集於大庭。共喜威顏之近。龍袞恪趨於小次。更知榮養之尊。

丞相率文武百僚賀皇帝正旦表

堯授舜。舜授禹。方瞻繼照之明。正次王。王次春。茂舉履端之慶。乾坤開闢。日月光華。中贊恭惟皇帝陛下。德上際而下蟠。化東漸而西被。政元定號。稽列聖之舊章。發政施仁。撫重熙之景運。內有可封之俗。外無不諫之戎。方且采諸儒之議。以制朝儀。陳九奏之音。以爲親壽。頒朔靡殊於遐邇。受圖高拱於穆清。治功卓然。海內幸甚。臣等謬膺睿獎。獲綴通班。戮力同心。永惟春秋五始之儀。拜手稽首。敢奏天子萬年之壽。



卷二

劄子十首

蠟彈省劄癸未二月二府請至都堂撰

朝廷今來特博大信。明大義於天下。依周漢諸侯及唐藩鎮故事。撫定中原。不貪土地。不利租賦。除相度於唐鄧海泗一帶置關。依函谷關外。應有據以北州郡歸命者。即其所得州郡。裂土封建。大者爲王。帶節度鎮撫大使。賜玉帶金魚。塗金銀印。其次爲郡王。帶節度鎮撫使。賜笏頭金帶金魚。塗金銅印。仍各賜鐵券旌節門戟。從物。元係蕃中姓名者。仍賜姓名。各以長子爲節度鎮撫留後。世世襲封。永無窮已。餘子弟聽奏充部內防團刺史。亦令久任。將佐比類金人官制。升等換授。其國置國相一員。委本國選擇保奏。當降真命。餘官准此。七品以下聽便宜辟除。土地所出。竝許截留。充賞給軍兵祿養官吏等用。更不上供。每歲正旦一朝。三年大禮一助祭。如有故聽遣留後或國相代行。天申會慶節。止遣國官一員將命。應刑獄生殺。竝委本國照紹興勅令。參酌施行。更不奏案。合行軍法者。自從軍法。四京各用近畿大國兼充留守。朝廷惟於春季遣使朝陵。餘時止用本處官吏侍祠。每遇朝貢。當議厚給茶綵香藥等充回賜。以示撫存。遇一國有警急。諸國迭相救援。如開斥生地。俘獲金寶。竝就賜本國。仍永不置監司帥臣。及監軍等官。候議定。各遣子弟一人入覲。當特賜燕勞畢。即時遣回。機會之來。時不可失。各宜勇決。以稱朝廷開納之意。

論選用西北士大夫劄子

臣伏聞天聖以前。選用人才。多取北人。寇準持之尤力。故南方士大夫沉抑者多。仁宗皇帝照知其弊。公聽竝觀。兼收博采。無南北之異。於是范仲淹起於吳。歐陽修起於楚。蔡襄起於閩。杜衍起於會稽。余靖起於嶺南。皆爲一時名臣。號稱聖宋得人。之盛。及紹聖崇寧間。取南人更多。而北方士大夫復有沉抑之歎。陳瓘獨見其弊。昌言於朝。曰。重南輕北。分裂有萌。嗚呼。瓘之言。天下之至言也。臣伏觀方今。雖中原未復。然往者衣冠南渡。蓋亦衆矣。其間豈無抱才術。蘊器識者。而班列之間。北人鮮少。甚非示天下以廣之道也。欲望聖慈命大臣近臣各舉趙魏齊

魯秦之遺才。以漸試用。拔其尤者而任之。庶上遵仁祖用人之法。下慰遺民思舊之心。其於國家。必將有賴。伏惟留神省察。取進止。

### 代乞分兵取山東劄子

臣等恭覲陛下特發英斷。進討京東。以爲恢復故疆。牽制川陝之謀。臣等屢侍清光。親奉睿旨。不勝欣抃。然亦有惓惓之愚。不敢隱默者。竊見傳聞之言。多謂虜兵困於西北。不復能但京東。加之苛虐相承。民不堪命。王師若至。可不勞而取。若審如此說。則弔伐之兵。本不在衆。偏師出境。百城自下。不世之功。何患不成。萬一未至。盡如所傳。虜人尙敢旅拒。遺民未能自拔。則我師雖衆。功亦難必。而宿師於外。守備先虛。我猶知出兵京東。以牽制川陝。彼獨不知侵犯兩淮。荆襄。以牽制京東邪。爲今之計。莫若戒敕宣撫司。以大兵及舟師十分之九。固守江淮。控扼要害。爲不可動之計。以十分之一。遴選驍勇有紀律之將。使之更出迭入。以奇制勝。俟徐鄆宋亳等處撫定之後。兩淮受敵處少。然後漸次那大兵前進。如此。則進有闢國拓土之功。退無勞師失備之患。實天下至計也。蓋京東去虜巢萬里。彼雖不能守。未害其疆。兩淮近在畿甸。一城被寇。尺地陷沒。則朝廷之憂復如去歲。此臣所以夙夜憂懼。寢不能瞑。而爲陛下力陳其愚也。且富家巨室。未嘗不欲利也。然其徒欲賈子遠者。率不肯以多貲付之。其意以爲山行海宿。要不可保。若傾囊而付一人。或一有得失。悔其可及哉。此言雖小。可以喻大。願陛下留神察焉。臣等謬蒙聖慈。待罪樞筦。攻守大計。實任其責。伏惟陛下照其愚忠。臣等不勝幸甚。取進止。

### 上二府論事劄子 壬午六月五日

某伏見大理寺奏北界蒙城縣官邢珪罪狀。竊緣有司之職。據其侵犯邊城。殺害義旅。雖置極典。未足當罪。然旣已具奏。則當有特旨。恐與有司之議不可同日而語。何者。有司謹守律令。朝廷當斷以大義故也。按邢珪生於涿。易。非祖宗涵養之人。仕於僞界。非國家祿使之吏。身有官守。一旦危急。力雖不及。猶能死守。雖憚於逆順。不知革面。然春秋之義。天下之善一也。若遂誅之。恐非所以勸天下之爲人臣者。奏陳之際。儻爲一言。貸其草芥微命。以示中國禮義。實非小補。又慮議者以謂張安國殺耿京事。與此略同。恐啓寬貸之路。無以慰歸附之人。則某謂不然。張安國中國人。又嘗受旗榜招安。見利而動。賊殺耿京。反覆奸猾。罪惡明白。與珪實爲不類。兼邢珪所犯。在未

被大赦蕩滌之前。張安國所犯。在已受旗榜招安之後。伏乞鈞察。

上殿劄子三首壬午十一月

臣恭惟陛下天縱聖智。生知文武。御極之初。內出大號。所以加惠於海內。甚渥。猶以爲未足也。乃八月戊子。寬恤之令繼下。至誠惻怛。纖悉備具。歡欣之聲。達於遠邇。可謂盛矣。然今既累月。不知有司皆已推而致之民乎。若猶未也。是不免爲空文而已。無乃不可乎。又有大不可者。陛下初卽大位。乃信詔令以示人之時。前日數十條。或曰當寘典憲。或曰當議根治。或曰當議顯戮。可謂丁寧切至。赫然非常之英斷也。若復爲官吏將帥一切翫習。漫不加省。一旦國家有急。陛下詔令戒救之語。將何加此。而欲使人捐肝腦以衛社稷乎。周官冢宰。以正月之吉。始和布治於邦國。都鄙垂象之法。徇以木鐸。曰。不用法者。國有常刑。正月。周正。今之十一月也。正歲夏正。今之正月也。自十一月至正月。若未甚久而申敕告戒。俟以刑辟。已如此其嚴。今命下累月。而有司或恬然不以爲意。臣竊惑之。欲望聖慈。以所下數十條者。申諭中外。使恪意奉行。毋或失墜。仍命諫官御史及外臺之臣。精加考覈。取其尤沮格者。與衆棄之。不惟聖澤速得下究。亦使文武小大之臣。聳然知詔令之不可慢。如此。實聖政之所當先也。伏惟留神省察。取進止。

又

臣聞夏尙忠。商尙質。周尙文。三者迭用。非以爲異。因時制宜。有不得不然者。臣竊觀太祖太宗之世。法度典章。廣大簡易。律令可以禁奸。無滋彰之患。文移可以應務。無叢委之弊。君臣上下。如家人父子。論說徑直。誠意洞達。所詳者大。所略者小。事易舉。功易成。其氣象風俗。人物議論。至於今可考也。太平既久。日趨於文。放而不還。末流愈遠。浮虛失實。華藻害道。雖號爲粲然備具。而文移書判。增至數倍。居官者窮日之力。實不暇給。猾吏奸人。乘隙以逞。其始也。所詳者小。所略者大。其極也。并小者不復能詳。則一切鹵莽。聽吏之所爲而已。太上皇帝中興大業。當宁歎息。思有以救之。於是漸加訂正。以還其舊。兩省復通爲一。以革迂滯之風。寺監幾省其半。以去支離之害。簡禮容。刪律令。規模措置。蓋欲悉除繁文。復從祖宗之質。而後已。有司奉承。未能盡如本指。此陛下今日所當力行。不可緩也。臣愚欲望聖慈。明詔輔臣。使帥其屬。因今六曹寺監百執事所掌。講求祖宗舊制。以趨於廣大簡易之

域繁碎重復無益實事者一皆省去使小大之臣咸有餘力以察奸夫蠹修舉其職則太平之基自此立矣元祐中司馬光請改三省職事一如昔日中書之制蘇轍亦請收昔日三司之權悉歸戶部則臣所謂因今所掌以求祖宗舊制誠不爲難願陛下力行何如爾千冒天聽伏深戰慄取進止

又

臣竊觀周自后稷公劉以來積德深遠十世長久爲之子孫者宜皆取法焉然而獨曰儀刑文王又曰儀式刑文王之典漢自高帝創業其後嗣亦多賢君然史臣獨曰漢言文景美矣至武帝之功烈猶以不遵文景之恭儉爲恨唐三百年一祖三宗皆號盛世而太宗正觀政要之書獨傳寶以爲大訓元祐中學士范祖禹亦曰祖宗畏天愛民子孫皆當取法惟仁宗在位最久德澤深厚結於天下誠能專法仁宗則成康之隆不難致也嗚呼祖禹之言天下之至言也迨我太上皇帝躬履艱難慨然下詔專法仁祖之政且竊聞燕閑惟考觀仁祖政事是以於萬斯年無疆惟休亦享仁祖垂拱之福可謂盛矣陛下紹休聖緒正當師太上專法仁祖之意申命躋英進讓之臣日以寶訓反覆敷繹以究微意仍命輔臣政事法度一以仁祖爲法臣將見陛下福祿川至治效日見年穀屢豐四夷率服慶曆皇祐之盛復見於今雖遐方絕壤皆當梯航而至矣况中原故地其有不復者哉臣不勝至願伏惟聖慈留神省察取進止

擬上殿劄子壬午准備輪對會內補送不果上

臣觀小毖之詩見成王孜孜求助特在初載意其臨天下之久閱義理之多則當默識獨斷雖無待於羣臣可也及考之書然後知其不然舜伐三苗年九十有三鬲伯益一言則退而敷文德舞干羽無一毫自用之意武王受貢粢年九十有一召公作訓累數百言武王納之不以爲過嗚呼爲人臣而不以舜武王望其君者不恭其君也伏以陛下生知之聖度越百王稽古之學博極墳典歷試諸難身濟大業更事閱理多矣自公卿大臣皆陛下四十年教養所成況於小儒賤士見聞淺陋曾何足以仰清光備顧問哉然其所陳則未必無尺寸之長何者舉吏部之籍擢紳之士幾人其得見君父者幾人白首州縣而不得一望闕門者多矣則凡進見之人固宜夙夜殫思竭誠以幸千載之遇雖其間有論事梗野不遠大體者究其較心亦願際會犯威顏以徇俗捨富貴以取名臣竊

謂無是理也。欲望陛下昭然無量疑於聖心。克己以來之。虛心以受之。不憚捨短而取長。以求千慮之一得。庶幾下情得以畢達。羣臣無伯益召公之賢。陛下以舜武王之心爲心。則是聖德巍巍。過於舜武王矣。如其屈萬乘之尊。躬日昃之勞。顧於疎遠之言。無大施用。姑以天地之度容之而已。是獨言者一身之幸也。干冒天威。臣無任惶怖俟罪之至。

## 上二府乞勿受慶雲圖劄子癸未春

伏覩尙書省劄子。知閬州呂游問奏慶雲見并圖一軸。奉聖旨降付編類聖政所。仰見主上聖孝。推美太上皇帝之心。然竊聞太上皇帝建炎之初。京東進芝草。親詔却之。盛德煌煌。光映簡冊。今乃以慶雲見爲聖政。恐非太上皇帝之本意。兼閬州所奏。專以慶雲見於普安郡。及在主上即位前一日。爲受命之符。諛佞牽合。不識大體。政與京東芝草相類。若受而不却。雖不報行。其誰不知。深恐自此草木之妖。氛氣之怪。緯候之說。歌頌之文。紛紛來上。却之則自起其端。不却則遂將成俗。欲望鈞慈以太上皇帝却芝草故事。委曲奏陳。主上剛明英斷。必有以處此矣。干冒鈞嚴。不勝恐怖之至。

## 上二府論都邑劄子

某自頃奏記。迨今累月。自顧賤愚不肖。無尺寸可以上補聰明。而徒以無益之事。上勤省閱。實有罪焉。故久不敢以姓名徹左右。今者偶有拳拳之愚。竊謂相公所宜聞者。伏冀少留觀覽。幸甚幸甚。伏聞北虜累書請和。仰惟主上聖武。相公威名。震疊殊方。足以致此。而天下又方厭兵。勢且故從之矣。然某聞江左自吳以來。未有捨建康他郡者。吳嘗都武昌。梁嘗都荆渚。南唐嘗都洪州。當時爲計。必以建康距江不遠。故求深固之地。然皆成而復毀。居而復徙。甚者遂至於敗亡。相公以爲此何哉。天造地設。山川形勢。有不可易者也。車駕駐蹕臨安。出於權宜。本非定都。以形勢則不固。以餽餉則不便。海道逼近。凜然常有意外之憂。至於讖緯俗語。則固所不論也。今一和之後。盟誓已立。動有拘礙。雖欲營繕。勢將艱難。某竊謂及今當與之約。建康臨安。皆係駐蹕之地。北使朝聘。或就建康。或就臨安。如此。則我得以閑暇之際。建都立國。而彼旣素聞。不自疑沮。黠虜欲借以爲辭。亦有不可者矣。今不爲。後且噬臍。至於都邑措置。當有節月。若相公以爲然。某且有以繼進其說。不一二年。不拔之基立矣。某智術淺短。

不足以識大計。然受知之深，不敢自以疎遠爲疑。干冒鈞聽，下情恐懼之至。

## 卷四

### 劄子十二首

#### 上殿劄子

臣聞善觀人之國者無他，惟公道行與否爾。書曰：毋虐癯獨，而畏高明。詩曰：柔亦不茹，剛亦不吐。此爲國之要也。若夫虐癯獨，畏高明，茹柔吐剛，而能使天下治者，自古未之有也。朝廷之體，責大臣宜詳，責小臣宜略。郡縣之政，治大姓宜詳，治小民宜略。賦斂之事，宜先富室，征稅之事，宜覈大商。是之謂至平。是之謂至公。行之一邑，則一邑治。行之一郡，則一郡治。行之天下，而治不逮於古者，萬無是理也。伏見朝廷頃因人言，必顯有功狀，乃昇職名。行之行年，而大臣近侍不得職者幾人。帥臣監司之加職者，又比比而有。至於銓曹格法，所以厄小官者，則未嘗少弛張也。慶典之行，所及至廣。貼職以上，例皆甄復。雖阿附秦氏得罪者，亦在焉。至於常調孤遠，固多久結刑憲者，今更赦令，雖使皆得霽被，銓法拘攀，必不如是之曠蕩也。無乃責大吏反略，而責小臣反詳乎。郡縣之吏，不能自立，觀望揣摩，惟強是畏。豪右雖犯重辟，官吏貪者黠者，則公與之爲市。廉者懦者，則又自營曰：得無反爲所害乎。凡嫁禍平人，誘罪僮奴者，皆有司爲之道地也。凶年饑歲，雖貧富俱病，然富者利源至多，貧者惟守田畝，孰爲當恤。視郡縣之庭，鞭笞流血，枉械被體者，皆貧民也。吳蜀萬里，關征相望，富商大賈，先期遣人懷金錢以賂津吏。大舸重載，通行無苦。終更小官，造廷進士，垂囊蕭然，齋糧有限，而稽留苛暴，略不之恤。如是，謂之平可乎。謂之公可乎。臣昧死伏望陛下，推至平至公之道，自朝廷始，然後下詔戒救四方，而繼之以誅賞。不過歲月，治效自見。惟在陛下執之重如山嶽，堅若金石爾。苟卿論闢國之說曰：兼并易能也，堅凝之難。夫豈獨兼并哉。凡爲政，施行之甚易，堅凝之甚難。臣區區之言，陛下或以爲萬有一可采焉，敢併以堅凝爲獻，取進止。

又

臣伏讀御製蘇軾贊，有曰：手扶雲漢，幹造化機，氣高天下，乃克爲之。嗚呼！陛下之言，典謨也。軾死且九十年，學士

大夫徒知尊誦其文。而未有知其文之妙在於氣高天下者。今陛下獨表而出之。豈惟軾死且不朽。所以遺學者顧不厚哉。然臣竊謂天下萬事。皆當以氣爲主。軾特用之於文爾。趙普氣蓋諸國。故能成混一之功。寇準氣吞虜虜。故能成却敵之功。范仲淹氣壓蠻夏。故西討而元昊心伏。狄青氣懾嶺海。故南征而智高殄滅。至於韓琦富弼文彥博之勳勞。唐玠包拯孔道輔之風節。大抵以氣爲主而已。蓋氣勝事。則事衆。氣勝敵。則敵服。勇者之鬪。富者之博。非有他也。直以氣勝之耳。今天下才者衆矣。而臣猶有憂者。正以任重道遠之氣。未能盡及古人也。方無事時。亦何所賴此。一旦或有非常。陛下擇羣臣使之假鉞而董二軍。擁節而諭萬里。雖得賢厚篤實之士。氣不素養。臨事惶遽。心動色變。則其舉措。豈不誤陛下事耶。伏望萬機之餘。留神於此。作而起之。毋使委靡。養而成之。毋使沮折。及乎人才爭奮。士氣日倍。則緩急惟陛下所使而已。且吳蜀閩楚之俗。其渾厚勁朴。固已不及中原矣。若夫日趨於拘窘怯薄之域。臣實懼國勢之寢弱也。不勝私憂。犯分獻言。恭惟陛下裁赦。取進止。

又

臣聞天下有無窮之變。而有必然之理。惟默觀陰察。能得其理。則事變之來。雖千態萬狀。可以坐制而無虞矣。天下之變。最幽眇倉卒不可測知者。莫如雷霆鬼物。然雷霆冬伏而春作。鬼物晝隱而夜見。則其理之必然。有不可待智者而知之矣。今朝廷內無權家世臣。外無強藩悍將。所慮之變。惟一金虜。禽獸也。譎詐反覆。雖其族類。有不能測。而臣竊以謂是亦有可必知者。夫何故。寬猛之相繼。如寒暑晝夜之必相代也。故自金虜猖獗以來。靖康建炎之間。窮凶極暴。則有紹興之和。通和既久。則有辛巳之寇。寇而敗亡。則又有隆興之和。今邊陲晏然。枹鼓不作。逾二十年。與紹興通和之歲月略相若矣。不知此虜終守和約。至數百年而終不變邪。將如晝夜寒暑必相代也。且虜非中國比也。無君臣之禮。無骨肉之恩。惟制之以力。劫之以威。則羸能少定。今力億勢削。有亂而已。其亂不起於骨肉相殘。則起於權臣專命。又不然。則奸雄襲而取之耳。三者有一焉。反虜會之政。以悅其國人。且何爲哉。雖陛下聰明英睿。自有所處。然臣竊觀士大夫之私論。則往往幸虜之備。以爲安。不知通和已二十餘年。如歲且秋矣。而謂衣裘爲不必備。豈不殆哉。大抵邊境之備。方無事時觀之。事事常若有餘。一旦有變。乃知不足。伏望陛下與腹心之臣力圖大計。宵旰弗怠。繕修兵備。搜拔人才。明號令。信賞罰。常如羽書狎至。兵鋒已交之日。使虜

果有變。大則掃清燕代。復列聖之簪。次則平生洞格。慰父老之望。豈可復如辛巳倉卒之際。斂兵保江。凜然更以宗社爲憂邪。臣世食君祿。且蒙陛下省錄姓名。已二十餘年。念無以報天地父母之大恩。故其陳於陛下者。惟懼不盡。而不知狂愚之爲大罪也。取進止。

乞祠祿劄子 戊申四月

照對某。昨任主管成都府玉局觀。將滿。陳乞再任。蒙恩差知嚴州。於淳熙十三年七月三日到任。郡政乖刺。雨澤不時。上勞宵旰。死有餘責。賴蒙朝廷哀矜。山郡瘠土之民。重賜蠲放。廣行賑恤。上格和氣。下安衆心。入秋得雨。陸種倍收。六縣竝無流徙人戶。今春以來。雨暘尤爲調適。二麥繼熟。民間亦以爲所收倍於常年。賑濟訖事。稍紓吏賈。某雖去替不遠。實緣年齡衰邁。氣血凋耗。夏秋之際。痼疾多作。欲望鈞慈。特賜矜憫。許令復就玉局微祿。養痾故山。及天氣尙涼。早得就道。實爲至幸。

上殿劄子

臣恭惟陛下躬聖人之資。履天子之位。而致養三宮。承顏左右。盛事赫奕。冠映千古。尙何待塵露之增山海哉。願臣竊抱惓惓之愚。不敢輒默。伏惟陛下聖孝純至。稟於天性。昔在潛邸。及登儲宮以來。夙夜孜孜。何嘗頃刻不以壽皇爲心。壽皇罷朝而悅。進膳而笑。則陛下欣然喜動於色。壽皇罷朝而不悅。進膳而少味。則陛下愀然憂見於色。方是時。徒能喜之憂之而已。今則致親之悅者。實在陛下。其可以不深念乎。所謂悅親之道。非薦旨甘。奉輕暖也。非晨昏定省。冬夏溫清也。非千門萬戶之宮。鈞天籥韶之樂也。惟在陛下得天下之愛戴。以寧壽皇之心而已。雞鳴而攬衣。辨色而視朝。必曰此昔者問安之時也。今以萬機之繁。不能日朝重華。歉然於懷。豈有限極。然闕問安之常。禮之小也。致天下之治。孝之大也。吾其力爲其大者乎。此固壽皇所望於陛下。亦天下所望於陛下也。治功已成。中外無事。陛下時備法駕。率羣臣上萬年之觴。豈非天下之大慶。不然。太史或以災異上聞。四方或以寇盜來告。壽皇聞之。萬分有一微輟玉食。陛下雖居萬乘之貴。孰與解憂哉。臣昧死願陛下於進退人才。罷行政事之際。率以是爲念。自三思十思。以至百思。不爲過也。自一日五六日至於旬日。不爲緩也。謀及卜筮。謀及卿士。謀及庶人。不爲曠也。一有小失。豈獨上勞宵旰。壽皇亦與焉。故陛下今日憂勤恭儉。百倍於古帝王。乃僅可耳。譬如



臣民之家。上有尊親。則所以交四鄰。訓子弟。備饑饉。禦盜賊。比之他人。自當謹戒百倍。何則。彼亦懼憂之及其親也。犬馬小臣。貪於增廣聖孝。不知言之涉於狂妄。冒犯天威。伏候斧鉞。

又

臣聞詩曰。上天之載。無聲無臭。人君與天同德。惟當清心省事。澹然虛靜。損之又損。至於無爲。大臣不得而窺所好。則希合苟容之害息。小臣不得而窺所好。則諂諛側媚之風止。不以從其所好而加賞。則檢人伏。不以逆其所好而加罪。則端士進。玩好無益之物。不好則不接於目。詖諧敗度之言。不好則不聞於耳。大抵危亂之根本。諛巧之機芽。奸邪之罅隙。皆緣所好而生。臣下雖有所偏好。而或未至大害者。無奉之者也。人君則不然。絲毫之念。形於中心。雖未嘗以告人。而九州四海。已悉向之矣。况發於命令。見於事爲乎。且嗜好之爲害。不獨聲色狗馬宮室寶玉之類也。好儒生而不得真。則張禹之徒。足以爲亂階。好文士而不賣實。則韋渠牟之徒。足以敗君德。其他可推而知矣。昔者漢文帝及我仁宗皇帝。所以爲萬世帝王之師者。惟無所嗜好而已。恭惟陛下。龍飛御極之初。天下傾耳拭目之時。所當戒者。惟嗜好而已。無有作好。遵王之道。天之所以錫神禹也。伏惟陛下。留神省察。實天下幸甚。取進止。

上殿劄子己酉四月十二日

臣聞王者以一人之身。臨制四海。人情錯出。事變遷至。惟靜以俟之。則心虛而明。惟重以持之。則體大而正。無偏聽之過。無輕舉之失。天何言哉。舜何爲哉。後世士大夫。學術卑陋。識慮褊淺。願謂王者得位。必有以聳動天下。於是厭常喜新之論興。飾智駭俗之政作。衆人之所喜。而君子之所深憂也。臣伏見陛下。自在潛邸。以至龍飛御宇。三十年間。天下之事。何所不習。雖日出百令。固亦易爾。乃謙恭退託。而安靜無爲。沉潛淵默。而聰明不作。上則承壽皇之睿謨。下則盡羣臣之公議。及乎議有未決。徐而斷之。政有當行。從而舉之。理愜事允。出臣下思慮之表。有心者誠服。有口者頌歎。則所謂靜與重者。陛下旣得之矣。嗚呼。一郡一邑之長。視事之始。尙且以新奇眩衆。以敏速釣名。陛下有天下之利勢。而不用。有聖智之絕識。而不施。超越羣倫。奚啻萬億。而或者方以聳動天下爲獻。此固兒童之見。而陛下所不取也。竊恐羣臣獻此說者。寔多。雖陛下決不取。然臣不勝惓惓愛君之愚忠。思有以堅

聖心而廣初政。昔魏鄭公憂正觀之政漸不克終。蘇轍亦謂但如元祐之初足矣。若夫進銳退速。能動耳目之觀聽。而無至誠惻怛之心以終之。如明皇之焚錦繡。德宗之放馴象。實陛下之龜鑑也。故臣願陛下圖事接策。不厭於從容。行賞議罰。無取於快意。兢兢業業。常如此三月之間。則成康文景之盛。復見於今日矣。犬馬小臣。出位妄言。冒犯天威。臣無任

又

臣聞天下有定理。決不可易者。飢必食。渴必飲。疾必藥。暑必箑。豈容以他物易之也哉。臣伏觀今日之患。莫大於民貧。救民之貧。莫先於輕賦。若賦不加輕。別求他術。則用力雖多。終必無益。立法雖備。終必不行。以臣愚計之。朝廷若未有深入遠討。犁庭掃穴之意。能於用度之間。事事裁損。陛下又躬節儉。以勵風俗。則賦於民者。必有可輕之理。緩急之備。固不可無。姑以歲月徐爲之可也。如是。則和氣浹洽。必無水旱之災。驪聲泮盜。必無盜賊之警。何慮國用之不足邪。設使裔夷弗賓。侵犯王略。所謂率其子弟。攻其父母。直可舞干羽而格之爾。頃者建炎紹興。戡定變亂之日。一切賦斂。有非承平之舊者。高宗皇帝宵旰焦勞。每欲俟小定而悉除之。故詔令布告天下曰。惟入世祖宗之澤。豈汝能忘。顧一時社稷之憂。非予獲已。止俟捍防之隙。首圖蠲省之宜。臣幼年親見民誦斯詔。至於感泣。雖傾貲以助軍興。而不敢愛。旋屬國家多故。逆亮畔盟。雖所蠲已多。終未仰稱聖意。書皇聖帝臨御以來。所以節用裕民者。皆繼承高宗蠲省之指也。則陛下今日豈可不以爲先務哉。臣昧死欲望聖慈。恢大度。明遠略。詔輔臣計司。博盡論議。量入而用。量用而取。可蠲者蠲。可省者省。富藏於民。何異府庫。果有非常。孰不樂輸。以報君父淪肌浹髓之恩哉。若有事之時。既竭其財矣。幸而無事。又曰儲積以爲他日之備也。雖恢復中原。又將曰邊境日廣矣。屯戍日衆矣。則斯民困弊。何時而已邪。瀆犯天威。罪當萬死。惟陛下下裁赦。取進止。

除修史上殿劄子

臣伏見真宗皇帝至道三年冬。修太宗實錄。至明年咸平元年八月而畢。甫九閱月。修書者錢若水。柴成務。宗度。吳鼎。楊億五人而已。書成。又詔重修太祖實錄。至明年六月而畢。亦甫九閱月。修書者王元之。梁灝。趙安仁。李宗諤四人而已。臣竊考之。太祖討澤潞。取揚州。平吳越。蜀。定荆楚。下五嶺。太宗撫有吳越。蕩定汾晉。用師薊門。問罪

夏臺皆大舉勳業廣事。議論煩委。兵機戎政。攻守餽餉。功罪黜陟之事。可謂夥矣。至於制禮作樂。明刑治曆。修廢官。舉陸典。革五季之弊。復漢唐之盛。側席求治。可謂勤矣。宜其摹寫日月。形容造化。雖累歲不成。而奏書之速。不淹三時。上足以慰羹牆之思。下足以厭薦紳之望。非獨此數人者。畢精竭思之力也。意者當時命令重刑賞。必尊君體國之俗成。凡史官紬繹之所須者。上則中書密院。下則百司庶府。以至四方萬里郡國之遠。重編累牘。如水赴海。源源而集。然後以耳目所接。察隧碑行述之諛辭。以衆論所存。刊野史小說之謬妄。取天下之公。去一家之私。而史成矣。九閱月而奏書。臣誠未見其爲速也。臣乞身累年。忽蒙聖恩。起之山澤之間。使與聞大典。既不累以他職。又特寬其朝謁。責委之意。可謂重矣。然臣之愚慮。有欲陳者。未敢遽以仰瀆天聽。而略具梗概於前。欲乞聖慈。明詔大臣。俟臣供職。有所陳請。擇其可者。出自朝廷。主張施行。如臣不能自力。曠職守。負聖知。則竄殛之刑。所不敢避。取進止。

乞致仕劄子癸亥

臣輒冒重誅。仰干洪造。伏念臣生逢千載。仕歷四朝。晚蒙旒扆之知。爰錫弓旌之召。濫司汗簡。擢長仙蓬。會未幾時。亟躋近列。雖願輸於塵露。顧已迫於桑榆。記問荒疎。文辭衰退。重負夜行之責。難貪晝接之榮。又况與奏成書。獲經審覽。時則可矣。敢少緩於控陳。天實臨之。冀俯從於懇款。伏望聖慈。許臣守本官職。依前致仕。

又癸亥

臣近緣實錄院進書已畢。具奏乞守本官職。依前致仕。準尙書省劄子。奉聖旨。不允者。伏念臣學緣病廢。志與年衰。步蹇弗支。髮存無幾。出入鷓行之內。惕然有颯於面顏。追參豹尾之間。觀者亦爲之指目。豈容冒昧。久竊寵榮。敢干咫尺之威。洊貢再三之請。萬籤黃卷。悵已負於初心。十具烏犍。冀獲安於故里。伏望聖慈。特賜開允。

又甲子

臣輒傾愚懇。仰達聖聰。伏念臣衰頽餘齡。已開九秩。遭逢盛際。逮事四朝。擢寘周行。初出高皇之獨斷。進登法從。晚蒙陛下之異知。朝歲強顏。秋毫無補。及憑乞身之請。更蒙優老之除。久此叨塵。豈勝危懼。雖天地之恩。未報而犬馬之力已窮。杜曲桑麻。儻遂扶犁之利。願瀟橋風雪。更尋策蹇之舊遊。誓教訓於子孫。用報酬於君父。伏望聖

慈許臣守本官職致仕。

卷五

奏狀八首

天申節進奉銀狀

效頌祝於萬年。適逢盛際。備貢輪於九牧。敢竭微誠。前件銀。祗率典章。獲參包篋。大庭旋百。愧非梯山航海之琛。神嶽呼三。但切就日望雲之意。

辭免賜出身狀

准尙書省劄子。奉聖旨。賜進士出身者。孤遠小臣。比蒙召對。從容移刻。褻稱訓諭。至於再三。仰惟天地父母之恩。固當誓死圖報。惟是科名之賜。近歲以來。少有此比。不試而與。尤爲異恩。揣分量材。實難忝冒。欲望敷奏。特賜追寢。以安冗散之分。

又

近蒙恩賜進士出身。嘗具狀乞行追寢。以謂科名之賜。近歲以來。少有此比。不試而與。尤爲異恩。揣分量材。實難忝冒。今月六日。准尙書省劄子。奉聖旨。不許辭免。螻螻至微。曲煩申諭。雷霆在上。其敢飾辭。然義有未安。若不自列。強顏冒寵。獲罪愈大。蓋特賜科名。雖有故事。必得非常之人。乃副非常之舉。甚非所以重儒科。杜倖門也。重念某一介疎賤。行能亡取。比蒙召對。面加訓獎。退而感激。至於涕泗。今者但使獲安冗散之分。以效尺寸之勞。則於上報主恩。不敢憚死。

條對狀

准今月六日詔書節文。令侍從臺諫取當今弊事。悉意以聞。退率其屬。極言毋諱。臣恭依詔旨。條具下項。一有國之法。當防其人。微臣之戒。尤在於僞。異姓封王。僞之尤者也。蓋封王始於漢初。天下未定。權宜之制。然韓彭英盧。皆以此敗。漢亦幾至大亂。遂與羣臣盟曰。非劉氏不王。後世懲創其失。魏晉隋唐。皆起草昧。有天下。豈無

功臣止於公侯而已。國初趙普有社稷大功。亦未嘗生加王爵也。唐將封王。始於安祿山。而本朝則始於童貫。此豈可法。而比年以來。屢以爲常。識者莫不憂之。欲乞聖慈明詔有司。自今非宗室外家。雖實有勳勞。毋得輒加王爵。藏之金匱。副在有司。永爲甲令。實宗社無疆之福。

一、伏見比來朝廷間遣小臣幹辦於外。既銜專命。又無統屬。造作威福。矜詫事權。所在騷然。理有必致。如措置酒坊。招捕海賊。未有毫髮成效。而擾害之事。已饜滿聞聽。則此事害多利少。可以無疑。若以輕君命。失國體言之。則雖有厚利。亦不可行。臣謂如此二事之類。止當專委戶部長貳轉運司。及安撫使提點刑獄措畫。如其不職。自有典憲。誠不足一一上煩聖慮。昔祖宗置走馬承受。本欲便於奏報耳。而小人恃勢。日增歲長。及改稱廉訪使者。則監司帥守反出其下。敗亂四方。危及社稷。實走馬承受之末流也。可不畏哉。此事乞陛下與輔臣長慮遠計。亟行廢罷。若止如近日改易其人。及令聽安撫使節制之類。根本未除。終必爲害。若朝廷或有大事。勢須遣使。即乞於廷臣中遴選材望。庶幾不負任使。不啓弊端。實天下之幸。

一、自古有國。設官分職。非獨下不得僭上。上亦不得侵下。所以正名分也。公師之官。將相之位。人臣之至貴。天子所尊禮。非百官有司比也。方宣和間。王黼以太宰而行。應奉司。蔡攸以三孤而直保和殿。紊亂之事。遂爲禍萌。中興以來。所宜痛革。而頃者遂有以師傅而領殿前都指揮使者。天下固已怪矣。近復有以太尉而領閣門事者。閣門古之中涓。太尉服章班列。蓋視二府。瀆亂名器。莫此爲甚。欲乞聖慈。詔輔臣議之。例加訂正。著爲定制。亦革弊所當先也。

一、伏覩詔書。委監司條具部內知州治行。仰見陛下撫恤百姓。欲使各安田里之意。然臣竊謂惟賢乃可以知賢。而無瑕者乃可以識人。不審今之監司。皆已賢乎。若猶未也。且夕臧否來上。而按行黜陟。無乃未可乎。雖使諫官御史劾奏其不當者。然人之識見。自有分限。若本無才智。又無學術。乃使品藻賢否。而劾其不當。是猶強盲者使察秋毫。而責其不見也。臣欲望聖慈。令三省具諸路監司姓名。精加討論。其不足當委寄者。例皆別與差遣。選有才智學術之士代之。則前日之詔。不爲空文。既一清監司之選。又審知郡守之政。實今日先務也。

一、伏覩律文。罪雖甚重。不過處斬。蓋以身首異處。自是極刑。懲惡之方。何以加此。五季多故。以常法爲不足。於是

始於法外特置凌遲一條。肌肉已盡而氣息未絕。肝心聯露而視聽猶存。感傷至和。虧損仁政。實非聖世所宜。也。議者習熟見聞。以爲當然。乃謂如支解人者。非凌遲無以報之。臣謂不然。若支解人者。必報以凌遲。則盜賊蓋有滅人之族者矣。蓋有發人之丘墓者矣。則亦將滅其族。發其丘墓以報之乎。國家之法。奈何必欲稱盜賊之殘忍哉。若謂斬首不足禁奸。則臣亦有以折之。昔三代以來。用肉刑。而隋唐之法杖背。當時必亦謂非肉刑杖背不足禁奸矣。及漢文帝。唐太宗。一日除之。而犯法者乃益稀少。幾致刑措。仁之爲效。如此其昭昭也。欲望聖慈。特命有司。除凌遲之刑。以明陛下至仁之心。以增國家太平之福。臣不勝至願。

一、臣恭以陛下仁心惻怛。聖澤深廣。四方萬里之遠。昆蟲草木之微。生成長養。惟恐或傷。近者天下奏獄。雖盜賊奸蠹。罪狀已明。一毫可寬。悉蒙原減。豈有無辜就刑而不加恤者。臣是以不量疎賤。敢昧死有請。夫宦侍之臣。自古所有。然晚唐以來。始進養子童幼何罪。橫羅刀鋸。古制。宮刑之慘。纔下大辟一等。是雖顯有負犯。猶在所矜。而況於童幼乎。向使宿衛不足。供奉闕人。暫開禁防。尙爲有說。今道路之言。咸謂員已倍冗。司局皆盜。而日增歲加。未聞限止。誠恐非陛下愛人恤物。蕃育羣生之意也。臣伏觀太祖皇帝開寶四年。詔內侍官年三十無養父。聽養一子。并以名上宣徽院。違者抵死。真宗皇帝咸平中。復申前詔。仁宗皇帝嘉祐四年。又詔入內侍省。權罷進養子。三聖詔令。炳如丹青。遵而行之。實在陛下。且方今聖政日新。入無苑囿之觀。出無逸遊之好。諸軍無承受。諸路無走馬。中人所領。不過兩宮掃除之職而已。顧久弛成憲。以從其私。干犯至和。虧損仁政。臣雖甚愚。猶知其不可也。伏惟聖慈。少留聽焉。

一、自古盜賊之興。若止因水旱饑饉。迫於寒餓。嘯聚攻劫。則措置有方。便可撫定。必不能大爲朝廷之憂。惟是妖幻邪人。平時誑惑良民。結連素定。待時而發。則其爲害未易可測。伏緣此色人處處皆有。淮南謂之二禳子。兩浙謂之牟尼教。江東謂之四果。江西謂之金剛禪。福建謂之明教。揭諦齋之類。名號不一。明教尤甚。至有秀才吏人軍兵亦相傳習。其神號曰明使。又有肉佛骨佛血佛等號。白衣烏帽。所在成社。僞經妖像。至於刻板流布。假借政和中道官程若清等爲校勸。福州知州黃裳爲監雕。以祭祖考爲引鬼。永絕血食。以瀾爲法水。用以沐浴。其他妖澁未易概舉。燒乳香。則乳香爲之貴。食菌蕈。則菌蕈爲之貴。更相結習。有同膠漆。萬一竊發。可爲寒心。漢之張角。

晉之孫恩。近歲之方臘。皆是類也。欲乞朝廷戒敕監司守臣。常切覺察。有犯於有司者。必正典刑。毋得以習不根。經教之文。例行闡略。仍多張曉示。見今傳習者。限一月。聽齋經像衣帽赴官自首。與原其罪。限滿。重立賞。許人告捕。其經文印版。令州縣根尋。日下焚毀。仍立法。凡爲人圖畫妖像及傳寫刊印明教等妖妄經文者。並從徒一年論罪。庶可陰消異時竊發之患。

## 奏筠州反坐百姓陳彥通訴人吏冒役狀

臣近因民間詞訴勘會。引本路筠州百姓陳彥通。因訴事夾帶。稱高安縣狎錄陳諒。經兩次徒杖罪。斷罷。不合冒役事。其本州於淳熙六年十月內。以爲陳彥通所論冒役不實。遂引用乾道六年八月二日臣僚陳請妄訴冒役科反坐刑名。仍引在法諸州縣公人。曾因犯罪勒停。謂於法不該收斂。及未該收斂者。放罷編配。再行投募充役者。許人告諸州縣收斂公人。於令格有違者。徒二年。公人依法不該收斂。而隱落過犯。或改易姓名。別行投募者。准此。將百姓陳彥通決脊杖十三。臣竊詳反坐之法。本謂如告人放火。而實不曾放火。告人殺人。而實不曾殺人。誣陷善良。情理重害。故反其所坐。然有司亦不敢即行。多具情法。奏取聖裁。今愚民無知。方其爲奸胥猾吏之所屈抑。中懷冤憤。訴之於官。但聞某人會以罪勒罷。又有許告指揮。則遂於狀內夾帶冒役之語。村野小民。何由身入官府。親見案牘。小有差謬。亦當未減。以通下情。縱使州郡欲治其虛妄。越之類。亦自有見行條法。笞四十至杖八十。極矣。與反坐之法。有何干涉。若一言及吏人冒役。便可捃摭置之徒罪。則百姓被苦。豈復敢訴。吏何其幸。民何其不幸也。自昔善爲政者。莫不嚴於馭吏。厚於愛民。今乃反之。事屬倒置。兼見今諸處冒役吏人。雖究見是實。亦不過從杖罪科斷罷役而已。未有卽置之徒罪者。豈有百姓訴吏人冒役。却決脊杖之理。臣本欲卽按治筠州官吏。又緣有上件乾道六年八月二日臣僚陳請到指揮。顯見因此陳請。致得州郡憑藉。用法深刻。臣蒙恩遣使一路。出自聖知。披擢。苟有所見。不敢隱默。欲望聖慈。更賜詳酌。如以臣所奏爲然。卽乞特降睿旨。寢罷乾道六年八月二日因臣僚陳請所降指揮。庶使百姓不致枉被深重刑責。且下情獲通。胥吏稍有畏懼。天下幸甚。

## 除竇謨閣待制舉會黯自代狀

准命。侍從授告訖。限三日內。舉官一員充自代者。右臣伏親從政。郎總領。維東軍馬錢糧所。準備差遣。曾黯克承。

家學早取世科。操行可稱。文詞有法。臣實不如。舉以自代。

辭免轉太中大夫狀

中大夫充寶謨閣待制提舉江州太平興國宮陸某狀奏。臣以修進兩朝實錄。今月二十三日伏准告命授臣太中大夫。依前充寶謨閣待制。提舉江州太平興國宮者。序進一階。雖循故事。擢登四品。實出殊私。勞薄賞禮。人微恩重。而况臣遭逢頗異。涉歷淺深。四朝嘗綴於廷紳。八十更持於從橐。惟寵光之永絕。庶視息之少延。敢控愚衷。冀回鴻造。

薦舉人材狀

太中大夫充寶謨閣待制致仕臣陸某近承紹興府牒。備承尙書吏部符。准都省劄子。奉聖旨節文。令前侍從各舉人材三兩人。臣爲已致仕累年。竊慮與在外侍從見任藩郡及宮觀人事體不同。遂具申審。今准都省劄子。照得寶謨閣待制致仕俞激薦舉萬夔實等。訖劄送臣照會者。臣切見宣教郎知臨安府臨安縣鞏豐材識超卓。文辭宏贍。從政郎前隨州學教授王田。學問淹貫。議論開敏。以上並可備文字之職。文林郎監潭州南嶽廟趙善力學好修。杜門自守。入仕以來。惟就祠祿。今已數任。若將終身。或蒙朝廷稍加畿拔。足以爲靜退之勸。抑躁競之風。於聖時不爲無補。如或不如所舉。甘坐責罰。

卷六

啓十一一首

謝解啓

倦遊場屋。分已歸耕。首置賢書。出於過聽。得非其分。榮不蓋慚。伏念某行己迂疎。稟資窮薄。生逢聖代。豈願老於漁樵。性嗜古文。了不通於世俗。因息四方之志。專爲一壑之謀。比遊都城。適睹明詔。復踴躍而自獻。信習氣之難除。內負初心。外慙舊友。然而廢放已久。盡忘科舉之章程。得失既輕。頗有山林之氣象。譬之進昌歎於玉食。陳侏儒於燕朝。方以怪而見珍。故雖樸而不廢。恭惟某官行爲世表。經爲人師。早學長安。識子雲之奇字。晚遊吳會。得



中郎之異書。心術正而無邪。文章簡而有法。憤雕蟲之積弊。疑草野之可收。遂致庸虛。輒先豪俊。自知不稱。敢辭同進之爭名。所懼流言。竊謂主司之好異。其爲愧悚。實倍尋常。

賀台州曾直閣啓

恭審寵辭使節。移鎮便藩。上待老成。惟恐弗當其意。士聞靜退。自消競進之心。凡有識知。誰不驩喜。恭惟某官淵乎似道。清而有容。古學名家。鬱爲諸儒之領袖。高文擅世。坐遷兩漢之風流。蚤踐清華。屢當要劇。民依愷悌之政。吏畏道德之威。不言而令已行。寡欲而人自化。好直無矯枉之過。爲善無近名之嫌。歷考平生。追配古人而奚愧。中更俗吏。益知儒者之有功。比由真館之宴閑。起奉外臺之委寄。翔而後集。汎然敢辭。子房避三萬戶之封。曼容至六百石而去。當守爲之太息。舉朝仰其高風。故擇名邦。示優耆德。然而公議所屬。久安實難。第恐賜環之來。弗容坐席之暖。某早嘗問道。晚益受知。春服方成。悵又違於師範。郡齋猶冷。冀深衛於生經。

賀會秘監啓

恭審趣登文陛。進冠闕臺。簡冊光華。孰謂太平之無象。薦紳歎息。共欣大老之來歸。誠爲中外之榮觀。非復門闕之私慶。竊嘗聞諸耆舊。昔在祖宗。朝有道德魁偉之臣。士鄙刑名功利之學。政術旣斥。夫卑陋國勢。自極於尊安。豈惟右文飾治之方。是亦折衝消萌之要。至於主盟儒道。典領書林。必求名勝之宗。尤極清華之選。不圖近歲。頓異前規。老吏亦驚。茲豈膏粱之地。遺編何罪。至遭鋒鏑之腥。廷範之汙清流。哥奴之非時望。較之於此。誠何足言。天未墜於斯文。上眷求於舊德。恭惟某官。文貴平道。氣合於神。學稽古以知天。心集虛而應物。舊聞入洛之盛事。疑於古人。追數過江之諸賢。屹然獨在。雖身居湖海之遠。而名滿覆載之間。友化人而遊帝居。願肯復求於外物。登泰山而小天下。蓋嘗俯陋於諸儒。昨者法宮決事之初。起於琳館燕居之際。力歸使節。自乞守符。觀其勇退於急流。真若無意於斯世。迫功名之不赦。凜風節之愈高。姑復領袖館閣之遊。行卽几杖廟堂之上。某自惟幸會。最辱知憐。識度關之雲。距今十載。從俗沂之樂。終後諸生。孤蹤愈遠於師門。精意空馳於夢想。

賀謝提舉啓

伏審頽膺帝制。起擁使華。雖輿論欬然。謂未究大賢之蘊。然用人如此。誰不知公道之行。恭惟某官躬真獨簡。貴

之資。蘊篤實誠明之學。早並遊於洛下。晚獨步於江東。談笑多聞。文章爾雅。履常應變。雖與時而偕行。據古守經。蓋絕世而獨立。風采聞於天下。勞烈簡於上心。自去清班。久安真館。付功名於昨夢。若無意然。顧富貴之迫人。恐不免耳。迨法宮之決事。付便郡以優賢。曾未踰年。已聞報政。入膺三接之寵。出臨千里之畿。明詔始傳。吾黨相慶。以謂名流之施設。當有前輩之規摹。班超之策平。陽城之考下下。至於俗吏。乃求奇功。所願一洗簿書之塵。庶幾少稱臺閣之望。此自明公之所及。豈須賤子之具陳。冒瀆之深。慚惶無措。

### 賀禮部曾侍郎啓

恭審顯奉制書。進司邦禮。所養既厚。萬鍾亦何足言。衆望所歸。九遷猶以爲緩。惟是老成之用。式昭至治之符。凡有識知。誰不驩喜。竊考六官之制。本皆三代之餘。惟宗伯之清華。極近臣之遴選。誠使此地常得其人。則朝廷日尊。自弭未形之患。論議守正。亦折羣邪之萌。一昨多艱。寢忘大體。刑名錢穀。獨號劇曹。文物典常。僅同虛器。蓋道由時而升降。官以人而重輕。苟凡材非據於其間。則舊章何恃而不廢。孰謂斯文之幸。復聞公議之伸。恭惟某官直哉惟清。淵乎似道。心至虛而善應。名弗求而愈高。絀繹六經。推明上世之絕學。度越兩漢。追配先秦之古文。早並遊於洛中。晚獨步於江左。人誦其德。家有其書。使少貶於諸公。已亟升於華貫。顧久幽而彌厲。凜自信之不回。上屢與見晚之嗟。公猶懷勇退之志。勉收功業於無復意之後。起踐富貴於不得已之餘。黃髮皤然。德容穆若。昔者慶曆之盛。側席而致衆賢。元祐之初。加璧而聘諸老。今茲盛事。可謂無慚。然猶漸進於省中。未足大慰於天下。竊謂德齒之貴。宜登師保之崇。入則几杖三雍之間。出則卷繡百工之上。使勳貴斂衽。畏楊縮之清。朝野洗心。化毛公之儉。紀話言於竹帛。肖形像於丹青。垂之無窮。然後爲稱。某頃陶善誘。嘗辱異知。雖借勢於王公大人。非迂愚之敢及。惟侍坐於先生長者。尙夢寐之不忘。逃聞綸紉之傳。獨阻門闌之慶。仰懷曩遇。不勝下情。

### 賀辛給事啓

恭審光奉制書。就升鉅鎮。用人惟己。上方詢事而考言。知我其天。公豈枉尋而直尺。世不容而何病。道有命而後行。雖殿藩猶屈於經綸。然親擢益知於眷注。縉紳頌歎。道路躡欣。伏聞先王相我後人。上天爲生賢佐。若時大任之降。將啓非常之元。故必雍容回翔。以養其康濟之才。排擯斥疎。以積夫邇遠之望。遺之險艱。以勵其志。待之贊

老以全其能。周公居東。歸相成王之善治。謝傳高臥。晚爲江表之宗臣。勳名卒至於偉然。物理殆非於偶爾。恭惟某官氣守剛大。性資方嚴。其在朝廷。有金玉王度之益。其位嶽牧。有股肱帝室之勞。指朋黨於蔽蒙膠漆之時。發奸蠱於潛伏機牙之始。庭叱義府。面折公孫。可否一語而不移。利害十年而後驗。人服其識。家誦其言。皓首來朝。方共推於宿望。丹心自信。寧少貶於諸公。洗鄙夫患失之風。增善類敢言之氣。頽仰無媿。進退兩高。不可誣者忠邪之情。不可揜者是非之實。出守未幾。見思已深。惟是謀帥之難。孰先舊德之舉。然而方政機之虛席。宜召節之在途。開慰斯民。始自今日。某迂愚不肖。窮薄多奇。雖道德初心之已非。猶節義大閑之可勉。側聞休命。深激懦衷。輒忘奏記之狂。蓋出執鞭之慕。仰祈閔量。曲貸嚴誅。

## 答福州察推啓

讖面卜鄰。固常懷於鄙志。杜門掃軌。殊未接於英游。於此相逢。慨然永歎。恭惟某官城南舊望。江左名流。高韻照人。清言絕俗。過眼不再。真讀五車之書。落筆可驚。倒流三峽之水。豈有如公之人物。猶令隨牒於海邦。政恐驛召之行。弗容席暖之久。某奔馳斗粟。流落二年。久親柱後之惠文。高東牀頭之周易。政須名理之語。一洗簿書之塵。賀何正言除左司諫啓

恭聞親詔。登用大賢。以白首魁偉之臣。膺明時諫諍之任。善類相慶。公道遂行。竊以逆指犯顏。人疑於甚難。而君子謂之易。盛朝治世。衆安於無事。而識者以爲憂。然非身居獻替之官。與夫素著中外之望。雖抱此識。何自而言。邈乎太平之難逢。考之前史而可見。以正人遺聖主。實惟祖宗敷佑之心。而公議在朝廷。豈非廟社無疆之福。恭惟某官心潛百聖。學貫羣經。老成之風。師表一世。直養之氣。充塞兩儀。立朝寬大而持平。論事雍容而守正。虛舟觸物。此自信其無心。怒髮衝冠。彼安知夫有體。居多聖政之助。始明儒者之功。非獨誠僞不可以欺。要之忠邪久而自判。上眷既厚。人望又歸。遂當登四輔之聯。豈久置七人之列。某頃以樸學。嘗預諸生。雖在泥塗。猶是門闌之舊物。竟無名第。亦竊場屋之虛聲。敢俟明公勳業之成。勉繼輿人歌頌之作。不足爲報。姑盡此心。

## 賀湯丞相啓

恭審顯膺典冊。進冠公台。廷告未終。擢紳相慶。郵傳所及。夷夏歸心。煥君臣嘉會之逢。俊廟社無疆之福。恭惟某

官民之先覺。國之宗臣。精義探繫表之微。英辭鼓天下之動。至誠貫日。歷萬變而志意愈堅。屹立如山。決大事而喜愠不見。一昨力辭重任之降。屈居次輔之職。三年有成。九功惟敘。方當詔令之誕布。孰測謀謨之所從。凡有大政事之慰斯民。咸曰右丞相之告於上。雖寧置一喙以頌德。士予千金而示恩。竊揆其情。未至於此。蓋廟堂之寄。代天而理物。帷幄之算。經遠而折衝。平居用小大之材。欲其披肝膽以自盡。一旦付疆場之事。欲其捐性命而不辭。自非有以素服衆心。則將誰與共濟大業。晉文側席於子玉。回紇下拜於汾陽。王商以忠譽立朝。則單于不敢仰視。平津以媵嬰充位。則淮南謂若發蒙。自昔論世之盛衰。莫如置相之當否。譬猶震風凌雨之動地。夏屋愈安。編流巨浸之稽天。方舟獨濟。人望所屬。國體自尊。今者大明彌亮之勳。正席辯章之任。守文致理。將見隆古極治之時。應變制宜。必有仁人無敵之勇。聖主以此屬元輔。學者以此望真儒。行或使之。天所命也。某猥以孤遠。辱在記憐。如其少道衣食之憂。猶能頌中興之盛德。必也遂老江湖之外。亦自號太平之幸民。窮遠皆出於恩私。生死不忘於報稱。

除刪定官謝丞相啓

收置鈞陶。固已踰於素望。責功鉛槧。仍俾効其寸長。神觀頓還。塵埃一洗。欲敘丹衷之感。不知危涕之橫。伏念某。獨學寡聞。倦遊不遂。爛翻記誦。愧口耳之徒勞。跌宕文辭。顧雕蟲而自笑。低回久矣。感歎悽然。使有一人之見知。亦勝終身之不遇。然而稟資至薄。與世寡諧。在鄉閭。則里胥亭長之所叱訶。仕州縣。則書佐鈴下之所蹈藉。聲名湮晦。衣食空無。方所向而輒窮。已分甘於永棄。侵尋末路。邂逅殊私。招之於衆人鄙遠之餘。擊之於半世浮沉之後。既賞音於一旦。又誦句於諸公。豈料前史之美談。乃獲此身之親見。茲蓋伏遇某官斯民先覺。吾道宗師。大學誠明。上下同流於天地。至仁博博。遠近一視於華夷。和氣行禮樂之間。治道出政刑之外。惟公故無所不取。惟大故無所不容。訖令頑鈍之資。亦預甄收之數。重念某家世儒學。非有旂常鐘鼎之勳。交友漁樵。又無金張許史之助。特緣薄技。獲齒諸生。形顧影以知歸。口語心而誓報。死而後已。天寶臨之。

謝內翰啓

來自遠方。驟參要局。知其愛閑而多病。故爲蒞俗吏之塵。勇於悼屈而哀窮。故使汗清流之末。繫禁近吹噓之過。

蒙廟堂選拔之優。俯仰以思。愧懼交至。伏念某讀書有限。識字不多。歲月供簿領之勞。衣食奪山林之志。窮雖已甚。狂不自懲。性本懦弱。輒妄希於骨體。任由資蔭。乃深惡於膏粱。坐此煙阨而莫收。未忍依違而少貶。比茲鞅轂。久困氛埃。望見車騎之雍容。傳誦文章之闕麗。不勝慕鄉。求備使令。門牆纔許其一登。聲價已增於十倍。夫富貴外物。惟事賢可謂至榮。父子雖親。然相知猶或不盡。曾是疎遠。至孤之迹。又無瓌奇可喜之能。不自省其何繇。乃遽叨於斯遇。非常之幸。從古罕聞。此蓋伏遇某官自明而誠。養氣以直。行著四方之防範。文專一代之統盟。勤於教人。務傳聖師之道。廣於求士。用報睿主之知。豈謂孤生。亦蒙至意。稱於天下曰知己。誰復間然。雖使古人而復生。未易當此。惟誓堅於名節。庶不辱於恩私。

謝諫議啓

來自遠方。驟參要局。因書生鉛槧之業。使效尺寸之長。脫俗吏簿領之煩。曲從疎野之性。儻非恩舊。每賜掄揚。自顧缺然。何以得此。伏念某讀書有限。識字不多。歲月供道路之勞。衣食奪山林之志。窮雖已甚。狂不自懲。材本懦弱。輒妄希於骨體。任由資蔭。乃深嫉於膏粱。衆惡所叢。孤生餘幾。自頃竝遊於場屋。亦嘗辱遇於宗師。徒竊虛聲。莫醜真賞。一斤遂甘於蹭蹬。殘年絕望於蹇騰。此在常情。所宜顯棄。豈謂并容之度。未移宿昔之私。既許瞻君子盛德之容。端乎似道。又使知大人接物之際。歡然有恩。訖致庸虛。誤蒙甄錄。此蓋伏遇某官養氣以直。自誠而明。大學中庸。發揮千歲之旨。生民清廟。主盟一代之文。吾道由此而復傳。善人有恃而不恐。施及區區之舊物。不忘眷眷之深情。求羸稱於門牆。惟益堅於名節。死而後已。天寶臨之。

卷七

啓十六首

謝會侍郎啓

結綬彈冠。既過尋常之望。懷鉛抱槧。獲輸尺寸之長。永言卯翼之恩。忽焉涕淚之集。伏念某讀書有限。與世無緣。吟梁甫於草廬。倒天吳於短褐。借助於金張許史。既家世之不爲。從事於米鹽簿書。又生平之未學。一昨奔馳簿

宦流落殊方。土風頓異於中州。宿疾遽侵於壯歲。食有鼯鼯之異。醫無鍼石之良。凜然懷性命之憂。不暇計飢寒之迫。毀車殺馬。逝從此以徑歸。賣劍買牛。分餘生之永已。豈謂始終之不棄。俯憐緩急之誰投。出泥塗而濯清風。披泉局而起白骨。稱於天下曰知己。願豈在於他門。雖使古人而復生。亦難勝於此賜。茲蓋伏遇某官盡心知性。惟道集虛。氣塞天地之間。辭編詩書之策。授業解惑。務廣先師之傳。揚善進賢。用爲聖主之報。廣則或至於雜。恕則不責其全。是致庸虛。亦好題品。然而仰觀明公之勇退。每蹈前哲之難能。超軼絕塵。優游卒歲。雖賢愚之甚遠。願師慕之敢忘。誓當力戒它歧。益堅素守。禍福有命。豈其或置於胸中。名節儻全。是則不辱於門下。終期末路。可復斯言。

刪定官供職謝啓

拔茅以征。冒處清流之末。及瓜而往。曾無累月之淹。恩重如山。感深至骨。伏以刑措不用。邈矣成康之隆。法家者流。肆於秦漢之際。以吏爲師。而先王之澤熄。以律爲書。而聖人之道微。是以鄙夫深文而不知還。儒者高談而靡適用。惟我國家之制。克合古今之宜。置局而總以弼臣。拔材而列之官屬。必有遠關盛衰之法。以授有司。故非深達體要之人。不預此選。豈容憊甚。亦在數中。茲蓋伏遇某官學極誠明。才全經緯。道樞善應。萬變不外於吾心。仁風遠翔。庶物悉陶於和氣。矜憐墜緒。收拾遺材。致茲流落之餘。彼此生成之賜。某敢不討尋廢忘。激勵庸庸。念彼三尺法安出哉。要必通於古誼。否則一獄吏所決耳。尙奚取於諸生。冀收毫髮之勞。庶逃俯仰之媿。

賀黃樞密啓

恭審顯膺制書。進貳樞府。威望之重。宗社所憑。天其相有求之圖。日以冀中興之治。竊以朝廷之政。屬在帷幄之臣。方無事之時。雍容坐談。則夫人而皆可。應一旦之變。酬酢曲當。非有道者不能。歷觀昔人。蓋鮮全美。王導之襟量而學不至。德裕之術略而器未優。故晉卒安於江東。唐莫追於正觀。有志之士。太息於斯。恭惟某官心正意誠。任重道遠。躬卓行於苟且。自恕之俗。推絕學於散缺不全之經。凜然一家之言。發乎千載之闕。加之博極墳史。得興亡治亂之由。綜練典章。識沿革始終之際。氣足以懾姦慝。明足以察忽微。其在掖垣。惟公議是達。其侍經幄。惟王道是陳。果由師錫之同。入總本兵之寄。然而方時多故。爲計實難。夷狄鴟張。肆猖狂不遜之語。邊障狼顧。懷震

授弗寧之心。東有淮江之衝。西有楚蜀之塞。降附踵至。人心雖歸。而強弱尙殊。踊躍請行。士氣雖揚。而勝負未決。堅壁保境。則曷慰后来之望。闢國復土。則又有兵連之虞。竊惟明公。素已處此。某頃聯官屬。獲侍燕居。每妄發其。慙愚。輒誤蒙於許可。雖輟食竊憂於謀夏。而荷戈莫效於防秋。敢誓糜捐。以待驅策。

## 除編脩官謝丞相啓

揆才無似。得祿已優。不知何取於聖時。願使輒塵於清選。既難稱塞。但有慚惶。伏念某學術空疎。文詞朴拙。頃遊場屋。未能絕出於原夫。久返山林。但欲追酬於欵乃。至於手編簡冊。身綴鵷鷺。豈惟忘魏闕之心。固已息邯鄲之夢。敢圖一旦。輒越稠人。與聞國典之權輿。猥備樞廷之掾史。此蓋伏遇某官斯民先覺。盛世元臣。亮天以格物之誠。化俗用修身之道。雖江海至廣。固無待於細流。念燕雀兼容。亦何傷於大廈。故令濫進。以廣旁求。然而某天賦甚窮。自量尤審。層臺起於累土。雖深知獎拔之心。浮屠成於合尖。冀終遂迂愚之分。敢忘惕勵。用對陶成。

## 謝參政啓

揆才無似。得祿已優。不知何取於聖時。願使輒塵於清選。既難稱塞。但有慚惶。伏念某至拙無能。下愚不肖。分章析句於蓬樞。鼂臠之下。學但慕於俚儒。娛憂紆悲於山嶺水涯之旁。文不供於世用。比坐啼號之迫。浪爲衣食之謀。投檄無緣。強顏可笑。橘踰淮而爲枳。竊自慨然。泥出井而作塵。望胡及此。手編簡冊。身綴鵷鷺。筆研重尋。氛埃一洗。茲蓋伏遇某官至仁無間。大德有容。文兼衆作。而不以窮人。識高一代。而樂於成物。雖江海至廣。本無待於細流。念燕雀兼容。亦何傷於大廈。致茲久困。遂得少通。然而某天賦甚窮。自量尤審。層臺起於累土。雖深知獎拔之心。浮屠成於合尖。冀終遂迂愚之分。敢忘惕勵。用對陶成。

## 謝賜出身啓

明廷錫對。晨趨甲帳之嚴。親札疏恩。暮拜丙科之寵。感深涕隕。愧極汗流。竊以國家取士之方。固非一路。學者進身之始。又惡多歧。故祖宗非私於俊造之科。而公卿罕出於選舉之外。至膺特詔。尤號異人。頌詩足以配絃歌。則梅堯臣出於皇祐。文章足以垂竹帛。則王安國起於熙寧。或友朋借譽。而不以爲私。或兄弟當塗。而莫之或讎。厥繇至嘗。故可無慙。如某者。才樸拙而無奇。學迂疎而寡要。自悲薄命。久擯名場。敢謂一朝。遂叨賜第。門外之袍立。

鶴恍記少時。詔中之字如鴉。猶疑夢事。茲蓋伏遇某官股肱王室。領袖儒林。以謂設一日之羅。蓋非得爵之道。至於售千金之骨。抑明市駿之心。寧借安庸以風四方。不忍拘攣而廢一士。某敢不計尋舊學。企慕前修。儒者之弊。勞而無功。誓少求於實效。聖君所行。卽是故事。將時得於遺材。敢仰賀公道之興。非獨敘私情之謝。

答人賀賜第啓

比對明廷。猥塵特舉。兩章控避。莫回天地之恩。一紙來臨。復拜友朋之賜。未知稱塞。積有慚惶。伏念某才本迂疎。識尤淺暗。頃遊場屋。首犯貴權。既憎糠播之偶前。復惡瓦樞之輒巧。訟劉黃之下第。空辱公言。與李賀而爭名。幾成奇禍。敢期末路。復齒清流。晨趨甲帳之嚴。暮拜丙科之寵。此蓋伏遇某官學窮游夏。文媿脚雲。槐花黃而竝遊。每記帝城之舊。荔子丹而共醉。未忘閩嶺之歡。特假溢言。俾膺異選。千名記佛。雖叨學者之光榮。一日看花。寧復少年之意氣。但懷感佩。未易敷陳。

賀張都督啓

恭審誕膺冊書。首冠樞府。運籌決帷幄之勝。遂定廟謨。假鉞督中外之軍。仍專閭寄。傳聞所逮。欣抃惟均。恭惟某官降命應期。自天生德。許國本事親之孝。化民用克己之仁。早際聖神。偏居將相。書虞淵取日之績。恍若古人。詠東山零雨之詩。適當初政。屬邊烽之尙警。煩幕府之親臨。玄黃之筐爭歸。赤白之囊幾息。果滄膺於微數。用卒究於宏規。仰惟列聖之恩。實被中原之俗。耕田鑿井。舉皆涵養之餘。寸地尺天。莫匪照臨之舊。豈無必取之長算。要在熟講而緩行。願非明公。誰任斯事。不惟衆人引頸以歸責。固亦當守虛心而仰成。某獲預執鞭。欣聞出綽。斗以南仁傑而已。知德望之素尊。陝以東周公主之。宜勳名之益大。雖不敢紀殊尤於竹帛。尙或能被一二於絃歌。冒瀆之深。震惶無措。

問候洪總領啓

借勢於王公大人。夙懷志願。侍坐於先生長者。適有夤緣。仰偉度之兼容。撫孤蹤而知幸。伏念某至愚不肖。甚拙無能。一官初迫於飢寒。百慮更成於疾疢。綴駕驚會朝之列。自傷勸鶴之摧頽。望魚龍變化之塗。獨類寒龜之藏。縮。比求祠廟。歸掃丘墳。猶出佐於近藩。實大踰於素望。始終微倖。進退慚惶。恭惟某官材擅國華。德推世笑。崇論



欲讖質諸鬼神而不疑。大冊高文。編之詩書而無愧。歷風波並起之險。捩金石可開之誠。雍容回翔。而愈高康濟之資。排擯斥疎。而彌積邈遐之望。天將降於大任。上惟圖於蕃人。荷從橐於西清。方俟論思之益。擁使擅於北固。猶煩道德之威。某竊覲須臾。欽承約束。快威鳳景星之觀。幸執過焉。辱高山流水之知。儻其自此。

## 答鈐轄啓

列屬樞廷。自不安於清選。佐州京峴。猶誤被於明恩。方修候問之恭。已拜緘滕之賜。情文甚寵。感愧兼深。伏惟某官胄出山西。書傳圯上。綠沉金鎖。雖勇略之無前。緩帶輕裘。亦風流而自命。茲膺帝眷。暫總兵符。遂容顛顛之餘。獲廁遊從之末。春容方麗。戎幕多閑。冀加衛於寢興。用大符於頌禱。

## 問候葉通判啓

列屬樞廷。自不安於清選。佐州京峴。猶誤被於明恩。敢謂窮途。獲親耆德。恭惟某官性資直諒。學術淵源。愷悌宜民。固已高於治績。忠誠許國。曾未究於遠猷。行膺召節之嚴。趣上禁途之峻。雖仰觀翔翥。鳳凰方覽於德輝。然猶幸須臾。虎鼠同稱於相屬。春容方麗。燕寢多閑。冀調與止之宜。用副傾依之素。

## 答吳提宮啓

伏蒙講修拜禮。惠示函書。溫乎其容。若加親。粲然有文。以相接。雖快景星之觀。終慙明月之投。伏惟某官華國英材。通家舊好。未嘗少貶於公卿勢位之地。願乃獨厚於江湖顛悴之人。賣劍買牛。念即歸於農畝。乘車戴笠。尚永記於交盟。

## 賀葉提刑啓

伏審顯奉璽書。改臨畿服。坐於廟朝而施利澤。雖尙鬱於遠猷。送以禮樂而有光華。寶慶隆於睿眷。傳聞之始。開慰實深。恭惟某官學造宮庭。行尊防範。闕譏兩朝之望。高文百世之師。入踐掖垣。有斧藻聖謨之益。出乘使傳。有宣道王意之勞。周旋百爲。終始一節。鳳凰之翔千仞。雖瞻仰詠歎之實同。虎豹之守九關。終排擯斥疎而莫進。竊惟大任之降。將啓非常之元。必使備歷於阻難。所以終成其器業。今者承邊鄙宿兵之後。加夏秋積潦之餘。疾疢相熏。流連未止。憂軫上煩於宵旰。撫摩方屬於忠賢。伏聞親奉尺一之書。下慰億兆之望。坐席未暖。握節遽行。蓋

將訪災沴之由。施寬平之政。挈之溝壑之內。厝諸衽席之安。老稚聚觀。感涕相屬。迨及嘉猷之告。宜膺共政之求。某久去門牆。寢疎履屐。搥衣函丈。每懷問道之誠。負弩前驅。卽下望塵之拜。其爲欣抃。未易敷陳。

### 賀呂知府啓

恭審光膺中詔。滄昇左符。協於師言。出自上意。凡在部封之內。舉同抃舞之情。恭惟某官襟量恢闊。文辭卓偉。飛書走檄。名早震於華夷。仗節擁旄。功每書於竹帛。比屬邊烽之靜。力辭宮鑰之嚴。雖北闕之書。至於屢上。然東山之志。寧許遽從。果被審知。復膺重寄。仁風穆若。方回比屋之春。威望凜然。先破巨奸之膽。某自欣末路。得附餘光。不汝疵瑕。固荷包荒之度。令公喜怒。敢招越分之尤。惟殫惕勵之誠。用對眷知之好。

### 上陳安撫啓

佐州北固。麥甫及於再嘗。易地南昌。瓜未期而先代。雖千里困奔馳之役。幸一官託覆護之私。伏念某孤孽背時。彌心忤物。方牽聯而少進。已恐懼而遽歸。偶充振鷺之廷。自知非稱。不失屠羊之肆。其又奚言。比自列於私孀。遂再汙於除目。始終徼倖。俯仰慚惶。恭惟某官道極誠明。器函康濟。閱議兩朝之望。高名百世之師。經術淵源。造大學中庸之妙。文章簡古。在先秦兩漢之間。久以臺省之英。出試蕃宣之績。雖弗容而君子乃見。公初無欣戚之殊。然必進而朝廷始尊。國實繫安危之重。佇聞休命。大慰衆心。某再掃餘塵。增光末路。願才能之有限。加疾疢之未平。先生琴瑟書冊在前。類卒門人之業。小子洒掃應對則可。敢踰別駕之功。

### 上史運使啓

佐州北固。麥甫及於再嘗。地易南昌。瓜未期而先代。雖千里困道途之役。幸一官在部封之中。伏念某學本小知。器非遠用。昨侵尋於薄宦。偶比數於諸公。除目雖頻。不出百僚之底。駭機忽發。首居一網之中。謂宜永放於窮閭。猶得出丞於近郡。復緣私請。更冒明恩。超超空凡馬之羣。實非能辦。默默反屠羊之肆。其又奚言。僥倖非常。慚惶莫諭。恭惟某官英姿山立。大度淵渟。不媿於天而不忤於人。卓矣誠身之學。有考於前而有驗於後。大哉致主之言。願自信之甚明。雖不容而何病。使事有指。姑少試於澄清。治具畢張。要終煩於經濟。某小舟已具。漫刺將前。雖多病懷歸。徒費嗷枯之力。然至仁逮下。實寬東溼之憂。

卷八

啓十六首

答發解進士啓

都騎來臨。方快景星之先覩。雄文授贊。更慚明月之暗投。藏去爲榮。幸甚過望。伏惟某官文高藝圃。行著鄉評。雖餘將鳩漸於天廷。姑龍驤於學海。豈圖羈宦。適與榮觀。萬里搏風。莫測雲程之遠。一第涸子。行聞桂籍之傳。欣佩兼懷。敷宣罔既。

答廖主簿發解啓

都騎來臨。方快景星之先覩。雄文授贊。更慚明月之暗投。藏去爲榮。幸甚過望。伏惟某官文高藝圃。行著鄉評。雖數奇如李廣之封。猶強飯有廉頗之志。賈勇千人之敵。策勳百戰之餘。豈意羈遊。與觀盛事。故將軍羨妄校尉。知久鬱於壯圖。新天子用老舍人。宜卽膺於顯擢。其爲賀喜。莫究占言。

上二府乞宮祠啓

白首而困下吏。久安佐郡之卑。黃冠而歸故鄉。輒冀奉祠之樂。恃廊廟并容之度。忘江湖遠屏之蹤。敬布忱誠。仰干造化。伏念某讀書有限。與世無緣。歲月供簿領之勞。衣食奪山林之志。拊心自悼。顧影知慚。儻少道於飢寒。誓永投於閑散。頃以牽聯而少進。惕然恐懼而弗寧。亟辭振鷺之廷。徑返屠羊之肆。優游食足。敢陳楚些之窮。衰疾土思。但抱越吟之苦。伏望某官因材授任。與物爲春。察其愚無所能。乏細木侏儒之用。哀其窮不自活。捐太倉紅腐之餘。特假閑官。使安晚節。棄寶憲如孤雛死鼠。莫足矜憐。譬杜牧以白骨遊魂。少加恤養。某謹當收身末路。沒齒窮山。玩仙聖之微言。樂唐虞之盛化。杜門掃軌。固莫望於功名。却粒茹芝。冀羸成於道術。雖無以報。猶不辱知。

賀吏部陳侍郎啓

恭審顯膺帝睇。進貳天官。成命甫行。羣情交慶。若用人每皆如此。則公論寧復間然。竊以自昔撫運而有邦。孰不好賢而願治。然賢能之進。常齟齬而不合。治安之會。亦稀闊而難遭。京房事漢。則見謂小忠。孔子去魯。則自以微

罪有志之士。太息於斯。方今主上嗣無疆之慶基。恢有爲之遠略。思求人傑。俾代天工。當饋歎無蕭曹。共傳斯訓。恥君不及堯舜。今得其人。采四海之公言。奠六卿之要地。將期共政。以責奮庸。恭惟某官道大而氣剛。才全而業鉅。方登臺閣。則已挺然稱輔相之器。及試岳牧。則又卓爾著藩垣之勞。福及京師。名震天下。使能少貶。久已趣還。顧乃周旋四鎮之間。淹歷五年之久。積排擯斥疎而莫置。殆艱難險阻之備更。道之將興。理不輕畀。豈惟論思獻納。陳萬世之策。遂將經綸康濟。致三代之隆。某早出門牆。晚依幕府。誨言在耳。盛德銘心。駕下澤之車。雖已安於微分。磨瑯溪之石。尙擬頌於中興。

賀莆陽陳右相啓

恭審廷颺大號。位冠羣公。識者咨嗟。益信道行之有命。聞而興起。共知天定之勝人。某嘗因故老之言。竊考昭陵之治。乾坤大度。固兼容而罔間。日月之照。實無隱而弗臨。小人雖有倖進。而善類常多。故論亦或抵巇。而公議終勝。故士氣屢折而復振。邦朋既久而自消。諤諤昌言。天下誦道輔仲淹之直。巍巍成績。史臣書韓琦富弼之賢。固嘗端拜於遺風。豈意親逢於盛旦。恭惟某官名蓋當代。材高古人。瑰偉之器。足以貫大而投艱。精微之學。足以任重而道遠。方孤論折羣邪之銳。蓋一身爲衆正之宗。徇國忘家。惟天知我。論去草者絕其本。宜無失於事機。及驅龍而放之菴。果不動於聲氣。卓矣回天之力。孰曰拔山之難。積此茂勛。降時大任。豈獨明公視嘉祐之良弼。初無間然。亦惟聖主享仁祖之治功。殆其自此。某孤遠一介。遠離累年。登李膺之舟。恍如昨夢。遊公孫之閣。尙覲茲時。敢誓糜捐。以待驅策。

謝王宣撫啓

杜門自屏。誤膺物色之求。開府有嚴。更辱招延之指。銜恩刻骨。流涕交頤。伏念某獨學寡聞。倦遊不遂。瀾翻誦說。愧口耳之徒勞。跌宕文辭。顧雕蟲而自笑。頃預朋來之列。適逢聖作之辰。王音親錫於儒科。奎翰特嘉於樸學。會未乾於詔墨。已亟遠於周行。病骨支離。遭塗顛沛。驚馬空思於十駕。沉舟坐閱於千帆。方所向而輒窮。已分甘於永棄。侵尋末路。邂逅賞音。招之於衆人鄙遠之餘。挈之於半世奇窮之後。夫富貴外物。唯事賢可謂至榮。父子雖親。然相知猶或不盡。曾是疏遠至孤之迹。又無環奇可喜之能。不知何由。坐竊殊遇。稱於天下曰知己。雖或間然。

雖使古人而復生。未易當此。此蓋伏遇某官民之先覺。國之宗臣。精義探鑿表之微。英辭鼓海內之動。至誠貫日。踐危機而志意愈堅。屹立如山。決大事而喜慍不見。雖裴相請行於淮右。然蕭公宜在於關中。姑訖外庸。卽登魁柄。凡一時之薦寵。極多士之光華。豈謂迂疎。亦加采錄。某敢不急裝俟命。碎首爲期。運筆颯颯而草軍書。才雖盡矣。持被刺刺而語婢子。心亦鄙之。尙力著於微勞。庶少伸於壯志。

通判夔州謝政府啓

貧不自支。食粥已踰於數月。幸非望及。彈冠忽佐於名州。孰知罪戾之餘。猶在憫憐之數。銜恩曷報。撫己知慚。伏念某少也畸人。長而獨學。好莊周齊物之說。樂以忘憂。讀嵇康養生之篇。慨然有志。秉心不固。涉世淺深。兒女忽其滿前。藜藿至於併日。屢求吏隱。冀代躬耕。亦嘗辱記其姓名。固欲稍畀之衣食。費元化密移之力。不知幾何。悼孤生一飽之艱。迺至如此。卒叨薄祿。實謂殊私。此蓋伏遇某官黼黻帝猷。權衡國論。開公孫之東閣。共欣多士之彙征。解晏子之左驂。不忍一夫之獨廢。召來和氣。力致隆平。惟是魚復之故城。雖號烏蠻之紀塞。乃如別駕。實類閑官。况憚憚方起於徒中。宜凜凜過虞於意外。固弗敢視馬曹而不問。亦每當占紙尾而謹書。豈有功勞。能自表見。念昔竝遊於英俊。頗嘗抒思於文辭。既嗟氣力之甚卑。復恨見聞之不廣。今將窮江湖萬里之峻。歷吳楚舊都之雄。山巔水涯。極詭異之觀。廢宮故墟。弔興廢之迹。動心忍性。庶幾或進於豪分。娛憂紓悲。亦當勉見於言語。儻羸傳於後世。猶少答於深知。過此以還。未知所措。

謝洪丞相啓

薄技効官。曾是青袍之朝士。明恩起廢。更爲朱綬之山人。雖莫與於鴻鈞。猶竊陶於盛化。敢修尺牘。敬布寸心。伏念某承學孤生。輟耕漫仕。頃輪勞於鉛槧。嘗廁迹於紳綬。再歲京華。每有鳧雁少多之歎。一時士類。或爲草木臭味之同。因遭衆口之鑠金。孰信淡交之如水。訖由寬貸。得遂退藏。幸未抵於投荒。乃復汗於除吏。茲蓋伏遇某官應期降命。同德格天。以淵源之學。潤色皇猷。以直大之氣。折衝世變。彝鼎方書於偉績。濤瀾忽起於畏塗。際嘉會之風雲。將開平治。畀凶人於豺虎。亟正讒誣。乃顧近藩。暫勞臥護。鋤耒競勸。流道已見於四歸。絃誦相聞。風俗殆期於一變。俯念編氓之賤。嘗居部吏之間。假之餘光。使不終廢。而某自安隱約。久困沉縣。和壽民擊壤之歌。徒欣

末路刻唐士齊天之烈尙俟他時

上王宣撫啓

薄命遭回阻竝遊於簪履。丹誠精確猶結戀於門牆。敢辭蹈萬死於不測之途。所冀明寸心於受知之地。伏念某稟資凡陋承學空疎。雖肝膽輪囷常慕昔賢之大節。迺齒牙零落猶爲天下之窮人。撫劍悲歌臨書浩歎每感歲時之易失不知涕泗之橫流。昨屬元臣暫臨西鄙。獲廁油幕衆賢之後。實輕玉關萬里之行。奮厲欲前駑馬方思於十駕。羈窮未愆。沉舟又闕於千帆。傷弱植之易搖。悼鴻鈞之難報。心危欲折。髮白無餘。如輪勞効命之有期。顧隕首穴胸而何憾。茲從剡曲。來次夔關。雖未覘於光躔。已少紓於志願。此蓋伏遇某官應期降命。生德自天。器宇魁闔。鍾太行黃河溫厚之氣。文章鉅麗。有慶曆嘉祐太平之風。取人不棄於小材。論事每全於大體。念茲虛薄。奚足矜憐。然遭遇異知。業已被辰前之薦。使走趨遠郡。豈不爲門下之羞。儻回曩昔之恩。俾叨分寸之進。窮子見父。可量悲喜之懷。白骨成人。盡出生全之賜。過此以往。未知所載。

謝晁運使啓救火後發舉狀

事出權宜弗及先言而後救。恩加慰藉乃煩竝蓄而兼收。甫定驚魂已橫感涕。伏念某灰心賤士。焦尾餘生。學纔比於聚螢。智莫階於束緼。偶緣竊宦。獲託餘光。別駕治中。已負曠瘼之責。祝融回祿。更慚備禦之疎。方炎官熱。屬之鼎來。寶杯水輿薪之弗救。煙埃蔽日。緘缶交塗。鬱攸遽駭於黔廬。倉卒僅知於顧府。焦頭爛額。本資衆力之同。露蓋暴衣。至屈使華之重。惟當治罪。寧可論功。此蓋伏遇某官造道精深。宅心誠敬。曲記熒熒之迹。特收赫赫之威。憐葉燕之幾焚。脫池魚於必死。弗用玉璫。方勤人事之修。等與牛車。俾離火宅之怖。某敢不仰思難稱。俯愧無勞。深念客言。更謹徙薪之戒。廣儲水器。常如濡幙之時。過此以還。未知所措。

謝夔路監司列薦啓

意象曩然。揣分方安於下吏。寵光異甚。交章遽上於公車。莫測何由。但知難稱。伏念某久嬰醫病。見謂散材。偶從諸老先生之遊。竊得前言往行之略。可咨各事。少年誤竊於虛名。力洗陳言。晚節方慚於大學。一來楚破。再闔王春。惟體重於藩方。故職均於曹掾。占名惟謹。幸逃有蟹之嘲。竊祿甚微。屢起無魚之歎。豈期僉論驟及。孤蹤遂令

枯槁之餘。漸有數榮之望。此蓋伏遇某官器函魁磊。讓極崇欬。雖持秋霜夏日之嚴。每廓滄海洪河之量。大呼相和。或容醉吏之狂。重聽何傷。曲恕孽丞之老。雖深知其無用。亦竝采而不遺。某敢不強恕求仁。質直好義。庶幾夙夜。或免小人之歸。猶有鬼神。尙圖國士之報。

答薛參議啓

伏審光奉制書。來參戎幟。山川信美。久嗟人物之寂寥。車騎甚都。一聳吏民之瞻視。極知趣召之在邇。猶幸小留而後東。恭惟某官器度清真。風規高亮。驥行千里。騰驥本結於主知。虎拒九關。排斥遂收於朝蹟。惟是雄豪之氣。寓於鉅麗之文。南弔沉湘。西廣諭蜀。願臥龍之遺蹟。有化鶴之故城。雖左官共歎於滯淹。然絕景政煩於彈壓。某久疎塵尾之誨。喜聞鷓首之來。聯遠遊之詩。固莫追於大手。續郊居之賦。猶小異於庸人。

答衛司戶啓

彈冠巫破。早欽三語之賢。振旆蜀江。首拜尺書之寵。情文兩厚。感作兼深。伏惟某官自立修名。蚤收上第。千人所見。共推高明。練達之才。一座盡傾。行接醞藉。雍容之論。豈獨有光於吾黨。固將增重於此州。至於痛懲文法之疎。一振廉隅之壞。非俗吏所爲也。微君子其能乎。願疾其驅。用諧所冀。

與何蜀州啓

漂流萬里。可知已老之頭顱。贊貳一城。復得本來之面目。將就脂車之役。致稽削牘之恭。伏念某小智自私。大惑莫解。自收朝蹟。久困宦遊。冒別駕治中者三州。假軍諮祭酒者數月。老驥伏櫪。雖未歇於壯心。逆風撐船。終不離於舊處。忘栖栖之可笑。復挈挈以此來。恭維某官曠度清真。高標峻潔。體道自得。有見於參倚之間。受氣至剛。不移於毀譽之際。願公言之允穆。知追詔之方行。政憲窮途。猥塵上佐。然某比緣多病。深願少閑。歲計之有餘。當守平生之素志。治行其無事。更歸長者之餘風。

答交代楊通判啓

瓜戍及期。幸仁賢之爲代。萍蹤無定。悵候問之未遑。敢謂勞謙。特先榮翰。伏惟某官淵乎似道。直哉惟清。風致雖高。不廢應酬於衆務。文詞甚麗。要皆原本於大經。所宜問津於黃扉青瑣之間。何至涉筆於赤甲白鹽之下。卽聞

號召遂陟清華。某猥以陳人。偶叨未契。道途迫遽。僅能占報於記曹。舟楫軻峨。弗獲往迎於市暨。歸依之素。數敘奚殫。

### 與趙都大啓

淳被臺移。攝陪幕辯。方刻章而俟報。輒懷檄以徑前。迫於奇窮。作此頑鈍。冒世俗之所憫笑。賴門下以爲依歸。伏念某下愚無知。大惑不解。罪宜永斥。朝蹟已收者十年。身困遠遊。車轍幾環於萬里。比官巴峽。旋客塞垣。歲月不知其再周。形影相顧而自悼。支離病骨。無毀而亦消。羈旅危魂。雖招而未返。念惛惛之安往。復挈挈以此來。豈忘慙笨。實恃矜惻。老馬已甘於伏櫪。敢望長途。窮猿方切於投林。況依茂蔭。斯蓋伏遇某官資函英達。學蘊淵源。早奮奇謀。蓋處囊而立見。晚更劇任。真遊刃以無前。寶儲直中禁之嚴。玉節寄西陲之重。曲憐狂簡。自致漂流。每假借於餘談。爲經營其一飽。致茲小憩。盡出大恩。某敢不痛洗昨非。姑休疲役。必陵笠澤。雖賒故國之歸期。錦江草堂。聊竊老師之補處。

### 卷九

#### 啓十六首

##### 與成都張閣學啓

薄遊萬里。最爲天下之窮。攝守一官。猥與幕中之辯。將攜孥而就食。敢削牘以告行。伏念某下愚難移。大惑莫解。光陰晚晚。已逾不惑之年。簿領沉迷。猶在無聞之地。嗟征途之可厭。捨舊館而疇依。爲晏平仲執鞭。旣云素願。就謝仁祖乞食。寧復自疑。茲承行省之移。遣備大藩之屬。雖刻章之未報。輒懷檄以徑前。冒行世俗之譏訶。實恃門闌之知獎。老馬已甘於伏櫪。敢望長途。窮猿方切於投林。況依茂蔭。恭惟某官學函經濟。洞極誠明。秉心無邪。不媿於俯仰之際。體道自得。有見於參倚之間。學倡諸儒。惠加多士。雖困窮之自取。亦提挈而不遺。照隱察微。每能得之濼上。哀窮悼屈。幾若推之溝中。施及孤生。亦叨異顧。某敢不暫休疲役。痛洗昨非。陪蓮幕之英遊。雖知遲暮。居草堂之補處。尙竊光華。



答勾簡州啓

近被臺移。來陪幕辯。以海內孤寒之迹。假天涯獨冷之官。但虞譏訶。誰肯慰藉。忽奉華箋之貺。豈勝末路之榮。伏念某性資冥頑。問學衰廢。留落殊方者累歲。奇窮舉世而一人。雖夢寐思歸。類澤國春生之雁。而巾瓶無定。如雲堂且過之僧。比叨閭屬之招。實過野人之分。方刻章而待報。忽捧檄以徑前。久矣倦遊。幸茲小憩。此蓋伏遇某官風猷凝粹。志節清真。念俛俛浪迹之安歸。假臺臺餘談而借助。遂容萍梗。暫息適途。惟此意之甚恩。實衰俗之創見。而某自侵晚景。久歇壯心。理剡曲之歸舟。方從此日。卜浣花之絕境。敢效先賢。

與蜀州同官啓

去國十年。鮑作江湖之夢。佐州萬里。又寬溝壑之憂。伏惟某官材術清通。風猷凝粹。雖小試尙淹於遠業。而盛名已著於僉言。俯念孤蹤。方厄黃楊之閏。特詒妙翰。俾生枯槁之春。靖言留落之餘。曷副吹噓之意。感慙交集。數紱奚禪。

賀薛安撫兼制置啓

恭審璽封綠底。疏恩遙下於霄宸。幙建碧油。開府全臨於井絡。周邦咸喜。舊觀復還。民望息肩之期。士知託命之所。竊以江淮駐蹕。勝人在天定之時。梁益宿兵。擊首有尾應之勢。儻事權之少削。則脈絡之不通。宜得股肱之夏。用增臂指之重。至於旁連荆豫。外撫戎蠻。亭障籌騰。東軼巴渝之阻。關河重復。西當秦隴之衝。蓋有應變於立談之間。豈容稟令於千里之外。維時詔旨。實契事機。恭惟某官淵博有傳。方嚴不撓。欲言崇議。卓爲百世之師。傑作雄辭。散落四夷之遠。入則首處六官之長。出而邁膺十乘之華。進用雖速。而人猶恨其滯淹。位望愈崇。而心益持於挹損。函湖海胸懷之大。負廟堂器業之優。將究顯庸。果膺隆委。關中既留蕭丞相。上遂寬西顧之憂。江左自有管夷吾。人共望中興之盛。而况絲綸之命。適茲孤矢之期。維嶽降神而生申。丕應風雲之會。夢帝賚弼而得說。端觀袞繡之歸。某去國十年。佐州萬里。縛袴服弓刀之役。雖恨迫於衰遲。思裾陪簪履之塵。尙欣承於閑燕。歸依之至。數紱奚禪。

與李運使啓

伏審抗章力請優詔曲從。雖暫勞諭蜀之行。然益見回天之力。恭惟某官致知格物。學道愛人。親承西洛之正傳。獨殿中朝之諸老。至於盤礴遊戲之翰墨。嬉笑怒罵之文章。過黃初而有餘。嗟正始之復見。飛騰捷路。耻煩狗監之吹噓。散落還荒。寧付鷄林之鑑裁。比下九天之號召。已傾四海之觀瞻。不俟駕行。命義雖存於大戒。可以理奪。忠孝果得而兩全。方帥閩之猶虛。以計司而兼莅。仰惟臺省清華之宿望。加以山林高逸之雅懷。一琴一龜。預想鈴齋之靜。三熏三沐。尙陪藥市之遊。過此以還。未知所措。

上鄭宣撫啓

伏審顯膺大號。出董成師。自陝以西。咸舞歌於德化。從天而下。卽震疊於威靈。豈惟瀚海玉關。馳奏捷之音。將見博士議郎上策勳之典。士心闔懌。國勢尊安。竊以當今秦蜀之權。重無與比。中原祖宗之地。久猶未歸。旣天定而勝人。宜王明之受福。非得太行黃河山川所鍾之傑。誰復廢曆嘉祐華夏太平之基。先王克相後人。上帝爲生賢佐。雖遠猷辰告。暫違帳殿之深嚴。然大臣暑行。式慰轅門之僕望。復河關其自此。知龜筮之悉從。恭惟某官氣壓羣公。才周萬務。識若著龜之先見。論如山嶽之不移。湖海襟懷。正在大牀之獨臥。廟堂風采。未妨一壑之初心。茲輟近司。來恢遠略。弼臣同德。何難運帷幄之籌。真儒爲邦。寧止學俎豆之事。已慶登壇而授鉞。過觀推轂而出師。先天下而深憂。方遠同於文正。卽軍中而大拜。豈專美於熙寧。某流落無歸。棲遲可歎。青衫去國。十載於茲。白首佐州。一人而已。願尙賒於委骨。猶復覲於伸眉。仰跂光躔。雖阻服弓刀之役。鋪張勳業。或能助金石之傳。過此以還。未知所措。

賀葉樞密啓

恭審顯膺明詔。進貳鴻樞。道大材全。固視功名爲餘事。任隆位重。蓋倚精神之折衝。衆志交孚。太平可冀。伏聞今昔有不移之形勢。華夷有一定之土疆。故彼不可越燕薊而南侵。猶我不能跨遼碣而北守。堯舜尙無冠帶百蠻之理。天地豈忍矜腥諸夏之區。又況以本朝積累。而當荒陋崛起之小夷。以陛下神武。而討衰弱僅存之虜虜。重以軍民之憤切。加之廟祫之威靈。當一震於雷霆。宜坐消於氛祲。夫何玩寇。久使逋誅。九聖故都。視同棄屣。兩河近地。進若登天。莫宣方叔之壯猷。更類棘門之兒戲。坐殫民力。孰奮士心。上方撫髀而喟然。公宜出身而任此。恭

惟某官負沈雄邁往之略。躬英發絕人之姿。撫卷慨慷。夙有四方之大志。立朝開濟。晚收九牧之重名。果副簡求。肆當柄任。以元龍湖海之氣。參子房帷幄之籌。北斗以南一人。誰其倫擬。長安之西萬里。行矣清夷。某識面莫先。託身最早。側聽延登之渥。自悲淪落之餘。雖意氣摧藏。非復雕鷲離風塵之望。然飢寒蹙迫。猶懷驚馬戀棧豆之思。敢敬布於微誠。覲少回於曩睠。

## 除制司參議官謝趙都大啓

攝郡壘之左符。已逾素望。備賓僚之右席。復玷明恩。雖可知已老之頭顱。猶幸得本來之面目。伏念某下愚不肖。至拙無能。陪蓬嶠之後塵。最爲薄命。省桃源之昨夢。恍若前身。泛然不繫之舟。莫知稅駕之地。豈圖末路。更汚除書。蓋將問道質疑。求備老聃之役。豈獨襲賤染翰。預廣嚴武之詩。樂哉斯行。幸甚過望。茲蓋伏遇某官學窺聖域。望冠時髦。根於高明。用以忠恕。執詩書之正印。司翰墨之衆盟。富貴不驕。有偉周宗之百世。誠明自得。屢班漢詔之六條。方當日有九遷之榮。何難身兼數器之地。施及萍蓬之孤迹。亦叨俎豆於羣英。但不稱之是虞。豈辱知之敢望。已遷臺檄。即發山城。紀文饒戎幕之談。當從茲日。窺逸少蘭亭之帖。或在暮春。過此以還。未知所措。

## 賀葉丞相啓

恭審誕告大廷。延登真相。永惟夷夏戴宋之舊。思見太平。時則祖宗在天之靈。爲生賢佐。海內幸甚。國勢巋然。某少從史氏之游。羸習星官之說。去歲之杪。垂象有開。太微紫垣。忽一新於景氣。神州赤縣。將寢復於提封。曾未閱時。遽聞休命。昭哉天人精禋之際。見於君臣會遇之初。恭惟某官鍾河嶽英靈之姿。應乾坤開泰之運。器函魁碩。論極崇絃。萬卷讀書。盡是經綸之蘊。十年遇主。獨高康濟之功。比邇井絡之歸。式贊斗樞之重。俄進陪於大政。果首建於永圖。股肱良哉。耻君不及堯舜。期月可也。致治庶幾成康。方將修未央長樂之故宮。築馬邑雁門之絕塞。興植禮樂於僵仆之後。整齊法制於搶攘之餘。威懾殊鄰。玉輦受涓橋之謁。治借邃古。金泥增岱嶽之封。然後遨遊謝傳之東山。偃息蕭何之甲第。委成功而不處。享眉壽於無窮。某遠寄殊方。久孤隆眷。驥老伏櫪。知難效命於馳驅。狐死首丘。但擬祈哀於造化。

## 賀龔參政啓

恭審光膺明詔。進貳政樞。爲治不難。其道願何如耳。用人若此。吾國其庶幾乎。傳聞四方。驩喜一意。某聞公論。未嘗盡廢。常恐不在於朝廷。小人豈必無材。惟患與聞於國事。誠使元臣大老。守紀綱而不紊。近習外戚。保富貴而有終。政一出於廟堂。權弗移於貴倖。豈獨坐消於外侮。固將馴致於太平。孰成伊尹格天之功。其在孟子敬王之學。恭惟某官材負超軼。器局恢闊。造道深。故能泛應而不窮。進身正。故敢盡言而無諱。建久安之勢。成長治之業。已收効於立談。開衆正之路。塞羣枉之門。曾不勞於變色。薦紳相賀。史冊有光。然而仁人先天下而憂。重矣自任。賢者備春秋之責。艱哉克終。某十年獨荷於異知。萬里敢虛於忠告。輒因尺牘。罄寫寸誠。未死殊方。或見丕天之偉績。猶期末路。終爲盛世之幸民。

答交代陳太丞啓

撫銅人而歎息。方感舊遊。拾竹馬之棄遺。偶叨新命。會馳書之未暇。愧飛翰之鼎來。恭惟某官鴻漸賢關。鳳儀朝著。傑作紀永和之會。逸矣風流。清言繼正始之音。超然名勝。初叱乘輅之馭。已勤側席之思。峻陟容臺。靈階清禁。某自憐末路。獲踵後塵。君遣使而有光華。即載驅於原野。匠誨人而以規矩。尙竊望於門牆。

與錢運使啓

奔走九年。僅補州麾之選。來歸萬里。遽叨使傳之華。踰分已多。置慙無所。伏念某粟資甚陋。賦命多艱。跌宕文辭。本是書生之常態。蹉跎名宦。獨爲天下之畸人。比由西蜀之歸。獲俟東華之對。進趨梗野。占奏空疎。謂擯斥之是宜。豈超逾之敢望。此蓋伏遇某官道參聖域。學擅經邦。愛惜人材。每陰借之餘論。維持公道。尤深憫於窮途。致此妄庸。亦叨臨遣。某服膺已久。擁篲有期。大匠之規矩可師。方日親於函丈。小夫之竿牘自見。姑少述於萬分。

答南劍守林少卿啓

比解邊城。猥叨使傳。顧惛惛之寡助。宜挈挈而亟行。揣分已踰。置慙靡所。伏念某百罹薄命。九折窮途。跌宕文辭。已困諸生之小技。沉迷簿領。又無俗吏之能聲。乃者來歸。頽然遲暮。進趨梗野。占奏空疎。宜居擯斥之科。敢辱光華之命。茲蓋伏遇某官道該聖蘊。學擅經邦。獨倡諸儒。躬伊尹天民之先覺。興憐末路。念正元朝士之無多。致此妄庸。亦叨臨遣。某方圖馳問。已辱詒書。墨妙筆精。雖喜窺於近製。頭童齒豁。更自感於殘年。

## 與建寧蘇給事啓

奔走九年。僅補州麾之選。來歸萬里。遽叨使傳之華。泰冒過優。慙惶莫喻。伏念某多奇薄命。孑立孤生。小智自私。守紙上區區之糟粕。大惑不解。蹈人間洶洶之風波。比由隴蜀之歸。獲奉宣溫之對。樸學不足以恭承清問。蕪辭不足以罄寫丹衷。謂擯斥之是宜。何超踰之敢望。此蓋伏遇某官材高而善下。道峻而兼容。哀元祐之黨家。今其餘幾。數紹興之朝士。久矣無多。曲借餘光。少伸末路。某逖違燕語。喜望提封。大匠之規矩可師。方亟趨於函丈。小夫之竿牘自見。姑少述於萬分。

## 與本路郡守啓

比奉宸綸。躡乘使傳。方懼謬恩之及。敢勤流問之先。伏念某潦倒寒生。沉迷薄宦。曲江禁柳。早旅食於京華。東閣官梅。晚狂吟於蜀道。偶然不死。復此來歸。豈期顛顛之餘。亦玷光華之選。此蓋伏遇某官天資甚茂。朝望素高。俯憐萍梗之孤蹤。每借齒牙之餘論。遂令留落。忽有超逾。某弛擔云初。登門尙阻。川途悠遠。敢辭叱馭之行。風度清真。先想凝香之地。

## 福建謝史丞相啓

大鈞播物。萬化悉付之無心。小己便私。一宦獲從於所欲。可謂難遭之會。空懷莫報之恩。伏念某早出門闈。嘗塵班綴。士於知己。寧無管鮑之情。人之多言。誣爲牛李之黨。既逡巡而自引。因委棄而莫收。晚參戎幕之遊。始被邊州之寄。知者希則我貴矣。何嫌流俗之見排。加之罪其無辭乎。至以虛名而被劾。甫周歲律。復畀守符。曾未縮於印章。已遽膺於號召。行能亡取。資望尙輕。便朝纔畢於對揚。使指遂叨於臨遣。此蓋伏遇某官兩朝元老。千載真儒。以道德性命。訓迪人材。以禮義廉耻。維持國勢。哀窮悼屈。如伐木故舊之不遺。懷昔感今。異積薪後來之居上。遂容孱瑣。猶被甄收。某敢不斂散視豐凶之宜。阜通去農末之病。觀近臣以其所主期無負於深知。非俗吏之所能爲。或蠹施於素學。過此以往。未知所裁。

啓十七首

上趙參政啓

造于王廷。既盡除於宿負。試以使事。復躡被於明恩。豈惟寬溝壑之憂。遂亦有桑榆之望。大鈞難報。末路知榮。伏念某固陋不通。迂疎寡合。雖抱宿道鄉方之志。了無赴功趨事之能。迨從幕府之遊。始被邊州之寄。方凜流於萬里。望飽暖於一麾。豈圖下石之交。更起鏗金之謗。素無實用。以爲類放。則不敢辭。橫得虛名。雖曰僥倖。而非其罪。甫周歲律。再畀守符。曾未縮於印章。已遽膺於號召。遂以羈旅入朝之始。首預光華遣使之行。此蓋伏遇某官造德精微。宅心忠厚。念錦里十年之卜筮。已是蜀人。憐萍蹤萬里之來歸。特捐漢節。蕭然遲暮。被此恩榮。某敢不敏。散視豐凶之宜。阜通去農末之病。觀近臣以其所主。期無負於深知。非俗吏之所能爲。或羸施於素學。過此以往。未知所裁。

上安撫沈樞密啓

造于王廷。既盡除於宿負。試以使事。復躡被於明恩。豈惟寬溝壑之憂。遂亦有桑榆之望。慙汗爲之浹背。感涕至於交頤。伏念某固陋不通。迂疎寡合。雖抱宿道鄉方之志。了無赴功趨事之能。自屏跡於寬閑。已頽心於榮進。徒中起廢。方蒙燹道之除。望外召還。忽奉燕朝之對。然而進趨梗野。論奏空疎。徒叨三接之榮。莫陳一得之慮。循名責實。所宜伏司。敗之誅。含垢匿瑕。特俾玷外臺之寄。茲蓋伏遇某官望隆而善下。道峻而兼容。袁元祐之黨家。今其餘幾。數紹興之朝士。久矣無多。曲借餘光。少伸末路。某敢不求民疾苦。絕吏竝緣。斂散視時。益廣倉箱之積。阜通助國。庶無農末之傷。過此以還。未知所措。

賀泉州陳尙書啓

恭審顯奉璽書。起臨藩府。廟堂虛位。固宜大老之遂歸。嶽牧得人。聊見太平之有象。恭惟某官道參聖域。德冠民彝。下視諸公。負元龍湖海之豪氣。獨尊九牧。擅諸葛宇宙之大名。風雲自際於明時。金石靡渝於素履。超然去國之久。綽有高世之風。雖力避寵名。亟欲急流而勇退。願眷求舊德。未容袖手而旁觀。姑暫起於名邦。卽延登於政路。某久違德宇。喜聽除音。承顏接辭。恍不殊於曩日。質疑問道。尙自慰於窮途。

答建寧陳通判啓

伏審顯膺新渥。出貳潛藩。逃聞旌旆之臨。宜有神明之相。伏惟某官風規高秀。德宇粹夷。含英咀華。早預蓬萊道山之選。飛英騰茂。暫爲治中。別駕之行。雖澹然克守於家風。顧藉甚難淹於國器。卽聞追詔。遂陟顯途。某託契至深。開緘竊喜。自憐下客。久孤國士之知。猶冀殘年。及見郎君之貴。

答漳州石通判啓

伏審被命佐州。涓辰視印。士心甚鬱。謂斂經濟以惠小邦。天意孰知。蓋諸名望而須大用。伏惟某官好是正直。擇平中庸。崇論絃言。挺松柏貫四時之操。高文大冊。擅江河流萬古之名。謂宜凌厲以橫翔。乃復逡巡而小却。使爲治中。乃展驥耳。雖暫試於外庸。不有君子。其能國乎。當亟還於近列。某未遑馳問。先辱寄聲。祭竈而請比鄰。歎高懷之莫測。烹魚而得尺素。藏妙語以爲榮。

江西到任謝史丞相啓

詣行在所。方承命以北馳。駕使者車。復改轅而西上。訓詞甚寵。地望加優。本宜使之省循。乃更增其僥倖。伏念某性資鄙陋。學問荒唐。雖慕長者之餘風。豈聞君子之大道。早親函丈。偶竊緒餘。曾未免於鄉人。乃見待以國士。知憐覆護。殆塵沙曠劫之難逢。頽隨摧藏。無絲髮微勞之上報。昨者甫還吳會。卽使甌閩。超躡既多。便安尤極。徒以久違於公袞。悵然願事於師門。山川間之。日月逝矣。方坐馳於夢想。忽祇奉於詔追。深惟幸會之非常。但懼奔馳之弗及。夫何奇蹇。更累生成。方仇怨造言。投鼠不思於忌器。乃保全極力。舍牛寧廢於鬻鐘。此蓋伏遇某官偉量包荒。深仁篤舊。念招之來而麾之去。若匪近於人情。謂舍其短而取其長。猶可勝於官使。故推餘潤。以及枯莢。而某筋力疲於往來。疾忿成於憂畏。質疑問道。自憐卒業之何時。訟過戴恩。尙冀收身於末路。

謝趙丞相啓

詣行在所。方承詔以北馳。駕使者車。復改轅而西上。仰戴公朝之寬大。重爲遠吏之光華。伏念某拳曲散材。齧牙末學。衣食不繼。自竄夔楚之邦。齒髮衰衰。倦遊隴蜀之境。惟習氣未忘於筆硯。每苦心自力於文詞。藏之名山。本欲羸傳於後世。待以國士。豈期親遇於鉅公。記憶不忘。詔除屢下。雖復顛躋於薄命。要爲比數於明時。而况仍皇

華臨遺之榮。易江表清閑之處。優遊甚適。僥倖難名。此蓋伏遇某官誕保民彝。堅持國是。致君密勿。偉治具之必張。望古慨慷。閱道術之將裂。務廣人文之化。仰扶主斷之明。念此窮途。爲之擇地。更令破萬卷之讀。或可成一家之言。某敢不開益舊聞。激昂懦意。稍竊簿書之暇日。試求學問之新功。櫛櫛侏儒。儻未捐於大匠。雕蟲篆刻。尙少進於故時。庶仰答於聖知。亦羸酬於鈞播。過此以往。未知所裁。

### 謝王樞使啓

詣行在所。方承詔以北馳。駕使者車。復改轅而西上。訓詞甚寵。地望加優。伏念某拳曲散材。遭回末路。浪遊山澤。不知歲月之屢遷。篤好文辭。自是書生之一癖。斐然妄作。本以自娛。流傳偶至於中都。鑒賞遂塵於乙夜。既閱期年之久。兩膺召節之頒。雖改命於半途。尙乘輅於各部。始終僥倖。進退光榮。茲蓋伏遇某官謨明弼諧。任重道遠。以國士待我。卓爲特達之知。於古人求之。每極吹噓之論。詔除屢下。器使不遺。雖云薄命之顛躓。要是公朝之記省。某敢不竊簿書之暇日。求學問之新功。櫛櫛侏儒。儻未捐於大匠。雕蟲篆刻。尙少進於曩時。庶仰答於上恩。亦羸酬於鈞播。過此以往。未知所裁。

### 謝錢參政啓

詣行在所。方承詔以北馳。駕使者車。復改轅而西上。訓詞甚寵。地望加優。伏念某少苦賤貧。長更憂患。名場蹭蹬。幾白首以無成。宦海漂流。顧青衫而自笑。不圖遠戍。乃誤明恩。一麾在巴蜀之間。萬里促宣溫之對。清光咫尺。密獎再三。略有司資格之常。備奉使詢謀之選。方虞官謗。又辱詔追。半道遣行。雖歎棲遲之薄命。頻年記錄。要爲比數於公朝。茲蓋伏遇某官培植衆材。主張公論。憐其跋前疐後。姑令全進退之宜。謂其尺短寸長。或可責馳驅之効。曲加杖拭。俾竊便安。某謹當增所不能。修其可願。侵尋遲暮。雖嗟已失於東隅。激勵衰疲。尙及未先於朝露。

### 謝侍從啓

祈天請命。冀循省於叢祠。便道之官。復馳驅於近甸。始終僥倖。俯仰兢慙。伏念某鄙朴不材。荒唐寡學。生逢盛際。無尺寸之可稱。久戍遠方。乞斗升而自活。昨蒙臨遣。已劇超逾。但虞薄祐之難勝。寧復異恩之敢望。未溫坐席。遽辱賜環。初疑誤報者再三。俄乃真承於尺一。文詞吏事。何者羸堪。物論人情。居然不允。非賴密加於覆護。固難終



道於顛隴。此蓋伏遇某官義薄九天。量容百輩。念器盈則覆。推轂無所復施。然令出惟行。反汗豈其得已。遂容末路。獲忝優除。雖愧招麾之類。亦驚弔賀之速。而某昨緣奔走。積困沉綿。顧影獨悲。豈久堪於從宦。服勤不怠。尙少贖於空餐。

謝臺諫啓

祈天請命。冀循省於窮閭。便道之官。復馳驅於近甸。始終僥倖。俯仰兢慙。伏念某鄙朴不材。荒唐寡學。生逢盛際。無尺寸之可稱。久戍遠方。賴斗升而自活。昨蒙臨遣。已劇超逾。但虞薄祐之難勝。寧復異恩之敢望。未溫坐席。遽辱賜環。初疑誤報於姓名。俄乃真承於詔命。人才吏事。何者羸堪。自計旁觀。居然不允。敢謂并包之廣大。更令進退之從容。此蓋伏遇某官山立英姿。海涵偉量。盡言劇論。雖震聳於朝端。用恕持平。每保全於士類。遂容末路。獲忝優除。俯伏以思。論報何所。而某昨緣奔走。積困沉綿。顧影獨悲。豈久堪於從宦。服勤不怠。尙少贖於空餐。

與本路監司啓

詣行在所。方奉詔以北歸。駕使者車。復改轅而西上。稍息道途之役。獲全溝壑之身。揣分已逾。置慙靡所。伏遇某類然遲暮。久矣漂流。戍隴十年。形容盡變。還吳萬里。交舊半空。騎馬而聽朝雞。已冥心於昨夢。賣刀而買耕犢。將掃軌於窮閭。敢謂頻年。屢膺嚴召。既衆知其不可。亦自揆之甚明。所期獨往於山林。乃得本來之面目。此蓋伏遇某官英姿山立。大度海涵。愛惜人才。每陰借之餘論。維持公道。尤深憫於窮途。施及安庸。未忘記省。某登門維舊。擁篲有期。大匠之規矩可師。卽趨函丈。小夫之竿牘自見。姑致萬分。

答本路郡守啓

末路賜環。本出聖知之舊。半途畀節。尙承寵命之新。揣分實逾。置慙靡所。伏念某易搖弱植。無用散材。轍環天下。而老於行。寧非薄命。舟近神山而引之去。殆有宿緣。方力丐於退藏。乃更叨於臨遣。此蓋伏遇某官指南公識。推轂時髦。顧雖流落之餘。亦在揄揚之末。某方勤馳傳。未卜登門。頌詠之私。敷宣罔既。

答寄居官啓

賜環半道。易節回轅。去閩中瘴癘之區。得江表清閑之地。優游甚適。僥倖難名。此蓋某官義重嗟枯。情深推轂。每

假揄揚之助。俾叨臨遣之榮。黃櫨幹晏簽判云。老夫耄矣而無能。寧有澄淸之効。君子居之而何陋。尙陪名理之餘。范幹提云。尺素驚傳。喜論交之未替。一樽相屬。悵道舊之何由。陳檢法云。汨沒簿書。敢冀澄淸之効。從容談笑。尙爲衰晚之光。

### 賀蔣正言啓

恭審優直北扉。方演出綸之命。拾遺西省。遂輸補袞之忠。上虛佇於嘉言。士共歸於碩望。恭惟某官英辭擅世。偉識絕人。諸老先生聞名而願交。學士大夫望風而知敬。警書羣玉之府。視草承明之廷。比傳夜對之從容。屢動天顏之忻懌。主聖臣直。共知千載之逢。言聽諫行。獨任七人之責。木從繩而必正。石投水以奚難。某屬以乘輅阻陪賀厦。比年十漸。必盡告於吾君。一日九遷。將孰先於門下。其爲抃躍。罔罄敷陳。

### 賀周參政啓

恭審顯奉廷揚。進陪國論。號令煥焉可述。乃專討論潤色之功。疇咨若時登庸。遂處輔弼疑丞之位。國有隆儒之盛。士知稽古之榮。伏以典謨實列於六經。臣主難逢於千載。高文大冊。或託之不得其人。老師宿儒。有死而莫見於世。維時鴻碩之彥。早冠清華之途。成功告於神明。大業刻之金石。發德音。下明詔。大哉王言。建顯位。施尊名。震於方外。一變猥釀枝駢之體。復還雄深灑灑之風。縉紳竊誦而得師。夷狄傳觀而動色。顧於昭代。可謂殊勳。雖箕穎之志屢陳。然莘渭之求焉往。恭惟某官任重而宏毅。謨明而彌諧。以窮深測遠之才。坐酬衆務。以極高蟠厚之氣。陰折遐衝。至於擅世之英辭。本皆全德之餘事。僅少施於一二。已見謂於崇紘。豈容卷懷經濟之圖。遂欲袖手寬閑之地。公毋困我。初誦留行之言。上誠知人。亟下延登之命。然易問者聖君之眷。難居者天下之名。方仰對於寵光。願益思於挹損。茂迪謙尊之吉。永爲善類之依。

### 賀謝樞密啓

恭審顯膺出綽。進貳本兵。蠻夷奪氣而息謀。朝野動容而相慶。恭惟某官英猷經遠。敏識造微。秉心如金石之堅。論事若權衡之審。主知千載。際聖世之風雲。言責三年。極人才之涇渭。士恃公平而不恐。上嘉孤直之無朋。遂由常伯之聯。進貳中樞之任。較一時之同進。得喪孰多。付四海之僉言。忠邪自見。固將力回薄俗。盡見明謨。網漏吞

舟。示太平之寬大。雲興膚寸。澤庶物之焦枯。豈惟康濟於茲時。固足儀刑於後世。某早迂記省。晚荷甄收。雖知薄命之多奇。猶復誦言而不置。使駑馬妄思於十駕。而沉舟未羨於千帆。求之古人。可謂曠世雖逢之會。報以國士。敢忘終身自勵之心。

卷十一

啓二十二首

賀禮部鄭侍郎啓

恭審筆橐陞華。竇論思於禁路。絲綸出令。兼潤色於臯猷。共知儒術之益尊。孰謂太平之無象。恭惟某官。好是正直。擇乎中庸。大冊高文。固已寫之瑰琰。崇言欲議。皆可質於鬼神。殆將與日月而爭光。奚止當雷霆而獨立。惟上聖克勤於總攬。察羣臣各盡於才能。謂其代予言。既久煩於鴻碩。求能典朕禮。宜無易於老成。况以南省之要司。仍寓西垣之舊直。惟時異數。實冠清途。然而文關國之盛衰。官以人而輕重。籲俊尊上帝。豈止在玉帛鐘鼓之間。斂福錫庶民。其必有典謨訓誥之盛視。古無愧。非公而誰。所冀復如三代禮樂大備之時。抑亦追還兩漢文辭爾雅之體。顧雖老矣。尙及見之。

答撫州發解進士啓

士論推賢。方恨定交之晚。鄉書擢秀。遽勤授贊之恭。恭惟某官。與學海涵。英姿玉立。山川信矣。生大儒名世之邦。絃誦相聞。陶聖主右文之化。將鵬搏於宦海。姑鴻漸於名場。某偶此乘輅。遂叨勸駕。宸廷射策。豈惟慶榜帖之馳。藏室警書。尙及見雲霄之舉。解魁云。藉甚聞名。方恨定交之晚。褒然擢秀。遽勤授贊之恭。

賀施中書啓

伏審蓬壺清閱。早冠羣仙之遊。詞披高華。旋觀一佛之出。得人之盛。吾道有光。恭惟某官。秉德醇明。定心夷粹。高文大冊。非復騷人墨客感寓之詞。崇論懿言。盡得宗廟朝廷嚴重之體。久矣絕世而獨立。固難袖手而旁觀。况今聖政之新。方建太平之業。推明天子惻怛愛民之旨。開慰海內奔走鄉化之心。德意達於四夷。號令媲乎三代。清

議所屬。匪公而誰。且甘泉均號於從臣。而西省獨稱於政本。國僑潤色。雖概取儒學之長。山甫將明。必深通天下之務。正官名者。蓋已百祀。稱職業者。凡有幾人。夏乎其難理。若有待。動心駭目。自茲觀大手筆之傳。削牘濡毫。又當慶真學士之拜。

### 上丞相參政乞宮觀啓

年運而往。益知涉世之艱。職思其憂。獨幸侍祠之樂。惓惓微志。懇懇自陳。伏念某擁腫凡材。贅牙曲學。既無甚高論。足以譁世。豈有它繆巧。用以致身。隨牒半生。問津萬里。雖誓圖微報。不勝狗馬之心。而俯迫頽齡。已罹霜露之疾。壯志纍然而欲盡。殘骸悴爾以難支。拉朽摧枯。競爲排陷。哀窮悼屈。孰借聲光。敢圖廊廟之尊。未棄門闈之藹。曲憐不逮。力謂無他。至於跌宕之文。辱在褒稱之域。二百年無此作矣。固難稱愜於獎知。萬戶侯豈足道哉。私亦激昂於衰懦。然而揣數奇之薄命。懼徒費於鴻鈞。與其度越羣材。留朱雲於東閣。曷若稍捐薄祿。置陶令於北窗。伏望某官仁風期及物之恩。赫日照覆益之陋。念前跋胡而後窺尾。惟當自屏於江湖。方上昭天而下漏泉。忍使獨擠於溝壑。假以毫端之潤。寵其林下之歸。某謹當刻骨戴恩。剗心慕道。誦丹臺之蕊笈。少尉素懷。拜玉局之冰御。用華晚景。

### 知嚴州謝王丞相啓

故里浮沉。竊玉局再期之祿。公朝技拭。付桐江千里之民。瓜戍非遙。竹符甚寵。感淪病骨。愧溢衰顏。伏念某元祐黨家。紹興朝士。池魚滂灑。本思自放於江湖。社櫟支離。久已離施於斤斧。繇治生之素拙。因從宦以忘歸。頃自吳中。久留劍外。顧彼衣冠之所萃。頗以文字而相從。方深去國之悲。敢有擇交之意。流偶殊於涇渭。風自隔於馬牛。睚眦見憎。本出一朝之忿。排擠盡力。幾如九世之讐。孰是羈孤。孰爲別白。縱免投荒之大罰。亦宜置散以終身。且定遠未歸。惟望玉關之生入。輕車已老。猶護北平之盛秋。豈有朝爲閭閻廢斥之人。暮竊畿輔承宣之寄。茲蓋伏遇某官學窮矣奧。勳塞堪輿。南山巖巖。冠公師之重任。赤舄几几。同宗社之閔休。念人才之寶難。悼士氣之不振。埏陶至廣。收拾無遺。方與物以皆春。憫向隅之獨泣。變和輿論。闊略彝章。起安國於徒中。較恩未大。還管寧於海外。爲力尙輕。而某少非列於通才。晚徒專於樸學。棄雞肋而猶惜。雖仰戴於深仁。續覺脛則自悲。恐難逃於薄命。

謝梁右相啓

故里投閑。久竊奉祠之祿。清時起廢。遽叨出守之榮。挈於九折之途。置之一飽之地。感深至骨。涕溢交頤。伏念某鄉校孤生。京塵下吏。學徒盡力。徐而察之。則鷓退飛。仕已冥心。非敢後也。而馬不進。頃者南遊七澤。西上三巴。繆見推於文辭。因頗交其秀傑。愛憎遂作。譽毀相乘。肆爲部黨之讒。規動朝端之聽。雖漸能忍事。聽唾面之自乾。猶競起浮言。至擢髮而莫數。頌洞風波之上。流離道路之旁。幸逢皦日之中天。固宜潦水之歸壑。矧此江山之郡。介於吳越之間。先世嘗臨。尙有召伯憩棠之愛。提封甚邇。僅同買臣衣繡之歸。葺爾何堪。居然非稱。此蓋伏遇某官身扶昌運。手幹化鈞。一氣鳶魚。咸遂飛潛之性。衆材棗楠。各安小大之宜。俯憐爨下之餘。嘗沐筆端之潤。摧頽雖久。省錄未忘。謂人士舍之則藏。固當慕昔賢顯晦之節。然朝廷養非所用。何以待異時緩急之求。既啓迪於淵衷。遂變和於輿論。而某年齡抵此。意氣蕭然。律召東風。雖幸春回於寒谷。手遮西日。敢希身列於修門。

謝周樞使啓

起由散地。付以名州。朝迹久疎。忽喜長安之近。戍期未及。先寬方朔之飢。靖言孤蹤。可謂過望。伏念某簞瓢窮巷。土木殘骸。早已孤危。馬一鳴而輒斥。晚尤顛沛。龜六鑿而不成。羽翮摧傷。風波震蕩。薄祿作無窮之祟。虛名結不解之讐。鄙生自謂非狂。甚矣見知之寡。韓愈何恃敢傲。若爲取怒之深。乘下澤之車。忽過半生。掛神武之冠。今無多日。偶然未死。得此少伸。制出西垣。地連右輔。願視必恭之梓。阡陌相望。封培勿翦之棠。鄉閭太息。此蓋伏遇樞使丞相學優聖域。道覺民先。卓爾爲衆正之宗。毅然開孤進之路。自太公已久望子。仰關宗廟之靈。有夷吾可無復憂。盡釋薦紳之慮。方廣求於雋傑。乃首記其姓名。生物功深。奚啻吹律召東風之妙。回天力大。未覺挾山超北海之難。而某少頗激昂。老猶矍鑠。志士弗忘在溝壑。固當堅馬草裹尸之心。薄福難與成功名。第恐有獲臂不俟之相。

謝黃參政啓

病餘揣分。斷續食於叢祠。望外疏恩。俾牧民於近郡。感深雪涕。慚劇辭顏。伏念某早歲多艱。晚途益困。岷嶓嶮絕。身行禹貢之書。雲夢蒼茫。口誦楚騷之句。未華支離之骨。辱招羈旅之魂。八千之路雖還。五十之年已過。視荒荒

而益廢。髮種種以堪哀。斷港絕潢。徒有朝宗之願。朽株枯木。何施造化之功。雖存溝壑之餘生。已是簪紳之棄物。驚宿愆之盡洗。知孤迹之少安。如絲如綸。命出西垣之潤色。有民有社。地連右輔之封圻。矧復嚴瀨遺祠。桐山故隱。企高風之如在。願俗狀以自慚。此蓋伏遇參政相公黼黻皇猷。權衡國是。衆仰規模之大。天知議論之公。謂設廉恥以遇羣臣。士斯自好。且蹈仁義則爲君子。人亦何常。務與惟新。不求其備。某謹當銘膺感德。擢髮思愆。弱羽遶枝。姑低回於晚景。靈丹點礫。儻邂逅於初心。

謝施參政啓

起由散地。畀以專城。命出詞垣。仰戴絲綸之寵。名居節鎮。俯慚章綬之華。僂僕拜恩。謔諛絃感。伏念某薄才綿力。多病早衰。竊慕長者之餘風。每思砥礪。未聞君子之大道。徒益顛危。零丁稷下之遊。寂寞漳濱之臥。尙無漂母哀王孫而進食。况有故人憐范叔而贈袍。牛欲斃鐘。誰其弗忍。婦非束緼。何以自還。敢期累年不振之蹤。忽有一旦殊常之遇。光生分表。喜溢情涯。惟茲山水之邦。自昔詩書之俗。脩門在望。會無日近之嗟。先世嘗臨。獲慰露濡之感。此蓋伏遇參政相公至仁善下。盛德兼容。一引坐。一解顏。士託終身之重。三吐哺。三握髮。野無片善之遺。賢能借勢以騫騰。孤遠望風而傾屬。自悲蓬梗。獨遠門闌。向使不爲萬里之行。固亦久在諸生之末。誦文章於方冊。竊喜得師。聞道義於薦紳。亦嘗願學。既積精誠之至。果歸甄治之公。旅進無階。歎空馳於清夢。餘年有幾。懼終負於初心。

謝臺諫啓

貧念代耕之祿。懇乞奉祠。恩開使過之門。復令治郡。方窮閭之待盡。非公議而疇依。慚極辭顏。感深雪涕。伏念某遭回薄命。顛顛餘生。肄業荒唐。小學僅通於蒼雅。屬辭卑弱。奇文徒慕於莊騷。髮種種以將童。心摇摇而欲折。食粥動逾於累月。陳絺或至於隆冬。不能引分以掛冠。廉隅已喪。更復貪榮於懷綬。愧懼可知。况此名城。今爲近輔。九霄嘉氣。日未邇於長安。千載遺詞。星嘗從於帝座。孰爲之地。使有此行。茲蓋伏遇某官偉量海涵。英姿山立。正言云。義急嗷枯。仁先念楚。衆惡之而必察。俯憐久困於風波。今老矣而無能。尙使少紓溝壑。爲國廣旁求之路。示人無終棄之才。曾是妄庸。曲蒙全護。除書已下。徒叨蒯洗之恩。羸疾益侵。無復激昂之日。

## 謝蔣給事啓

杜門訟六十年之非。久安散地。起家忝二千石之重。忽奉明恩。驚覺垢之漸除。扶衰殘而下拜。舍人云。起自窮閭。叨臨近郡。爲農爲圃。三年之穴不治。如絲如綸。一字之褒過寵。伏念某學由病廢。仕以罪歸。冥心鷓鷯之行。投迹雞豚之社。海三山之縹緲。釣鼈已媿於初心。楚七澤之蒼茫。殫兜亦成於昨夢。但欲負耒慕許行之學。豈復叩角歌甯戚之詩。偶逢公朝使過之時。躡昇近郡承流之寄。所蒙過矣。自揆茫然。天際鬱鬱。望九重之雲氣。道周蔽帶。掃四世之棠陰。得遂此行。孰爲之地。此蓋伏遇侍講給事。首本文王之正。學師孟氏之醇。騰茂實而蜚英聲。久隆上瞻。息邪說而距詖行。遂擅儒宗。方與萬物而皆春。不忍一夫之獨泣。某偶階未契。遂借餘光。舍人云。議論四方之望。文章百世之師。餘談激水之斗升。窮鱗悉逝。麗藻生雲於膚寸。甘澤無方。窮與萬物而皆春。不忍一夫之獨泣。而某適有讀書之幸。首明泚筆之榮。雖飯豆羹藜。不敢望功名於老大。然書紳銘座。尙思復玷缺之艱難。

## 答交代陳判院啓

病求玉局。但懷優游卒歲之心。思昇桐廬。獲繼超軼絕塵之迹。方自嫌於通問。乃遽辱於移書。公真快哉。我則陋矣。伏念某少而落魄。老益迂疎。顛顛關河。萬里客岷嶓之境。馳驅節傳。三年使闕楚之郊。迨此退歸。頽然遲暮。投幘已安於蟹舍。起家忽奉於魚符。此蓋伏遇某官秉節以貫四時。瑞世而翔千仞。經行早推於庠序。謀猷晚著於朝廷。謠誦上聞。豈獨最列城之課。規模甚遠。又足爲來者之師。某偶幸懷章。遂將接武。雖取棄竹馬。望英躅以增慚。然獲舊青氈。在衰門而甚密。發吞伊始。坐獻多聞。願遵輔養之宜。卽慶榮嚴之拜。

## 嚴州到任謝王丞相啓

懇求祠祿。乃叨便郡之除。甫及戍期。亟奉燕朝之對。身旣復歸於鈞播。衆知未棄於明時。伏念某淺智褊能。薄才綿力。棲遲屏迹。但欲射猛虎以終殘年。辛苦著書。不足藏名山而俟後世。偶爲貧而求仕。旋觸罪以免歸。雁食無儲。鶉衣不補。凡百君子。悠悠非特達之知。平生故人。往往虛嫌疑之際。欲言誰聽。投老奚歸。豈期廟堂任使之公。掣出僻壑漂流之地。此蓋伏遇某官孟韓道統。伊呂王功。繼徽聖猷。謂言之不文。則行之不遠。甄陶土類。每捨其所短而取其所長。慨念孤生。已侵暮境。儻使拘所聞而不試。則將齋遺恨於無窮。何止屢陳於斧屨之前。蓋亦昌

言於播紳之上。故雖久斥。亦復漸收。而某已知悔童子之雕蟲。未免守古人之糟粕。決無可用。寧不自知。續鍾釜之祿。以待掛冠。嘗面祈於大造。劾尺寸之勞。而垂汗簡。張永負於初心。

謝梁右相啓

玉局二年。已竊代耕之祿。桐廬千里。復叨起廢之恩。望碎表之顛昂。撫編氓之繫鞅。退惟忝冒。徒積兢慙。伏念某四壁寒家。一簞賤土。刻舟求劍。固匪通材。懲羹吹齏。已消壯志。比由蟹舍。起領魚符。永言久斥之餘。亦有少伸之望。然而察簿領稽違之糾。擿吏胥隱伏之微。一皆非其素知。又不可以遽習。淵明之寄事外。已迫頽齡。安國之擢徒中。曷勝煩使。此蓋伏遇某官才全經緯。氣塞堪輿。博取聚材。屢抗延英之論。宏開公道。靡須光範之書。施及妄庸。未忘風昔。溫飽一門之衣食。洗滌累歲之罪愆。使爲全人。以畢餘日。某敢不好是正直。擇乎中庸。戒舞智以賊民。寧取椎魯少文之訕。務盡心於折獄。庶無冤枉失職之嗟。苟不辱知。其敢言報。

謝周樞使啓

入望清光。出臨近郡。天威不遠咫尺。既諧就日之心。父命惟所東西。况被牧民之寄。感恩至矣。揣分茫然。伏念某下愚難移。大惑莫解。不能高飛遠舉。求避橫目之民。乃復直情徑行。自撓瞻騰之悔。永言窮薄。數蹈違回。毀靡待於德高。災非由於福過。斷雲零落。敢懷出岫之心。病鶴離襪。忽忝乘軒之寵。此蓋伏遇某官道窮災奧。氣塞堪輿。南山之石巖巖。帝資宿望。綈袍之意戀戀。士感誠言。哀細德之峻微。開鴻鈞之塊扎。念茲積譴。雖擢髮而有餘。察彼衆讒。亦吹毛之已甚。未加顯棄。聊復少收。雖不在於英材樂育之中。竇創見於薄俗相挺之際。而某扶衰自笑。迫老宜歸。無復入關。西日舉釣竿之手。惟希度世。東封謁玉輅之塵。傾倒具陳。慚惶無措。

謝臺諫啓

挂洪景之衣冠。宜還故里。懷買臣之印綬。尙冒明恩。觸熱卽塗。扶衰領郡。伏念某身常短褐。家本衡門。一官惟妻。子之謀。萬里極關河之遠。景翳翳以將入。餘日幾何。芳菲非其彌章。素心空在。比者竊冰銜於玉局。染雲屋於鏡湖。惟俟引年。遂將沒齒。散地方斬於因任。除書忽昇於專城。宮闕中天。有就日望雲之幸。鄉閭接壤。逾過家上冢之榮。此蓋伏遇某官望重朝綱。學通國體。收真才於水落石出之後。坐銷浮僞之風。察定理於舟行岸移之時。盡



黜讒誣之巧。稍收久廢。用示至公。某謹當勉効微勤。堅持素守。吏犯法而法在。先務去奸。政近民則民歸。敢忘用  
恕。或羸逃於大譴。庶少答於深知。

謝監司啓

挂洪景之衣冠。宜遷故里。懷買臣之印綬。尙冒明恩。觸熱卽途。扶衰領郡。伏念某身常短褐。家本衡門。一官惟妻  
子之謀。萬里極關河之遠。景黯黯以將入。餘日幾何。芳菲非其彌章。素心空在。比者竊冰銜於玉局。築雲屋於鏡  
湖。惟俟引年。遂將沒齒。散地方蘄於困任。除書忽昇於專城。宮闕中天。有就日望雲之幸。鄉閭接壤。逾過家上冢  
之榮。此蓋伏遇某官學貫經郛。望隆國器。繡衣持斧。姑小試於使輶。豹尾屬車。卽超登於禁路。尙容衰頓之迹。暫  
託澄清之餘。某謹當勉効微勤。堅持素守。吏犯法而法在。先務去奸。政近民則民歸。敢忘用恕。或羸逃於大譴。庶  
少答於深知。

答方寺丞啓

年運而往。悵久隔於英遊。道阻且長。忽恭承於榮問。情文甚寵。衰晚增光。伏念某笠澤漁家。紹興朝士。捫參歷井。  
久困客遊。衰海摘山。屢乘使傳。旣罪愆之未洗。復衰疾之相乘。骨相宜窮。頭顱可揣。穿延和之細仗。恍若隔生。分  
新定之左符。更叨起廢。此蓋伏遇某官義存推轂。德重匿瑕。哀其顛頓之百罹。借以揄揚之一諾。遂叨共理之寄。  
亦及歸耕之餘。而某緣病廢書。迫貧墮牒。能古文何用於今世。徒慚長者之見知。居是邦不非其大夫。殊匪小人  
之所望。佇奉丁寧之誨。用寬瘵曠之虞。

賀王提刑啓

恭審繡衣玉節。肅王畿風憲之嚴。寶畫奎文。新內閣圖書之直。方攬澄清之轡。已騰謠誦之聲。恭惟某官學道愛  
人。至誠格物。德秉民彝之粹。才推國器之英。中外踐揚。自際風雲之會。始終操履。靡移金石之堅。將階言語侍從  
之除。游被禮樂光華之遺。欽恤副九重之指。平反奉一笑之春。始乾外庸。卽躋近列。計乘輶之未幾。旋頒詔以趣  
歸。某意廣才疎。心勞政拙。伏櫪志在千里。悵暮景之已侵。葉林不過一枝。幸卑棲之有託。

與汪郎中啓

去蜀歸吳。已侵尋於晚境。乞祠得郡。尙記錄於明時。夙戒行臚。已臨弊邑。方竊依仁之幸。敢稽告至之恭。伏念某笠澤農家。紹興朝士。捫參歷井。久困客遊。蕩海摘山。屢乘使傳。既罪愆之未洗。復衰疾之相乘。骨相宜窮。頭顱可揣。穿延和之細仗。恍若隔生。分新定之左符。更叨起廢。恭惟某官義存推轂。德重匿瑕。哀其顛頓之百罹。借以揄揚之一諾。遂容共理之寄。亦及歸耕之餘。而某扶憊以來。罔功是懼。快景星之先覩。雖尙阻於瞻承。分鄰燭之餘光。遂密依於覆護。其爲慰幸。曷究敷陳。

與沈知府啓

乘傳江臯。偶同一道。分符畿內。復幸鄰邦。公將假道於虞。僕其得御於李。胡交臂而失此。亟削牘而布之。恭惟某官厚德鎮浮。英姿邁往。富貴固有命矣。未嘗枉尺以自謀。將相豈無種哉。方且搏風而直上。雖仰急流之勇退。寧容袖手而旁觀。果奉明綸。起臨近甸。豐年高廩。想謠誦之已聞。燕寢清香。知文書之益簡。願精調於列鼎。卽歸覲於凝旒。瞻詠之私。敷宣曷既。

賀留樞密啓

恭審行玉關之萬里。方喜遄歸。陳秦階之六符。亟聞殊陞。地禁虞承明之邃。任崇參宥密之嚴。成命誕揚。師言允穆。竊以藝祖鑒五代之弊。不偏重於中書。裕陵新六官之名。亦旁開於西府。豈獨並隆於文武。固將兼注於安危。至以明詔特預於訃謨。尤爲本朝久虛之盛舉。中原多故。首用種忠憲之偉人。聖政方新。則有虞雍公之近事。或名光於竹帛。或位極於廟堂。恭惟某官躬閑深魁。碩之資。負剛大直方之氣。早推雅望。濩歷近班。以至公服小人。故雖疎而不怨。以大節事明主。故旣去而見思。世方謫譎。以自營。公固落落而難合。迨此寵光之自至。益知蟻險之徒勞。端乎一心。應彼萬事。七擒七縱。已成服遠之功。三起三留。果有處中之命。方且端委冠鈞衡之位。挽河洗夷虜之塵。復列聖在天之警。據遺民泣血之憤。某幸身未死。見國中興。材館旁招。雖莫陪於下土。涪溪深刻。尙自力於斯文。

賀蔣中丞啓

伏審顯膺帝制。進總臺評。公道大開。在廷爲之相賀。正人益進。吾國殆其庶幾。仰惟廟社之休。非復門闌之慶。某

聞人情不遠。立朝誰樂於抨彈。仕者自謀。干世本求於遇合。皆使從容而徐進。自非怨嫉之所歸。一居三院七人之官。遂任四海九州之責。至於諫大夫之助成主德。中執法之振肅朝綱。知不可以不言。言不可以不盡。雷霆在上。獨立自如。鼎鑊當前。直趨不避。始也負當世之名。而人不我捨。今也居得言之地。則責將誰歸。卓乎偉人。更此重任。恭惟某官英姿邁往。奧學造微。論必盡忠。得堪與剛大之氣。仕常思退。有耕釣高逸之風。位逾達而謙有加。權益隆而量莫測。姑小煩於繩肅。卽進與於弼諧。豈惟斯民被化於春風和氣之中。亦使多士吐氣於青天白日之下。今其始矣。幸孰甚焉。某嘗辱王翰卜鄰之榮。妄懷貢禹彈冠之喜。崇言絃議。已觀魁磊光信史之傳。過計私憂。妄有一二爲執事之獻。儻少寬於斧鑕。尙嗣布於腹心。

卷十一

啓十五首

賀賈大諫啓

恭審顯膺一札之放。首冠七人之選。主賢臣直。國勢巋然。言聽諫行。天下幸甚。某聞昔在本朝之官制。參稽前代之舊章。南臺不置大夫。中憲任紀綱之重寄。北省久虛常侍。諫坡率遺補以盡規。選求既艱。畀託尤重。故政在中書。而常開言路。事由獨斷。而不廢爭臣。仰觀十一聖家法之傳。茲爲三百年治功之本。繼昔之盛。非公而誰。恭惟某官學造精微。器函闊遠。許國弗渝於夷險。憂時如抱於渴飢。造膝告猷。浩浩江河之決。傾心愛士。拳拳涇渭之分。慨然死生禍福不入於中。常若天地鬼神實臨其上。以今日陳善閉邪之效。成異時贊元經體之功。同出此心。夫孰能禦。某侵尋暮景。踰躑孤生。迹本甚疎。妄欲依歸於公道。分當永棄。特蒙杖拭於窮途。何以仰答門闈特達之知。惟有稍陳郡縣利病之實。儻少寬於斧鑕。尙嗣布於腹心。

賀謝殿院啓

恭審顯膺帝制。進貳臺端。手縮衷以逡巡。久已抱獨立無朋之操。髮衝冠而憤切。自茲皆盡言不諱之時。在庭簪觀。有識相慶。伏以御史分職。本以論事任耳目之司。忠臣設心。蓋欲去邪爲宗社之福。抗雷霆而獨立。凜山嶽之

不搖。非以近名。固將竭節。天子爲之改容而垂聽。大臣不敢持必而自私。國有紀綱。治自形於四海九州之遠。士篤名義。效或見於數世百年之餘。今茲孰配於古人。識者固歸於門下。恭惟某官道德醇備。義論正堅。灰寒木槁。而譽益高。鯤擊鵬搏。而才乃見。默究朝廷之利病。盡得源流。徐觀天下之是非。若指白黑。放斥者有愧心。而無怨。更革者雖害己而謂然。太平之功。指日可待。某侵尋暮景。踳躅孤生。迹本甚疎。妄欲依歸於公道。分當永棄。特蒙。拔拭於窮途。何以仰答一見特達之知。惟有稍陳千里利病之實。儻少寬於斧鑕。尙嗣布於腹心。

### 賀周丞相啓

恭審夢卜襲祥。揚王庭而煥號。典冊備物。熙帝載以宅師。國其庶幾。民以寧壹。實惟宗社無疆之祐。非復門闕旅賀之常。竊以時玩久安。輒生天下之患。國無遠略。必有意外之虞。方今風俗未淳。名節弗勵。仁聖焦勞於上。而士夫無宿道嚮方之實。法度修明於內。而郡縣無赴功趨事之風。邊防廢弛於通和。民力坐窮於列戍。每靜觀於大勢。懼難待於非常。至若靖康喪亂。而遺平城之憂。紹興權宜。而蒙渭橋之恥。高廟有盜環之逼寇。乾陵有斧柏之逆傳。江淮一隅。夫豈仗衛久留之地。梁益萬里。未聞腹心不貳之臣。文恬武嬉。戈朽鉞鈍。謂宜博采衆謀之同異。然後上咨廟論之崇嚴。非素望之偉然。誰出身而任此。恭惟某官降神維嶽。生德自天。居安資深。學洞六經之韞。探蹟索隱。識窮萬務之微。蓋嘗獨立以當雷霆。何止賁名之揭日月。運籌帷幄。每當上心。端委廟堂。遂持國柄。玉燭聲時和之慶。雲龍協聖作之辰。清未央長樂之宮。將肅六飛之御。築碣石榆林之塞。永奠四夷之封。於古有光。自今以始。某側聞盛舉。竇抃歡悵。恤百口之飢寒。豈無竊覲。披四方之英俊。願付至公。庶未死之餘生。覩太平之盛際。

### 賀施知院啓

恭審誕布明綸。進專籌幄。用真儒而無敵。翊扶宗社之基。得大老以來歸。開慰華夷之望。恭惟某官英姿邁往。精識造微。居安資深。韞六藝淵源之學。任重道遠。炳兩朝開濟之心。明辯足以折遐衝。果敢足以斷幾事。自初拔用。迄此延登。大節全名。松柏挺歲寒之操。同心一德。風雲協聖作之期。堪輿清夷。星緯明潤。致太平其自此。將魁柄之焉歸。冀暫入於脩門。竊有聞於行路。謂明公之得政。以人物爲最先。自隆師尹南山之瞻。復見平津東閣之盛。

揚庭薦拔。造膝開陳。凡人所難。以身獨任。今雖總本兵之地。願益尸誓類之盟。公能以士而報國家。士亦以身而歸門下。某侵尋暮境。顛頽偏州。志氣已衰。無復獻狗盜雞鳴之技。文辭自力。尙能助稗官野史之傳。過此以還。未知所措。

賀丘運使啓

恭審上印帥藩。乘輅畿甸。得人若是。則吾國其庶幾乎。先聲隱然。非俗吏之所能也。公論爲之慰愜。大用此其權輿。伏以寬猛異施。古今莫一。子產號衆人之母。用於鄭而弗救。陵夷。商爲法家者流。弊至秦而卒以顛覆。歷考簡編之跡。莫先儒術之功。惟蹈君子之時中。斯得古人之大體。方其尊瞻視。正顏色。教化固已有成。雖使空囹圄。畫衣冠。法令其誰敢犯。恭惟某官英姿邁往。敏學造微。夷途早踐於高華。隆委徧當於繁劇。所臨輒治。雖千變萬化而不窮。自守弗阿。終特立獨行之如此。上將引而自近。公其有以告猷。某早陪談燕之餘。謾辱賞知之異。敢圖暮境。獲備屬城。閭里亡聊。每攬涕下。催科之筆。事功靡著。更忍慙修候問之賤。尙加惠於始終。俾羸全於進退。歸依之切。敷繹奚碑。

賀蔣尙書出知婺州啓

恭審解中執法以暫均勞佚。拜大宗伯而入侍禁嚴。雖若不得其言。固亦未爲弗用。乃抗投閑之請。力斲就養之榮。詔諭靡從。藩條初布。上倚承宣之績。士高廉退之風。恭惟某官直哉惟清。淵乎似道。懇款許國。肝膽凜其輪囷。慷慨疾邪。山嶽爲之震動。進率由於獨斷。節早見於盡言。未移桑蔭之掩。入總柏臺之峻。國方增九鼎之重。身已如一葉之輕。魯人獲麟以爲不祥。雖愛憎之叵測。塞翁失馬未必非福。抑倚伏之何常。某幸託里門。獲趨賓席。身世等蒯菅之棄。孰閱餘生。姓名託甄冶之公。尙須異日。

除直華文閣謝丞相啓

秩視大蓬。已竊垂車之寵。思加蓬閣。更叨出綈之勞。初聞道路之傳。猶謂姓名之誤。迨茲被命。重以懷慚。伏念某承學迂疎。稟資葑陋。幼生京洛。尙爲全盛之編氓。長綴班聯。曾是中興之朝士。福未容於盈皆。祟已駭於燒城。西征至岐鳳之間。南戍掠甌閩之境。晚僅升於省闈。旋即返於鄉關。鶴歸遼天。狐死丘首。蓬戶十移於歲律。幔亭四

闕於祠官。久遂屏居。非始挂冠之日。盡捐半俸。真爲納祿之人。豈期垂盡之光陰。忽玷殊常之惠澤。復緣詔札。併竊身章。里巷聳觀。共仰恩光之下燭。兒孫扶拜。不知衰涕之橫流。茲蓋伏遇某官降命應期。奮庸熙載。神無方。易無體。心獨運於道樞。尺有短。寸有長。士悉歸於鈞播。雖迫崦嵫之景。亦歸塊圮之公。而某意氣空存。筋骸已憊。草具明堂辟雍之禮。雖遭甚盛之時。塗竄清廟生民之詩。其在方來之篤。

### 修史謝丞相啓

七十告老。誓待盡於山林。尺一召還。恍復瞻於觀闕。內祠祿厚。信史事嚴。容孤迹於其間。知鴻鈞之有自。恭以高皇之盛德大業。雖號中興。而實同開創之難。孝廟之內修外攘。躬享太平。而不忘恢復之志。治躋古昔。威震裔夷。俄屬鼎成之悲。肆修麟止之緒。固已網羅軼事。潤色皇猷。備述巍巍蕩蕩之功。曲盡業業兢兢之指。豈緊遲暮。能與討論。伏念某天予散材。家承孤學。生逢盛旦。蒙六聖之涵濡。身綴清班。被四朝之識拔。常恐倏先於朝露。遂將莫報於秋毫。豈期及耄之餘齡。猥得効勤於大典。茲蓋伏遇某官材全經緯。氣塞堪輿。平生陳謨決策之言。煥乎可誦。十載知人安民之績。底於有成。殊鄰款塞而奉琛。多士鄉風而釋屨。內而臺閣。極稽古禮文之選。外而郡縣。有宜民愷悌之風。肇闢大公至正之途。不棄偏能一曲之士。故如某輩。亦在數中。謹當益廣見聞。更勤采掇。老驥伏櫪。脩途已非其所堪。小草出山。薄効尙期於自見。

### 賀謝丞相除少保啓

恭審命出淵衷。廷揚顯冊。人主之論一相。方寄腹心。少保茲爲三公。益隆體貌。傳聞所逮。驩頌惟均。恭以某官謨明彌諧。任重道遠。協天心於崑崙旁魄之際。動必有成。隆主眷於蠅蝸蠖濩之中。言無不用。自登近輔。允迪大猷。疇咨雖首於羣公。謙畏不殊於一日。每稽首而遜稷契。終選衆而舉伊臯。三年有成。四海用乂。農扈告豐登之候。戎韜臻偃息之期。熙運方興。周召並爲於師保。衆心所繫。平勃均任於安危。是宜大號之繼敷。昭示元臣之同體。羣生咸遂。協氣橫流。謹乃憲而屢省則成。孰測化鈞之妙。本無事而庸人實擾。始知靜治之功。某獲綴清班。欣逢盛事。無好無惡而遵王路。共欣聖政之大成。不愆不忘而由舊章。更冀廟謨之無倦。敢効涓塵之助。輒干礎斧之誅。冒瀆實深。兢惶罔措。

賀張參政修史啓

恭審誕布明綸。總提鉅典。固已動鸞驚行之喜色。而況在牛馬走之後塵。不能自已於寸誠。是敢冒陳於尺牘。恭惟某官自天生德。降命應期。蘭溫厚爾雅之文。經緯萬象。蘊超軼絕塵之識。鎮撫四夷。位居台鼎。而有山澤清臞之容。禮絕搢紳。而無王公驕泰之意。心虛靜而觀復。道冲用而不盈。周公太公。方隆夾輔之望。堯典舜典。更專點竄之功。實以袞衣黃閣之尊。下兼蘭臺石室之事。在天三后。魏乎下臨。作宋一經。信矣無憾。某偶蒙簡拔。獲預討論。已優投老之殘年。何補不刊之信史。仰傳巖之霖雨。幸預在廷。歸杜曲之桑麻。尚勞泚筆。想典刑於諸老。已媿空疎。竭精力於是書。敢忘策勵。

除寶謨閣待制謝丞相啓

冊府秩清。偶至龍峯之頂。禁途地密。遂穿豹尾之中。雖造化之至公。實恩憐之曲被。欲絃丹衷之感。莫知雪涕之橫。伏念某雖起耕疇。羸傳家學。書藏屋壁。尙擯斥而不容。跡避園廡。豈榮華之敢望。虛名作祟。聚謗成雷。幸於先狗馬塞溝壑之前。遂其賜骸骨歸卒伍之請。任子以世其祿。篤直以華其行。固已負耒學耕。飾巾待盡。身還民服。口誦農書。從故里漁樵之遊。拜高年羊酒之賜。忽從廡置。逃奉詔除。所憫忝大門之官。敢竟奪匹夫之志。惟俟奏篇之御。卽伸告老之誠。簡牘未終。絲綸已降。半生淹泊。沉舟真閣於千颿。一旦遭逢。開印適當於三日。已扶衰而拜命。旋曳蹇以造庭。茲蓋伏遇某官德懋忱恂。化均塊扎。作成士類。兼小大而不遺。勸相皇家。泯異同於無迹。澤東漸而西被。功上際而下蟠。才或取於寸長。罪不捐於一眚。故雖么麼。亦被生成。某敢不頂踵知恩。冰霜勵節。少不自力。坐沉廢者半生。老當告休。悵報酬之無地。

謝費樞密啓

猥被恩綸。躡持從橐。虞內闕諷咨之地。繼大門揚歷之榮。揣分奚堪。置慚靡所。伏念某百罹薄命。九折窮途。迹久困於多言。年已優於大耋。都門屢入。壯遊恍似於前身。冊府再來。衆吏多非其舊識。扶衰殘而就列。刮醫膜以紓書。非徒莫揜於旁觀。每亦不勝其自媿。惟俟奏篇之御。卽伸請老之誠。敢謂遭逢。曲蒙識拔。茲蓋伏遇某官道尊皇極。學統聖傳。雖吐哺握髮之勞。曾靡遺於一土。然引坐解顏之遇。願豈在於他人。每屈崇嚴。不移疇昔。爰自東

壁圖書之府。俾躋西清。鷲鷲之班。驟伏。樞以悲鳴。囊誰念者。大砥丹而仙去。今乃似之。某燈火尙親。簞瓢未厭。修世官而不墜。益體上恩。繼家學於寢衰。或傳來裔。庶幾瞑目。無媿初心。

致仕謝丞相啓

優詔許歸。已荷乾坤之造。異恩及幼。更霑雨露之私。非公台力假於敷陳。則草野何從而甄錄。感銘刻骨。涕泗交頤。伏念某少乏通材。晚嬰羸疾。史闡八月。常懷惕日之慚。祠祿三時。滄上引年之請。初但虞於煩瀆。旋曲被於矜從。而况從中。明降於德音。任子特逾於常制。桑榆已迫。俾華垂白之年。豚犬何能。遽有拾青之幸。里閭歎息。門戶敷榮。茲蓋伏遇某官降命應期。奮庸熙載。告猷於內。時已措於太平。祝嘏在前。禮每加於諸老。臺臺誠明之學。魏巍忠厚之風。坐格華裔之寧。有光簡冊之載。故推餘澤。俯及衰門。重念穉兒。雖非異稟。善和之書。幸在。敢虛棄於光陰。太常之第。可收。尙仰酬於長育。

答權提刑啓

伏審抗章請外。攬轡入東。謂宜因對而復留。故欲馳書而未敢。遽先垂問。莫喻愧心。恭惟某官英識造微。宏材經遠。學術得前。言往行之要。議論有羣。公先正之風。踐揚早歷於清華。雖能自見。寄任靡辭於叢委。刃每有餘。茲乃勇退急流。旁觀袖手。明刑以弼五教。誦詩而使四方。雖暫試於外庸。願豈符於僉矚。還節旄於少府。行被詔追。司筆橐於甘泉。孰居公右。某退依耕隴。密邇臺綱。躬豈弟以宜民。既蒙賜矣。用春秋而決獄。行且見之。頌詠惟深。陳罔既。

答胡吉州啓

伏以累疏乞歸。既拜賜骸之命。華賤贊喜。更煩泚筆之勞。異書憐老學之勤。厚幣篤嘉賓之體。願惟衰悴。曷稱眷私。伏惟某官絕識超然。英聲藉甚。簡編插架。早推師友之淵源。紳佩在廷。旋慶君臣之際遇。茲暫煩於共理。卽歸告於嘉猷。而某已返農疇。愈賒門戟。噓枯甚寵。徒藏櫝以爲榮。詠德雖深。愧占辭之莫既。



書九首

代二府與夏國主書癸未正月二十一日二府請至都堂撰

隆興元年正月二十二日特進尚書左僕射同中書門下平章事兼樞密使信國公陳康伯等謹致書夏國主殿下。昔我祖宗與夏世修盟好。豈惟當無事時。共享安平之福。亦惟緩急同休戚。恤裁患。相與爲無窮之託。中更變故。壤地阻絕。雖玉帛之聘。弗克往來。然朝廷未嘗忘祖宗之志也。乃者皇天悔禍。輿圖寢歸。會今天子紹登寶位。慨然西顧。宣諭大臣。曰。夏二百年與國也。豈其不念舊好而忘齊盟哉。某等恭以國主英武聰哲。聞於天下。是敢輒布腹心於執事。願留神圖之。惠以報意。當告於上。議所以申固歡好者。同心協慮。義均一家。永爲善鄰。傳之萬世。豈不美歟。有少幣儀。具如別幅。伏惟炤察。不宣。某等謹白。

貼黃前件事宜。臣等雖已面陳。緣利害至大。陛下反覆省覽。故敢出具此奏。

上執政書辛巳四月

某官閣下文人之在天下。用之。徒以爲治世之觀。太平之飾。不用。則亦已耳。非如兵刑錢穀之吏。不可一日無也。然爲國者。每每收取。不忍棄去。豈固爲是不急哉。蓋天下之事。惟此爲最難。非誠好之。捐三二十年之勤。耗心疲力。彫瘁齒髮。飲食寢夢。悲歡得喪。一在於是者。殆未易可以言工。信工矣。然且高不足以爲功名。下不足以得財利。塵編蠹簡。束而藏之。幸世有知此道者。歎息稱工。嗚呼。可謂純哉。以天下之至勤苦。爲天下之至鈍。待千萬中一二人之知。此賢公卿以人物爲己任者。所以不忍棄也。某小人。生無他長。不幸束髮有文字之愚。自上世遺文。先秦古書。晝讀夜思。開山破荒。以求聖賢致意處。雖才識淺闇。不能如古人迎見逆決。然譬於農夫之辨菽麥。蓋亦專且久矣。原委如是。派別如是。機杼如是。邊幅如是。自六經左氏離騷以來。歷歷分明。皆可指數。不附不絕。不誣不紊。正有出於奇。舊或以爲新。橫騫別驅。層出間見。每考觀文詞之變。見其雅正。則纓冠肅衽。如對王公大人。得其怪奇。則脫帽大叫。如魚龍之陳前。臬廬之方勝也。間輒自笑曰。以此娛憂舒悲。忘其貧病。則可耳。持以語人。幾何其不笑且罵哉。誠不自意。諸公聞之。或以爲可。書生所遭如此。雖窮死足以無憾矣。然師慕下風。而未得一稔履寫。此心歉然。不敢違寧。恭惟明公道德風節。師表一世。當功名富貴之會而不矜。踐山林鐘鼎之異而不變。

非大有得於胸中。其何以能此。夫文章小技耳。然與至道同一關捩。惟天下有道者。乃能盡文章之妙。此某所以忘其賤且愚。而願有聞於左右也。

### 上虞丞相書

某聞才而見任。功而見錄。天下以爲當。君子曰。是管仲相齊。衛鞅相秦之法耳。有人於此。才不足任。功不足錄。直以窮故哀之。天下且以爲過。君子則曰。是三代之俗。周公孔子之政也。何也。彼有才。吾賴其才。因以高位處之。彼有功。吾藉其功。因以厚祿報之。上持祿與位以御其下。下挾才與功以望其上。非市道乎。故齊秦用之。雖足濟一時之急。而俗以大壞。君子羞稱焉。若夫三代之俗。周公孔子之政。則不然。無才也。無功也。是直無所用也。無所用之人。雖窮而死者百千輩。何損於人之國哉。自薄者視之。尙奚恤。君子顧深哀之。視其窮。若自我推以與之。不敢安也。矜憐撫摩。衣之食之。曰。彼有才有功者。何適而不遇。吾所急者。其惟無所用而窮者乎。此心父母也。推父母之心。以及於天下無所用之人。非聖賢孰能哉。謂之三代之俗。周公孔子之政。則宜。故王霸之分。常在於用心之薄厚。而昧者不知也。恭惟大丞相道學精深。力量廣大。庶幾以周公孔子之政。而復三代之俗者。渾渾巍巍。不可窺測。平時挾功恃才。錙銖較計者。皆自失退聽。若某之愚不才無功。留落十年。乖隔萬里。而終未敢自默。特曰。身之窮。大丞相所宜哀耳。某行年四十有八。家世山陰。以貧悴逐祿於夔。其行也。故時交友。驟緡錢以遺之。峽中俸薄。某食指以百數。距受代不數月。行李蕭然。固不能歸。歸又無所得食。一日祿不繼。則無策矣。兒年三十。女二十。婚嫁尙未敢言也。某而不爲窮。則是天下無窮人。伏惟少賜動心。捐一官以祿之。使粗可活。甚則使可具裝以歸。又望外則使可畢一二婚嫁。不賴其才。不藉其功。直以其窮可哀而已。此氣象。自秦以來。世以功利相高。沒不見者累二千年。今始見於門下。所願持之不搖。行之不疑。則豈獨某之幸哉。

### 上辛給事書

某官閣下。君子之有文也。如日月之明。金石之聲。江海之濤瀾。虎豹之炳蔚。必有是實。乃有是文。夫心之所發。而爲言。言之所發。比而成文。人之邪正。至觀其文。則盡矣。決矣。不可復隱矣。爝火不能爲日月之明。瓦釜不能爲金石之聲。潢汙不能爲江海之濤瀾。犬豕不能爲虎豹之炳蔚。而或謂庸人能以浮文眩世。烏有此理也哉。使誠

有之。則所可眩者。亦庸人耳。某聞前輩以文知人。非必鉅篇大筆。苦心致力之詞也。殘章斷彙。憤譏戲笑。所以娛憂而舒悲者。皆足知之。甚至於郵傳之題詠。親戚之書牘。軍旅官府倉卒之間。符檄書判。類皆可以洞見其人心術才能。與夫平生窮達壽夭。前知逆決。毫芒不失。如對某枰而指白黑。如觀人面而見其目衡鼻縱。不待思慮搜索而後得也。何其妙哉。故善觀晁錯者。不必待東市之誅。然後知其刻深之殺身。善觀平津侯者。不必待淮南之謀。然後知其阿諛之易與。方發策決科時。其平生事業。已可望而知之矣。賢者之所養。動天地。開金石。其胸中之妙。充實洋溢。而後發見於外。氣全力餘。中正闊博。是豈可容一毫之僞於其間哉。某束髮好文。才短識近。不足以望作者之籬籬。然知文之不容僞也。故務重其身而養其氣。貧賤流落。何所不有。而自信愈篤。自守愈堅。每以其全自養。以其餘見之於文。文愈自喜。愈不合於世。夫欲以此求合於世。某則愚矣。而世遂謂某終無所合。某亦不敢謂其言爲智也。恭惟閣下以臯陶之謨。周公之誥。清廟生民之詩。啓迪人主而師表學者。雖鄉殊壤絕。百世之下。猶將想望而師尊焉。某近在屬部。而不能承下風。望餘光。則是自絕於賢人君子之域矣。雖然。非敢以文之工拙爲言也。某心之爲邪爲正。庶幾閣下一讀其文而盡得之。唐人有曰。士之致遠。先器識而後文藝。是不得爲知文者。天下豈有器識卑陋。而文詞超然者哉。狂率冒犯。死有餘罪。

## 答邢司戶書

五月二十六日。笠澤陸某頓首。再拜復書司戶。迪功足下。某辱賜書。及聖人之道與古作者之文章。又以世之稱師弟子。而徒事科舉。求利祿者爲羞。卓乎偉哉。非某所敢仰望萬一也。某少之日。學文而不工。及其老。妄意於道。亦未敢謂得也。身且弗給。而何以及人。及庸衆人且弗能。其况有以助足下乎。惶恐惶恐。雖然。足下顧我厚。某其敢有所弗盡。吾嘗有衣食祭祀婚嫁之累。則出而求祿。恐未爲非。既不免求祿。則從事於科舉。恐亦未爲可憾。科舉之文。固亦尊王而賤霸。推明六藝而誦說古今。雖小出入。要其歸亦何負於道哉。若言之而弗踐。區區於口耳。而不自得於心。則非獨科舉之文爲無益也。近時頗有不利場屋者。退而組織古語。剽裂奇字。大書深刻。以眩世俗。考其實。更出科舉下逮甚。讀之使人面熱。足下謂此等果可言文章乎。尙不可欺僕輩。安能欺足下哉。故自科舉取士以來。如唐韓氏。柳氏。吾宋歐氏。王氏。蘇氏。以文章擅天下者。莫非科舉之士也。此無他。徒以在場屋時。苦

心耗力。凡陳言淺說之可病者。已知厭棄。如都市之玉工。珉玉雜治。積日既久。望而識之矣。一旦取荆山之璞。以爲黃珠蒼璧萬乘之寶。珉其可復欺邪。凡今不利場屋而名古之文者。往往多未嘗識珉者也。又安知玉哉。乃如足下識之。可謂精矣。當業珉剖玉而已。至於聖人之道。足下往昔朝夕所講習者。豈外於是。言之而必踐焉。心之而不徒口耳焉。無餘道矣。某文既不工。聞道又甚淺。則今所以進於左右者。其果近乎。一讀置人。無重吾過。不宜。

答劉主簿書

某才質愚下。又兒童之歲。遭罹多故。奔走避兵。得近文字最晚。年幾二十。始發憤欲爲古學。然方是時。無師友淵源之益。凡古人用心處。無所質問。大率以意度。或中或否。或始疑其非。終乃大信。或初甚好之。已而徐覺不可者。多矣。然亦竟不知所謂是且非者。卒何如也。方竊媿歎。不自意如足下。學術文章。足以雄長一世者。乃不鄙其愚。而欲與之交。惠然見臨。賜之以言。以爲可與言古學者。文詞偉麗。讀之惕然。夫道遇乞人。責之千金。足下固過矣。然遂謂足下爲非。則不可。往者前輩之學。積小以成大。以所有易所無。以能問於不能。故其久也。汪洋浩博。該極百家。而不可涯涘。如足下所稱諸公。蓋皆如是也。至中原喪亂。諸名勝渡江。去前輩尙未甚遠。故此風猶不墜。不幸三二十年來。士自爲畦畛甚狹。己所未知者。輒訕薄之。以爲不足學。排抑沮折。惟恐不力。詆窮經者。則曰傳註已盡矣。詆博學者。則曰不知無害爲君子。嗚呼。陋哉。夫世既未有仁智之足如孔孟而師焉。則亦各出所長。相與講習。從其可者。去其不可者。自六經百氏歷代史記。與夫文詞議論。禮樂耕戰。鍾律星曆。官名地志。姓族物類之學。今四方之士。亦不可謂無人。雖不能兼該衆長。要爲各有所得。往往皆捐數十年之功。耗心疲力。彫頓齒髮。而爲之。豈可易哉。如足下之所已得者。某願就學焉。其未者。頗願與足下從諸君子。歷探其所有。足下亦宜益發所亭蓄。以與朋友共之。某所聞誠最淺薄。亦願再拜以進。惟足下與諸君子之所決擇。使前輩風俗。由吾輩復少振。而狹陋之病。不遂沉痼。豈細事哉。屬兩目苦眩。未得面陳。而先以書布謝。惶恐惶恐。

與尉論捕盜書

某昨暮聞以逐盜遽出。雖小事。亦有難處置者。此十許人皆負重辟。相與竄伏山林中。昏夜伺便小劫。比官知之。則已分散跳匿。無次舍旗鼓。可以物色求。無編裨部伍。可以策畫破。無糧可燒。無巢穴可窮。驟集忽散。如鬼物然。

又實小盜。官兵計其不能爲甚害。所以久不獲也。今未言能萬一馴至大盜。但無辜之民。時時遭劫。亦不可云細事。方其劫時。執縛恐迫。計民之冤。與遭大盜亦有何異。今日偶見一退卒說此事。頗若可采。不敢效庸人以非職事故。默默不以告。卒言。此十許人。雖出沒合散不常。似難遽獲。然盡必食。夜必息。得金帛必賣。劫掠往來。至近亦須行四五里。豈有都無一人見之之理。蓋自頃。民言見賊。官輒意其與賊通。捕繫笞掠。久之。無所得。始釋去。是官自塞耳目。爲賊計則多。爲捕賊計則疎矣。一二年來。民間懲創此事。雖與賊交臂而過。歸家噤默。不敢以語比鄰。而況於告官乎。故官兵動息。賊皆先知。而賊雖近在十步內。官兵終不得知。某思其言。實中事情。亦嘗竊度之。環三縣弓手土兵。爲人幾何。逐捕十許賊。連歲弗獲。不可不思其故也。四境無事。秋稼如雲。誰肯爲賊囊橐者。縱有亦不應人人皆然。吾輩儒者。當有大略。願足下曠然無疑於胸中。不當效武夫俗吏。但知守故常也。夫戰而獻誠。自三代以來用之。不可謂非古然。近世至賊殺平人。以爲功。靖康建炎間。不勝其弊。始更制凱還。勿獻誠。使將校。列上功最而已。由是妄殺之禍。十去八九。然則三代聖人之遺法。尙可改以便事。而況近歲妄庸者所爲乎。自今有言見盜者。當一切慰藉遣去。卽度其不安。或羸有補。則又稍旌別之。雖目前未得力。但使人人敢言見賊。賊蹤跡益露。勢益窮蹙。遠不過數月獲矣。足下試熟策之。秋暑野次自愛。

## 答陸伯政上舍書

九月六日。某再拜復書伯政學士宗友兄閣下。卽日初寒。伏惟尊候萬福。春中蒙見顧。衰疾無聊。不得款承絕塵邁往之論。至今悒悒。忽賢郎上舍攜所貺書及新詩來。已深開慰。又得雜著詩文一編。置百事讀之。所以開益。殆非一端。古聲不作。久矣。所謂詩者。遂成小技。詩者。果可謂之小技乎。學不通天人。行不能無愧於俯仰。果可以言詩乎。僕紹興末。在朝路。偶與同舍二三君。至太一宮。聞中有高士齋。皆名山高逸之士。欣然訪之。則皆扃戶出矣。裴回老松流水之間。久之。一丫髻童。負琴引鶴而來。風致甚高。吾輩相與言曰。不得見高士。得見此童。亦足矣。及揖而問之。則曰。今日董御藥生日。高士皆相率往獻香矣。吾輩遂一笑而去。今世之以詩自許者。大抵多太一高士之流也。不見笑於人。幾希矣。而望其有陶淵明杜子美之餘風。果可得乎。雜文數篇。多甲寅以來所著。言論風旨。皆非同乎俗合乎世者。與乎甫書。用意尤至。則石守道李泰伯。氣格相上下。而師友淵源。未可以望吾伯政也。

然所以告平甫者。尙恐有所含蓄。不欲盡發。此非面莫究。昨日兒子自城中來。知方伯暮已卒。天平有是哉。計老兄亦同此哀也。賢子表表超絕。當爲名士。不止取科第而已。奉爲宗家。贊喜無已。黃精奇妙。感激千萬。匆匆不旣所欲言者。亦坐老憊耳。漸寒。珍重珍重。

答王樞秀才書

十一月二日。山陰陸某再拜復書。先輩足下。貢舉之法。擇進士入官者爲考試官。官以考試名。當日夜專心致志。以去取士。不可兼蒞他事。則又爲設一官。謂之監試。監試羸官不復擇。蓋夫人而可爲也。甚至法吏流外。平日不與清流齒者。亦得爲之。故又設法曰。監試毋輒與考校。則所以待監試可知矣。某鄉佐洪州。適科舉歲。當以七月到官。遂泊舟星子灣。幾月。聞已鎖院。不敢進。非獨畏監試事煩。實亦羞爲之。今年在夔府。府以四月試。試前督白府帥。願得移疾。已見許矣。會部使者難之。某篤弱。畏以避事得罪。遂勉入院。某與諸試官皆不相識。惴惴恐其以侵官犯律。令見詬。自命題至揭榜。未嘗敢一語及之。不但不與也。間偶見程文一二可愛者。往往遭塗抹疵。詆令人氣湧如山。然歸臥室中。財能向壁歎息。蓋再三熟計。雖復強聒。彼護短者決不可回。但取詬耳。若可回。雖詬固不避也。如足下之文。又不止可愛。誠可敬且畏者。而一旦以疑黜。此豈獨足下不能無言。雖試官與拔解諸人。亦噴噴稱屈。某至是直欲以羸官不與考試自恕。其可乎。將因紹介再拜請罪於門牆而未敢也。不圖足下容之察之。更辱賜書。講修朋友之好。而以前者不能無言爲悔。方是時。使足下遂能無言。固大善。然士以功名自許。非得一官。則功名不可致。雖決當黜。尙悒悒不能已。況以疑黜乎。某往在朝。見達官貴人免去。不憂沮者蓋寡。彼已貴。雖免。貴固在。其所失孰與足下多。然猶如此。今乃賣足下以不少動心。亦非人情矣。前輩有錢希白。少時試開封。得第二。希白豪邁。自謂當第一。乃詣闕上書。詆主司。當時不以爲大過。希白卒爲名臣。夫科舉得失爲重。高下細事耳。希白不能忍其細。而賣足下。默默於其重者。不可不邪。是皆已往事。不足復言。區區仰歎足下才氣。思有以奉廣。故詳及之。某吳人。凡吳之陸。皆同譜。所謂四十九枝譜是也。如龍圖公雖差遠。顧尙可紀。則於足下亦有瓜葛。蒙教篤。尤感。旦暮詣見。先此爲謝。

## 卷十四

## 序十七首

## 容齋燕集詩序

廉宣仲葺其燕居之室曰容齋。既成。置酒落之。舉觴屬客曰。吾聞東郭順子之爲人。人貌而大。清而容物。吾雖不能。而竊慕焉。諸君以爲何如。或曰。方公盛壯時。以郡文學高第入爲博士。公卿盡傾。名流彥士執贄求見者。肩摩而袂屬。車騎雍容。行者趨避。議論英發。聞者傾聽。傲色不至於目。嫚言不接於耳。方是時。容物固無甚難也。及轉徙江湖。白首下吏。舍於邸者爭席。遇於途者相誰何。則公之容固難矣。至於權口語。結吏議。少年之喜謗前輩者。闕然成市。公猶容之。則豈不甚難哉。敢問所以能此者。何也。宣仲笑曰。是亦有道焉。可容者吾以其情容之。不可容者吾以其人容之。故吾遇客而驩然。遇酒而醺然。遇怒罵嫺侮。如風葉之過吾前。候蟲之鳴吾旁也。子欲聞其說乎。方子之飲酒也。俳諧者箕倨。角觝者裸程。子何以不怒。豈不以其爲此者非嫚耶。此吾所謂以其情容之也。世有服讒蒐慝。習於爲惡。勇於爲不義者。誠若可疾矣。吾則徐思之曰。彼君子邪。固不至此。彼小人邪。此固小人之常。而吾以動心。則去彼亦無幾何耳。此又吾所謂以其人容之也。二者可容。何所不容。而子獨何怪於是。坐客媿且歎曰。吾儕誠小人哉。某在衆人中。尤號褊率。蓋屢歎也。酒酣。客皆賦詩。而屬某爲絃。旣不得辭。則因以識其媿。將覽觀之。以自傲焉。

## 京口唱和序

隆興二年閏十一月壬申。許昌韓無咎以新番陽守來省太夫人於潤。方是時。予爲通判郡事。與無咎別。蓋逾年矣。相與道舊故。問朋遊。覽觀江山。舉酒相屬。甚樂。明年。改元乾道。正月辛亥。無咎以考功郎徵。念別有日。乃益相與遊。遊之日。未嘗不更相和答。道羣居之樂。致離闕之思。念人事之無常。悼吾生之不留。又丁寧相戒。以窮達死生毋相忘之意。其詞多宛轉深切。讀之動人。嗚呼。風俗日壞。朋友道缺。士之相與如吾二人者。亦鮮矣。凡與無咎相從者六十日。而歌詩合三十篇。然此特其略也。或至於酒酣耳熱。落筆如風雨。好事者從旁掣去。他日或流傳樂府。或見於僧窗驛壁。恍然不復省識者。蓋又不可計也。潤當淮江之衝。予老益厭事。思自放於山巔水涯。與世

相忘。而無咎又方用於朝。其勢未能遽合。則今日之樂。豈不甚可貴哉。予文雖不足與無咎並傳。要不當以此廢而不錄也。二月庚辰。笠澤陸某務觀序。

送關漕詩序

李固杜喬臧洪之死。士以同死爲榮。范文正之貶。士以不同貶爲恥。今著作之免歸也。御史以風聞言之。天子以無心聽之。與前事固大異。而坐客賦詩或危之何也。風俗異也。某旣列名衆詩之次。又承命作序。二罪當併按矣。乾道六年十二月七日。笠澤陸某序。

雲安集序

濟南治歷城。漢故縣也。帶灤水而表歷山。其山川雜見於春秋。孟子史記諸書。舜之遺迹。蓋至於今可考。士生其間。多通儒名卿秀傑之士。而以筆墨馳騫相高。往往多清麗雄放警絕之詞。與山川稱。若今夔府連帥王公是已。公自少時寓秘閣直。晚由尙書郎。長三院御史。出牧於夔。實督峽中十五郡。資忠厚。故政令簡。心樂易。故民夷親。乃因暇日。登臨矚望。徘徊太息。弔丞相之遺祠。想拾遺之高風。醉墨淋漓。放肆縱橫。實爲一代傑作。願夔雖號大府。而荒絕瘴癘。戶口寡少。曾不敵中州一下郡。如某輩又以憂患留落。九死之餘。才盡志衰。欲強追逐公後而不可得。向使公當承平時。爲并爲雍。爲鎮爲定。盡得四方賢士大夫。以爲賓客。相與覽其河關之勝。以騁筆力。則公衆作森列。豈特此而已哉。雖然是猶未也。必極公之文。絃歌而薦郊廟。典冊而施朝廷。然後曰宜。今乃猶嘯詠於荒山野水之濱。追前世放逐羈旅之士而與之友。雖小夫下吏。或幸得之。於虜。是可歎歎。公以乾道七年八月移牧永嘉。行有日。奉節令右從政郎晉慈安高良公在郡。文章若干篇。爲雲安集。且屬通判州事左承議郎山陰陸某爲序。十月二十六日序。

送范西叔序

乾道壬辰二月。予道益昌。始識范東叔。後月餘。進與東叔兄西叔爲僚於宣威幕府。又三月。西叔以樞密使薦。趣召詣行在所。二君皆中書侍郎榮公孫也。昔榮公對制策於治平。爭詔獄於熙寧。論河事邊事刑名。赦令於元祐。雖用舍或小異。而要皆不合。故用不極其材以沒。沒又列黨籍。其門戶爲世排詆。諱惡者幾四十年。又四十年。而



西叔兄弟始復奮發。爲蜀知名士。世之論盛衰者。謂人定勝天。夫定亦勝人。予獨鄙此說。夫盛衰皆天也。人何與焉。天將禍人之國。則小人得志而君子廢。其將福之也。則君子見用而小人絀。國有禍福。而君子無屈伸。彼區區者。乃誠謂天與人以衆寡疾徐爲勝負。豈不可悲也哉。九月丁丑。西叔始東下。同舍相與臨濠水。置酒賦詩。而屬予爲序。夫吾曹之望於西叔。所以繼榮公者。豈獨爵位隆赫。文辭行中朝而已哉。雖然。予與西叔。皆黨籍家也。旣以勵西叔。亦以自勵。且勸吾東叔云。

東樓集序

余少讀地志。至蜀漢巴楚。輒悵然有遊歷山川。攬觀風俗之志。私竊自怪。以爲異時或至其地。以償素心。未可知也。歲庚寅。始泝峽。至巴中。聞竹枝之歌。後再歲。北遊山南。憑高望鄠。萬年諸山。思一醉曲江。漢陂之間。其勢無繇。往往悲歌流涕。又一歲。客成都唐安。又東至於漢嘉。然後知昔者之感。蓋非適然也。到漢嘉四十日。以檄得還成都。因索在筭得古律三十首。欲出則不敢。欲棄則不忍。迺紉藏之。乾道九年六月二十一日。山陰陸某務觀序。

范待制詩集序

石湖居士范公待制。敦文閣來帥成都。兼制置成都潼川利夔四道。成都地大人衆。事已十倍他鎮。而四道大抵皆帶蠻夷。且北控秦隴。所以臨制捍防。一失其宜。皆足致變。故於呼吸顧盼之間。以是幕府率窮日夜力。理文書。應其會。而故時巨公大人。亦或不得少休。及公之至也。定規模。信命令。弛利惠。農遷將治兵。未數月。聲震四境。歲復大登。幕府益無事。公時從其屬。及四方之賓客。飲酒賦詩。公素以詩名一代。故落紙墨未及燥。士女齒人已更傳誦。被之樂府。絃歌。或題寫素屏。團扇。更相贈遺。蓋自蜀置帥守以來未有也。或曰。公之自桂林入蜀也。舟車鞍馬之間。有詩百餘篇。號西征小集。尤雋偉。蜀人未有見者。盍請於公以傳。屢請而公不可。彌年。乃僅得之。於是相與刻之。而屬某爲序。淳熙三年上巳日。朝奉郎成都府路安撫司參議官兼四川制置使司參議官山陰陸某序。

持老語錄序

持禪師。明州鄞人。世爲士。一旦棄髮鬚。學佛。得法於白牛卿。初住餘姚法性。數年忽謝去。越牧欲以雍熙邀致。疑不就。試一問之。師欣然曰。願即得檄。牧大喜。師懷負包笠。即日徒步入院。秉節如金石。說法如雷霆。雖從之遊者。

不過四五十費。而名震吳越。盡交一世名卿賢大夫。予先君會稽公知之最深。予時甫數歲。侍先君旁。無旬月不見師。至今想其抵掌笑語。瞭然在目前。夷粹真率。真山林間人也。後又徙居雪竇護聖二山。年德益高。如徑山杲公輩。皆以丈人行尋事之。其滅也。談笑如平時。蓋以真率爲佛事者邪。得法弟子子詢行光如寂廣懃。或出世說法。或遁迹衆中。皆不幸早逝去。而法揚用璋獨在場。於是亦住護聖。譚然爲叢林耆宿。璋老且病。猶自力刻師語錄。且合辭屬予爲序。師可謂有子矣。予以先君故。不敢辭。淳熙六年五月二十五日。山陰陸某序。

師伯渾文集序

乾道癸巳。予自成郡適犍爲。識隱士師伯渾於眉山。一見。知其天下偉人。予旣行。伯渾餞予於青衣江上。酒酣。浩歌。聲搖江山。水鳥皆驚起。伯渾飲至斗許。予素不善飲。亦不覺大醉。夜且半。舟始發去。至平羌。酒解。得大軸於舟中。則伯渾醉書。紙窮墨燥。如春龍奮鬣。奇鬼搏人。何其壯也。後四年。伯渾得疾不起。予懷祖集伯渾文章。移書走入千里。乞余爲序。嗚呼。伯渾自少時名震秦蜀。東被吳楚。一時高流皆尊慕之。願與交。方宣撫使臨邊。圖復中原。制置使并護梁益兵民。皆巨公大人。聞伯渾名。將聞於朝。而卒爲忌者所沮。夫伯渾旣決不肯仕。卽無沮者。不過有司歲時奉粟帛牛酒勞問。極則如孔叵徐復輩。賜散人號。書其事於史而已。於伯渾何失得。而忌已如此。鄉使伯渾出而事君。爲卿爲公。則忌者當益衆。排擊沮撓。常不遺力。徒比景。輪左校。殆未可知。安得如在眉山。躬耕婦織。放意山水。優游以終天年邪。則伯渾不遇。未見可憾。或曰。伯渾之才氣。空海內無與比。其文章英發鉅麗。歌之清廟。刻之彝器。然後爲稱。今一不得施。顧退而爲山巔水涯。娛憂紓悲之言。豈不可憾哉。予曰。是則有命。識者爲時惜。不爲伯渾歎也。淳熙某月某日。山陰陸某序。

晁伯各詩集序

傳密居士東里晁公伯各詩四百六十有一篇。其孫教授君百談集爲四卷以授予。請序卷首。伯各少以文學稱。自其諸父景迂。具茨先生。皆歎譽之。諸公貴人亦往往聞其名。顧黨家不敢取。靖康之元。黨禁解。伯各召爲開封掾。且顯用矣。阻兵不能造朝。比乘輿過江。中原方兵連不解。士大夫多以甲兵錢穀進。故家名流。乃見謂不切事機。伯各落江湖者數年。久之。雖起。乘傳橫海。復坐微文斥。卒棄不用以死。而伯各傲睨憂患。不少動心。方扁舟往

來吳松。嘯歌飲酒。益放於詩。其名章秀句。傳之士大夫。皆以爲有承平盛閣之風。蓋晁氏自文元公以大手筆用於祥符天禧間。方吾宋極盛時。封泰山。禮百神。歌頌德業。冶金伐石。極文章翰墨之用。汪洋渟滢。五世百餘年。文獻相望。以及建炎紹興。公獨殿其後。又少時所交。皆中州名勝。講習磨礪之益深矣。是豈囊書生聞見局陋者。敢望其涯哉。伯各學問膽博。胸中恢疎。勇於爲義。視死生禍福無如也。至他文亦皆曩奇。不獨其詩可貴。尙力求而盡傳之。伯各諱公邁。仕至某官。淳熙七年十一月十七日。山陰陸某序。

長短句序

雅正之樂微。乃有鄭衛之音。鄭衛雖變。然琴瑟笙簧猶在也。及變而爲燕之筑。秦之缶。胡部之琵琶篳篥。則又鄭衛之變矣。風雅頌之後。爲騷。爲賦。爲曲。爲引。爲行。爲謠。爲歌。千餘年後。乃有倚聲製辭。起於唐之季世。則其變愈薄。可勝歎哉。予少時汨於世俗。頗有所爲。晚而悔之。然漁歌菱唱。猶不能止。今絕筆已數年。念舊作終不可捨。因審其首以識吾過。淳熙己酉炊熟日。放翁自序。

徐大用樂府序

古樂府有東武吟。鮑明遠輩所作。皆名千載。蓋其山川氣俗。有以感發人意。故騷人墨客。得以馳騁上下。與荊州邯鄲巴東三峽之類。森然竝傳。至於今不泯也。吾友徐大用家本東武。呼吸食飲於邦。其津。蓋有以相其軼思者。故自少時。文辭雄於東州。比南歸。以政事議論。顯聞薦紳。顧不肯輕出其文。以沽世取富貴。三十年猶屈治中別駕。澹然莫測涯涘。獨於悲懣離合。郊亭水驛。鞍馬舟楫間。時出樂府辭。瞻蔚頓挫。識者貴焉。或取其數百篇。將傳於世。大用復不可。曰。必放翁以爲可傳。則幾矣。不然。姑止。予聞而歎曰。溫飛卿作南鄉九闌。高勝不減。夢得竹枝。訖今無深賞音者。予其敢自謂知君哉。獨感東武山川。旣墮胡塵中。而大用之才。久伏不耀。故爲之一言。紹熙五年三月庚寅。笠澤陸某務觀序。

呂居仁集序

天下大川莫如河江。其源皆來自蠻夷荒忽遼絕之域。累數萬里。而後至中國。以注於海。今禹之遺書。所謂岷積石者。特記禹治水之迹耳。非其源果止於是也。故爾雅謂河出崑崙虛。而傳記又謂河上通天漢。某至蜀。窮江源。

則自蜀岷山以西皆岷山也。地斷環絕。不復可窮。河江之源。豈易知哉。古之學者蓋亦若是。惟其上探慮。唐虞以來。有源有委。不以遠絕。不以難止。故能卓然布之天下。後世而無媿。凡古之言者皆莫不然。自漢以下。雖不能如三代盛時。亦庶幾焉。宋興。諸儒相望。有出漢唐之上者。迨建炎紹興間。承喪亂之餘。學術文辭。猶不愧前輩。如故紫微舍人東萊呂公者。又其傑出者也。公自少時。既承家學。心體而身履之。幾三十年。仕愈躡。學愈進。因其暇。盡交天下名士。其講習探討。磨礱浸灌。不極其源不止。故其詩文。汪洋闊肆。兼備衆體。間出新意。愈奇而愈渾厚。震耀耳目。而不失高古。一時學士宗焉。晚節稍用於時。在西掖。嘗兼直內庭。草趙丞相鼎制。力排和戎之議。忤秦丞相檜。秦公自草日曆。載公制辭以爲罪。而天下益推公之正。公平生所爲詩。既已孤行於世。嗣孫祖平又盡哀他文。凡若干首爲若干卷。而屬某爲序。某自童子時。讀公詩文。願學焉。稍長。未能遠遊。而公捐館舍。晚見曾文清公。文清謂某。君之詩淵源殆自呂紫微。恨不一識面。某於是尤以爲恨。則今得託名公集之首。豈非幸歟。慶元二年九月既望。中大夫提舉建寧府武夷山仲佑觀山陰陸某謹序。

### 佛照禪師語錄序

拙庵禪師以佛法際遇孝宗皇帝。問答之語。既刻金石。傳天下久矣。晚菴居阿育王山中。其徒相與盡衷五會所說法。凡數萬言。爲五卷。遣侍者正球走山陰澤中。請某作序。某曰。拙庵之道。棟梁大法。無語可也。拙菴之語。雷霆百世。無錄可也。又何以序爲哉。然五會之外。別有一會。數萬言之外。別有一句。是可錄。是不可錄。諸人試下語。若也。道得老農贊歎有分。慶元三年九月壬子。陸某謹序。

### 趙秘閣文集序

漢孝武帝好文。淮南王安以高帝孫爲諸侯王。而學問文辭在漢庭諸儒甲乙中。其所著大小山。至與雅頌離騷竝。魏陳思王。唐太白長吉。則又以帝子及諸王孫。落筆妙古今。冠冕百世。河出崑崙虛。首四瀆。經天下。以入于海。彼源委固自不同。無足異也。宋興。宗室深居宮中。不與外庭接。故雖博學軼材。不得著見。然以詩文飛白書詔藏秘府者。亦不乏人。熙寧元豐間。始與羣臣竝進於朝。積數十年。而德麟伯山。屬文英妙。寔見推於諸公間矣。漢王五世孫秘閣公。諱不拙。字若拙。少以進士奮。主司及流輩皆伏其工。初苦貧無以養。乃教授諸生以自給。其勤苦

殆有非人子所堪者。既得第，猶不廢也。晚入蜀，爲州，遂持使者節，學益不厭，文益妙。予行南充闕，中小益至成都。歷山鄆、津、寧，及浮屠老子之廬，見穹碑巨板，多公遺文，每觀之，至忘食。已而故尙書孫公仲益、端明汪公聖錫、侍御王公龜齡、文益出於世，往往見公名字於其間，許與甚至。然後知天下自有公論也。公之子善發、善零，皆取世科。善發字正己，尤以文學稱，其爲漢州判官也。囊公之文，萬里請予於山陰澤中，曰：願有以冠篇右。顧公平生知己，久已凋落，予材下，徒以後死，不得讓，媿可量哉。慶元六年三月丁巳，中大夫直華文閣致仕賜紫金魚袋山陰陸某序。

## 方德亨詩集序

詩豈易言哉。才得之天，而氣者我之所自養，有才矣，氣不足以御之，淫於富貴，移於貧賤，得不償失，榮不蓋媿，詩由此出，而欲追古人之逸駕，詎可得哉。予自少聞莆陽有士曰方德亨，名豐之才甚高，而養氣不撓，呂舍人居仁，何著作擢之，皆屈行輩與之遊。德亨晚愈不遭，而氣愈全，觀其詩，可知其所養也。既歿若干年，待制朱公元晦，以書及德亨之詩示予於山陰，曰：子爲我作德亨集序。往時有方晦者，與德亨同族，爲予言。德亨遇疾，卒於臨安逆旅，垂困，猶能起坐，正衣冠，手自作書，與其族人官臨安者，使買棺，棺至，乃歿，色辭不異平日，非養氣之全，能如是乎。請以是爲序。慶元六年四月丁酉，山陰陸某序。

## 會稽志序

昔在夏禹，會諸侯於會稽，歷三千歲，而我高宗皇帝御龍舟，橫濤江，應天順動，復禹之跡，駐蹕彌年，定中興之業，羣盜削平，強虜退遁，於是用唐幸梁州故事，陞州爲府，冠以紀元，大駕旣西幸，而府遂爲股肱近藩，稱東諸侯之首，地望蓋視長安之陝洛，汴都之陳許，所命牧守，皆領浙東安撫使，其自丞相執政來，與去而拜丞相執政者，不可遽數，而又昭慈聖烈皇后及永祐以來，四陵攢殿，相望於鬱葱佳氣中，朝謁之使，臚銜數擊，中原未清，今天下鉅鎮，惟金陵與會稽耳。荆揚梁益，彈廣皆莫敢望也。則山川圖牒，宜其廣載備書，顧未暇及者，縣數十年，大卿沈公作賓，待制趙公不迹，繼爲守，皆慨然以爲己任，乃與通判軍事施君宿，安撫司幹辦公事李君兼韓君茂卿，及郡士禰異中，邵持正，陸子虞，王度，朱籛等，上參禹貢，下考太史公及歷代史，金匱石室之藏，旁及爾雅本草，道釋

之書。稗官野史所傳。神林鬼區幽怪恍惚之說。秦漢晉唐以降金石刻。歌詩賦詠。殘章斷簡。靡有遺者。若父老以口相傳。不見於文字者。亦間見層出。積勞累月。乃成。是雖本之圖經。圖經出於先朝。非藩郡所可附益。乃用長安河南成都相臺之比。名會稽志。會稽爲郡。雖遷徙靡常。而郡本以山得名。又禹所巡也。故卒以名之。而屬某爲之序。嘉泰元年二月庚子。中大夫直華文閣致仕陸某謹序。

## 卷十五

### 序十七首

#### 施司諫註東坡詩序

古詩唐虞賡歌。夏述禹戒作歌。商周之詩。皆以列於經。故有訓釋。漢以後詩。見於蕭統文選者。及高帝項羽章益揚。揮梁鴻趙壹之流。歌詩見於史者。亦皆有註。唐詩人最盛。名家者以百數。惟杜詩註者數家。然槩不爲識者所取。近世有蜀人任淵。嘗註宋子京黃魯直陳無己三家詩。頗稱詳贍。若東坡先生之詩。則援據閎博。指趣深遠。淵獨不敢爲之說。某頃與范公至能會於蜀。因相與論東坡詩。慨然謂予。足下當作一書。發明東坡之意。以遺學者。某謝不能。他日。又言之。因舉二三事以質之。曰。五畝漸成終老計。九重新掃舊巢痕。遙知叔孫子。已致魯諸生。當若爲解。至能曰。東坡竄廣州。自度不復收用。故曰新掃舊巢痕。建中初。復召元祐諸人。故曰已致魯諸生。恐不過如此耳。某曰。此某之所以不敢承命也。昔祖宗以三館養士。儲將相材。及官制行。罷三館。而東坡蓋嘗直史館。然自認爲散官。削去史館之職久矣。至是史館亦廢。故云新掃舊巢痕。其用字之嚴如此。而鳳巢西隔九重門。則又李義山詩也。建中初。韓會二相得政。盡收用元祐人。其不召者亦補大藩。惟東坡兄弟猶領宮祠。此句蓋寓所謂不能致者二人。意深語緩。尤未易窺測。至如車中有布乎。指當時用事者。則猶近而易見。白首沉下吏。綠衣有公言。乃以待妾朝雲嘗歎黃師是仕不進。故此句之意。戲言其上僭。則非得於故老。殆不可知。必皆能知此。然後無憾。至能亦太息曰。如此誠難矣。後二十五年。某告老居山陰澤中。吳興施宿武子出其先人司諫公所註數十大編。屬某作序。司諫公以絕識博學名天下。且用工深。歷歲久。又助之以顧君景蕃之該洽。則於東坡之意。蓋幾

可以無憾矣。某雖不能如至能所託，而得序斯文，豈非幸哉。嘉泰二年正月五日，山陰老民陸某序。

蓬觀堂詩序

朝請郎致仕吳公景先少嘗從洛川先生朱公希真問道。朱公爲名所居堂曰蓬觀，手書以遺之。且賦詩一章，屬之曰：子爲人深靜簡遠，不富貴，必壽考。故吾以此事相期。景先出仕五十年，不求速化，不治生產，位僅至二千石，晚爲東諸侯客，遂引年以歸，距八十不遠，望其容貌，不腴不瘠，視聽步趨，如五六十人，非得朱公密傳親付，殆不能爾。朱公之逝甚異，世以爲與尹先覺譙天授蘇養直俱解化僊去，則吾景先亦其流亞歟。自朱公賦詩後，士大夫繼作凡若干篇，屬子爲序。嘉泰二年十一月癸丑，放翁陸某務觀序。

梅聖俞別集序

宛陵先生遺詩及文若干首，實某君李兼孟達所編輯也。先生當吾宋太平最盛時，官京洛，同時多偉人巨公，而歐陽公之文，蔡君謨之書，與先生之詩，三者鼎立，各自名家。文如尹師魯，書如蘇子美，詩如石曼卿輩，豈不足垂世哉。要非三家之比。此萬世公論也。先生天資卓偉，其於詩，非待學而工，然學亦無出其右者。方落筆時，置字如大禹之鑄鼎，練句如后夔之作樂，成篇如周公之致太平，使後之能者欲學而不得，欲贊而不能，況可得而譏評去取哉。歐陽公平生常自以爲不能望先生，推爲詩老。王荆公自謂虎圖詩不及先生，包鼎畫虎之作，又賦哭先生詩，推仰尤至。晚集古句，獨多取焉。蘇翰林多不可古人，惟次韻和陶淵明及先生二家詩而已。雖然，使本無此三公，先生何歎有此三公，亦何以加秋毫於先生，予所以論載之者，要以見前輩識精論公，與後世妄人異耳。會李君來請予序，故書以予之。嘉泰三年正月己卯，山陰陸某序。

楊夢錫集句杜詩序

文章要法，在得古作者之意，意既深遠，非用力精到，則不能造也。前輩於左氏傳太史公書韓文杜詩，皆熟讀暗誦，雖支枕據鞍間，與對卷無異，久之，乃能超然自得。今後生用力有限，掩卷而起，已十亡三四，而望有得於古人，亦難矣。楚人楊夢錫才高而深於詩，尤積勤杜詩，平日涵養不離胸中，故其句法森然可喜，因以暇戲集杜句，夢錫之意，非爲集句設也，本以成其詩耳，不然，火龍黼黻手，豈補綴百家衣者邪。予故爲表出之，以告未深知夢錫

者嘉泰三年正月丁亥笠澤陸某序。

陸伯政山堂類稿序

古之學者始於家塾鄉校而貢於天子之辟雍始於抱關擊柝而至於公卿始於賦物銘器師旅會盟之辭而至於陳謨作誥其所遇雖不同然於明聖人之道闡性命精微之理則一也周衰道術裂於百氏士各以所見著書授徒於是稽之堯舜禹文王周公孔子之遺書始有大不合者今六經散缺不全而諸子之書則往往具在又其辭怪僅辯麗足以動蕩世之耳目乃欲學者之文辭一合於道而不悖戾於經可謂難矣吾宗伯政諱煥之唐丞相文公希聲之九世孫文公上距丞相元方五世中間子孫遇五季之亂獨不失譜至今世次皆可序述伯政家世爲儒力學篤行至老不少衰所爲文皆本六經無一毫汨於釋老雖其徒有從之求文者伯政每所聞猶毅然不爲之貶至如楊公時近世名儒獨以立論少入釋老伯政正色斥之不遺餘力使死而有知吾伯政有以見周公孔子矣其孤集遺文爲二十卷來請余爲序伯政之文可稱述者衆余獨言其學術文辭之正以序之尙不失斯人之本意又進其子孫云嘉泰四年二月丁巳笠澤陸某謹序。

普燈錄序

粵自曠大劫來至神應迹開示天人未有不以文字語言相授者今七佛偈是其一也至於中夏則三十萬年前包犧氏作已畫八卦造書契矣釋迦之興固亦無異今一大藏教可謂富矣乃獨於最後舉華示其上足弟子迦葉迦葉欣然一笑不立文字不形言語謂之正法眼藏師舉華而傳弟子一笑而受既書之木葉旁行之間矣亦未見其與古聖異也豈謂之文而非文謂之言而非言邪昔有景德傳燈三十卷者蓋非文之文非言之言也此門一開繼者相望其尤傑立者續燈廣燈二書也然皆草創簡略自爲區別雖聖君賢臣之事有不能具載者獨旁見間出於諸祖章中識者以爲恨吳僧正受始著普燈凡十有七年成三十卷前日之恨毫髮無遺矣而尤爲光明崇顯者我祖宗之明詔睿藻哀集周悉一一皆有據依足以傳示萬世實爲大訓其有功於釋門最大方且上之御府副在名山而又以其副示某俾得紀述梗槩於後某自隆興距嘉泰五備史官今雖告老待盡山澤猶於祖宗遺事思以塵露之微仰足山海不自知其力之不逮也嘉泰四年三月乙酉太中大夫充寶謨閣待制



致仕山陰縣開國子食邑五百戶賜紫金魚袋陸某謹序。

## 瘡齋居士詩序

詩首國風。無非變者。雖周公之豳亦變也。蓋人之情。悲憤積於中而無言。始發爲詩。不然。無詩矣。蘇武李陵陶潛謝靈運杜甫李白。激於不能自己。故其詩爲百代法。國朝林逋魏野以布衣死。梅堯臣石延年棄不用。蘇舜欽黃庭堅以廢紼死。近時。江西名家者。例以黨籍禁錮。乃有才名。蓋詩之興本如是。紹興間。秦丞相檜用事。動以語言士大夫。士氣抑而不伸。大抵竊寓於詩。亦多不免。若瘡齋居士陳公德召者。故與秦公有學校舊。自揣必不合。因不復與相聞。退以文章自娛。詩尤中律呂。不怨不怒。而憤世疾邪之氣。凜然不少回撓。其不坐此得禍。亦僅脫爾。及秦氏廢。始稍起。爲吏部郎。爲國子司業。祕書少監。遽沒於官。後四十餘年。有子知津爲高安寺。最其詩。得三卷。屬某爲序。某少識公於山陰。方公召還。嘗以詩贈別。及公爲郎時。故相湯岐公一日語公曰。陸務觀別君詩。方傳世。非公之賢。何以發其語如此。時紹興己卯歲也。因高安之請。重以感歎。某於是年八十有一矣。開禧元年九月。太中大夫寶謨閣待制致仕山陰縣開國子食邑五百戶賜紫金魚袋陸某序。

## 傅給事外制集序

國家自崇寧來。大臣專權。政事號令。不合天下心。卒以致亂。然積治已久。文風不衰。故人材彬彬。進士高第。及以文辭進於朝者。亦多稱得人。祖宗之澤猶在。黨籍諸家爲時論所貶者。其文又自爲一體。精深雅健。追還唐元和之盛。及高皇帝中興。雖披荆棘。立朝廷。中朝人物。悉會於行在。雖中原未平。而詔令有承平風。識者知社稷方永。太平未艾也。故給事中傅公以是時典西省文書。得名尤盛。公天資忠義。絕人。自東夷寇逆。滔天。建炎中。大駕南渡。虜吞噬不遺力。幾犯屬車之塵。公眇然書生。位未通顯。獨涕泗感激。請提孤軍。橫過虜衝。衛乘輿。論功埒諸大將。及駐蹕會稽。公遂爲浙東帥。始隳然有大臣望。雖擯斥不容。而士論愈歸。及在東省。御史力詆去之。然猶知公爲一代大儒。蓋公論不可揜如此。公遺文百餘卷。嗣孫穉貧甚。手自鈔錄。以傳後世。未能竟。乃先緝外制數百篇。屬某爲序。公之文。固天下所願見而取法。某未成童時。公過先少師。每獲出拜侍立。被公教誨。詎今七十餘年。幸猶後死。得輪序公文。亦幸矣。某聞文以氣爲主。出處無媿。氣乃不撓。韓柳之不敵。世所知也。公自政和訖紹興。閱

世變多矣。白首一節不少屈於權貴。不附時論以苟登用。每言虜言畔臣。必憤然扼腕裂背。有不與俱生之意。士大夫稍有退縮者。輒正色責之若讐。一時士氣爲之振起。今觀其制告之詞。可槩見也。公諱崧卿。字子駿。於虜賢哉。開禧元年九月某日。太中大夫充寶謨閣待制致仕山陰縣開國子食邑五百戶。賜紫金魚袋陸某謹序。

### 聞聲錄序

元豐初。置武學。先太師以三館兼判學事。今學制規模多出於公。而策問亦具載家集中。後百餘年。某從子朴作聞聲錄若干篇。論孫吳遺意。欲上之朝。且乞序於某。某懦且老。非能知武事者。朴許國自奮之志。亦某所愧也。乃從其請。開禧元年十一月丁卯。陸某序。

### 周益公文集序

天之降才固已不同。而文人之才尤異。將使之發冊作命。陳謨奉議。則必畀之以閎富滄貫溫厚爾雅之才。而處之以帷幄密勿之地。故其位與才常相稱。然後其文足以紀非常之事。明難喻之指。藻飾治具。風動天下。書黃麻之詔。鏤白玉之牒。藏之金匱石室。可謂盛矣。若夫將使之闡道德之原。發天地之秘。放而及於鳥獸蟲魚草木之情。則畀之才亦必雄渾卓犖。窮幽極微。又畀以遠遊窮處。排擯斥疎。使之磨礱齟齬。瀕於寒餓。以大發其藏。故其所賦之才。與所居之地。亦若造物有意於其間者。雖不用於時。而自足以傳後世。此二者。造物豈真有意哉。亦理之自然。古今一揆也。大丞相太師益公。自少壯時。以進士博學宏詞疊二科起家。不數年。歷太學三館。予竇定交於是時。時固多豪雋不羣之士。然落筆立論。傾動一座。無敢嬰其鋒者。惟公一人。中雖暫斥。而玉煙劍氣三秀之芝。非窮山腐壤所能湮沒。復出於時。極文章禮樂之用。絕世獨立。遂登相輔。雖去視草之地。而大詔令典冊。孝宗皇帝猶特以屬公。於虜。聖主之心。亦如造物。非私公以富貴。蓋大官重任。不極不久。則無以盡公之才也。公既薨。逾年。公之子綸以公遺文號省齋文稿者。屬予爲之序。公在位久。崇論宏議。豐功偉績。見於朝廷。傳之夷狄者。何可勝數。予獨論其文者。墓有碑。史有傳。非集序所當及也。開禧元年十二月甲子。太中大夫寶謨閣待制致仕山陰縣開國子食邑五百戶賜紫金魚袋陸某謹序。

### 宣城李虞部詩序

宣之爲郡。自晉唐至本朝。地望常重。來爲守者不知幾人。而風流吟詠。謝宣城實爲之冠。生其鄉者幾人。而歌詩復古。梅宛陵獨擅其宗。此兩公蓋與敬亭之山俱不磨矣。故宣之士多工於文。而五七字爲尤工。唐有李推官。以詩名當代。其家傳遺詩者數百篇。以詩考之。蓋與皮陸同時歟。自推官後。世世得能詩聲。當元豐間。有虞部公作詩益工。推官清新警邁。極鍛鍊之妙。而虞部則規模思致。宏放簡遠。自宛陵出。如劉子駿文學。不盡與父同。議者亦不能優劣之也。予得其兩世遺編於虞部之曾孫臨海太守兼字孟達。孟達固詩人。蓋淵源二祖。而能不媿者。推官虞部之家世諱字。與其學術行治。蓋各見於其墓刻家牒。予獨志其詩云。開禧三年六月丙午。太中大夫寶謨閣待制致仕渭南縣開國伯食邑八百戶賜紫金魚袋陸某謹序。

## 曾裘父詩集序

古之說詩曰言志。夫得志而形於言。如臯陶周公召公吉甫。固所謂志也。若遭變遇讒。流離困悴。自道其不得志。是亦志也。然感激悲傷。憂時閔己。託情寓物。使人讀之。至於太息流涕。固難矣。至於安時處順。超然事外。不矜不挫。不誣不懟。發爲文辭。冲澹簡遠。讀之者遺聲利。冥得喪。如見東郭順子。悠然意消。豈不又難哉。如吾臨川曾裘父之詩。其殆庶幾於是乎。予紹興己卯庚辰間。始識裘父於行在所。自是數見其詩。所養愈深。而詩亦加工。比予來官臨川。則裘父已沒。欲求其遺書。而予蒙恩召歸。至今以爲恨。友人趙去華彥穉寄裘父艇齋小集來。曰。願序以數十語。然裘父得意可傳之作。蓋不止此。遺珠棄璧。識者與歎。去華爲郡博士。尙能博訪之。稍增編帙。計無甚難者。敢以爲請。裘父諱季狸。及與建炎過江諸賢游。尤見賞於東湖徐公。嘉定元年二月丁酉。山陰陸某序。

## 送巖電道人入蜀序

王衍一生酣養富貴。乃以口不言錢自高。巖電本張氏子。施藥說相。不受人一錢。乃自稱姓錢。以滑稽玩世。古今相反。有如此者。忽來告放翁。言將西入蜀。乃書以遺之。他日到青城大峨霧中鸚鵡鳴諸名山。見孫思邈朱桃椎張四郎。亦朱先生姚小太尉。譙天授尹先覺輩。有問放翁安否者。可出此卷。相與一笑。

## 邢芻甫字序

衛詩美武公之德一章。曰。瞻彼淇澳。綠竹猗猗。終之曰。有匪君子。終不可諼兮。淇大川也。見淇而思武公。可也。王

芻蕘竹草之微者。亦見而思焉。則思之至矣。此所謂終不可諉今者歟。吾友邢子名祺。請字於予。予復之曰。士之仕者。能使一國一邑之人安其政而無怨疾嘲譏。亦已難矣。况見其鄉閭而咨嗟追慕。豈不甚難哉。今衛人於武公。見其地而思之。見其草木而思之。見其草之微者。如王芻蕘竹而思之。况遇其子孫。又將何如哉。人不我忘。於我何加。然使人不怨疾嘲譏。又咨嗟追慕。久而不忘。必有以得之矣。故爲士者於此不可不知勉也。請字子曰芻甫。芻甫勉之。仕而使一國一邑之人不忘。相處而使鄉閭黨友不忘。相與記其行事以爲法。傳其言論風指。誦習而勉於善。豈不美哉。嘉定元年四月己未。山陰陸某序。

會溫伯字序

堯舜去今遠矣。其言傳於今者蓋寡。惟直而溫與寬而栗之言再見焉。方是時。教化之所覃。人才之所慕。全德如夔臯陶所言。是豈戒其不足哉。至商周之間。始有得聖人之清。聖人之和者。清近直。和近溫。則既分而爲二矣。若漢汲長孺事君無隱。天下爲之直。然去古之全德。又益以遠。贛川曾君黯。方其入家塾也。大父大卿公用蘇子由張芸叟字其子孫。例字之曰溫伯。蓋以古全德訓之。有其義而亡其說。溫伯請於予曰。願有以補之。以終大父之意。予慨然歎曰。自大卿至溫伯。三世傳嫡。德亦克肖。其有以承此訓矣。序其敢辭。嘉定元年五月辛酉。山陰陸某序。

天童無用禪師語錄序

處箴一畫。發天地之秘。迦葉一笑。盡先佛之傳。淨名一默。曾點一唯。丁一牛刀。扁一車輪。臨濟一喝。德山一棒。妙喜一竹篋子。皆同此關捩。但恨欠人承當。天童無用禪師。蓋卓爾能承當者。未見妙喜大事已畢。豈有住山示衆之語。可累編簡哉。放翁謂若不投之水火。無有是處。惟韓退之所云。火其書。其語差似痛快。又恐退之亦止是說得耳。五百年後。此話大行。方知無用與放翁却是同參。嘉定元年秋九月丙辰序。

陳長翁文集序

漢之文章。猶有大經餘味。及建武中興。禮樂法度。粲然如西京時。惟文章頓衰。自班孟堅已不能望太史公之淳深。崔蔡晚出。遂墮卑弱。識者累歎而已。我宋更靖康禍變之後。高皇帝受命中興。雖艱難顛沛。文章獨不少衰。得

志者司詔令。垂金石。流落不偶者。娛憂紆憤。發爲詩騷。視中原盛時。皆略可無媿。可謂盛矣。久而寢微。或以纖巧摘裂爲文。或以卑陋俚俗爲詩。後生或爲之變而不自知。方是時。能居今行古。卓然傑立於頽波之外。如吾長翁者。豈易得哉。其子師文來乞予爲長翁集序。乃寓吾歎以慰其子。且以慰長翁於地下云。長翁高郵陳氏。諱造。字唐卿。嘉定二年三月丁巳。涇南伯陸某務觀序。

## 卷十六

## 碑六首

成都府江濱廟碑傳熙四年五月一日

自古水土之功。莫先乎禹。紀其事莫備乎禹貢之篇。禹貢之所載。莫詳乎江漢。曰嶓冢導漾。東流爲漢。又曰岷山導江。某嘗登嶓冢之山。有泉涓涓出兩山間。是爲漢水之源。事與經合。及西遊岷山。欲窮江源。而不可得。蓋自蜀境之西。大山廣谷。鎗鋌起伏。西南走蠻夷中。皆岷山也。則江所從來。尤荒遠難知。而漢過三澁。至大別之麓。亦卒附江以達於海。故江爲四瀆之首。三代典祀。秩視諸侯。而楚大國。亦以爲望。有事必禱祠焉。可謂盛哉。成都自唐有江濱廟。其南臨江。唐末。節度使高駢大城成都。廟與江始隔。歷五代之亂。淫昏割裂。神弗受職。廟亦弗治。宋興。乾德三年。平蜀。越八年。當開寶六年。有詔自京師繪圖遣工。侈大廟制。傑閣廣殿。脩廊邃宇。聞於天下。慶曆七年。故太師忠烈潞公以樞密直學士來作牧。則又築大堂。竝廟東南。以爲徹祭飲福之所。而廟益宏麗矣。厥後雖屢繕治。有司不力。寢以大壞。上漏旁穿。風雨入屋。支傾苴罅。苟偷歲月。淳熙二年六月。今尹敷文閣待制范公之始至也。躬執牲幣。祇肅祀事。旣退。讀開寶中修廟碑。惕然政容。曰。此太祖皇帝之詔。敢弗虔。南出登堂。見忠烈公之識。則又歎曰。潞國予自出也。敢弗嗣。始有葺廟意矣。會歲旱。公潔齋以禱。曰。三日而雨。且大治祠宇。以報如期。高下洽足。歲以大穰。公饒私餘。蠻夷順服。乃自三年某月。庀工。訖四年五月。廟成。總其費。木以章計者。八千一百二十有八。竹以箇計者。四萬九千四百七十。輓甃釘以枚計者。十八萬七千七百二十有四。丹青黝堊以斤計者。一萬八十有七。梓匠役徒以口計者。二萬三千八百。爲屋二百有九間。牆六千八百七十尺。廟之制度。復還開寶慶

曆之盛而有加焉。於是府之屬吏來請其刻文麗牲之石。且繫以詩。詩曰。井絡之躔。下應岷山。蟠踞華夷。江出其間。奔蹴三峽。放於荆揚。我考禹跡。九州茫茫。千礎之宮。肇自開寶。吏靡嚴恭。庭有萑草。范公來止。事神是力。廟未克成。當食太息。江流東傾。於海朝宗。廟成公歸。與江俱東。壯哉湯湯。環我蜀城。萬古不竭。亦配公名。

行在寧壽觀碑

紹興二十年十月。詔賜行在三茆堂名曰寧壽觀。因東都三茆寧壽院之舊也。初。章聖皇帝。建會靈觀。實爲崇奉之始。至是。高宗皇帝方躋天下於仁壽之域。尤垂意焉。迺命道士蔡君大象知觀事。蒙君守亮副之。許其徒世守。又命中貴人劉君敖典領。置吏胥。給清衛兵。略用大中祥符故事。後十年。敖遂請棄官。專奉寧壽香火。詔如所請。賜名能真。改左右街都道錄。仍領觀事。實又用至道中內侍洪正一故事。上心眷顧。每示優假如此。然迨今歲月寢久。未有紀之金石以侈上賜者。紹熙五年六月。知觀事冲素大師邵君道俊始礱石來。請某爲文。傳示後世。某實紹興朝士。屢得對行殿。同時廷臣。零落殆盡。某適後死。獲以草野之文。登載盛事。顧不幸歟。伏觀寧壽觀實居七寶山之麓。表裏湖江。拱輔宮闕。前帶馳道。後枕崇阜。盡得都邑之勝。廣殿中峙。脩廊外翼。雲章寶室。籤帙富麗。浩浩乎道山蓬萊之藏也。鐘經二樓。聲飛霄漢。飄飄乎化人中天之居也。金符象簡。羽流畢集。進趨有容。肅恭齋法。濟濟乎茹靈芝。飲沆瀣之衆也。導以霓旌。節以玉磬。侍者翼從。以登講席。琅琅乎徹九天震十方之音也。祐陵之御畫。德壽重華之宸翰。煥乎河雒之圖書也。鴻鐘大鼎。華蓋寶劍。褚遂良吳道子之遺跡。卓乎祕府之怪珍也。榮光異氣。夜燭天半。所以扶衛社稷。安鎮夷夏者。於是乎在。非他宮館壇宇可得而比。永惟我高宗皇帝。實與三茆君。自渾沌溟涔開闢之初。赤明龍漢浩劫之前。俱以願力。應世濟民。雖時有古今。迹有顯晦。其受命上帝。以福天下。則合若符券。及夫風御上賓。威神在天。與三十六帝翔翔太虛。三茆君來與焉。時臨熙壇。顧享明薦。用敷佑於我聖子神孫。降福發祥。時萬時億。於虛休哉。某既述觀之所繇興。且繫之以銘。曰。炎祚中否。開真人。以大誓願。濟下民。左右虛皇友三真。坐令化國風俗淳。乃營斯宮示宿因。丹碧爰縈天與鄰。神君龍虎呵重闈。鯨鐘橫撞震無垠。錦旛寶蓋高嶙峋。天華龍燭晝夜陳。歷載九九符堯仁。超然脫屣侍帝晨。遺澤

滲漉萬萬均。歲豐兵僊無吟呻。咨爾衆士嚴冠巾。以道之真治子身。服膺聖訓常如新。冲霄往從龍車塵。

## 嚴州烏龍廣濟廟碑

山川之祀。自虞書以來。見於載籍。與天地宗廟竝。或謂山川與雲雨。澤枯槁。宜在秩祀。非必有神主之。以予考之。殆不然。維嶽降神。生甫及申。山川之神。降而爲人。與人死而爲山川之神。一也。豈幸而見於經則可信。後世則舉不可信邪。柳宗元死爲羅池之神。其傳甚怪。而韓文公實之。張路斯自人爲龍。廟於潁上。其傳尤怪。而蘇文忠公實之。蓋二神者。所傳雖不可知。而水旱之禱。卓乎偉哉。不可泯沒。則二公亦不得而揜也。予適蜀見李冰張惡子廟於離堆梓潼之山。皆血食千載。非獨世未有疑者。蓋其靈響暴者。亦有不容置疑者矣。嚴州烏龍山廣濟廟之神。曰忠顯仁安靈應昭惠王。舊碑以爲唐貞觀中人。姓邵氏。所記甚詳。雖幽顯殊隔。不可盡質。然神靈動人如羅池。變化不測如潁上。歷數百年未嘗少替。而朝廷之所褒顯。吏民之所奉事。亦猶一日。此烏可以幸得哉。至於紹興辛巳東海之師。羣胡見巨人皆長丈餘。弋戟麾旄。出沒煙雲間。則相告曰。烏龍神兵至矣。或降。或遁去。無敢枝梧者。是又與東晉八公山。及慶曆嘉嶺神之事相埒。然彼皆在近境。而此獨見於山海阻絕數千里之外。豈不尤異也哉。不得韓蘇之文以侈大其傳。而邦人進士沈奐願以屬筆於某。辭卑事偉。有足恨者。迺作送迎神詩一章。使併刻之。實慶元五年十月甲子也。其辭曰。

王之生兮。值唐初基。龍翔於天兮。英雄是資。獨沉草萊兮。默不得施。嶮然萬仞兮。胸中之奇。使得小試兮。冒白刃而擎朱旗。丈夫戰死兮。固亦其宜。死於不禮兮。精神曷歸。王亦何慙兮。人則爲悲。烏龍之山兮。跨空巍巍。築傑屋兮。奉祠。釀桂兮。羞芝。彈箜篌兮。吹參差。王捨斯民兮。逝何之。錫以祉兮。燕及憚。歲屢豐兮。長無凶饑。擁羽蓋兮。駕玉螭。時節來靈兮。民之依。國有征誅兮。克相王師。長戈大纛兮。肅肅陰威。掃平河雒兮。前功弗隳。隆名顯爵兮。永世有辭。

## 德勳廟碑

自古王者經綸草昧。戡定亂略。必有熊羆之士。不貳心之臣。內任心膂之寄。外宣股肱之力。而廟謨國論。密賴以決。實兼將相之任者。在我高宗皇帝時。有若太師循忠烈王張公。實維其人。粵自高宗。歷試於外。開大元帥府。總

天下兵首以山西豪傑入侍帷幄。龍飛順動。避狄南渡。公則有扶天夾日之功。蕭牆釁起。羣公暗拱。公則倡勤王復辟之大策。氛祲內侵。戎馬豕突。公則奮却敵禦侮之奇略。巨盜乘間。羣兇和附。公則建剪除安輯之成績。由是不數年間。國勢安強。夷虜奪氣。請和而一二重將未還宿衛。論者咸以爲非長久計。公則率先請罷宣撫使事。奉朝請。車再上。引義懇款。於是議始定。士大夫咸謂其得大臣體。而高宗亦每謂之腹心舊將。又曰。從來待卿如家人。又曰。是人與他功臣相去萬萬。蓋高宗蹈履艱危。身濟大業。沉機獨智。燭微察遠。以爲方海內橫流。巡幸四方。暴衣露蓋。周衛單寡。非如中都高拱。蠅蛄蟻渡之居。江流阻艱。海道阨危。非如平時安行清蹕馳道之中。不有如公者。協心同德。均禍福。共安危。譬之一家。父兄有急。子弟不召而自至。譬之一身。頭目有患。手足不令而自力。則天下之計。將以誰諉。袁盎謂絳侯功臣非社稷臣。則社稷臣與功臣果異。建炎以來。功臣則有矣。至可名社稷臣者。非公而誰。故國家所以褒表崇異。常出等夷之上。非私恩也。及配享高宗廟庭。其次偶居其後。或者疑焉。是不然。唐名將前曰英衛。後曰李郭。衛公汾陽之勳德。巍如泰山。終不以姓名次序爲歎。欽宗皇帝下詔褒顯故老。而范文正竇次司馬文正之下。司馬公之賢。不過與范公等。范公輔政先數十年。聲詩所載。以配夔夔。而顧乃居次。世豈以此爲有抑揚之意哉。公之曾孫鑑三世傳嫡長。始築廟於居第之東。廟成。以高宗御書德勳二大字爲廟之名。自忠烈以下爲三室。忠烈之配曰秦國夫人魏氏。漢國夫人章氏。第二室曰少傅公諱子厚。配曰漢國夫人蕭氏。第三室曰少師公諱宗元。配曰楚國夫人劉氏。維忠烈王勳業之詳。與夫世諱字系官爵。葬有碑。諡有誥。史有傳。此不復載。顧廟祭宜有歌詩。刻於麗牲之碑。乃作詩曰。

宋傳九聖。高宗是承。化龍渡江。天關中興。維忠烈王。翼從帝旁。捐身棄孥。獨當豺狼。煙塵未息。變生肘腋。首倡義師。氣沮金石。大業復隆。退不矜功。雪涕引罪。身衛行宮。國有大難。我則出捍。功成愈謙。將士畏歎。旣空盜藪。鏖虜淮右。柘臯之捷。梁楚無寇。河雒將平。虜畏乞盟。亟上虎符。就第王城。茂勳明德。爛然史冊。燕及家國。匪王孰克。築廟作主。三室同宇。歲時奉享。豐豆碩俎。國有世臣。家有元孫。咨爾後人。祇栗廟門。

泰州報恩光孝禪寺最吉祥殿碑

天下無不可舉之事。亦無不可成之功。始以果。終以不倦。此事之所以舉。而功之所以成也。海陵通川之間。自建



炎後爲盜區戰場。中雖息兵。然猶鬼嘯狐嘯於藜莠瓦礫中。自官寺民廬。皆略具爾。未幾。復有紹興辛巳虜禍。前日之略具者。又踐蹂燔燒。滌地而盡。乾道淳熙以來。中外無事。函養滋息。且以國力興葺之。迨今四十年。而城郭邑屋。尙未能復承平之舊。至於浮圖之廬。又非郡縣所急。或盛或衰。皆在仕者所不問。則其舉事若尤難者。嗚呼。是特不遇浮圖之傑耳。信有之。未見其果難也。泰州報恩光孝禪寺。是已。寺始爲天寧萬壽寺。今名蓋用紹興詔書改賜。亦火於辛巳之變。有祖彥師者。復葺之。未成而化。中間屢易主者。至紹熙中。今長老德範師。應轉運陳公損之之請而至。寺雖羸。而大役多未之舉。有巨鐘千石。方寺壞於兵時。樓焚。鐘墮。扁而不壞。範始至。奮曰。鐘不壞。寺將興之符也。吾舉事。將自鐘始。乃建樓百尺。以棲鐘。鐘始鑄。歲在乙卯。至是三乙卯矣。而樓成。人咸異之。遂議佛殿。殿之役最大。度費錢數千萬。見者縮頸曰。使可爲。豈至今日邪。範曰。不然。吾當與有緣者力成之。不敢以難故止。已而有居士劉洪。首施錢五百萬。施者不勸而集。積爲四千萬。有奇。乃伐木於黃岡。蔽流而下。方役之興。以闕征爲懼。常平使者王公寧聞之。曰。斯殿以資永祐。陵在天之福。孰敢議者。吾當任其事。於是所至皆爲弛禁。殿以崇成。爲重屋八楹。東西百三十六尺。南北九十六尺。高百一十尺。佛菩薩阿羅漢三十有一軀。會王公去。而後使者韓公挺取華嚴經語。書殿之顏。曰。最吉祥殿。範又爲閣六楹。以奉今天子。昔在潛邸。賜前住持覺深碧雲二大字。閣之廣袤雄麗。亦略與殿稱。餘若方丈寢堂。廚庫水陸堂。兩廡。累數十年不能成者。皆不淹歲而備。最其費。爲緡錢二十萬。在它人若寢食不遑暇。範獨終日從容。倡道以進。其徒一警歎。一顧視。皆具第一義。學者往往得入。而其師別峯之法。遂盛行於江淮間矣。凡一寺內外。莫不粲然復興。是殿實爲之冠。慶元六年夏四月。範使其書記蜀僧祖興來。求予作碑。予既盡述其始末。且爲之銘。銘曰。

海陵奧區。名寔中。長淮大江爲提封。於皇徽祖御飛龍。臣民薦福。遐邇同。是邦巍然。千柱宮。中有廣殿。奉大雄。環材破江西。徂東。波神呵護。如雲從。璇題藻井。翔虛空。丹碧椽瓦。無遺了。劫火不能壞。鳩鐘雷震。鯨吼聲隆隆。層閣闕奉龍鸞蹤。榮光夜起。騰長虹。微祖聖德。齊天崇。澤覃草木。函昆蟲。咨爾梵衆。極嚴恭。熙運共慶。千載逢。餘福漸被。兼華戎。長佑農扈。消兵烽。

## 洞霄宮碑

造化之初。昆侖旁薄。一氣既分。天積氣於上。地積塊於下。明爲日月。幽爲鬼神。聚爲山嶽海瀆。散爲萬物。萬物之最靈爲人。人之最靈爲聖哲。爲仙真。而道爲天地萬物之宗。幽明鉅細之統。此虛箴黃帝老子所以握乾坤司變化也。其書爲易六十四卦。道德五千言。陰符西昇度人人生神之經。列禦寇莊周關喜之書。其學者必謝去世俗。練精積神。棲於名山喬岳。略與浮屠氏同。而篤於父子之親。君臣之義。與堯舜周公孔子遺書無異。浮屠氏蓋有弗及也。臨安府洞霄宮。舊名天柱觀。在大滌洞天之下。蓋學黃老者之所處。其來久矣。至我宋。遂與嵩山崇福宮。獨爲天下宮觀之首。以寵輔相大臣之去位者。亦有以提舉洞霄召拜左相者。則其地望之重。殆與昭應景靈醴泉萬壽太一神霄寶籙爲比。它莫敢望。在真宗皇帝時。始制詔改宮名。賜金寶牌。又賜仁和縣田十有五頃奉齋醮。悉除其租賦。至政和間。宮以歷歲久。穿壞漫漶。徽宗皇帝降度牒三百。命兩浙轉運司復興葺之。歲度童子一人爲道士。建炎中。又廢於兵火。高宗皇帝中興大業。聞之當宁太息。乃紹興二十五年。以皇太后之命。建昊天殿。鐘樓經閣。表以崇闕。繚以脩廡。費出慈寧宮。梓匠工役。具於修內步軍司。中使臨護。犒賜踵至。既不以命有司。而山麓之民。亦晏然不知有役。一旦告成。金碧之麗。光照林谷。鐘磬之作。聲摩雲霄。公者疑其天降地涌。而神運鬼輸也。可謂盛矣。及上脫屣萬幾。頤神物表。遂以乾道二年。自德壽宮行幸山中。駐蹕累日。勅太官進蔬膳。親御翰墨。書度人經以賜。自有天地。卽有此山。殊尤之迹。未有若此者。慶元六年九月。葆光大師宮都監潘三華與知宮事高守中。同知宮事水丘居仁。以告山陰陸某。曰。願有紀以爲無窮之傳。某以疾未能屬稿。後三年。同知宮事王思明與其徒李知柔。航濤江入東。繼以請。乃敘載其本末如此。且爲之銘。曰。

在宋祥符。帝錫之書。乃作昭應。比隆籤圖。元豐景靈。列聖攸居。元祐上清。以祝帝儲。棟宇煌煌。煥於天衢。徽祖神霄。誕彌九區。迨我高皇。東巡於吳。睠言天柱。鎮茲行都。警蹕來臨。神明翊扶。乃御幄殿。穆清齋居。天日下照。雨露普濡。迨今遺民。注望屬車。三聖嗣興。光紹聖謨。千礎之宮。鸞騰太虛。寶磬鳴鐘。震於江湖。肆作頌詩。用紀絕殊。

## 卷十七

### 記十三首

## 雲門壽聖院記

雲門寺自晉唐以來名天下。父老言昔盛時。繚山竝谿。樓塔重複。依巖跨壑。金碧飛踊。居之者忘老。寓之者忘歸。遊觀者累日乃徧。往往迷不得出。雖寺中人。或旬月不相覲也。入寺。稍西石壁峯爲看經院。又西爲藥師院。又西繚而北爲上方。已而少衰。於是看經別爲寺曰顯聖。藥師別爲寺曰雍熙。最後上方亦別曰壽星。而古雲門寺更曰淳化。一山凡四寺。壽聖最小。不得與三寺班。然山尤勝絕。遊山者自淳化歷顯聖雍熙。酌煉丹泉。闌筆倉。追想葛稚川王子敬之遺風。行聽灘聲。而坐蔭木影。徘徊好泉亭上。山水之樂。饜飫極矣。而亭之旁。始得支徑。逶迤如線。脩竹老木。怪藤醜石。交覆而角立。破崖絕澗。奔泉迅流。喊呀而噴薄。方暑凜然以寒。正晝仰視。不見日景。如此行百餘步。始至壽聖。嶄然孤絕。老僧四五人。引水種蔬。見客。不知拱揖。客無所主而去。僧亦竟不知辭謝。好奇者或更以此喜之。今年。予來南。而四五人者相與送予至新谿。且曰。吾寺舊無記。願得君之文。磨刻崖石。予異其朴野而能知此也。遂與爲記。然憶爲兒時往來山中。今三十年。屋益古。竹樹益蒼老。而物色益幽奇。予亦有白髮久矣。願未知予之文辭亦能少加老否。寺得額以治平某年某月。後九十餘年。紹興丁丑歲十一月十七日。吳郡陸某記。

## 寧德縣重修城隍廟記

禮不必皆出於古。求之義而稱。揆之心而安者。皆可舉也。斯人之主。食稻而祭先嗇。衣帛而祭先蠶。飲而祭先酒。畜而祭先牧。猶以爲未。則凡日用起居所賴者皆祭。祭門祭竈祭中。醫之類是也。城者以保民禁奸。通節內外。其有功於人最大。願以非古黜其祭。豈人心所安哉。故自唐以來。郡縣皆祭城隍。至今世尤謹。守令謁見。其儀在他神祠上。社稷雖尊。特以令式從事。至祈禳報賽。獨城隍而已。則其禮願不重歟。寧德爲邑。帶山負海。雙巖白鶴之嶺。其高摩天。其峻立壁。負者股栗。乘者心掉。飛鸞關井之水。濤瀾洶湧。蛟鱉出沒。登舟者涕泣與父母妻子別。已濟者同舟更相賀。又有氣霧之毒。鼃龜蛇蠃守宮之蠱。郵亭逆旅。往往大暑牆壁。以道出寧德爲戒。然邑之吏民。獨不得避。則惟神之歸。是以城隍祠比他邑尤盛。祠故在西山之麓。紹興元年。知縣事趙君詵之始遷於此。二十八年五月。權縣事陳君據復增築之。高明壯大。稱邑人尊祀之意。旣成。屬某爲記。某曰。幽顯之際遠矣。惟以其類。

可感。故古之祭者，必思其所嗜好。夫神之所以爲神，惟正直。所好亦惟正直。君儻無愧於此，則擷澗谿之毛，挹行潦之水，足以格神。不然，豈豆碩俎，是諂以求福也。得無與神之意異邪？旣以勵君，亦以自勵。又因以勵邑人。八月一日，右迪功郎主簿陸某記。

### 灤亭記

灤山道人履勤慮於會稽之下，伐木作亭，苦之以芴，名之曰灤亭。而求記於陸子。吾聞鄉居邑處，父兄弟相扶持以生，相安樂以老且死者，民之常也。士大夫去而立朝，散之四方，功名富貴，足以老而忘返矣。猶或以不得車騎冠蓋，雍容於途，以夸其鄰里，而光耀其族，嫺焉懣懣，惟浮屠師一切反此。其出遊惟恐不遠，其遊之日，惟恐不久。至相與語其平生，則計道里遠近，歲月久暫，以相高。嗚呼，亦異矣。勤公之心，獨不然。言曰：吾出遊三十年，無一日不思灤。而適不得歸，未嘗以遠遊夸其朋儕。其在灤亭，語則灤也，食則灤也，煙雲變滅，風雨晦冥，吾視之若灤之山。樵牧往來，老稚嘯歌，吾視之若灤之人。疏一泉，移一石，藝一草木，率以灤觀之。恍然不知身之客也。夫人之情，無不懷其故者。浮屠師亦人也，而忘其鄉邑父兄弟，無乃非人之情乎？自堯舜周孔，其聖智千萬於常人矣，然猶不以異於人情爲高。浮屠師獨安取此哉？則吾勤公可謂篤於自信，而不移於習俗者矣。故與爲記。紹興三十年十二月十二日記。

### 煙艇記

陸子寓居得屋二楹，甚隘而深。若小舟然，名之曰煙艇。客曰：異哉！屋之非舟，猶舟之非屋也。以爲似歟？舟固有高明奧麗踰於宮室者矣。遂謂之屋，不可邪？陸子曰：不然。新豐非楚也，虎賁非中郎也。誰則不知，意所誠好而不得焉，羸得其似，則名之矣。因名以課實。子則過矣，而予何罪？予少而多病，自計不能效尺寸之用於斯世，蓋嘗慨然有江湖之思。而飢寒妻子之累，劫而留之，則寄其趣於煙波洲島蒼茫杳靄之間。未嘗一日忘也。使加數年，男勝鉏犂，女任紡績，衣食羸足，然後得一葉之舟，伐荻釣魚，而賣芰芡，入松陵，上嚴瀨，歷石門沃洲，而還泊於玉筍之下。醉則散髮扣舷爲吳歌，顧不樂哉！雖然，萬鍾之祿，與一葉之舟，窮達異矣。而皆外物，吾知彼之不可求，而不能不眷眷於此也。其果可求歟？意者使吾胸中浩然廓然，納煙雲日月之偉觀，攬雷霆風雨之奇變，雖坐容膝之

室。而常若順流放櫂。瞬息千里者。則安知此室果非煙艇也哉。紹興三十一年八月一日記。

## 復齋記

仲高於某爲從祖兄。某蓋少仲高十有二歲。方某爲童子時。仲高文章論議已稱成材。冠峨帶博。車騎雖容。一時名公卿皆慕與之交。諸老先生不敢少之。皆謂仲高仕進且一日千里。自從官御史。識者惟恐不得如仲高者爲之。及其丞大宗正。出使一道。在他人亦足稱笑任。在仲高則謂之蹉跌不偶可也。顧曾不煖席。遂瓊口語。南遷萬里。凡七閱寒暑。不得內徙。與仲高親厚者。每相與燕遊。輒南望歎息出涕。因罷酒去。如是數矣。然客自海上來。言仲高初不以遷謫瘴癘動其心。方與學佛者遊。落其浮華。以反本根。非復昔日仲高矣。聞者皆悵然。自以爲不足測斯人之淺深也。隆興元年夏。某自都還里中。始與兄遇。視其貌。淵乎似道。聽其言。簡而盡。所謂落浮華。反本根者。乃親見之。嘗對榻語至丙夜。謂某曰。吾名吾燕居之室曰復齋。子爲我記。某自念少貧賤。仕而加甚。凡世所謂利欲聲色。足以敗志汨心者。一不踐其境。兀然枯槁。似可學道者。然從事於此數年。卒無毛髮之得。若仲高馳騁於得喪之場。出入於憂樂之域。而自得者乃如此。非深於性命之理。其孰能之。某蓋將就學焉。敢極道本末。以爲復齋記。

## 青州羅漢堂記

隆興改元秋九月。某訪故人弈公於青山之下。與弈公別。蓋十有餘年矣。聞某至。曳杖出迎松間。黔瘠腊如殘雪覆頂。相與握手。訪問朋舊。且悲且喜。既至其居。脩廊邃屋。曲折皆有。意已而入法堂之東室。忽見澗壑巖壑。飛泉迅流。菩薩阿羅漢。翔遊其中。使人如身在峨眉天台。應接不暇。弈公從旁笑曰。此吾使工人幻爲之者也。始王君某築是庵於墓左。以資其先人之福。而請吾居焉。王君閉門讀書。未嘗少貶於世。顧於吾獨委曲周盡。吾亦感其意。爲之留而弗去者十年。凡此土木金碧。以爲像設供養之具者。積費千金。王君無絲毫計惜。而吾之心志亦竭於是矣。子爲我記。嗚呼。某不天。少罹閔凶。今且老矣。而益貧困。每遊四方。見人之有親而得致養者。與不幸喪親而葬祭之具可以無憾者。輒悲痛流涕。愴然不知生之爲樂也。聞王君之事。既動予心。又况弈公勤勤之意乎。記其可辭。明年七月一日。甫里陸某記。

### 鎮江府城隍忠祐廟記

漢將軍紀侯以死脫高皇帝於滎陽之圍。而史失其行事。司馬遷班固作列傳。弗載也。維宋十一葉天子駐蹕吳會。改元乾道。正月甲子。右中奉大夫直敷文閣知鎮江府方滋言。府當淮江之衝。屏衛王室。號稱大邦。自故時祠紀侯爲城隍神。莫知其所。始。然實有靈德。以庇其邦之人。禱祈禴禱。昭答如響。紹興隆興之間。虜比入塞。金鼓之聲。震於江壖。吏民不知所爲。則惟神之歸。雖虜畏天子威德。折北不支。退舍請盟。府以無事。至於流徙蔽野。兵民參錯。而居處弗驚。疾癘以息。則神實陰相之。吏其敢貪神之功以爲己力乎。謹上尙書。願有以褒顯之。以慰父兄子弟之心。越三月。癸丑。有詔賜廟額曰忠祐。詔下。而方公爲兩浙轉運副使。右朝散大夫直徽猷閣呂公擢來知府事。倭上之賜。五月癸亥。大合樂。盛服齊莊。躬致上命。神人協心。霧雨澄霽。靈風肅然。來享來臨。於是呂公以屬某曰。願有紀焉。某惟紀侯忠奮於一時。而暴名於萬世。功施於漢室。而見褒於聖宋。身隕於滎陽。而血食於是邦。士惟力於爲善而已。豈有有其善而不享其報者乎。吏之仕乎是邦者。必將有事於廟。有事於廟者。必將有考於碑。其尙知所勉焉。毋爲神羞。六月癸未記。

### 黃龍山崇恩禪院三門記

自浮屠氏之說盛於天下。其學者尤喜治宮室。窮極侈靡。儒者或病焉。然其成也。無政令期會。惟太平久。公私饒餘。師與弟子四出丐乞。積累歲月而後能舉。其壞也。無衛守誰何。一日寇至。則立爲草莽丘墟。故天下亂則先壞。治則後成。予於是蓋獨有感焉。黃龍山方南公時。學者之盛名天下。而其居亦稱焉。中更夷狄盜賊大亂之後。學者散去。施者弗至。昔之閎壯鉅麗者。嘗委地矣。自庚申訖丁亥。二十餘年之間。乃能粲然復興。樓塔殿閣。空翔地踊。鐘魚之聲。聞十餘里。法席之盛。殆庶幾南公時。是非兵革之禍不作。遠方之氓。蕃息阜安。得以其公賦私養之餘。及於學佛者。則此山且爲虎狼魑魅之所宅矣。而安能若是哉。禪師升公於其寺門之成也。屬予爲記。予謂升公方以身任道。起其法於將墜。門蓋未足言。獨書予所感。使凡至山中者。皆知前日之禍亂。嘗如此。而國家之覆轍。函育斯民。若是其深。吏勤其官。民力其業。相與思報上之施焉。升公豈不得所願哉。乾道三年正月十四日。左通直郎陸某記。

## 王侍御生祠記

乾道七年二月。知夔州濟南王公新作貢院。成。越三月。夔歸。萬施梁山。大寧六郡之士。不謀同辭。曰。夔雖號都督。府。而僻在巴峽。無贏財羨工。公之爲是役也。寸寸銖銖。心計而手度之。累月乃成。形容爲癯。髮爲盡白。其德於士。豈有旣邪。蓋思所以報者。乃相與築祠於院之東堂。畫像惟肖。又相與鬻予記之。予曰。公之施厚矣。祠未足報也。士則曰。吾等將日夜勉於學。父兄詔子弟於家。長老先生訓諸生於鄉。期有以應有司之求。如是。足乎。予曰。未也。郡國貢士於天子。天子命近臣與館閣文學之士。選其尤者。而親策之於廷。策旣上。天子爲親第其名。謂之進士。進士。將相儲也。自是而起於朝。其任政事。毋伏嘉言。毋醜衆正。其任言責。毋比大吏。毋置賢人。其任百執事。守節秉誼。宿道鄉方。毋懷護。毋服讒。使天下稱之。史臣書之。曰。是夔州所貢士也。士以是報公。公以是報天子。迺可無媿。而予於記亦無愧辭矣。若何。皆曰。唯敢不力。乾道七年三月十五日。左奉議郎通判軍州主管學事兼管內勸農事陸某記。

## 東屯高齋記

少陵先生晚遊夔州。愛其山川。不忍去。三徙居。皆名高齋。質於其詩。曰。次水門者。白帝城之高齋也。曰。依藥餌者。瀼西之高齋也。曰。見一川者。東屯之高齋也。故其詩又曰。高齋非一處。予至夔數月。弔先生之遺迹。則白帝城已廢。爲丘墟。百有餘年。自城郭府寺。父老無知其處者。况所謂高齋乎。瀼西。蓋今夔府治所。畫爲阡陌。裂爲坊市。高齋尤不可識。獨東屯有李氏者。居已數世。上距少陵。財三易主。大曆中。故券猶在。而高齋負山帶谿。氣象良是。李氏業進士。名襄。因郡博士雍君大椿。屬予記之。予太息曰。少陵天下士也。早遇明皇肅宗。官爵雖不尊顯。而見知實深。蓋嘗慨然以稷禹自許。及落魄巴蜀。感漢昭烈諸葛丞相之事。屢見於詩。頓挫悲壯。反覆動人。其規模志意。豈小哉。然去國浸久。諸公故人。熟睨其窮。無肯出力。比至夔。客於柏中丞嚴明府之間。如九尺丈夫。俛首居小屋下。思一吐氣而不可得。予讀其詩。至小臣議論絕。老病客殊方之句。未嘗不流涕也。嗟夫。辭之悲。乃至是乎。荆卿之歌。阮嗣宗之哭。不加於此矣。少陵非區區於仕進者。不勝愛君憂國之心。思少出所學。佐天子。與正觀開元之治。而身愈老。命愈大謬。坎壈且死。則其悲至此。亦無足怪也。今李君初不踐通塞榮辱之機。讀書絃歌。忽焉忘老。

無少陵之憂而有其高。少陵家東屯不浹歲。而君數世居之。使死者復生。予未知少陵自謂與君孰失得也。若予者。仕不能無媿於錢。退又無地可耕。是直有慕於李君爾。故樂與焉。記。乾道七年四月十日。山陰陸某記。

### 樂郊記

李晉壽一日圖其園廬持示余。曰。此吾荊州所居名樂郊者也。荊州故多賢公卿。名園甲第相望。自中原亂。始以吳會上流。常宿重兵。而衣冠亦遂散去。太平之文物。前輩之風流。蓋略盡矣。獨吾樂郊日加葺。文竹奇石。蒲萄來禽。芍藥蘭蕙。芟艾齒莠之富。爲一州冠。其尤異者。往往累千里致之。予幸爲我記。予官峽中。始與晉壽相識。長身鐵面。音吐鴻暢。遇事激烈奮發。以全軀保妻子爲可鄙。其意氣豈不壯哉。及爲客置酒。出佳侍兒。陳書畫琴奕。相與娛嬉。則雍容都雅。風味乃甚可愛。雖梁宋間少年貴公子不能過。蓋其多材藝知弛張如此。然自少時。不喜媒聲利。有官不仕。窮園林陂池之樂者。且三十年。每自謂泉石膏肓。及來夔州。諸公始大知之。合薦於朝。議者謂晉壽當以少伸於世爲喜。而晉壽顧不然。獨眷眷於樂郊。不忍暫忘。嗚呼。出處一道也。仕而忘歸。與處而不能出者。俱是一癖。未易是泉石。非鐘鼎。諸公之薦。蓋矜晉壽膏肓。而使爲世用。異時晉壽成功而歸。高牙在前。千兵在後。擅畫繡之榮。以賁斯園。荆楚多秀民。尙有能賦其事者乎。乾道七年六月十日。笠澤陸某記。

### 對雲堂記

巫故郡。自秦以來見於史。其後罷郡。猶爲壯縣。杜少陵扁舟下白帝。過焉。爲賦歸字韻五字詩。詩傳天下。由是巫縣名益重。宋建中靖國之元。黃太史始脫鉤黨。自蜀之荆。訪少陵遺迹。客縣治之東堂。留字壁間。有坐臥對南陵雲山陰晴變態之語。距乾道辛卯。逾一甲子。無舉出者。郢城李德修來爲令。風流儒雅。翩翩佳公子。因廢址作堂。與客落之。舉酒屬山陰。陸務觀曰。子爲予名。且記復興之歲月。務觀既取太史語名之。且曰。僕行年五十。閱世故多矣。所謂朝夕百變者。奚獨雲山哉。一日。進此道。幻瞥消。情塵滅。真實相見。雖巍乎天地。浩乎古今。變壞不停。與浮雲遊塵。空華眚暈。初無少異也。德修方吏退時清。坐堂上。試以僕言觀之。德脩名普。務觀名某。臘月乙卯之夕。大醉中。秉燭梅花下記。

### 靜鎮堂記



四川宣撫使故治益昌。樞密使清源公之爲使也。始徙漢中。卽以郡治爲府。郡自兵火瘵地之後。一切草創。公至未幾。凡營壘廡庫吏士之廬。皆築治之。使堅壯便安。可以支久。而府獨仍其故。西偏有便坐。日受羣吏謁見。與籌邊治軍。燕勞將士。靡不在焉。而其壞尤甚。公旣留三年。官屬數以請。始稍加葺。易其傾撓。徹其蔽障。不費不勞。挾日而成。會上遣使持親詔。賜黃金匱寶熏珍劑。以彰殊禮。公遂據詔中靜鎮坤維之語。名新堂曰靜鎮。而命其屬陸某記之。某辭謝不獲命。則再拜言曰。以才勝物易。以靜鎮物難。以靜鎮物。惟有道者能之。泰山喬嶽之出雲雨。明鏡止水之照毛髮。則靜之驗也。如使萬物並作。吾與之遊。衆事錯出。吾爲之變。則雖弊精神。勞思慮。而不足以理小國寡民。況任天下之重乎。歲庚寅。某自吳適楚。過廬山東林。山中道人爲某言。公嘗憩此院。閉戶面壁。終夏不出。老宿皆愧之。則公之刳心受道。蓋非一日矣。世徒見公馳騁於事功之會。而不知公枯槁澹泊。蓋與山棲谷汲者無異。徒見公以才略奮發。不數歲取公輔。而不知公道學精深。尊德義。斥功利。卓乎非世俗所能窺測也。而上獨深知之。故詔語如此。傳曰。知臣莫若君。詎不信哉。雖然。某以爲今猶未足見公也。虜暴中原久。腥聞於天。天且悔禍。盡以所覆界上。而公方弼亮神武。紹開中興。異時奉鑿駕。奠京邑。屏符瑞之奏。抑封禪之請。卻渭橋之朝。謝玉關之質。然後能究公靜鎮之美云。乾道八年七月二十五日。門生左承議郎權四川宣撫使司幹辦公事兼檢法官陸某謹記。

## 卷十八

## 記十一首

## 藏丹洞記

漢嘉郡治之西偏望雲樓。東有石穴。天將雨。輒出雲氣。予疑而發之。則石室屹立。室之前。地中獲瓦缶。纒矮。貯丹砂雲母奇石。或爛然類黃金。意其金丹之餘也。悉斂而積藏。輸諸府庫。緘識惟謹。予嘗讀丹經言。古得道至人。藏丹留於名山。非當仙者。輒不見。雖見亦輒變化。今是丹不藏名山。而近在官寺之側。予以塵垢衰病之餘。又輒見之。是與丹經之說大異。或謂丹藏於此遠矣。方上古未爲城邑時。西望三峨。東帶大江。山川秀傑。蓋宜爲仙真鍊

藥騰舉之地。至予輒見之者。豈神物隱見有時。而予適逢其時與。丹之伏而不見者常多。見者常寡。雖嵇叔夜葛稚川不免齋恨以蜺。而予願得見焉。茲非幸與。乾道九年秋八月辛未。山陰陸某記。

### 籌邊樓記

淳熙三年八月既望。成都子城之西南。新作籌邊樓。四川制置使知府事范公。舉酒屬其客。山陰陸某曰。君爲我記。按史記及地志。唐李衛公節度劍南。實始作籌邊樓。廢久。無能識其處者。今此樓望擬爲楚道黔中。越雋諸郡。山川方域。皆略可指。意者衛公故趾。其果在是乎。樓旣成。公復按衛公之舊圖。邊城地勢險要。與蠻夷相入者。皆可考信不疑。雖然。公於邊境。豈真待圖而後知哉。方公在中朝。以洽聞強記。擅名一時。天子有所顧問。近臣皆推公對。莫敢先者。其使虜而歸也。盡能道其國禮儀刑法職官宮室城邑制度。自幽薊以出。居庸松亭關。並定襄。五原。以抵靈武朔方。古今戰守離合。得失是非。一皆究見本末。口講手畫。委曲周悉。如言其闕內事。雖虜耆老人。知之不如是詳也。而况區區西南夷。距成都或不過數百里。一登是樓。在目中矣。則所謂圖者。直按故事而已。請以是爲記。公慨然曰。君之言過矣。予何敢望衛公。然竊有幸焉。衛公守蜀。牛奇章方居中。每排沮之。維州之功。旣成而敗。今予適遭清明寬大之朝。論事薦吏。奏朝入而夕報可。使衛公在蜀。適得此時。其功烈壯偉。詎止取一維州而已哉。某曰。請併書公言。以詔後世。可乎。公曰。唯唯。九月一日記。

### 銅壺閣記

天下郡國。自譙門而入。必有通達。達於侯牧治所。惟成都獨否。自劍南西川門以北。皆民廬市區軍壘。折而西。道北爲府。府又無臺門。與他郡國異。考其始。盡自孟氏國除。矯霸國之僭侈而然。至蔣公堂來爲牧。乃南直劍南西川門西北。距府五十步。築大閣曰銅壺。事書於史。崇寧初。以火廢。政和中。吳公拭因其矩。復修大之。雄傑閎深。始與府稱。淳熙二年夏六月。今敷文閣真學士范公。以制置使治此府。始至。或以閣壞告。公曰。失今不營。後費益大。於是躬自經畫。趣令而緩期。廣儲而節用。急吏而寬役。一旦崇成人。徒駭其山立。聲飛業然。摩天不知此閣已先成於公之胸中矣。夫豈獨閣哉。天下之事。非先定素備。欲試爲之。事已紛然。始狼狽四顧。經營勞弊。其不爲天下笑者鮮矣。方閣之成也。公大合樂。與賓佐落之。客或舉觴壽公曰。天子神聖英武。蕩清中原。公且以廊廟之重。出

撫成師。北舉燕趙。西略司并。挽天河之水。以洗五六十年腥膻之污。登高大會。燕勞將士。勒銘奏凱。傳示無極。則今日之事。蓋未足道。識者以此知公舉大事不難矣。其可闕書。四年四月己卯。朝奉郎主管台州崇道觀陸某記。

## 彭州貢院記

國家三歲一貢士。天子先期爲下詔書。與郊祀天地埒。及試於禮部。既中選矣。天子親御殿發策。詢天下事。第其高下。又親御殿賜以科名。其禮可謂重矣。蓋以爲所與共代天理物。而守宗廟社稷於無窮者。實在是也。然則郡國貢士。顧可不重邪。彭州舊無貢院。每科舉。輒寓佛祠。祠乃在城外。士不以爲便。淳熙三年。知州事王公敦詩。通判州事鄧公樞。始采進士穆滂陳仲山楊倫蘇松等議。取廢驛故地爲貢院。凡郡之士。奔走後先。肩袂相屬。甃堅材瓦。山積雲委。自正月壬子。至七月癸亥。訖事。用緡錢萬五千六百有奇。役工稱是。重門大堂。高閣邃深。繚以脩廡。沈沈翼翼。分職庀事。各有攸處。旣成。王公徙利州路轉運判官。書來屬予爲記。鄧公又繼以請。明年正月。朝奉大夫王公序來知州事。則又以請。予發書歎曰。俗壞久矣。上下相戾。後先相傾者。天下皆是也。今彭之士大夫。與王公鄧公謀同心協。若出一人。固已發矣。後王公事不出己。而不忌其成。不揜其能。惟懼後之無傳。可不謂賢哉。使士之貢於朝而仕者。揆時之宜。從人之欲。以舉萬事。如王公鄧公。視人之善。若己有之。如後王公。則利澤被元元。勲業垂竹帛。將孰禦焉。士尙知所勉哉。四年五月丁未。朝散郎主管台州崇道觀陸某記。

## 撫州廣壽禪院經藏記

淳熙己亥冬十二月。予使江西。治在撫州。其東是爲廣壽禪院。每出。輒過焉。僧守璞方爲輪藏。予之始至也。纔屹立十餘柱。其上未瓦。其下未甃。其旁未垣。經未匾。其止山立。其作雷動。神呵龍負。可怖可愕。丹墀金碧。殆無遺功。而守璞儼然燕坐。爲其徒說出世間法。土木梓匠之間。不至丈室。若未嘗有是役者。比明年冬十一月。予被命詣行在所。璞乃礪石乞予爲記。予慨然語之曰。子棄家爲浮屠氏。祝髮壞衣。徒跣行乞。無冠冕軒車府寺以爲尊也。無官屬胥吏徒隸以爲奉也。無鞭笞刀鋸圜桎梏。與夫金錢粟帛爵秩祿位。以爲刑且賞也。其舉事宜若甚難。今顧能不動聲氣。於期歲之間。成此奇偉壯麗百年累世之迹。予切怪士大夫操尊權。席利勢。假命令之重。耗府庫之積。而翫歲愒日。事功弗昭。又遺患於後。其視子豈不重可愧哉。旣諾其請。又具載語守樸者。以勵吾黨云。

是月十九日朝請郎提舉江西南西路常平茶鹽公事賜緋魚袋陸某記。

### 成都犀浦國寧觀古楠記

予在成都。嘗以事至沈犀。過國寧觀。有古楠四。皆千歲木也。枝擾雲漢。聲挾風雨。根入地不知幾百尺。而陰之所庇。車且百兩。正晝日不穿漏。夏五六月。暑氣不至。凜如九秋。成都固多壽木。然莫與四楠比者。予蓋愛而不能去者。彌日有石刻。立廡下。曰：是仙人蘧君手植。予歎曰：神仙至人。手之所觸。氣之所呵。羸疾者起。盲聵者愈。榮茂枯朽。而金玉瓦石不難。況其親所培植哉。久而不槁不死。固宜。欲爲作詩文。會多事不果。嘗以語道人蘧昌老。真叟以爲恨。予既去蜀三年。而昌老以書萬里屬予曰：國寧之楠。幾伐以營繕。郡人力全之。僅乃得免。懼卒不免也。君爲我終肯意。予發書且歎且喜。夫勿翦憩棠。恭敬桑梓。愛其人及其木。自古已然。姑以蜀事言之。則唐節度使取孔明祠柏一小枝爲手板。書於圖志。今見非詆。蔣堂守成都。有笑政。止以築銅壺閣。伐江濱廟一木。坐謠言罷。亦書國史。且王建孟知祥父子。專有西南。窮土木之侈。沉犀近在國城數十里間。而四楠不爲當時所取。彼猶有畏而不敢者。況今聖主以恭儉化天下。有夏禹卑宮室。漢文罷露臺之風。專閭方面。皆重德偉人。豈其殘滅千歲遺迹。侈大棟宇。爲王孟之所難哉。意者特出於吏胥梓匠。欺罔專恣。以自爲功而已。使有以吾文告之者。讀未終篇。禁令下矣。然則其可不書。淳熙九年六月一日。朝奉大夫主管成都府玉局觀山陰陸某記。

### 書巢記

陸子既老且病。猶不置讀書。名其室曰書巢。客有問曰：鵲巢於木。巢之遠人者。燕巢於梁。巢之襲人者。鳳之巢。人瑞之。梟之巢。人覆之。雀不能巢。或奪燕巢。巢之暴者也。鳩不能巢。伺鷓育雛而去。則居其巢。巢之拙者也。上古有有巢氏。是爲未有宮室之巢。堯民之病水者。上而爲巢。是爲避害之巢。前世大山窮谷中。有學道之士。棲木若巢。是爲隱居之巢。近時斂家者。流或登木杪。酣醉叫呼。則又爲狂士之巢。今子幸有屋以居。牖戶牆垣。猶之比屋也。而謂之巢。何邪。陸子曰：子之辭辯矣。顧未入吾室。吾室之內。或栖於櫺。或陳於前。或枕藉於牀。俯仰四顧。無非書者。吾飲食起居。疾痛呻吟。悲憂憤歎。未嘗不與書俱。賓客不至。妻子不覲。而風雨雷電之變。有不知也。間有意欲起。而亂書圍之。如積槁枝。或至不得行。則輒自笑曰：此非吾所謂歎者耶。乃引客就觀之。客始不能入。既入又不

能出。乃亦大笑曰。信乎其似巢也。客去。陸子歎曰。天下之事。聞者不如見者知之爲詳。見者不如居者知之爲盡。吾儕未造夫道之堂奧。自籬籬之外而妄議之。可乎。因書以自警。淳熙九年九月三日甫里陸某務觀記。

## 景迂先生祠堂記

明州船塢。新作故侍讀晁公祠成。監場事襄陽王君鉞。因通判州事丹陽蘇君玘移書某爲之記。自春徂秋。凡十許書。請不倦。某於公爲爛熳。方踰躡學步時。已獲拜公。則今於爲記。誠不當以薄陋辭。謹按公諱說之。字以道。一字伯以父。自號景迂生。元豐元祐間。已爲知名士。崇寧後。坐上書邪等。斥不得立朝臨民。故連爲祠。廟筦庫吏。其爲船塢。則大觀政和間也。寓舍直桃華渡。而官寺有亭曰超然。公方爲世僇人。士夫遇諸途。噤莫敢語。况有拜牀下者。簿書稍暇。則以讀書爲樂。時時見於文章。如汪伯更哀辭。祭鄒忠公文。皆傳天下。亦間與爲佛學者。延慶明智師遊。論著所謂天台教。至今其徒以爲重。雖然。此猶未足言公也。公之學深且博矣。於易自商瞿下至河南邵先生。於書自伏生下至秦山姜先生。於詩雜以齊魯韓三家。不枯於毛鄭。於春秋考至賈誼董仲舒。不膠於啖趙。其所引據。多先秦古書。藏山埋冢之秘。卓乎獨立。確乎自信。雖引天下而與之爭。不能奪。卒成一家之說。與諸儒並傳。向非擯斥。疏置於荒遠寂寞之地。如在船塢時。則雖公之敏。此功未易成也。於庫士之棄日。豈皆馳騫於富貴功名哉。弊精神於事爲之末。謀衣食於涯分之外。忽焉不知老之至者多矣。登堂而望公之風采。讀記而稽公之學術。其亦可自省哉。公之文章。本二百卷。中原喪亂後。其家復集之。益以南渡至歿時所作。纔得六十卷。而士大夫猶未盡見也。郡人能言公舊事者曰。一日。部使者來治船事。詎責甚峻。公從容對曰。船待木乃成。木非錢不可致。今無錢致木。則無船適宜。使者爲發愧去。觀公平生大節。一言折庸人之驕。蓋不足書。而郡人所願書。故亦不敢略云。淳熙十年九月丁丑朝奉大夫主管成都府玉局觀山陰陸某記并書。

## 圓覺閣記

淳熙十年某月某日。徑山興慶萬壽禪寺西閣落成。會是歲某月某日。詔賜住持僧寶印御注圓覺經。且命某爲之序。於是道俗咸曰。賜經與閣成同時。宜榜曰圓覺之閣。且刻石以侈盛事。於是又咸曰。陸某宜爲記。寶印以衆言來諭某於山陰大澤中。某蹴然不敢辭。恭惟聖天子以聰明睿智之資。體蹈堯舜。深造道妙。悟一心於萬法之

中。既已博極皇壇帝典。範圍魯史之秘。而象胥所傳。木葉旁行。亦莫不究極。以大圓覺爲我世界。悼士之陋。多岐私智。昧乎大同。乃以萬機之餘。親御訓釋。凡十二士之所問。調御之所說。佛施波羅之所譯。宗密之所注。裴休之所言。皆冰釋縷解於宸筆之下。十日並照。物無遁形。百川東歸。海無異味。如旣望月。無有缺減。如大寶鏡。莫不照了。東夷南蠻。西戎北狄。霜露所墜。日月所照。莫不共此大圓覺中。魯之逢掖。楚之黃冠。竺乾之染衣祝髮。平時相與爲矛盾。爲冰炭者。亦莫不共在此大圓覺中。不偏不欠。不迷不謬。垂之千萬億世。亦莫不然。而寶印以山林枯槁之士。名徹九重。得以大覺禪師懷瑾入侍。仁宗皇帝故事。覲清光。承聖問。受好賜。序鉅典。又此閣壯麗。首冠一山。費至三十萬錢。其落成也。適當賜經之時。山川動色。神龍踴躍。於虜盛哉。方閣之未建也。東偏有千僧閣。紹興中。大慧禪師宗杲。法門之傑。方住山時。衆溢千數。故以是名閣。然自今觀之。雖阿僧祇衆。猶爲有限量也。豈若圓覺之廣大無邊也哉。願某衰且病。學問廢落。文思局澁。而名山盛事。本末闕闕。非區區筆力所能演述。竇以爲愧懼云。淳熙十年十一月十四日。朝奉大夫主筆。成都府玉局觀陸某記。

### 能仁寺捨田記

淳熙十三年三月乙巳。承節郎河東薛純一詣紹興府。自言生長太平。蒙被德澤。念亡益縣官。不勝悽悽報國之心。願以家所有山陰田千一百畝。歲爲米千三百石有奇。入大能仁禪寺。祝兩宮聖壽。安撫使龍圖丘公視牒異之。問所以然。純一曰。昔漢卜式上書。願輸家財半助邊。且曰。天子誅匈奴。愚以爲賢者宜死節。有財者而輸之。如此可滅也。今天子垂拱穆清。北虜讐服。歲時奉貢。純一弗獲傾貲備軍。與一日費。故因像教爲兩宮祈年。誠愚戇不識法令。罪死不宥。願言之朝。即伏斧鑕。不敢悔。於是龍圖公嘉其意。爲上尙書戶部。純一乃因寺之住持僧子昕來告予。請撰次本末爲記。予辭謝不可。則語之曰。子雖列在男爵。曩嘗舉進士。試禮部。繼今能益修其業。以自致於顯榮。則所以報國者。豈若是而已。雖然。是已足以勵風俗。助教化。使貪冒者廉。怠忽者奮。享祿賜而忘報者。愧。豈不可書也哉。田之頃畝賦役。及別以錢權其子本。以待凶歲。則具書於碑陰。俾後有考焉。五月十三日記。

### 常州開河記

隋疏大渠。自今京口毗陵。姑蘇嘉興。以抵於臨安。初以備巡幸。而後世因爲漕運大利。故得不廢。渠貫毗陵城中。

徐行東注。獨南水門受荆溪之水。爲惠明河。醜爲二股。皆會於金斗門。慶曆中。太守國子博士李公餘慶。始疏顧塘河。益引惠明水注之。漕渠。顧塘地勢在漕渠後。故俗又謂之後河。崇寧初。太守給事中朱公彥復增濬之。方是時。毗陵多先生長者。以善俗進後學爲職。故儒風蔚然爲東南冠。及余公中霍公端友。皆策名天下士第一。則說者遂歸之後河。曰。是爲東南文明之地。鄒忠公方居鄉。士所尊事而化服者。忠公避不敢居。因以後河實之。而爲作記。淳熙十四年。今太守林公下車逾年。既尊禮其諸老先生。延見其秀民。所以表勵風俗而激勸儒學者。日夜不敢少怠。絃歌之盛。殆軼於承平時矣。而或以後河告者。亦不廢也。後河自崇寧後。不治者積數十年。中更兵亂。民積瓦礫。及治家棄滓。故地益堅礪。夏六月。林公乃蒐閑卒。捐羨金。分命其屬治之。不掩旬。渠復故道。袤若干。深若干。脩若干。乃以書屬予曰。願記其事。予謂渠之興。自爲一郡之利。不必爲士之舉。有司者設。然城南衣冠。以杜固鑿而頓滅。則後河成廢。與士之舉。有司者相爲盛衰。亦自有理。太王遷岐。成王都洛。皆觀川原。咨卜筮。其由來蓋尙矣。則林公兼取焉。顧不可哉。士益勉之。以毋負公之意。公名曰洽。字子禮。明州鄞人。世以經行顯云。渠成之歲。十二月二日記。

## 卷十九

## 記十首

## 明州育王山買田記

紹興元年。高皇帝行幸會稽。詔明州阿育王山廣利禪寺。上仁宗皇帝。賜僧懷璉詩頌親札。念無以鎮名山。慰衆志。乃書佛頂光明之塔以賜。又申以手詔。特許買田贍其徒。逾五十年。未能奉詔。佛照禪師德光。以大宗師自靈隱歸。老是山。慨然曰。僧寺毋輒與民質產。令也。今特許勿用令。高皇帝恩厚矣。其可弗承。且昔居靈隱時。壽皇聖帝召入禁闈。顧問佛法。屢賜金錢。其敢爲他費。乃盡以所賜及大臣長者居士脩供之物買田。歲去穀五千石。而遣學者義銛求記於陸某。某方備史官。其紀高皇帝遺事。職也。不敢辭。惟茲四明表海大邦。自嘉祐紹興。兩賜宸翰。雲漢之章。下飾萬物。於是山君波神。効珍受職。鼉鼉蛟鱓。弭伏退聽。惡氣毒霧。收斂澄廓。萬里之舶。五方之賈。

南金大貝委積市肆不可數知。陂防峭堅年穀登稔於庫盛哉。今德光又廣上賜。斷兩宮之壽。植天下之福。無疆惟休。時萬時億。刻之金石。於是爲稱。咨爾學者。安食其間。明已大事。傳佛大法。報上大恩。將必有在。不然不耕而食。既飽而嬉。厲民以自養。豈不甚可愧哉。淳熙十六年十一月二十四日。朝議大夫尙書禮部郎中兼寶錄院檢討官陸某記。

### 建寧府尊勝院佛殿記

建寧城東永安尊勝禪院。成於唐僖昭間。壞於建炎之末。稍葺於紹興之庚申。自佛殿始。方是時。院大墮塗地。趣於復立。以慰父老心。故不暇爲支久計。未四十年。遽復頽圯。適懷素者來。爲其長老。乃慨然曰。殿大役也。舍是弗先。吾則不武。乃廣其故基。北南西東各三尺。意氣所感。助者四集。瓌材珍產。山積雲委。其最巨者。石痕村之杉。脩百有三十尺。圍十有五尺。其餘蓋稱是。凡費錢三百萬有奇。而竹木輒斲。聖之施者。工人役夫之樂助者。不在是數。其成之歲月。淳熙戊申冬十一月庚子也。越四年。紹熙辛亥五月。予友人方君伯謨。移書爲懷素求文爲記。予爲之言曰。世多以浮屠人之舉事。誚吾士大夫。以爲彼無尺寸之柄。爲其所甚難。而舉輒有成。士大夫受天子爵命。披刑賞予奪。以臨其吏民。何往不可。而熟視蠹弊。往往憚不敢舉。舉亦輒敗。何邪。予謂不然。懷素之來。爲是院。固非有積累明白之效。佛殿方壞。而院四壁立。今日食已。始或謀明日之食。懷素坐裂瓦折楹。腐柱頽垣之間。召工人。持矩度。謀增大其舊。計費數百萬。未有一錢儲也。使在士大夫。語未脫口。已得狂名。有心者疑。有言者謗。逐而去之。久矣。浮屠人則不然。方且出力爲之先後。爲之輔翼。爲之禦侮。歷十有四年如一日。此其所以歸然有所成就。非獨其才異於人也。以十四年言之。不知相之拜者幾人。免者幾人。將之用者幾人。黜者幾人。禮樂學校。人主所與對越天地。作士善俗。與夫貨財刑獄足用。而弼教藩翰之臣。古所謂侯國者。大抵倏去忽來。更不勝紀。彼懷素固自若也。則其是成。曷足怪哉。且懷素之爲是院。不獨致力於佛殿。凡所謂堂寢之未備者。廊廡之朽敗者。皆一新之。今老矣。無他徒意。使不死。復十四年。或過十四年。皆未可知也。則是院之葺。又可前知邪。而士大夫。矻矻拘拘。擇步而趨。居其位不任其事。護藏蠹萌。傳以相諉。顧得保祿位。不蹈刑禍。爲善自謀。其知恥者。又不過自引而去爾。天下之事。竟執任之於庠。是可歎也已。懷素。三衢人。少從道行禪師游。能得其學。伯謨名士繇。蒲陽



人六月甲申。中奉大夫提舉建寧府武夷山冲佑觀陸某記。

## 紹興府脩學記

八卦有畫。三墳有書。經之原也。典教有官。養老有庠。學之始也。歷世雖遠。未之或異。不幸自周季以來。世衰道微。俗流而不返。士散而無統。亂於楊墨。賊於申韓。大壞於釋老。爛漫橫流。不可收拾。始有重編累簡。棲以巨輪。象龍寓人。飾黃金珂璧怪珍之物。誘駭愚稚。而六經淩微。穹閣傑屋。上摩霄漢。勦聖髹丹。窮極工技。其費以億萬計。而學校弗治。自周衰至五代。幾二千歲。而後我宋誕受天命。崇經立學。以爲治本。十二聖一心。罔或怠忽。然竊嘗考之。方周盛時。天子所都。既竝建四代之學。而又黨有庠。遂有序。畿內六鄉。鄉有黨。百五十六遂。遂有鄙。如黨之數。遂序黨庠。蓋互見之。則是千里之內。爲序十有二。爲庠三百。何其盛也。今畿內之郡。皆僅有一學。較於周不及百之二。而又不治。則爲之牧守者。得無任是責邪。會稽拱行在所。爲東諸侯之冠。宜有以宣聖化。倡郡國。而學未稱。給事中括蒼王公信來。爲是邦。政成令行。民物和樂。臺榭弗崇。陂池弗廣。而惟學校是先。燕遊弗親。廚傳弗飾。而惟養士是急。下車未久。奧殿崇閣。邃宇脩廊。講說之堂。絃誦之舍。以葺以增。不日訖事。以其饗殮未足也。則爲之售常平之田。以其見聞未廣也。則爲之求四方之書。食有餘積。書罕未見。然公猶以爲慊。曰。上丁之禮。服器未復古也。又爲之新寃弁衣裳帶紳佩舄之屬。自邦侯至諸生。各以其所宜服。鼎俎尊彝豆籩簠簋之屬。自始奠至受胙。各以其所宜用。無一不如禮式。公迺齋心脩容。來宿於次。質明陟降揖遜。進退踴起。俯首屏氣。如懼弗克。禮成。士僉曰。公以躬行先我。我處於鄉。弗篤於孝悌忠信。出而仕。弗勉於廉清正直。不獨不可見公。仰天俯地。其何心。見父兄長者。其何辭。教授陳君自強與諸生以其言來告曰。願有紀。某老病。不獲奉俎豆以從公後。喜士之能承公也。於是平書。紹熙二年九月癸酉。中奉大夫提舉建寧府武夷山冲佑觀陸某記。

## 重修天封寺記

淳熙丙午春。予以新定牧入奏。行在所。館於西湖上。日與物外人遊。多爲予言淨慈有慧明師者。歷抵諸方。如汗血駒。所至蹴躡。萬馬皆空。方是時。知其得法。而不知其能文。後四年。予屏居鏡湖上。明來訪予。談道之餘。縱言及文辭。卓然儻偉。非凡子所及。方是時。知其能文。而不知其有才。明旣從予遊累日。乃曳杖負笠。入天台山。爲天封

主人是山也。巖嶂嶄絕。爲天台四萬八千丈之冠。林麓幽邃。擅智者十二道場之勝。然地偏道遠。遊者旣寡。施者益落。明居之彌年。四方問道之士。以天封爲歸。檀福樂施者。踵門而至。雖卻不可。於是自佛殿經藏。阿羅漢殿。鐘經二樓。雲堂庫院。莫不畢葺。敞爲大門。繚爲高垣。周爲四廡。屹爲二閣。來者以爲天宮化成。非人力所能也。又哀其餘。作二庫。曰資道。曰博利。以供僧及童子紉浣之用。彼庸道人日夜走衢路。丐乞聚畜。蓋未必能辦此。明方爲其徒發明大事因緣。錢帛穀粟之問。不至丈室。而其所立。乃超卓絕人如此。豈非一世奇士哉。予嘗患今世局於觀人。妄謂長於此者必短於彼。工於細者必略於大。自天封觀之。其說豈不淺陋可笑也哉。會明以書來求予文。記其寺之廢興。因告以予說。使併刻之。庶幾覽者有所做焉。紹熙三年三月三日。中奉大夫提舉建寧府武夷山冲佑觀山陰縣開國男食邑三百戶陸某記。

### 嚴州重修南山報恩光孝寺記

浙江自富春沂而上。過七里瀨桐君山。山益秀。水益清。烏龍山崛起千仞。鱗甲爪鬣。蜿蜒盤踞。嚴州在其下。有山直州之南。與烏龍爲賓主。烏龍以雄偉。南山以秀邃。形勢壯而風氣固。是爲太宗皇帝高宗皇帝受命賜履之邦。登高四望。則樓觀雉堞。鸞騰縈帶。在鬱葱佳氣中。兩山對峙。紫翠重覆。信天下名城也。南山報恩光孝禪寺。實爲諸刹之冠。質於地志及父老之傳。唐末。有僧結廬於山之麓。名廣靈菴。慶曆中。始斥大之爲廣靈寺。紹聖中。易禪林佛印大師希祖實爲第一代。始徙寺於山巔。今寺是也。崇寧中。賜名天寧萬壽。紹興中。易今名。初長者江氏爲塔七級。與寺俱燬於宣和之盜。厥後文則來居而寺復。法琦來助而塔建。及得智廓仲玘。而學者雲集。廓不期年示滅。凡今之營繕崇成者。皆玘也。如來大士有殿。演法會齋有堂。安衆有寮。樓鐘有樓。寢有室。遊有亭。浴有泉。又以餘力爲門。爲廡。爲庫。爲垣。爲磴路。爲禦侮力士之像。未五六年。百役踵興。無一弗備。郡人童天祐。錫方珍。出貲爲最鉅。老僧智貴。傾其衣囊。助施爲尤難。若夫以宿世願力。來爲外護。取郡之積木以終成之者。太守殿中侍御史冷公世光也。寺之役旣成。冷公適有歸志。遂奉祠以去。豈非緣法哉。予亦嘗來爲守。廓及玘皆予所勸請。則於是山不爲無風昔緣。故玘來求予爲記。予行天下多矣。覽觀山川形勝。考千載之遺迹。未嘗不慨然也。晚至是邦。觀烏龍似赤甲白鹽。南山似錦屏。一水貫其間。紆餘澄澈似渭水。而南山崇塔廣殿。層軒脩廓。山光川霽。鐘

鳴鯨吼。遊者動心。過者駭目。又甚似漢嘉之凌雲。蓋兼天下之異境而有之。騷人墨客。將有徙倚太息。援筆而賦之者。予未死。尙庶幾見之。紹熙四年二月庚申記。

會稽縣重建社壇記

古者侯國。地之別三。爵之等五。皆有宗廟社稷。秦黜封建。置郡守縣令。於是古之命祀。惟社稷尙存。陵夷千餘載。士不知學古。吏不知習禮。其祀社稷。徒以法令從事。畿封壇壝。服器牲幣。一切苟且。取便於事。無所考法。宋興。文物寔盛。自朝廷達於下州。蕞邑。社稷之祀。略皆復古。不幸中更犬戎之禍。兵氛南被吳楚。中興七十年。郡縣之吏。往往惟餉軍弭盜。簿書訟獄爲急。及吏以期告。漫應曰如令。至期。又或移疾弗至。雖朝廷所班令式。或未嘗一視。況三代之舊典禮乎。會稽之爲邑。實奉陵寢。且在安撫使提點刑獄。提舉常平治所。有將迎造請之役。有符檄期會之煩。敕使內家及宗室近屬。一歲屢至。亭傳道路。舟車徒役。一有不治。責在會稽者十居八七。故令於祀事。尤不遑暇。縣社在禮神坊。曰社。曰稷。曰風師。曰雨師。曰雷神。凡五壇。皆蕪不治。祀則芟舍以爲次。凡祀之費。一出於吏。兩則寓於吳越王祠之門。承議郎四明王君時會之來爲令。始至。周視壇所。喟然歎曰。幸爲政於此。得有人民社稷。事孰大於是者。迺卽其地爲垣八十丈。築屋四楹。有門以時其啓閉。有庫以儲其器物。用宋之櫟。豐之枌榆。故事。藝松五十。又稽合制度。稿秸莞席。帶篚樽俎。豆籩簠簋。莫不如式。染盛酒醴牲牢。莫不供給。獻有次。祝有位。齋有禁。省饌食。爵奠幣。飲福。望燎。望瘞。有儀。祝事各以其日。王君祇敬齋栗。與其僚從事。禮成而退。無違者。會稽歲比不登。及是兩暘時若。歲以大豐。民歌於途。農林於野。皆曰。吾令致力於神。神實響答。吾其可忘。於是父老子弟相與告予。請記其事。予曰。爲政之道。與他知先後緩急之序而已。王君設施。知所先急如此。雖欲不治。得乎。雖然。是皆朝廷以班郡縣者。王君特能舉之爾。後來者顧獨不能邪。故予詳記始末。所以告無窮也。慶元二年五月二十日。中大夫提舉建寧府武夷山冲佑觀山陰縣開國男食邑三百戶陸某記。

廣德軍放生池記

古者臣之愛其君。何其至也。其禱祈之辭曰。受天百祿。曰子孫千億。曰如南山之壽。一語言。一飲食。未嘗忘君。然不聞有以羽毛鱗介之族。祈其君之福者。蓋先王盛時。山澤有虞。川林有衡。漁獵有時。數罟有禁。洋洋乎。浩浩乎。

物各遂其生養之宜。所謂瀟波竭濁者。蓋無有也。所謂相响以溼。相濡以沫者。蓋未見也。至於後世德化弗行。厲禁弗施。廣殺厚味。暴殄天物。放而不知止。舍耒耜而事網罟者。日以益衆。於是有以放生名池。用祝壽祺者。而唐顏真卿之石刻。始傳於世。宋興十三聖相繼。以深仁盛德。極高蟠厚。鳥獸魚鼈咸若矣。而四方郡國。猶相與築陂儲水。修放生故事。所以廣聖澤之餘。有不敢忽者。惟廣德軍舊以郡圃後池爲之。地隘水泉淺涸。不與事稱。承讓郎曾侯渠。以慶元二年來領郡事。顧而太息。曾以事至子城西。稍南得巨溪者。延袤百步。泓渟澄澈。蒲柳列植。藻荇縈帶。水光天影。盪摩上下。爲一郡絕景。侯因其故而加治焉。築屋於其會。名曰溪堂。民不勞。財不費。煥然告成。重明節。率僚吏放鱗介千計。望行在拜手稽首。禮成而退。父老童穉縱觀與歎。以爲廣德爲郡以來。逾二百年所未之有。侯移書笠澤陸某俾爲記。某復之曰。侯奉天子詔。來爲守於此。一賦役非其時。一訟獄非其情。窮僻下里。匹夫匹婦有一愁歎。侯之責也。能不負此責。然後足以對揚天子休命。而致歸美報上之意。放生之舉。蓋賢守善其職之一事爾。豈特是而止哉。期年政成。將屢書之。中大夫提舉建寧府武夷山冲佑觀山陰縣開國男食邑三百戶陸某記。

### 鎮江府駐劄御前諸軍副都統廳壁記

鎮江府駐劄御前諸軍副都統武功大夫和州防禦使淄川夏侯君。書來諗予於山陰澤中曰。吾軍有都統。爲一軍大將。內以屏衛行在。外以控扼梁楚。隱然一長城也。又置副都統一員。以佐其長。智勇相資。寬猛相濟。有事則或居或行。更出迭歸。無事則同籌共畫於帳中。而制敵於千里之外。其任可謂重矣。而副都統自設官以來。今三十有八年。歷官十人。再至者一人。未有壁記。後將無所攷實。予爲我書而刻其姓名。可乎。予與夏侯君南北異鄉。東西異班。出處壯老異致。然每見其撫劍抵掌。談中原形勢。兵法奇正。未嘗不太息。恨不與之周旋於軍旅間也。君亦謂予非齷齪老書生。以兄事予。甚敬。則今日之請。尙何辭。然今天子神聖文武。承十二聖之傳。方且拓定河洛。規恢燕趙。以卒高皇帝之武功。則宿師江淮。蓋非久計。夏侯君亦且與諸將移屯玉關之西。天山之北矣。予雖老。尙庶幾見之。慶元四年正月甲子。陸某記。

### 法雲寺觀音殿記

浙東之郡。會稽爲大。出會稽城西門。循漕渠行八里。有佛剎曰法雲禪寺。寺居錢塘會稽之衝。凡東之士大夫仕於朝。與調官者。試於禮部者。莫不由寺而西。餞往迎來。常相屬也。富商大賈。捩拖挂席。夾以大牘。明珠大貝。翠羽瑟瑟之寶。重載而往者。無虛日也。又其地在鏡湖下。灌漑瘠泄。最先一邦。富比封君者。家相望也。故多施者。寺易以興。然建炎庚戌。胡虜之禍。亦以近官道。首廢於火。一瓦不遺。主僧曰道亨。爲一方所信。度弟子三十二人。慨然自任。以興復之事。未成者十七而沒。其後有自修者。始爲三門法堂經藏等。予適得華嚴般若涅槃寶積數百卷。以施之。草創未畢。而修謝去。自是寺以不得人。又廢。木剪竹伐。鐘鼓不鳴。白衣攘居之。屠牛牧豕。莫敢執何。初先楚公爲尙書左丞。請於朝。以證慈及法雲爲功德院。歲度僧一人。三年間。證慈得其二。法雲得其一。故太傅與楚公祠堂肖像具存。予自蜀歸。始言於府。請逐白衣。而命契彝者主之。彝與亨俱東陽人。人固已喜。而彝又有器局才智。居之且二十年。創佛殿及像設。費甚厚。談笑而成。重建三門。翼以兩廡。巍然大剎矣。彝沒。予以告府。牧尙書葉公。以其弟子道澤繼之。澤少年。志節清苦。言議英發。人皆畏其嚴。而服其公。於是予以大屋四楹。施以爲觀音大士殿。雖然。尙未易成也。澤卽日走四方謀之。三年。遂建殿。殿之雄麗。冠於一剎。予又施以禪月所畫十六大阿羅漢像。龕於兩壁。觀者起敬。施者踵至。自火於庚戌。及今庚申。實七十載。殆若有數然。卒成之者。繫彝與澤父子積勤不懈之力也。予嘗謂事物廢興。數固不可逃。而人謀常參焉。予遊四方。凡通都大邑。以至遐陬夷裔。十家之聚。必有佛剎。往往歷數百千歲。雖或盛或衰。要皆不廢。而當時朝市城郭。邑里官寺。多已化爲飛埃。鞠爲茂草。過者弔古興懷。於狐嘯鬼嘯之區。而佛剎自若也。豈獨因果報應之說。足以動人。而出其財力。亦其徒堅忍強毅。不以豐凶難易變其心。予又有孫。孫又有子。必於成而後已。彼之不廢固宜。予因彝與澤之事。而有感焉。併載其說。士大夫過而稅駕者。讀之。其亦有感也夫。慶元五年秋七月庚午記。

## 會稽縣新建華嚴院記

會稽五雲鄉有山曰黃琢。山之麓。原野曠。水泉冽。岡巒抱負。崑嶂森立。而地蕪不治者。不知幾何年。或謂古嘗立精舍。以待天衣雲門遊僧之至者。有石刻具其事。其後寺廢。石亡。獨龜趺猶在。父老類能言之。慶元三年。有信士馬君正卿聞而太息。乃與其弟崧卿。以事親收族之餘貲。買地築屋。擇僧守之。凡僧若士民之道出於此者。皆得

就憩猶以爲未廣也。則爲堂殿門廡倉廡庖福。凡僧居之宜有者悉備。而殖產使足以贍足其徒。猶懼其不能久也。告於府牧丞相葛公。以華嚴院額徙置焉。可謂盡矣。而其意猶未已也。曰年運而往。或者欺有司而寓其孥。則院廢矣。家世隆替不可常。萬分一有子孫以貧故。規院之產。侵院之事。則僧散矣。於是因其同學於佛者。朝奉耶致仕曾君迅叔。來請予文刻之石。庶來者知此院經理之艱勤。則不忍寓其孥。子孫知乃祖乃父志願之堅確。則不忍規其產。侵其事。設若有之。而至於有司。則賢守善令必有以處此。雖至於數百千歲。此院猶不廢也。予報之曰。僧居之廢興。儒者或謂非吾所當與。是不然。韓退之著書。至欲火其書。廬其居。杜牧之記南亭。盛贊會昌之毀寺。可謂勇矣。然二公者卒亦不能守其說。彼浮圖突兀三百尺。退之固喜其成。而老僧挈衲無歸。寺竹殘伐。牧之亦賦而悲之。彼二公非欲納交於釋氏也。願樂成而惡廢。亦人之常心耳。則君之志。叔遲之請。與予之記之也。皆可以無愧矣。慶元五年八月甲子。中大夫致仕山陰縣開國男食邑三百戶陸某撰并書丹。

## 卷二十一

### 記十首

#### 居室記

陸子治室於所居堂之北。其南北二十有八尺。東西十有七尺。東西北皆爲窗。窗皆設簾障。視晦明寒煖爲舒卷。啓閉之節。南爲大門。西南爲小門。冬則析堂與室爲二。而通其小門以爲奧室。夏則合爲一。而闢大門以受涼風。歲暮必易腐瓦。補罅隙。以避霜露之氣。朝晡食飲。豐約惟其力。少飽則止。不必盡器。休息取調節氣血。不必成寐。讀書取暢適性靈。不必終卷。衣加損。視氣候。或一日屢變。行不過數十步。意倦則止。雖有所期處。亦不復問。客至。或見或不能見。間與人論說古事。或共盃酒。倦則亟捨而起。四方書疏。略不復遺。有來者。或亟報。或守累日不能報。皆適逢其會。無貴賤疎戚之間。足跡不至城市者。率累年。少不治生事。舊食奉祠之祿。以自給。秩滿。因不復敢請。縮衣節食而已。又二年。遂請老。法當得分司祿。亦置不復言。舍後及旁。皆有隙地。蒔花百餘本。當敷榮時。或至其下。徜徉坐起。亦或零落已盡。終不一往。有疾。亦不汲汲近藥石。久多自平。家世無年。自曾大父以降。三世皆不

越一甲子。今獨幸及七十有六。耳目手足未廢。可謂過其分矣。然自記平昔於方外養生之說。初無所聞。意者日用亦或默與養生者合。故悉自書之。將質於山林有道之士云。慶元六年八月一日。山陰陸某務觀記。

## 邵武縣興造記

太平興國五年。詔卽建州邵武縣置邵武軍。而縣爲屬。其治在軍之東。建炎三年。盜起閩縣。邵武亦被兵。焚官寺民廬略盡。紹興十年作譙門。十六年作守丞治所。於是學宮軍壘。圉園倉廩。以次皆復其舊。獨縣故地廢爲教場。而縣寓尉廨。至二十一年。知縣事業遂始復縣治。未及成。安撫使用兵官王存之請。卽日撤除。滌地皆盡。而縣徙寓武陽驛。乾道六年。知縣事尤昂始作縣門。他猶未暇及。慶元四年。宣義郎史君定之來爲縣。始至而歎曰。縣古子男國也。因時之治忽。政之善否。以爲盛衰。自建炎己酉。訖今歲在戊午。凡七十年。自高宗皇帝。至今天子。歷四聖。寬賦薄征。休養元元。歲且屢豐。公饒私餘。生齒繁滋。考之九域圖。郡戶八萬七千九百有奇。今增五萬四千二百有奇。爲戶十四萬二千一百有奇。可謂盛矣。而邵武一邑。獨當戶五萬六千四百有奇。爲郡境十之四。則吾邑顧不又盛哉。而反寓其治於傳舍。詔勅法令。圖志符檄。護藏不嚴。棲列無所。決訟問囚。延見丞佐與賓客之來者。其地皆褊迫庳陋。仰漏旁穿。非所以宣布德澤。示民以上下之分也。念非所先。姑置弗議。比爲政期年。家無弗伸之冤。庭無弗直之訟。善無濫刑。惡無佚罰。太守趙侯不謫知君爲深。君所設施。郡未嘗以勢撓焉。以故君之政成。民之俗變。有所爲。輒共成之。於是始有意於新縣治矣。會得吏蠹與用度之餘。爲錢百餘萬。自五年七月甲午鳩工。至十月己巳落成。出令有所。燕息有次。勞賓有館。胥吏徒役。咸有寧宇。貨布器物。各司其局。事立令行。老稚舞歌。視承平舊觀有加焉。而木章竹筍。瓦甃榘丹。悉視時低昂。交手畀予。梓匠枵腹。百工之來者。得直皆如私家。訖事。民不及知。吏不得治以爲奸。非君之才。有餘。顧能若是哉。堂之名有九。曰畫簾。曰無私。曰近民。曰仁平。曰居敬樓。曰瞻雲軒。曰讀書。曰如水亭。曰海棠。其扁榜多君自書。有筆法。其命名之意。卽其地可知。故不詳著。君蓋故丞相太師魏公之孫。予魏公客也。故君與趙侯皆以記縣之興造爲請。予受知魏公時。甫壯歲爾。俯仰四十餘年。同時賓客凋喪殆盡。而予偶獨後死。見君以才稱於世。且猶能秉筆有所紀述。亦可謂幸矣。故不復辭。慶元六年九月癸酉。中大夫直華文閣致仕陸某記。并書。

諸暨縣主簿廳記

建炎紹興間。予爲童子。遭中原喪亂。渡河沿汴。涉淮絕江。間關兵間以歸。方是時。天子暴衣露蓋。櫛風沐雨。巡狩四方。會不期月休也。大臣崎嶇於山海阻險之地。草行露宿。不敢告勞。亦宜矣。況於州牧郡守以降。遽條一廈以治其事者相望。又况降而爲縣令丞簿者哉。及王室中興。內外蠲定。然郡縣吏寓其治於郵亭民廬僧道士舍者。尙比比皆是。積累六七十年。四聖相授。天下日益無事。兵燹歲登。用度饒餘。然後皆得稍復承平之舊。至於縣。則有迨今苟且因循者。主簿在縣官中。卑於令丞。而冷於尉。非甚有才。則其舉事爲尤難。若諸暨主簿丁君崇者。可謂才矣。君海陵人也。今居吳。世有顯人爲吏精察而平恕。學工文辭。而不忽簿書期會之事。嘗兼攝丞。久之。得添給。不取一錢。皆用以新主簿之廡。諸暨舊無丞。元豐間。置丞。徙主簿以居之。而主簿更得廡。乃故鹽廩。藉湮支傾。殆不可居。然閱百二十年。爲主簿者凡幾人。至君乃更新之。不亟不徐。不侈不陋。不費所公。不斂於民。竹箇木章。瓦甃丹堊。不瀝不苦。庶不漫漶。堂後舊有池。自君來。比二歲。產異蓮。駢跗。邑人謹傳。以爲君且通貴之祥。相與名其池上之亭曰雙蓮。君故不喜怪。而邑人之意如此。亦足知其得民也。君與予之子子虛遊。乃因子虛請記歲月。予不得辭也。昔我藝祖肇造區夏。當乾德六年二月癸亥。嘗詔郡縣吏代歸者。皆上其官舍敝壞。或興葺之。數於有司。以爲殿最。於虞。祖宗明詔。具在汗簡。而近世乃有相戒以爲非急務。且徒速訪者。獨安取此哉。予嘗備太史牛馬走。獲窺金匱石室之藏。故敢併記之。以曉他在任者。嘉泰元年十月二十七日。中大夫直華文閣山陰縣開國男食邑三百戶致仕陸某記。

婺州稽古閣記

大觀二年九月乙丑。天子既大興學校。舉經行之士。於是詔天下州學經史閣。皆賜名稽古。婺州稽古閣者。本以閣之下爲講堂。而閣用大觀詔書易名。紹興中。學廢於火。及再建講堂。雖復其故。不暇爲閣。至嘉泰元年。太守丁公逢。乃卽講堂後。得舊直舍地。以爲閣。而請於今。參知政事許公大書其顏。公書宏偉有漢法。於是閣一日而傳天下。丁公既代去。會公舉來爲郡。閣之役尙未既也。於是窗戶闌楯。瓦甃髹丹。粲然皆備。又爲兩廡。達於講堂。高廣壯麗無遺力。南山在其上。雙谿在其下。煙雲百變。朝暮獻狀。閣之後有仰高堂。舊祠資政宗公澤尙書梅公執



禮中書舍人潘公良貴。三公皆郡人。有忠義大節。而祠庠陋。且弗葺。曾公微而大之。始奕奕與閣稱。曾公以邦人之請。及州學教授潘君夢得所敘。移書史官山陰陸某。願記其始末。時方修孝宗光宗兩朝實錄。業大事叢。而奏篇有程。久乃能如曾公之請。夫堯舜禹臯陶。書紀其事。雖不同。然未嘗不同者。稽古也。稽古必以書。前乎堯舜之書。其易之始。畫與典墳乎。易之畫。幸在至今。而三墳五典。自楚倚相以後。不聞有能盡讀者。世所共歎也。雖然。今讀易不能知伏羲之心。讀典謨不能知堯舜禹臯陶之心。雖典墳盡在。亦何益於稽古。故予以爲士能玩易之龜。與身親見虞叢等。反覆盡心於典謨。與身親見堯舜禹臯陶等。能親見聖人。而不能佐其君。與聖人之治理。豈有是哉。士之放逸惰偷。不力於學者。固所不論。學而不親見聖人。猶未學也。親見不疑。而不用於天下。則有命焉。進則不負所學。退則安吾命。而無愠。斯可仰稱大觀詔書。與賢守復閣之意矣。士尙勉之。嘉泰二年閏月二十五日。中大夫直華文閣提舉佑神觀兼實錄院同修撰兼同修國史陸某謹記。

## 智者寺興造記

婺州金華山智者廣福禪寺。淨居士所謂梁樓約法師道場。國朝開寶九年。始爲禪寺。自淨悟禪師全肯傳三十七代。二百餘年。至慶元之五年。而仲玘實來。方是時。事廢不舉。地蕪不葺。棟橈柱腐。垣斷甃缺。若不可復爲者。玘植杖而四顧曰。智者之爲寺。天造地設者至矣。而人事不能充焉。故壞壞至於此。天其使我與此地歟。乃諏諸爲地理學者。則其言與玘略合。蓋寺在金華山之麓。峯嶂屹立。林岫間出。日月映蔽。風雲吞吐。而前之形勢。無以留之。如王公大人。南嚮坐帷幄中。宜其前有列鼎大牲之饗。盛禮備樂之奉。賓客進趨。擴相襜翼。將吏武士。執轡執何。然後爲稱。今乃巍然獨坐。而侍衛者皆奔趨而去。則其威重。無乃少損乎。於是始議鑿大池。蓄水於門梁。其上通大路。而增門之址。高於故三之二。異時所謂奔趨而去者。皆肅然就列。恪然執事。則王公大人之尊。於是始全。則其施置建立。號令賞罰。亦何可少訾邪。方議之初。或謂門有大木數十。必盡去。乃可與池。而木所從來久。以是未決。忽一夕大風。木盡拔。若有鬼神相其役者。其亦異矣。玘之來。百役皆作。修廊傑閣。虛堂廣殿。至於棲養老之室。庖廡祭廡之所。繕爲垣牆。引爲道路。莫不美於觀。而便於事。後雖有能者。無以加焉。玘有道行。爲其後所宗。而才智器局。又卓然不凡如此。故薦紳多喜道之。予又與有夙昔。且嘗記其嚴州南山興造之盛。故玘今又從予。

求作智者與造記。而予友人寧遠軍節度使提舉佑神觀姜公邦傑。復以手書助之請。未及屬稿。而邦傑歿。予尤感焉。雖老。不敢辭也。今茲之役。地爲大。故書之特詳。嘉泰三年十月二十九日記。

### 常州奔牛關記

岷山導江。行數千里。至廣陵丹陽之間。是爲南北之衝。皆疏河以通。鍾鮑。北爲瓜州關。入淮汴。以至河洛。南爲京口關。歷吳中以達浙江。而京口之東。有呂城關。猶在丹陽境中。又東有奔牛關。則隸常州武進縣。以地勢言之。自創爲鍾河時。是三關已具矣。蓋無之。則水不能節。水不節。則朝溢暮涸。安在其爲鍾也。蘇翰林嘗過奔牛。六月無水。有仰視古堰之歎。則水之苦涸固久。地志概述本末而不能詳也。今知軍州事趙侯。善防字若川。以諸王孫來爲郡。未滿歲。政事爲畿內最。考古以驗今。約己以使人。裕民以束吏。不以難止。不以毀疑。不以費懼。於是郡之人。僉以關爲請。侯慨然。是其言。會知武進縣丘君壽。篤來白事。所陳利病益明。侯旣以告於轉運使。且亟以其役專畀之丘君。於是凡關前後左右受水之地。悉伐石於小河元山。爲無窮計。舊用木者皆易去之。凡用工二萬二千石。二千六百錢。以緡計者八千。米以斛計者五百。皆有奇。又爲屋以覆關。皆宏傑牢堅。自鳩材至訖役。閱三時。其成之日。蓋嘉泰三年八月乙巳也。明年正月丁卯。侯稜書來請記。予謂方朝廷在故都時。實仰東南財賦。而吳中又爲東南根柢。語曰。蘇常熟。天下足。故此關尤爲國用所仰。遲速豐耗。天下休戚在焉。自天子駐蹕臨安。牧貢戎贄。四方之賦輸。與郵置往來。軍旅征戍。商賈貿遷者。途出於此。居天下十七。其所繫豈不愈重哉。雖然。猶未盡見也。今天子憂勤恭儉。以撫四海。德教洋溢。如祖宗時。齊魯燕晉秦雍之地。且盡歸版圖。則龍舟仗衛。復泝淮汴。以還故都。百司庶府。熊羆貔虎之師。翼衛以從。戈旗蔽天。軸轡相銜。然後知此關之功。與趙侯爲國長慮遠圖之意。不特爲一時便利而已。侯。吾甥也。請至四五不倦。故不以衰耄辭。三月丙子。太中大夫充寶謨閣待制致仕山陰縣開國子食邑五百戶賜紫金魚袋陸某記。

### 盱眙軍翠屏堂記

國家故都汴時。東出通津門。舟行歷宋毫宿泗。兩隄列植榆柳槐楸。所在爲城邑。行千有一百里。汴流始合。淮以入於海。南舟必自盱眙絕淮。乃能入汴。北舟亦自是入楚之洪澤。以達大江。則盱眙實梁宋吳楚之衝。爲天下重

地。尙矣。粵自高皇帝受命中興。駐蹕臨安。歲受朝聘。始詔盱眙進郡。除館治道。以爲迎勞宿餞之地。而王人持尺一牘。懷柔殊鄰者。亦皆取道於此。於是地望益重。城郭益繕治。選任牧守。重於曩歲。及吳興施侯之來。爲知軍事也。政成俗阜。相地南山。得異境焉。前望龜山。下臨長淮。高明平曠。一目千里。草木蔽虧。鳧雁翔泳。蓋可坐而數也。乃築傑屋。衝爲四楹。縱爲七架。前爲陳樂之所。後有更衣之地。而傍又有射牲驛。與夫吏士更休之區。翼室修廊。以陪以擁。斲削髹丹。皆極工緻。最二十有六間。而堂成。旣取米禮部芾之詩。名之曰翠屏。且疏其面勢於簡。繪其棟宇於素。走騎抵山陰澤中。請記於予。侯與予故相好也。予聞方國家承平時。其邊郡遊觀。有雅歌之堂。萬柳之亭。以地勝名天下。雖區脫間。猶能詠歎。以爲盛事。然營至其地者。皆謂不可與淮水南山爲比。翠屏之盛。又非雅歌萬柳可及。則亦宜有雄文傑作。以表出之。而予之文不足稱也。雖強承命。終以負愧。侯名宿。字武子。於是爲朝散郎直祕閣。開禧元年春正月癸酉記。

## 上天竺復菴記

嘉泰二年。上天竺廣慧法師築退居於寺門橋南。名之曰復菴。後負白雲峯。前直獅子乳竇二峯。帶以清溪。環以美箭嘉木。凡屋七十餘間。寢有室。講有堂。中則爲殿。以奉西方像設。殿前闢大池。兩序列館。以處四方學者。炊爨滌浴。皆有其所。牀敷巾鉢。雲布鱗次。又以爲傳授講習梵唄之勤。宜有遊息之地。以休其暇日。則又作園亭流泉。以與學者共之。旣成。命其弟子了懷。走山陰鏡湖上。從予求文。以記歲月。予告之曰。進而忘退。行而忘居。知趨前而昧於顧後者。士大夫之通患也。故朝廷於士之告歸。每優禮之。而又命有司察其尤不知止者。以勵名節。而厚風俗。士猶有不能決然退者。又況物外道人。初不踐是非毀譽之途。名山大衆。以說法爲職業。愈老而愈尊。愈久而人愈歸之。雖一坐數十夏。何不可者。如法師道遇三朝。名蓋萬禩。自紹熙至嘉泰十餘年間。詔書褒錄。如日麗天。學者歸仰。如泉赴壑。非有議其後者。而法師慨然爲退居之舉。傾竭塵裝。無所顧惜。雖然。以予觀之。師非獨視天竺之衆。不啻弊屣。加以歲年。功成行著。遂爲西方之歸。則復菴又一弊屣也。死生去來無常。予若甚矣。安知不先在寶池中。俟師之歸。語今日作記事。相與一笑乎。開禧元年三月三日記。

## 東籬記

放翁告歸之三年。闢舍東蒔地。南北七十五尺。東西或十有八尺而贏。或十有三尺而縮。插竹爲籬。如其地之數。藟五石瓮。瀦泉爲池。植千葉白芙蓉。又雜植木之品若干。草之品若干。名之曰東籬。放翁日婆娑其間。撥其香以臭。擷其穎以玩。朝而灌。莫而鋤。凡一甲坵。一數榮。童子皆來報惟謹。放翁於是考本草以見其性質。探離騷以得其族類。本之詩爾雅。及毛氏郭氏之傳。以觀其比興。窮其訓詁。又下而博取漢魏晉唐以來。一篇一詠無遺者。反覆研究古今體制之變革。間亦吟諷爲長語短章。楚調唐律。酬答風月煙雨之態度。蓋非獨娛身日。遣暇日而已。昔老子著書末章。自小國寡民。至甘其食。美其服。安其居。樂其俗。鄰國相望。雞犬之聲相聞。民至老死不相往來。其意深矣。使老子而得一邑一聚。蓋真足以致此於庠。吾之東籬。又小國寡民之細者歟。開禧元年四月乙卯記。

### 嚴州釣臺買田記

嘉泰四年。詔以嚴州久不治。命朝散郎直祕閣浙西路安撫司參議孫公叔豹爲知州事。公至數月。州以大治。聞獄無淹繫。庭無滯訟。幙府閑暇。符檄簡少。榜笞之聲。不聞於屏外。向之逋賦佚罰。皆以時舉。倉有餘粟。府有餘帛。公天資近道。不樂燕遊歌舞優戲之奉。又不喜以土木無益之事勞其民。治事少休。則宴坐別室。自夜至旦。盥澣而出。終歲如一日。獨念初赴郡。過七里瀨。嚴殿先生釣臺下。讀唐興元中崔儒釣臺記。以爲上有平田百畝。足以力耕。下臨清流。足以垂釣。今投釣之地具在。而田則亡有。乃以屬縣令訪之。則田亦具在。旁有流泉。雖大旱不竭。可給灌溉。而或者輒有之。公乃遣語以當歸田直。而取田以爲先生歲時祭享之奉。其人難之。公歎曰。光武欲與先生共天下。而先生不屑也。千有餘歲後。吾乃欲必取百畝之田以奉祀事乎。且吾教化未孚。而遽望人以輟耕遜畔。難矣。因置不問。會有沒官田。又從傍買民田足百畝。除其泛科斂。以畀浮屠之奉祠者。又卽祠之右。創爲佛院。樓鐘於樓。匱經於室。僧廬客館。略皆有所。度歲入可以食其徒七人。而樵汲之役。又在其外。則先生之祠。可以永世不廢。乃嚶笑石請記於予。予曰。嚴名城也。自大駕巡幸臨安。以朝士出守者。與夫入對行殿被臨遣而來者。大抵多取道於富春。入謁亭下。有高山仰止之歎。而恨祠屋弊壞。椒桂不以時薦。往往咨嗟躊躇。久而後去。及其下車。則日困於簿書米鹽。將迎燕勞之事。忽焉忘前日之言。寒暑再更。復上車去。則又過祠下。負初心戴愧面而去者。袂相屬也。聞孫公之舉。得無少自咎哉。予二十年前。蓋嘗來爲此邦。亦自咎者之一也。故喜道孫公之舉。且

以勵來者云。開禧元年十二月辛未。太中大夫寶謨閣待制致仕山陰縣開國子食邑五百戶賜紫金魚袋陸某記。

## 卷二十一

## 記十首

## 仁和縣重修先聖廟記

聖人之道。位天地。育萬物。可謂大矣。然常寓之於宮室祭祀器服度數之間。非如後世佛老子廢禮棄樂。掃除名分。務爲玄默寂滅。浩然不可致詰也。夫子生於周。故其尊以爲師者。文王周公也。使夫子生於今。有不奉孔子顏子孟子以爲先聖先師者乎。則今之卽學校以春秋舍奠於先聖先師者。非獨甲令也。方先朝學校盛時。縣有學。與郡等。後以海內多事。縣學往往廢壞。而所以奉先聖先師者。亦苟而已。知臨安府仁和縣事謝君庭玉。獨慨然以爲急務重責。寢食不敢安。捐己之公租錢二十萬以經始。會得廢寺當沒官錢。以佐其費。又取吏舍以益其址。自開禧元年十二月。至二年正月。廟乃告成。最其費爲錢五十萬。吾夫子被袞服冕。巍然當坐。旣悉如舊制。祀享從祀。亦皆就列。出入有門。陟降有階。設燎有庭。三獻及受胙。俶幣皆有位。儲峙祭器。則又有庫。是歲二月。上下將有事於廟。吏言異時惟丞以下執事。令以芻劇率不行。謝君曰。豈有是哉。於是告於府。肅恭齋明。以時訖事。且來告。請記其始末。天子中興大業。講太平典禮。方自學校始。學校之設。方自兩赤縣始。則茲廟又學校之權輿也。其可闕書。三年正月戊寅。太中大夫寶謨閣待制致仕涇南縣開國伯食邑八百戶賜紫金魚袋陸某記。

## 湖州常照院記

昔在高宗受命中興。全功至德。聖神文武。昭仁憲孝皇帝。龍興河朔。克濟大業。祀宋配天。三十有六年。涵養生齒。其數無量。遺弓故劍。羣臣皆當追慕號泣。思所以報在天之靈。至千萬世無怠無斁。而況山林外臣。以道藝供奉仗內。嘗被異禮厚賜者乎。鎮江府延慶寺僧梵隆。以異材瞻學。高操絕藝。自結上知。不由先容。得對內殿。先是。隆師固已結廬於湖州菁山。號無住精舍。一時名士如葉左丞夢得。葛待制勝仲。汪內翰藻。陳參政與義。皆爲賦詩。

勒銘傳於天下。至是詔賜菴居於萬松嶽金地山。江濤湖光映帶几席。壽藤老木。岑蔚天矯。隆師方力辭。願歸故棗。既至。悅其地。且侈上賜。幡然願留。久之示化。上爲悵然不懌。賜金歸葬故山。及孝宗皇帝嗣位。又命創常照院於無住故址。以隆師弟子上首。至叶嗣其事。賜田以贍其徒。又命充丁亥丁未本命道場。以祈兩殿之福。高宗皇帝御德壽宮。賜御書寂而常照。照而常寂八字。以示名院本指。且賜天申金剛無量壽閣扁榜。及紫檀刻佛號。如來閣榜。悉御書也。又一再賜萬機暇日所臨。晉王羲之帖二十二紙。唐陸東之蘭亭詩一卷。及米芾史略帖一卷。題團扇二柄。又賜白金助建立。於是院悉崇成。有釋迦文殊普賢十六阿羅漢殿。左則觀音大士道場。右則法輪藏室。食息有堂。鐘經有樓。薰浴炊爨儲積。各有其所。攄椎鼓鐘。器亦備足。至於遊息臨眺。種藝疏鑿。莫不極思致區處之妙。而西巖尤爲勝絕曠快之地。叶師以老疾請罷院事。屏居西巖。今皇帝詔從之。且命政院爲禪院。專以仰薦高宗神遊。世擇其徒有道行者。嗣住持事。而本澄首被是選。實嘉泰四年甲子歲之四月也。叶師乃來告曰。願有述焉。某實紹興朝士。歷事四朝。三備史官。名列策府。諸儒之右。則與隆師及其子孫。雖道俗迹異。而被遇則同。今叶澄父子晨香夜燈。梵唄禪定。雖世外枯槁。亦有以伸其圖報萬一之意。某則不然。飽食而安居。日復一日。飾巾待終而已。視叶澄豈不有媿哉。故遂秉筆而不敢辭。上以紀三朝眷遺山林學道者之盛德。下以識某媿云。開禧三年二月壬子謹記。

### 法慈懺殿記

東出慶元府五十里。曰小溪。有僧舍曰法慈院。院創於唐咸通中。舊號鳳山院。歷五季至宋興。院常不廢。治平二年。始賜今名。雖世以院僧主之。然其徒多出遊四方。學經論。問祖師第一義。或終其身不歸。淳熙十四年。老宿及後來者。始議作懺殿。而如戒等十輩。願盡力營之。久而不成。十人或死。或緣不偶。獨如戒智玻行慈。誓不怠廢。必遂其始願。行乞勞苦。積細微以成高大。於是施者牆立。助者儻至。聞者與歎。見者起敬。木章竹筍。山積雲委。伐石於山。陶甃於甕。丹漆黝堊。致於四方。以紹熙壬子三月癸酉始土工。明年八月庚申始匠事。十一月土木皆告成。南北八丈六尺。東西五丈八尺。而棟之高四丈一尺。耽耽奕奕。窮極藝巧。雖慶元多名山巨剎。然懺堂之盛。未有如法慈者。奉釋迦於中。而左則彌勒。右則無量壽。又以天地鬼神之像。陪擁四旁。於廓亦盛矣。院僧因餘姚普明

院僧則華求予爲記。則華嘗遊蜀。予識之於成都。今三十餘年。以故舊不忍拒也。乃爲之書。而刻施者姓名於碑陰云。

## 東陽陳君義莊記

東陽進士陳君德高。因吾友人呂君友德來告曰。德高不幸。早失先人。舉進士。又輒斥。念昔先人進德高。輩於學。蓋將使之事君。使之字民。以廣我先人之志。今雖自力。而不合於有司之繩尺。如其遂負所期望付託。生何面以奉祭享。死何辭以見吾親於地下。不獲施於仕進。爲時雨爲豐年矣。獨不可退而施於宗族乎。於是欲爲義莊。略用范文正公之矩度。而稍增損之。以適時變。敢求文於執事者。且載其凡於碑陰。予復之曰。笑哉。吾子之志也。人之情。於其宗族。遠則疏之。彌遠則益疏。而至於忘之。蓋以身爲親疏。而不以先人爲親疏也。視兄之子。已或不若己之子。己之子與兄之子。自吾父視之。有異乎。能以父之心爲心。則己之子與兄之子。且不知其同異矣。推而上之。大父之孫。爲從父兄弟。曾大父之曾孫。爲從祖兄弟。又推而上之。至於無服。雖天下長者。不能無親疎之殺矣。於庫制。服不得不若是也。若推上世之心。愛其子孫。欲使之衣食給足。婚嫁以時。欲使之爲士。而不欲使之流爲工商。降爲皂隸。去爲俘圜老子之徒。則一也。死而有知。豈以遠而忘之哉。義莊之設。蓋基於是。然舉天下言之。能爲是者有幾。非以爲不笑而不爲也。力不足也。若陳君者。自其先人勤勞節約。以致饒餘。而陳君不敢私有之。其地在陸頭昭福寺之傍。初期以千畝。今及十之七。而吾地在陸頭者止此。比鄰感其義。皆欲期年間貿易以成之。又植桑畜牛築陂。以豐衣食之源。其說見碑陰。又有最當慮者。吾子之心則盡矣。後人或貪而專利。或嗇而吝出。或夸而廣費。或挾長挾仕。挾有力之助而敗約。非有司者別白之。則莊且壞不支。府牧邑長丞掾曹吏及鄉之卿大夫先生處士。其必綱維主張之。使久而如一日。陳氏布衣也。其貲產非能絕出一鄉之上。而義倡於鄉如此。吾徒任於朝於四方。雖未必皆厚祿。然聞陳氏之風。而不知媿且慕者。豈人情也哉。於是併書以遺焉。君之先君子。蓋諱士澄。字彥清云。開禧三年七月辛丑記。

## 廬帥田侯生祠記

開禧二年八月。詔以開封田侯琳爲淮南西路安撫使。兼知廬州。節制淮西軍馬。時虜方入塞。侯旣受命。謂廬州

爲淮西根本。而古城又爲州之襟要。堅守廬州。則淮西有太山之安。修復古城。則廬州有金城湯池之固。異時讖者知守南城而已。古城不復繕治。一日有警。如有太阿之利而不持鐔柄。七尺之軀而授人腰領。幾何其不敗也。古城雖不甃。而其竇峭堅。利以禦寇。且西北堅城。多止用土。雖潼關及赫連氏統萬城。亦土爾。乃躬臨視之。芟夷草棘。則城果屹如石壁。戈戟皆廢。衆始駭服。於是增陴浚濠。大設樓櫓。又有月城。亦得地利。而卑不可恃。則又爲築羊馬城。厚六尺。高倍之。且爲重塹。設釣橋。而月城亦不可復犯矣。然自興役至訖事。不三閱月。將士爭奮。民不與知。一旦巍然。若役鬼神。可謂奇偉不世之功矣。城甫畢。虜果大入。道執鄉民。問知侯在是。相顧曰。殊不知乃鐵面將軍也。蓋虜自王師攻蔡州時。已習知侯名。未戰。氣先奪矣。乘城拒守甚力。夜遣偏將自屯所攻其營。殺傷數千人。萬戶死者二人。侯聞捷。曰。是且伏兵東門。夜攻吾水柵。以幸一勝。乃提親兵隨所向禦之。莫不摧破。虜知廬州不可近。遂解而趨和州。侯又亟遣親信間道督光州戍將。斷橋梁。燒賊艦。絕其饋道。奪俘虜復取安豐軍。又遣萬騎由梁縣援和州。會和州亦堅壁。虜窮。乃盡還。侯又出兵濠州。以戰車敗虜屯兵。戰車久不用。侯以意爲之。果取勝。策勳真拜達州刺史。且以車制頒之諸軍。侯猶不敢自以爲功。方益修水門之備。濬河深二丈。乃得昔人撒星椿。橫亘兩城間。始知昔固有此舉。遂益植新椿而城之。其崇五丈有奇。檣櫓稱焉。將吏士民聚而謀曰。侯之所立如此。郡人無以報萬一。則不可。相與築生祠於城中。而移書於予。請書歲月。予以衰疾辭。比書復來。則侯捐館舍矣。請既益堅。予亦痛若人之不淑。而不獲卒大勳業也。故采之僉論。以敘其始末。昔劉滬城水洛。趙立城山陽。滬所遇非堅敵。立雖死事。而不能全其城。猶皆廟食。載在祀典。況如侯之功。光明卓絕如此。則祀典之請。必有任其事者。尙繼書之。以垂示後世。爲忠義之勸云。嘉定元年春二月己巳謹記。

### 吳氏書樓記

天下之事。有合於理而可爲者。有雖合於理而不可得爲之者。士於可爲者。不可不力。力不足。則合朋友鄉閭之力而爲之。又不足。告於在仕者以卒成之。成矣。又慮其壞。則吾有子。子又有孫。孫又有子。雖數十百世。吾之志猶在也。豈不賢哉。彼不可得爲之者。則有命焉。有義焉。不知命義。徒呶呶紛紛。奚益。故君子不爲也。然爲此者寡也。或易之。爲彼者輒可以得名於流俗。故士之爲此者寡也。吾友南城吳君仲與其弟倫。初以淳熙之詔。建社會。其



詳見於侍講朱公元晦所爲記。其後又以錢百萬剋爲大樓。儲書數千卷。會友朋。教子弟。其意甚美。於是朱公又爲大書畫樓二字以揭之。樓之下曰讀書堂。堂之前又爲小閣。閣之下曰和豐堂。旁復有二小閣。左則象山陸公子靜書。其顏曰南牕。右則良齋謝公昌國書。其顏曰北牕。堂之後榮木軒。則又朱公實書之。於廬亦可謂盛矣。蓋吳君未命之士爾。爲社會以惠其鄉。爲書樓以善其家。皆其力之所及。自是推而上之。力可以及一邑。一郡。一道。以至謀讓於朝者。皆如吳君自力而不媿。則民殷俗儉。兵寢刑厝。如唐虞三代可積而至也。吳君兄弟爲是。迄今已十五六年。使皆壽考康寧。則倉與樓皆當益洽。鄉之民生業愈給足安樂。日趨於壽富。而君之子弟孝悌忠信。亦皆足以化民善俗。是可坐而俟也。然年運而往。天人之際。有不可常者。則又當有以垂訓於無窮。予讀唐李衛公文鏡平泉山居記。有曰。鬻平泉者。非吾子孫也。以平泉一木一石與人者。非佳子弟也。平泉持燕遊地。木石之怪奇者。亦奚足道。而其言且如此。況義倉與書樓乎。後之人讀吾記至此。將有渙然汗出。霰然廊下者。雖百世之後。常如吳君時。有不難者矣。嘉定元年五月甲子記。

## 靈秘院營造記

出會稽城西門。舟行二十五里。曰柯橋靈秘院。自紹興中。僧海淨大師智性築屋設供。以待遊僧。各接待院。久而寢成。始徙廢寺故額名之。海淨年九十。坐八十三夏而終。以其法孫德恭領院事。恭少嘗學於四方。有器局。迨今二十年。食不過一簞。衣不加一稱。而惟衆事是力。夕思晝營。心揆手畫。施者自至。魔事不作。用能於二十年間。或改作。或增葺。光明偉麗。毫髮無憾。上承先師遺志。下爲子孫基業。闕堂傑閣。房奧廊序。樓鐘之樓。橫經之堂。館客之次。下至庖廚。漏浴。無一不備。爲屋僅百間。自門而出。直視旁覽。道路繚直。而原野砥平。一遠山在前。孤峭奇秀。常有煙雲映帶其傍。卜地者以爲在法百世不廢。且將出名僧。今院纔一傳。其興如此。後烏可量哉。院之崇成也。恭來請記曰。先師之塔。公實與之銘。今院富有記。非公誰宜爲哉。予報之曰。子廬於此。凡東之會稽。四明。與西入臨安者。風飄日相屬也。彼其得志於仕宦。獲利於商賈者。寧可計邪。有能家世相繼。支久不壞。如若之爲父子者乎。有能容寬聚族。變和安樂。如若之處兄弟者乎。至於度地築室。以奢麗相誇。斤斧之聲未停。丹堊之飾未乾。而盛衰之變已遽至矣。亦有如若之安居奠處。子傳之孫。孫又傳之子者乎。此無他。彼其初與若異也。雖曰有天數。

然人事常參焉。人事不盡而諉之數於虛。其可哉。嘉定元年夏五月庚申記。

### 橋南書院記

吾友西安徐載叔豪雋人也。博學善屬文。所從皆知名士。方其少壯時。視功名富貴猶券內物。一第直浼我爾。然出遊三十年。蹭蹬不偶。異時知己零落且盡。家貲本不薄。載叔常糞壤視之。權衡仰俯。算籥衡縱。一切不能知。惟日夜從事於塵編蠹簡中。至食不足不問也。中年卜居城中。號橋南書院。地僻而境勝。屋庫而人傑。清流美竹。秀木芳草。可玩而樂者不一而足。載叔高臥其中。韞不曳刺不書。客之來者日益衆。行者交跡。乘者結轍。訶殿者隨坊陌。雖公侯達官之門不能過也。名不可妄得。客不可強致。載叔蓋有以得此於人矣。乃者數移書於予。請記所謂橋南書院者。嗟乎。漢梁伯鸞入吳。賃舂於皋伯通廡下。至今吳有皋橋。蓋以伯鸞所寓得名。載叔之賢不減伯鸞。而橋南乃其居。則後世不難沒決矣。尙何待記。然載叔之請不可終拒也。乃爲之書。嘉定元年夏六月庚寅。山陰陸某務觀記。

### 心遠堂記

大卿朱公以開禧元年築第於昭武城東。取陶淵明詩語。名其堂曰心遠。旣成。與士大夫落之。而以書來告。曰。子爲我記。始嘉泰壬戌。予蒙恩召爲史官。朱公丞秘書。日相從甚樂。公去爲御史。予領監事。閑劇異趣。會見甚疏。然每與同舍焚香煮茶於圖書鐘鼎之間。時時言及公。未嘗不相與與懷絕歎也。明年。國史奏御之明日。予乞骸骨而歸。俄而公亦自寺卿得請外補。不復相聞者累歲。比書來。予方臥病。作而言曰。朱公真可人哉。士得時過主。施其才於國。退居閭里。閒暇之日爲多。樽俎在前。琴弈迭進。欣然自得。悠然遐想。問餽宴樂。以修親舊。夙昔之好。講解誦說。以垂後進。無窮之訓。進退兩得。可謂賢矣。予獨相望累千里。不得持一觴爲公壽。且慶斯堂之成。願方以爲歎。今乃得以不腆之文。自託於後世。亦可謂幸矣。夫。嘉定元年秋七月甲子記。

### 萬卷樓記

學必本於書。一卷之書。初視之若甚約也。後先相參。彼是相稽。本末精羸。相爲發明。其所關涉。已不勝其衆矣。一編一簡。有脫遺失次者。非考之於他書。則所承缺而不知。同字而異詁。同辭而異義。書有隸古。音有楚夏。非博極

羣書則一卷之書。殆不可遽通。此學者所以貴夫博也。自先秦兩漢。訖於唐五代以來。更歷大亂。書之存者既寡。學者於其僅存之中。又鹵莽焉。以自便其怠惰。因循曰。吾懼博之溺心也。豈不陋哉。故善學者通一經而足。藏書者雖盈萬卷。猶有憾焉。而近世淺士。乃謂藏書如鬪草。徒以多寡相爲勝負。何益於學。嗚呼。審如是說。則秦之焚書。乃有功於學者矣。昭武朱公敬之粹於學而篤於行。早自三館爲御史。爲寺卿。出典名藩。尊所聞行所知。亦無負於爲儒矣。然每愷然自以爲歛。益務藏書。以棲於架藏於櫝爲未足。又築樓於第中。以示尊閣傳後之意。而移書屬予記之。予聞故時藏書如韓魏公萬籍堂。歐陽充公六一堂。司馬溫公讀書堂。皆實萬卷。然未能絕遞諸家也。其最擅名者曰宋宣獻李邯鄲呂汲公王仲至。或承平時已喪。或遇亂散軼。士大夫所共歎也。朱公齒髮尙壯。方爲世顯用。且澹然無財利聲色之慕。儻網羅不倦。萬卷豈足道哉。予聞是樓南則道人三峯。北則石鼓山。東南則白渚山。煙嵐雲岫。洲渚林薄。更相映發。朝暮萬態。公不以登覽之勝名之。而獨以藏書見志。記亦詳於此。略於彼者。蓋朱公本志也。嘉定元年秋七月甲子記。

卷二十一

銘七首

梅子真泉銘

距會稽城東北七里。有山曰梅山。山之麓有泉。曰子真泉。遊者或疑焉。智者及道人求笠澤漁父爲之銘。銘曰。梅公之去漢。猶鴟夷子之去越也。變姓名。棄妻子。舟車所通。何所不閱。彼吳市門人。偶傳之。而作史者。因著其說。儻信吳市而疑斯山。不幾乎執一而廢百。梅公之去。如懷安於一方。則是以頸血丹莽之斧鉞也。山麓之泉。甘寒澄澈。珠琲玉雪。與子徊徘徊。酌泉飲之。亦足以盡公之高。而歎其決也。

司馬溫公布被銘

公孫丞相布被。人曰詐。司馬丞相亦布被。人曰儉。布被可能也。使人曰儉不曰詐。不能也。此銘予二十歲時作。今傳以爲秦少游非也。

金崖硯銘

我遊三峽。得硯南浦。西窮梁益。東掠吳楚。揮灑淋漓。鬼神風雨。百世之下。莫予敢侮。

延平硯銘

延平雙龍去無迹。收斂光氣鍾之石。聲如浮磬色蒼璧。予文日衰愧匪敵。

蠻谿硯銘

斯石也。出於漢嘉之蠻谿。蓋夷人佩刀之礪也。琢於山陰之錢湖。則放翁筆墨之瑞也。質如玉。文如穀。則駭龍尾之羣從。而溜韞玉之仲季也。

錢侍郎海山硯銘

雲濤三山。飾此怪珍。誰其寶之。天子侍臣。煌煌繡衣。福我遠民。一字落紙。活億萬人。勿謂器小。其重千鈞。從公邁歸。四海皆春。

桑澤卿磚硯銘

古名硯以瓦。今名硯以甌。瓦以利於用。甌以全其天。甌乎甌乎。寧用之鈍而保其全乎。尙無媿之。日陳於前。放翁銘桑澤卿磚硯。紹熙二年六月九日。老學庵書。

贊二十四首

崔伯易畫像贊

崔公名公度。字伯易。高郵人。劉相沆舉賢良方正。不赴。以任爲三班。使韓魏公薦之。詔易文資爲國子監直學。亦辭。元祐中。再召爲郎。又皆固辭。補外郎。諸公力白於朝。強起爲國子司業。訖不肯。復出爲郡。以起居郎祕書少監召。亦不肯起。紹聖中。復以爲祕書少監。辭如初。遂請宮觀。尋致仕。予喜其白首一節。乃求畫像於高郵。而爲贊曰。

古之君子。學以爲己。可行則行。可止則止。任以行義。止以遠恥。世衰道微。豈復知此。蚩蚩始學。青紫思拾。萬馬竝

馳。孰能獨立。始雖弗急。後亦汲汲。我思崔公。憐泗橫集。

東坡像贊

我遊鈞天。帝之所都。是老先生。玉色敷腴。顧我而歎。閱世垢濁。笑謂侍仙。昇以靈藥。稽首徑歸。萬里天風。碧山蟻然。月墮江空。

王仲信畫水石贊

亡友王仲信。爲予作水石一壁。仲信下世二十年。乃爲之贊。恨仲信之不及見也。其詞曰。

導江三峽。神禹之蹟。王子寫之。洵洵撼壁。後三十年。塵暗苔蝕。瘡墨色之欲盡。尙觀者之慘慄。或曰。是學蜀兩孫者非邪。放翁曰。吾但見其有歐陽信本柳誠懸之筆力也。

鍾離真人贊

五季之亂。方酣於兵。叱嗟風雲。卓乎人英。功雖不成。氣則莫奪。煌煌金丹。粃糠陶葛。

呂真人贊

一粒之粟。有國有民。二升之釜。浩渺嶙峋。我遊巴陵。始識公面。青蛇鏗然。求之不見。

又

天下家家畫呂公。衣冠顏鬢了無同。勸君莫被丹青誤。那有長繩可繫風。

僧師源畫觀音贊

三世如來同一闕。大士亦作補陀夢。佛子無財可修供。尺紙寸毫俱妙用。寶纓天冠儼四衆。長年造極筆愈縱。唯師魯公爲作頌。十方世界俱震動。

宏智禪師真贊

死諸葛。走生仲達。死姚崇。賣生張說。看渠臨了一著子。諸方倒退三十里。

大慧禪師真贊 爲認覺文老作

平生嫌遮老子。說法口巴巴地。若是靈利阿師。參取畫底妙喜。

己庵禪師真贊 爲虞長老作

灑灑落落五十年。一句不說祖師禪。妙喜堂中正法眼。等閒滅在瞎驢邊。

塗毒策禪師真贊

骨相環奇。風神蕭散。貌肅而和。語盡而簡。畫得者英氣逼人。畫不得者頂門上一隻眼。

又

塗毒不自讚。留待三山老。試問脚上人。讚好莫讚好。海中忽起劫初風。北斗柄折須彌倒。

佛照禪師真贊

名勳三朝。話行四海。撒手歸來。雲山不改。人言大覺同龕。師云老僧掩彩。

大洪禪師贊

髮長無心剃。衣破無心補。大洪山上有賊。大洪山下有虎。非但白刃殺盡兒孫。更能一口吞卻佛祖。

中巖圓老像贊

我遊中巖。拜師於牀。巍巍堂堂。鳳舉龍驤。公住無爲。訪我成都。雄辯縱橫。玉色敷腴。別未十日。梁木告摧。我如飛蓬。萬里南來。孰謂窮山。乃瞻儀形。牆壁說法。況此丹青。

奉聖淳山主年八十有四放翁爲作真贊

兩住名山一老禪。目光如電照人天。行藏不用占蓍草。卦氣全來二十年。

芋庵宗慧禪師真贊

煨懶殘芋。打塗毒鼓。舌本雷霆。毫端風雨。

廣慧法師贊

東土震旦。西方極樂。一納草鞋。到處行脚。

敷淨人求僧贊

光雍頭。淨洗鉢。頭頭拈起頭頭活。有時與。有時奪。受用現前活鱗鱗。敷道者。一短褐。欠箇什麼。更要惡水潑。將錯

就錯也不妨。只在檀那輕手撥。道數淨人求伽陀。見施主郭買度牒。爲說此微語。嘉泰辛酉四月十日。放翁書。

錢道人贊

柈欄冠。青芒屨。上天下天不騎鶴。喚作神仙渠不肯。道是凡人我又錯。會稽城中且賣藥。

放翁自贊

遺物以貴吾身。棄智以全吾真。劍外江南。飄然幅巾。野鶴瀉九天之風。澗松傲萬木之春。或以爲跌宕湖海之士。或以爲枯槁隴畝之民。二者之論雖不同。而不我知則均也。淳熙庚子。務觀自贊。時在臨川。年五十有六。

又

名動高皇。語觸秦檜。身老空山。文傳海外。五十年間。死盡流輩。老子無才。山僧不會。

又

皮葛其衣。巢穴其居。烹不糝之藜藿。駕秃尾之草豨。聞雞而起。則和寧減之牛歌。戴星而耕。則稽汜勝之農書。謂之瘁則若陳。謂之澤則若癯。雖不能草泥金之檢。以紀治功。其亦可挾兔園之冊。以教鄉閭者乎。周彥文令畫工爲放翁寫真。且來求贊。時年八十。

又

進無以顯於時。退不能隱於酒。事刀筆不如小吏。把鋤犁不如健婦。或問陳子何取而肖其像。曰。是翁也。腹容王導輩數百。胸吞雲夢者八九也。陳伯予命書。工爲放翁記顏。且屬作詩。時開禧丁卯。翁年八十三。

記事一首

記太子親王尹京故事

隋齊王暕。尹河南。唐秦公世民。尹京兆。衛王重俊。爲洛州牧。皆親王。尹京故事也。然尙未甚以爲重。後唐秦王從榮。以長子爲河南尹。又爲天下兵馬大元帥。故當時遂以尹京爲儲貳之位。至晉天福中。鄭王重貴。周廣順中。晉王榮。皆尹開封。用秦王故事也。國朝太祖皇帝建隆二年七月。以太宗皇帝爲開封尹。開寶末。太宗嗣位。纔八日。

即以齊王廷美爲開封尹。後封秦王太平興國七年秦王出爲西京留守。自是開封不置尹。止命近臣權知府而已。權知府自李符始。雍熙二年始以陳元僖爲開封尹。蓋是時太宗元子楚王元佐被疾廢。則陳王亦儲君也。淳化三年薨。後二年真宗皇帝自襄王爲開封尹。後封壽王。至道元年正東宮。議者謂尹有品秩。非太子所宜兼領。乃改判府事。自後唐以來。雖以尹京陰爲儲副之位。然皆藩王。以太子判京府。則自至道始也。故事。開封尹之上有牧。雖具員。而初未嘗置。國朝惟親王乃除。尹餘但爲權知府事。自太祖至徽宗八朝。百七十年。未嘗改。蔡京爲相。始建議置尹。尹非獨故事須親王乃除。又太宗真宗潛藩所領。人臣所宜避。天下皆罪京之不學。其後宣和未。欽宗皇帝自東宮爲開封牧。是時已有尹。尹之上惟有牧。故以命之。然牧故事序位在太子少保之下。御史大夫六曹尙書之上。亦非太子所宜兼。蓋有司失考。至道判府之制也。尹之下。故事有少尹。位在少府將作少監之下。太子少詹事之上。後唐秦王時。嘗以劉陟爲之。而建隆以來。率不置。惟置判官推官各一員或二員。通掌府事。竝以常參官充。親王爲尹。則判官以給諫充。今大中大夫以上。推官差降焉。真宗爲尹時。判官二員。推官三員。蓋特置也。或問太宗以來。尹京則謂之南衙。何也。曰。開封府治所。本在正陽門南街東。然太宗爲尹。乃就晉邸視事。晉邸又在內及府治之南。故曰南衙。亦曰南宮。秦王許王因之。及真宗爲尹。太宗以秦王許王皆不利。始命遷就府治焉。

## 卷二十二

### 傳二首

#### 姚平仲小傳

姚平仲。字希墨。世爲西陲大將。幼孤。從父古養爲子。年十八。與夏人戰。滅底河。斬獲甚衆。賊莫能枝梧。宣撫使童貫召與語。平仲負氣不少屈。貫不悅。抑其賞。然關中豪傑皆推之。號小太尉。睦州盜起。徽宗遣貫討賊。貫雖惡平仲。心服其沉勇。復取以行。及賊平。平仲功冠軍。乃見貫曰。平仲不願得賞。願一見上耳。貫愈忌之。他將王淵。劉光世。皆得召見。平仲獨不與。欽宗在東宮。知其名。及卽位。金人入寇。都城受圍。平仲適在京師。得召對福寧殿。厚賜



金帛許以殊賞。於是平仲請出死士，斫營擒虜帥以獻。及出，連破兩寨，而虜已夜徙去。平仲功不成，遂乘青驃亡命。一晝夜馳七百五十里，抵鄧州，始得食。入武關，至長安，欲隱華山，顧以爲淺。奔蜀，至青城山上清宮，人莫識也。留一日，復入大面山，行二百七十餘里，度采藥者莫能至，乃解縱所乘驃，得石穴以居。朝廷數下詔物色求之，弗得也。乾道淳熙之間始出。至丈人觀道院，自言如此。時年八十餘，紫髯鬢然，長數尺，面奕奕有光，行不擇崖壑荆棘，其速若奔馬。亦時爲人作草書，頗奇偉，然祕不言得道之由云。

## 族叔父元燾傳

族叔父元燾，名燾，一字居安。自山陰徙家餘姚，性恭謹純厚，閉門力學，不安與人交，尤好樂律。每言樂所以成人，才今世所用皆胡部，雖鄭衛亦不得聞，况韶濩乎？因考按古關雉鹿鳴諸詩，抑揚皆合音律。時時自歌之，中正簡古，聞者興起，欲上書請用之。鄉飲酒，嘗疾酒不果，所居瀕江，一室蕭然，數十年間，几席書冊琴樽之屬，皆未嘗易。好飲酒，然不肯自釀，或餽以宰所醢，亦辭不取，曰：「法不可也。」其謹如此。有子洙，登進士第，爲鹽官尉，迎養官舍。明年，洙卒，元燾護其喪歸，亦能自釋，久之以疾卒。年七十，與元燾同時有鄭從革者，名鼎之，丹徒人，自三舍法行，已在鄉校，能自刻苦，口誦手鈔，日常義數人，然試有司，輒黜。從革亦不以黜故少怠，終始如一日。事父篤孝，建炎中，客山陰，遇寇，從革欲奉父避之，父不聽。從革乃東帶立牀前，鬻糜粥，奉湯液，悉如平時。寇至，則迎門拜泣曰：「父老不能去，惟哀憐之，寇爲感動，乃畧其門，使其屬勿犯。」終亂定，父子俱得全。年六十餘，貧益苦，比卒，衣衾不能具，而一鄉皆推其賢云。

## 陳氏老傳

會稽五雲鄉陳氏老，年近八十，生三子，有孫數人，皆業農。淮力耕致給足，凡兼井之事，抵實賣販以取贏者，一切不爲。耕桑之外，惟漁樵畜牧而已。子孫但略使識字，不許讀書爲士。婚姻悉取農家，非其類皆拒，不與通室廬。不妄增一椽，器用皆朴質堅壯，不加漆飾。衣惟布襦，取適寒暑之宜。行之四五十年如一日。子孫亦皆化之，無違。陳氏所居，在刺唐山下，地名曰南溪。三陸子曰：「予嘗悲士之仕者，若苟名位而已，則爲負國，必無負焉，則危身害家，憂其父母，有所不免。耕稼之業，一捨而去之，復其故甚難，予先世本魯墟農家，自祥符間去而仕，今且二百年，

窮通顯晦所不論。竟無一人得歸故業者。室蠹桑床梁榭溝池之屬。悉已蕪沒。族黨散徙四方。蓋有不知所之者。過魯墟。未嘗不太息興懷。至於流涕也。聞陳氏事。因爲述其梗概傳之。庶觀者有感焉。

### 青詞六首

#### 紹興府衆會黃籙青詞

上帝福善禍淫。雖各繇於類應。大道回骸起死。或俯徇於哀祈。敢露忱詞。仰下聰鑒。伏念臣等所居紹興府。地連三輔。人雜五方。任職居官。當閭閻之太半。鮮交笑食。昧稼穡之所從。習俗莫遷。神明積譴。方凶饑之薦至。加疫癘之相乘。疾痛呻吟。未及三醫之謁。烈蒿悽愴。已悲萬鬼之鄰。念升濟之無方。敢號呼而有請。伏望少回洪造。一洗衆辜。逝者脫泉路之冥冥。生者安王民之皞皞。天職生靈。地職形載。敢忘夙夜之歸。冬無愆陽。夏無伏陰。永冀生成之賜。

#### 江西祈雨青詞

天惟至仁。久寬水旱之譴。史實有罪。仰累陰陽之和。旣閱雨之歷時。敢叩閭而請命。伏念臣濫膺上指。出使近畿。深惟冥頑固陋之資。莫副惻怛丁寧之訓。徒積勤於夙夜。冀無負於幽明。然而風采不足。以擊服豪強。惠愛不足以撫綏鰥寡。政踰愒日。田疇曠陂澤之修。訟積淹時。囹圄困朽楊之繫。務均力役。而或蔽於所見。思廣賑恤。而或緣以爲奸。旣莫致於善祥。懼卒罹於饑饉。是用諏辰之吉。稽首以陳。伏望推善貸之慈。霈曲成之惠。雖有司曠職。宜伏雷霆之誅。然比屋何辜。流爲溝壑之瘠。若復未回於洪造。遂將絕望於有秋。敢殫皇皇哀迫之誠。冒貢懇懇吁嗟之禱。庶格九霄之澤。少紓一道之憂。稼穡順成。儻僅蒙於中熟。里閭疾苦。誓靡壅於上聞。

#### 謝雨青詞

旱大甚以是虞。不遑啓處。天蓋高而可叩。思罄精誠。方祇被於齋場。已亟霑於膏澤。尙懼豐凶之未決。敢忘祈報之交修。仰企叢霄。少回冲馭。伏願哀黎民之匱食。宥衆吏之瘵官。申救有神。更終大惠。一穀不升。謂曠。豈勝夙夜之憂。三日以往爲霖。實賴乾坤之造。

嚴州祈雨青詞

歲律肇新。農功伊始。居者慮陰淫陽伏之寇。耕者懷旱乾水溢之虞。仰惟上穹。職是元化。俯遂羣黎之育。式均六氣之平。敢卽熙壇。恭陳薄薦。所冀歲豐民樂。寬九重宵旰之憂。賦足刑清。遣衆吏簡書之責。敢忘惕勵。仰對生成。

謝雨青詞

天九關之在上。精誠可以徹聞。兩三日而成霖。枯槁爲之盡起。恭陳薄薦。冒貢丹衷。伏念臣領此偏州。迄今累月。上無以布宣寬大。而道屯膏之咎。下不能撫摩凋瘵。而格解澤之施。踟躕靡遑。吁嗟上訴。敢謂叢霄之應。曾無披日之淹。月離畢以示期。山出雲而效職。風霆下擊。澗壑交流。井汲如初。家享一瓢之樂。粟儲可繼。土寬半菽之憂。商旅通行。道途鼓舞。彼有遺秉。此有滯穗。方將均惠於憚瘡。冬無愆陽。夏無伏陰。更冀默消於疾癘。敢忘兢惕。仰對生成。

保安青詞

道垂光而下濟。罔不興慈。情至敬則無文。惟當直訴。伏念臣少多罪垢。晚乏功能。寓形寢迫於九齡。定著遂階於四品。先世被追榮之典。已冠三孤。諸兒荷延賞之恩。例霑寸祿。首座滿盈之久。自挺災釁之來。時涉夏秋。疾生經絡。有藥必試。靡神不祈。呻吟之聲。晨暮不絕。惟歸誠於洪造。或少追於往愆。么然微衷。亟以自列。伏望曲回聽聽。俯佑殘軀。俾耄及之餘生。獲奠居於故社。耕桑安樂。父子團樂。天實無私。敢汲汲希望外之福。人誰不死。願熙熙須數盡之期。

疏二十一首

天申節樞密院開啓道場疏

得道者上爲皇。啓帝圖之廣大。有德者得其壽。當化日之舒長。率籲衆情。虔伸善祝。光堯壽聖。太上皇帝。伏願三靈介祉。九廟儲休。無黃屋之心。雖退藏於黜默。如南山之壽。冀茂對於天祺。

滿散道場疏

惟天其申命用休。誕御無疆之曆。有德者必得其壽。共輸歸美之誠。敢叩梵宮。仰申善頌。光堯壽聖太上皇帝陛下。伏願頤神物外。布澤寰中。福祿萬年。丕介鴈鳩之祉。本支百世。永奉詒燕之謀。

天申節功德疏

得吾道而上爲皇。算自齊於箕翼。有天下而傳之子。福方寢於華夷。敢因震風之期。申致延鳩之祝。恭惟光堯壽聖太上皇帝陛下。聰明時憲。清淨無爲。黃屋非心。共仰堯仁之大。玉卮爲壽。益瞻漢殿之尊。光堯壽聖太上皇帝。恭願茂對昌辰。丕承景貺。以聖傳聖。增光奕世之休。爲天中天。永享萬方之奉。

又

得道上爲皇。誕受泰元之冊。重華協於帝。光臨孝治之朝。敢殫向日之誠。仰祝後天之算。尊號陛下。恭願又新湯德。丕顯文謨。日舒以長。燕處益探於衆妙。道冲而用。陰功廣被於羣生。

瑞慶節功德疏七

有開必先。天地肇開於景運。無遠弗届。華夷畢效於貢珍。矧備邇聯。敢稽壽祝。皇帝陛下。伏願誕膺戩穀。端拱穆清。以八千歲而爲春。永御舒長之景。卜七百年而過曆。用符愛戴之誠。

又

誕彌厥月。丕昭震風之期。長發其祥。共致鴈鳩之祝。皇帝陛下。恭願後天難老。如日正中。紹十二聖之睿謨。開三百年之景運。金泥玉檢。肇修稀闊之儀。楷矢石磬。永享貢輸之盛。

又

叨榮禁路。千齡獲遇於聖明。歸老故山。一飯敢忘於君父。敬修梵供。仰祝堯年。皇帝陛下。恭願光照大千。壽踰時萬。繼統燕無爲之治。御邦躋有道之長。上際下蟠。永享化國舒長之日。東封西祀。嗣修太平稀闊之儀。

又

節紀千秋。寶踵開元之盛。神呼萬歲。滄膺滿嶽之祥。願雖遐迹於丘園。敢愈馳誠於軒陛。皇帝陛下。伏願道極高而蟠厚。治咸五而登三。碣石河源。盡復輿圖之舊。泰山梁甫。嗣修檢玉之儀。

又  
惟皇之極。欣逢熙洽之辰。於萬斯年。共效鴈鴻之祝。敢趨淨域。薦控丹衷。皇帝陛下。伏願允叶帝心。誕膺神策。化東漸而西被。功上際而下蟠。降德於衆兆民。坐致唐虞之治。上瑞至千百所。永符箕翼之祥。

又  
聖恩念舊。猶叨四品之崇。景運開先。敢後萬年之祝。皇帝陛下。恭願當守撫盈成之業。垂衣紹積累之休。朔易南訛。綿鋤擾於率土。東漸西被。會玉帛於中朝。

又  
恩霑遺老。幸聯上雍之班。身遇明時。敢後祝禋之請。皇帝陛下。恭願乾端廣大。日轂正中。髦鬻奉九譯之琛。農扈告三登之候。應帝王之運。故聰明睿智。足以有臨。集天地之祥。皆算數譬喻所不能及。

祈雨疏  
九秋伊始。百穀將登。念零雨之稍愆。率臯情而致禱。仰惟慈蔭。曲鑒丹誠。三日爲霖。俯慰雲霓之望。大田多稼。上寬宵旰之憂。

謝雨疏  
諸佛願心。本常存於澤物。衆生業果。或自召於凶年。民愚無良。吏惰不職。駭驕陽之作害。閔零雨之弗時。內罄寸誠。方吁嗟而仰禱。起瞻四野。已枯槁之一蘇。自惟莫格於太和。乃至上勤於慧力。敢忘祇報。用答鴻慈。

道宣謝雨疏  
上帝至仁。本不忘於澤物。下民胡罪。幾坐致於凶年。由官吏之情偷。致政刑之疵癘。驕陽作害。零雨弗時。內罄寸誠。方吁嗟而仰禱。起瞻四野。已枯槁之盡蘇。自惟莫格於太和。迺至輒干於鳩造。敢忘祇報。用答好生。

嚴州祈雨疏

又  
倬彼雲漢。尙愆霖雨之期。害於塗盛。俯劇淵冰之懼。敢輸丹悃。仰叩真(或覺)慈。冀占離畢之祥。少道屯膏之咎。

又

時雨少愆。上勞宵旰。詔音亟下。恭致禱祈。敢冀覺慈。(或供思)誕敷惠澤。

又

龜占墨而尙違。凜有屯膏之懼。龍蟠泥而未舉。方繫解澤之施。冀軫(或鴻)慈。曲成樂歲。俯慰闔境雲霓之望。上寬淵衷宵旰之憂。

嚴州施大斛疏

早魃爲虐。念莫釋於衆憂。飯香普熏。敢恭陳於淨供。伏願雲從龍而效職。月離畢以告祥。解澤亟行。屯膏一洗。如來施無量食。旣靡間於聖凡。史臣書大有年。庶上寬於宵旰。

嚴州謝雨疏

時雨愆期。方軫焦勞之慮。天心(或佛慈)從欲。遽蒙霑澤之施。敢擇良辰。敬伸昭報。

嚴州謝雪疏

萬邦屢豐。幸際中天之熙運。平地尺雪。驚爲嗣歲之嘉祥。敢忘淨供(或薄薦)之修。(或陳)少誠覺慈(或叢霄)之貺。尙祈垂佑(或供造)益介純禧。

嚴州久雪祈晴疏

時雪屢應。已占嗣歲之登。春氣未和。寧免祈寒之怨。敢趨祕(或梵)宇。仰叩真(或覺)慈。冀日麗於層霄。俾民安於比屋。上寬旰食。俯慰輿情。

## 卷二十四

### 疏二十九首

法雲寺建觀音藏殿疏

補落伽之道場。蕪蕪已久。修多羅之妙典。函匱僅存。先師每志於經營。四衆亦思於協助。天時默定。佛事將成。伏望巨公大人。居士長者。深戒著鞭之後。共合浮圖之尖。庶得萬瓦鱗差。修梁虹舉。紺容輝日。梵唄陵雲。結難值之

勝因作無窮之壯觀。

開元寺重建三門疏

巍然古剎。實居大府之喉衿。卓爾高閣。復爲一寺之眉目。歷數百載。極祇園之盛。乃七十年。猶劫火之殘。伏望大發積藏。亟成鉅麗。粲粲丹於久廢。偉扁榜之一新。雨霽塵清。碧瓦勢凌於霄漢。霧開日出。金鋪光射於康莊。還壯觀於承平。垂美名於不朽。

安隱寺修鐘樓疏

金鐘大鑪。蓋以聲爲佛事。雄樓傑閣。宛在水之中央。歷歲既深。須人乃復。敢徧投於信士。祈同結於勝緣。浮翠流丹。儻復還於鉅麗。撞昏擊曉。實大警於沉冥。

重修光孝觀疏

天覆地載之間。斂喙皆由於道蔭。跂行喙息之類。涵濡悉荷於國恩。豈獨忠義之心。人人具有。抑亦生成之賜。物物皆同。永惟光孝之道場。實薦徽皇之懿御。神祠佛剎。尙營繕之相望。琳館珍臺。豈修崇之可後。某等叨恩冠褐。忝職宮庭。敢忘夙夜之勤。冀復規模之舊。既俟先朝之遺迹。遂新大府之榮觀。

圓通寺建僧堂疏

如來香飯。取時已遣化人。開士鉢單。展處又須得所。營茲華屋。延我勝流。念非極棟宇之功。何以稱龍象之衆。木魚哮吼。千僧閣也在下風。露柱證明。九梁屋直須退步。

重建大善寺疏

劫火之壞。大千雖云有數。長者之施。億萬要豈無時。儻阿練若獲了大緣。則窳堵波亦還舊觀。可謂非常之舉。惟須不退之心。

道像五藏疏

道雖與貌。固非耳目口鼻之施。天本無心。尙何肝膽肺腸之有。既云肖像。蓋亦同人。願共發於信心。不須疑著。庶亟成於盛事。垂示無窮。

鷲峯寺重建三門疏

建寺年深。築門役鉅。雖不下禪牀相接。用此何爲。然倒騎佛殿出來。少它不得。伏望念古阿蘭若之勝地。結檀波羅密之大緣。或備土木甄斲之材。或施勦聖採丹之費。初發心處。已有諸聖證明。一落筆時。自然大地震動。

重修大慶寺疏

佛出本爲一大緣。初無差別。越城昔有大尼寺。五已丘墟。惟大慶之名藍。實故唐之遺址。茲蒙賢牧。命復舊規。方廣募於衆財。冀亟成於偉觀。魔王魔民魔女。盡空蜂蟻之區。法鼓法炬法幢。一新龍象之衆。儻承金諾。敢請冰銜。

福州請仁王堅老疏

勇退急流。雖具衲子參尋之眼。旁觀袖手。要非邦人嚮慕之誠。爰擇名藍。往迎高士。某人芙蓉正派。真歇諸孫。默觀已得於本心。自重每輕於外物。不合則去。蹈儒士之難能。知我者希。得老氏之所貴。付越山於昨夢。聽石嶺之儻來。野鶴溪雲。豈有去留之迹。齋魚粥鼓。一隨宿昔之緣。

福州請九峯圖老疏

鬧籃裏入頭。不妨奇特。懸崖邊撒手。只要承當。須遇作家。方了此事。某人參臨濟正法眼。得補陀大辯才。雖則跛跛挈挈走諸方。不認昭昭靈靈作自己。伏請如雲出岫。似月印潭。放下鉢袋衣囊。打起齋魚粥鼓。直到佛祖不知處。猶是半途。且向父母未生前。試道一句。

福州請聖泉穎老疏

少室玄機。陽岐正脈。最端的處。只要言下承當。有多少人。盡向面前踉過。某人談鋒峻峭。心地圓明。當初向竹篋子頭。偶然築著磕著。而今踞寶華王座。選甚胡來漢來。便須拈起鉗鎚。打開窠臼。以鐵酸醱。普供大衆。與木上座同演宗風。鐘鼓鏗鐺。旛幢炳煥。豈惟流輩。知不由兔徑之高。要使師翁。發撞破煙樓之歎。

能仁請昕老疏

視世如葶摩勒果。雖外物之本輕。說法如優曇鉢華。要應時而出現。久已名行於海內。豈容身隱於雲根。敬虛金布之圍。往致空飛之錫。某人材高龍象。辯震雷霆。潛闕嶺者十年。遇寒巖而一笑。始初歎賞。明窗下特地安排。最



後慙慙鉢侖子親自分付。幸念先師之遺語。亟爲故人而遠來。要傳無盡燈。當觀第一義。

雍熙請最老疏

山陰道中萬壑水。依舊潺湲。雲門寺裏一爐香。久成寂寞。忽於旁邑。得此高人。某人立雪飽參。隔江大悟。通威音以前消息。躡毗盧向上機關。血指汗顏。諸方不供一笑。搏風擊水。萬里始自今朝。豈惟續且庵家傳。更喜得可齊道伴。

鄉士請妙相講主疏

雜華設教。猶日照山。大士應緣。如雲出岫。某人英姿邁往。雋辯絕倫。早集布金之園。久造笑雲之室。伏望俯從衆志。來繼道場。且要於談笑間。取上方香積之飯。然後以神通力。成夜摩觀史之宮。

千秋觀修造疏

一曲澄湖。千秋古觀。瓊樓玉宇。正須月斧之修。蕊笈琅函。未極雲章之奉。至於傑閣羣飛於天半。長橋虹臥於波心。皆擬繕營。用成絕勝。況丞相肇新於真館。與邦人仰禱於帝齡。覆載之間。共陶化日。髮膚之外。皆是聖恩。願垂不朽之名。更效無疆之祝。

光孝請廓老疏

孤峯頂上。一口吞三世如來。七里瀨邊。隻手接十方衲子。既是隨緣自在。便須信手承當。某人號真作家。有大力量。拈起拂子。且與陸大夫同舉宗風。放下鉢囊。不妨陳尊宿暫爲鄰舍。

雍熙請機老疏

諸方到處。只解抱不哭孩兒。好漢出來。須會打無麵粥。舉起一枝拂子。勘破四海禪和。某人心地坦然。談鋒備甚。最初遊歷。倒卻門前刹竿。末後承當。分付先師鉢袋。十年涵養。一旦闡揚。請木上座作先馳。拈鐵酸礮施大衆。鯨鐘鼉鼓。無非塗毒家風。蘿月谿雲。盡是放翁供養。

雍熙請錫老疏

瞿唐峽。激瀨堆。萬里不生寸草。若耶谿。雲門寺。三人卽是叢林。要看雲居錫上座。點檢諸方。須與宣城陸大人。激

揭此事某人得來孤峻。用處縱橫。魏巍堂堂。灑灑落落。半月崑戴起管子。好泉亭脫下草鞋。水宿山行。平日只成露布。刀耕火種。從今別是生涯。

求僧疏

掀禪牀。拗拄杖。雖屬具眼厮兒。搭袈裟。展鉢盂。卻要護身符子。伏望尊官長者。達士通人。共燃續慧命燈。不惜判虛空筆。起難遭想。結最勝緣。向僧堂前喝參。幸離俗諦。以比丘身得度。敢負厚恩。

又

佛有八萬四千法門。出家最勝。僧受二百五十戒。利物無邊。方今雲門諸山。莫如淨智一境。必度僂鑿塞。俾成比丘僧。魏巍堂堂。聿觀龍象之衆。雍雍肅肅。不媿旃檀之林。儻許結緣。願垂淑筆。

紫霄宮女童徐居慶求披戴疏

雲山棲隱。雖從金門羽客之遊。冠珮焚修。尙欠白水真人之力。敢輸微懇。仰叩高闕。伏望推博施之心。植衆妙之本。仙槎乞得支機石。既遇有緣。天風飄下步虛聲。是爲報德。

成都大聖慈寺念經院僧法慧爲行者雷印定求度牒疏

拈華會上。正法眼雖是自明。剡草殿前。護身符少伊不得。故鄉踰八千里路。空手要七十萬錢。欲辦大緣。莫嫌俗氣。從此鉢盂兩度溼。受賜不貲。忽然平地一聲雷。酬恩有在。

雍熙請倫老疏

脩竹茂林。久作蘭亭之客。青鞵布襪。忽尋秦望之盟。此有宿因。寧容力避。某人渡河香象。跋浪長鯨。初得好於室中。耳聾三日。晚抽身於林下。壁觀九年。道價雖高。世緣未契。方公言之共歎。亦勝地之將興。百草頭祖師。本來知見。一毫端寶刹。今日神通。但辦肯心。必無難事。

梁氏子求僧疏

名家有千里駒。本意折一枝桂。忽厭魯章甫。擬著僧伽黎。可謂人英。堪承佛種。長者若能成就。放翁爲作證明。

孫餘慶求披戴疏

孤雲野鶴。山林自屬閑身。布襪青鞵。巾褐本來外物。伏念心久游於塵外。迹尙寄於人間。傳翁雖然頭戴道冠。王恭終要身披鶴氅。直須白水真人力。共了青谿道士緣。

陶山菴行者求化度牒疏

昔於如來所發心。蓋非一世。今以比丘身得度。夫豈小緣。況貞白先生昇僊之區。寶文昌左轄植福之地。遍投信施。庶獲圓成。七條九條二十五條。儻無魔障。一佛二佛百千億佛。當共證明。

傅妙穌求僧疏

四十劫前記作佛。已定出家。百尺竿頭坐底人。正須進步。茲迷悽悽之請。敬趨赫赫之門。伏望王公大臣。長者居士。揮雲煙於紙上。運財寶於庫中。出現優鉢曇花。成就僧伽黎相。十方諸佛同聲讚。可謂勝緣。一日鉢孟兩度開。敢忘大施。

葉可忻求僧疏

七寶布施作福。止屬有爲。一人發心歸源。方名大事。非賴賢豪之助。曷弘清淨之緣。所冀見聞。各懷喜捨。續佛壽命。成茲芻不壞之身。爲國焚修。效芥石無疆之祝。

祝文二十三首

鎮江謁諸廟文

某以隆興改元夏五月癸巳。自西府掾出佐京口。明年春二月己卯至郡。洪惟上恩。不可量數。敢不夙夜祗惕。圖稱所蒙。區區之心。神其監之。

祭富池神文

某去國八年。孀家萬里。徒慕古人之大節。每遭天下之至窮。登攔江山。徘徊祠宇。九原孰起。孤悌無從。雖薄奠之不豐。冀英魂之來舉。

稻建謁諸廟文

某聞聰明正直。神之所以爲神也。靖共爾位。好是正直。吏之所以事神也。一戾於此。神且殛之。其何福之敢望。某蒙恩出使一道。告至之始。祇慄於祠下。

福州城隍昭利東嶽廟祈雨文代

閩之風俗。祭祀報祈。比他郡國最謹。以故祠廟之盛。甲於四方。斧斤丹堊。靡有遺巧。重門傑閣。煥然相望。則神之所以福其人者。亦宜與他郡國異。而自夏訖秋。驕陽爲害。水泉淺涸。草木焦卷。多稼彌野。將茂而槁。夫幽顯之際。雖遠。然豈有享其奉而不恤其害者。惟神聰明。宜動心焉。

福州謝雨文代

吏受命天子。牧養百姓。神受命上帝。保衛一方。其責則均。然而祠宇貌像。孰與府寺之雄。犧牲醪幣。孰與廩餼之厚。巫覡尸祝。孰與官屬之盛。吏情政紀。無以格豐年之祥。不自責而望神。宜拒而弗享矣。區區之禱。曾未信宿。雲與東山之麓。雨被千里之內。雷發而不怒。風行而不疾。祁祁霖霖。如哺如乳。起視四野。莫不露足。愁歎之聲。變爲歡謠。嗚呼。吏之愧於神多矣。酒冽牲肥。樂歌送迎。匪報也。以識吏之愧也。

福州準赦禱諸廟文代

乙未。詔書慈寧殿服藥。數大宥於四方。分命郡國。禱山川神示之在典祀者。惟神受職。欽承上意。

福州歐冶池龍輝谿河口五龍廟祈雨祝文代

繚垣闕宇。蓄水灌木。竊然而幽陰者。龍之神也。升天御雲。濟世澤物。霈然而成功者。龍之仁者也。聰明正直。有禱必應者。又其所以食於民也。歷時不雨。稟盛將害。則龍亦何心視民之窮。如越人之視秦也。變化呼吸。轉災爲豐。在龍之力。其易如指之屈伸也。犧牲醪幣。吏之所以報龍者。其敢怠而弗親也。

福州閩王闔忠懿王祈雨祝文代

維神之生。禦災捍患。有功德於此邦之人。沒而祀之。非獨父老子弟。不忘神之功德。意者神亦眷眷於此邦。沒而不已也。歷時不雨。稼穡將害。吏雖不言。神其忍安視弗拯邪。雖然。敢不以告。

嚴州謁諸廟文

新定爲郡。地陬民貧。而回祿漏夷。數見譴告。市邑蕭然。至今未復。某蒙恩來守是邦。宜知所報。如或黷貨以厲民。淫刑以飾怒。事燕遊以廢政。納請謁以撓法。是宜即罪於有神。死不敢悔。使其能蠱踐。今茲之言。則神亦宜哀矜之。調節雨暘。驅逐癘疫。使與吏民仰戴明神之休。牲酒鼓歌。以時來報。豈不幽顯各得其職哉。

謁大成殿文

某聞之夫子曰。言不忠信。行不篤敬。雖州里行乎哉。某家世山陰。被命來守。不三舍而至。殆與古之仕於其國者無以異。然一於忠敬有所不力。則吏與民且合其智詐澆悍以欺其守。豈不殆哉。視事之始。款謁先聖先師。非獨以令甲也。敢告夙夜祗懼之意。

謁社稷神文

某蒙上恩。來守新定。邦雖小。有社稷焉。其敢不恪以獲戾於神。敬以到郡之三日。周視壇壝。

嚴州秋祭祝文

秋有祀國之典也。筮日之良。爰舉祀事。牲酒樂歌。靡敢不勩。惟爾有神。來格來歆。惠我吏民。神亦永饗典祀。

嚴州祈雨祝文

新定爲郡。介於谿山之間。雨暘少愆。輒能病稼。戊申水溢。方禱於神。曾未再旬。復以旱告。吏政無以格陰陽之和。而惟神之溘。羣趨廟庭。僕僕亟拜。神固不以吏罪而棄斯民。吏獨無愧於神乎。尙力勵事以蓋茲媿。神其監臨之。

又

甲辰。詔旨以閔雨命郡守致禱。惟神受職。欽承上命。

又

某被命來守。幸及終更。不敢以去郡有期。愈荒厥事。屏逐暴吏。慰安疲民。請於幽明。儻道各責。而嘉穀方秀。時雨未渥。維神正直。宜監於茲。敢列忱辭。恭俟嘉祥。

嚴州馬目山祈雨祝文

維神有祠。茲山尙矣。唐刺史韓泰。以禱雨復舊。載新廟貌。今又四百餘年。而未列命祖。無以慰父老祝史之心。今

茲早夢已極。某謹也。蒙恩守得以專達於朝。敢與爾神期以三日。甘澤霑足。槁苗復與。當列奏乞封。以修神之威。願以守郡。不獲親行。謹遣功郎建德。縣主薄汪仲儀。即事祠下。而某帥郡僚。望拜於軍門。僣以俟命。

又

考於圖志。得神之威靈。而致禱焉。既累日矣。誠弗能格。誰間得小雨。地不及濡。塵不及斂。而赫日復出矣。然父老之言。以爲比夕雲物。多起神之祠傍。意者神哀憫斯民。終有以活之也。敢復以請。悽悽之誠。神尙鑒之。

嚴州祈晴祝文

兩勢未止。溪流暴溢。民廬官寺。倉庫獄戶。皆有意外之憂。惟神聰明。亟俾開霽。約束漲水。以時返壑。某與吏民。其敢忘報。

嚴州謝雪祝文

四時冬爲元英。閭里毋虞於癘疫。平地尺爲大雪。麥禾預卜於豐穰。敢忘薄薦之陳。少答明神之賜。尙祈孚佑。永安寧。

嚴州久雪祈晴祝文

雪雖嘉瑞。過則爲災。春氣未和。民屢告病。郡政乖刺。惟神之歸。尙祈與哀。以卒大賜。牲酒之報。其敢弗虔。

嚴州廣濟廟祈雨祝文

不雨且再旬矣。井泉涸竭。蔬菽告病。閭巷講於焚之備。郡庭決爭汲之訟。秋陽益熾。疾癘將作。吏雖愚。猶知恐懼。豈神之聰明而忘之乎。出雲興雨。以一洗之。神之德於斯民。豈有旣哉。

嚴州謝雨祝文

比承詔旨。致禱靈祠。果遂感通。沛然甘澤。敢涓吉日。祇報靈休。

嚴州戊申謝蠶麥祝文

乃者蠶老而未繭。麥秋而未穫。天作靈雨。將害於成。惟神降康。陰沴消弭。牲登於俎。酒湛於觴。維以薦誠。匪敢言報。

卷二十五

勸農文二首

夔州勸農文

仰惟天子臨遣牧守。每以務農勸課之指。丁寧訓敕。雖遐陬僻邑。如在畿甸。惟懼一穀之不登。一夫之失職也。峽中之郡。夔爲大。其於奉明詔。以倡屬郡。慰齊民者。尤不敢不勉。繼自今。不縱惰克。不長罷訟。不傷爾力。不奪爾時。爾父兄弟。其亦恭承天地惠澤。毋爲惰遊。毋怠東作。毋失收斂。毋嫚蓋藏。勤以殖產。儉以足用。有司與民。交致其愛。使公私之蓄。日以富饒。無貽朝廷宵旰之憂。豈不隳哉。

丁未嚴州勸農文

蓋聞農爲四民之本。食居八政之先。豐歉無常。當有儲蓄。吾民生逢聖世。百穀順成。仰事俯育。各遂其性。太守幸得以禮遜相與從事於此。故延見高年。勞勸勸課。致誠意以感衆心。非特應法令。爲文具而已。今茲土膏方動。東作維時。汝其語子若孫。無事末作。無好終訟。深陂廣耜。力耕疾耘。安豐年而憂歉歲。太守亦當寬期會。簡追胥。戒興作。節燕遊。與吾民共享無事之樂。而爲後日之備。豈不美哉。

戊申嚴州勸農文

蓋聞爲政之術。務農爲先。使衣食之屬充。則刑辟之自省。當職自蒙朝命。來剖郡符。雖誠心未格於豐穰。然拙政每存於撫字。觴酒豆肉。曷嘗妄蠹於邦財。銖漆寸絲。不敢輒營於私利。所冀追胥弗擾。墾闢以時。春耕夏耘。仰事俯育。服勞南畝。各終庶養之功。無犯有司。共樂舒長之日。今者土膏既動。櫛事將興。敢延見於耆年。用布宣於聖澤。清心省事。固守令之當爲。曠土游民。亦父兄之可恥。歸相告戒。恪務遵承。上以寬當守之深憂。下以成提封之美俗。

雜書十一首

書通鑑後

司馬丞相曰。天地所生。財貨百物。止有此數。不在民則在官。其說辯矣。理則不如是也。自古財貨不在民。又在官者。何可勝數。或在權臣。或在貴戚近習。或在強藩大將。或在兼并。或在老釋。方是時也。上則府庫殫乏。下則民力窮悴。自非治世。何代無之。若能盡去數者之弊。守之以悠久。持之以節儉。何止不加賦而上用足哉。雖捐賦以予民。吾知無不足之患矣。彼桑弘羊輩。何足以知之。然遂以爲無此理。則亦非也。

又

周世宗既服江南。諭使修守備。通鑑以爲近於大邦。畏其力。小邦懷其德。是比之文王也。方是時。世宗將有事於燕晉。其謀以爲若南方有變。雖不能爲大害。然北伐之師。勢亦不得不還。故先思有以安江南之心。又疲其力於大役。使不得動。比北伐成功。江南折簡可致矣。此世宗本謀也。遽謂之近於文王。豈不過哉。然世宗之謀。則誠奇謀也。蓋先取淮南。去腹心之患。不乘勝取吳。獨楚粵。而舉勝兵以取幽州。使幽州遂平。四方何足定哉。甫得三關。而以疾歸。則天也。其後中國先取蜀南粵。江南吳越太原。最後取幽州。則兵已弊於四方。而幽州之功卒不成。故雖得諸國。而中國之勢終弱。然後知世宗之本謀爲善也。

書賈充傳後

言一也。情則三也。其惟論兵乎。自古惟用兵最多。異論以其有是三者也。禍機亂萌。伏於隱微。人知兵之利。不知其害。有識者焉。逆見而力止之。王猛之於秦是也。投機之會。轉盼已移。而常人闇於事機。私憂過計。馮道之於周是也。猛固賢矣。道雖闇。猶有憂國之心焉。至於賈充。當晉武時。力沮伐吳之舉。至請斬張華。則何說哉。自漢之季。百數十年間。庸人習見。南北分裂。謂爲故常。赤壁之役。以魏武之雄。乘破竹之勢。而大敗塗地。終身不敢南鄉。充之心。蓋竊料吳未可下。因爲先事之言。以徼後日之福。而不料天下之遂一也。要之戰危事也。以舜爲君。禹出師不能一舉而定三苗。以唐太宗自將。李勣在行。不能遂平區區之高麗。故爲充之說者。常有利焉。此人臣之陰爲身計者。所以多出於此也。馮道不足言矣。王猛賈充之論。所謂差毫釐而謬千里者。可不察哉。

書郭崇韜傳後

後唐莊宗初得天下。欲立愛姬劉氏爲后。而韓夫人正室也。伊夫人位次在劉氏上。莊宗雖出夷狄。又承天下大



亂。禮樂崩壞之際。然顧典禮人情。亦難其事。未知所出。羣臣雖往往阿諛。亡學術。然亦無敢當其議者。豆盧革爲相。郭崇韜爲樞密使。崇韜功高迹危。思爲自安計。而革庸懦無所爲。惟諂崇韜以自安。因相與上章言劉氏當立。於是莊宗遂立劉氏爲后。劉氏既立。黷貨蠹政。殘賊忠良。天下遂大亂。莊宗以弑崩。李氏之子孫殲焉。嗚呼。革不足言矣。崇韜佐命大臣。忠勞爲一時冠。其請立劉氏。非有他心也。不過謂天子所寵昵而自結焉。將賴其助以少安而已。然唐之亡。實由劉氏。是亡唐者崇韜也。後唐之先。皆有勳勞於帝室。晉王克用。百戰以建王業。莊宗因之。遂有天下。同光之初。海內震動。幾可指麾而定矣。而崇韜顧區區之私。引劉氏以覆其社稷。而滅其後嗣。宗廟之靈。其肯赦之乎。崇韜卒以盡忠赤其族。革亦無罪誅死。豈非天哉。昔唐高宗欲立武昭儀爲后。大臣褚遂良等力爭以爲不可者。皆得禍。獨李勣勸成之。窮極富貴而死。自謂得計矣。及武氏得志。唐高祖太宗之子孫。誅戮幾盡。而勣雖已死。亦卒以孫敬業故。發墓剖棺。喪其宗族。遂良等。雖得禍。不至此也。天理之不可逃如此。雖然。豈獨天理哉。彼勣與崇韜。皆武夫烈士。勇於報德。乃以此心揣婦人。以爲自安之奇策。安知婦人之性。陰忮忍毒。果於背德。方其得志自肆。若豺虎然。豈復思得立之所自哉。然則二人之禍雖微。天理固有不可逃者矣。悲夫。

## 書安濟法後

嘗安濟坊法行時。州縣醫工之夏者。懼於入坊。越州有庸醫曰林彪。其技不售。乃冒法代它醫造安濟。今日傳容平當來。則林彪也。明日丁資當來。又林彪也。又明日僧寧當來。亦林彪也。其治疾亦時効。遂以起家。然里巷卒不肯用。比安濟法罷。林彪已爲溫飽家矣。年八十餘。乃終。開禧乙丑四月七日。務觀書。

## 書空青集後

建中靖國元年。景靈西宮成。詔丞相曾公終於碑。以詔萬世。碑成。天下傳誦。爲宋大典。且歎曾公耆老白首。而筆力不少衰如此。建炎後。仇家盡斥。曾公文章。始行於世。而獨無此文。或謂中更喪亂。不復傳矣。淳熙七年。某得曾公子寶文公遺文於臨川。然後知其寶文公代作。蓋上距建中八十年矣。嗚呼。文章鉅麗。閱偉至此。使得用於世。代王言。頌成功。施之朝廷。薦之郊廟。孰能先之。而終寶文公之世。士大夫莫知也。汪翰林平生故人。及銘其墓。惟曰始爲家。賢子弟。中爲時勝流。晚爲能吏。是豈足以言公哉。公家世固以文章名天下。又自小時所交。皆諸父。各

天下偉人出入試用亦數十年。荆薈滿朝。然世猶不盡知之如此。況山林之士。老於布衣。所交不出閭巷。其埋沒不耀。抱材器以死者。可勝數哉。可勝數哉。九月十九日。山陰陸某書。

### 書浮屠事

浮屠師宗杲。金陵人。法一。汴人相與爲友。資資豪傑。負氣好遊。出入市里自若。已乃折節。同師。蜀僧克勤。相與磨礱。浸灌。至忘寢食。遇中原亂。同舟下汴。杲數視其笠。一怪之。伺杲起去。亟視笠中。杲有一金釵。取投水中。杲還。亡金。色頗動。一叱之曰。吾期汝了生死。乃爲一金動邪。吾已投之水矣。杲起。整衣作禮曰。兄真宗杲師也。交益密。於世多詆浮屠者。然今之士有如一之能。其友者乎。藉有之。有如杲之能受者乎。公卿貴人。謀進退於其客。客之賢者不敢對。其不肖者則勸之進。公卿亦以適中其意而喜。謀於子弟亦然。一旦得禍。其客其子弟。則曰。使吾公早退。可不至是。而公卿亦歎曰。向有一人勸吾退。豈至是哉。然亦晚矣。

### 書渭橋事

中大夫賈若思。宣和中。知京兆櫟陽縣。夏夜。以事行三十里。至渭橋。夜漏欲盡。忽見二三百人馳道上。衣幘鮮華。最後車騎旌旗。傳呼甚盛。若思遽下馬。避於道傍民家。且使從吏詢之。則曰。使者來按視都城。漢唐故城。王氣已盡。當求生地。此十里內已得之。而水泉不壯。今又舍之矣。語畢。馳去如飛。時方承平。若思大駭。明日還縣。亟使人訪諸府。則初無是事也。若思。河朔人。自遼陽從蔡靖辟爲燕山安撫司管勾機宜文字。靖康中。自燕遞歸。入尙書省。爲司封郎而卒。陸某曰。河渭之間。輿區沃野。周秦漢唐之遺跡。隱隱故在。自唐昭宗東遷。廢不都者三百年矣。山川之氣。鬱而不發。藝祖高宗。皆嘗慨然有意焉。而羣臣莫克奉承。予得此事於若思之孫逸祖。豈關中將復爲帝宅乎。虜暴中原。積六七十年。腥聞於天。王師一出。中原豪傑。必將響應。決策入關。定萬世之業。茲其時矣。予老病垂死。懼不獲見。故私識若思事。以示同志。安知士無脫輓輅以進說者乎。

### 書包明事

包明者。不知其鄉里。少爲兵。事湯岐公。自樞密至左相。明常在府。紹興末。岐公以御史論罷。故例。一府之人皆罷。遇拜執政。則往事焉。久之。御史中丞汪公澈拜參知政事。一府皆往。汪公蓋前日劾岐公者也。於是明獨不肯往。

曰。是嘗論擊吾公者。持何面目事之。雖妻子飢寒。不之顧。未幾。以病死。方岐公貴時。所薦達士大夫多矣。至其失勢。不反滋以媚權門者幾人。且岐公平日待明。非有異於衆人也。汪公之拜一府。俱往。非獨明也。明而往事汪公。非有負也。泥塗賤隸。又非清議所及。而其自信毅然不移如此。蓋有古烈士之風矣。書其始末。使讀者有感焉。

## 書神僊近事

昔道士侯道華喜讀書。或問其意。答曰。天上無凡俗神仙。後果騰舉而去。呂洞賓陳搏賀元施肩吾皆本書生。近歲有譙定雍孝閔尹天民。亦皆以儒士得道。定今百二十餘歲。故在青城山中采藥。道人有見之者。讀易尙不輟也。孝閔或自稱木先生。往來沔鄂間。天民客青城儲福宮。一日。大罵所與往來道士。卽閉門睡。道士明且相率謝之。而門不啓。壞壁視之。危坐死矣。方相與驚歎。俄失所在。此三人者皆顯人。故其事傳閭巷山澤之士。名迹湮晦。本不爲人知者。又可悉數哉。予從子慧綽爲浮屠。爲予言豫章西山香城寺之傍。有野人身被綠毛。每雨霽。多坐石上。暴日。見人輒避去。追之不可及。有識者曰。此馬祖弟子亮座主者。乃知長生久視之道。人人可以得之。初不必老氏之徒也。因書置座右以自勵云。

## 書屠覺筆

建炎紹興之間。有筆工屠希者。暴得名。是時大駕在宋。都在廣陵。又南渡。幸會稽錢塘。希嘗從駕。自天子公卿朝士。四方士大夫。皆貴希筆。一筒至千錢。下此不可得。晁侍讀以道作詩稱譽之。有吳先生師中。字茂先。得其筆。以一與先少師。希之技誠絕人。入手卽熟。作萬字不少敗。莫能及者。後七十餘年。予得其孫屠覺筆。財價百錢。入手亦熟可喜。然不二百字。敗矣。或謂覺利於易敗而速售。是不然。價旣日削矣。易敗則人競趨它工。覺固不爲書者計。獨不自爲計乎。乃書希事。庶覺或見之。

## 書二公事

鄭介夫名俠。以剛直名天下。晚居福清。自號一拂居士。布衣糲食。而雜植華木於舍傍。觴詠自適。客至。必與飲。多不過五爵。蔬粟之外。一肉而已。遇貧士過者。亦薄贖之。止於千錢。飲具皆白鐵。或遺以銀盃。辭不取。好強客弈棋。有辭不能者。則留使旁觀。而自以左右手對局。左白右黑。精思如真敵。白勝則左手斟酒。右手引滿。黑勝反是。如

是幾二十年如一日。謝昌國名謬。嘗聞道於頤正郭先生。居臨江。名其廬曰良齋。晨興。烹豆腐菜羹一釜。偶有肉。則縷切投其中。客至。亦不問何人。輒共食。有貧士及醫卜之類。飯已。輒語之曰。吾無錢予君。豈欲詩乎。取幅紙作絕句贈之。以爲常。二公皆予所鄉慕也。予貧甚。欲學介夫辦五盃千錢。亦復未易。又不解弈棋。或可力貧學昌國耳。書之座右。當徐圖之。紹熙之元十二月八日。九曲老樵書。

### 卷二十六

#### 跋四十首

真廟賜馮侍中詩

某家舊藏孝嚴殿繪像。先正侍中馮公在焉。冠劍偉然。與太行黃河氣象相埒。每稽首歎曰。侍中輔相兩朝。更天下大變。而社稷奠安。夷狄嚮服。鋤耨萬里。無犬吠之警。有以也夫。晚待罪新定。公之孫頤出示章聖皇帝賜詩。又以想見一時盛事。恨不生其時。俯伏沙隄旁。窺望風采云。

高宗聖政草

某被命修光壽皇帝聖政。草創凡例。網羅放逸。雖寢食間。未嘗置也。然不敢以稿留私篋。暇日偶追記得此。命兒輩錄之。隆興二年十月一日。左通直郎通判鎮江軍府事陸某記。

高宗賜趙延康御書

右知金壇縣趙君師懇。錄高宗賜其大父延康公書。及延康移僞楚書。共爲一編。以示史官陸某。某曰。延康在宣和靖康間。聲望風采。震曜一時。及守宛丘。百戰禦狂虜。卒全其城。視唐代張巡許遠。顏真卿皆過之。來朝行在。高皇蓋欲以左轄命之。議者謂宗室輔政非故事。遂止。方公之南徙也。謝表有云。臣本支百世。侍從三朝。又云。堅壁以保近畿。愷前功之俱廢。登壇而陪盛禮。懷囊遇以自憐。識者悲之。某又嘗於公從孫師嚴有翼家。見公建炎奏議稿一編。皆人所至難言者。不知此稿皆在鑑堂集中否。或可訪於有翼院中。以補逸遺。敢併以告。嘉泰癸亥歲三月丙申。臣某謹識。

高皇御書二

臣某少時與胡尚書之子杞同學於雲門山中。見高皇帝賜尚書御題扇。曰：文物多師古。朝廷半老儒。蓋黃體也。與此手詔絕相類。後數年蒙收召。得面天顏。距今四十四年矣。伏讀寶箴。不知所云。嘉泰癸亥五月一日。史官臣陸某謹題。

又

臣某伏觀高皇帝御天下幾三十年。進用諫官御史。皆出聖選。故往往躡至相輔。其不合者。猶爲侍從。乃去。如施公財任遺補。卽出守小郡。蓋無幾人。則其犯顏拂指。不撓於權倖。可以想見。而上之知人受盡言。有仁祖用范仲淹。唐介之風矣。惜乎施公遽逝去。不及召用於虛。悲夫。開禧乙丑九月一日。故史官陸某謹書。

今上皇帝賜包道成御書崇道菴額

開禧某年某月甲子。皇帝親御翰墨。書崇道菴三字。賜妙行先生臣包道成。以示故史官臣陸某。將刻之石。具載歲月及被賜之由。示天下後世。臣某竊聞臣道成實晉陵人。少學黃老之說。以劬身濟衆爲事。寓跡都城三十餘年。築堂以居。凡以黃冠褐衣至者。靡不館之。往來千人。蓋嘗有神僊異人混於衆中。道成獨默識之。而不言。會稽光孝觀。故名乾明。天聖間。章獻明肅皇后遣中使築之。久壞不葺。道成談笑復其舊。凡都城橋梁道路。皆力治之。費至緡錢百餘萬。建東嶽廟吳山上。旣成。又卽其傍築室以奉真武。左江右湖。氣象雄蔚。而道院屹立於廡外。鐘磬步虛之聲。在雲霄間。都人爲之心駭神竦。於是皇帝聞而異之。故有扁榜之賜。臣某犬馬之年。駸駸九十。獲在聖主仁壽域中。且嘗獲緡繡繹三朝金匱百室之藏。今雖篤老。猶幸未病廢。得以紀稀闊盛事。豈非幸哉。開禧二年。歲在丙寅。三月某日。太中大夫充寶謨閣待制致仕山陰縣開國子食邑五百戶賜紫金魚袋臣陸某昧死稽首再拜謹書。

跋尹耘師書劉隨州集

備書人韓文持束紙支頭而睡。偶取視之。劉隨州集也。乃以百錢易之。手加裝褫。紹興二十五年正月八日。陸某記。

轉師耕。鄉里前輩。與九伯父及先君游。此集蓋其手抄云。紹熙元年七月望。某再跋。

### 跋唐御覽詩

右唐御覽詩一卷。凡三十人。二百八十九首。元和學士令狐楚所集也。按盧綸墓碑云。元和中。章武皇帝命侍臣采詩。第名家得三百一十篇。公之章句奏御者居十之一。今御覽所載綸詩。正三十二篇。所謂居十之一者也。據此。則御覽爲唐舊書不疑。然詳云三百一十篇。而此纔二百八十九首。蓋散逸多矣。姑校定訛謬。以俟完本。御覽一名唐新詩。一名選集。一名元和御覽云。紹興乙亥十一月八日。吳郡陸某記。

### 跋文武兩朝獻替記

學者當以經綸天下自期。此書不可不見也。但傳本謬誤。幾不容讀。以它書尋繹之。十得四五云。紹興丙子臘日。務觀題。

### 跋吳禪師蒙泉銘

右妙喜禪師爲良上人所作蒙泉銘一首。往予嘗異過鄒禹功博士。坐有僧焉。予年少氣豪。直據上坐。時方大雪。寒甚。因從禹功索酒連引徑醉。禹功指僧語予曰。此妙喜也。予亦不辭謝。方說詩論兵。旁若無人。妙喜遂去。其後數年。予老於憂患。志氣摧落。念昔之狂。痛自悔責。然猶冀一見。作禮懺悔。孰知此老遂棄世而去邪。雖然。良公蓋一世明眼衲子。不知予當時是。卽今是。試爲下一轉語。隆興改元十一月五日。笠澤漁隱陸某書。

### 跋修心鑑

右高祖太傅公修心鑑一篇。初。公生七年。家貧未就學。忽自作詩。有神仙語。觀者驚焉。晚自號朝隱子。嘗退朝。見異人行空中。足去地三尺許。邀與俱歸。則古仙人嵩山栢真施先生肩吾也。因受鍊丹辟穀之術。尸解而去。然其術秘不傳。今惟此書尙存。某既刻版傳世。并以七歲吟及自贊。附卷末。庶幾篤志方外之士識之。有所發焉。亦公之遺意也。隆興二年七月二日。元孫某謹書。

### 跋邵公濟詩

先子入蜀時。與邵子文遇於長安。同遊興慶池。有詩倡酬。相得驩甚。夜讀公濟詩。超然高逸。恨未嘗得講世舊與

文盟也。乾道元年五月十八日。笠澤漁隱陸某書。

跋坐忘論

司馬子微師體玄先生潘師正。體玄師昇玄先生王遠知。昇玄師真白先生華陽隱居陶弘景。故體玄語子微曰。吾得陶隱居正一法。遠汝四世矣。乾道二年。天慶節。借玉隆藏室本傳漁隱子手記。

跋查元章書

李份事士大夫謹。以故得書帖多。不可數。然閱其書。至不敢與他札偕藏者。元章吏部一人而已。份一吏耳。知敬元章如此。豈知元章仕於朝。既不容。去而居幕府。又不容。自引於數千里外。赤甲白鹽之間。乃少安。嗚呼。亦可歎也夫。丙戌上元後三日。漁隱書。

跋高象先金丹歌

右玉隆萬壽觀本。序言有注解而不傳。亦不知序者爲何人也。丙戌二月八日。務觀書。

又

國初有高象先。淳化中。爲三司戶部副使。少從戚同文學。與宗度許驥陳象輿郭成範王礪滕涉齊名。不言其所終。亦不知其鄉里。恐卽此人。然序言名先。字象先。又似別一人。神仙隱顯。不可必知。聊記之耳。辛亥炊熟日書。

跋天隱子

最後易簡漸門二說。非天隱子本語。他日錄本當去之。丙戌三月中休傳本於玉隆萬壽宮。漁隱。

東坡先生以爲天隱子真司馬子微所著也。傳本後二十五年。紹熙庚戌冬至日書。

跋造化權輿

先楚公著埤雅。多引是書。然未之見也。乾道三年。孟夏十八日。傳自玉隆藏室。甫里陸某謹題。

跋老子道德古文

右漢嚴君平著道德經指歸古文。此經自唐開元以來。猶傳明皇帝所解。故諸家盡廢。今世惟此本及貞觀中太史令傅奕所校者尙傳。而學者亦罕見也。予求之踰二十年。乃盡得之。玉笈藏道書二千卷。以此爲首。漁隱陸某

題。乾道二年十月十日。

跋已庵語

乾道庚寅十月入蜀。舟過公安二聖。見祖珠長老。得此書。珠自言南平軍人。得法於已庵云。

跋武威先生語錄

豐清敏公爲中執法。論事上前。曰。司馬光呂公著皆忠賢。何爲引赦復官。赦當及有罪耳。無罪何赦也。微祖曰。光等變先帝法度。非罪乎。清敏公頓首曰。誠當變。無可罪者。方元符建中。衆正畢集於朝。天下喁喁。想望太平。清敏公與陳忠肅公。俱極諫官御史之選。而所以言則有婉直之異。吾先大父楚公。每以爲二公之論皆不可廢。蓋忠肅似孟子說齊。而清敏似伯夷諫周。其歸一也。今觀武威先生之論。又甚似清敏。百世之下。志士仁人。得此書讀之。當有太息流涕者矣。乾道七年。立秋日。山陰陸某書。

跋關著作行記

著作關公出使峽中。風采峻甚。仕者人人震懼。莫敢仰視。某以孤生起臯籍。萬里佐州。淺闇滯拙。自期且汰去。而關公獨厚遇之。舉酒賦詩。談臺閣舊事。忘其位之重也。公免歸之明年。某以事至臥龍山咸平寺。長老惠璉言。公往有行記。今將刻之石。因屬某書其末。某曰。方關公之門。可炙手時。此書伏不出。今公歸臥青城山中。賓客解散。形勢一變。而璉方刻其書。爲不朽計。嗟乎。足以愧士大夫矣。乾道七年七月七日。左奉議郎通判夔州軍州主管學事陸某謹識。

跋司馬子微鉅松菊法

乾道初。予見異人於豫章西山。得司馬子微鉅松菊法。文字古奧。非妄庸所能附託。八年。又得別本於蜀青城山之丈人觀齋戒手校。傳之同志。十二月六日。笠澤漁翁陸務觀書於玉華樓。

跋周茂叔通書

濂谿之生也。世但以佳士許之耳。旣死。蒲左轄作誌。黃太史作詩。其稱述亦不過如此。向使無二程先生。後世豈知濂谿爲大儒。傳聖人之道者邪。以此知士之埋沒無聞者。何可勝計。乾道壬辰十二月十五日。成都驛南窗書。



跋岑嘉州詩集

予自少時。絕好岑嘉州詩。往在山中。每醉歸。倚胡牀睡。輒令兒曹誦之。至酒醒。或睡熟。乃已。嘗以爲太白子美之後。一人而已。今年自唐安別駕來。攝轡焉。既畫公像齋壁。又雜取世所傳公遺詩八十餘篇。刻之以傳。知詩律者。不獨備此邦故事。亦平生素意也。乾道癸巳八月三日。山陰陸某務觀題。

跋二賢像

右孟貞曜歐陽率更二像。皆唐人筆墨。北湖者吳則禮子傅也。無待者劉焯無言也。最後竇先君會稽公茶山先生曾文清公書。萬里攜旅。不自意全。撫卷流輝。乾道九年九月既望。刻石甞漢嘉月榭上。山陰陸某識。

跋山谷先生三榮集

予集黃帖。得贈元師及王周彥三詩。甚愛之。有黃淑者。家三榮。見而笑曰。紹興中再刻本也。舊石方黨禁時已磨毀矣。乃出此卷曰。是舊石本。其筆力精勁。蓋如此。因錄藏之。淳熙之元二月二日。務觀書。

跋硯錄香法

硯錄舊有本而亡之。香法蓋未之見。師房者。濟南衛昂也。娶婆婆先生崔德符女。晚官巴峽。死焉。乾道辛卯冬。予得此編於巫山縣。師房手鈔也。已腐敗不可讀。乃錄藏之。後三年。淳熙之元二月三十日。蜀州漱玉南窗務觀書。

跋唐修撰手簡

某之曾外大父質肅唐公守并州。故給事中呂公寶爲幕客。質肅爲人方嚴。少許可。或面折人。臨川王和甫。同時在幕中。每言。見唐公退。輒汗滿握。然遇呂公特歡。他客莫敢望也。淳熙元年。某在蜀州。得質肅仲子修撰公與給事手帖讀之。蓋元祐初。修撰使河北。給事爲御史時也。書論黃河市易。辭指激烈。無一語及其私。與世俗責報父客。至有寘言者。何其遠哉。修撰字君益。元祐中。建議棄渠陽城。紹聖初。坐貶團練副使。元符建中之間。赴守許昌。方治事。得報召蔡京。撫案憤咤。即日。疽發背卒。某不及拜公。而先夫人爲言。公大節如此。敢併記之。以遺給事之孫教授君云。七月二十三日。山陰陸某謹書。

跋蔡君謨帖

近歲蘇黃米書盛行。前輩如李西臺宋宣獻蔡君謨蘇才翁。兄弟書皆廢此兩軀。蘇行草隸皆備。石在但井可寶也。淳熙元年九月八日。蜀州手裝。

### 跋瘞鶴銘

瘞鶴銘。予親至焦山摹之。止有此耳。殘璋斷玦。當以真爲貴。豈在多邪。淳熙之元九月一日。蜀州重裝。

### 跋西崑酬唱集

通直郎張玠。河陽人。呂汲公家外甥。藏書甚富。淳熙二年正月八日夜讀此集。燈架忽仆。壞書時傳畢。方一日。豈歐尹諸人亦有靈邪。記之爲異時一笑。

### 跋歷代陵名

三榮守送來。近世士大夫所至。喜刻書版。而略不校讎。錯本書散滿天下。更誤學者。不如不刻之愈也。可以一歎。淳熙乙未立冬。可齋書。

### 跋溫庭筠詩集

先君舊藏此集。以華清宮詩冠篇首。其中有早行詩。所謂雞聲茅店月。人跡板橋霜者。久已墜失。得此集於蜀中。則不復見早行詩矣。感歎不能自已。淳熙丙申重陽日。某識。

### 跋王君儀待制易說

王公易學。雖出於葆光張先生。然得於心者多矣。魏炎問。胡騎在錢塘。明越俱陷。王公端居於嚴。曰。虜決不至此。且狼狽而歸。自此窮天地不復渡江矣。其妙於易數蓋如此。淳熙丁酉元日。山陰陸某書於錦官閣下。

### 跋崔正言所書書法要訣

德符詩名一代。書則未之見也。觀此編中字。瘦健有神采。亦類其詩。乃知前輩未易以一技名也。戊戌重午。務觀書。

### 跋後山居士詩話

談叢詩話皆可疑。談叢尙恐少時所作。詩話決非也。意者後山嘗有詩話而亡之。妄人竊其名。爲此書耳。後山二

千豐登。登過江。爲會稽曹官。李鄴降虜。登亦破驅以北。悲夫。淳熙戊戌十月二十四日。可齋。

跋佛智與升老書

此一編。佛智禪師與其法子寒巖升公書也。議論超卓。殆非世儒所及。三復歎仰。淳熙己亥三月九日。建安雙清堂書。

跋古柏圖

此圖吾家舊藏。予居成都七年。屢至漢昭烈惠陵。此柏在陵旁廟中。忠武侯室之南。所謂先主武侯同闕宮者。與此略無小異。則畫工亦當時名手也。淳熙六年。龍集己亥。六月一日。陸某識。

卷二十七

跋四十九首

跋中和院東坡帖

此一卷。皆蘇仲虎尙書所藏。鑒定精審。無一帖可疑者。刻石在成都大聖慈寺中和勝相院。淳熙六年六月十七日。陸務觀題。

跋漢隸

漢隸十四卷。皆中原及吳蜀真刻。淳熙己亥。集於建安公署。友人莆陽方士繇伯謨。親視裝標。故無一字差謬者。六月二十一日。山陰陸某書。

跋晁百谷字敘

名者士所願也。而或懼太早。何哉。吾測之審矣。少而得名。我不能不矜。人不能不忌。以滿假之心。來讒慝之口。幾何其不躡也。吾元歸年甫二十。筆力扛鼎。不患無名。患太早耳。雖然。洪道方力張其名。而吾獨欲其退避揜覆。元歸未必樂也。異時出入朝廷。更歷世故。會當思吾言也夫。淳熙庚子二月三日。山陰陸某書。

跋陵陽先生詩草

右陵陽先生韓子蒼詩草一卷。得之其孫縉。先生詩擅天下。然反覆塗乙。又歷疏語所從來。其嚴如此。可以爲後輩法矣。予聞先生詩成。既以予人。久或累月。遠或千里。復追取更定。無毫髮恨。迺止。則此草亦未必皆定本也。大歇菴詩一章。徐師川作。而先生手錄之。亦足見其無昔人爭名之病矣。故附見卷中。淳熙庚子四月二十二日。筆澤陸某書。

### 跋荆公詩

右荆公手書詩一卷。前六首。贈黃慶基。後七首。贈鄧鏞。石刻皆在臨川。淳熙七年七月十七日。陸某謹題。

### 跋續集驗方

予家自唐丞相宣公在忠州時。著陸氏集驗方。故家世喜方書。予宦遊四方。所獲亦以百計。擇其尤可傳者。號陸氏續集驗方。刻之江西倉司民爲心齋。淳熙庚子十一月望日。吳郡陸某謹書。

### 先左丞使遼語錄

右先楚公使遼錄一卷。三十八伯父手書。伯父自幼被疾。以左手書。然筆力清健如此。平生凡鈔書至數十百卷云。淳熙八年四月五日。某謹識。

### 跋朝制要覽

先君會稽公晚歲喜觀此書。間爲子弟講論因革。率至夜分。先君捐館舍三十有四年。統得此於故廬。伏讀悲哽。敬識卷末。淳熙八年龍集辛丑十一月二十五日。山陰陸某書。

### 跋東坡問疾帖

東坡先生憂其親黨之疾。委曲詳盡如此。則愛君憂國之際可知矣。其曰勿使常醫弄疾。天下之至言。讀之使人感歎彌日。淳熙九年五月乙未。甫里陸某書。

### 跋東坡詩草

東坡此詩云。清吟雜夢寐。得句旋已忘。固已奇矣。晚謫惠州。復出一聯云。春江有佳句。我醉墮渺莽。則又加於少作一等。近世詩人。老而益嚴。蓋未有如東坡者也。學者或以易心讀之。何哉。淳熙九年五月二十六日。玉局祠吏

陸某書於鏡湖下鷗亭。

跋孫府君墓誌銘

方五代割裂時。自一郡以上。非其國子弟。則大將功臣也。士大夫仕爲令掾者。已爲違官。錢氏土境尤盛。而孫公至專城。蓋其國顯人也。觀杜公所述。亦誠有以得之矣。淳熙壬寅立秋日。甯星陸某。

跋蘇魏公百韻詩

右首一卷。丞相魏公謝事歸第。且八十時所作也。蘇端明賀趙清獻公得謝啓云。念平生之百爲。一無可恨。某於魏公亦云。淳熙壬寅立秋日。吳郡陸某謹識。

跋家藏造化權輿

右造化權輿六卷。楚公舊藏。有九伯父大觀中題字。淳熙壬寅。得之故第廢紙中。用別本警校。而闕其不可知者。兩本俱通者。亦具疏其下。六月四日。山陰陸某謹記。

後十有四年。慶元元年八月十二日重校。凡三日而畢。時年七十一。

跋三蘇遺文

此書。蜀郡呂商隱周輔所編。周輔入朝爲史官。得唐安守以歸。未至家。暴卒。可悲也。淳熙十一年正月十一日。務觀識。

跋兼山先生易說

郭立之從程先生遊最久。程先生病革。猶與立之有問答語。著於語錄。而尹彥明獨謂立之自黨論起。卽與程先生絕。死亦不弔祭。蓋愛憎之論也。立之子雍。字子和。屏居岷中。屢聘不起。亦著易說。得共家學。蓋程氏易學。立之父子實傳之。淳熙甲辰二月三十日。甯星陸務觀云。

後六年。得謝昌國所贈頤正先生辨尹公說。乃知于此言羸合也。頤正卽雍也。己酉八月二十八日某書。

跋鄭虞任昭君曲

自張文濟下世。樂府幾絕。吾友鄭虞任作昭君曲。如羊車春草空芊芊。及重瞳光射搔頭偏之類。文濟殆不死也。

但願夕烽長不驚甘泉。妾身勝在君王前。能道昭君意中事者。淳熙甲辰三月二十三日。甫里陸某書。

### 跋傅正議至樂菴記

伏波將軍困於壺頭。曳病足土室中。以望夷賊。左右哀之。莫不爲流涕。定遠侯在西域三十年。年老思土。上書自言。願生入玉門關。詞指甚哀。彼封侯富貴矣。然戚戚無聊乃如此。其他盈滿鞿危。畏禍憂誅。願爲布衣不可得者。又何可勝歎。然則富貴果不如貧賤之樂邪。曰。此自富貴者言之耳。貧賤之士。仕則無路。處則無食。自非有道君子。其憂又有甚者矣。正議傅公在學校二十年。聲震京師。同舍生去爲公卿者。袂相屬。而公始僅得一第。既仕矣。適時艱難。妄男子往往起閭巷。取美官。公又棄不用。則亦何自樂哉。及讀所作至樂菴記。自道其胸中恢疎磊落。所以樂而忘憂者。文辭辯麗。動人有列禦寇莊周之遺風。然後知公蓋有道者。或曰。使天以富貴易公之樂。公其許之乎。予曰。公所以處貧賤者。則其所以處富貴者。顏回之簞瓢。周公之衮纁。一也。觀斯文者。盍以是求之。淳熙十一年七月十六日。山陰陸某謹書。

### 跋中興間氣集

高適字仲武。此乃名仲武。非適也。評品多妄。蓋淺丈夫耳。其書乃傳至今。天下事出於幸不幸固多如此。可以一歎。淳熙甲辰八月二十九日。放翁書。

高適字仲武。此集所謂高仲武。乃別一人名仲武。非適也。議論凡鄙。與近世宋百家詩中小序可相甲乙。唐人深於詩者多。而此等議論乃傳至今。事固有幸不幸也。然所載多佳句。亦不可以所託非其人而廢之。

### 跋齊驅集

此集刻版於宣和三年。方是時。黨禁猶未解。文士蓋僅有見者。故本多誤。然好事者冒法刻之。亦奇矣。淳熙甲辰重午日。陸務觀書。

### 跋柳柳州集

此一卷。集外文。其中多後人妄取他人之文。冒柳州之名者。聊且哀類於此。子京。右三十一字。宋景文公手書。藏其從孫最家。然所謂集外文者。今往往分入卷中矣。淳熙乙巳五月十七日。務觀

校畢。

跋說苑

李德劄云。館中說苑二十卷。而闕反質一卷。曾鞏乃分修文爲上下。以足二十卷。後高麗進一卷。遂足。淳熙乙巳十月六日。務觀書。

跋章氏辨誣錄

徽宗皇帝盛德大度。自秦漢以來。人主莫能及者。尤在友愛蔡王。寬貸章惇。而史臣不能發明。可爲太息。淳熙丙午十月望。陸某謹題。

跋釣臺江公奏議

渠乾道庚寅夏。得此書於臨安。後十有七年。蒙思守桐廬。訪其家。復得三表及贈告墓志。因併刻之。以致平生尊仰之意。淳熙十三年十一月十有六日。笠澤陸某書。

先太傅遺像

先太傅皇祐中。以吏部郎中直昭文館。自會稽移守新定。期年。請老。得分司西京以歸。迨今百四十年。而某自奉祠玉局。起爲是邦。竇繼遺躅。於是知建德縣事。蘇君林以父老之請。築祠宇於兜率佛寺。淳熙十四年春正月丙辰。備車旗儀物。大合樂。奉遺像於祠。且以公自贊。道帽羽服像。刻之堅珉。慰邦人無窮之思。朝隱子。蓋公自號云。元孫朝請大夫。權知嚴州軍州事。陸某謹書。

跋高康王墓誌

王岐公文章閎麗。有西漢風。而宋常山公書法森嚴。竇傳鐘張古學。方裕陵致孝竇慈。極天下養。故並命兩公。彰顯高氏先王功烈。以詔萬世。可以爲寵光矣。中更亂離。而墨本竇藏如新。殆有神物護持云。淳熙十四年二月三日。笠澤陸某謹識。

跋半山集

右半山集二卷。皆荆公晚歸金陵後所作詩也。丹陽陳輔之嘗編纂刻本於金陵學會。今亡矣。淳熙戊申上巳日。

笠澤陸某書。

跋李深之論事集

唐丞相司空李公深之論事集。有兩本。其一本七卷。無序。其一本一卷。史官蔣偕作序。然以序考之。則偕所序蓋七卷者也。淳熙戊申四月十九日。笠澤陸某識。

跋李莊簡公家書

李丈參政罷政歸鄉里時。某年二十矣。時時來訪先君。劇談終日。每言秦氏。必曰咸陽。憤切慷慨。形於色辭。一日平旦來。共飯。謂先君曰。聞趙相過嶽。悲憂出涕。僕不然。謫命下。青鞵布襪行矣。豈能作兒女態邪。方言此時。目如炬。聲如鐘。其英偉剛毅之氣。使人興起。後四十年。偶讀公家書。雖徙海表。氣不少衰。丁寧訓戒之語。皆足垂範百世。猶想見其道青鞵布襪時也。淳熙戊申二月己未。笠澤陸某題。

跋之眾先生稟

肩吾。文忠公四世孫。博學。工文章。與予蓋莫逆也。晚來行在。諸公貴人頗知之。欲引置要津。有毀之者。肩吾既不偶。乃調桂陽令去。客姑蘇。未繫舟。暴疾。一夕死。哀哉。嘉父。鍵爲人。肩吾沒後數年。始以進士起家。淳熙戊申秋社日。放翁書。

跋吳夢予詩編

山澤之氣爲雲。降而爲雨。勾者伸。秀者實。此雲之見於用者也。子嘗見旱歲之雲乎。嵯峨突兀。起爲奇峯。足以悅人之目。而不見於用。此雲之不幸也。君子之學。蓋將堯舜其君民。若乃放逐顛顛。娛悲舒憂。爲風爲騷。亦文之不幸也。吾友吳夢予。彙其歌詩數百篇於天下。名卿賢大夫之主斯文盟者。翕然歎譽之。末以示余。余愀然曰。子之文。其工可悲。其不幸可弔。年益老。身益窮。後世將曰。是窮人之工於歌詩者。計吾吳君之情。亦豈樂受此名哉。余請廣其志曰。窮當益堅。老當益壯。丈夫蓋棺事始定。君子之學。堯舜其君民。余之所望於朋友也。娛悲舒憂。爲風爲騷而已。豈余之所望於朋友哉。淳熙十五年十一月二十六日。甫里陸某書。

跋松陵集三



淳熙十六年四月二十六日。車駕幸景靈宮。予以禮部郎兼鹽部檢察。賜公卿食。訖事作假。會陵陽韓籍寄此集來。云東都舊本也。欣然讀之。時寓甌街巷街南小宅之南樓。山陰陸某務觀手識。此集蔡景繁舊物。復嘗歸韓子蒼。子蒼之孫籍以遺予。蓋百年前本也。景繁元豐中嘗爲開封推官。此所題開封南司者是也。景繁二子。居厚居易。此題居厚者。其長也。景繁臨川人。而韓子蒼居臨川。故得此書。務觀手記。

跋王仲言乞米詩

仲言貸米。本自欲就魯肅輩人。而良齋又戒以勿取陶胡奴米。仲言治己可謂嚴。而良齋告之。亦可謂忠矣。數年來。仲言以貧甚。客長安中。豪子資給殊厚。今春忽捨去。主人叩首乞少留。不可。豈獨能踐初言。亦不負良齋期待矣。淳熙己酉四月二十七日。陸某務觀書。

跋金奩集

飛卿南鄉子八闋。語意工妙。殆可追配劉夢得竹枝。信一時傑作也。淳熙己酉立秋。觀於國史院直廬。是日風雨。桐葉滿庭。放翁書。

跋韓非子

右韓非子一卷。紹興丁卯。先君年六十時。傳吳棫才老本。後四十有二年。淳熙己酉。某重裝而藏之。時年六十有五。十月九日。史院東閣手識。

跋卻掃編

此書之作。敦立猶少年。故大抵無紹興之後事。淳熙己酉十一月十四日。書於儀曹直廬。

跋彩選

紹興甲戌七月三日。子宅過此。彩選畢。景丙子二月五日。同季思訪務觀雲門山客堂。復爲此戲。子宅記。紹興十九年正月十有七日。友人王仲言自京江來。以是書爲贈。餘醜菴記。官制。左右丞不爲平章事。自侍郎拜者。皆躡選尙書。此書蓋失之。

子宅季思下世。忽已數年。予今年六十有七。覽此太息。然予方從事金丹。丹成。長生不死。直餘事耳。後五百年。過雲門草堂故址。思昔作彩戲。豈非夢邪。紹熙元年上半年。放翁書。去子宅題字時三十年矣。

跋陝西印章二

紹熙庚戌正月十九日。夜闕故書。得此。追思在山南時。已二十年。同幙惟周元吉。閩才元章。德茂張季長。及余五人。尙亡。慈爾。拊卷累欷。放翁題。

又十有五年。當嘉泰之四年。歲在甲子。因暴書再觀。則元吉才元德茂。又皆物故數年矣。季長在蜀。累歲不得書。存亡有不可知者。而予年已八十。感歎不能已。八月十六日。務觀書。

跋詩稿

此予丙戌以前詩二十之一也。及在嚴州。再編。又去十之九。然此殘稿。終亦惜之。乃以付子聿。紹熙政元立夏日書。

跋秘閣續帖張長史率意帖

此一帖。在故簽書樞密王倫家。倫出使時。得之故都。予少日嘗見之。紹熙政元五月甲子。甫呈陸某識。時年六十有六。距初見時。四十有五年矣。

跋王深甫先生書簡二

深甫先生以治平二年七月二十八日卒。而此卷末答其弟容季書。是年六月一日。相距無兩月矣。悲夫。紹熙元年六月望。陸某書。

跋郭德謹墓誌銘

此書。朝夕觀之。使人若居嚴師長友之間。不敢萌一毫不善意。仲晦先生識郭公墓。或恨其太簡。然吾夫子銘季札曰。於虜。有吳延陵季子之墓。財十字耳。至今傳以爲寶。彼賣菜求益之論。可付一歎。紹熙二年正月二十三日。陸某謹書。

又

顏魯公麻姑壇記。東坡先生經藏記。皆有大字小字兩本。蓋用羊叔子峴山故事。千載之後。陵谷變遷。尙冀其一存。德誼之名。固自不朽。然吾元晦爲斯人計亦至矣。豈希呂兄弟孝愛篤至。有以發之邪。紹熙二年正月壬申。澤笠陸某識。

跋郭德誼書

予童子時嘗避兵東陽山中。距今六十年。予長德誼三歲。計其年可以相從而不及也。觀此遺墨。爲之太息。紹熙二年正月二十三日。澤笠老漁陸某謹書。

卷二十八

跋四十一首

跋後山居士長短句

唐末詩益卑。而樂府詞高古工妙。庶幾漢魏。陳無己詩妙天下。以其餘作辭。宜其工矣。顧乃不然。殆未易曉也。紹熙二年正月二十四日。雪中試朱元亨筆。因書。

跋蘇氏易傳

此本先君宣和中入蜀時所得也。方禁蘇氏學。故謂之毗陵先生云。紹熙辛亥七月二十日。陸某識。

跋資暇集

吾家舊有此本。先左丞所藏。書字簡樸。疑其來久矣。首日隴西李扈文濟翁編。扈字猶成文也。久已淪陸。忽尤延之寄刻本來。爲之愴然。紹熙二年十一月二十九日。陸某識。

跋法帖

此本嘗見之。清勁可愛。及移之石。乃爾失真。拙工誤人如此。乾符元年十一月乃致元。此云三月。何邪。蔡君謨用鐫字。穎字俱非是。又何邪。紹熙三載正月二十二日。三山下漚亭書。

又

魯公書殊不類。紙乃煙熏。周副之語尤俚俗。羅紹威用羅氏世寶印。犯唐諱。益可疑。跋語詩句亦鄙甚也。君諤豈至是哉。惟錢希白字奇古可喜。然非題顏帖。乃剪它軸附卷後耳。

跋蘭亭樂毅論并趙岐王帖

某恭聞太宗皇帝。天縱聖學。跨軼百王。萬幾之餘。尤留神翰墨。文昭武穆。世受筆法。有若岐簡默王得稿書之妙。蓋其爲學。上稽三代兩漢。以象其高古。下專以晉右將軍王羲之爲法。以極其變化。所藏魯公作文王尊彝。伯禽祀文王之器。紹聖間。詔取藏秘閣。宣和博古圖。亦列於他周器上。又政和中。關中發地得竹簡。皆東漢討羌書檄。字作章草。好事者爭取。而王獨多獲之。則王之窮深造微。豈寒窶書生所及哉。至蘭亭脩禊序樂毅論。又王所愛玩。天下名本。王之於書。名尊一代。固無足異。今周器漢札。雖不可復見。而脩禊序樂毅論。如魯靈光巋然獨存。意有神物護持。非適然也。王遺墨藏家廟者。今雖僅存。某嘗獲觀。皆奇麗超絕。動心駭目。往時。米芾於書少許可。獨推王以爲能學古人。語在芾所著書畫史。王之孫不流。以從官長東諸侯。懼書家不能盡見。是奇蹟。迺詎良工。併刻樂石。置會稽郡齋。而屬某書其後。惟王歷事累朝。典司宗盟。嘉言善行。不可勝載。文章尤長於詩。有唐人餘風。此特論其書而已。紹熙四年正月辛卯。中奉大夫提舉建寧府武夷山冲佑觀山陰縣開國男食邑三百戶陸某謹書。

跋蔡肩吾所作蘧府君墓誌銘

蔡迨肩吾。與予同官。僉爲郡文。辭字畫皆過人。自蜀入吳。持予書。見友人許昌韓无咎。无咎時爲吏部侍郎。薦之甚力。且有除命矣。蜀土有排之者。肩吾遂從銓部得桂陽令。行至吳門。暴死舟中。每念之。未嘗不流涕也。不識肩吾者。讀此文。亦足知其不凡矣。蘧昌老字真叟。亦佳士。蓋與肩吾爲方外友云。紹熙癸丑立夏日。澤笠陸務觀書。

跋原隸

故吏部郎宇文卷臣所著。卷臣爲郎數月。坐口語。亟去。晚守臨邛廣漢。有能名。然亦以謗絀。遂卒於家。可哀也。紹熙癸丑四月二十一日。老學菴書。

跋京本家語

本朝藏書之家。獨稱李邕。鄆公宋常山公。所蓄皆不減三萬卷。而宋書校讐。尤爲精詳。不幸兩遭回祿之禍。而方策掃地矣。李氏書。屬靖康之變。金人犯闕。散亡皆盡。收書之富。獨稱江浙。繼而胡騎南騫。州縣悉遭焚劫。異時藏書之家。百不存一。縱有在者。又皆零落不全。予舊收此書。得自京師。中遭兵火之餘。一日於故篋中。偶尋得之。而蟲齧鼠傷。殆無全帙。綴緝累日。僅能成帙。乃命工裁去四周所損者。別以紙裝背之。遂成全書。嗚呼。予老賴目昏。雖不復讀。然嗜書之心。固未衰也。後世子孫。知此書得存之如此。則其餘諸書。幸而存者。爲予寶惜之。紹興戊午十月七日。雙清堂書。

後五十有七年。復脫壞不可挾。子聿亟裝緝之。持以相示。方先少保書此時。某年十四。今七十矣。不覺老疾之孺。睫也。紹熙甲寅閏月四日。第三男中大夫某謹識。

跋李徂徠集

中野去魯歸周三詩。可以追媿退之琴操。而世不甚傳。使予得見李公。當百拜師之。不特願爲執鞭而已。紹熙甲寅六月二日書。

跋劉文老使君義居遺戒

祥符中。天子封禪。講隆典。以文太平。詔求孝義之門。於是天下以名聞者數十家。遠不過十世。獨吾鄉裘承詢。自齊梁以來。十九世如一日。郡國莫先焉。吾亡友劉文老歿。當上一子世其祿。而長子復辭。以予其季。蓋文老所未嘗命者。於未嘗命者如此。况其所命者乎。將見世世守遺訓不墜。十九世豈足道哉。紹熙甲寅中秋日。陸某識。

跋無逸講義

按實錄。元祐五年二月壬寅。適英閣講經。無逸篇。詔詳錄所講以進。今後具講義。次日別進。壬寅是月七日也。與此卷首所云面奏乞候講畢錄進。乃不同。恐當以此爲正。紹熙五年八月十日。陸某謹識。

跋東坡帖

此碑。蓋所謂橫石小字者邪。頃又嘗見暨石本。字亦不絕大。數簡行筆。尤奇妙可貴。與成都西樓十卷中所書。郭熙山水詩。頗相甲乙也。紹熙甲寅十月二十三日。務觀題。

跋東坡祭陳令舉文

東坡前後集祭文凡四十首。法祭賢長陳公辭指最哀。讀之使人感歎。深察其言。天人予奪之際。雖若出憤激。然士抱奇材絕識。沉隱擯廢。不得少出一二。則其肝心凝爲金石。浩氣去爲神明。亦烏足怪。彼懷恨者固不知也。紹熙甲寅十二月二十九日。陸某謹書。

跋劉凝之陳令舉騎牛圖

公卿貴人方黃金絡馬。傳呼火城中時。欲如二公騎牛山谷。蕭蕭遺物。固不可得。若予者。仕而無歸。欲買一黃犢代步。其費二萬有畸。作爛畜意。又在此外。遂一笑而止。徒有此生。猶著幾兩屐之歎。乃知二公風流亦未易追也。紹熙甲寅十二月二十九日。陸某識。

跋東坡七夕詞後

昔人作七夕詩。率不免有珠璣綸藻詰別之意。惟東坡此篇。居然是星漢上語。歌之曲終。覺天風海雨逼人。學詩者當以是求之。慶元元年元日。笠澤陸某書。

跋張監丞雲莊詩集

張觀神州七十年。東南士大夫視長淮以北。皆險荒也。以從事往者。不復黍離麥秀之悲。殆無以慰答父老心。今觀張公爲奉使官屬時所賦歌詩數十篇。忠義之氣鬱然焉。之悲慨彌日。慶元改元九月二十七日。陸某書。

跋淵明集

吾年十三四時。待先少傅居城南小隱。偶見藤牀上有淵明詩。因取讀之。欣然會心。日且暮。家人呼食。讀詩方樂。至夜。卒不就食。今思之。如數日前事也。慶元二年。歲在乙卯九月二十九日。山陰陸某務觀書於三山龜堂。時年七十有一。

跋陸史君廟籤

昔者龐德公。未曾入州府。襄陽背舊間。處士節獨苦。豈無濟時策。終竟畏羅罟。林茂烏有歸。水深魚知聚。舉家隱鹿門。劉表焉得取。

射洪陸史君廟。以杜詩爲籤。極靈。余自蜀被召東歸。將行。求得此籤。後十四年。乃快意不復仕宦。愧吾宗人多矣。  
紹熙辛亥十二月十日。山陰陸務觀書。

跋巴東集

予自乾道庚寅入蜀。至淳熙戊戌東歸。九年間。兩過巴東。登秋風白雲二亭。觀萊公手植檜。未嘗不悵然流涕。恨古人之不可作也。又有七年。慶元丙辰六月二十四日。山陰陸某書。時年七十二。

跋呂侍講歲時雜記

承平無事之日。故都節物及中州風俗。人人知之。若不必記。自喪亂來七十年。遺老凋落無在者。然後知此書之不可闕。呂公論著。實崇寧大觀間。豈前輩達識。固已知有後日邪。然年運而往。士大夫安於江左。求新亭對泣者。正未易得。撫卷累歎。慶元三年二月乙卯。笠澤陸某書。

跋許用晦丁卯集

許用晦居於丹陽之丁卯橋。故其詩名丁卯集。在大中以後。亦可爲傑作。自是而後。唐之詩益衰矣。悲夫。慶元丁巳六月四日。放翁識。

跋李涪刊誤

王行瑜作亂。宗正卿李涪盛陳其忠。必悔過。及行瑜傳首京師。涪亦放死嶺南。疑卽此人也。丁巳七月十六日識。  
跋歸去來白蓮社圖

予在蜀得此二卷。蓋名筆。規模龍眠。而有自得處。季子子聿手自裝褱藏之。慶元丁巳中秋前三日。放翁識。

跋釋氏通記

予少時避兵東陽山中。有沈師者。丞相恭惠公之裔。近有僧來往天衣山。自言歐陽文忠公家。今又得脩公所著釋氏通記觀之。則建炎樞巨盧公諸孫也。近世不以世類求人。名門大家。散而爲方外道人者。多矣。如脩公既棄衣冠。猶能博學強記。寓史氏法於是書。亦賢矣夫。慶元丁巳重九日。放翁陸某務觀識。

跋毛仲益所藏蘭亭

龍乘雲氣而上天。鳳翔於千仞。吾見舊定本蘭亭。其猶龍鳳邪。慶元丁巳十一月二十日。笠澤陸某務觀書。

跋魏先生草堂集

按國史。野陝人。沈存中筆談以爲蜀人。居陝州。不知何所據也。予在蜀十年。亦不聞野爲蜀人。筆談蓋誤也。慶元戊午。得之書肆。十月十九日。龜室病叟手識。時年七十有四矣。

跋王輔嗣老子

晁以道謂王輔嗣老子題曰道德經。不析乎道德而上下之。猶近於古。此本乃已析矣。安知其他無妄加竄定者乎。慶元戊午十月晦書。

跋前漢通用古字韻編

古人讀書多。故作文時偶用一二古字。初不以爲工。亦自不知孰爲古。孰爲今也。近時乃或鈔綴史漢中字入文辭中。自謂工妙。不知有笑之者。偶見此書。爲之太息。書以爲後生戒。己未三月二十四日。龜室識。

跋胡少汲小集

少汲之兄。名僧孺。字唐臣。在元祐紹聖間。亦知名士也。少汲十詩中一篇所謂阿兄驚世才者是也。周秀實。名蔚。予亡姑之子。及與元祐前輩游。紹興十六七年。猶亡念。有文集數十卷。王性之作序。少汲倡酬最多。班班見於此集。秀實有子名疊文者。乃翁每稱其穎異。自先少師捐館。兩家相去地遠。不復相聞。每爲之惻愴於懷也。因讀少汲小集。併書之。慶元己未七月一日。老學菴書。

跋曉師顯應錄

法華之爲書。天不足以喻其大。海不足以喻其深。利根之士。一經目。一歷耳。自不能捨。雖舉天下沮之。彼且不動。尙何勸相之有哉。然人之根性利鈍。蓋有如天淵者。善知識諄諄告語。誘之以福報。懼之以禍罰。亦有不得已者。譬之世法。道德風化。固足坐致唐虞三代之治矣。而賞以進善。罰以懲惡。亦烏可廢哉。觀曉師顯應錄者。當作是觀。慶元己未立秋日。山陰陸某書。

跋范巨山家訓



人莫不愛其子孫。愛而不知教之。猶弗愛也。人莫不思其父祖。思而不知奉其教。猶弗思也。使爲人父祖者。皆如范氏之先。爲人子孫者。皆如吾友巨山。世其有不興者乎。吾所謂興者。天地鬼神與之。鄉人慕之。學者尊之。是爲興。不然。雖門列戟。牀堆笏。德弗稱焉。何興之有。巨山之子。旣以文章擢高科。公卿將相之儲也。故予思廣其意。而書其家訓後如此。巨山父子不以予爲老悖。則將有感也夫。巨山名中立。其子名薰。慶元己未八月晦。山陰陸某謹書。

跋張安國家問

東坡先生書遍天下。而黃門公所藏至寡。蓋常以爲易得。雖爲人持去。不甚惜也。紫微張舍人書帖。爲時所貴重。錦囊玉軸。無家無之。今大宗伯兄弟。自爲知己。家書往來。蓋以百計矣。相稱相勉。期以遠者。亦何可勝計。而今所存財五紙耳。方紫微亡恙時。豈亦以爲易得。故多散逸邪。某昔者及爲紫微客。今老病臥家。而大宗伯猶以世舊寄此卷。命寓姓名於後。某自浮玉別紫微。三十六年之間。摧頽抵此。紫微若尙在而見之。且不能識。則大宗伯尙何取哉。援筆至此。慨然不知衰涕之集也。慶元五年十一月戊申。笠澤陸某書。

跋坐忘論

此一篇。劉虛谷刻石在廬山。以予觀之。司馬子微所著八篇。今昔賢達之所共傳。後學豈容置疑於其間。此一篇雖曰簡略。詳其義味。安得與八篇爲比。兼旣謂出於子微。乃復指八篇爲道士趙堅所著。則堅乃子微以前人。所著書淵奧如此。道書仙傳。豈無姓名。此尤可驗其妄。予故書其後。以祛觀者之惑。己未十一月二十一日。放翁書。

跋唐盧肇集

子發嘗謫春州。而集中誤作青州。蓋字之誤也。題清遠峽觀音院詩。作青州遠峽。則又因州名而妄竄定也。前輩謂印本之害。一誤之後。遂無別本可證。真知言哉。病馬詩云。塵土臥多毛已暗。風霜受盡眼猶明。足爲當時佳句。此本乃以已爲色。猶爲光。壞盡一篇語意。未必非妄校者之罪也。可勝歎哉。慶元庚申二月三日。放翁燈下書。

跋居家雜儀

王性之言。熙寧初。有朝士集於相監之燒朱院。俄有一人未至。問之。則王元澤也。時荆公方有召命。衆人問舍人

不堅辭否。元澤言。大人亦不敢不來。然未有一居處。衆言居處固不難得。元澤曰。不然。大人之意。乃欲與司馬十  
二丈卜鄰。以其修身齊家事事可爲子弟法也。某聞此語六十年矣。偶讀居家雜儀。遂識之。慶元庚申五月四日  
書

跋皇甫先生文集

古一時。在涪溪中興頌傍石間。持正集中無詩。詩見於世者。此一篇耳。然自是傑作。近時有容齋讀筆亦載此詩。  
乃云。風格殊無可采。人之所見。恐不應如此。或是傳寫誤爾。慶元六年五月十七日。龜堂書。

跋南堂語

予入蜀時。南堂入滅已久。獨有一二弟子在。然皆破齋犯律。諸禪皆詆訾之。予亦以衆毀意。譴其爲人。及其死也。  
乃卓然穎脫。人亦不得而議。是誠未易測也。庚申五月壬戌書於龜堂。

跋注心賦

世之未通佛說者。觀此亦得其梗概矣。慶元庚申七月庚申。龜堂老人書。

跋朱新仲舍人自作墓誌

秦丞相擅國十九年。而朱公竄嶠南者十有四年。僅免僇仆於炎瘴中耳。以此胸中浩然無愧。將終。自識其墓。辭  
氣山立。向使公諂附以苟富貴。至暮年。世事一變。方憂悔。內積惟恐聞人道其平日事。其能慨然奮筆自敘如此  
乎。慶元六年秋社日。笠澤陸某謹書。

跋黃魯直書

老子曰。豫兮若冬涉川。猶兮若畏四鄰。山谷此卷。蓋有得於此。慶元庚申重九日。笠澤陸某書。

卷二十九

跋四十一首

跋蘭亭序

觀蘭亭當如禪宗勘辨。入門便了。若待渠開口。堪作什麼。識者一開卷已見精蘊。或者推求點畫。參以耳鑑。瞞俗人則可。但恐王內史不肯爾。余平生見佳本亦多。然如武子所藏。不過三四。真可寶也。慶元庚申重九日。笠澤陸某書。

跋李少卿帖

宣城李氏。自推官至今八九世。詩人不絕。蓋時有如少卿者。振起之也。慶元庚申九月二十日。笠澤陸某書。

跋樂毅論

樂毅論橫縱馳騁。不似小字。瘳鶴銘法度森嚴。不似大字。此後世作者所以不可仰望也。庚申重九。陸某書。

跋李朝議帖

胡唐臣僧孺少汲直孺兄弟。爲江西名士。其朋友亦皆知名。朝議公蓋其一也。慶元庚申重九日。陸某書。

跋東方朔畫贊

元豐間。有德州士人搆畫贊示東坡。自言二百年前本家藏數世矣。東坡爲題之曰畫贊世多本。惟德州者第一。君所藏又爲德州第一。或聽之曰。此言君是德州人耳。其人雖不伏。亦大笑止。因觀武子所藏。聊識卷末。慶元六年九月甲子。陸某務觀書。

跋李虞部與范忠宣公啓

某家藏先大父遺書。其橫背多當時士大夫牋啓。刺字不過曰尙書左丞。或曰左丞中大而已。數十百人無一人異者。此建中靖國之元也。上距元祐又十餘年。風俗淳厚可知。況丞相忠宣公與虞部李公之相與親厚者乎。宜其不爲諂也。諸公或以今日耳目求之。過矣夫。慶元庚申九月二十一日。陸某書。

跋范文正公書

觀文正范公書札。如欲與韓魏公同薦李泰伯。見其進賢之誠。戒余安道。石守道避禍。見其愛惜人材之意。於虜賢哉。然泰伯卒棄不用。安道守道。俱陷患難。或至死不解。志士仁人至今以爲歎。信乎明哲保身之難也。慶元庚申九月二十九日。笠澤病叟陸某書。

跋東坡帖

成都西樓下有汪聖錫所刻東坡帖三十卷。其間與呂給事陶一帖。大略與此帖同。是時時事已可知矣。公不以一身禍福。易其憂國之心。千載之下。生氣凜然。忠臣烈士。所當取法也。予謂武子當求善工。堅石刻之。與西樓之帖。並傳天下。不當獨私囊褚。使見者有恨也。

跋廬衷父絕句

客懷耿耿自難寬。老傍京塵更鮮歡。遠夢已回窗不曉。杏花同度五更寒。  
廬衷父絕句。衷父名蹈。青社人。今寓犍爲郡。夾江縣佳士也。

跋四三叔父文集

先楚公捐館時。叔父未成童。已從章貢黃先生安時學喪禮。稷講無小差。蓋天資精敏如此。謹附書於遺文之後。以示後人。

跋王右丞集

余年十七八時。讀摩詰詩最熟。後遂置之者幾六十年。今年七十七。永晝無事。再取讀之。如見舊師友。恨間闊之久也。嘉泰辛酉五月六日。龜堂南窗書。

跋歐陽文忠公疏草

慶曆之盛。蓋庶幾漢文景矣。而賢人君子猶如是之難。文忠公之奏議。非獨不明諸公之讒也。身亦隨排陷中。睢州之謫是已。於虜。悲夫。嘉泰二年人日。笠澤陸某書。

跋盤澗圖

紹興己卯庚辰之間。予爲福州決曹。延平張仲欽爲閩縣大夫。朝暮相從。後四年。予佐京口。仲欽佐金陵。數以檄往來於鍾阜浮玉間。把酒道舊甚樂。又二十年。予使閩中。仲欽間居延平。數相聞。方約相過。而予蒙恩召還。遂有死生之異。言之悵然。仲欽之子爲西和守。寄此軸來求詩。蓋又二十餘年。予年七十有七矣。嘉泰政元歲辛酉五月十九日。陸某書。時予納祿已三年。居會稽山陰之三山。

跋爲琛師書維摩經

鄉僧琛上座求予書維摩詰所說法，欲刻石施四衆，以篤其母，會予病，不能卽如其請。琛十返不厭，孝哉！此僧，吾徒所樂從也。乃力疾爲書。嘉泰壬戌正月二十一日，放翁書。

跋東坡諫疏草

天下自有公論，非愛憎異同能奪也。如東坡之論時事，豈獨天下服其忠，高其辯，使荆公見之，其有不撫几太息者乎？東坡自黃州歸，見荆公於半山，劇談累日不厭。至約卜鄰以老焉。公論之不可掎如此，而紹聖諸人，乃遂其伎心，投之嶺海必死之地，何哉！此疏藏馮氏三世八十年矣，真可寶哉。嘉泰壬戌二月七日，笠澤陸某謹書。

跋東坡代張文定上疏草

張安道實一時偉人，以其論新法，諫用兵，則不得不爲忠，以其力排吳育，深惡石介，歐陽文忠公司馬文正公斥之於前，呂正獻公抑之於後，則似有可議者。然東坡此疏，則自與日月爭光。安道之爲人，不與焉。元祐初，盡起舊老，安道獨置不問。近臣請加恩禮，亦不報，更奪其宣徽使，議者以爲多出正獻公之意云。嘉泰壬戌二月七日，笠澤陸某謹書。

跋楊處士村居感興

一壺村酒膠牙酸，十數胡椒徹骨乾。隨著四婆裙子後，杖頭挑去賽蠶官。右畢仲荀景儒所記楊處士詩也。四婆，卽處士之配也。蘇疇季真家有處士夫妻像，野逸如生，恨不曾傳摹得之。它日見蘇氏子孫，尙可畢此志也。嘉泰癸亥，放翁書於三山老學菴北窗。

跋朱氏易傳

易道廣大，非一人所能盡。堅守一家之說，未爲得也。元晦尊程氏至矣，然其爲說亦已大異。讀者當自知之。嘉泰壬戌四月十二日，老學菴識。

跋晁以道書傳

晁以道著書，專意排先儒，故其言多而不通。然亦博矣。凡予家所錄本，多得於以道孫子闔。子闔本自多誤，予方

有吏役。故所錄失誤又多。不暇校定。及謝事。居山陰。欲得別本參考。又不能致。可恨也。壬戌四月十八日。老學菴記。時年七十八。

### 跋嵩山景迂集

景迂鄜時排悶詩云。莫言無妙麗。士雅動金門。蓋鄜人善作土偶兒。精巧。雖鄒下莫能及。宮禁及貴戚家。爭以高價取之。喪亂隔絕。南人不復知此句。遂亦難解。可歎。嘉泰壬戌四月二十四日。放翁識。

### 跋任德翁乘桴集

德翁感遇篇云。言行身不用。無適我所欲。長沙地卑溼。正可高閣足。其議賈生。可謂善矣。所抱如此。排擯至死。天下之不幸也。壬戌五月一日。老學菴書。

### 跋洪慶善帖

某兒童時。以先少師之命。獲給掃洒丹陽先生之門。退與子威講學。則兄弟如也。每見子威言洪成季慶善學行。然皆不及識。今獲觀慶善遺墨。亦足少慰。衰病廢學。負師友之訓。如愧何。嘉泰二年五月丁卯。陸某謹題。

### 跋浦郎中易老解

易學自漢以後。浸微。自晉以後。與老子並行。其說愈高。愈非易之舊。宋與有酸棗先生。以易名家。同時。种豹林亦講門傳授。傳至邵康節。遂大行於時。然康節欲以授伊川程先生。乃拒弗受。而伊川每稱胡安定王荆公易傳。以爲今學者所宜讀。惟此二家。王公乃自毀其說。以爲不足傳。著論悔之。易之難知如此。夜讀蜀蒲公易傳老子解。喟然歎曰。公於易與老子。蓋各自立說。迹若與晉諸人同。而實異也。書以遺其族孫申仲。試以予言請問。信何如也。嘉泰二年九月丁卯。笠澤陸某書。

### 跋陸子彊家書

吾友伯政持其先君子家問來。讀之。累日不厭。使學者皆能如此。孰得而警病之。雖有警者。吾可以無愧矣。乃令子韋鈔一通。置篋中。時覽觀焉。嘉泰壬戌十月二十三日。宗人某書。

### 跋子韋所藏國史補

予事喜蓄書。至輟衣食。不少吝也。吾世其有興者乎。嘉泰壬戌閏月幾望。放翁記。時年七十有八。以同修國史兼秘書監居六官宅第六位。

跋火井碑

予昔在征西幕府。嘗得小校言火山軍地枯燥。不可耕。鉏犁入地不及尺。烈火隨出。今江吳間。穿地尺餘則見水。北人聞之。亦未必信也。夜讀蜀彭君火井碑。乃知天地間何所不有。亦喜彭君之善記事也。嘉泰壬戌閏月十有五日。山陰陸某務觀書。

跋韓晉公牛

予居鏡湖北渚。每見村童牧牛於風林煙草之間。便覺身在圖畫。自奉詔紬史。逾年不復見此。寢飯皆無味。今行且奏書矣。奏後三日。不力求去。求不聽輒止者。有如此。嘉泰癸亥四月一日。笠澤陸某務觀書。

跋畫橙

嘉泰癸亥四月十六日。兩朝寶錄將進書。予以史官兼秘書監宿衛於道山堂之東直舍。茶罷取此軸摩挲久之。覺香透指爪。此物著霜時。予歸鏡湖小園久矣。山陰陸某務觀書。

跋臨帖

此書用筆。飄飄多態度。如雙鈞鍾王遺書。可寶藏也。笠澤陸務觀跋。時年七十九。當嘉泰癸亥四月二十八日。居於六官宅老學行菴。

跋米老畫

畫自是妙迹。其爲元章無疑者。但字卻是元暉所作。觀者乃并畫疑之。可歎也。嘉泰癸亥四月二十九日。陸務觀書。

跋潘幽老帖

潘幽老詩妙絕世。恨不見其字。今見此卷。無復遺恨矣。癸亥五月一日。笠澤陸某書。

跋薊林帖

先少師使淮南。實與薊林向公爲代。薊林作雍熙堂於廳中。堂之前有井。泉甘寒。宜茶。洪駒父聞之。寄詩云。何如喚取陸鴻漸。石鼎風爐來試茶。詩與除代堂帖同日到。薊林大以爲異。手書報先少師。今尙在也。伏觀公移文。奏牘稿。大節貫金石。然諸公所書。已可傳世。黃書之亦屋下架屋耳。而某家世所傳。足補薊林逸事者。則不可不書。以遺後人。嘉泰三年五月十日。陸某謹書。

跋陳魯公所草親征詔

紹興辛巳壬午之間。某由書局西府掾。親見丞相魯公經綸庶務。鎮服中外。有人所不可及者。然猶不知此詔爲出於公也。後四十有三年。某行年且八十。偶幸乘先犬馬。獲見公手稿於庫。公之謙厚不伐。與露才揚己者。相去何啻千萬哉。追懷盛德大度。如巨山喬嶽。凜然猶在目前。爲之隕涕。嘉泰三年五月十二日。門人前史官陸某謹書。

跋蔡忠懷送將歸賦

予讀送將歸之賦。爲之流涕。不爲蔡氏也。宋興百餘年。累聖致治之業。筮幾三代。熙寧元祐所任大臣。蓋有孟楊之學。稷契之忠。而朋黨反因之以起。至不可復解。一家之禍。福曲直。不足言也。爲之子孫者。能力學進德。不爲偏激。則承家報國。皆在其中矣。嘉泰三年五月十五日。山陰陸某書於浙江亭。

跋東坡書髓

成都西樓下石刻東坡法帖十卷。擇其尤奇逸者爲一編。號東坡書髓。三十年間。未嘗釋手。去歲在都下。脫敗甚。乃再裝緝之。嘉泰三年。歲在癸亥。九月三日。務觀老學菴北窗手記。

跋范元卿舍人書陳公實長短句後

紹興庚申辛酉間。予年十六七。與公實遊。時予從兄伯山。仲高。葉晦叔。范元卿。皆同場屋。六人者。蓋莫逆也。公實謂予小陸兄。後六十餘年。五人皆已隔存歿。予年七十九。而公實卽君宥字伯廣者。出此帖。恍然如與公實元卿聯杖屨。均茵憑也。爲之太息彌日。因識其末。雖然。使死而有知。吾六人者。安知不復相從。如紹興間乎。會當相與擊手一笑。尙何歎。嘉泰癸亥十月二十九日。笠澤釣叟陸某書。



跋謝師厚書

謝師厚早歲與歐陽充公王荆公梅直講江記注諸人遊。名甚盛。晚更蹭蹬。居穰下二十餘年。學愈進。文章愈成。獨後諸公死。予情悰。甥黃魯直。皆知名天下。然年運而往。士大夫鮮能知師厚者。今觀吾友傅漢孺所藏其上世墓刻。實師厚遺文。至送行詩。雜之宛陵詩中。殆不可辨。字則宋宣獻父子之流亞也。爲之太息。嘉泰癸亥立春後四日。笠澤陸某書。時年七十九。

跋雲丘詩集後

宋興詩僧不愧唐人。然皆因諸巨公以名天下。林和靖之於天台長吉。宋文安之於凌雲。惟則。歐陽文忠公之於孤山。惠勤。石曼卿之於東都祕瀆。蘇翰林之於西湖道潛。徐師川之於廬山。祖可。蓋不可殫紀。潛可得名最重。然世亦以蘇徐兩公許之太過。爲病。餘則徒得所附託。故聞後世。非能巋然自傳也。予觀雲丘詩。平淡閑暇。蓋庶幾可以自傳者。政使不遇呂居仁蘇養真朱希真王性之范至能。亦決不泯沒。況如予者。烏足爲斯人重哉。其徒覺淨以遺稿來。求題其後。十款吾門不厭。故爲之書。嘉泰四年二月乙巳。笠澤陸某書。

跋呂舍人九經堂詩

前輩以文章名世者。名愈高。則求者愈衆。故其間亦有徇人情而作者。有識之士。多以爲恨。如呂公九經堂詩。蓋自少時與昭德尊老諸公。師友淵源。講習漸瀆所得。又爲其子孫而發。故雄筆大論如此。於虜。凜乎其可敬畏也哉。嘉泰四年六月庚子。陸某書。

跋韓忠獻帖

方曩霄犯邊時。忠獻王首當禦戎重任。功冠諸公。後入輔帳幄。陳謨畫策。駕馭人材。鎮服虜情。自曾集賢以降。皆協贊而已。觀此帖。可概見也。嘉泰四祀六月辛丑。故史官山陰陸某謹識。

跋高大卿家書

子長大卿娶予表從母之女。故自少時相從。後又同入征西大幕。情分至厚。讀此數書。如見其長身蒼髯。意象軒舉也。嘉泰甲子歲夏六月壬寅。放翁陸某書。

卷二十

跋四十首

跋諸晁書帖

某之外大母清豐君。實巨茨先生女兒。而墓刻則景迂先生所作。故某每見昭德及東眷中表。每感愴也。況今行年八十。飾巾待盡。伏讀此卷。其情可知。嘉泰甲子六月既望。山陰陸某謹識。

跋南城吳氏社倉書樓詩文後

南城吳君子直兄弟作社倉。略倣古者斂散之法。築書樓。用爲子孫講習之地。其設意深遠。流俗殊未易測也。或者乃謂吳氏捐貲。以爲社會。凶歲免民於死徙。其有德於人甚大。後世當有與者。子孫不學。則不足以承之。此其築書樓之意。使吳氏之意信出此。乃市道也。市道不可以交鄉黨。自好之士。其可以與天交乎。吳君之意。蓋曰。吾爲是舉。非一世也。吾兄弟他日。要當付之後人。人不可知。吝則畜出。貪則漁利。怠荒則廢事。雖面命之。或不聽。於還言何有。惟學則免是三者之患。而社會雖百世可也。此吾兄弟之本旨。若夫富貴賤。我且不能自知。乃爲後人謀。而責報於荒忽。不可致詰之地。亦愚矣。吳君遺書行千餘里。示予以社會本末。因及諸公書樓紀述。予慨然歎以爲知吳君兄弟心者。莫予若也。故書之。嘉泰四年六月某日。山陰陸某書。

跋六一居士集古錄跋尾

始予得此本。刻畫精緻。如見真筆。曾有使入蜀。以寄張季長。及再得之。纔相距數年。訛闕已多。知古人欲傳遠者。必託之金石。有以也夫。嘉泰甲子六月二十二日。笠澤陸某謹識。

跋林和靖詩集

和靖人物文章。初不賴東坡公以爲重。況黃秦哉。若李端叔者。尤不足錄。讀竟使人浩歎。書之。所以慰和靖於泉下也。嘉泰甲子六月二十四日。放翁識。

跋米元暉書先左丞海岱樓詩

右米侍郎元暉書先大父題海岱樓詩一首。春秋公羊傳曰：山川有能潤於百里者，天子秩而祭之。觸石而出，膚寸而合，不崇朝而徧雨乎天下者，惟泰山爾。故大父云：起爲霖雨從膚寸，蓋言徧雨天下之澤，自膚寸而始也。米所書，誤以從爲成，遂失本意，可爲太息。嘉泰四年秋八月壬寅，山陰陸某書於三山老學菴。

跋蘇丞相手澤

某之先大父左丞平生所尊事願學者，惟丞相魏公。每爲門生言國朝輔相，德量巋然，莫如魏公與王文貞公。且所謂築太平之基，壽宗社之脈，養天下之氣者，他相雖賢，莫敢望。觀此奏稿，可概見也。嘉泰四年秋八月丙辰，山陰陸某謹識。

跋韓幹馬

大駕南幸，將八十年，秦兵洮馬，不復可見。志士所共歎也。觀此畫，使人作關輔河渭之夢，殆欲竄涕矣。嘉泰甲子十月二十一日，山陰陸某書。

跋義松

黃子邁之爲蓮城，以最聞。予以相距遠，不能知其詳。然草木無知，造物無心，太平無象，其所感猶如此，則是邑之民，其有以不友不敬，至庭造獄者乎？予將求諸邑人而紀之，未暇也。嘉泰甲子歲十一月甲子，山陰陸某書。

跋林和靖帖

祥符天禧間，士之風節文學名天下者，陝郊魏仲先、錢塘林君復二人，又皆工於詩。方是時，天子修封禪，告太平，有二人在天下，麟鳳芝草不足言矣。君復書法，又自高勝絕人。予每見之，方病不藥而愈，方飢不食而飽，忽得觀上竺廣慧法師所藏二帖，不覺起敬立。法師能捐一石，刻之山中，使吾輩皆得墨本，以刮目散懷，亦一奇事也。嘉泰甲子歲十二月丁卯，山陰陸某務觀書。

跋東坡集

此本藏之三十年矣。嘉泰甲子歲十二月，遺燼幾焚之。予緝成編，比舊本差狹小，乃可愛。遂目之曰焦尾本云。十四日，山陰陸某書。

跋陶靖節文集

張續季長學士自遂寧寄此集來。道中失調護。前後皆有壞處。遂去之。而存其偶全者。末有年譜辨正。別緝爲編。云。開禧元年正月四日。務觀書。

跋三近齋餘錄

右外兄元城王正夫所作。正夫名從。元豐中書舍人震字子發之子。仕至上饒守。云。開禧改元正月庚申。務觀識。

跋望江菊君集

徐常侍鼎臣送望江張明府詩云。無使千年後。空傳魏令名。則魏令之名。在唐著矣。開禧改元歲乙丑。二月二十七日。山陰陸務觀書。時年八十有一。

跋吳越備史

錢氏諱佐。故以左爲上。凡官名左字者。悉改爲上。此書所謂上右者。乃左右也。

又

吳越在五代及宋興。最爲安樂少事。然廢立誅殺猶如此。方斯時。吾家先世守農桑之業於魯墟梅市之間。無一人仕於其國者。真保家之法也。開禧乙丑。九月四日。山陰陸某書於三山書巢。

跋僧帖

方外之士。發揚其先德。累世不懈。吾輩亦可少愧矣。開禧乙丑九月五日。陸某書贈觀師。余年八十一。識其家四世矣。安得不爲陳人乎。因以寓歎。

跋卿師帖

本朝小楷。至宋宣獻後。僅有道士陳碧虛一人。今見吾里中前輩卿師所書。則蕭散小不逮碧虛。而法度森嚴無媿者。亦名筆也。後人善藏之。開禧元年乙丑歲。九月丁亥。山陰陸某務觀題。時年八十有一。

跋松陵倡和集

皮襲美當唐末遜於吳越。死焉。有子光業爲吳越相。子孫業文。不墜家聲。至襲美四世孫公弼。以進士起家仕慶

曆嘉祐間。爲韓魏公所知。雖不甚貴顯。亦當世名士也。方吳越時。中原隔絕。乃有妄人造謗。以謂襲美驟節於某賊。爲其翰林學士。新唐書喜取小說。亦載之。豈有是哉。比唐書成時。公弼已死。莫與辨者。可歎也。開禧元年九月十四日。山陰陸某務觀書於松陵倡和集之後。

跋潛虛

學者必通易。乃能以其緒餘通玄。玄既通矣。又以其餘及虛。非可以一旦驟得也。劉君談虛如此。則其於易與玄可知矣。司馬丞相乃謂己學不足知易。故先致力於玄。蓋謙云耳。開禧乙丑十一月十八日。笠澤陸某書。

跋呂成叔和東坡尖又韻雪詩

古詩有倡有和。有雜擬追和之類。而無和韻者。唐始有之。而不盡同。有用韻者。謂同用此韻耳。後乃有依韻者。謂如首倡之韻。然不以次也。最後始有次韻。則一皆如其韻之次。自元白至皮陸。此體乃成。天下靡然從之。今蘇文忠集中。有雪詩。用尖又二字。王文公集中。又有次蘇韻詩。議者謂非二公莫能爲也。通判澧州呂文之成叔。乃頓和百篇。字字工妙。無牽強湊泊之病。成叔詩成後四十餘年。其子棊乃以示予。予固好詩者。然讀書有限。用力甚薄。觀此集。有愧而已。乃書集後。而歸其本。呂氏。開禧元年乙丑十一月丙申。笠澤陸某務觀書。

跋花間集

花間集。皆唐末五代時人作。方斯時。天下岌岌。生民救死不暇。士大夫乃流宕如此。可歎也哉。或者亦出於無聊。故邪。笠澤翁書。

又

唐自大中後。詩家日趨淺薄。其間傑作者。亦不復有前輩闕妙渾厚之作。久而自厭。然枯於俗尙。不能拔出。會有倚聲作詞者。本欲酒間易曉。頗擺落故態。適與六朝跌宕意氣相近。此集所載是也。故歷唐季五代。詩愈卑。而倚聲者。輒簡古可愛。蓋天寶以後。詩人常恨文不迨。大中以後。詩衰而倚聲作。使諸人以其所長。格力施於所短。則後世孰得而議。筆墨馳騁則一。能此不能彼。未易以理推也。開禧元年十二月乙卯。務觀東籬書。

跋韓晉公子母懷

予平生見三尤物。王公明家韓幹散馬。吳子副家薛稷小鶴。及此子母牛是也。不知未死間。尙復眼中有此奇偉否。開禧二年四月甲子。陸務觀老學菴北窗書。

跋韓立道所藏蘭亭序

觀此本蘭亭。如見大勳業鉅公於未央庭中。大冠若箕。長劍拄頤。風采凜凜。雖單于不覺自失。况餘子有不汗洽。股栗者哉。開禧丙寅歲四月十有三日。陸某年八十二。

跋龔氏金花帖子

右龔氏家藏其先世金花帖子。嘉泰中。陳翰林考質史。諜以爲先書姓名散報。始於端拱中。宋太素尙書知貢舉時。自建隆至端拱。取士已久。始克舉此故事。然予按宋公有追念策名時詩。凡千言。略云。吉音來碧落。帖子報紅牋。清夜驚神王。朧明到省前。風中宮漏盡。日出勝繩懸。宋公蓋建隆二年進士。則國初已有前一夕報帖之事。唐制初未嘗廢。若曰。五代草創。止用紅牋。至端拱初。乃加金華如唐時。則亦細事耳。不得云始舉唐故事也。世必有知者。予復書此於後。以待博洽君子云。開禧丙寅夏四月丙寅。山陰陸某書。

跋曾文清公奏議稿

紹興末。賊亮入塞。時茶山先生居會稽禹跡精舍。某自勅局罷歸。略無三日不進見。見必聞憂國之言。先生時年過七十。聚族百口。未嘗以爲憂。憂國而已。後四十七年。先生曾孫藉以當日疏稿示某。於今某年過八十。任忝近列。又方王師討殘虜時。乃不能以塵露求補山海。真先生之罪人也。開禧二年。歲在丙寅。五月乙巳。門生山陰陸某謹書。

跋曾文清公詩稿

河南文清公。早以學術文章擅大名。爲一世龍門。顧未嘗輕許可。某獨辱知。無與比者。士之相知。古蓋如此。方西漢時。專門名家之師。衆至千餘人。然能自見於後世者寡矣。揚子惟一侯芭。至今誦之。故識者謂千人不爲多。一人不爲少。某何足與乎。此讀公遺稿。不知衰傑之集也。開禧丙寅歲五月乙巳。門生笠澤陸某謹書。

跋魚計賦

某恭聞微祖宣和末。將下罪己詔。學士王孝迪嘗直不召。願謂輔臣曰。非小字不能作。遂召肅愍公。公初不在北門。既至。辭以非職守。不許。遂授以聖意。下筆盡。不數刻進御。今載在國史。與三代訓誥並驅。蓋千百年間詔令所未有也。晚讀魚計堂賦。瞻麗超軼如此。則施之右手筆。固宜絕人遠甚。某嘗見公遺像於友人趙恬家。英氣如生。恨不得獨拜牀下。致欣慕之意。今得記所聞於賦後。亦幸矣。開禧二年六月己巳。笠澤老民陸某謹書。

跋徐待制詩稿

予以乾道庚寅入蜀。幾十年而歸。故人在朝者。惟許昌韓无咎。握手道舊。因相與論當世知名士。无咎獨稱待制徐公。以爲文辭辨論。有貞元元和間諸賢之遺風。恨予不及識。因誦其詩句。信奇作也。後三十年。徐公之子植。以遺稿一編示予。屬以序引。予與待制雖出處不同時。然嘗歎愛其筆墨。則亦願託名卷首。而待制之文。既於火。所餘財百之二。則序亦無自作。乃姑書此附於後。它日得全書。紬繹其妙處而論載之。尙未晚也。開禧二年六月某日。山陰陸某書。

跋周益公詩卷

紹興辛巳。予與益公相從於錢塘。去題此詩時十一年。予年三十七。益公少予一歲。後二年。相繼去國。自是用捨分矣。今益公捨我去。所不知者。相距幾何時耳。開禧丙寅九月二十五日。山陰陸某謹識。

跋樊川集

唐人詩文。近多刻本。亦多經校讐。惟牧之集。誤繆特甚。予每欲求諸本訂正。而未暇也。書以示子逢。尙成吾意。開禧丙寅十一月二十七日。放翁書。

跋周侍郎奏稿

某生於宣和末。未能言。而先少師以畿右轉輸饟軍。留澤潞。家寓滎陽。及先君坐御史徐秉哲論罷。南來壽春。復自淮徂江。聞關兵間。歸山陰舊廬。則某少長矣。一時賢公卿與先君遊者。每言及高廟盜環之寇。乾陵斧柏之憂。未嘗不相與流涕哀慟。雖設食。率不下咽引去。先君歸。亦不復食也。伏讀侍郎周公論事。勝子。猶想見當時忠臣烈士憂憤感激之餘風。於虜。建炎紹興間。國勢危蹙如此。而內平羣盜。外捍強虜。卒能披草莽。立社稷者。諸賢之

力爲多。某故具載之。以勵士大夫。儻人人知所勉。則北平燕趙。西復關輔。實度內事也。開禧丁卯歲正月丁亥。故史官陸某謹書。

跋周侍郎尋姊妹帖

方建炎多故。羣盜如林。士大夫家糧。有盡室不知在亡者。觀周公所書。可爲流涕。六七十年来。在仕在野。皆安其生。贊老者。字幼者。戰死者。可不知所自邪。尙勉思所以報。開禧三年正月丁亥。山陰陸某書。

跋鮑參軍文集

鮑明遠。宋元嘉中人。比陶淵明謝靈運。差爲晚出。然與靈運詩名相埒。體製亦頗相類。故世稱鮑謝云。開禧三正九。放翁書。

跋南華真經

南華真經并音二冊。籤題皆友人莆陽方伯謨書。伯謨下世已二年矣。哀哉。開禧丁卯二月四日。老學菴識。

跋與周監丞書

某頃得監丞公書。作報如此。後二十餘年。公家持以來。屬以題數字於後。乃爲記歲月。公諸子多賢。不幸有早世者。今惟主簿君以力學承其緒。他日仕途。有嶄然頭角者。必吾主簿君。恨毫期已迫。不及見之耳。開禧三年三月丙子。渭南伯陸某書於山陰澤中老學菴。

再跋皇甫先生文集後

司空表聖論詩有曰。愚嘗覽韓吏部詩。其驅駕氣勢。掀雷決電。撐挾於天地之垠。物狀其變。不得鼓舞而徇其呼吸也。其次。皇甫祠部文集外所作。亦爲迥逸。非無意於深密。蓋或未遑爾。據此。則持正自有詩集孤行。故文集中無詩。非不作也。正如張文昌集無一篇文。李習之集無一篇詩。皆是詩文各爲集耳。表聖直以持正詩配退之。可謂知之。然猶云未遑深密。非篤論也。予讀之。蓋累歎云。開禧丁卯四月二十一日。某再書。

跋漢文帝後元年三月詔

漢文此詔。與詩之七月書之無逸何異。吾以此知文景太平之有自也。雖然。豈獨爲天下哉。十室之邑。千金之產。



儻能思是言。其有至於喪敗者乎。庚申五月十七日。陸某書。

跋張魏公與劉察院帖

與人同功。人用而已。捨君子不敢言勞。與人同辜。人免而已。窮君子不敢逃責。非能異夫人也。理固如是也。不然則亡恥已。使御史公無恙。得予此說。其將以爲能知言乎。

跋世父大夫詩稿

世父大夫公。自幼得未疾。以左手作字。性喜鈔書。嘗鈔王岐公華陽集百卷。筆鋒無倦意。豈特其書可貴重哉。亦可見其爲人矣。

卷三十一

跋四十七首

跋魯直書大戴踐阼篇

上古之文。幸不泯者。率非後世所可及。不必壞魯壁發汲冢而得之。乃可信也。丹書之辭如此。武王之銘如此。微大戴禮載之。可置疑哉。某鄉先生傅公子駿爲學者言。洪範自無偏無黨至歸其有極三十二字。皆古所傳爲人君之常訓。箕子申以告武王。吳棫才老著尚書稗傳。以爲得此說於虞仲琳少崔少崔學於傅公。此三十二字。與丹書三十九字。一傳於箕子。一傳於師尙父。武王敬受力行之。卜世卜年之永。有所自矣。開禧三年五月辛卯。故史官陸某識於黃太史所書踐阼篇後。以遺廬陵彭君孝求。

跋唐昭宗賜錢武肅王鐵券文

某按唐昭宗乾寧四年。遣中使焦鏗賜吳越武肅王鐵券。以八月壬子至國。是歲。武肅始兼領鎮東節。出師大敗淮南兵十八營。定婺蘇湖州。而鐵券適至。蓋其國始盛時也。及忠懿王入朝。以其先王所藏玉冊鐵券。置之祖廟。不敢以自隨。淳化元年。杭州悉上之於朝。時忠懿王已薨。太宗皇帝復以冊券賜王之子安僖王惟瓚。安僖王薨。券歸文僖公惟演。文僖公薨。券傳仲子霸州防禦使晦。霸州侍仁宗皇帝。燕間。帝問先世所賜鐵券。欲見之。

霸州并三朝御書以進。帝爲親識御書之末，復賜焉。文傳之孫開府公景臻，尙秦魯國大長公主。某年十二三時，嘗侍先夫人，得謁見大主，鐵券實藏臥內，狀如箭瓦，今七十餘年，乃得見錄本於武肅諸孫樞家。後十字，蓋文僊手書。某家舊藏文僊書帖，亦有押字，皆與此同。武勝軍節度使印，則文僊尹洛時所領鄧州節鉞也。開禧三年六月乙巳，山陰陸某謹書。

跋司馬端衡畫傳燈圖

司馬六十五丈，抱負才氣，絕人遠甚。方少壯時，以黨家不獲施用於時，欲有以寓其胸中浩浩者，遂放意於畫。落筆高妙，有顧陸遺風。某嘗以通家之舊，親聞其論畫，袞袞終日，如孫吳談兵，臨濟趙州說禪，何其妙也。每恨是時不能記錄一二，以遺後之好事者。今獲觀傳燈圖，恍如接言論風指，時稽首太息，不能自已。開禧丁卯歲十月丁未，山陰陸某謹題。

跋呂伯共書後

紹興中，某從曾文清公遊。公方館甥呂治先，日相與講學。治先有子未成童，卓然穎異，蓋吾伯共也。後數年，伯共有盛名，從之學者以百數。不幸中道奄忽，而予幾九十，尙未死，攬其遺墨，大抵忠信篤敬之言也。爲之涕下。開禧丁卯歲十二月乙巳，山陰陸某書。

跋張敬夫書後

隆興甲申，某佐郡京口。張忠獻公以右丞相督軍過焉。先君會稽公嘗識忠獻於豫南鄭時，事載高皇帝寶錄。以故某辱忠獻顧遇甚厚。是時敬父從行，而陳應求參贊軍事，馮園仲查元章館於予廡中，蓋無日不相從。迨今讀敬父遺墨，追記在京口相與論議時，真隔世事也。開禧丁卯十二月乙巳，山陰陸某書。

跋劉戒之東歸詩

乾道中，予與戒之同在宣撫使幟中，同舍十四五人，宣撫使召還，予輩皆散去。范西叔宇文叔介最先下世，其餘相繼凋落。至開禧中，獨予與張季長猶存。今春，季長復考終於江原。予年開九秩，獨幸未書鬼錄，偶得戒之郎君市征君所藏送行詩，觀之，恍然如隔世事也。爲之流涕。丁卯十二月乙丑，渭南伯陸某書於山陰老學菴。

跋秦淮海書

黃豫章秦淮海。皆學顏平原真行。豫章晚尤自稱許。淮海則退避。不肯以書自名。亦各行其志也。嘉定改元四月己酉。山陰陸某書。

跋柳書蘇夫人墓誌

近世注杜詩者數十家。無一字一義可取。蓋欲注杜詩。須去少陵地位不大遠。乃可下語。不然。則勿注可也。今諸家徒欲以口耳之學。揣摩得之。可乎。書家以鍾王爲宗。亦須升鍾王之堂。乃可置論耳。爾來書法中絕。求柳誠懸輩。尙不可得。書其可遽論哉。然予爲此言。非獨觸人。亦不善自爲地矣。覽者當粲然一笑也。嘉定元年四月己酉。陸某書。

跋朱希真所書雜鈔

朱先生與諸賢。當建炎間。裔夷南牧。羣盜四起時。猶相與講學如此。吾輩生平世。安居鄉里。乃欲飽而嬉。可乎。嘉定之元。四月乙酉。陸某書於山陰老學菴。時年八十有四。

跋爲子適書詩卷後

子適持正紙求錄詩。期年矣。以乃翁衰疾。不忍迫蹙。予更以此念之。爲寫終此卷。然此兒近者時時出所作。皆大進。論建安黃初以來。至元和後詩人。皆有本末。歷歷可聽。吾每爲汗出。因併記之。嘉定戊辰歲五月乙巳。放翁書。時年八十有四。

跋呂文靖門銘

一言可以終身行之者。其恕乎。此聖門一字銘也。詩三百。一言以蔽之。曰思無邪。此聖門三字銘也。其簡且盡如此。學者苟能充之。雖入聖域不難矣。丞相申國文靖呂公作門銘。自忠孝十有八字。廣吾夫子之訓。以遺後人。某得本於公元孫祖平。敢再拜書其後。致願學之意。嘉定元年夏五月辛亥。山陰陸某謹識。

跋傅給事竹友詩稿

王逸少寫經換鵝。給事傅公籠鵝換竹。二者皆山陰勝絕事。然換鵝事。人皆能道之。換竹事。未甚著。鄉人以爲恨。

獨某曰：是不足怪也。逸少志在物外，不肯輕爲世用，故換鵝事易傳，給事方南渡之初，忠義大節爲一時稱首，雖困於讒誣，用之不盡。然至今聞其風者，可立衰懦，則換竹事固應不傳。蓋所見於世者大也。給事遺文百卷，今藏秘閣，某領策府時見之。嘉定元年七月庚申，陸某謹識。

跋陳伯予所藏樂毅論

世傳中山古本蘭亭之流，帶右天五字，有殘闕處。於是士大夫所藏蘭亭悉然。又謂樂毅論古本至一海字止。於是凡樂毅論亦至海字而亡。其餘妄僞亂真，大抵如此。今伯予此軸皆佳。後一本尤數腴可愛。未可以海字爲定論也。嘉定戊辰歲七月己未，山陰陸某務觀書。時年八十有四。

跋伯予所藏黃州兄帖

某之從父兄故黃州使君遺墨，伯予書其後，發揚大節至矣。伏讀感涕，不知所云。先兄諱沈，字子東，仕至朝奉大夫。嘉定元年七月己未，山陰老民陸某謹書。

跋詹仲信所藏詩稿

予平生作詩至多，有初自以爲可，他日取視，義味殊短，亦有初不滿意。熟觀乃稍有可喜處。要是去古人遠爾。詹仲信何處得予斷稿以見示，爲之屢歎。乃題其後歸之。嘉定改元六月壬辰，山陰陸某務觀書於三山老學菴。年八十四。

跋陳伯予所藏蘭亭帖

予監定此本，自是絕佳。然亦不必云唐舊刻也。卷末數跋，皆吾友王君王所錄黃太史傳直語，竊恐未必然。蓋周孔無過，蘭亭筆法亦無過。學者步亦步，趨亦趨，猶或失之，豈可以輕心慢心觀之哉。若以夫子嘗自謂有過，孟子云周公之過，遂據以爲周孔有過，乃醉夢中語也。嘉定改元十月庚午，陸某書。

跋坡谷帖

先大父左轄元祐中，自小宗伯自請守穎，逾年移南陽，而蘇公自北扉得穎，與大父爲代。此當時往來書也。書三幅，前後二幅藏叔父房，其一幅則從伯父彥遠得之。亡兄次川又得於伯父，此是也。傳授明白，可以不疑。而或者

疑其出於摹倣。識真者寡。前輩所歎。嘉定元年十二月乙亥。山陰陸某謹識。

跋山谷書陰真君詩

此石刻在夔州漕司白雲樓下。黃書無出其右者。嘉定己巳四月辛卯。放翁書。

跋呂尚書帖

右尚書呂公給事傅公往來書二卷。書曰。昔先正保衡。作我先王。語曰。起予者商也。蓋臣當有以作其君。弟子當有以起其師。而況朋友之際乎。二公可謂無負於古道矣。使此書廣傳。安知百世之下。無興起者。嘉定己巳秋七月辛亥。山陰陸某謹識。

跋傅給事帖

紹興初。某甫成童。親見當時士大夫。相與言及國事。或裂眦嚼齒。或流涕痛哭。人人自期以殺身翊戴王室。雖醜裔方張。視之蔑如也。卒能使虜消沮退縮。自遣行人請盟。會秦丞相檜用事。掠以爲功。變恢復爲和戎。非復諸公初意矣。志士仁人。抱憤入地者。可勝數哉。今觀傅給事與呂尚書遺帖。死者可作。吾誰與歸。嘉定二年七月癸丑。陸某謹識。

跋熊舍人四六後

裕陵見伯通外制。手批付中書曰。熊本文詞。朕自知之。荆公亦曰。讀熊君奏報。如面相語。

跋臨汝志

歐陽澈字德明。撫州臨川人。徙崇仁。金虜犯闕。上書請身使虜庭。馭親王以歸。不報。建炎初。伏闕上書論大臣誤國。太學生陳東亦上書。所言略同。遂併誅二人。年三十一。車駕渡江。贈承事郎。紹興初。贈朝奉郎。祕閣修撰官。其三子賜田十頃。

跋尼光語錄

予登豫章西山。其上蓋有光禪師塔焉。及來成都。又得師所說法要。博辯奇偉。雷霆一世。猶有蜀忠文公立朝堂。不燒於死生禍福之遺風。信其爲范氏女子也。笠澤漁隱陸某。

跋程正伯所藏山谷帖

此卷不應攜在長安逆旅中。亦非貴人席帽金絡馬傳呼入省時所觀。程子他日幅巾筇杖。渡青衣江。相羊喚魚。潭瑞草橋清泉翠樾之間。與山中人共小巢龍鶴菜飯。掃石置風爐。煮蒙頂紫茁。然後出此卷共讀。乃稱爾。

跋張待制家傳

待制公躡於仕宦。晚途僅得一郎吏。而感激國難。冒兵渡河北行。忠義之氣。可沮金石。方其客死靈丘。寓骨雲中。時雖夷狄異類。亦爲賢涕也。今其家寔微一孫。未去天官侍郎選。公卿大夫。乃未有表出之。以爲忠義勸者。誠某所不識也。

跋柳氏訓序

方玘之爲是書也。瓌已長矣。詩曰。誨爾諄諄。聽我藐藐。悲夫。

跋祠部集

祠部叔祖詩文至多。今皆不傳。此小集得之書肆。蓋石氏所藏也。某謹識。

跋涪災頌

高道傳言。此頌蓋武陵張尊師作。尊師亦號白雲子。豈以此故。遂誤爲子微乎。玉笈齋書。

跋輦論

高僧傳。肇公化時。年三十一耳。所著書乃傳百世。吾曹老而無聞。可愧也。

先楚公奏檢

舊有海陵時錄白元本。巨編大字。有先左丞親書更定處。今不復存。此本紹興中先少師命筆史傳錄者。某識。

跋宗元先生文集

宗元先生吳貞節。唐史有傳。以歌詩名天寶中。此一卷。蓋見雲章寶室云。放翁書。

跋韓子蒼語錄

此數人范季隨周士所記也。周士沒後數年。得之於其子。然余舊聞周士道韓公語極多。尙恐所記不止於此。當

更訪之。

跋孟浩然詩集

此集有示孟郊詩。浩然開元天寶間人。無與郊相從之理。豈其人偶與東野同姓名邪。晁伯以謂岳陽樓止有前四句。亦似有理。

續考之。伯以之說蓋不然。大抵浩然四十字詩。後四句率覺氣索。如洞庭寄閣九。歲暮歸南山之類皆然。杜少陵評浩然詩云。新詩句句盡堪傳。豈當時已有此論。故少陵爲揜之邪。

適越留別譙縣張主簿詩。初云得與故人會。後云浮雲去吳會。此亦是吳與會稽也。

跋出疆行程

此一書。蓋陳魯公出使時官屬所記。不知爲何人也。文詞雖鄙淺。事頗詳洽。故錄之。

淳熙己酉秋。錢愷之子端忠爲金部外郎。予在僂曹。與之同廊。日會食。嘗問此書誰所作。端忠云。刁靡也。靡字文叔。頗有文。不應鄙淺如此。恐未必然也。放翁書。

跋李衛公集

韋執誼之爲人。順宗實錄及唐書載之甚詳。正人所唾罵也。今觀李衛公祭文。稱譽之乃如此。衛公之言固過矣。史官所書。無乃亦有溢惡者乎。毀譽之可疑如此者長矣。可勝歎哉。執誼作相時。實錄言嘗遷中書侍郎。同平章事。而史不書。衛公又以爲僕射。雖小節。亦聊附見於此。

跋徐節孝語

仲車名在天下。孰不知尊仰者。雖無蘇公所云可也。況它人乎。此集前後所載。悉當削去。陸某識。

跋趙渭南詩集

唐人如韋蘇州五字。趙渭南唐律。終身所作多出此。故能名一代云。

跋石鼓文辨

予紹興庚辰辛巳間。在朝路。識鄭漁仲。好古博識。誠佳士也。然朝論多排詆之。時許至三館借書。故館中尤不樂

云。

跋西崑酬唱集

祥符中。嘗下詔禁文體浮豔。議者謂是時館中作宣曲詩。宣曲見東方朔傳。其詩盛傳都下。而劉楊方幸。或謂頗指宮掖。又二妃皆蜀人。詩中有取酒臨邛遠之句。賴天子愛才士。皆置而不問。獨下詔調切而已。不然。亦殆哉。

跋兼山家學

予始得此書時。猶未識昌國。後五年。始同朝。詳觀其爲人。誠法度之士。間相與論學。輒忘昏且。乃知其得於和先生者深矣。昌國名其所居曰良齋。亦以嗣兼山之學歟。

跋淮海後集

悼王子開五詩。賀鑄方回作也。子開名邁。居江陰。既死。返葬趙州臨城。故有和氏干將之句。方回詩。今不多見於世。聊記之以示後人。放翁。

跋張季長中庸辨擇

此書大概似陳瑩中初著尊堯集。識者當自得之。

跋法書後

法書一編付子適。能熟觀之。亦可得筆法之梗概矣。

跋李太白詩

此本頗精。今當塗本雖字大可喜。然極謬誤。不可不知也。

跋重廣字說

字說凡有數本。蓋先後之異。此猶非定本也。

跋巖壑小集

朱希真夜熱坐寺庭五字一篇。及病虎過酒樓二古詩。皆出同時諸人上。

跋王元澤論語孟子解



元澤之歿。詔求遺書。荆公視篋中。得論語孟子解。皆細字。書於策之四旁。遂以上之。然非成書也。

## 卷二十一

## 墓誌銘四首

## 右朝散大夫陸公墓誌銘

陸氏自漢以來。爲天下名族。文武忠孝。史不絕書。比唐亡。惡五代之亂。乃去不仕。然孝弟行於家。行義修於身。獨有古遺法。世世守之。不以顯晦易也。宋興。歷三朝數十年。秀傑之士畢出。太傅始以進士起家。楚公繼之。陸氏衣冠之盛。復如晉唐時。往往各以所長見於世。而材略偉然可紀者。如公是也。公諱寔。字元珍。曾祖吏部郎中。直昭文館。贈太傅。諱翰。太傅兩子。伯曰萬載。縣令。諱琪。縣令。生宿州符離縣主簿。贈朝奉大夫。儼。仲曰國子博士。贈太尉。諱珪。實生楚公。仕至尙書左丞。諱佃。公。楚公第五子。大夫早卒。無嗣子。楚公命公後焉。任爲假承務郎。調台州寧海縣丞。行令事。遇事立決。老吏宿姦。畏懼縮粟。不敢輒動。巫以淫祀惑民。悉捕寘於法。習俗爲變。會省丞官。父老。送公出境。爭賸金帛。公拒之不可。至或泣下。乃取絲一鉤。歷杭州仁和縣尉。越州司工曹。事以舉。爲蘇州長洲縣。縣號繁劇。且久不治。公至。從容如無事。而縣以大治。以最遷。即就命通判真州事。發姦伏。申冤枉。號稱神明。州多大陂澤。用事者方興水利。官吏人人懷希望。意謂且得厚賞。公獨不肯與。人莫測也。而覆覈多誕設。遂置詔獄。惟公獨免。盜起青溪。張甚。至出大兵。監司知公長於治劇。共薦爲隨軍勘計官。軍食漕浙江。公建議。潮汝羸縮。不可必。請令士卒各持三日糧。舟至龍山。果失期。賴以無乏。而主將怒護舟吏。欲立斬之。莫敢爭者。公獨慨然曰。江行與平地異。非吏罪。且戮二人。衆必大駭。怯者求死。強者委舟竄。立敗事矣。乃議分所載。募民陸輦以行。舟遂輕。皆以時會。雖沙磧湍瀨無害也。衆多其謀。而主將終以戾其意不說。凡與軍事者皆超擢。獨公更爲通判登州。徙制置發運司幹當公事。未赴。除江南東縣轉運判官。實代兄中散公寘。當時以爲榮。部中饒。公便宜留。上供米六十萬石。損直予民。而糴於他郡。官無所亡失。而民賴以濟。避親嫌。移提舉京畿常平等事。與轉運提點刑獄皆置司。陳留會金人犯京師。遊騎突至。轉運提點刑獄倉卒避去。故事兩司皆兼提舉將兵及保甲。而常平司弗與。

也。及是。公獨不動。以便宜召集燕山戍卒數千。雜以保甲。日夜部勒習教。命舊將張憲統之。扼據要害。虜既不能犯。而潰卒亦不爲亂。措置號令。赫然有大將風采。因問道上章自劾。且乞犒軍。詔釋罪。從所請。方是時。虜剽掠四出。陳留適當其衝。微公幾殆。議者謂宜出入兵間。以盡其材。而公罷歸矣。屏居常州無錫縣。讀書賦詩。以自適。初甚貧約。公才具高。既不仕。因治產業。甫數年。家大贍足。然取予有大略。不務苛碎。凶年賑貸。至傾倉庾。無少計惜。鄰里疾病嫁娶喪葬。有弗給者。不待告而賙之。然必以暮夜。曰。吾畏人知也。蓋公雖退而家居。然有所爲。猶卓卓如此。使得盡其材於多故時。視古所謂功名之士。豈遠哉。初。太傅遇異人。得秘訣。服氣仙去。公晚而嗣其學。起居康寧。齒髮不衰。疾已革。猶不亂。以紹興十八年閏八月四日卒。年六十有一。官至右朝散大夫。遺命葬太湖之東。大浮山之原。以宜人徐氏祔。宜人尙書禮部員外郎君平之女。有賢德。善筆札文辭。先公二十有九年卒。四男子。演某官。仕以廉直稱。亦以故不得志。後公十一年卒。淙某官。沒某官。渲某官。一女子。適某官段彬。孫若。公既葬十有五年。淙等始屬公從子某爲銘。銘曰。

陳君墓誌銘

以公之材。遭時艱虞。馳騁功名。公蓋有餘。世方尙法。豪傑斥疎。亦或知之。旁睨歎歎。卒斂智略。老於里閭。二十三年。燕及憚狐。大浮之原。其下震澤。春秋奉祠。世世無斁。

建炎四年。先君會稽公奉祠洞霄。屬中原大亂。兵燹南及吳楚。謀避之遠遊。而所在盜賊充斥。莫知所鄉。有惟悟道人者。東陽人。爲先君言同邑有陳彥聲。名宗譽。其義可依。其勇可恃。彥聲事親孝。父死。貲百萬。悉推以予弟。脫身躬耕。復致富饒。宣和中。盜發旁郡。東陽之民。有將應之者。賴彥聲爲言逆順禍福。得不從亂。安撫使劉忠顯公。因命悉將其鄉之兵。彥聲設方略。明部伍。盡出家貲。激使用命者。有潰卒阻林莽。且數百人。彥聲馳一馬自往。招之。皆感泣。願効死。東陽當橫潰中。而能獨全。不爲盜區者。彥聲之力也。劉公奇其材。欲官之。辭不肯受。至建炎初。羣盜四合。州縣復以禦賊事屬彥聲。方是時。所立尤壯偉。及論賞。則又固辭。先君聞之大喜。曰。是豪傑士。真可託死生者也。於是奉楚國太夫人間關適東陽。彥聲越百里來迎。旗幟精明。士伍不譁。既至。屋廬器用。無一不具者。家人如歸焉。居三年。乃歸。彥聲復出境餞別。泣下霑襟。已而先君捐館舍。予兄弟遊宦四方。念無以報之。每惕然。



公諱幾。字吉父。其先贛人。徙河南之河南縣。曾祖識。泰州軍事推官。妣祖氏。寧晉縣君李氏。祖平。衢州軍事判官。贈朝散大夫。妣慈利縣君劉氏。考準。朝請郎。贈少師。妣魏國太夫人孔氏。公有器度。真禮部侍郎孔武仲。祕閣校理平仲。歎譽以爲奇童。未冠。從兄官鄆州。補試州學爲第一。教授孫緄亦贛人。異時讀諸生程試。意不滿。輒曰。吾江西人。屬文不爾。諸生初未諭。及是。持公所試文。矜語諸生曰。吾江西人之文也。乃皆大然。已而入太學。屢中高。等。聲籍甚。會兄弼提舉京西南路學事。按部。病死。無後。特恩補公將仕郎。公以太夫人命。不敢辭。試吏部。銓中優等。賜上舍出身。擢國子正。兼欽慈皇后宅教授。遷辟雍博士。兼編修道史檢閱官。時禁元祐學術甚厲。而以剽剝。經義絕倫者。而他場已用元祐體見黜。公爭之。不可。明日。會堂上。用其文誦之。一坐聳聽稱善。爭者亦奪氣。及啓封。則內舍生陳元有也。元有遂釋褐。文體爲少變。學者相賀。改宣義郎。入祕書。爲校書郎。道士林靈素。以方得幸。尊寵用事。作符書。號神霄錄。自公卿以下。羣造其虛拜受。獨故相李綱。故給事中傅崧卿。及公。俱移疾不行。出爲應天少尹。尹故相徐處仁敬待公。公嘗決疑獄。徐公謝曰。始徒謂君儒者。乃精吏道如是邪。一日。有中貴人傳中旨。取庫金。而不齎文書。徐公用府寮議。將姑許之。公力爭。至謁告不出。徐公雖不果用。而尤以此服公。丁內艱。服除。主管南外宗室財用。靖康初。提舉淮南東路茶鹽公事。女真入寇。都城受圍。太府鹽鈔無自得。商賈不行。公乃便宜爲太府鈔給之。比賊退。得緡錢六十萬。喪亂之餘。國用賴是以濟。而公不自以爲功也。改提舉荊湖北路茶鹽公事。羣盜大起。湖北諸郡皆破。獨辰沅靖三州僅存。有封樁鹽。公以與蠻獠貿易。得錢數鉅萬。問道上行在所。賊孔彥舟據鼎州。川陝宣撫使司幕官有傳勞者。輒假彥舟湖北副總管。彥舟因自稱官軍。面殺掠四出自若也。俄以總管檄。檄公求鹽給軍食。官屬震恐。請與以紓禍。公卒拒不予。其後。有爲鼎澧鎮撫使者。怙權暴橫。復欲得鹽。公曰。使吾畏死。則輸彥舟矣。亦卒不予。以疾乞閑。主管臨安府洞霄宮。起爲福建府轉運判官。未赴。改廣南西路。廣南支郡賦入。悉隸轉運司。歲度所用給之。吏緣爲姦。公獨親其事。吏不得與。文書下。諸郡慙服。徙江南西路。提點刑獄公事。改兩浙西路。故太師秦檜用事。與虜和。士大夫議其不可者。輒斥。公兄爲禮部侍郎。爭尤力。首斥而公亦罷。時秦氏專國柄未久。猶憚天下議。復除公廣南西路轉運副使。以慰士心。徙荊湖南路。賊駱科起郴州。

宜章縣。郴道桂陽皆警。且度嶺。詔湖北宣撫司遣將逐捕。賊引歸宜章之臨武峒。宣撫司遂以平賊聞。公獨奏其實。朝廷始命他將討平之。主管台州崇道觀。起提舉湖北茶鹽。未赴。改廣西轉運判官。公雖益左遷。然於進退。從容自若。人莫能窺其涯。復主管崇道觀。寓上饒七年。讀書賦詩。蓋將終焉。紹興二十五年。檜卒。太上皇帝當宁。慨然盡斥其子孫。淵。而收用耆舊。與一時名士。十一月。起公提點兩浙東路刑獄。公老矣。而精明不少衰。去大猷。吏張鎬。一路稱快。明年。知台州。公娶錢氏。有郡酒官者。夫人族子也。大爲姦利。且恣橫。患苦里閭。公亟捕繫獄。奏廢爲民。黃巖令用兩吏爲囊橐。以受賄。吏持之。令不勝怒。械吏置獄。一夕皆死。公發其罪。或以書抵公曰。令。左丞相客也。公治益急。亦坐廢。踰年。召赴行在所。力以疾辭。除直秘閣。歸故官。數月。復召。既對。太上皇帝勞問甚渥。曰。聞卿名久矣。公因論士氣不振。既久。陛下興起之於一朝。矯枉者必過直。雖有折檻斷鞅。牽裾還笏。若賣直沽名者。願皆優容獎激之。時太上懲秦氏專政之後。開言路。獎孤直。應詔論事者衆。公懼或有以微訐獲戾者。故先事反覆極論。以開廣上意。太上大悅。除秘書少監。先是少監選輕。士至不藥入館。公既以老臣自外超用。名震京都。及入朝。鬢須皓然。衣冠甚偉。雖都人老吏。皆感歎。以爲太平之象。於是公去館中三十有八年矣。舉故事與同舍賦詩飲酒。縱談前輩言行。臺閣典章。從容每竟日。故相湯思退嘗語客曰。恨進用偶在前。不得當斯時。從會公遊也。其爲薦紳歆慕如此。擢尙書禮部侍郎。初。公兄楸。歷禮部侍郎。至尙書。兄開。亦爲禮部侍郎。至是公復繼之。衣冠尤以爲盛事。二十七年。吳越大水。地震。公極論消復災變之道。及言賑濟之令。當以時下。太上皆嘉納。時將郊祀。公力請對。言臣老。筋力弗支矣。陛下郊天。若禮官失儀。亦足辱國。太上曰。卿氣貌不類老人。姑爲朕留。公再拜謝曰。臣無補萬分一。惟進退有禮。尙不負陛下拔擢。不然。且爲清議罪人。乃以集英殿修撰。提舉洪州玉隆觀。又三歲。除敷文閣待制。元顏亮盜塞。下詔進討。已而虜大入。或欲通使以緩其來。公方病臥。聞之奮起。上疏曰。遣使請和。增幣獻城。終無小益。而有大害。爲朝廷計。當嘗膽枕戈。專務節儉。整軍經武之外。一切置之。如是。雖北取中原可也。且前日陛下降詔。諸將傳檄。數金人君臣。如罵奴耳。何詞復和邪。今上初受內禪。公又上疏累數千言。大概如前疏。而加詳。既封奏。具衣冠。趨闕再拜。乃發。公自宣義郎十一遷。爲左中大夫。至是以卽位恩。遷左太中大夫。執政欲起公入侍經筵。度不可致。乃以公子遠爲提點浙西刑獄。以便養。隆興二年。公上章謝事。遷左通議大

夫致仕。莊文太子立。羣臣爲父後者。得加封其親。公子逢請於朝。而有司疑公官高。詔特遷左通奉大夫。乾道二年。五月戊辰。卒於平江府逮之宮舍。享年八十三。爵至河南縣開國伯。食邑至七伯戶。公平生燕居莊敬如齋。至歿不少變。九月辛酉。逢等葬公於紹興府山陰縣鳳凰山之原。詔贈左光祿大夫。有司諡曰文清。娶故翰林學士錢總之孫。朝請郎東美之女。封魯國太夫人。男三人。逢。朝散大夫。尙書左司郎中。逮。朝奉大夫。充集英殿修撰。知湖州。迅。通直郎。主管台州崇道觀。女一人。嫁右朝散郎知吉州呂大器。孫男七人。榮。迪。功。郎。監戶部。瞻軍。烏。益。酒。庫。真。承務郎。新知平江府長洲縣。梁。從政。郎。監戶部。瞻軍。諸。暨。酒。庫。榮。迪。功。郎。監建康府。提領所。激賞。酒。庫。槩。宣。教。郎。槩。修職郎。監明州支鹽倉。棠。迪。功。郎。新湖州長興縣尉。孫女九人。長適從事郎衢州江山縣丞李孟傳。次適通直郎新通判楊州軍州事朱輅。次適宣義郎新浙東提舉常平司幹辦公事詹徽之。次適從政郎新婺州金華縣丞邢世材。次適宣教郎幹辦行在諸軍審計司葉子強。次適修職郎呂祖儉。次適文林郎湖州長興縣丞丁松年。次適迪功郎前明州慈谿縣主簿王中行。次適迪功郎監衢州比較務張震。曾孫男女十三人。公貫通六經。尤長於易論語。夙興。正衣冠。讀論語一篇。迨老不廢。孝悌忠信。剛毅質直。篤於爲義。勇於疾惡。是是非非。終身不假人以色詞。少師捐館舍。公才十餘歲。已能執喪如禮。終喪不肉食。及遭內艱。則既祥猶蔬食。凡十有四年。至得疾。顛胸乃已。每生日拜家廟。未嘗不流涕也。平生取與。一斷以義。三仕嶺外。家無南物。或求沉水香者。雖權貴人不與。守台州以屬縣竝海。產蚶菜。比去官。終不食。初佐應天時。元祐諫臣劉安世亡。急。卹禁方厲。仕者不敢闢其門。公獨日從之。遊論經義及天下事。皆不期而合。避亂寓南嶽。從故給事中胡安國。推明子思孟子不傳之絕學。後數年。時相倡程氏學。凡名其學者。不歷歲取通顯。後學至或矯託干進。公源委實自程氏。顧深閉遠引。務自晦匿。及時相去位。爲程氏學者益少。而公獨以誠敬倡導學者。吳越之間。翕然師尊。然後士皆以公篤學力行。不諱世取寵爲法。公治經學道之餘。發於文章。雅正純粹。而詩尤工。以杜甫黃庭堅爲宗。推而上之。繇黃初建安。以極於離騷雅頌。虞夏之際。初與端明殿學士徐俯。中書舍人韓駒。呂本中。游。諸公繼歿。公巋然獨存。道學既爲儒者宗。而詩益高。遂擅天下。有文集三十卷。易釋象五卷。他論著未詮次者尙數十卷。某從公十餘年。公稱其文辭有古作者餘風。及疾革之日。猶作書遺某。若永訣者。投筆而逝。故公之子以銘屬某。會某客巴蜀。久乃歸。銘之歲。實淳

熙五年去公之歿十二年矣。銘曰。聖人既沒。道裂千歲。士誦遺經。用鮮弗戾。孰如文清。得於絕傳。耄期躬行。知我者天。秉禮蹈義。篤敬以終。病不情。大學之功。仕豈不逢。施則未究。刻銘於丘。維以詔後。

卷二十二

墓誌銘五首

青陽夫人墓誌銘

有宋蜀人天池先生譚公諱篆字拂雲之夫人青陽氏。并研人。大父知歸州事。泰實生五丈夫子。以幼子古繼其弟春。是爲夫人之考。夫人歸譚氏。不及事舅。獨事君姑。太安人。太安人則歸州之女子子。於夫人爲姑夫人。夙夜婦道。不以親故少懈。天池與其考隆山先生諱望字勉翁。皆以文章名一代。取友皆天下士。亦繼以進士起家。然得年皆不盈五十。志遠年局。未嘗問家人產業。方天池歿時。一子曰季王。甫生十年。煢然獨立。而天池亦無兄弟。譚氏不絕如線。太安人傳家事已久。夫人幼讀書。了大義。於是行其所知。自處儉薄。而不以貧憂其姑。躬履艱難。而不以事累其子。外父母家。而一意立譚氏門戶。太安人饑服。非其手調。筆縫紉。不以進。親客至。夫人視庖廚刀。七惟謹。及卽席。則立侍姑側。終日不休。酒殺潔豐。果蔬芳甘。奉盥授脫。肅祗無譁。客歸。皆太息。祝其女婦。願庶幾夫人萬一。而夫人歎然。常愧力不足也。斥賣簪竊。遺季王就學。夜課以書。必漏下三十刻乃止。間則爲道。隆山天池言行以磨礪之。及季王稍長。與人交。則誨之曰。某可師。某可友。某當絕勿與通。故季王名其堂曰願學。室曰勝己私。皆夫人所以訓也。夫人享家廟如養姑之孝。字孤嫠如愛子之恩。蓋其節行法度。士君子莫能加焉。季王舉進士。拔解。太安人尙無恙。夫人不自喜。而爲太安人喜。及擢第拜廟。夫人猶涕泣曰。先姑不及見矣。觀者皆感動。惻愴。後以德壽宮慶壽恩得封。亦以是不敢樂也。初。季王解褐爲崇慶府學教授。凡四年。徙成都府。吏部以僑寓格不下。執政爲奏。復還崇慶。以便養。命至。而夫人棄其孤矣。初。命教成都。今樞密使周公貳大政。知予與季王友。以書來告曰。石室得人矣。季王有學行。爲諸公大人所知。蓋如此。以故士皆慕與之交。而夫人墓迺之。乃萬

里來屬予於山陰鏡湖上。義不可辭。夫人諱字及年。與其他在法當書者。皆已見內誌。懼於再告。故獨述其大節而已。自周以降。禮教日衰。爲子女者。不聞姆師之訓。圖史之戒。閭巷尼媪。交媼其間。非天資淑柔。則悖驚囂昏。貪黷悍驕。不復知供養祭祀爲婦職者。固其所也。夫人奪乎千載之下。獨不移於俗。矯矯自立如此。於虜賢哉。予與季王。竇兄弟如也。故述孝子之意以作銘。其辭曰。

淳熙十祀。冬十月丙申。孤季王奉先夫人之柩。紩於天池先生之藏。平生相倚爲命兮。未嘗輕去吾親之傍。日將夕而未返。則倚門其皇皇。今也山空無人。凜乎欲霜。鳥獸紛其號鳴。木葉實兮草黃。吾親不見其孤兮。悲生死之茫茫。兒不能奉養於泉塗兮。肝心裂而涕滂。茹哀忍死兮。庶其顯揚。維友予銘兮。後百世而彌芳。

### 陸孺人墓誌銘

孺人山陰陸氏。曾大父某。國子博士。贈太尉。大父某。承奉郎。考某。迪功郎。明州司法參軍。母同郡齊氏。孺人年若干。嫁與承議郎知梧州高郵桑公莊之妻。端靖淑柔。讀書略知大義。自其在父母家。已得孝名。見治絲枲。輒趨與共事。法曹與齊夫人皆異之。建炎間。法曹避兵天台。而承議適攝縣主簿事。故時兩家已繼爲婚姻。情好甚篤。因以孺人歸焉。承議旣罷。主簿以亂故。不克北歸。因寓近縣山中。凡四十年。間雖出仕。歲滿輒歸。居山之日。多於在宦。衣食嘗不足。孺人慮之超然。自幼奉佛法。戒擊鮮。終身不犯。嘗舟行汜汜。遇老桑門丐錢。孺人亟施之。且問曰。師何許人。老如此。尙行乞邪。對曰。居天台。兄弟十八人。我獨好遠遊。故抵此。汝與我有宿契。他日當爲鄰。及是。寓居適近石橋。一日。登應真閣。修茶。供至第三尊者。驚歎曰。此吾汜舟所見也。承議嘗爲西安令。有娠婦以事繫獄。念釋之。未果。孺人夢白衣人告曰。囚且字子矣。旦以告承議。呼乳醫眎之。而信。卽脫械。予假使歸。果以是夕產。孺人事佛之驗。至如此。然奉家廟。盡孝盡敬。朝夕定省如事生。凡祭祀烹飪滌濯。皆親之。至累夕不寐。承議平生所與遊。多知名士。每客至。輒信宿留。孺人執刀匕。白首無倦色。曰。此婦職也。近世閨門之教。略。妄以學佛自名。則於祭祀賓客之事。皆置不顧。惟私財賄以徇其好。曰。吾徼福於佛也。於虜娶婦。所以承先祖。主中饋。顧乃使之徼佛福而止耶。安得以孺人之事告之。承議有兄之子。妻士人陳汝翼。貧無以生。孺人力贊承議挈之歸。同爨十五年。使其子與己子俱就學。遂中名第。而孺人諸子皆好修。世昌從諸公問學。不以貧奪其志。人以爲積善之報。孺人



得年七十有四。以淳熙十二年正月己丑卒。丈夫子三人。長子瑞。早卒。次則世昌。次世茂。女子子四人。徐廷煥。顧淵。陳寬。吳植。其甥也。明年某月甲子。葬於天台之太平鄉朴壤。祔承議之墓。世昌實來請銘。孺人於予爲從祖姊。其敢辭。銘曰。

廟祭賓享。維婦之職。嫺驚狼驕。蠹我壺則。孰如孺人。耆老益恭。名山崇崇。閱此幽宮。

浙東安撫司參議陸公墓誌銘

紹興初。詔修元祐故事。命大臣近侍以十科舉士。翰林學士承旨知制誥孫公近。首舉右迪功郎陸靜之。文章典麗。可備著述科。方詔之下也。孫公一時辭宗。主盟翰墨。自三館諸儒與進士高第。願得一言者。袂相屬也。公年財二十餘。以門蔭入官。初未爲人知。而孫公獨歎譽稱薦之。一旦出千百人右。於是中朝名勝士。莫不知陸伯山。慕與之交。而公仲弟升之。仲高。亦以文章有名。號二陸。仲高遂登進士丙科。公業春秋及賦。再試禮部。乃輒斥。因不復踐名場。而一意欲以才略致通顯。然愈不偶以老。豈非命邪。公會稽山陰人。曾大父珪。國子博士。贈太尉。大父倬。中大夫。考長民。左朝請大夫。尙書右司員外郎。兩世皆贈金紫光祿大夫。公以父任補將仕郎。調信州上饒縣。台州天台縣主簿。皆不赴。監潭州南嶽廟。徙措置戶部贍軍酒庫所幹辦公事。又不赴。徙江南東路轉運司淮南西路轉運司幹辦公事。知台州寧海縣。部使者挾私憾。中公以法。鍛鍊累月。無所得。然猶坐微文衝替。起知臨安府。臨安縣。主管台州崇道觀。通判隆興府。建康府。資當守郡。會得重聽疾。不能奉臨遣。乃爲浙東路安撫司參議官。官至朝散大夫。服三品。淳熙十四年六月癸酉卒。享年七十七。娶季氏。先公二十年卒。贈宜人。子二人。子墨。前台州寧海縣主簿。子埜。當以公納祿恩補官。女子二人。長適鄉貢進士石正大。餘尙幼。子墨子埜。將以九月丙午葬公於會稽善价。孫男三人。立遠。立言。立柔。孫女五人。長適鄉貢進士石正大。餘尙幼。子墨子埜。將以九月丙午葬公於會稽縣上臯尙書塢。以季宜人祔。實來請銘。公平生不大試於事。故可傳載者少。然在寧海。有嫺訴子不孝二十條。公遽呼嫺問之。憐不能置一辭。遽問爲書者。則嫺之女婿實爲之。案驗辭服。一邑驚以爲神。佐建康。會久旱。力請於府爲火備。已而火屢作。皆以有備不爲災。士民至今誦之。晚既久不仕。日誦左氏傳。史記。前漢書。率盡兩卷。不以寒暑疾恙少廢。有疑義。客至。輒講之。前五年。忽作治命百餘言。戒家人勿用浮屠法及厚葬。比終。無大疾。疾已亟。

猶起坐堂上觀書如平生。徐闔書危坐遂逝。於庫亦奇矣。銘曰。  
士患不材。材患莫知。既或之知。又弗克施。在昔所歎。天嗇其壽。毫螿不試。將孰歸其咎。

### 山陰陸氏女墓銘

淳熙丙午秋七月。予來牧新定。八月丁酉。得一女。名閨孌。又更名定孌。予以其在諸兒中最穉。愛憐之。謂之女女。而不名。姿狀瓌異。凝重。不妄啼笑。與常兒絕異。明年七月。生兩齒矣。得疾。以八月丙子卒。敢於城東北澄谿院。九月壬寅。卽葬北岡上。其始卒也。予痛甚。灑淚棺衾間。曰。以是送吾女。聞者皆慟哭。女女所生母楊氏。蜀郡華陽人。銘曰。

荒山窮谷。霜露方降。被荆榛兮。於瘁吾女。孤冢巋然。四無鄰兮。生未出房奧。死棄於此。吾其不仁兮。

### 傅正議墓誌銘

公諱某。字凝遠。其先爲北地清河著姓。後徙光州。爲固始人。唐廣明之亂。光人相保聚。南徙閩中。今多爲大家。而傅氏之祖曰府君。實與其夫人林氏。始居泉州晉江縣。生五子。長子卒。謀葬。有異人告以葬聖姑山之右。而徙其居仙遊羅山之麓。林夫人有高識。悉用其言。宋興。仙遊隸興化軍。而傅氏鉅公顯人始繼出矣。若夫德修於家。教行於鄉。而身不及用者。亦在其子孫。如公是也。公之大父程。父嵩。以累舉進士推恩。閉門教子。不肯仕。累贈奉直大夫。公奉直第二子。幼有美質。讀書日數千言。學爲文。輒驚其長老。崇寧中。甫年十八。入大學。聲名籍甚。試中高第。然猶幾二十年。乃以上舍登第。調滄州無棣縣主簿。會女真陷全燕。乘虛南下。兩河皆震。吏士相顧無人色。或委官去。郡檄公餉軍。公南方書生。平生不習金鼓。初咸意公難之。而公得檄卽行。不暇秣馬。冒兵往來。軍賴以無乏。虜出塞。會公亦遭奉直憂。始南歸。終喪。得南劍州順昌縣尉。時所在盜起。縣民亦相挺爲亂。公素得土心。徐設方略。窮其窟穴。未幾悉平。部使者欲言之朝。公辭而出。弓手有謀叛者。語其徒曰。奈累傅公何。比公罷去。盜遂作。殺掠暴甚。邑人以不留公爲悔。調泉州安溪縣丞。改宣教郎。猶安其官。不求徙。有自吏部擬注來代者。始徙南安縣丞。其恬於仕進如此。南安大饑。民棄子者相屬。公請於州出常平錢米。設安養院於延福僧舍。乳湏糜粥湯液。皆不失其宜。明年歲豐。悉訪其所親歸之。曩時。縣之貧民鬻業者。輒減其戶產。以求速售。或業盡而賦獨存。官責

之急。至死徙相踵。公既得其弊。一切以肥磽定賦。民之冤失職者皆得直。治最一路。遷知晉江縣。會詔造戰艦。他郡縣吏多並緣煩擾。事亦不時集。公獨不以諉吏躬督其役。勞費視他邑省殆半。而事獨先期辦。安撫使張忠獻公聞於朝。特減磨勘年。遂爲茶事司幹辦公事。公於是行能已爲時所知。秩滿。造行在所。顧不數見公卿。赴銓。得通判南劍州而歸。將之官。以紹興二十一年六月十一日感疾不起。享年六十有八。積寄祿官至左朝奉大夫。累贈正議大夫。公亡急時。自發書卜葬於白石之南。雖月日莫不有治命。至歿。悉遵用焉。娶林氏。正議大夫豫之女。封宜人。今累封太淑人。六子。溥。奉議郎。知漳州漳浦縣。汶。朝散郎。江南西路提舉常平茶鹽公事。淇。朝散大夫。直龍圖閣。兩浙西路提點刑獄公事。洵。凌。洵。舉進士。奉議。莅官有家法。不幸與洵。凌。皆早世。常平以材望擢使一道。而龍圖嘗位列卿。實中朝宿德。皆且柄用矣。士大夫以爲公積行累功之報。四女。長適進士林維。次適龍溪縣尉陳希錫。次適進士林若思。次適進士林若公。初。龍圖使浙東。實治會稽。而某爲郡人。始從龍圖遊。獲觀公文章。豪邁絕人。而其詩尤工。龍圖又爲某言。公嘗官至廉。爲縣時。有小吏持官燭入中閫。公顧見。立遣出。仕官三十年。先疇無一壟之增。老猶力學不厭。行其所知。未嘗以窮達累心。飢者輟食濟之。病者治藥療之。所居之傍。有路達泉州。而林谷阻險者四十餘里。行旅告病。公率親黨。塹山伐石。易爲夷途。人至今誦焉。疾革。簡戒諸子曰。吾平生無愧類仰。歿後。汝曹居官主清。治家主嚴。奉先主敬。收族主恩。造次顛沛。必主忠信。能用吾言。雖貧賤猶爲有德君子。不然。獵取光顯。奚爲哉。語終。遂瞑。方龍圖言此時。固已屬某以發揚潛德。會徙節浙西。後逾年。乃以狀來請銘。銘曰。

築野宵夢相武丁。死不泯亡騎列星。後世繼起三千齡。峩冠相望立漢廷。公入太學奮由經。蹭蹬晚乃駕篋。抱才不試歸泉扃。二妙山立尙典刑。公雖埋玉有餘馨。印綬三品告諸冥。馬鬣之封柏青青。咨爾雲來視斯銘。

## 卷二十四

## 墓誌銘四首

## 尙書王公墓誌銘

寶謨閣直學士正議大夫致仕贈銀青光祿大夫王公既葬之二年。孫宿來請於公之里人陸某。願次公出處。請設於有司。某辭不獲。既以狀授其家。宿復來。泣且言曰。古之葬以碑封。因識於碑。則碑固在墓外。後世隧葬。識於隧中。非古也。吳會稽之葬。帶墓。則雖已葬。刻石墓旁。實爲近古。惟丈人予之銘。某辭以既嘗狀公之行。願更求名。卿巨人以信後世。宿復泣言。近世固有此爲狀。而復爲之碑者。丈人何獨謂謙。某用是不果固辭。惟公諱佐。字宣子。會稽山陰人。曾大父諱仁。大父諱忠。世有懿德。考諱俊彥。以進士起家。經行尊顯。爲時醇儒。仕至左宣義郎。太平州州學教授。贈至特進。兩娶同郡葉氏。追贈同安永寧郡夫人。同安實生公。幼而穎異。不羣。七歲。特進爲講孟。子。卽能復講。不遺一言。吳無祿色。特進歎曰。吾家積善百年。當有與者。是子其當之乎。十八。補大學生。二十有一。以南省高選。奉廷對爲第一。方唱名時。趨拜進止。詳華中慶。高宗皇帝喜動玉色。授承事郎。簽書平江軍節度判官廳公事。未赴。召爲祕書省校書郎。時秦丞相檜專政。其子熿。以前執政提舉祕書省。館中或趨附以爲捷徑。公質簡默。嚴重。未嘗妄交一語。嘗語同舍曰。唐三館故事。丞相與赤縣尉均爲學士。安得妄自屈哉。熿聞不能平。嗾言者論去之。逾年。請祠祿。爲主管台州崇道觀。丁特進憂。服除。會秦丞相死。熿亦斥逐。起家拜祕書郎。兼玉牒所檢討官。遷尙書吏部員外郎。右司郎闕。以公兼領。秦丞相夫人王氏。陳乞舊所得恩數之未用者。自稱冲真先生。公持白執政曰。婦人安得此名。向者誤恩。有司不能執。爲失職。今當追正。然王氏封兩國夫人。蓋祖宗以寵親王之配。及外家尊屬者。何可輒引以階僭紊。當併奪之。執政不能聽。但寢其請而已。後王氏死。卒奪先生號。識者猶恨不盡用公初議。同安夫人墓在山陰。爲盜所發。公卽日不待命。奔赴至墓。一日復盜。公與母弟左司公公袞欲手殺之。親戚爲言。此在法固當死。不患讎恥不雪。乃告於有司。公旣斂葬。猶不忍去墓所。朝旨趣還。不得已。造朝。逾月獄成。盜不死。左司公憤切。手戮盜。挈其首詣郡。自繫待罪。公適乞盡納官以贖弟罪。詔給舍議。給事中楊公椿等共議曰。春秋之義。義復讎。公袞無罪。佐納官之請。可勿許。詔曰。給舍議是。於是趣公就職如初。紹興二十九年二月。拜起居郎。遇事直前。獻納多所裨益。未兩月。以臺評罷。然言者詆公甚峻。至請投竄。而上終保全之。命守外郡。遂知永州。公自初仕。卽在館閣。未嘗一日歷州縣。到郡。每決事。吏皆抱牘立數步外。不呼。不敢輒進。公親與民語。有寃者得盡其言。誕謾者一再詰。皆詞窮折服。自謂當受罰。公迺延見諸生。勞問耆年。凡可美民俗。勵士節。

者。舉之無遺。又言。永之士衆於道州。而解名財及道四之一。願詔有司稍均之。庶無失士。徙知吉州。廬陵號江西劇郡。人疑公且困於事。不得復閑暇。公至。爲政如零陵時。不知有閑劇之異。而事亦頓省。治聲聞於行在。詔直寶文閣。逾年。徙知明州。仍命入奏。而張丞相浚力薦公。及王侍郎十朋。張舍人孝祥。以爲可大用。既對。壽皇聖帝諭。以且有親擢。既退。除中書門下省檢正諸房公事。兼權戶部侍郎。公力辭。且言。臣昨面奏。乃者戶部以江東歲歉。有江西和糴之令。臣在江西。實見一路決不能獨出百五十萬石。而關子茶藥乳香之屬。既不能售。必至抑配。其爲民病。且甚於江東之饑。今臣若不自揆。貪榮冒受。而實未有以爲策。他日固不敢逃譴。然民力國計。將何以支。願復補外。或止供檢正職事。詔不允。仍兼侍講。湯丞相思退。以首相領江淮都督。請公參其軍謀。公爲湯公言。虜方議和。而以兵入吾境。此非其僉本旨。蓋用事者幸一勝以遂所求。當選驍將精卒。乘其驕惰。急擊之。彼以敗聞。則用事者且得罪。吾可從容制之矣。會湯公去位。公亦罷參謀。方是時。疆場未靖。調兵遣戍。用度日窘。且諸路歲額不登。公從容應變。望漏察欺。事無不集。而民間泰然如無事時。會永寧夫人臥疾。懇求奉祠。改權吏部侍郎。請不已。乃復以直寶文閣知宣州。徙知建康府。行宮留守。建康自車駕行幸。建爲別都。居守多執政。及侍從久次者。惟公以威望被親擢。中外皆知上任屬之意。妖人朱端明崔先生。挾左道。與軍中不逞輩謀不軌且久。及公至。相與謀曰。是不可欺。少緩必敗。不如先事發。乃共約以春大閱日起事。雖極詭秘。而公已盡得其陰謀。一日。坐帳中決事。命捕爲首者至前。略詰數語。即責短狀。判斷之。而流其徒數人於嶺外。餘置不問。僚屬方候見於客次。無一人知者。見公擲筆。乃異之。而妖人已誅矣。公方閱案牘。治他事。如平時。良久。延見賓僚。乃退。無一毫異於常日。又徙知平江。隆興二府。未赴。會知上元縣李允升坐賄。前事未作。已丐尋醫去。而讒者謂公縱有罪。坐削官。居建昌軍。讒者去。上察守臣連坐。未有公比。且數思其才。復官。主管台州崇道觀。俄起知饒州。又復直寶文閣。知楊州。入對。勞問甚渥。留爲宗正少卿。兼權戶部侍郎。上祀南郊。命公玉輅執綬。凡所顧問。占對瞻敏。上甚悅。有褒嘉語。於是疾公者益衆。史侍郎正志爲發運使。坐奏課不實。誅。有欲爲史分謗者。乃併罷公。而發運司事。公始末未嘗與。且嘗論其徒擾無補。至是。乃併得罪。逾年。主管台州崇道觀。起爲福建路轉運判官。徙知潭州。連進祕閣。修撰。集英殿修撰。淳熙六年正月。彬州宜章縣民陳峒竊發。俄破道州之江華。桂陽軍之藍山。臨武。連州之陽山。縣旬日。

有衆數千。彬道連永柱陽軍皆警。公奏乞荆鄂精兵三千。未報。公度不可待。而見將校無可用者。統以馮懋適在州。公召與語曰。君能有功。不特雪前辜。且遂爲朝廷用。北鄉恢復。自此始矣。懋請行。公曰。請行易耳。今當不俟奏報。以兵相付。既受此命。即以竊盜授首爲期。一有弗任。軍法非某敢貸也。遂檄懋帶元管權湖南路兵馬鈐轄。統制軍馬。即日令懋自選潭州廂禁軍及忠義寨。凡八百人。即教場誓師遣行。仍命凡兵之分屯諸州縣者。皆聽懋調發。違慢皆立誅。又出軍令牌付懋。軍士所過。秋毫無擾。民及臨敵不用命。或既勝而攘賊金帛。使得竄逸者。皆必行軍法。上奏以擅遣懋待罪。且請亟發荆鄂軍。又私念懋有善戰名。賊必遜入廣南。思得勁兵遏其衝。而廣南非所部。未有以爲計。會受命節制賊軍馬。而前一日。又奉詔會合諸路兵。乃合二命爲一。稱節制會合諸路兵馬。檄廣南摧鋒軍兵官黃進。張喜。分屯要害。賊知懋至。而廣南守備已嚴。乃驅載所掠輜重。由間道歸宜章。轉運司聞之。即移諸州。以爲賊已窮蹙。自守巢穴。毋以備禦妨農。公得報曰。是不獨害捕寇。且必惑朝廷。乃檄轉運司及諸州。以爲賊未嘗敗。何謂窮蹙。其巢穴旁接三路七郡。林菁深阻。出入莫測。何謂自守。復奏言。遣馮懋之後。事方有緒。若遽弛備。賊必更猖獗。愚民且有附和而起者。非細事也。因堅乞前所請荆鄂軍。從之。已而果聞賊方作箭鏃甚盛。遣入溪峒買毒藥之可爲藥箭者。公赫然以蕩滅爲期。且奏向者連州受賊首李晞降。賞犒備足。未幾復亡去爲賊。今陳峒之次首領是也。以此知不一意討捕。容其不死。湖廣之憂未艾。俟誅賊首而貸脅從。未爲晚也。樞密院猶謂當先招降。上獨是公策。命公躬至軍前節制。公即日戒行。師徒不譁。耕隴市肆之人。莫有知者。既至宜章。命懋以四月二十三日移屯何卑山。懋請進兵。曰。不答。惟給以合符。符至。即行耳。二十九日夜半。始發兵符。命懋及鄂州軍統領夏俊。五月朔日詰旦。分五路進兵。賊初詐降。實欲繕治寨柵。阻險以抗官軍。公得其情。督兵甚峻。及馳入隘口。賊果立寨柵。未及成。聞官軍至。狼狽出戰。既敗。又退失所憑。乃皆潰走。是日奪空岡寨。駐兵十二渡。賊之起也。假唐源淫祠。以誑其下。曰。殺所虜一人祭神。至是斬像。焚其祠。懋遂誅陳峒。函首來獻。已而晞以下。誅獲無遺。宥其脅從。發倉粟。振貸安輯之。案功行賞。悉如初令。且上其事於朝。振旅而還。詔以公忠勞備著。起拜顯謨閣待制。懋亦由此復進用。俄徙公知揚州平江。遂知臨安府。公力辭。曰。人各有能有不能。天府。臣所不能爲也。方祖宗時。用人莫重於三司。開封。高選賢傑。號將相之儲。豪右憚其威望。莫不斂避。故得人爲多。巡幸

以來。用人益輕。惟能媚奉權貴。則爲稱職。沿襲非一日矣。若使方拙自守者爲之。猶推舟於陸。決不可行。縱巨欲降心下氣。周旋其間。賦性既定。如燥濕之不可移。終有不能自抑者。徒速顛隲而已。奏三上。不得請。遂就職。入對。上褒勉甚寵。特賜金帶。進工部侍郎。兼知臨安府。進權工部尙書。而尹京猶如故。兼侍講。久之。進侍讀。遂權戶部尙書。知淳熙十一年貢舉。公尹京逾三年。又兼版曹。故時是冗劇。日夜不得休。公處之。超然閑暇。事皆立辦。貴臣權家。斂手不敢干以私。民間利病。無巨細。罷行之。或可施於四方者。則疏其事以聞。多見施行。歲饑。畿內小民。或以農器蠶其抵粟於大家。苟紓目前。明年皆有失業之憂。公乃出令。斷自東作之日。先以還之。俟蠶麥訖事。而歸其子本。大家不遵令。小民負約。不以時償。皆坐罪。令下。農家相慶。識者以爲與呂文靖公建請不稅農器事相埒。他日且爲名相。上亦自器異之。嘗因夜直。召對。出御書三都賦序以賜。蓋倚以拓定中原之事。會長子病卒。公力乞奉祠。上察其不可留。命以質文閣直學士出守。公復力申前請。得提舉江州太平興國宮以歸。執永寧夫人喪。服除。提舉隆興府玉隆萬歲觀。鳳翔府上清太平宮。紹熙元年八月。自製壙記。又爲治命。凡沐浴斂葬之節。莫不備具。時公方康強無疾。人或怪之。二年二月十一日晨起。猶讀書理家事如平時。俄暴感風眩。遂卒。享年六十有六。寄錄官自承事郎積選至正奉大夫。封自山陰縣開國男至開國伯。食邑自三百戶至九百戶。致仕。進正議大夫。遺表上。贈銀青光祿大夫。以卒之歲十一月四日。葬於山陰縣天樂鄉竺里峯之原。公娶同郡高氏。早卒。繼室括蒼季氏。亦先公若干年卒。皆追封頌人。子男二人。履常。承奉郎。監淮西總領所建康府西酒庫。克常。承奉郎。知台州天台縣丞。皆前卒。女四人。長適温州平陽縣主簿梁叔括。叔括卒。再適提舉湖北路常平茶鹽張孝曾。次適通判建康府曾槩。今存者。惟適曾氏女。而槩卒矣。孫男二人。宿。承務郎。某某官。孫女二人。尙幼。公以英傑邁往之資。自學校科舉時。已卓然出千萬人上。仕雖至侍從。所施設曾未究一二。閑居九年。憂患或出。意表。而公所養愈剛大。不爲事變之所折困。人莫窺其涯。一日。嘗語某曰。里中或謂僕以誅殺衆。故多難。不知僕爲人除害也。湖湘鄉者盜相踵。今遂掃迹者二十年。綿地數州。深山窮谷之垠。得以滋息。而僕以一身當禍譴。萬萬無悔。於虜。公可謂知命者。銘曰。

惟宋中興。三聖相承。公聽並觀。以出賢能。公奮於幽。有德有勳。知我者天。用我者君。蹈義秉節。迄至耆艾。山立

庭。以道進退。大夏方建。拱把鉅材。豈茲棟梁。萬牛莫回。生或忌之。亦歎其死。我銘弗誣。用諗太史。

楊夫人墓誌銘

爲東方大邦。宋與以來。多名公卿。雖擯不仕。及仕而不顯者。如穆參軍。修士。兵部建中學。易。劉先生。岐。皆既死。而言立。化行於家。至今學者。尊焉。建炎南渡。人物寢衰矣。而山堂鞏先生。韓庭芝。經爲人師。行爲世範。德義之化。自家人始。凜然克配。前數公。先生之仲子。處士。諱灑之夫人。曰武義楊氏。年二十有一而嫁。二十有三而字。二十有六而寡。寡四十有三年。年六十有八而卒。卒一年而葬。塋處士之墓。實紹熙五年十一月丙申也。夫人自爲鞏氏婦。事山堂及君姑。錢夫人。一步趨。一語言。悉皆鞏氏家法。耳目濡染。又皆天下長者事。故行成德進。山堂以爲稱吾家婦。宗黨姻戚。鄰里。皆取法焉。處士先山堂不祿。當是時。夫人尙盛年也。遂誓不再行。二子。伯始。學步。踉蹌不踰閭。仲尙襁褓。及能言。夫人皆親授以孝經論語。毛詩國風。爲之講。整形。正章句。具有師法。二子未從外塾。而於幼學之事。各已通貫。精習。卓然爲奇童矣。其後子益長。夫人身任家事。不以荒其子之業。故皆舉進士。中其科。然夫人不喜子之得祿。所以教而進之者。父師莫加焉。於庠。非是母固不能成其子。非鞏氏家法。亦不能成是婦也。予少時。猶及見趙魏秦晉齊魯士大夫之渡江者。家法多可觀。雖流離九死中。長幼遜悌。內外嚴正。肅如也。距今未五十年。散去四方。寔不能如故時。久而不變。如鞏氏者。蓋鮮矣。夫人曾大父瓊。大父彬。父仲卿。皆不仕。子曰豐。從事郎。江南東路提點刑獄司幹辦公事。嶧。奉議郎。知徽州歙縣事。孫復亨。慈孫陽孫桐。孫女七。皆處。豐來請銘。銘曰。

鞏氏之先。化行閭門。我觀夫人。典則具存。夫人之賢。實應圖史。有如不信。視其二子。東有茂欖。處士所藪。雖不克稱。鬱乎相望。

陸郎中墓誌銘

公諱沅。字子元。會稽山陰人。曾大父珪。國子博士。贈太尉。大父佖。中大夫。尙書左丞。贈太師。楚國公。考賓。右中散大夫。贈少師。公於某爲從父兄。某蓋少公十五歲。方爲童子時。公已學成行著。以兩浙轉運司進士。試禮部。不中。試博學宏詞。又不中。乃以世賞試吏部。再爲第一人。所與交。多一時知名士。每見某。必諄諄道其所與共學。日夜



磨礱漫漶以希古人者。曰時然進之。時然莊氏名革。早死不顯。而進之則故相湯岐公也。及岐公以文章事業相高皇帝。公猶沈浮州縣。久之乃得監行在都進奏院。監尙書六部門。岐公每見必留公道往。昔相從講習時事。抵掌笑語。公輒俛首踧踖自引去。岐公亦歎息。以爲不可親。疏後輩躡進至大官者相望。公顧處百僚底自若也。岐公免相。門下士多牽聯以鼻斥。未去者亦不自安。公獨澹然如平時。人亦莫指議者。初少師自山陰徙四明。已數十年。婚姻皆在焉。蓋四明人也。會史魏公入爲參知政事。爲右丞相。與公實姻家。少相從。魏公亦器待公。而公未嘗數謁見。朝士亦莫知其相國親且厚也。監門歲滿。遷太府寺丞。權尙書戶部郎。久次當爲真矣。而公亟求歸養。得提舉兩浙市舶。權知舒州。提舉福建市舶。遭母益國夫人憂以歸。初通判泉州者。嘗有所請。以法拒之。公去而提點刑獄兼權舶司事。通判者因詭提點刑獄。以危法中公。公平日以恭謹聞。又方以舉職被賞。遷一官。朝論右之。公雖得專。猶傳輕比。於是公劄門絕交遊。誦佛書。以夜繼日。多至萬卷。不復言再仕。亦絕口不及仇家。對客清談而已。自束髮至老。無一日廢書。尤長於詩。閑澹有理致。在場屋時。以賦稱。老猶自喜。子孫及族黨從之講貫。皆有師法。公爲人夷雅曠遠。與人言。惟恐傷之。然遇事必力行所知。無所撓屈。嘗爲丹徒丞。朝廷用言者。遣使籍江上沙田。立稅額。使指甚厲。吏莫敢違。亦或從而張虛數以爲功。使者至郡。聞人人稱公詳練。乃檄與偕往。公旣極論其不可。又爲詩陳民情。詩流傳至朝廷。遂止不行。沙人礮石刻其詩。今猶可考。其使福建也。有中貴人所親皇甫甲者。輒諷公以珍貨別進。公正色拒之。戒典客者。他日謁至。勿復通。其不阿類如此。公仕自修聽。卽至朝奉大夫而廢。二十三年。以紹熙五年四月六日卒。享年八十有五。娶盧氏。封宜人。先公十二年卒。享年亦八十有五。六子。曰梓。通直郎。知寧國府宣城縣。先公十二年卒。曰格。舉進士。曰之瑞。國學免解進士。曰橈。曰櫜。曰之詳。皆舉進士。一女。適文林郎監淮東總領所糴場樓鈞。六孫。曰炳。曰煥。曰炎。曰原。曰燮。曰熨。四孫女。諸孤以慶元元年九月二十五日。遵治命。返葬於會稽遊塢。望少師墓百步。來且屬某爲銘。銘曰。

仕躡於時。年登耄期。孰奪孰與。理莫可推。銘識於幽。孰知我悲。

## 知興化軍趙公墓誌銘

慶元二年八月辛亥。朝請郎新知興化軍事趙公。以疾卒於第。越十月庚午。葬於會稽會稽五雲鄉湯家畝之原。

明年九月乙卯。諸孤寡夫等。墨其衰。見予於郡西南澤中。泣且言曰。先君之葬。將請銘於執事。以大事之日。追方伏苦塊間。不能自通。今幸踰年。未即死。敢以承事郎簽書平江軍節度判官廳公事莫君子純之狀來告。惟公幸許之。某等即死無憾。予以老疾辭。請益牢。維公文學治行。皆應銘法。而寡夫實娶予從孫女。與其弟同時中進士科。爲鄉里后來之秀。乃卒與銘。謹按公諱彥真。一名彥能。以淳熙新制改今名。胄出宣祖昭武皇帝之後。曾大父諱叔儻。贈武康軍節度使洋川郡公。大父諱贊之。武經大夫。浙東路兵馬鈐轄。贈右朝請大夫。考諱公懋。左朝請大夫。知臨江軍。贈太中大夫。公少純篤。從故侍御史王公十朋學。王公嘗得中書舍人張公孝詳書不欺室榜。持以遺公。所以期公者甚遠。公益自奮。雖舉進士。蓋不止爲科舉而已。然同時爲進士。亦皆推之。遂中其科。調撫州錄事參軍。以太中公喪解官歸。除喪。起爲信州弋陽縣丞。終更調建寧府觀察推官。薦者如格。改宣教郎。知寧國府宣城縣。未赴。以內艱罷。除喪。知平江府吳縣。通判袁州。知興化軍。朝廷知公者寔多。謂且用矣。而得郡未及赴。遽至大故。公之將赴撫州錄事參軍也。太中公戒之曰。汝任治獄。人死生所繫也。可不勉乎。公再拜受教。既就職。東吏甚巖。視囚之寒暑飢渴。慘然不曾在己。囚以故皆輸其情曰。不忍欺吾父也。會部使者以事付獄。有寃狀。而使者方怒。風指甚厲。人皆謂乖其意。且得譴。吏尤惶恐。即欲捶掠成之。公叱吏去具。列其寃。使者爲屈。因欲薦公。公亦終不就也。太中聞之。太息曰。吾有子矣。及在建寧幕。南劍州將樂沙縣諸寨。軍食不時給。羣卒空壘來訴於轉運司趙公公碩。謝公師稷爲使。乃檄公行。公馳至沙縣。與其令調財得三千緡。明日召卒於庭。閱籍。自下給之。軍吏及卒長。皆不得一搖手。衆乃大服。比至將樂。給之如沙縣。亦皆大服。於是議者謂公所試者小。然猶能表表如此。他日功名事業。距可測哉。郡守鄭公伯熊。知公最深。有疾。不以郡事屬其貳。而言於使者。請檄公攝守。疾革。獨延公至臥內。屬以草乞致仕奏。其知之如此。高宗皇帝永思陵橫宮事興。公適爲吳縣轉運司。調取洞庭青石。期會迫。不可遽辦。公即日涉湖至其地。召石工泣議之曰。先皇帝櫛風沐雨。惡衣菲食。爲天下攘強虜。除大盜。輕賦薄役。汝曹數十年安居樂業。亦知所自乎。今官取此石欲何用。而汝曹尙可願望不竭力哉。於是民趣役。不待督責。先期告畢。使者欲上其勞於朝。公力辭曰。此臣子職也。袁州積彫弊。公佐其守。窮利病根源。一切罷行之。郡爲一振。民困於坊場。官弊於護運。皆久不能革。公奮曰。小民知目前之利。不知後日之害。一陷於坊場。則富者貧。

貧者大壞。非死徒不得免。乃取尤者白守。請於戶部。蠲除之。挺繫收檄。一旦幾空。郡人驩呼。以爲昔所未有。護運異時。多以所遣官非其人。故多蠹害。公一切精擇才吏。其以權貴請託來者。皆力拒絕之。抵公去。所發漕運四十萬緡。不費一錢。造朝。得知興化軍。未及到郡而卒。享年五十有四。公篤學。工文辭。有集五卷。易集解五卷。他所著未成編者尙多。初。太中通判饒州。有江州統軍官王益者。坐事下吏。更江州鄂州鞫治。獄成。而家以冤聞。由是復命。太中鞫之。得冤狀明白。益賴以不死。而太中以決疑獄進秩除郡。未幾。捐館舍。益之家人懷太中之德無已。乃厚載金帛以助葬爲請。公固辭不受。曰。非吾先人之志也。益家人泣而去。蓋公之清德類此。然常畏人知。故予亦不得而悉書也。公娶李氏馮氏。皆早世。贈安人。今皆從葬。徐氏封安人。四子二女。皆李出。康夫。迪功郎。隆興府武寧縣主簿。先公十一年卒。窆夫。從政郎。隆興府南昌縣丞。竊夫。從政郎。臨安府於潛縣尉。忝夫。未仕。女長嫁從事郎。新平江府常熟縣尉。劉祖邁。次未行。二孫。時敏。時哲。銘曰。

卷三十五

墓誌銘二首

夫人孫氏墓誌銘

夫人孫氏。會稽山陰人。四世祖沔。觀文殿學士戶部侍郎。諡威敏。有傳國史。曾祖之文。朝議大夫。主管杭州洞霄宮。累贈正奉大夫。祖延直。奉議郎。通判盱眙軍。贈朝散郎。考綜。宣義郎致仕。母同郡梁氏。夫人幼有淑質。故趙建康明誠之配李氏。以文辭名家。欲以其學傳夫人。時夫人始十餘歲。謝不可。曰。才藻非女子事也。宣義奇之。乃手書古列女事數十授夫人。夫人日夜誦服不廢。既笄。歸今文林郎寧海軍節度推官蘇君瑒。遺事舅姑左右。就養唯謹。凡組織縫紉烹飪調絮之事。非出其手。舅姑弗悅。舅姑歿。夫人執喪哀。終喪。事家廟如生。祭薦豐潔。中度。疾已革。猶修秋祭。不知其力之僊。推官女兄。寶朝議大夫直顯謨閣呂公。正己之夫人。性堅正。善持家法。凡家人必責以法度。不知者以爲過嚴。至夫人能事之。則終身怡怡。未嘗少忤。宗黨間既稱譽夫人之賢。又以知呂夫人非

難事者也。紹熙四年。從推官官臨安。以其年七月辛巳。疾終於官舍。夫人平生奉浮屠氏。能信識其言。及處生死之際。盥濯易衣。泰然不亂。世外適人有所不逮。亦賢矣。享年五十有三。五子。竊。太學生。泖。洞。濱。路。皆卓然自立。能世其家。蓋推官與夫人善訓育之力也。二女。長適修職郎通州錄事參軍王易簡。次尙幼。孫男二人。曰暹。幼未名。字予世家山陰。先太尉邊夫人實與戚。致夫人爲女兒弟。予與宣義外兄弟也。少時交好甚篤。今夫人年逾五十而歿。予乃及銘其隧。則予安得不老。銘曰。

猗與夫人。率德不情。舅姑宜之。曰善事我。殄其事故。以奉女公。雍雍肅肅。既和且恭。相夫以正。教子以嚴。施於先後。以遜以謙。一病不復。奄其告終。我作銘詩。用詔亡窮。

### 奉直大夫陸公墓誌銘

吳郡陸氏。方唐盛時。號四十九枝。太尉枝最盛。唐末。自吳之嘉興。東徙錢塘。吳越王時。又徙山陰魯墟。宋祥符中。贈大傅諱軫。以進士起家。仕至吏部郎中。直昭文館。太傅生國子博士贈太尉諱珪。太尉生尙書左丞贈太師楚國公諱佃。太師生中散大夫贈少師諱寔。少師八子。皆以文學政事自奮。公諱洸。字子光。少師第四子。紹興初。以蔭補登仕郎。調右迪功郎。浦江縣尉。歷筠州司法參軍。徽州司法參軍。湖北路轉運司幹辦公事。知玉山縣。江淮等路坑冶司主管文字。通判通州。知荆門軍。提舉江南西路常平茶鹽公事。江南西路提點刑獄公事。主管建寧府武夷山冲佑觀。遂致仕。積官至奉直大夫。賜紫金魚袋。封陳留縣開國男。食邑三百戶。以慶元元年十月丙寅卒於私第。享年七十有二。初。少師避建炎之亂。益東徙居明州鄞縣之橫溪。猶返葬山陰。至公兄弟。遂有即葬鄞縣者。故公以三年十二月庚午。葬於縣之豐樂鄉西瀨之原。諸孤請銘於公從弟某。某則少公一歲。兒時分梨共棄。稍長。同入家塾。實知公比他人爲詳。公天資穎異。數歲能屬文。舉進士。連拔兩浙轉運司解。又爲江東轉運司解首。然卒不第。公不以懟有司。治經考古。益不少懈。爲吏窮日夜勤其官。未嘗事燕遊。所至上官委以事。公至忘寢食。寒暑以趨事赴功。在玉山時。劾剔蠹弊。根源窟穴。毫髮必盡。正俸外。他增給悉棄不取。比代去。計其數凡六十餘萬。故諫官尹穡有別業在縣。歲往來邑中。尹爲人喜議論。仕者多懼之。公不爲動。尹願敬公。每曰。子光清足以肅吏。惠足以養民。諸邑求其比。殆未見也。自荆門回。奏事殿上。所陳合指。皆即日施行。明日。孝宗皇帝對輔臣

稱公之才。丞相王魯公力薦之。遂擢江西常平使者。到官。治便坐於廳事之後。治事退。足迹不履中闕。揭所治錢穀出納之最於壁。列案皆簿書。終日坐臥其間。目閱手披。望罅漏。嚴期會。官屬吏胥。奔走承命不暇。不旬月。事大治。一道肅然。歲旱。公一先事爲備。得米百萬斛。吏不能一毫爲奸。五州之民。訖無流殍。於是特進一官。遂除提點刑獄。且進用於朝。會有臨江軍民習儀卿。爲其奴所殺。獄成。則謂儀卿弟宣卿實使之。宣卿既服。復以冤告。凡八移鞠。皆然。最後特以命公。公始得其情。宣卿實無使之之迹。奴亦無異辭。遠近稱神明。事上刑部。刑部以爲疑。言諸朝。移大理寺窮治。久。自卿以下。亦不能與公異。宣卿竟不死。公既以自請得奉祠而歸矣。於是益知奉法守官之難。不復有仕進意。甫七十。卽上書告老。始終進退之際。可謂無愧矣。公娶林氏。吏部侍郎保之女。三男子。桂。修。職。郎。監秀州蘆瀝鹽場。已卒。椿。迪。功。郎。臨安府臨安縣主簿。棟。迪。功。郎。徽州歙縣西尉。二女子。長適迪功郎平江府司戶參軍詹麒。次女適從政郎監楚州鹽城縣鹽場耿開。孫男焯。焯。焯。焯。焯。焯。皆進士。孫女適文林郎新監台州支鹽倉宋安雅。餘尙幼。銘曰。

遭余道兮晚乃逢。握使節兮撫困窮。發積勸兮忘歲凶。以經決獄兮平反之功。人不我知兮道則通。歸築室兮老於東。位列卿兮善始終。服三品兮五等之封。植櫛鬱鬱兮起墳崇崇。閱百世兮過者必恭。

## 中丞蔣公墓誌銘

公諱繼周。字世修。初。周公相成王。封元子伯禽於魯。是爲魯公。別子伯齡封於蔣。其後子孫因以國爲氏。至漢。有蔣詡。十世孫休。自樂安徙義興陽羨縣。始爲吳人。裔孫仲。相唐宣宗僖宗。故蔣氏益大。宋興。有堂爲仁宗侍臣。之奇。執政徽宗初。帝相孝宗。皆不去陽羨。而公之先獨益東徙家處州青田縣。曾祖球。贈通奉大夫。祖禔。父仔。宣教郎。致仕。贈中散大夫。公天資警邁。七歲賦。牧童詩。有奇思。遂精詞賦。十四棄其業。習戴氏禮。期年。輒通貫。諸老先生自謂莫及。一日。先生有欲勉成之者。期以問處。曰。吾將有以發子。公先時往。俟之甚謹。先生喜曰。子誠可教。士當務學。才不足恃也。子於書。能博觀而得要。則善如其未也。當勉之。毋以才自足。蹈吾所悔。公再拜謝。自是窮日之力。無所不讀。人罕見其面。遂學進士。中其科。調衢州常山縣主簿。試教官中選。歷太平州州學。臨安府府學教授。改宣教郎。入爲太學正。會省官。添差簽書鎮東軍節度判官廳公事。復入爲司農寺主簿。召試館職。擢秘書省

正字進校書郎秘書郎兼國史院編修官實錄院檢討官遭中散公憂服除起知舒州陞辭改宗正丞初公在館中得對所論甚衆其間因論和糴省運孝宗皇帝大悅曰卿文絕類陸贄省運誠不難行又曰朕將用卿卿果有趣事赴功之意乎公遂巡退避久之上亦默然方是時士大夫銳於進取者衆得上一語自謂結主知往往遂投合以取大官公獨若不敢當上意者故至是財得補郡然上終賢之辭日上問卿往年論事朕謂似陸贄今七年矣卿尙能記否舒州待次幾年公以三年對上曰卿家貧母老豈得待遠次當除卿行在職事官公謝曰臣事君猶子事父固願朝夕膝下然幹蠱於外亦子職也敢有所擇上益察公靜退乃大悅即有是命改秘書丞兼國史院編修官權吏部郎官公遷朝逾二年杜門絕造請諸公貴人以爲簡我將假他事出之會熒惑犯氏公因對言氏者邸也驛傳宜備非常不淹旬都進奏院果災上諭輔臣曰蔣某博學善論事卿知其人否皆對以不詳知上乃自禁中索班簿閱之將作監闕即命除公已而命下則少監也蓋有密以資淺爲言者上終不快未幾遷將作監遂兼太子侍讀然所以屬公者顧不在是方試太學諸生未出院除右正言實淳熙十年九月也十一年正月同知貢舉有禮記義絕出流輩已見黜公力主之拔置高等及啓封則吳人衛涇也已而廷對遂爲第一十二年二月兼侍講八月遷右諫議大夫十三年九月遷御史中丞公任諫官中執法凡五年知無不言初上受內禪收召四方名士舉集於朝其間議論或過爲激昂貴近不便之於是妄言方秦檜當國時遜於除授一人或兼數職亦未嘗廢事又可省縣官用度於是要官多不補而收召絕稱公首論之曰往者權臣用事專進私黨廣斥異己故朝列多闕至有一人兼數職者今獨何取此朝臣俸祿有限侍從卿監郎中以至百司月計其俸乘除百緡而已假使省二十員不過月省二千緡是特一二節度使俸耳其省幾何而遺才乏事上下交病且一官治數司而收其稟裴延齡用以欺唐德宗也孰倡此議者請得其人詰之其言蓋指貴臣人服其敢言時著令賊吏必坐舉官既屢施行矣有蔣億者以贓坐辜而舉官獨置不問公劾之曰此非有所避則有所庇耳同舉異罰法且由是廢上悅命有司舉行如初詔進士黃光大上書送台州聽讀公極論其不可且曰臣既樸愚不長於言人之有言又不能開導以廣言路實有愧焉太史奏日中有黑子公言日象君德豈容陰慝乘之大臣之蒙蔽外夷之侵軼後官之私謁宦者之用事下民之困窮皆其應也願陛下仰觀天文俯察人事以消羣陰之萌會地震公復反覆

論奏而加詳焉。將行郊禮。上春秋淺高。或以陟降拜跪爲勞。公言。今距冬至則踰半年。願陛下清心省事。養性導和。毋強疲勞。毋過燕樂。飲酒以和氣。不可以無節。而飲過度之酒。服藥以養生。不可以無疾。而服伐性之藥。自今以往。宜若神祇在其上下。祖宗臨其左右。誠意所加。幽明並助。將不勞而成禮矣。上悉嘉納。議者亦翕然。以爲得耳目之體。有女冠請於皇太子妃。以久廢上清宮額。徙置其居。因爲住持。祝妃本命。女冠入謝。禁輿。適有他女冠。祝中宮本命者。同列庭中。爭長。舊例。以往持者爲首。事聞。上取文書毀之。初不知有舊額也。皇太子皇恐不敢入朝。羣臣不知所爲。公乃抗言。徙廢額置他寺觀。天下皆有之。然女冠自不應入宮。今當一切禁絕。僧尼道士女冠。勿使得入而已。上悅。曰。卿此奏。善處朕父子間矣。封以付東宮。明日。皇太子入謝。上歡甚。皇太子。今太上皇帝也。亦遣人謝。曰。非公慮不及此。方是時。上以暇日。時御佛書。間召其徒入對。或自內東門賜肩輿以入。故公因以爲諫。自是遂無所召。士論歸重。都下喧傳遊奕軍統制官答百姓娠婦。至墮胎。公上章彈之。詔大理寺鞠治。同時又有故內人陸靚姬者。訴其夫恃爲閣門官。無故棄逐。且據有其貲。公請窮治。其人自計下吏。詞且窮。乃遣人妄誑。公曰。且暮且除簽書樞密矣。公叱遣之。論愈力。會考殿試進士。此兩人者。相與合力。於是大理具獄。以爲所管乃軍妻。公爲風聞不實。即日統制官者復還故官。且賜金帶。而靚姬所訴。亦得不治。考試畢。公方再抗章。詔遷禮部尙書。辭不拜。出知婺州。未幾。以母喪解。紹熙元年。除喪。復遷徙寧國府。加煥章閣待制。徙太平州。比四年。易三郡。適遇水旱。公力行賑恤之政。寢食不置。所條上者。皆盡利害之實。其大略曰。臣夙夜訪求荒政。言者萬端。然大指不過廣儲畜一事。爾有備。則拙者亦能集事。不然。雖習何益。中外服其論。故奏多見聽。其以常平椿管。通融賑民。蓋得請乃行。又旋已補足。且災傷五分。許賑糶。方高宗時。已屢著之。春秋頌矣。常平使者。願劾以爲罪。或曰。是爲其所親報。宿怨。公盍自言於朝。公曰。吾初不計此。人臣奉行寬大詔令。寧過無不及。天下豈無公論。會使者召用。公卒以口語罷歸。卜居嚴州。得屋僅庇風雨。頽垣壞甃。悠然自適。讀書且暮不輟。時從其耆老而訓其子弟。若未嘗貴達者。初。公任言責累年。排擊不避權豪。至士大夫有以誣得謗傷者。輒語同舍曰。夷考其人。平日恐不至此。及廣詢之。果不合。故一時在朝。寒遠孤進之士。得以自保。而四方賢牧伯。皆得究其設施。不爲怨仇所播。及公治郡。善政爲一路最。所遭乃如此。人爲公憤悒。而公未嘗見之色辭。於虛。非學問之力。疇克至此。居嚴逾年。稍起。提

舉江州太平興國宮。俄感疾。以通議大夫致仕。遂卒。實慶元二年十一月二十一日也。享年若干。娶梁氏。故戶部尙書汝嘉之孫。封碩人。五男子。綸。修。職。郎。台州司法參軍。緯。宣義郎。知徽州休寧縣丞。繹。承奉郎。維。將仕郎。紳。承務郎。二女子。朝散郎通判温州湯宋彥。進士梁至。其壻也。五孫男。一孫女。皆幼。諸孤將以某年某月某日葬公於處州某縣某原。以某獲從公遊。屬以銘。不敢以衰耄辭。銘曰。

孝宗龍興。大哉爲君。聖意圖回。羣才駸奔。於時語公。爾朕自知。今且巨用。欽哉勿違。公屹如山。却立弗前。曰臣實愚。敢先衆賢。帝初不怡。久乃太息。是予所求。忠厚諫直。乃長諫垣。乃丞御史。陳謨諤。國論所倚。一去不復。白首外落。晚躓於讒。浩然丘園。維始及終。進德彌劬。勒銘某隧。萬世是詔。

## 卷二十六

### 墓誌銘十六首

#### 呂從事夫人方氏墓誌銘

維申國呂氏。自五代至宋。歷十二聖。常有顯人。忠孝文武。克肖先世。婚姻多大家名胄。婦姑相傳以德。先後相勉。以義富貴不驕汰。雖甚貧。喪祭猶守其舊。養上撫下。恩意曲盡。雖寒陋巷環堵之屋。鄰里敬化服之。猶在京師故第時。於虜盛哉。從事郎諱大同之夫人方氏。嚴州桐廬人。曾大父楷。尙書駕部員外郎。大父蒙。朝散郎尙書屯田員外郎。父元矩。朝散郎知建州。建州之歿。夫人尙幼。事母已爲宗黨所稱。年二十有一來歸。生一男一女。而從事不祿。夫人能篤禮孝義。哀死字孤。爲子求師擇友。日夜進其業。而教其女以婦事。皆訖於成。不幸得年不長。四十有九而卒。於淳熙三年。祖平猶未仕也。及祖平通朝籍。以宗祀恩。贈從事通直郎。夫人亦追封孺人。故祖平每言。輒流涕曰。祖平不夭。不得以斗升之祿養吾親。視斯世尙何聊。惟圖所以慰親於九原者。在墓隧之文乎。遂來告某於山陰澤中。曰。願有述。某亦早失先親。與吾子之憾無異也。行年八十。每思之。殆欲忘生。則吾子之悲哀。其實能深知之。其敢愛一日之勞。不以成吾子之悲乎。初從事葬於信州上饒縣明遠鄉之德源山。以潦水醫墓趾。改卜於舊墓少東二百步。實慶元二年十二月庚申。而夫人初歿時。祖平妻不能以柩稱從事墓。乃即婺州武義縣



明招山祖墓之旁葬焉。自改葬從事。諏日奉夫人歸柩。而筮未得吉。祖乎於是爲承議郎。知興化軍仙遊縣事。女嫁朝請郎漆差通判鎮江府曾棐。孫男樛年。孫女萊孫。銘曰。

維呂世世有令德。繫女父母皆得職。夫人薰陶成厥質。行則尊矣壽胡蓄。歸柩同穴慰存歿。先刻此銘俟卜吉。

夫人陳氏墓誌銘

紹熙慶元之間。予以故史官屏居鏡湖上。有東陽進士呂友德。自太學來與予遊。問學論議文辭。皆有源流。而衣冠趨邇甚偉。予固異之。訪於東陽人。則曰。是清潭呂君紹義之子。呂君蓋賢有德。而其配陳夫人又賢。生三子。孟則友德。仲定夫。季友之。孟固奇士。仲季亦有聲學校場屋間。能稱其兄者也。自是友德不閱歲。必一過予。過必見其進。予老病謝客。無貴賤。多不能接。獨友德來。欣然倒屣。不知疾痛之在體也。歲戊午十月壬午。忽墨其衰經。叩予門哭。且言母夫人不幸。以八月戊子歿矣。得年六十有五。卜用十二月壬申。葬於孝順鄉蟠谷之原。以其家君之命。徵銘於予。予方病。亦不勝悲。不敢以病爲解。乃按從事郎陳君黼狀。序次爲銘。夫人與呂君同邑人。曾大父懿。大父嚴。父子淵。皆鄉長者。夫人幼孤。女功不待教而能。稍長。佐其母經紀家事如成人。大父猶無恙。奇之。爲擇所歸。得呂君。旣嫁。事舅姑以孝聞。女妹適人。傾其嫁時囊裝。無少靳。積勤儉以裕財。隆祭享以盡孝。厚振施以立義。呂氏之興。夫人之助爲多。處事明果。雖呂君有不能回者。諸子獻疑。亦堅守初意不爲變。曰。後當如是。及事定。一如夫人言。人人歎服。其後呂氏家益康。大第千礎。堂寢尤宏麗。而夫人顧自挹損。齊居玩道。即東偏汛掃一室。肅然如老釋之廬。或終日不出閫。如是歷十餘年。呂君與諸子屢勸其歸堂中。皆不可。然絲枲絨縷之事。至老猶自力。暇日勉諸子以學。授諸婦以家事。淳淳不倦。雖古賢婦。殆無以加。不幸一日不疾而臥。醫藥至。皆卻之。曰。吾固無疾也。已而遂不復語。諸子方就試。馳歸省疾。領之而已。神宇泰定。超然就蛻。及有司以友德名上禮部。報至。夫人不及見矣。可哀也已。夫人三女。嫁吳一夔。徐僑。徐鼐。皆良士。孫男四人。銘曰。

山盤水紆。龜龜食養。從吉日壬申。宅是幽宮。表表三子。奮繇詩書。維夫人之賢。有以基之。

承議張君墓誌銘

君諱鐵。字深父。年三十有八。慶元三年十一月壬辰病卒。以四年九月庚申。孤某葬君於臨安府西湖佛首山之

原因其伯父寺丞功父。以君之友太學內舍生陳公道原狀。請銘。予與功父交二十年。信重其言。而陳君所敘文亦甚美。可考據。遂與爲銘。君家素之三陽。曾大父安民。靖江寧武靜海軍節度使。清河郡王。追封循王。諡忠烈。配饗高宗皇帝廟庭。大父諱子厚。左武大夫。康州刺史。帶御器械。贈少傅。考諱宗元。通議大夫。敷文閣待制。贈少師。君幼而穎異。強記好學。少師遇郊祀恩。任爲承事郎。稍長。主管建昌軍仙都觀。遭少師憂。未除而母夫人繼卒。君執喪累年。毀瘠幾不可識。族人以不勝喪爲憂。共諭勉之。始稍自抑。然終喪猶羸甚。歷兩浙轉運司。明州造船場簽書。安豐軍判官廳公事。江淮荆浙福建廣南路都大提點。坑冶鑄錢司檢踏官監。總領淮西江東軍馬錢糧所太平惠民局。積官承議郎。君之爲船場。人或唁其非勳閥所宜處。君謝之曰。景迂冕以道先生所嘗爲也。吾處之。懼弗稱。敢薄之邪。訖代去。不以卑冗怠其事。自守以下。皆歎譽之。晚官藥局。尤號閑冷。顧無所施其才。又素簡儉。遠聲色。獨以書自娛。時屬文辭見志。然未嘗妄出以示人。所居帷屏壁門。皆有銘以自警戒。其文尤高。沒後。始或見之。皆驚其才。服其識。以爲使未死。得享中壽。其所至詎可量哉。孰謂不幸年止於此。君嘗以進士試禮部。見黜。不以對有司。亦遂不復踐場屋。諸公貴人多知之。然仕常從銓。與寒士竝進。至終其身。其靜退乃天性。娶楊氏。太師和王存中之孫。繼室以潘氏。少保安慶軍節度使邵之孫。皆封孺人。子男一人。渥。將仕郎。有賢稱。女一人。與孫伯東皆幼。銘曰。

君家勳德奕世傳。圖像麟閣侍甘泉。佳哉公子何翩翩。才當用世不永年。有美樂石可磨鐫。百世之下知此賢。

朝奉大夫石公墓誌銘

公諱繼曾。字興宗。周武王之弟康叔封於衛。五世生靖伯。邑於石。是爲石氏之始祖。而會稽新昌之石實自青之樂陵南徙。距公二十三世。其詳見於世譜。左朝議大夫累贈正奉大夫諱端。中朝散大夫大理正出爲福建路參議。諱邦哲。迪功郎温州平陽縣主簿。累贈朝奉大夫諱祖仁。公之三代也。公幼穎異。入家塾。日誦千言。過目不再。寺正築堂。名博古。藏書二萬卷。每撫公歎曰。吾是書以遺爾。無恨矣。客至。侍左右。進退應對唯謹。客悚然不敢童子視之。曰。石氏興未艾也。朝議捐館舍時。公尙未生。遺言吾致仕得任子恩。當以予適曾孫。公既生。補明州文學。調黃州黃陂縣尉。以便養親。監潭州南嶽廟。歷臨安縣新城縣主簿。楚州司理參軍。監行在編估打套局門。監建

康府戶部贍軍西酒庫。知饒州德興縣。兩浙轉運司主管文字。提轄行在文思院。未及造朝。以疾卒於家。享年五十有八。自迪功郎十遷至朝奉大夫。公事親孝。執喪如禮。毀瘠幾不可識。除喪。久之。乃復居官。守家法。以廉自勵。俸入可以受。可以無受。必辭。餽贖可以取。可以無取。必卻。徇公而忘私。約己而裕物。捐利而篤義。爲主簿新城時。謹簿書。掘吏奸。以善其職聞。移於潛丞。邑民謹於境上曰。奈何奪我主簿。久乃涕泣辭去。在楚州。治獄尤詳明。屬縣尉一日獲盜十輩。意且得贖賞。同僚爲言。君雖恕。然不可縱盜。公正色對曰。盜誠不可縱。罪亦不可入。囚辭亦不可不盡。同僚退相顧曰。尉賞不諧矣。然憚其正。不敢復言。獄成。真盜財伍人。餘破械遣去。部使者趙公思允賢公。一路有疑獄滯訟。輒以委公。公治之無遺察。雖受罰者。皆稱其平。德興壯縣。俗喜負氣。健鬪而終訟。公始下車。歎曰。是不可以柱後惠文治也。於是爲政一本於教化。有兄弟宗族爭訟者。輒對之泣下。多感愧而去。俗爲一變。繕治學宮。聚經史。豐饔羞。尊延耆老。而賓友其秀民。又創小學以誘進。其童子誦書之聲。聞於行路。會科詔下。德興與薦送者二十有三人。比他邑爲最盛。縣之遠郊。貧民憚多子。或不能全。公舉行胎養之令。置保伍以察之。甚悉。而盜攘因不得輒發。其政大抵類此。郡以上聞。勢孤無爲援者。不報。還朝。從吏部得兩浙漕司屬官。公愴然無滯留色。浙江西陵渡。舊設官護舟楫。歲久不復擇人。其弊叢出。歲有覆溺。公建言。請各命文臣一員。察其愆惰。以爲陞黜。且渡舟一。置備舟二以翼之。雖有惡風怒濤。可無大害。江之津。官舊爲築舍數十區。爲待渡之所。後輒廢。往來有暴衣露蓋之患。公亦請以官廢屋復之。事有施行者。皆至今爲利。而議者惜其不盡用也。公雖以任子入仕。然志在繼世科。嘗貢禮部。不合有司。退而力學著書。比卒。遺稿可次第者數十卷。多可行世。娶郭氏。封安人。先公一歲卒。丈夫子三。曰正大。正誼。正權。皆舉進士。而正大亦嘗至禮部。女子子九。已嫁者五。鄉貢進士郭溪。修職郎新邵武軍司戶參軍趙善駿。從政郎新隆興府府學教授王益之。國學進士孫之淵。國學進士劉敏文。其婿也。諸孤將以卒之明年。慶元六年正月丙午。葬於山陰縣謝墅之原。以安人祔前葬。來請銘。銘曰。噫大夫。秀而文。學自強。仕有聞。秩中郎。返蒿蕞。戎作銘。賁其墳。後百世。仰遺芬。

## 方伯蕃墓誌銘

伯蕃甫。姓方氏。名士繇。一名伯休。蒲陽人。曾大父會。事徽宗皇帝。出入榮顯。顯謨閣待制。贈少師。大父昭。左朝請。

大夫嘗入尚書省爲駕部郎中父豐之右迪功郎監建州豐國監中書舍人呂公居仁著作郎何公晉之皆屈年  
費與之遊紹興間有名士方德亨者是也予嘗序其文今行於世伯蕃甫所自出曰兵部尚書呂公安老尙書以  
臨大節不撓死雒西之難載在國史伯蕃甫遭父憂時財十二歲從太夫人依外家居邵武軍執喪已能無違禮  
而事太夫人及庶祖母以孝謹稱入小學與他童子從師授經既退意不滿爲朋儕剖析義理師聞之悚然自失  
冠遊鄉校試學在高等聞侍講朱公元晦偶道學於建安往從之朱公之徒數百千人伯蕃甫年尙少而學甚  
敏不數年稱高第因徙家從之於崇安五夫籍谿之上所以熏陶器質涵養德業磨礱浸漬以至於最大高明者  
蓋朱公作成之妙而伯蕃甫有以受之也伯蕃甫既見朱公卽厭科舉之習久之遂自廢不爲進士專以傳道爲  
從學師六經皆通尤長於易亦頗好老子嘗歎曰老子之言蓋有所激者生於衰周不得不然世或黜之以爲申  
韓慘刻原於道德亦過矣又曰釋氏固夷也至於立志堅決吾亦有取焉其博學兼取不以百家之駁揜所長如  
此亦足見其資之寬裕忠厚與世俗異也伯蕃甫晚得脾弱之疾春夏之交輒作不能食者彌月乃已慶元五年  
夏病如常歲至五月庚申忽命家人爲之總髮既畢取鏡自照正冠危坐而歿得年五十有二娶黃氏曹氏男女  
各三男曰丕曰立曰平女嫁張登劉學稼幼未行明年卜葬於武夷山石門寺之原六月丕書來請銘其辭指甚  
哀予雖老病昏眊亦重遺孀子之意且伯蕃甫之賢固願有所述遂不敢辭初德亨之文豪邁警絕人莫能追及  
而伯蕃甫之作則閑澹簡遠有一唱三歎之音世莫能優劣之也工於書自篆籀分隸行草諸體皆極其妙又能  
講其時世之變與國方缺瘠之法聽之終日忘倦遺稿數百篇與它著書甚衆丕等方輯之未成好方技治疾有  
奇驗能逆決生死著傷寒括要亦未成嘗謂予曰士貧惟賣藥可爲然子孫繼爲之有怠且欺卽不免害人若不  
不爲之愈也大抵伯蕃甫多才藝所能輒過人其思慮精詣又若此然在伯蕃甫皆不足言故不詳著銘曰  
方氏三徙而不出閩君從朱公始爲建人武夷山麓鬱有封樹車過必式曰是爲伯蕃甫之墓

### 留夫人墓誌銘

慶元六年十月余之友信安徐廣赴告其母夫人之喪於山陰澤中曰廣不天早失先人先人無他子廣於母氏  
相特爲命稍長娶婦韓賡出游獲從一時知名士學問母氏與婦韓治家事以待廣歸賡雖游不敢甚遠母氏壽

而康間有小疾。則馳歸省。到家。往往已愈。母氏見廣所與諸公論議辦質文章。則大喜曰。使汝嘗在吾傍。詎有是哉。今年六月。廣客都下。得報母氏有疾。廣即日歸。行二日而遭大變。至家。已無及矣。俯仰天地。豈能生存。大事未終。不敢致毀。惟是幽隧之銘。敢請於執事。廣忍死以須。執事忍卻乎。按狀。夫人姓留氏。常山之馬廋人。曾大父唐大父永。父師古。世爲儒。夫人適西安人徐君韓國潤。徐君一鄉善士。其卒也。故尙書謝公諤狀其行。而內相洪公邁誌其葬。不知徐君者。以二公許與。可信其賢。夫人資端重。色莊言厲。然遇慢己者。輒退自省曰。吾其有以致之。舅姑御家嚴。夫人左右無違。嫁女妹。凡已嫁時。服飾粧澤無所惜。與先後處。自始逮終。歡如一日。凡徐君行事。見稱於族黨閭里者。多夫人相之。而廣之學識卓然聞於世者。抑又夫人教誨之力也。是可以得銘矣。夫人享年七十。生丈夫子一。廣也。女子子三。知武當縣劉館。新知樂安縣劉璿。前監太平縣稅韓朴其甥也。孫男曰魯。孫女長適進士翁時敏。餘二尙處。卒之歲。某月某日。葬於清平鄉官樓山。附徐君之墓。銘曰。三代益遠。世廢女史。豈無淑人。曾莫之紀。玉埋於泉。孰知貞堅。我父尙傳。夫人與焉。

## 卷二十一

## 墓誌銘五首

## 朝議大夫張公墓誌銘

於康士有才足以任重。賈成謀足以折衝。經遠而不見知於人。不獲用於時者。世固有矣。人猶未以爲憾也。至於知之而不盡。用之而不極。利安元元之功。卒不克見。則後世讀其事。至於悲傷歎息。有不能自己者。某自壯歲客遊四方。獲識其豪傑。如朝議大夫張公。其始是已。公諱郊。字知彥。和州烏江人。曾大父諱廷慶。大父諱補。蓄德深厚。然皆不仕。父諱幾。才尤高。以子貴。贈金紫光祿大夫。公少用兄待制邵。出使思。授右迪功郎。調開化尉。兼主簿。歷平江府西比較務。監南嶽廟。平江府錄事參軍。全椒令。復監南嶽廟。監行在激賞酒庫所糴米場。樞密院編修官。通判建康府。主管台州崇道觀。主管惟西轉般倉。監登聞檢院。太府寺丞。知真州鄂州。提舉江南東路常平茶鹽公事。復主管崇道觀。建寧府武夷山冲佑觀。積九遷。至朝奉大夫。遂請老。以子遇郊祀恩。積四封。至朝議大夫。

公爲人魁磊不凡。學問識其大者。臨事前見逆決。若燭照龜卜。無秋毫無滯。他人極思慮。不能可否者。公一言處之。常有餘裕。初爲編修官。公府吏素容養。習爲奸利。無所畏忌。視掾屬無如也。公因事。時白發其甚不可者。羣吏縮粟。至相語以公白事爲憂。未幾。坐臺評免歸。孝宗皇帝受內禪。虜猶窺江淮。上慨然思卻虜復中原。廊堂共謀。拔擢人材。分任兩淮事。築城浚隍。什任民兵。漕上江之粟。以儲兵食。乃自散地起公主管。淮西轉般倉。然初議。乃欲概付以淮西邊事。不獨治倉廩也。會更用大臣。所議不果行。乃以公監國院丞。大府無深知公者。求試外。出守儀真。得對。言臣疎賤。歷州縣。頗熟民間事。今蒙恩使治郡。不敢不力。惟淮南新被虜禍。民散徙未還。臣當體聖意。安輯撫摩。察其蠹弊。一皆上聞。惟陛下省察。如臣不任職。固不敢逃罪。前守員琦。獻羨緡八萬。皆文具。實不有一金。公到郡。悉以實聞。訖得免輸。俄詔兩淮郡守及部使者。各上用錢券利害。公力言。券用於四蜀全盛之地。故能流轉。然猶有弊。今兩淮凋瘵如此。諸郡賴以給用度者。不過酒稅。新爲戰場。無復土產。可以貿易。獨賴錢幣而已。若用券。商賈且不行。何以爲郡。時議者多妄揣時事。謀闕邊隙。公密奏虜盟固不足恃。然其主孱懦。懲故酋敗盟之失。方幸無事。其任事之臣。又皆齷齪。日事琴弈。無遠略可知。我若惑浮言。遽動。不惟力有未給。又激彼使生事。朝廷且旰食矣。上頗采用其說。公因言。真爲楊楚之衝。當城此郡。以固人心。度費緡錢十萬。米三千斛。而郡有上供。與經制羨數。可得大半。止乞給降三萬緡。發傍近屯兵二千人。臣身自督役。不再關月可成。旣得請。果以四十有四日告畢。樓櫓屹立。而民不與知。上聞。益知公可用。代歸入對。所陳又合上指。乃有武昌之命。入辭。上慰諭曰。卿真州之政不苟。鄂上游重地。是以委卿。卿便宜體此意。到郡。有事第奏。來御前。當遣金字牌報卿。公感奮益盡力。鄂爲江湖間一都會。總領轉運及都統制。三司鼎立。異時多縱肆。雖幙府僚屬。皆下視郡守。公素剛介。難犯。人固已震畏其名。及視事。衣冠視瞻甚偉。號令設施皆當。人心由是莫不敬憚。而軍中猶倔強自如。縱羣卒入市。視民及郡兵。有長身中度程者。輒毆以往。公捕至郡庭。呼吏作奏。軍吏羅拜請後不敢。自是訖公去。無敢犯。都統入朝。有營卒夜挾刃貸於富室。脅使不敢言。公廉得之。馳入提舉軍事張平家。平素以兄事公。呼家人置酒。公曰。我來正欲飲。但當得劫富民者。行軍法。乃快飲爾。平惶恐。立捕治如公言。妖人吳興居屬邑。有詔命捕。公求得善捕盜者唐青。厚資給之。且授以方略。遣行。而方士皇甫坦挾禁輿勢。爲私請。公弗聽。俄獲輿以獻。及公還朝。上首問

獲與之狀。公謝曰：妖人在郡境，不卽置法，至煩詔命。臣乃有辜。然唐青實盡力，賞未償勞。敢昧死以爲請。蜀士以喪歸，遇名盜破舟殺人。又欲斲其棺。公厚賞捕之，竟伏法。由是江路清夷。有誤觸舟者，柁師大言曰：今張公在此，汝尙敢爾邪？歲大疫，公爲之營醫藥，以全否爲醫殿最。餓給之食，死予之棺。民家一牛死，貸錢三萬以買犢。治聲聞於行在。及使江東，公言都中旱饒，南康尤甚。濟之當如救焚拯溺。今當奏事往返且兩月，請先馳至部。議所以賑卹者，又條上其事甚悉。上皆從其情。事略定，乃入對。且以聞。上惻然曰：何以使吾民得食至麥熟邪？公又具以計劃對。上勞勉遣行。會詔諸路諸郡陳事之不便於民者。公因言歲饑民流，去年渡江而北者，殆數百萬。至淮南亦無所得食，死者相枕藉。今僅中熟，而郡縣不度民力，督常賦及私負甚厲，加之造窳屋，教民兵，行和糴，叛馬棚鑄錢幣，未見其利，已不勝其擾。願發德音，一切罷之。此數事，有主之者，施行方力，而公盡言乃如此。武臣提點刑獄，怙權侵官，公略不爲屈。職業所及，必力爭得直乃已。至甚不可者，又以互察法劾上之。其人懼，乃與池州守相附結，排公。賴上素知公，譖不得行。歲滿，請奉祠而歸。初，待制治命，以遺恩官諸姪。仲兄祕閣公祁辭不取，以予公之子。初不告也。公聞，亦固辭，而乞官孤姪孝嚴，寓家蕭山，收養孤殘，與同甘苦。視所居之鄉，如其宗黨。進善人，誨責其有過者，俗爲一變。門當吳越大道，有病於旅，死於行，公以私財療治斂瘞之，無遺力。歲惡，飢民爭歸公，公爲設食，不可數計。然用度初不給足，食或不肉也。間無事，時出門尙竿，扶一童立里巷。老稚遙見，稽首祝之曰：願吾父壽百千歲，爲窮民歸。淳熙十六年八月七日晨闔戶，有方外士二人來謁。公接之如平時，將食，曰：吾今日病，不能同汝食。家人請命醫，公不許。且麾使去。家人行數步，回視之，奄然逝矣。享年八十有七。娶余氏，進士芾之女。封恭人。贈碩人。先公三年卒。諸孤以公捐館之明年十月二十有八日，奉公之喪，與碩人合葬於慶元府鄞縣桃源鄉西山之原。子六人：孝伯、朝請、大夫、權、禮部尙書，兼侍講，兼實錄院同修撰。孝仲，承議郎。京西南路安撫司幹辦公事。孝叔，孝季，未官而卒。孝禪，從事郎。監嚴州神泉監。孝聞，從事郎。新差管押紹興府石堰。慶元府鳴鶴鹽場袋鹽。女四人：修職郎高得中，進士王孝友，其壻也。其二早卒。孫六人：守之、宜之、約之、及之、卽之、能之。孫女十有五人。初，公兄弟皆負異材，惟待制稍顯榮。然皆不得盡行其志。祕閣之子，中書舍人孝祥，以進士第一起家，出入朝廷二十年。文學議論政事，隱然號中興名臣。亦未四十而卒。公晚遇主，又壽最高，亦竟不用。識者謂天嗇其報，將大

張氏後。而公之陰德在人。其後亦當大。今尙書公忠孝文武。方極柄用。公既以通識大夫告第矣。追榮且繼下。然後知識者之言爲驗。某生晚。不及拜待制之門。若祕閣及中書。則辱知厚甚。晚始識公於武昌。公又特期之。遠不惟以祕閣中書故也。時方葺南樓。公朝夕召與燕飲。慨然語曰。吾南樓。天下壯觀。要得如子者落之。子之來。造物以厚我也。謝不敢當。今尙書之客。皆一時賢傑。其巨筆鴻藻。皆足以慰公於九泉。而尙書獨以誌墓屬某。豈猶以公遺意耶。用是不敢辭。銘曰。

世患無才。才大輒棄。萬里之遠。方駕而稅。若時張公。表表國器。入接樞庭。誇讒亟至。兩城一節。所至大治。抱負萬。出微一二。備或忌之。竟以譴蹟。言歸江濱。風雨財碎。聃然密期。化被閩里。天其知我。報在嗣子。教忠之榮。四品告第。尙有寵褒。靈輝一世。後勒特銘。式貢幽隧。

王季嘉墓誌銘

予自尙書郎罷歸。屏居鏡湖上。郡牧部使者。多不識面。至縣大夫以耕釣所寄。尤避形迹。弗取與通。惟兩人曰山陰張君燾。會稽王君時。會相從。雖然如故交。張君端亮英達。不幸卒於官。王君尤淵粹有守。官滿造朝。來別予。悵然語之曰。賚行當以言。願足下自愛。毋以用舍媿初心。敗晚節。君曰。是我志也。及見除書。從天官銓調湖南轉運司主管文字以去。方是時。大臣多知君賢。近臣或奏疏薦君。而揚歷久。且嘗爲邑以最聞。近比當得美官。君一不顧。方上書請進退。人才當考實。不宜以近似斥善士。已而迂道來過予。喜津津見眉宇曰。某於是粗能不負公所期矣。予作而答曰。僕不失言。足下不失己。皆可賀也。及卒。予聞訃歎驚。爲朝廷惜此一士。亦竊喜君任雖蹟而志遠也。會其子前葬來求銘。因敘而銘之。君字季嘉。慶元府奉化縣人。曾大父起。大父元發。皆布衣。考中立。以君有列於朝。再贈至宣教郎。君自少時事親孝。戶兄弟。處鄉里學校。從師擇友甚嚴。言語舉動。忠敬有法。與兄時敘同登。乾道五年進士第。任自台州司事參軍。歷袁州州學教授。監行在左藏西庫。知紹興府會稽縣。最後終於長沙。自迪功郎七遷至朝散郎。賜緋魚袋。初。魏惠憲王判明州累年。君移書丞相史魏公。言國家早建儲宮。以定天下之本。而魏王偃藩在外。天下皆以爲當然者。父子異宮。天下爲家。東藩之守。猶異宮也。然父子兄弟之情。終若有間。雖曲加恩禮。豈若用故事。使得日奉朝謁。外庭濟濟。示天下以公。內庭熙熙。從家人之樂哉。史公讀之。太息稱



善。會魏王薨。言不果行。觀君此書。使得居中任用。其補國家。化天下。必有大過人者矣。有識之士。恨君之不遇也。會稽歲霖潦。郡方督已竭之賦甚急。君持不可。守不聽。乃袖告身。易服。立庭中力爭。守爲之奪氣。民賴以紓。遂修社倉之政。因立保伍。以察不孝不悌情。遊不逞者。風俗一變。會營奉永阜陵。吏按舊比。抱文檄如山。環案立。君徐視。去十之七。餘不可已者。召民面給錢粟。與爲期會。於是民不知役。而事悉集。君所至設施。多可稱述。論事亦多識大體。予所書。特其章章可備史官之求者。若廉於貨財。簡於自奉。不納妄餽。不受羨俸。此在君爲不足言。故皆略之。君銳意經學。有易詩書論語訓傳。鄉飲酒辨疑。凡數十百卷。文辭簡古。尤喜爲詩。與范文穆公。及尤延之。楊廷秀。倡酬。諸公皆推之。有泰菴存稿三十卷。病已亟。猶強起。拱手端坐。無情容。顧家人曰。吾學易。晝夜之理甚明。遂卒。享年六十有四。慶元六年正月丙申也。娶楊氏。封安人。淑柔孝恭。晚益好靜。安於死生。有學士大夫所難者。先君一歲卒。男女各五。男宗廣。以君遺恩入官。宗大。太學生。宗朴。早卒。宗野。宗愚。女長嫁進士楊琪。迪功郎沈黠。進士杜思問。進士孫之穎。幼尙處。孫男五人。與黠。與回。與賜。與文。與求。孫女七人。皆尙處。諸孤將以十二月甲午。奉君及安人之柩合葬於某地之原。銘曰。

君才雋偉。天所授。早篤於學。晚益富。年過六十。是亦壽。道悠運促。志弗究。子孫森然。敏而秀。如芝在庭。驥在廐。築丘植。櫟日高茂。盛德表表。宜有後。

## 石君墓誌銘

會稽之姓石爲大。君諱允德。字迪之。會稽剡人。梁開平中。分剡爲新昌。君之籍在焉。爲新昌人。五世祖。開府儀同三司待旦。以學行爲范文正公所禮。子孫又多賢爲聞人。而石氏益爲名家。君曾祖景恭。祖端怡。父圖南。獨皆不列仕籍。然邑人皆推以爲賢長者。至君。繼以好學謹行。事後母至孝。舉鄉進士。亦每在選中。然卒不遇以死。吾嘗觀一邦一邑之士。其犯法觸禁。流離困踣者。非必皆其身不善也。問其先。往往喪節而貴者也。否則不義而富者也。否則養交黨。事頰舌。飾詐售僞。以取名譽者也。其仕而達。處而給足。且有才子子令孫者。非必皆其身之賢也。問其先。往往正直而不遇者也。否則廉讓而貧者也。否則篤學守道。而不爲人知者也。若君之家世。庶幾於正直廉讓。篤學守道者歟。君又能繼之。而滋不遇。初。君先世寡兄弟。至君亦子立。而君乃生四子。皆不陸詩書之業。天之

報將有在矣。君薄於自奉，厚於賓友。所居財蔽風雨，而作東園。有大堂方池，爲宴客之地。客至，把酒賦詩，弈棋投壺。或終日廼休。平居尤樂施惠，嘗葬不舉之喪，遺失時之女，晚與族人吏部公畫問讖，同作義莊，以給族之貧者。會吏部下世，君乃與其子提刑宗昭將終焉之。而君又歿，提刑亦歿，善之鮮克舉如此。於虐悲夫。君歿以慶元六年四月癸丑，享年四十九。娶許氏，朝散郎知辰州從龍之女。子孝本，孝施，孝積，皆進士。女孟，嫁太平州司戶參軍趙時儒。仲季未行，諸子將以嘉泰元年十二月甲申葬君於仙桂鄉大姥山之原，實祔大墓。來請銘，銘曰：

夫人陸氏墓誌銘

夫人陸氏，吳興人。曾大父某，大父某，皆爲薦紳士大夫。父某，有學行，爲進士。母劉氏，同郡戶部侍郎劉公岑之女。劉公蓋與進士君遊甚久。夫人幼有美質，懿行，旣笄，嫁金谿人故通直郎黃君齊。黃君仕至靖州軍事判官以歿。夫人持家教子有法度，廟享賓燕合禮，嫁娶不苟。里中多稱之。遇疾雖篤不亂，起坐盥櫛，正衣冠，乃歿。其歿以慶元六年十一月己未，享年六十七。上距黃君捐館舍三十六年。初葬以嘉泰二年十月壬午，實祔黃君之墓。夫人三男子：曰甲，曰庚，曰丙。一女嫁陸祺，四孫，自勉，自得，自立，自防。一孫女，予與夫人皆吳人。夫人之先徙吳興，而予家徙山陰。其實一族也。而祺又予從子，故其孤以朝奉郎通判江州黃君榮之狀來請銘，銘曰：

程君墓誌銘

君諱宏濟，字志仁，兵部尙書諱瑀之子。尙書鄉里世次，家有譜，墓有碑，國史有傳。君生於宣和六年，客有得古劍於武夷山中，以獻尙書，已而君生，遂以劍命之。幼讀書，記誦博敏，號奇童。十二能爲詩，有老成氣。紹興初，尙書以給事中勸講邇英殿，敷繹古義，開廣上聽，以濟中興之業者甚衆。君概聞其說，輒嘆息不已。一夕夢道君皇帝大駕南還，且以告尙書。尙書悲慨，爲賦詩。他日，以示中書舍人傅公崧卿。傅公抱負大節，常思捐肝腦死國家，與尙書尤厚。讀詩感歎曰：忠義出天資，非勉強可至。吾輩老矣，使後生皆如此兒，寤寐不忘國事，尙何慮讎恥之不雪哉。十年，以宗祀恩授右承務郎。久之不調官，或勸之仕，皆不從。秦丞相檜亦嘗以問尙書，君尤不謂可。凡再爲監

南嶽廟。法不許復請。乃命以江南西路安撫司屬官。尙書壽終。君哀慕過人。除喪。監通州金沙鹽場。秦丞相用事。數起羅織獄。士大夫株連被禍者。袂相屬也。廉得尙書所著論語說。擯近似語。以爲訕。禍且叵測。母夫人憂懼。不知所爲。君侍左右。無俄頃捨去。且慰解言。先人逮事三朝。上所眷禮。必且蒙矜宥。願毋戚戚。母夫人賴以少安。君雖寬坐罷官。然母子居家如平日。同時得罪。莫得與比。蓋高宗皇帝終保全之。如君所料。久之。起家爲江南西路轉運司幹辦公事。時李莊簡公光自海南歸。舟下瀟湘而病。君曰。吾先友也。且兒時蒙公知。得一見。死不恨。亟告往。程抵江州。則李公至蘄州薨矣。君弔祭盡哀。歷江南西路提舉常平司幹辦公事。遭內艱。除喪。監建康府樞貨務。乾道元年六月丙戌。以疾卒。年財四十有二。官止通直郎。明年五月庚申。葬於番陽縣鑿山之原。夫人臨川黃氏。吏部郎季岑之女。六男子。有功。宣教郎。故通判秀州。有孚。朝散郎。戶部犒賞酒庫所主管文字。有元。進士。有徽。太學內舍生。充國子監小學教諭。當赴殿試。正奏名。有初。有大。皆進士。二女子。長適進士鮑庭燾。次適黃州黃岡縣尉賦詩。一孫。始予自蜀召歸。出爲江南西路常平使者。進士程君有章。字文若。以五字詩爲贊。卓然有元和遺風。予刮目視之。自是二十餘年間。數相見。及見於臨安。程君已入太學。更名有徽。字晦之。才名動一時。卽君第四子也。來屬予銘君墓。不獲。以衰病辭。銘曰。

古士奚學。惟忠暨孝。君雖不試。志彌名教。中臨嶮巖。凜不回撓。咨爾後人。是則是倣。

卷二十八

墓誌銘四首

朝奉大夫直秘閣張公墓誌銘

公諱瑄。字子律。寧州真寧縣人。其先爲郊寧望族。世以學行著。或居郊。或居寧。居郊之後。故吏部侍郎兼侍讀。公諱瑄。字子律。寧州真寧縣人。其先爲郊寧望族。世以學行著。或居郊。或居寧。居郊之後。故吏部侍郎兼侍讀。民爲元祐名臣。居寧者。則公之大父太中大夫也。諱居。擢元祐六年進士第。元符三年。徽宗皇帝嗣位。下詔求言。太中時。爲黔州彭水令。上疏切直。出數百人上。而數百人者。得其副。亦歎以爲不可及。會蔡京入相。取秦疏次第。置奸黨上等。特降官衝替。永不許改官。數年。遂卒於沉廢。後以子仕登朝。累贈至今官。實生朝請大夫通判永

州事諱避。則公之考也。亦累贈至中奉大夫。中奉遭亂南渡。從大將岳少保飛。爲之屬。身先將士。屢與金虜鏖戰。走其名王大酋。策功進官。方慨然以功名自許。會朝廷與虜和。中奉去。鎮府調知岳州巴陵縣。有異政。久之。佐永州。以歿。識者謂用不究其才。後當有異者。公始以郊祀恩入官。調贛州會昌縣主簿。未幾。以材選攝事。與國丞信豐令。皆閹茂。會昌與梅州比境。梅移文捕逃卒。卒已亡去。巡檢司乃發卒圍其所。親率柅金。柅雄其衆。以爲恥。詔聚謀亂。令託辭委縣去。以印屬公。公不爲動。械巡檢卒繫獄。親爲檄。諭柅以禍福。柅皇恐。請命。縣賴以無事。與國有婚訟。久不決。公察其婦人不類良家。一問引服。信豐俗悍。輸賦率不以時。吏亦以此擾之。至相率抱嶮自固。吏計窮。即以民拒官爲言。公曰。豈有是哉。馳至近村。慰僧廬中。以善言招其鄉之爲士者。及父老。與之酒食。從容曰。稅賦豈可終負。然已失時。姑使吾得十二。藉手若何。皆踊躍而去。更相告。即日皆集如約。公去而之他鄉。悉如之。旬日歸報。太守洪公遺異其能。方薦於朝。而忌者聞之於部使者。遂止。調潭州右司理參軍。有老卒夫婦居牙城中。白晝爲何人所屠。而掠其貲。卒有義子。兵官疑之。執送州。且以同處之卒及牧牛兒爲證。旣繫獄。公親詰之。皆詞服。公察其冤。他日。取牧牛兒寘壁間。引義子者與他重囚雜立庭中。出兒問孰爲殺老卒者。憐無以對。乃入白州。請揭厚賞。募告真盜。不閤日獲之。則卒王青也。捕至具伏。且得其貲。於市庫無遺。即日釋義子去。湘鄉縣械鋪卒張德上州。以爲手刃其叔祖。不得見。兄之疾告。就視則死。而非疾也。方愕眙。兄與里正及鄰人共謀執誣之。且以言脅誘。謂決不死。今乃知死矣。因稱冤不已。公亟呼其兄與對。兄情得語塞。遂伏辜。他死囚類此得不死者。十有七人。終不言賞。府帥林公粟以直得名。臨事剛果。小人揣知之。有榜於州治門。言提轄官者爲帥謀。將稱兵。林公怒。闔門徧呼吏卒。驗其書。一兵與者。與榜出一手。親詰不服。乃以付僉廳。苛慘雖至。終不服。乃屬公。即僉廳鞠問。公寬之。而諭使以情言。且許以不死。始具言提轄官橫甚。爲所患苦之狀。度不可訴。故出下策。爲此榜。以爲不及帥。則無以激其怒。不知乃陷重辟。公問於大局兵。人人言同。公乃白帥。且求寬其罪。林公大怒。嘻笑。必誅之。公一日凡十餘進。力爭曰。帥所以屬某者。欲得其情也。今得其情而失信。則有司自是不復可鞠獄矣。爭至暮。林公亦悟。隸隸嶺外而已。民有訴一冤死而十年不見理者。訴於提點刑獄馬公大同。馬公以屬公。公閱其獄。皆謂震死。

公獨得其死狀實以鬪毆非震也。公曰：罪固有所歸，然歲月久，屢更赦令，當從末減。馬公強果自信，下吏莫敢與爭。公獨不爲屈。又有訟者，馬公直判委公勘某罪，公力陳其不可。馬公皆霽威嚴，如公請，識者兩善之。公每白事，姓名歲月及事之名數曲折，皆成誦在口，無一遺者。馬公始亦疑，因強記一條驗之，牘皆合。乃大歎服，自謂不逮。又調常德府武陵縣丞，政事益明習。攝縣及府從事者，凡再闕歲，紹熙中，武陵大水，犯縣城，不沒者三版，門不得闔，水且入城。公時方攝縣，亟命實土於布囊以塞門，俄而水定。乃設方略，募舟救民，且親載粟，戶給之。泥行露宿，無所憚。蠲閣賦輸，一切必以實，吏不得一搖手。民忘其災，縣三里港，灌漑甚廣，久弗治，數遇枯旱，公爲築之，不愆期。訖事，因治他陂塘，無遺利。迨今賴焉。以薦者及格，改宣教郎。知隆興府奉新縣，縣有營田，征賦比他爲最薄，民競耕之。久而營田罷，以鬻於民，履畝取稅，比舊已增。俄而復命折粟帛以緡錢，共低昂或至十百，民皆破家不能輸。令屢以病告，不見聽。公力請，又不聽，則欲棄官去。會帥張公杓來，是公言，始奏蠲之，戶千有九十，皆若更生。楊公萬里記其事。他與除利害，勸農桑，築陂防，興學校，不可勝載。所部及府，俱以其事論薦於朝。而王公大人亦自知公，乃命主管官告院，進將作監主簿。太府寺丞，方公在朝，子右史舍人翔翔三館，俄擢從班，父子相望於班列。中客至門見公，便坐從容，聞國朝故事，前輩履行，後生所未聞者，人人鑿足，退而見舍人，碩大雋傑之資。同時進用，爲國光華。史冊所載，殆無以進焉。而公了不以自滿，方勤其官，如仕州縣時，文思院火，告身綾無在者，士大夫不以時得告身。公時在告院，建言援故例，便宜以雜華綾紵目前。從之。藥局舊隸太府，積奸弊至衆，公日夜窮極弊原，髮櫛而縷析之，都人無貴賤，皆得善藥。方擢實要官，而近比厄於未爲郡，公亦小疾，思彷彿外藩，力請去。乃知嘉興府，中貴人藍氏，殖產於崇德縣，名田過制，而役不及，有鍾淳者糾之，藍迫期去產，以規免。官吏欲許之，公判曰：兩家物力，相去遠甚，而藍又白脚，必如法乃可。一郡稱快。故人子乘舟方醉，縱從者與將官朱樽年忿爭，交訴於府。公察故父子不直，治其從者不少貸。民張璿得臨安營妓，與之歸，遂欲棄妻出子，其兄止之，復悻兄，兄以告官。公爲逐妓歸臨安，且以大義開諭之。於是璿爲兄弟夫婦父子如初，其爲政有古循吏風，類如此。且摘發隱伏，照了如神。良民雖相與化服，而奸豪之讒作矣。改主管建寧府武夷山冲佑觀，公怡然命駕去。郡人錢公孜，鄉之老成人，嘗以書抵其舅婁公機曰：張公廉直有守，近時鮮及，今乃遽去，此無他，吾鄉士民福薄耳。歸過國門，右

史方請外。乃橫舟北關。需同載而歸。會右史被命使金國。右史許懇奏辭行。公不許曰。使事不可辭。我留此待汝。自薊門回。乃偕去。未晚也。遂寓錢塘門外張氏園。甫再旬。右史既渡淮而北。公女孫醜者生十歲。暴得疾。醜老孳而孝。公甚愛之。朝暮親撫視。因亦感疾。比其天。家人不敢告。而公揣知之曰。吾與此孫偕逝矣。遂卒。享年六十有四。上始聞公疾。草以子方遠使。加直秘閣。蓋異恩也。公自宣教郎七遷至朝奉大夫。謫緋魚袋。娶韓氏。魏忠獻王元孫通直懿胄之女。封恭人。三子。嗣真。從事郎。新新州新興縣尉。先公七年卒。嗣祖。苦學得心疾。未能仕。其季。則朝散大夫。侍立修注官。兼實錄院檢討官。國史院編修官。資善堂小學教授。詞古也。一女。適宣教郎新知太平州蕪湖縣趙汝鏞。三孫。烜。烜舉進士。幼未名。公貧。磊落恢疎。與人交。洞然無城府。而默察其賢否邪正。無能匿者。善則稱之。不遺餘力。不善則苦言規之。雖愠不恤也。初中奉公遭亂去秦。生公於襄陽。遂卜居宜春。公仕宦五十年。先疇之外。不增一壘。比右史奉公喪歸。至無屋可廬。其清約如此。右史卜以開禧元年八月丙申。葬公於袁州宜春縣歸化鄉宜化里大富嶺趙家衝之原。以王君克勤之狀來屬某爲銘。某與舍人同爲史官。因得從公遊。義不可以毫疾辭。銘曰。

彭原之張。與邠相望。邠遷杜城。元祐之英。彭原綿綿。獨處不遷。至太中公。得譴以忠。中奉履艱。有功兵間。傳家禾輿。益以才稱。剛不容世。方用而躓。是生記注。麟儀鳳翥。父子在庭。國有典刑。子聘於幽。公逝不留。上聞歎息。加錫秘職。生雖不終。賁耀無窮。刻銘隧道。百世是告。

### 山堂陸先生墓誌銘

陸氏之遺譜曰。漢太中大夫賈生仕。爲豫章都尉。葬於吳胥屏亭。始爲吳人。至晉侍中贈太尉玩。生始。始生萬載。萬載生子真。子真生惠澈。惠澈生閑。閑生兒。兒生丘公。丘公生探。探生山仁。山仁生玄之。玄之生元生。元生景融。景融後四世曰文公希聲。仕唐。爲戶部侍郎。同中書門下平章事。文公生崇。崇生德遷。猶居吳。遭唐季之亂。始徙家撫州之金谿。德遷生有程。有程生演。演生處士諱戩。配曰周氏。處士生贈宣教郎諱賀。配曰孺人饒氏。宣教生從政郎諱九思。配曰孺人賜冠帔彭氏。從政生山堂先生諱煥之。字伯章。一字伯政。生而穎異。端重。五歲入家塾。坐立語默。悉有常度。讀書自能質問。出長者意表。與季父象山先生九淵。生同年。學同時。先生不敢以年均狎。

季父象山則朋友視之。磨礱浸灌甚至。十三學爲進士。即有聲。十六諸父開以大學。先生一聞。輒窮深造。極其指趣。而文章機杼。自成一家。宿士見之。多自貶以爲不可及。屢貢禮部。皆不合。學益成。文章益奇。閱世學多淪於異端。尤務自拔出。以張吾道。意所不可。雖名儒顯人。爲時所宗者。必力斥之。恨力之不足也。諸父雖繼以進士起家。亦不用於時。象山晚爲朝士。陸陸百察底。旋復斥死。先生滋信其道之窮。蓋將退耕於野。著書傳世。而未及也。以嘉泰三年十月戊子卒。年六十有四。諸孤以是年十二月乙酉。葬先生於某鄉之福林。娶陳氏。鄱陽人。有賢行。先十八年卒。子男三。洽。濬。浹。浹篤於養。先生出遊。賴以經理家事。無後憂。濬遊太學。有雋才。而器度淵粹可喜。浹方就學。女五。項黠。朱曰邁。鄧文子。其壻也。皆良士。餘二尙處。先生葬日。迫幽隧之銘未刻。既葬二年。濬以先生之友晁君百談之狀來請銘。某以既嘗序先生文章。所謂山堂集者。而先生多朋游。不應併以銘見屬。因辭焉。連三年。請益勤。乃敘而銘之。銘曰。

陸姓入漢。祖好時兮。迨及豫章。始南徙兮。吳晉至唐。世見史兮。斷自文公。三百祀兮。傳世八九。皆可紀兮。雖不公卿。世爲士兮。後乃浸大。名實偉兮。培養既久。產杞梓兮。維時伯章。繼以起兮。白首篤學。未見止兮。攘斥異端。正而不詭兮。天不少留。使菴齒兮。伯章之志。在其子兮。我銘於隧。亦以誅兮。

## 監丞周公墓誌銘

公諱必正。字子中。曾祖諱衍。朝奉郎。祖諱說。左朝散大夫。皆贈太師秦國公。曾祖妣郭氏。祖妣潘氏。李氏。張氏。俱贈秦國夫人。考諱利見。左朝請郎。贈金紫光祿大夫。妣尙氏。贈鄴郡夫人。世居鄭州管城縣。祖秦公通判吉州。遇亂。不能北歸。因家焉。光祿與弟秦公諱利建。皆世以進士擢第。公與從父弟丞相益公諱必大。咸童俱入家塾。學行修立。俱以世科自期。已而益公策名。又舉博學宏詞。如其志。公乃不偁。始以祖遺澤。補將任郎。易迪功郎。監潭州南嶽廟。亦嘗貢至禮部。久之。調袁州司戶參軍。適歲旱盜起。分宜尉巡檢捕之。皆不能獲。安撫龔公茂良聞公至。召問計。公曰。此皆飢民。羣聚貸粟以自活耳。桀黠爲之倡者。財一二輩。可以計取。餘必自散。龔公乃檄公往捕。至則諭以禍福。解散其黨。而除募鄉豪。授之策。俾擒致盜首。於是盜盡得。坐誅者二人而已。龔公復委公以荒政。當是時。自郡至屬邑。流民盈集。公日夜行視。凡累月。全活鉅萬。諸司共薦於朝。孝宗皇帝召對便殿。論奏合上指。

諭以將襄用。遂改宣教郎。知建昌軍南豐縣。南豐劇邑也。公遇事明敏。常若有餘。民柏氏夜被盜。併殺守藏奴。賊逸去。公物色求之。果獲。面詰猶不承。搜其家。得白金器一篋。既至。倒奩出之。囚聞其聲。即引服。淨梵寺有盜。夜斬關入。既獲。公察其非盜。挺出之。立賞捕真盜。僧恨甚。以公爲故出。誅之。郡方以他事怒公。即逮所縱囚。繫鞠甚峻。囚不能自伸。并邑吏皆重坐。未幾。獲真盜送郡。拒不肯治。公乃以白諸司。雖治。猶久不決。御史聞之。奏徙大理。乃得實。如公所言。邑賦色目極繁。以入償出。不足者猶四萬緡。率苛征預借。苟違吏責。公至。一切罷之。且以其實言於轉運司。得稍廢。邑賴以蘇。鄉校久不治。公凡可以補弊起什者。一切爲之。甫滿秩。詔赴都堂審察。除主管官告院。進軍器監丞。會益公參知政事。公請外知舒州。陛辭。所陳又合指。命公卹民。隱修武備。闢田萊。并究鼓鑄利害。先是同安宿松兩監。歲鑄鐵錢三十萬緡。言者以爲擾。既損其半。而監亦遽廢。亟復。會歲薦饑。又命罷鑄。故障遣及之。公至郡。乃知地產鐵炭。民以不售爲患。而兵工失業。亦或轉而爲盜。故當饑歲。尤宜鼓鑄以聚民。條上便宜。詔命復鑄。且省宿松監入同安。公奉行尤有術。公私皆便。又奏自昔鼓鑄。未始殺以鉛。止因議者謂入鉛之錢。不可爲兵。始殺鉛以鑄。臣嘗親視之。鉛之精者爲飛煙。其滓惡下墜。鑪底與鐵初不相爲用。亦嘗以入鉛。不入鉛錢。較其堅脆。及冶爲兵。初無異。徒使處信兩州歲歲輓運。謂宜廢夾鉛之制。又奏郡歲輸上供緡錢五萬八千。舊皆倚辦於常賦。不足。則取征榷之贏以補之。乾道間。守臣偶以羨餘爲民代輸租稅一年。而來者因踵爲例。會征榷之贏不能當其半。餘三萬。趣辦於坊渡二十九所。今諸場舊餘鐵炭及民所貨錢。凡一萬五千緡。若取以爲鑄本。可歲得三萬緡。代舒民上供。悉罷坊渡之征。百世利也。事俱施行。大修學宮。如在南豐時。又立文翁廟於學。立周將軍廟於城南。皆舒人也。復故隄城北。以禦潯溪漲溢。民田數千畝。復爲膏腴。因作四橋於北西東門之外。其一。公自捐俸爲之。州民號周公橋。郡東南有烏石陂。分其流。旁則爲石塘陂。烏石之民。欲專其利。乃壅水使不得行。石塘之田。歲以旱告。公命懷寧令丞視之。得實。圖上於州。公按圖自以意定水門高下。甫去壅水未尺餘。得古舊迹。與所高下不少差。陂利始均。石塘民喜至感泣。乃歌曰。烏石陂。石塘陂。流水濺濺有盡時。思公無盡時。徒知贛州。過闕。上諭曰。聞贛兵悍驕。死徙之餘。今亦無幾。可勿復補。儻尙循故習。卿當便宜行事。朕將以他郡兵更戍。公對。守臣古號郡將。今結銜云知軍州事。苟有過。臣自當臨機應變。不敢勞聖慮。上喜。明日語宰相曰。周必正有



器識似其弟。謂益公也。至郡。江西副總管錢卓本起行伍。暴人也。入境。下令諸校將。以翼日部肆其子弟。選補軍額。初不以告郡。會卓請見。公詰其率意力止之。且微諭以上指。錢驚訝。然意不悅。乃漏公言於諸校將。激使詣郡訴。公徐曉之。如所以告卓。辭指明辯。卒皆帖服。無敢譴者。章貢二水。來自郡南。夾城東西流。皆有浮梁以濟。而城南獨以舟渡。溪惡。或至覆溺。公始作南橋。又治道路。以石易甃。最數百丈。輿國縣之安陂。溉田六十頃。水勢自上奔突。故難築。而易壞。壞且五十年。公命復之。費不及民。擢提舉江東常平茶鹽公事。入奏。還道玉山縣。縣有徐田陂。其渠瀕江。數決。將徙渠。則地主不可。將徙陂而下。則柘陂居下流。懼爲己害。復不可。交訟於公。公諭徐田民。買地鑿渠。苦讎其直。柘陂民遂幡然無靳色。不三日。渠成。溉田三百餘頃。民大感悅。江自陂而下。避礙析爲兩支。其一掠縣壩而去。歲久岸潰。民居其濱者。聞公修渠以利民。乃遮道自言。公爲相水之衝。爲石隄。民欣賴之。相與繪公像。祠於玉虹橋側。歲時奉牲酒。抵今不懈。舊法沒官之產。以畀民耕。而歸其租於常平。及是。議臣請鬻田。以價充糴本。公言如此。則常平儲愈匱。請除新令。光宗皇帝從之。因并行於諸路。池州舊試貢士。率寓景德寺。隘不能容。士病之。會闕守。公兼領郡事。始作貢院。植八桂於門。名其門曰擢桂。是歲。貢士五人而三奏名。士以爲公之賜。言者說於聞。言誣玉山之役。以爲擾。罷歸。主管建寧府武夷山冲佑觀。上章納祿。不許。再命武夷祠。而公歸志已決。告老益力。乃許致仕。公自江東還。闔門屏外事。讀書賦詩者累年。益公少公一歲。亦謝事歸第。相與置酒高會。無少間。時人比漢二疎。益公薨。公哭之慟。不復有世間意。開禧元年十一月旦。感疾不起。享年八十一。娶向氏。文簡公五世孫。封恭人。前公一年卒。男二人。縱。蚤夭。綱。今爲修職郎。前潭州醴陵主簿。一女。適進士胡榆。孫男二人。頌。穎。皆將仕郎。孫女一人。尙幼。恭人之歿也。葬廬陵縣膏澤鄉金鳳山。祔大墓之東。至是。乃以十二月庚申。奉公柩合葬焉。維公仕自迪功郎。積遷至奉直大夫。爵管城縣開國男。服三品。公孝友最篤。歸自龍舒。築第於永和鎮。聚族共爨。弟姪蚤世。育其孤如己子。伯氏宜春守出妾之子世修。流落贛境。公訪得之。爲治產築室於永豐。蓋伯氏志也。其處閨門率如此。鄒人有寓旁近者。皆歲饋之。剛介有守。不以進退累心。方家居時。前後當國數公。多與公有雅故。數問公安否。公應之泊然。益公屢推恩數以貶公。亦辭不受。善屬文。尤長於詩。孝宗皇帝嘗訪當代詩人於湖。忠簡公銓。忠簡首稱公。敷文閣直學士程公大昌。亦稱公文學操行之美。晚取莊周息黥補劓之說。名其

堂曰乘成。因以自號。有文集三十卷。書有古法。四方豐碑巨扁。多出公筆。既葬。綱以朝奉大夫新知真州郭君贊之狀來求銘。某與益公定交五十年。且嘗遇公於臨川。適重九日。同集擬峴臺。風度語言。尙可想也。而女孫又歸公之從子紀。情好厚矣。銘其敢辭。銘曰。

仕不爲不逢。人不以爲通。年不爲不究。人不以爲壽。有愛在民。百世不泯。有業其丘。利爾後之人。

夫人樊氏墓誌銘

廬陵隱君子宣溪王英臣之夫人樊氏。同郡永新人。曾大父佐。大父仲文。學行皆見推於其里中。父才。字子明。尤以賢著聞。敬其里之長老。而教其子弟。環數縣從之。決曲直。雖所不與。亦皆厭服。往往內省而徙義。爲善士矣。二男五女。獨奇夫人。以爲吾門亦將賴焉。及少長。女工婦儀。未習而能。事親左右無違。及笄。歸英臣君。舅南鵬。交友傾一世。食客塞門。君姑不幸早沒。二長子亦不得年。冢婦孀居。悲傷齋居。不能與賓祭事。亞婦又父母奪志。獨夫人佐英臣。仰事俯育。凡祭祀燕享將迎慶弔婚姻之事。一皆身任之。英臣隱操達識。見於楊公廷秀誌銘。先夫人十五年捐館舍。夫人不以家事累諸子。使皆得用其力於學。暇則勉以道義名節。不獨責其仕進起家也。及琳以進士策名。又嘗有列於朝。出爲大縣。文章得盛名。然後薦紳間愈知英臣及夫人之賢。夫人母壽百歲。夫人無一日不遣人問起居。珍膳良劑。必出其手。終身不少怠。又請於朝。得封。卒如子明之言。夫人以宣和五年五月某日。生。以開禧二年十一月甲辰卒。享年八十有四。卒之明年三月甲申。葬於廬陵縣膏澤鄉山寺岡之原。子男四人。長即琳也。宣教郎。新知潭州衡山縣。次揚杲。揚烈。揚暉。皆進士。女二人。迪功郎辰州敘浦縣主簿張履。免解進士曾儒。二女及履皆已卒。孫男八人。麟之。彬之。勝之。蒙之。得之。冲之。隆之。豐之。嘗試吏部。孫女九人。婿則迪功郎新道州江華縣主簿張淵。進士左利見。載元。崇。曾克寬。易。應龍。彭舜牧。劉侃。劉治元。曾克愿。利見。克寬。亦皆嘗貢禮部。曾孫女各七人。尙幼。琳。予友也。遣一介行千七百里。持書抵予於山陰澤中。以臨安府府學教授危君稹之狀來求銘。予年八十三。不敢以老疾辭。銘曰。

女也而行則士。毫也而志不惰。敏而好修。靜以寡過。持身如長。趨義則果。我銘之悲。維以代些。



師封魏國公。大父諱某。朝請郎。贈金紫光祿大夫。考諱某。中散大夫。贈正議大夫。兩魏公皆厚德重望。任至公卿。登載國史。至光祿正議。任雖不甚通顯。而學術風節。皆挺挺爲時聞人。游公定夫銘光祿墓。而正議之銘。則韓公无咎作。兩公皆重許可。然於稱述。猶歉然若不能盡者。正議三子。公最長。而正議之配碩人歐陽氏。實充文忠公之孫。公生出既異於人。又天資嗜學。恂恂孝悌。才雖高而不以驕人。處羣衆中。退然若不能者。及遇事奮發。切中事機。於古有考。於後可傳。而公色辭愈謙下。衆或不知其出於公也。初以叔祖待制致仕。補將仕郎。調右迪功郎。嚴州遂安尉。會正議通判平江府。正議嘗爲樞密院計議官。同僚胡公銓。上書詆斥時相。胡公既貶竄。正議亦株連去國。不調者久之。及來平江。適王晌爲守。揣時相意。日窺伺正議。正議廉且公。無所肆毒。既去。而正議權府事。適中丞常公同卒於海鹽。公爲文讞之。語頗及時相。晌得之曰。此奇貨可以遲。卽爲告密之舉。時相大怒。喉御史劾奏。且曰。常同師德之友婿。且其子玘之婦翁。遺玘致祭。以庫金二千緡賻之。雖究得誣狀。正議猶徙汀州。公坐停官。及時相死。正議起於久廢。公亦復官。調台州黃巖縣主簿。台四邑。黃巖爲大。綿地百萬畝。吏與豪民爲市戶籍。惟出鄉有秩手。官莫能稽考。公日夜紬繹。吏不得欺。雖數十年。蠹弊皆洞見。貧下始得職。徙准西安撫司。書寫機宜文字。又似辟書從。眞侍郎方公某使金國。裨助既多。又以其暇繫日爲書。凡山川城邑人情風俗。登載詳密。史官蓋有取焉。歸而知衢州常山縣。其治抑豪右。伸貧弱。下令簡而信。用刑明而寬。前日輪公上不以時者。皆期而至。又因定陽一鄉民病於役。與義役厝置井井有理。至今爲利。它鄉人不病者亦置之。其虛心裕民如此。歲饑。出倉粟振糶。不待上命。民賴以不死。徙。徐遣吏市米於吳。視常平舊藏。悉如其故。政旣成。顧縣學久弗不治。乃力葺之。進秀民於學。以禮延鄉老先生爲之表倡。士亦自知勉勵。儒風益盛。至於橋梁道路。廡置委積。產孽醫藥。莫不爲之經理。而於掩骼殮死。長養孩幼。尤篤。後數十年。士民追論之。猶感涕也。召赴都堂審察。監行在推貨務。都茶場。公事親盡孝。惟恐毫髮不當親意。繼遭家難。執喪毀瘠注血。食米不鑿。鹽酪蔬果皆不御。終喪期如一日。朋友規以於禮爲過。輒痛哭以對。規者亦爲慘愴。至除喪。久之。容貌猶不能復故。通判明州。在官二年。歷兩守。政事獄訟不苟合。亦不爲崖異。然有一微事。士民輒譁曰。此出於蘇公也。城東有造船場。晁公以道坐元符上疏。詎不許親民。來爲船官。所著書及文章最多。邦人至今言晁朝散公。慨然爲築祠立碣。致其師尊之意。陳忠肅公嘗

謫於明。而豐清敏公明人也。公又言於郡。立二公祠於學宮。風勵學者。其所建類非庸衆人所及如此。會歲歉。常平使者朱公元晦檄公。屬以一郡荒政。客米自海道至者多。公請於朱公。請發積錢廣糴。以爲後備。朱公爲聞於朝。如其請。又建築定海縣崇丘河。灌四千頃。公爲之親駕。不避風雨。歷五月而後成。還朝。除知衡州。大臣薦公才可用。乃改常州。常股肱郡。守符蓋不輕畀。及入對。所陳皆當上意。且行矣。會有間言。乃改知泰州。泰亦名城也。公下車已六十。殊無倦意。祀社稷。陟降鹽薦。恪敬不懈。學校釋奠。器服有不如禮令者。一皆正之。盡買國子監書。以惠諸生。王公明叟墓在郡境。遣郡僚致奠。人士爲之興起。既擢爲尙書吏部郎。分職侍郎西銓。吏長縮不敢肆。孤遠微眇。悉得自伸。譽望日著。以紹熙三年五月某甲子。遇疾捐館舍。享年六十有四。寄祿至朝請大夫。八月庚申。葬於會稽陶山西塢。祔正議墓。娶常氏。封宜人。以賢稱於族黨。先公一年卒。丈夫子二人。溱。文林郎。新知衢州常山。縣有志節。執喪如公喪考妣時。濂。將仕郎。女子二人。長嫁承直郎常州晉陵縣丞徐邦傑。次尙處。孫男女二人。男曰隨。與其妹皆尙幼。公家世顯於累朝。天資穎異。讀書一過目。輒不忘。尤長考訂異同。其於官各地里軍制民賦。雖甚細微。皆能講畫窮盡。無所放軼。屬文有體制。筆法簡遠。其尺牘尤爲時所珍愛。往往藏去。少從張公子韶。徐公端立。汪公聖錫遊。皆期之甚遠。晚學於朱公元晦。盡門人禮。元晦亦稱其善學。初。公從父有著魏公談訓者。未及成。或附益之。正議嘗以爲有可更定者。而未及書。公卒成之。藏之家塾。又著魏公年譜一卷。累歲乃成。識者貴之。公旣歿之年。溱乃以呂君祖儉狀來請銘。某會大父太尉隧銘。實出魏公。而正議之銘。則某實書之。又少時。獲獨拜正議於林下。退而與公相從甚久。山陰之居。又俱在城西南。相望煙水間。扁舟往來。交好不薄。故爲之銘。銘曰。

維相魏公。克有全德。留畚三世。是生訓直。事賢友仁。政則宜民。晚纒爲郎。志不盡信。陶山之賊。松栝孔碩。峨峨高丘。過者必式。

## 墓表五首

## 陸氏大墓表

山陰陸氏大墓。九里袁家嶼曰二評事諱忻。配李氏。祔。是爲某之七世祖。九評事諱郁。配范氏。祔。是爲某之六世祖。光祿卿贈太子太保諱昭。配福昌縣君。贈昌國夫人李氏。祔。是爲某之五世祖。九評事冢前少右。有小冢。或以爲殤子。昌國家傍。又有冢。差小。或以爲其娣。不可考也。四世祖太傅公。始別葬焦塢。而元配靖安縣君。贈崇國夫人吳氏。猶祔大墓。紹聖九年。先大父楚公。懼凌遠失傳。墓上皆立石表。自是距今又九十五年。中更兵亂。惟太保冢可識。餘皆迷不知處。歲時祭於太保冢前而已。淳熙十二年三月。或爲某言。鄉民鉅麥。得石表草間。蓋陸氏祖墳。亟往視之。則二評事冢也。幸不毀。乃從父老參訂。不三日。盡得之。石表皆在。封識如新。而地多爲人冒沒。聞某至。迭相質證。於是侵地皆歸。培冢築垣。闢道莳木。而陸氏大墓皆復其故。某老矣。羣從有曾孫行。其視二評事已十世。世益遠。則大墓守護。或益怠。故具書始末於石。以告後之人。淳熙十二年正月日。朝請大夫權知嚴州軍州事某謹誌。

### 舊朝奉墓表

新定遂安縣詹氏。爲郡望族。自光祿公諱良臣。以死勤事。被褒顯。書其事於國史。少保公諱大方。純誠質厚。爲中興賢輔。薰陶漸漬。子孫皆以學行顯聞。雖未必皆至貴仕。而學行淵粹。論議堅正。師友稱其賢。鄉閭服其化。身歿而不泯。若故朝奉郎諱靖之。字康仲。及其子承奉郎諱長民。字子齊者。是矣。某謹按家傳。及質之鄉人所傳。朝奉公以少保遇郊祀恩。補承務郎。歷浙東安撫司主管機宜文字。監潭州南嶽廟。婺州金華常州宜興縣丞。浙東提舉常平司幹辦公事。通判靖州。卒於官舍。年五十二。葬淳安縣仁壽鄉拜山之陽。初。將赴金華。而代者以私故。欲遷延。而重於自言。既遣吏來。迓。公始聞之。亟出避。吏至。家人告以適他郡。後數月。乃往。郡委以受輸。而公所親有居部內者。貧不能及期。公亟代之輸。民聞之。莫敢後。屨有筮者徐生。嘗倉卒繫獄。無妻孥。有田數畝。預書券。屬共友鬻之。友鬻而有其直。徐生出訟於有司。久不決。公詰以數語。得其情。宜與到官。纔再閱月。會兄得疾甚篤。丐歸視疾。郡不許。乃棄官歸。郡督還甚厲。公卒不可。曰。寧坐法。不忍有負於孝悌也。人服其決。郡亦卒無以罪。浙東茶鹽司同僚有慢公者。公置不較。及其人遇疾卒。妻前死。男女皆幼稚。貧甚。斂具歸裝。一切皆出公力。又爲營其葬。及嫁孤女之費。無憾而後已。公雖閑居。無厚積餘藏。然勇於爲義。有婚姻不能舉。及疾病死喪之急。慨然助之。忘

其力之不足也。所親鄭椿年官於嚴。公以嫌不數見。一日椿年卒。有子在外。名以似宗。而未及以歸。及卒。有致仕恩。族子自其鄉來。衰經而入。將冒取官。公力排出之。求得似宗。卒官之。公所爲大率類此。不可概舉。古所謂可以屬孤託死者。公真其人也。公娶王氏。封安人。賜冠帔。後公四年卒。子七人。長民。承奉郎。前公三年卒。卓民。文林郎。新寧海軍節度推官。表民。出繼公弟微之。仕至從事郎。常州無錫縣丞。卒。定民。少有疾。亦已卒。又民。從事郎。前楚州司戶參軍。養民。仁民。未仕。女子二人。朝請郎。前通判湖州會樂。朝散大夫直華文閣前淮南轉運副使石宗昭。其壻也。孫七人。強學。好學。好問。好禮。好謙。好修。好信。承奉君。以少保遺表。恩補承務郎。遷承奉郎。歷監紹興府都稅院。鎮江府排岸兼拆船公事。卒於家。享年二十七。葬祔世墓之次。君所至勤其官。在紹興時。府遺官檢察。所遺者無以爲功。則肆爲侵刻。行道爲之咨嗟。君與爭。不聽。即自劾去。故時鎮江排岸官。兼掌總領所。逋欠綱運官吏。君至。閱視。凡八九十輩。皆飢寒疾病。或父死而督其子。君慨然爲之言。皆得挺繫以去。未幾屬疾。謁告歸省。郡持不可。比得請。則疾已篤矣。朝奉公見其癯瘠。驚問故。以實告。且曰。懼爲親憂。故不敢左右。聞者皆感歎。自是疾遂不可爲。而君每見父母。輒以有瘳告。痛楚。則忍不發聲。懼親之聞也。君從吾友呂祖謙。伯恭學。伯恭門人數百。君以孝謹好學。屢見稱嘆。比卒。伯恭哀之。見於讞辭。雖位下而年不遐。亦可不泯矣。娶馮氏。子一人。強學。初。朝奉公之子。卓民。以父兄遺事。屬予爲墓表。且曰。願共爲一碑。而疑古未有比。予謂石元懿。公熙載。及其子文定。公中立。實同一碑。故相蘇魏公所爲也。是爲比。後世尙有考焉。慶元某年某月某日。中大夫直華文閣致仕山陰縣開國男食邑三百戶賜紫金魚袋陸某撰。

## 孫君墓表

會稽餘姚縣。有士曰孫君。名椿年。字永叔。其先山陰人。當仁宗皇帝時。有諱沔者。仕至樞密副使。有忠直名。謚威敏。威敏之弟曰洞。洞生儼。始東徙餘姚。儼生璣。璣生繹。繹生述。君之考也。以君貢南省。過慶壽。恩補修職郎。實始聚書館士人。以善其子弟。子弟多自奮於學。而君尤知名。間遊四方。從老師宿儒受學。尤好左氏春秋。班氏漢書。司馬氏通鑑。平居至忘寢食。遇其得意。時時著說。以發明三家奧指。多世儒所不及。又從長老及有識者。講國家兵興以來。理亂得失之故。某事可法。某事可戒。至於淮江以北。極於司并幽薊。山川險要。及前代用師餽糧道路。

所出。言之莫不詳盡。聽者忘倦。使君得至人主前。口論手畫。極利害是非之實。以感悟上聽。安知不見拔用而成功名哉。士固有幸不幸。未易以成敗論也。晚預特奏名。人皆謂公且遇合。乃復以不合有司意。入下第。時有詔例補嶽祠。君辭焉。然君年未六十。識者以爲學識如此。安知終不合。而君不幸死矣。君雖終不合以死。然君家可記者多。尤篤於孝友。兄早死。諸孤猶稚。負父母哀之。君曰。某在。兄不亡也。父母爲損哭泣。君於是牽整嫂。撫孤姪。盡敬盡愛。父母既終。視平日加篤。立義居。法度寬裕而密察。可久不廢。兩院子弟。分授諸經。擇名師。遣從學。朋遊亦謹擇。以故皆有學行可稱。姊適里中胡氏。夫婦皆早卒。君撫孤。恩意甚備。不幸其孤又早夭。君益哀憐之。復爲立後。胡氏之祭。緊君力得不絕。晚仿范文正公義莊之制。贍其族。長幼親疎。咸有倫序。歲以爲常。有餘。又以及媼戚故舊。無遺力。紹熙中。歲旱。米價日翔。君悉發廩貸里人。明年。稼登糶賤。來償者。止受其米如初貸之數。有鬻屋廬。將散而之四方者。君必貸之以錢。如鬻屋之數。曰。所得幾何。奈何捨鄉里而去。以此。旁近無流徙者。縣並海。隄防數決。在仕者欲泆湖。募人耕其中。積粟爲築隄費。君爭不可。曰。捍海固利矣。泆湖則無以灌漑。歲且饑。利不補害。請出私金。率鄉里共營之。隄可成。卒如君言。而湖利亦得不廢。君之所爲。大概類此。觀者可知其磊落不凡矣。君享年五十有九。以慶元五年二月壬申卒。卜以明年十二月甲申。葬於龍泉鄉澄清之原。娶吳氏。子四人。之宏。之亮。之望。之穎。皆有學行之宏之亮。嘗同試禮部。女一人。歸迪功郎衢州學教授史彌忠。亦知名士。既納銘窆中。又來此文以表墓上。於虜。義修而命室。施豐而報齋。進報不忒。亦不在亟。尙其後人。克肖君德。慶元六年十月中。大夫直華文閣致仕陸某表。

### 何君墓表

詩豈易言哉。一書之不見。一物之不識。一理之不窮。皆有憾焉。同此世也。而盛衰異。同此人也。而壯老殊。一卷之詩有淳漓。一篇之詩有善病。至於一聯一句。而有可玩者。有可疵者。有一讀再讀至十百讀。乃見其妙者。有初悅可人意。熟味之。使人不滿者。大抵詩欲工。而工亦非詩之極也。鍛煉之久。乃失本指。斲削之甚。反傷正氣。雖曰名不可幸得。以名求詩。又非知詩者。纖麗足以移人。夸大足以蓋衆。故論久而後公。名久而後定。嗚呼。難哉。予固不足爲知此道者。亦致其意久矣。願每不敢易於品藻。蓋彼皆廣求約取。極數十年之力。僅得其所謂自喜者以示



人而我乃欲一覽而盡其可乎。何君名遠，字思順，能詩，終身不自足而卒。卒後，予友人曾樂道輩仲至，始介思順之子羨，以遺稿屬予表墓。且言思順平生欲見予而不果，故有斯請。予年近九十，病臥鏡湖上，凡以文章來者，積架上不能省。一日取思順詩讀之，不覺起坐太息曰：「今世豈無從事於此者？如思順，蓋未易得也。」不以字害其成句，不以句累其全篇，超然於世俗毀譽之外。予之恨不一見其人，甚於其人之願見予也。思順曾大父諱粹，大父諱汝能，父諱松，東陽東陽人。以嘉泰三年九月十一日卒，年五十有一。兩娶郭氏，皆先卒。以開禧元年十一月二十日合葬於仁壽鄉陂頭山之原。子一人，女長適進士郭概，次尙幼。開禧二年四月戊寅，太中大夫寶謨閣待制致仕山陰縣開國子食邑五百戶賜紫金魚袋陸某表。

## 孺人王氏墓表

孺人王氏，名中，字正節，濰州北海人。曾大父諱競，朝議大夫直祕閣，大父諱慎修，迪功郎，贈中奉大夫，父諱焜，贈承事郎，字季夷，負天下才名。孺人嫁司馬文正公元孫龍圖閣待制諱伋之仲子通直郎新權發遣信州軍州事，遵司馬君亦有文學政事稱其家，登用於朝。孺人實相之人，謂季夷雖坎壈不偶以死，而三子皆知名士，夫人復以賢婦稱。天所以報善人，亦昭昭矣。司馬君簽書寧海軍節度判官公事，孺人不幸遇疾卒。時嘉泰三年二月初二日也。得年四十有四。司馬君來赴告曰：「亡婦不逮事君姑，其事舅及少姑，皆盡孝，執喪中禮，而哀有餘。至除喪，猶不能自抑。司馬大族也，孺人承上接下，肅敬慈恕，既歿，哭之皆哀，以開禧二年十二月壬申葬於會稽山陰清嶸北塢之原。三子：拓、揅、操。二女尙幼。予與待制及季夷少共學，情好均兄弟。兩公又皆娶予中表孫氏，則表孺人之墓，宜莫如予。乃泣而書之。」太中大夫寶謨閣待制致仕山陰縣開國子食邑五百戶賜紫金魚袋陸某書。

## 擴記一首

## 令人王氏擴記

於虛。令人王氏之墓。中大夫山陰陸某妻蜀郡王氏。享年七十有一。封令人。以宋慶元丁巳歲五月甲戌卒。七月己酉葬。耐君舅少傅君姑魯國夫人墓之南岡。有子子虛。烏程丞。子龍。武康尉。子愔。子坦。子布。子聿。孫元禮。元敏。

元簡。元用。元雅。曾孫阿喜。幼未名。

### 卷四十一

#### 塔銘八首

##### 祖山主塔銘

嘉州天王禪院景倫師。有二弟子。孟曰紹覺。仲曰紹祖。倫且老。嘆曰。孰能問法南方。以大吾門者乎。於是覺請行。曰。不可使師有恨。祖請留。曰。老人不可以莫養也。覺南遊得法。居蘄州五祖山。而祖左右就養。先意承志。終身不去。倫欲新其廬。祖則雨濡日炙。出入閭巷。累年崇成。鬱爲寶坊。倫飲食往來者。祖則高困大庖。牀敷潔溫。凡至者如歸焉。皆曰。倫師可謂有子矣。祖既老。亦有二弟子。曰海慧。海澄。慧萬里走閩中。求大藏經以歸。祖不及待。而澄實送終。其撰次祖行實。以求予銘者。慧弟子法琳也。是倫師不獨有子。子又有孫。何其盛哉。世所謂學士大夫。蹈義秉禮。終其身者。或鮮矣。況至四世。閱百年而不失者乎。予於是有感焉。祖姓楊氏。字繼逵。世居龍游。歿以乾道四年十月某甲子。年七十五。葬以五年二月某甲子。銘曰。

##### 定法師塔銘

淳熙四年。予自梁益還吳。蓋西遊九年矣。耆老凋落。朋舊散徙。無與晤語。而少年學問日新。議論鋒出。亦莫與顧。爲之也。悅不樂。一日。有叩戶者。攝衣迎之。則所謂惠定法師也。風骨嶮嶮。如太華之立雲表。議論袞袞。如黃河之行地中。爲予談諸經。辭指精詣。往輒破的。窮日夜不休。予作而曰。公生輩一輩人。予懼不足以辱公友也。會予復出仕。又三年。迺還。屏居鏡湖之西。略無十日。不過予。霰雪風雨。往往留不去。予方以譴斥退。亦安於不遇。意者相從湖山間以老。而師不幸死矣。其徒來乞銘。師字寧道。姓王氏。世爲紹興山陰人。幼歲。從錢清保安院子堯道人得度。出遊四方。從道隆。師會。景崇三師。授華嚴義。盡得其說。至超然自得。出入古今。不妄隨。不苟異。三師蓋莫能屈也。衆請住戒珠省院。未幾棄去。時大慧禪師宗杲。說法阿育王山。師慨然往造其居。所聞益廣。學者宗之。起住

妙相。徙觀音。復還省院。皆蕭然小剎。羹藜飯豆。人不堪其枯槁。然著書不少輟。若金剛般若經解法界觀圖會三歸一章莊嶽論。已盛行於世。餘在稿者猶數十百篇。以淳熙八年十二月二十四日。焚香說偈示滅。年六十八。僧夏四十八。九年十二月十八日。葬於錢清。得法弟子妙定了洪。了悅。得度弟子了知。了端。了達。初。師著金剛解成。持以示予。語之曰。昔德山見龍潭。言下悟。盡焚金剛疏鈔。公見大慧而歸。更著此解。與德山孰優。師笑不答。豈魯之善學柳下惠者歟。銘曰。

木葉旁行。九譯而東。維此雜華。衆經之宗。肇自有唐。世以名家。師如巨舟。極其津涯。著書至死。此亦奚求。承其師傳。以絕爲羞。我徂弔之。遺書滿室。喟然作銘。用愧逢掖。

夏禪師塔銘

禪師處夏。字遂翁。會稽山陰劉氏子。紹興五年。甫九歲。以童子得度。十三歲遊諸方。僅勝衣笠。路人爲之驚嘆。初爲妙喜禪師宗杲侍者。又從己菴禪師道顏爲書記。遂翁英邁。玉立。遊二師間。皆受記別。餘事能文詞。善筆札。諸方翕稱夏書記。然亦以議論嫩枝。不少假借。不爲諸方所容。一妄比丘。輒得名山壯剎。遂翁獨陸陸衆中。嘗居嘉興法喜院。舉香爲己菴嗣。蕭然數僧。食財半菽。再歲。退廬會稽海上。合太常尤公延之守臨海。起遂翁領紫囊。復以縣大夫不樂。棄去。久之。領崑山薦巖資福寺。遂以疾逝。淳熙十四年六月戊寅也。遺言藏骨廬山智林寺。寺。己菴與遂翁所同建也。逝之日。手書求銘於予。銘曰。

山棲谷汲。利欲靡及。孰擗使躡。道成謗集。廬阜峨峨。浮屠岌岌。吾識其封。身沒名立。

高僧猷公塔銘

宋山陰有高僧曰子猷。字脩仲。晚自號笑雲老人。宏材博學。高行達識。卓然出一世之表。雖華嚴其宗。而南之天台。北之慈恩。少林之心法。南山之律部。莫不窮探歷討。取其妙以佐吾說。雖浮屠其衣。百家之書。無所不讀。聞名儒賢士。雖在千里之遠。必往交焉。篤行義。勵風操。嚴取與。一得喪。接物簡而峻。不屈於富貴。有以供施及門者。苟體不足。雖累百金。輒拒不取。於虛賢哉。脩仲出陳氏。生七歲。從同郡大善寺。宴時爲童子。十有二歲。祝髮受具。習華嚴經。論於廣福院。擇交。得其學。又游錢塘。見惠因院師會。博盡所疑。二師皆自以爲弗迨。遂還山陰。說法於城

東妙相院。僅二十年。學者常百餘人。脩仲厭其近城市。思居山林。乃捨衆遷於梅山。上方學者不肯散去。而院隘不能容。相與言於府。願迎脩仲。覓妙相。於是法席加盛於昔。所著書大行於世。院亦益葺。號爲壯刹。大慧禪師宗杲過而異之。爲留偈壁間。然脩仲竟棄去。學者猶不捨。又說法者三。最後住姜山。閱三年。喟然嘆曰。老矣。將安歸邪。亟囊書歸梅市。結菴以老。淳熙十六年八月二十有六日。忽命舟過別平日所往來者。明日晨起說法。遂坐逝。壽六十有九。又三日。火化。得舍利。五色粲然。弟子卽菴之西建塔。奉靈骨及舍利以葬。脩仲度弟子四人。戒海。戒先。戒明。戒堅。戒先傳家學。而四方之學者得法出世。又十有七人。隱於衆者。蓋以百數。脩仲之道。其傳又可涯哉。戒明來乞銘。銘曰。

予嘗觀古高僧。窮幽闕微。能信踐之。不爲利說。不爲勢撓。未嘗不與學士大夫同也。考脩仲之爲人。可謂有古高僧之風矣。吾予之銘。非獨以厚故人。蓋亦天下之公也。

### 別峯禪師塔銘

南山自長安秦中。西南馳。爲嶠。嶠爲岷。岷東行。紆餘起伏。歷蠻夷中。跨軼且千里。然後秀偉特起。爲三峯。摩星辰。蓄雲雨。龍蟠鳳翥。是名峨嵋山。通義犍爲二郡。實在其下。人鍾其氣。爲秀民傑士。出而仕者。固多以功業文章。擅名古今。至於厭薄紛華。棄捐衣冠。木食澗飲。自放於塵垢聲利之外。而不幸爲人知。不能遂其隱操。亦卒至於光顯榮耀者。如別峯禪師是也。師名寶印。字坦叔。生爲龍游李氏子。世居峨嵋之麓。少而奇警。日誦千言。然不喜在家。乃從德山院清遠道人得度。自成童時。已博通六經。及百家之說。至是復從華嚴起信諸名師。窮源探蹟。不高出同學不止。論說雲興泉湧。衆請主講席。謝不可。圓悟克勤禪師有嗣法上首安民。號密印禪師。說法於中峯道場。迺擊一筇往從之。一日。密印舉僧問巖頭。起滅不停時如何。巖頭叱曰。是誰起滅。師豁然大悟。自是室中鋒不可觸。密印恨相得之晚。會圓悟自南歸成都。昭覺乃遣師往省。因隨衆入室。圓悟舉從上諸聖。以何法接人。師舉起拳。圓悟曰。此是老僧用者。孰爲從上諸聖用者。師卽揮拳。圓悟亦舉拳相交。大笑而罷。圓悟嘆異之曰。是子他日必類我師。留昭覺三年。密印猶在中峯。以堂中第一座致師。師辭。密印大怒曰。我以法得人。人不我傳。尙何以說法爲。欲棄衆去。衆皇恐。亟趨昭覺。羅拜懇請。圓悟亦助之請。始行道望日隆。學者爭歸之。雖圓悟密印不能捨也。

久之南遊。見滌山佛性泰福。嚴月菴果疎山左堂。皆目擊而契。或以第一座留之。師潛遜以免。最後至徑山。見大慧杲。大慧問曰。上座從何處來。師曰。西川來。大慧曰。未出劍門關。與汝三十棒了也。師曰。不合起動和尚。時徑山衆千七百。雖耆宿名衲。以得棲笠地爲幸。願爲師獨掃一室。堂中皆驚。大慧南遷。師亦西歸。始住臨邛鳳皇山。舉香嗣密印。歷住廣漢崇慶武信東禪。成都龍華。眉山中巖。復還成都。住正法道。旣盛行。士大夫亦喜從之遊。築都不會菴。松竹幽邃。暇日。名勝畢集。聞師一言。皆自謂意消。稍或問閤。輒相語曰。吾輩鄙吝萌矣。其道德服人如此。俄復下碇。抵金陵。應菴華方住蔣山。館師於上方。白留守張公燾。舉以代己。師聞。卽日發去。會陳丞相俊卿來爲金陵。以保寧延師。俄徙京口金山。學者傾諸方。金山自兵亂後。雖屢葺。莫能成。至是始復。大興如承平時。而有加焉。異時。居此山。解踰三年者。師獨安坐十五夏。潭帥張公孝祥。嘗延以大滂山。師與張公雅故。念未有以卻。而京口之人。自郡守以降。力爭之。卒返。潭使魏惠憲王牧四明。虛靈來請。師度不可辭。迺入東。凡住四年。樂其山林。有終老之意。而名益重。被敕住徑山。淳熙七年五月也。七月。至行在所。至導壽皇聖帝降中使。召入禁中。以老病足蹇。賜肩輿於東華門外。賜食於觀堂。引對於選德殿。特賜坐。勞問良渥。師因舉古宿云。透得見聞覺知。受用見聞覺知。不隨見聞覺知。上悅曰。此誰語。師曰。祖師皆如此提倡。亦非別人語。上爲微笑。時秋暑方熾。師再欲起。上再留。使畢其說。迺退。後十餘日。又命固堂於靈隱山中。使齋賜御香。恩禮備至。十年二月。上製圖覺經注。遣使馳賜。且命作序。師迺築大閣祕奉。以修上恩。師老。益厭住持事。門人懼其速遊不返。相與築菴於山北。俟其歸。今上在東宮。書別峯二大事。榜之。十五年冬。奏乞養疾於別峯。得請。明年。上受內禪。取向所賜宸翰。識以御寶。復賜焉。紹熙元年冬十一月。忽往見今住山智策。告別策問行日。師曰。水到渠成歸。取幅紙。大書曰。十二月七日夜雞鳴時。如期而化。奉蛻質返寺之法堂。留七日。顏色精明。鬚髮皆長。頂溫如沃湯。是月十四日。葬於別峯之西岡。壽八十有二。臘六十有四。得法弟子梵牟。宗性。道奇。智周。慧海。宗璨等。得度弟子智穆。慧密等。百四十有七人。有慧綽者。山陰陸氏子。當以蔭得官。辭之。從師祝髮。又得記莧。遜迹巖岫。終身不出。師旣示寂。上爲敕有司。定謚曰慈辯。且名其塔曰智光。菴曰別峯。極方外之寵。師說法數十年。所至。門人集爲語錄。晚際遇壽皇。被宸翰。咨詢法要。皆對使者具奏。將化。說偈尤奇偉。已別行於世。此不悉著。三年三月。法孫宗愿。走山陰鏡湖。屬某銘師之塔。某與

師交最久。嘗相約還蜀。結茆青衣喚魚潭上。今雖老病。義不可辭。銘曰。圓悟再傳。是爲別峯。坐十道場。心法之宗。淵識雄辯。震驚一世。矯乎人中龍也。海口電目。旒期稱道。卓乎獨壑。松也。叩而能應。應已能默。渾乎金鐘大鑪也。師之出世。如日在空。升於陽谷。不爲生。隱於崦嵫。其可以爲終乎。

### 海淨大師塔銘

乾道中。史魏公以故相牧會稽。嚴重簡貴。士大夫非素負才望。莫得登其門。顧每召靈秘院僧智性與語。有大興造。輒以付之。性公時年且七十。亦輒受命不辭。已而事皆井井有條理。邦之人始服魏公之知人。雖方外道人。任之亦能舉其事如此。又嘆性公之不負所知也。及淳熙末。予還朝。典南宮牋奏。兼領祠部。而會稽守言靈秘院本蘊條表丈地。智性以孤身力成之。今爲名剎。請以其徒世守之。報可。予雖會稽人。然自魏公去。不復見性公。乃驚嘆曰。是道人尙在邪。又五年。予臥疾鏡湖上。性公法孫德恭來告曰。公以紹熙三年六月五日示化。將奉遺骨塔於小夾山。且來請銘。性公本會稽山陰蔡氏子。七歲從廣福院崇教大師慧超祝髮。九歲賜紫方袍。號海淨大師。坐八十三夏。住靈秘五十一載。年九十。度弟子七人。單永。宗慶。宗亮。宗振。宗懋。宗寶。宗一。孫四人。德和。德恭。德興。德椿。曾孫二人。行昭。行闡。銘曰。

龜食簞從。宅此山阿。陵谷有遷。吾銘不磨。

### 松源禪師塔銘

松源禪師名崇岳。生於處州龍泉之松源吳氏。故因以自號。自幼時。已卓犖不羣。處羣兒中。未嘗嬉宕。稍長。聞出世法。慕嚮之。年二十三。棄家。衣掃塔服。受五戒於天明寺首造靈石妙禪師。繼見大慧杲禪師於徑山。久之。大慧陞堂。稱蔣山應菴華公爲人徑捷。師聞之。不待旦而行。既至。入室未契。退愈自奮勵。中夜。自舉狗子無佛性話。豁然而有得。即以叩應菴。舉菴世尊有密語。迦葉不覆藏。師云鈍置和尙。應菴厲聲一喝。自是朝夕咨請。應菴大喜。以爲法器。說偈勸使祝髮。棟梁吾道。隆興二年。師始得度於臨安西湖白蓮精舍。自是徧歷江浙諸大老之門。罕當其意。乃浮海入閩。見乾元木菴永禪師。一日辭木菴。欲往黃檗。木菴舉有句無句如藤倚樹。師云。裂破。木菴云。瑯琊道好。一堆爛柴。師云。矢上如尖。如是應酬數反。木菴云。老兄下語老僧。不過如此。祇是未在。他日拂柄在手。

爲人不得。驗人不得。師云。爲人者。使博地凡夫。一起。入聖域。固難矣。驗人者。打向面前過。不待開口。已知渠骨髓。何難之有。木菴舉手云。明明向汝道。開口不在舌頭上。後當自知。逾年。見密菴於衢之西山。隨問卽答。密菴微笑。曰。黃楊禪爾。師切於明道。至忘寢食。密菴移住蔣山華藏徑山。皆從之。一日。密菴入室。次問傍僧。不是心。不是佛。不是物。師侍側。豁然大悟。乃云。今日方會木菴道。開口不在舌頭上。自是機辯縱橫。鋒不可觸。木菴又遷靈隱。遂命師爲室中第一座。旋出世於平江澄照。爲密菴嗣。遷江陰之光孝。無爲之冶父。饒之薦福。明之香山。平江之虎丘。皆天下名山。惟冶父最寂寞。又以火廢。師一臨之。四方名衲踵至。棟宇亦大興。人謂師能使所居山大。慶元丁巳年。適靈隱虛席。僉曰。安得岳公來乎。果被旨以鼻師。驪聲如潮。居六年。道盛行。得法者衆。法席爲一時冠。而師有棲隱之志。卽上章乞罷住持事。上察其誠。許之。退居東菴。俄屬微疾。猶不少廢。倡道。忽垂一則語。以驗學者曰。有力量人。爲甚麼擡腳不起。開口不在舌頭上。又貽書嗣法香山光睦雲居善開。傳以大法。因書偈曰。來無所來。去無所去。瞥轉玄關。佛祖罔措。踟躕而寂。實嘉泰二年八月四日也。得年七十有一。坐夏四十。奉全身塔於北高峯之原。塔成之四年。香山遣其侍者道孚。以銘屬某。某方謝事居鏡湖上。年過八十。病臥一榻。得書。不覺起立曰。亡友臨川李德遠。浩實聞道於應菴。蓋與密菴同參。李德遠每與某談參問悟。入時機緣。言句。率常達旦。今讀師語。峻峭崑崙。下臨雲雨。如立千仞之華山。蹴天駕空。駭心眩目。如錢塘海門之濤。虎豹股栗。屋瓦震動。如漢軍昆陽之戰。追思德遠所言。然後知師真臨濟正宗。應菴密菴之真子孫也。銘曰。

## 退谷雲禪師塔銘

佛照禪師有嗣子曰淨慈報恩光孝退谷禪師。名義雲。生於福州閩清黃氏。世爲士。禪師幼入家塾。成童入鄉校。穎異有聲。旣冠。遊國學。因讀論語中庸。有所悟入。後聞龜峯山堂淳禪師說法。遂自斷出家。從山堂祝髮。徧遊江湖。至吳。見鐵菴一大禪。爲侍者。一日室中問國師三喚侍者話。師亟舉手掩其口。又問曰。侍者三應。又作麼生。師拂袖徑出。鐵菴大喜。時佛照倡道靈隱。師往依之。及佛照移育王。師從其行。歷十年。爲堂中第一座。佛照聞其說。

法嘆曰。此之提倡。宛如雪堂行和尚。吾鉢袋有所付矣。遂出住香山。居五年。徙台州光孝。又徙鎮江甘露。會平江虎丘萬壽皆欲延師。師聞萬壽願。卽欣然就之。淮南轉運使虞公儔。又以長蘆來招。師與虞公有雅故。又從之。會育王虛席。朝命師補其處。時佛照方居東菴。父子日相從。發明臨濟正宗。學者雲集。會有魔事。師卽捨衆退居香山。蓋將終焉。而朝命又起師說法淨慈。恩光赫奕。都邑聳動。一日。領衆持鉢畿邑。是夕。寺災無遺宇。比師歸。獨三門巋然。在瓦礫中。師不動容曰。成壞相尋。亦豈有常。今日之壞。安知不爲四衆作福之地哉。天子聞之。出內庫金以賜。自重臣貴戚以下。傾囊輦金。惟恐居後。未期年。廣殿邃廡。崇閣傑閣。蓋愈於前日矣。於是上爲親御翰墨。書慧日閣三大字。賜之。開禧二年五月。師示微疾。六月朔早辛亥。作偈別衆曰。意烏猝嗟。萬人氣索。佛法向上。何曾躡著。臨行業識茫茫。一任諸方十度。遂寂。後九日。弟子處約等奉全身塔於寺之東北隅。世壽五十八。僧夏三十五。住山十九載。度弟子四十有畸。學者集。師語爲七會錄。行於世。師初欲以復佛殿屬予記之。未及而棄世。於是處約等以西堂可宣禪師之狀來求予銘。適予老疾。弗克就。宣公又以書來固請。而師之侍僧處納者。留逾年不肯去。辭指懇款。予爲之嘆曰。師之在育王也。將新僧堂。而陰陽家以爲法所禁。將不利於主人。師奮不顧。排衆說。力爲之堂成。而魔果作。遂去。陰陽家之說。使人拘而多忌。然其法本出流俗。不待師之明。知其妄決矣。雖或適中。終爲不足信也。又師在淨慈。遭火患。滌地皆盡。度非金錢累億萬。且假以歲月。必不能成。師談笑盡復舊觀。讓者或以爲師之才用絕人。見於此者。則亦陋矣。此事若澄觀輩。則可稱大善知識。直遊戲爾。師所以獨立一世者。豈直以此哉。師示衆有曰。烏道孤危。玄關妙密。在曹洞宗旨亦奇矣。若較臨濟。直是天地懸隔。此足以知師能繼圓悟妙喜佛照之大作用者。自有所在也。銘曰。

踰歟雲公。自儒衣奮。爲東菴子。無示無問。上距圓悟。四世而近。龍象蹴踏。獅子奮迅。或造其室。目不容瞬。丹碧南山。蓋其游刃。於談笑頃。變化煨燼。以此諭師。其殆未盡。譬如觀海。測以尺寸。我銘不磨。百世其信。

卷四十一

祭文二十一首



皇太后靈駕發引祭文

風御上賓。玉衣永闕。生堯鈞弋。尙懷帝武之祥。從禹會稽。遽奉寢園之卜。母慈罔極。坤載無疆。方同軌之畢來。悵東朝之已遠。然而艱難契闊。歸慰聖主問安之誠。壽考康寧。躬享先后莫致之福。陰功陽德。上際下蟠。歷邃古而罕聞。知聖心之無憾。臣藩維有守。愴慕徒深。目斷栢城。神馳翼御。敢修饋奠之禮。少致攀號之心。

祭梁右相文

人之生世。如雲之出於山川。雲不自用。用之者天。降爲甘澤。散爲豐年。抑有時而弗用。則輪囷磅礴。或卷或舒。以自適於野水之涯。荒山之巔。彼雲無心。豈有用舍之異。出處之偏哉。公之在朝。道大材全。不爲世變。不爲物遷。顯相廟郊。華袞金蟬。太平之功。溢於簡編。謝病而歸。大節愈堅。從容適英。抗議慨然。曰我非堯舜之道。不敢以陳於前。孰謂萬鍾之祿。不足顧留。遂委之而仙乎。抑公之學。得聖所傳。視生死爲一區。等華屋於荒阡乎。又豈如雲之旣散。廓然大虛。則前日用舍。初不足以爲愚賢乎。酒不盈觴。肉不揜豆。獨區區之詞。寫其肺肝者。公豈捐之乎。

祭龔參政文

某官劔南。公在廊廟。書從驛來。如奉色笑。哀窮悼屈。忘其不肖。歲戊戌春。某辱號召。歸未及都。公歿荒徼。山川阻脩。萬里孤旆。官事有守。不違往弔。寓哀一觴。公乎來醺。

祭魯國太夫人文

嗚呼。昔先太師。遜世懷寶。播慶於家。生我元老。維少傅公。秉德逢辰。長養成就。則繫夫人。少傅在朝。袞衣繡裳。帝錫夫人。御醴宸章。少傅在藩。豹尾玉節。帝錫夫人。兼金重帛。僉曰盛哉。其榮則多。夫人曰嘻。其報伊何。帝虛元弼。方屬少傅。於時夫人。以疾即路。煌煌安輿。少傅實從。天祐德人。華其初終。某受恩門闈。義均子姓。晚偕婦息。升堂修敬。萬里羈宦。忽承哀音。東望永懷。碎裂寸心。送車麟麟。傾動鄉鄰。隕涕羞奠。形留神往。

祭王侍御令人文

惟靈生自大家。來嬪德門。象服有輝。娣媵如雲。相我御史。克勤藻蘋。諸子甚材。頎然薦紳。世所願懷。孰如夫人。惟是孤生。實忝外姻。萬里焉依。如在鄉鄰。遭此不淑。慘然酸辛。尊卮之微。備以斯文。

祭祝永康文

嗟我與公。萬里羈單。人孰知之。所恃者天。庶幾白首。相從鄉關。追談梁益。把酒笑歡。云胡不淑。一病莫還。邇孤子立。未逮冠婚。謂天可恃。公宜百年。玉裂竹折。喟其永歎。公守導江。鬻蕪飲泉。凜凜色詞。請謁莫干。人或謗嘲。公守益堅。雖昔君子。終此實難。云持此歸。何憾九原。公喪之東。丹旆翩然。我病莫興。撫枕涕潛。矢辭羞奠。尙慰營魂。

祭劉樞密文

嗚呼公乎。有文有武。無仁有智。立朝無助。以直自遂。聲氣不動。而折萬里之衝。從容一言。而決盈庭之議。蓋人所難。公之所易。仰天俯地。一念不愧。秋毫未安。寢食忘味。輕失富貴。而重朋友之責。自屈達尊。而伸白屋之士。蓋人之所忽。公之所畏。昔歲癸未。某始去國。見公西省。凜然正色。顧雖不肖。竊師公直。流落得歸。公與有力。舟過金陵。公疾已亟。命之不淑。旋聞易簀。祭不及時。實負盛德。尙想平生。出涕橫臆。

祭蔣中丞夫人文

維靈出由德闕。克配儒先。從容圖史之規。肅敬蘋蘩之薦。是生著哲。來瑞明時。大邦開賜沐之封。列鼎極循陔之養。奄聞不淑。靡究遐齡。窀穸有期。川途云邈。雖莫綴千車之盛。願敢稽一酌之恭。仰冀靈魂。俯歆誠意。

祭趙提刑文

惟靈早以茂異。起膺簡求。逢時休明。爲國壽雋。建牙淮服。擁節王畿。方期來朝。遽以疾諗。挂冠決去。共高靜退之風。易簀亟聞。何勝殄瘁之感。某早託通家之好。晚逢攬轡之行。揮塵軒昂。恍如昨日。拊棺摧痛。莫喻孤懷。敢陳一奠之恭。少紓九京之訣。

祭勤首座文

我之與公。義則師友。情骨肉也。相從十年。談道賦詩。藝松菊也。別雖數月。使來自東。書相續也。比獨怪公。書詞諄諄。若予屬也。嗟哉已矣。頽然野鶴。尙在目也。卯塔告成。欲往不果。身桎梏也。上愧道義。下負交情。猴可掬也。龍文之若。沉水之薰。薦甘馥也。懷舊之心。有如丘山。此一粟也。

祭許辰州文

惟靈笑操懿行。達識英辭。筆陣掃千人軍。早擢太常之第。曾中吞九雲夢。耻裁光範之書。抱沉英之歎者十年。分共理之憂者兩郡。人之不淑。生也有涯。旅館招魂。一朝今古。孤舟反葬。萬里風濤。豈知故里之交。遽作夜臺之別。魂兮未遠。鑒此哀誠。嗚呼哀哉。

祭韓无咎尙書文

兄之初載。甚蹟而難逢。亂客吳。萬里孤騫。文方日衰。蕩爲狂瀾。組織纖弱。各自謂賢。士晚莫救。兄勇而前。陋巷一室。日旰未餽。誦書鼓琴。志操益堅。落筆天成。不事雕鐫。如先秦書。氣充力全。壯年相從。顧我憫孱。曰是有志。許以周旋。我自蜀歸。兄典三銓。邂逅都門。挈手歡然。兄牧東陽。我走閩山。曠不相值。今五六年。我病早衰。願未及泉。兄之壽康。一朝先顛。餉酒踵門。乃酌柩前。嗟嗟造物。孰尸此權。豈其好惡。亦與俗遷。微官有守。喪車莫攀。尊卮之奠。敘訣終天。

祭胡監丞文

惟公文學足以發身。政事足以宜民。人則不合。何罪於神。乃者起家。往守宜春。臨別慨然。握手江津。曾未逾月。乃以訃聞。舟載銘旌。返其鄉枌。臺省袞袞。公獨逡巡。室家嘻嘻。公獨悲辛。我雖晚交。甚知公真。適苦骭瘍。奠弗及親。尙想平生。寓哀斯文。

祭丘運使母夫人文

昔先大夫。懷寶里閭。沒世不濯。乃以其孤。屬之夫人。道德是詔。故河圖公。文學政事。望在廊廟。榮養五鼎。眉壽百年。其德彌劭。高識超然。朱門畫戟。視若蓬蘞。再入都城。曾未溫席。翩其歸旆。方歲之惡。公私交病。冀寬賦調。而河圖公。遽以憂歸。道路相弔。我登門闈。情均甥姪。宜送宅兆。官守所廢。矢辭傷悲。薦此清醪。

祭曾原伯大卿文

惟靈淵乎似道。敏而好學。韋編鐵硯。雪窗螢几。不足以言其勤。冢書壁簡。銅牆鬼炊。不足以名其博。文辭典奧。論議超卓。不使直承明之庭。猶當置諸天祿之閣。時方越拘攣以用人。公奚彼之不若。而乃老於惠文之冠。弗預甘泉之彙。痛結慈蘭。悲纏華萼。凡閭巷之故交。想話言之如昨。聞訃相弔。摧然涕落。羞一醑以祖行。冀九原之可作。

祭大姪文

汝實先少傅之長孫，岳州使君之嫡子。早列仕籍，垂五十年。夫婦二人，更相爲命。嶺海萬里，淪謝不還。收骨於火爐之中，藏榘於松楸之次。頰冤痛酷，實滂何言。歿而有靈，歆此薄設。

祭十郎文

自汝不幸早世，將二十年。乃克稽葬於先少師魯國夫人瑩兆之南岡。距汝母令人墓尤遠，汝而不泯，豈不得所願哉。感念疇昔，悲痛何言。

祭朱元晦侍講文

某有捐百身起九原之心，有傾長河注東海之淚。路脩幽老，神往形留。公歿不亡，尙其來饗。

祭方伯蕃文

予與伯蕃別於武夷，予五十有五，齒髮未衰。伯蕃蓋方壯耳。顧後日猶長，未知別之悲也。俯仰二十有一年，卒不相遇。而伯蕃遂捨我而何之乎。予年垂八十，如朝露之將晞，與伯蕃別，尙復幾時。生也相遇，猶不可必。死遊地下，果可期乎。予言之及茲，涕不可止。伯蕃尙能有知也乎。

祭張季長大卿文

於虜世之定交，有如某與季長者乎。一產岷下，一家山陰。邂逅南鄭，異體同心。有善相勉，闕遺相箴。公醉巴歌，我病欲吟。大笑劇談，坐客皆瘖。公旣造朝，衆彥所欽。我南入蜀，九折欽益。公以憂歸，我亦陸沉。久乃相遇，垂涕霑襟。宿好未遠，舊盟復尋。駕言造公，公已來臨。我倡公和，如鼓瑟琴。送我東歸，握手江潯。欲行復尼，頓足噫喑。是實古道，乃見於今。公還爲卿，華路駸駸。我方畏讒，潛恐不深。公去我召，如商與參。渺邈天涯，一書萬金。我自史闡，進長書林。迫老亟退，突不暇黔。亦嘗挽公，力微弗任。比乃聞公，請投華簪。旋又聞訃，天乎難謀。玉樹永闕，壟柏已森。何時復聞。正始遺音，續酒絮中。不及手斟，英魂如生。豈忘來歆，於虜哀哉。

祭周益公文

某紹興庚辰，始至行在。見公於途，欣然傾蓋，得居連牆。日接嘉話，每一相從，脫帽褫帶，從容笑語。輸寫肝肺，鄰家

借酒小圃鉏菜。熒熒青燈。瘦影相對。西湖弔古。竝轡共載。賦詩屬文。頗極奇怪。淡交如水。久而不壞。各謂知心。絕出流輩。別二十年。公位鼎盛。我方西遊。荷戈窮塞。歸得臺耶。旋又坐廢。公亦策免。久處於外。見不可期。使我形瘵。斯文日卑。公則崧岱。士昏于智。公則著蔡。公老不衰。雷霆百代。每得手書。字細如芥。凝兒駭女。問及瑣碎。孰爲一病。良醫莫差。赴告鼎來。震動海內。奔赴不遑。涕泗澎湃。豈無葷鮑。致此薄爵。辭則匪工。聊寄悲慨。

## 哀辭二首

## 尤延之尙書哀辭

帝藝祖之初造兮。紀號建隆。煥乎文章兮。講揖遜之選蹤。詔冊施於朝廷兮。萬里雷風。灑灑噩噩兮。始掃五季之雕蟲。閱世三傳兮。車書大同。黃麾繡仗兮。駕言東封。繼七十二后於邃古兮。勒崇垂鴻。吾宋之文抗漢唐而出其上兮。震耀無窮。柳張穆尹。歐王曾蘇。名世而間出兮。魏如華嵩。雖宣和之蠱弊。與建炎之軍戎。文不少衰兮。殷殷隆隆。太平之象兮。與六龍而俱東。余自梁益歸吳兮。愴故人之莫逢。後生成市兮。摘裂剽掠以爲工。遇尤公於都城兮。文氣如虹。落筆縱橫兮。獨殿諸公。晚乃契遇兮。北扉南宮。塗改雅頌兮。蹈躡軻雄。余久擯於世俗兮。公顧一見而改容。相期江湖兮。斗粟共春。別五歲兮。晦顯靡同。書一再兮。奄其告終。於嗟哀哉。孰抗衣而復公兮。呼伯延甫於長空。孰誦些以招公兮。使之捨四方而歸徠乎郢中。孰酌荒丘兮。露草霜蓬。孰闌虛堂兮。寒燈夜蛩。文辭益衰兮。奇服彤茸。天不憖遺兮。黼黻火龍。嗟局淺之一律兮。彼寧辨夫瓦釜黃鐘。話言莫聽兮。孰知我衷。患難方殷兮。孰恤我躬。煮蒿不返兮。吾黨孰宗。死而有知兮。惟公之從。

## 沈子壽母趙夫人哀辭

嗚呼。人孰無母。母孰無子。無以壽終。子克終養。亦可紓無窮之悲矣。維吾子壽。自初遭艱。晝夜號泣。匪淚伊血。羸乎莫支。陞堂弔祭者。不忍聞其聲。得書赴告者。不忍觀其辭。子壽蓋曰。不孝孤少罹閔凶。父喪母廢。無壟可耕。母子相依。及遊太學。母客京師。冬兮母寒。晝兮母飢。飢無一囊之粟。寒無一襲之衣。不孝孤雖食於學官。羹餼在前。歎息而靡。撫所讀書。而與之誓曰。編絕則輯。字渝則補。寧死於壽傍。不敢畏難苟止。以負吾母之慈。如是十年。幸

賜第於太常。歸而拜母。相持以泣。淚盡目萎。母前子後。告於先墓。庶幾吾父聞之。而寬其九泉之思也。於虜。此子壽之既言。而其未言者。蓋可推矣。奉身以道義。發身以書詩。文章傳於不朽。節行全而無虧。士患無志。不患無位。士患無才。不患無恃。子壽之志。所以事親者。蓋其所以事君。子壽之才。願猶屈而未施。親則日遠。時節奉祀。如將見之。一言一行。足以顯揚吾親者。苟有怠忽。是以吾親爲歿而亡知也。子壽之令名。與天壤同弊。則親實與焉。刻誄千字。置守萬家。蓋不足進於斯也。子壽之存於曾中而未言者。予得陳之。非獨慰吾子壽。蓋以爲天下孝子之詒。哀哉。

## 卷四十一

### 天彭牡丹譜

#### 花品序第一

牡丹在中州。洛陽爲第一。在蜀。天彭爲第一。天彭之花。皆不詳其所自出。土人云。曩時永寧院有僧。種花最盛。俗謂之牡丹院。春時。賞花者多集於此。其後花稍衰。人亦不復至。崇寧中。州民宋氏張氏蔡氏。宣和中。石子灘楊氏。皆嘗買洛中新花以歸。自是落花散於人間。花戶始盛。皆以接花之業。大家好事者。皆竭其力以養花。而天彭之花。遂冠兩川。今惟三井李氏。劉村毋氏。城中蘇氏。城西李氏。花特盛。又有餘力治亭館。以故最得名。至花戶連畛相望。莫得而姓氏也。天彭三邑。皆有花。惟城西沙橋上下。花尤超絕。由沙橋至瑚口。崇寧之間。亦多佳品。自城東抵濠陽。則絕少矣。大抵花品近百種。然著者不過四十。而紅花最多。紫花黃花白花。各不過數品。碧花一二而已。今自狀元紅至歐碧。以類次第之。所未詳者。姑列其名於後。以待好事者。

狀元紅 祥雲 紹興春 燕脂樓 金腰樓 玉腰樓 雙頭紅 富貴紅 一尺紅 鹿胎紅 文公  
紅 政和春 醉西施 迎日紅 彩霞 疊羅 勝疊羅 瑞露蟬 乾花 大千葉 小千葉  
右二十一品紅花

紫繡毬 乾嶺紫 潑墨紫 葛巾紫 福嚴紫

右五品紫花

禁苑黃 慶雲黃 青心黃 黃氣毬

右四品黃花

玉樓子 劉師哥 玉覆盃

右三品白花

歐碧

右碧花

轉枝紅 朝霞紅 灑金紅 瑞雲紅 壽陽紅 探春毬 米囊紅 福勝紅 油紅 青絲紅 紅鵝

毛 粉鵝毛 石榴紅 洗粧紅 盛金毬 閭綠樓 銀絲樓 六對蟬 洛陽春 海芙蓉 膩玉紅

內人嬌 朝天紫 陳州紫 袁家紫 御衣紫 斬黃 玉抱肚 勝瓊 白玉盤 碧玉盤 界金

樓 樓子紅

右三十三品未詳

花釋名第一

洛花見紀於歐陽公者。天彭往往有之。此不載。載其著於天彭者。彭人謂花之多葉者。京花。單葉者。川花。近歲尤賤。川花賣不復售。花之舊裁曰祖花。其新接頭。有一春兩春者。花少而富。至三春。則花稍多。及成樹。花雖益繁。而花葉減矣。狀元紅者。重葉深紅花。其色與鞋紅潛緋相類。而天姿富貴。彭人以冠花品。多葉者謂之第一架。葉少而色稍淺者。謂之第二架。以其高出衆花之上。故名狀元紅。或曰。舊制進士第一人。即賜茜袍。此花如其色。故名之。祥雲者。千葉淺紅花。妖豔多態。而花葉最多。花戶王氏。謂此花如朶雲狀。故謂之祥雲。紹興春者。祥雲子花也。色淡。佇而花尤富。大者徑尺。紹興中始傳。大抵花戶多種花子。以觀其變。不獨祥雲耳。燕脂樓者。深淺相間。如燕脂染成。重趺累萼。狀如樓觀。色淺者。出於新繁勾氏。色深者。出於花戶宋氏。又有一種。色稍下。獨勾氏花爲冠。金腰樓。玉腰樓。皆粉紅花。而起樓子。黃白間之。如金玉色。與燕脂樓同類。雙頭紅者。竝蒂駢萼。色尤鮮明。出於花

戶宋氏始秘不傳。有謝主簿者始得其種。今花戶往往有之。然貴之得地。則歲歲皆雙不爾。則間年矣。此花之絕異者也。富貴紅者。其花葉圓正而厚。色若新染未乾者。他花皆落。獨此抱枝而槁。亦花之異者。一尺紅者。深紅頗近紫色。花面大幾尺。故以一尺名之。鹿胎紅者。鶴領紅子。花色紅微帶黃。上有白點。如鹿胎。極化工之妙。歐陽公花品有鹿胎花者。乃紫花。與此頗異。文公紅者。出於西京潞公園。亦花之麗者。其種傳蜀中。遂以文公名之。政和春者。淺粉紅花。有絲頭。政和中始出。醉西施者。粉白花。中間紅暈。狀如醜顏。迎日紅者。與醉西施同類。淺紅花中特出深紅花。開最早。而妖麗奪目。故以迎日名之。彩霞者。其色光麗。爛然如霞。疊羅者。中間瑣碎。如疊羅紋。勝疊羅者。差大於疊羅。此三品。皆以形而名之。瑞露蟬。亦粉紅花。中抽碧心。如合蟬狀。乾花者。粉紅花。而分蟬旋轉。其花亦富。大千葉。小千葉。皆粉紅花之傑者。大千葉無碎花。小千葉則花萼瑣碎。故以大小別之。此二十一品。皆紅花之著者也。紫繡毬。一名新紫花。蓋魏花之別品也。其花葉圓正如繡毬狀。亦有起樓者。爲天彭紫花之冠。乾道紫。色稍淡。而暈紅。出未十年。潑墨紫者。新紫花之子花也。單葉深黑如墨。歐公記有葉底紫近之。葛巾紫。花圓正而富麗。如世人所戴葛巾狀。福嚴紫。亦重葉紫花。其葉少於紫繡毬。莫詳所以得名。按歐公所紀。有玉版白。出於福嚴院。土人云。此花亦自西京來。謂之舊紫花。豈亦出於福嚴邪。禁苑黃。蓋姚黃之別品也。其花閑淡高秀。可亞姚黃。慶雲黃。花葉重複。郁然輪囷。以故得名。青心黃者。其花心正青。一本花往往有兩品。或正圓如毬。或層起成樓子。亦異矣。黃氣毬者。淡黃檀心花。葉圓正。向背相承。敷腴可愛。玉樓子者。白花。起樓。高標逸韻。自然是風塵外物。劉師哥者。白花帶微紅。多至數百葉。纖妍可愛。莫知何以得名。玉覆盃者。一名玉炊餅。蓋圓頭白花也。碧花止一品。名曰歐碧。其花淺碧。而開最晚。獨出歐氏。故以姓著。大抵洛中舊品。獨以姚魏爲冠。天彭則紅花以狀元紅爲第一。紫花以紫繡毬爲第一。黃花以禁苑黃爲第一。白花以玉樓子爲第一。然花戶歲益培植。新特間出。將不特此而已。好事者尙屢書之。

### 風俗記第三

天彭號小西京。以其俗好花。有京洛之遺風。大家至千本。花時。自太守而下。往往卽花盛處張飲。帝幟車馬。歌吹相屬。最盛於清明寒食時。在寒食前者。謂之火前花。其開稍久。火後花。則易落。最喜陰晴相半時。謂之養花天。栽



接鬪始。各有其法。謂之弄花。其俗有弄花一年。看花十日之語。故大家例惜花。可就觀。不敢輕翦。蓋翦花。則次年花絕少。惟花戶則多植花。以牟利。雙頭紅初出時。一本花取直至三十千。祥雲初出。亦直七八千。今尙兩千。州家歲常以花餉諸臺。及旁郡。蠟蒂筠籃。旁午於道。予客成都六年。歲常得餉。然率不能絕佳。淳熙丁酉歲。成都帥以善價私售於花戶。得數百苞。馳騎取之。至成都。露猶未晞。其大徑尺。夜宴西樓下。燭焰與花相映發。影盪酒中。繁麗動人。嗟乎。天彭之花。要不可望洛中。而其盛已如此。使異時復兩京。王公將相。築園第以相誇尙。予幸得與觀焉。其動蕩心目。又宜何如也。明年正月十日。山陰陸某書。

### 致語六首

#### 天申節致語

得吾道而上爲皇。方探真詮之妙。有天下而尊歸父。適當孝治之隆。肆均湛露之恩。用修流虹之瑞。恭惟皇帝陛下。德高邃古。澤被縣區。神武應期。三紀撫紹開之運。希夷玩志。兆民傾愛戴之誠。爰輯上儀。式彰華旦。山呼萬歲。驩已浹於神人。花覆千官。慶更同於中外。臣獲預梨園之法部。遙瞻鳳闕於丹霄。敢采民謠。恭陳口號。

宮殿紅雲捧紫皇。河清電繞擁休祥。壺中常占青春在。物外方知浩劫長。畫立龍旗風不動。曉開瓊笈遠飄香。堯年豈特封人祝。動地隨聲遍萬方。

又

樞電效祥。丕顯生商之旦。霈雲示惠。肆均在鑄之恩。喜溢鸞鷲。光生俎豆。伏惟皇帝陛下。聖神廣運。垂拱無爲。躬堯舜之性仁。致成康之刑措。克肖其德。天惟申命。用休非求於民。人皆同心以戴。號令雷風之鼓舞。文章日月之昭明。修甲觀之昌期。璇璣池之廣宴。山呼萬歲。花覆千官。激灑上樽。味挹金莖之露。悠颺法曲。聲留玉宇之雲。臣等生值聖時。身參樂府。敢緣歸笑之義。廣載太平之詩。

廣殿遙聞警蹕音。觚稜曉色尙沉沉。半空瑞靄爐香馥。一點紅雲繡座深。夷夏驩聲歸羽舞。乾坤和氣入薰琴。欲知聖德齊堯舜。遡闕爭傾萬國心。

又

有王者興，應繞電流江之瑞，俾聖人壽，實敷天率土之心。欣逢震風之期，恭致龐鴻之祝。伏惟皇帝陛下，聰明稽古，歷數在躬。聖澤上霽而下蟠，睿化東漸而西被。追景德祥符之治，萬寓丕平。御紫宸垂拱之朝，四夷入貢。爰錫需雲之宴，用均慈露之恩。臣等瑞暹清時，遙瞻丹闕。聽虞帝簫韶之奏，同極驩情。綴漢家樂府之詩，敢陳薄技。嘉會千齡，豈易逢。瓊壽俱榮，未央宮。九重鳳闕，瞻矚日。百尺龍旗，掩葇風。奇瑞屢書圖讖上，太平長在詠歌中。區區擊壤，雖無取。意與生民既醉同。

徐稚山給事慶八十樂語

伏以就第而賜安車，綏及常珍之歲。爲酒以介眉壽，宜伸善頌之誠。恭惟致政龍學給事，東省近臣。西清宿望，體鍾和氣。生元祐之盛時，適合聖君。贊隆興之初政，抗議每先於諸老。遺榮靡顧於萬鍾，雖容疎傳之歸。行見謝公之起，至若就金比訓，產玉生輝。出將使指之榮，入奉色難之養。膺慈念福，屬我耆英。維降嶽之嘉辰，當發春之令月。廟堂舊弼，紆華袞以臨觴。臺閣名卿，煥繡衣而在席。式歌且舞，俾煥而昌。上對台顏，敢陳口號。

欲知主聖本臣忠，傾盡嘉謨沃舜聰。同載方如周呂尚，安車不數漢申公。日烘盎盎花光暖，燭映鱗鱗酒浪紅。白首同朝各強健，其辭爛醉答春風。

致語二

伏以碧油紅旆，有嚴幕府之容。珮組華觴，用飾輿情之喜。恭惟某官，西清禁從。東省名臣。據古守經，凜北斗泰山之望。黜浮崇雅，繁銘鐘篆鼎之辭。行表縉紳，言書簡冊。雖弗容然後見君子，願未起何以慰蒼生。適茲謀帥之辰，誰處耆英之右。佩麟符而就鎮，獨屈經綸。穿豹尾以遷朝，佇聞趨召。某官爰申宴樂，式奉笑談。士民踴躍而仰瞻，將吏奔馳而卽事。諧金石鏗鏘之奏，盛魚龍曼衍之觀。上對台堦，敢陳口號。

曾立蛾眉禁省班，至今風采照金鑾。縱橫箏陣千人廢，浩蕩辭源萬頃寬。落紙煙雲紛態度，照人冰玉峙高寒。從容坐嘯香凝寢，說與賓僚拭目觀。

又

西顧司辰。素商紀節。徧日初開於幕府。肆筵式奉於皇華。恭惟某官節槩清真。風規簡亮。過眼不再。盡讀五車之書。落筆可驚。早冠萬人之勇。文久傳於後學。名疑覩於昔賢。凜臺柏之生風。煥使星之下燭。繡衣持斧。威聲方肅於列城。豹尾屬車。趣召行參於法從。某官爰開燕豆。款奉談犀。畫棟珠簾。納九秋之爽氣。金樽玉酒。醉一道之歡聲。仰對台階。致陳口號。

涼月參差白露溥。請看賓主罄清歡。麟符玉節交相映。鳳竹鸞絲殊未闌。百穀方登倉庾足。七州無事里閭安。樽前莫惜山頽玉。四者能兼自古難。

卷四十三

入蜀記第一

乾道五年十二月六日。得報差通判夔州。方久病。未堪遠役。謀以夏初離鄉里。

六年閏五月十八日。晚行。夜至法雲寺。兄弟餞別。五鼓始決去。

十九日黎明。至柯橋館。見送客。已時至錢清。食亭中。涼爽如秋。與諸子及送客。步過浮橋。橋堅好。非昔比。亭亦華潔。皆史丞相所建也。申後。至蕭山縣。憩蕩筆驛。驛在覺苑寺旁。世傳寺乃江文通舊居也。有大碑。葉道卿文。寺額及佛殿榜。皆沈睿達所書。有碑亦睿達書。尤精古。又有毗陵人戚舜臣所畫水。蓋佛後座大壁也。卒然見之。覺瀟灑洶湧可駭。前輩或謂之死水。過矣。縣丞權縣事紀旬尉會槃來。會原伯逢招飲於其子槃廨中。二鼓歸。原伯復來。共坐驛門。月如晝。極涼。四鼓解舟行。至西興鎮。

二十日黎明渡江。江平無波。少休仙林寺。寺僧爲開館設湯飲。遂買小舟出北關。登漕司所假舟於紅亭稅務之西。夜無蚊。

二十一日。省三兄。

二十二日至二十四日。皆留兄家。

二十五日晚。葉夢錫侍郎衡招飲。案間設饔山數盆。望之如雪。

二十六日晚。芮國器司業。擘招飲。同集仲高兄詹道子大著亢宗。張叔潛編修淵。坐中。國器云。頃在廣東作漕。有提舉茶鹽石端義者。性殘忍。每捕官吏繫獄。輒以石鹽木枷枷之。蓋木之至堅重者。每曰。木名石鹽。天生此爲我用也。其後。石坐罪。竟荷校云。

二十七日。

二十八日。同仲高出關門。買小舟泛西湖。至長橋寺。予不至。臨安八年矣。湖上園苑竹樹。皆老蒼。高柳造天。僧寺益葺。而舊交多已散去。或貴不復相通。爲之絕歎。

二十九日。沈持要檢正。極招飲。邂逅趙德莊少卿彥端。晚出湧金門。竝湖繞城。至舟中。三十日。

六月一日早。移舟出關。幾盡一日。始能出三關。船舫櫛比。熱甚。午後小雨。熱不解。泊糴場前。

二日。禺中解舟。鄉僕來言。鄉中閔雨。村落家家車水。比連三年頗稔。今春父老。言占歲可憂。不知終何如也。過赤岸班荆館。小休前亭。班荆者。北使宿頓及賜燕之地。距臨安三十六里。晚急雨。頗涼。宿臨平。臨平者。太師蔡京葬其父準於此。以錢塘江爲水。會稽山爲案山。形如駱駝。葬於駝之耳。而築塔於駝之峯。蓋葬師云。駝負重則行遠也。然東坡先生樂府固已云。誰似臨平山上塔亭亭。迎客西來送客行。則臨平有塔亦久矣。當是蔡氏葬後增築。或遷之耳。京賁太子少保制云。託祝聖而飾臨平之山。是也。夜半解舟。

三日黎明。至長河堰。亦小市也。魚蟹甚富。午後至秀州崇德縣。縣令右從政郎吳道夫。丞右承直郎李植。監秀州都稅務右從政郎章湜來。舊聞戴子微云。崇德有市人吳隱。忽棄家寓旅邸。終日默坐一室。室中惟一臥榻。客至共坐榻上。或載酒過之。亦不拒。清談竟日。隱初不學問。至是間與人言易數。皆造精微。亦能先知人吉凶壽夭。見者莫能測也。因見吳令問之。云皆信然。今徙居村落間矣。是晚行十八里。宿石門。火雲如山。明日之熱可知也。四日。熱甚。午後始稍有風。晚泊本覺寺前。寺故神霄宮也。廢於兵火。建炎後再修。今猶甚草創。寺西廡有蓮池十餘畝。飛橋小亭。頗華潔。池中龜無數。聞人聲皆集。駢首仰視。兒曹驚之不去。亭中有小碑。乃郭功甫元祐中所作。醉翁操。後自跋云。見子瞻所作未工。故賦之。亦可異也。

五日早抵秀州。見通判權郡事右通直郎朱自求。員外通判右承事郎直秘閣趙師夔。方務德侍郎滋。務德留飯。飯罷。還舟小憩。極熱。謁樊自強主管。樊自牧教授。廣抑皆茂實。吏部子聞人伯卿教授。阜民茂德。刪定子二樊居城外。居第頗壯。茂實晚歲所築。尙未成也。隔水有小園。竹樹脩茂。荷池渺瀰。可喜。池上有堂曰讀書堂。遊寶華尼寺。拜宣公祠堂。有碑。缺壞磨滅之餘。時時可讀。蘇州刺史于頔書。大略言秘書監陸公齊望始作尼寺於此。其後灞漣禮兄弟又新之。後又有賢妹字歆香。陸氏嘗有女子爲尼云。然不言宣公所以有祠者。家諸體賴此證。誤諱。諱者則宣公之父也。老尼妙濟。大師法淳。及其弟子居白留啜茶。且言方新祠堂也。移舟北門宣化亭。晚復過務德飯。

六日。右奉議郎新通判荆南呂援來。援字彥能。進士聞人綱來。綱字伯記。方務德館客。自言識毛德昭。德昭名文。衢州江山縣人。居於秀。予兒時從之甚久。德昭極苦學。中年不幸病盲而卒。無子。綱言其盲後。猶終日危坐。默誦六經。至數千言不已。可哀也。赴郡集於倅廨中。坐花月亭。有小碑。乃張先子野雲破月來花弄影樂章。云得句於此亭也。晚赴方夷吾導之集於陳大光縣丞家。二樊呂倅皆在。大光字子充。榮中諫議孫。居第潔雅。末利花盛開。七日早。遍辭諸人。赴方務德素飯。晚。移舟出城。泊禾興館前。館亦頗闊壯。終日大雨不止。招姜醫視家人及綱。八日。雨霽。極涼如深秋。遇順風。舟人始張帆。過合路。居人繫數賣鮓者尤衆。道旁多軍中牧馬。遑河水泛溢。高於近村地至數尺。兩岸皆車出積水。婦人兒童竭作。亦或用牛。婦人足踏水車。手猶績麻不置。過平望。遇大雨暴風。舟中盡溼。少頃。繫止宿八尺。聞行舟有覆溺者。小舟叩舷賣魚。頗賤。蚊如蠶蠶可畏。

九日。晴而風。舟人懲昨夕狼狽。不敢解舟。日高方行。自至崇德。行大澤中。至此。始望見震澤。遠山。午間。至吳江縣。渡松江。風極靜。瘦庵竹樹益茂。而主人死矣。知縣右承議郎管統。尉古迪。功郎周鄴來。縣治有石刻。曾文清公漁具圖詩。前知縣事柳楹所刻也。漁具比松陵倡和集所載。又增十事云。託周尉招齋鄭端誠。爲統綯診脈。皆病暑也。市中賣魚鮓頗珍。晚解舟中流。回望長橋層塔。煙波渺然。真若圖畫。宿尹橋。登橋觀月。

十日。至平江。以疾不入。沿城過盤門。望武丘樓塔。正如吾鄉寶林。爲之慨然。宿楓橋寺前。唐入所謂半夜鐘聲到客船者。

十一日五更發楓橋。曉過游點。居人極多。至望亭小憩。自是夾河皆長岡高壟。多陸種菽粟。或櫛木叢篠。氣象窘隘。非楓橋以東比也。近無錫縣。始稍平曠。夜泊縣驛。近邑有錫山。出錫。漢末識記云。有錫天下兵。無錫天下清。有錫天下爭。無錫天下寧。至今錫見輒持之。莫敢取者。

十二日早。謁喻子材郎中。子材來謝。以兩夫荷轎。不持胡牀。手自授。語云。知縣右奉議郎吳禮來。晚行。夜四鼓。至常州城外。

十三日早。入常州。泊荆谿館。夜月如晝。與家人步月驛外。綯始小愈。

十四日早。見知州右朝奉大夫李安國。通判右朝奉郎蔣誼。員外倅左朝散郎張堅。堅。文定公綱之子。教授左文林郎陳伯達。員外教授左從政郎沈燿。司戶右從政郎許伯虎來。伯達字兼善。燿字子壽。皆未識。子壽仍出近文一卷。伯虎字子威。余兒時筆硯之舊也。至東嶽廟觀古檜。數百年物也。又小憩崇勝寺納涼。遂解舟。甲夜過奔牛。梁明帝遺沈懷明擊孔觀。至奔牛築壘。卽此也。開水湍激。有聲甚壯。遂抵呂城關。自祖宗以來。天下置堰軍止四處。而呂城及京口二關在焉。

十五日早。過呂城關。始見獨轆小車。過陵口。見大石獸。偃仆道傍。已殘缺。蓋南朝陵墓。齊明帝時。王敬則反。至陵口。慟哭而過。是也。余頃嘗至宋文帝陵。道路猶極廣。石柱承露盤及麒麟辟邪之類。皆在。柱上刻太祖文皇帝之神道八字。又至梁文帝陵。文帝武帝父也。亦有二辟邪尙存。其一爲藤蔓所纏。若繫縛者。然陵已不可識矣。其旁有皇業寺。蓋史所謂皇基寺也。疑避唐諱所改。二陵皆在丹陽。距縣三十餘里。郡士蔣元龍子雲謂予曰。毛達可作守時。有賣黃金石榴來禽者。疑其盜。捕得之。果發梁陵所得。夜抵丹陽。古所謂曲阿。或曰雲陽。謝康樂詩云。朝日發雲陽。落日到朱方。蓋謂此也。

十六日早。發丹陽。汲玉乳井水。井在道旁觀音寺。名列水品。色類牛乳。甘冷熨齒。井額陳文忠公所作。堆玉八分也。寺前又有練光亭。下闕練湖。亦佳境。距官道甚近。然過客罕至。是日見夜合花方開。故山開過已月餘。氣候不齊如此。過夾岡。有二石人。植立岡上。俗謂之石翁石媪。其實亦古陵墓前物。自京口抵錢塘。梁陳以前不通漕。至隋煬帝始鑿渠八百里。皆闊十丈。夾岡如連山。蓋當時所積之士。朝廷所以能駐蹕錢塘。以有此渠耳。汴與此渠。

皆假手隋氏。而爲吾宋之利。豈亦有數邪。過新豐。小憩。李太白詩云。南國新豐酒。東山小妓歌。又唐人詩云。再入新豐市。猶聞舊酒香。皆謂此。非長安之新豐也。然長安之新豐。亦有名酒。見王摩詰詩。至今居民市肆頗盛。夜抵鎮江城外。是日立秋。

十七日。平旦入鎮江。泊船西驛。見知縣右朝散郎直祕閣蔡洸子平。都統慶遠軍節度使成閔。通判右朝奉大夫章汝。右朝奉郎陶之真。府學教授右文林郎熊克。總領司幹辦公事右承奉郎史彌正端叔。

十八日。右奉議郎簽書節度判官廳公事葛郛。觀察推官右文林郎徐務滋。司戶參軍左迪功郎楊冲。焦山長老定國。甘露長老化昭來。

十九日。金山長老寶印來。字坦叔。嘉州人。言自峽州以西灘。不可勝計。白傅詩所謂白狗到黃牛。灘如竹節稠。是也。赴蔡守飯於丹陽樓。熱特甚。堆冰滿坐。了無涼意。蔡自點茶頗工。而茶殊下。同坐熊教授。建寧人。云建茶舊雜以米粉。復更以薯蕷。兩年來。又更以楮芽。與茶味頗相入。且多乳。惟過梅則無復氣味矣。非精識者。未易察也。申後。移舟出三閘。至潮闌而止。

二十日。遷入嘉州王知義船。微雨。極涼。

二十一日。

二十二日。郡集衛公堂後圃。比舊唯增染香亭。飲半。登壽丘。普照寺終宴。壽丘者。宋高祖宅。有故井尙存。寺本名延慶。隆興中。復泗州。有普照寺。僧奉僧伽像來歸。寓焉。因賜名普照寺。僑置僧伽道場。東望京山。連亘抱合。勢如繚牆。官寺樓觀如畫。西闕大江。氣象極雄偉也。

二十三日。至甘露寺。飯僧。甘露蓋北固山也。有狼石。世傳以爲漢昭烈吳大帝嘗據此石共謀曹氏。石亡已久。寺僧輒取一石充數。游客摩挲太息。僧及童子輩往往竊笑也。拜李文饒祠。登多景樓。樓亦非故趾。主僧化昭所築。下臨大江。淮南草木可數。登覽之勝。實過於舊。邂逅左迪功郎新太平州教授徐容。容字子公。泉州人。此山多峭崖如削。然皆土也。國史以爲石壁峭絕。誤矣。

二十四日。

二十五日早。以一盞壺酒。謁英靈助順王祠。所謂下元水府也。祠屬金山寺。寺常以二僧守之。無他祝史。然勝云。賽祭豬頭。例歸本廟。觀者無不笑。初紹興末。元顏亮入寇。樞密葉公審言。督視大軍守江。禱於水府寺祠。請事平。奏加帝號。既而不果。隆興中。虜再入。有近臣申言之。議者謂四瀆止封王。水府不應在四瀆上。乃但加美稱而已。廟中遇武人王秀。自言博州人。年五十一。元顏亮寇邊時。自河朔從義軍。攻下大名。以待王師。既歸期不見錄。且自言孤遠。無路自通。獻款不已。是晚欲出江。舟人辭以潮不應。遂宿江口。

二十六日。五鼓發船。是日舟人始伐鼓。遂游金山。登玉鑑堂。妙高臺。皆窮極壯麗。非昔比。玉鑑蓋取蘇儀甫詩云。僧於玉鑑光中坐。客躡金鼈背上行。儀甫果終於翰苑。當時以爲詩識。新作寺門亦甚雄。翟耆年伯壽篆額。然門乃不可泊舟。凡至寺中者。皆由雄跨閣。長老寶印言。舊額仁宗皇帝御飛白。張之。則風波洶湧。蛟鼉出沒。遂藏之寺閣。今不復存矣。印住山近十年。興造皆其力。寺有兩塔。本會子宣丞相。用西府俸所建。以薦其先者。政和中。寺爲神霄宮。道士乃去路上相輪而屋之。謂之鬱羅霄臺。至是五十餘年。印始復爲塔。且增飾之。工尙未畢。山絕頂有吞海亭。取氣吞巨海之意。登望尤勝。每北使來聘。例延至此亭烹茶。金山與焦山相望。皆名藍。每爭雄長。焦山舊有吸江亭。最爲佳處。故此名吞海以勝之。可笑也。夜風水薄船。鞦韆有聲。

二十七日。留金山。極涼冷。印老言。蜀中梁山軍驚變。爲天下第一。

二十八日。風戾。觀日出江中。天水皆赤。真偉觀也。因登雄跨閣。觀二島。左曰鵝山。舊傳有栖鵝。今無有。右曰雲根島。皆特起不附山。俗謂之郭璞墓。奉使余國起居郎范至能至山。遣人相招食於玉鑑堂。至能名成大。聖政所同官。相別八年。今借資政殿大學士提舉萬壽觀侍讀。爲金國祈請使云。午間過瓜洲。江平如鏡。舟中望金山。樓觀重複。尤爲鉅麗。中流風雷大作。電影騰掣。止在江面去舟財丈餘。急繫纜。俄而開霽。遂至瓜洲。自到京口無蚊。是夜蚊多。始復設榻。

二十九日。泊瓜洲。天氣澄爽。南望京口。月觀甘露寺水府廟。皆至近。金山尤近。可辨人眉目也。然江不可橫絕。放舟稍西。乃能達。故渡者皆遲回久之。舟人以帆弊。往姑蘇買帆。是日方至。檣高五丈六尺。帆二十六幅。兩日間。閱往來渡者。無慮千人。大抵多軍人也。夜觀金山塔燈。



卷四十四

入蜀記第二

七月一日黎明離瓜州。便風掛帆。晚至真州。泊鑿遠亭。州本唐揚州揚子縣之白沙鎮。楊傳有淮南。徐溫自金陵來。觀傳於白沙。因改曰迎鑿鎮。或謂周世宗征淮時。諸將嘗於此迎謁。非也。國朝乾德中。升爲建安軍。祥符中。建玉清昭應宮。卽軍之西北小山。置冶鑄玉皇聖祖太祖太宗四聖像。旣成。遣丁謂李宗諤爲迎奉使副。至京。車駕出迎。肆赦。建軍曰真州。而於故治築儀真觀。政和中。修九域圖志。又名曰儀真郡。舊以水陸之衝。爲發運使治所。今廢。

二日。見知州右朝奉郎王察。市邑官寺。比數年前頗盛。攜統游東園。園在東門外里餘。自建炎兵火後。廢壞滌地。漕司租與民。歲入錢數千。昔之閑壯巨麗。復爲荆棘荒墟之地者四十餘年。乃更葺爲園。以記考之。惟清齋堂。拂雲亭。澄虛閣。羸復其舊。與右之清池。北之高臺尙存。若所謂流水橫其前者。湮塞僅如一帶。而百畝之園。廢爲蔬畦者。尙過半也。可爲太息。登臺。望下蜀諸山。平遠可愛。裴回久之。過報恩光孝寺。少留。辛巳之變。儀真焚蕩無餘。而此寺獨存。堂中僧百人。長老妙湍。常州人。

三日。右迪功郎監稅務聞人堯民來。堯民。茂德剛定之兄子。以恩科入官。北山永慶長老蘊常來。郡集於平易堂。遍游澄瀾閣。快哉亭。遂至壯觀。以歸。壯觀舊有米元章所作賦石刻。今亡矣。初聞王守儀真觀去城遠近。云在城南里許。方怪與國史異。旣歸。亟往游。則信城南也。有老道士出迎。年七十餘。自言廬州人。能述儀真本末。云舊觀實在城西北數里。小土山之麓。祥符所鑄。乃金銅像。并座高三丈。以黃麾全仗道門幢節迎赴京師。皆與國史合。故當時樂章曰。范金肖像。申嚴奉。宮館狀翬飛。萬靈拱衛。瑞煙披。堤柳映黃塵。道士又言。賜號瑞應福地。則史所不載也。今所謂儀真觀者。昔黃冠入城。憩道院耳。晚大風。舟人增纜。

西日。風便。解纜挂帆。發真州。岸下舟相先後發者甚衆。煙帆映山。縹緲如畫。有頃。風愈厲。舟行甚疾。過瓜步山。山蜿蜒蟠伏。臨江起小峯。頗巉峻。絕頂有元魏太武廟。廟前大木。可三百年。一井已涸。傳以爲太武所鑿。不可知也。

太武以宋文帝元嘉二十七年南侵至瓜步建康戒嚴太武鑿瓜步山爲蟠道於其上設甃廡大會羣臣疑卽此地王文公詩所謂葺祠瓜步認前朝是也梅聖俞題廟云魏武敗忘歸孤軍駐山頂按太武初未嘗敗聖俞誤以佛狸爲曹瞞耳山出瑪瑙石多虎豹害人往時大將劉寶每募人捕虎於此周世宗伐南唐齊王景達自瓜步渡江距六合二十里設柵亦此地也入夾行數里沿岸園囿衍沃廬舍竹樹極盛大抵多長蘆寺莊出夾望長蘆樓塔重覆自江淮兵火官寺民廬莫不殘壞獨此寺之盛不減承平至今日常數百家江面渺瀰無際殊可畏李太白詩云維舟至長蘆目送煙雲高是也晚泊竹篠港有居民二十餘家距金陵三十里

五日大風將曉覆袂衾晨起淒然如暮秋過龍灣浪湧如山望石頭山不甚高無峭立江中繚繞如垣牆凡舟皆由此下至建康故江左有變必先固守石頭真控扼要地也自新河入龍光門城上舊有賞心亭白鷺亭在門右近又創二水亭在門左誠爲壯觀然賞心爲二亭所蔽頗失往日登望之勝泊秦淮亭說者以爲鍾阜艮山得庚水爲宗廟水秦鑿淮本欲破金陵王氣然庚水反爲吉天下事信非人力所能勝也見留守右朝請大夫秘閣修撰唐瑑通判右朝散郎潘恕建康行宮在天津橋北橋琢青石爲之頗精緻意其南唐之舊也晚小雨右文林郎監大軍倉王烜來王言京口人用七月六日爲七夕蓋南唐重七夕而常以帝子鎮京口六日輒先乞巧翌旦馳入建康赴內燕故至今爲俗云然在太宗皇帝時嘗下詔禁以六日爲七夕則是北俗亦如此此說恐不然

六日見左朝散大夫太府少卿總領兩淮財賦沈夏武泰軍節度使建康諸軍都統郭振右宣教郎知江寧縣何作善右文林郎觀察推官褚意來作善字百祥意字誠叔晚見秦伯和侍郎伯和各填故相益公檜之孫延坐靈堂棟宇闕麗前臨大池池外卽御書閣蓋賜第也家人病創託何令招醫劉仲寶視脈

七日早遊天慶觀在冶城山之麓地理家以爲此山脈絡自蔣山來不可知也吳晉間城壘大抵多因山爲之觀西有忠烈廟卞壺廟也以嵇紹及壺二子眡盱配食紹死於惠帝時在壺前且非江左事而以配壺非也廟後叢木甚茂傳以爲壺墓墓東北又有亭頤疎豁曰忠孝亭亭本南唐忠貞亭後避諱改焉忠貞靈諭今日忠孝則并以其二子死父難也雲堂道士陳德新字可久姑蘇人頗開敏相從登覽久之遂出西門游清涼廣慧寺寺距城星許據石頭城下臨大江南直牛頭山氣象甚雄然壞於兵火舊有德慶堂在法堂前堂榜乃南唐後主撮襟書

石刻尙存。而堂徙於西偏矣。又有祭悟空禪師文曰。保大九年。歲次辛亥九月。皇帝以香茶乳藥之奠。致祭於右街清涼寺悟空禪師。按南唐元宗。以癸卯歲嗣位。改元保大。當晉出帝之天福八年。至辛亥。寶保大九年。當周太祖之廣順元年。則祭悟空者。元宗也。建康志以爲後主。非是。長老寶餘。楚州人。留食。贈德慶堂榜墨本。食已。同登石頭。西望宣化渡。及歷陽諸山。真形勝之地。若異時定都建康。則石頭當仍爲關要。或以爲今都城徙而南。石頭雖守無益。蓋未之思也。惟城旣南徙。秦淮乃橫貫城中。六朝立柵斷航之類。緩急不可復施。然大江天險。都城臨之。金湯之勢。比六朝爲勝。豈必依淮爲固邪。左迪功郎新湖州武康尉郭煒。右迪功郎監比較務李膺來。煒。秦伯和館客也。言秦氏衰落可念。至屢典質。生產亦薄。問其歲入幾何。曰米十萬斛耳。

八日晨。至鍾山道林真覺大師塔焚香。塔在太平興國寺。上寶公所葬也。塔中金銅寶公像。有銘在其膺。蓋王文公守金陵時所作。僧言古像取入東都啓聖院。祖宗時每有祈禱。啓聖及此塔。皆設道場。考之信然。塔西南有小軒。曰木末。其下皆大松。髯甲夭矯如蛟龍。往往數百年物。木末。蓋後人取王文公詩木末北山雲冉冉之句名之。建康志謂公自命此名。非也。塔後又有定林菴。舊聞先君言。李伯時畫文公像於菴之。昭文齋壁著帽束帶。神彩如生。文公沒。齋常扃閉。遇重客至。寺僧開戶。客忽見像。皆驚聳。覺生氣逼人。寫照之妙如此。今菴經火。尺椽無復存者。予乙酉秋。嘗雨中獨來遊。留字壁間。後人移刻崖石。讀之感歎。蓋已五六年矣。歸途過半山。少留。半山者。王文公舊宅。所謂報寧禪院也。自城中上鍾山。此爲中途。故曰半山。殘毀尤甚。寺西有土山。今謂之培塿。亦後人取文公詩所謂溝西顧丁壯。擔土爲培塿名之也。寺後又有謝安墩。文公詩云。在冶城西北。卽此是也。

九日。至保寧戒壇二寺。保寧有鳳凰臺。攬輝亭。臺有李太白詩云。三山半落青天外。二水中分白鷺洲。今已廢爲大軍甲仗庫。惟亭因舊趾重築。亦頗宏壯。寺僧言。亭榜本朱希真隸書。已爲俗子易之。法堂後有片石。瑩潤如黑玉。乃宋子嵩詩題云。鳳臺山亭子。陳獻司空。鄉貢進士宋齊丘。司空者。徐知誥也。後改姓名曰李昇。是爲南唐烈祖。而齊丘爲大臣。後又有題字云。昇元三年。秦勅刻石。蓋烈祖旣有國。追念君臣相遇之始。而表顯之。昇齊丘雖皆不足道。然當攘奪分裂橫潰之時。其君臣相遇。不如是。亦不能粗成其功業也。戒壇額曰崇勝戒壇寺。古謂之瓦棺寺。有閣因岡阜。其高十丈。李太白所謂鍾山對北戶。淮水入南榮者。又橫江詞。一風三日吹倒山。白浪高於於

瓦棺閣是也。南唐後主時，朝廷遣武人魏丕來使，南唐意其不能文，卽宴於是閣，因求賦詩。丕攬筆成篇，未句云：莫教雷雨損基局。後主君巨皆失色。及南唐之亡，爲吳越兵所焚。國朝承平二百年，金陵爲太府，寺觀競以崇飾。土木爲事，然閣終不能復。紹興中，有北僧來居，講惟識百法論，誓復吳造，求偉材於江湖間，事垂集者屢矣。會建宮闕，有司往往輒取之，僧不以此動心，愈益經營，卒成盧舍那閣。平地高七丈，雄麗冠於江東。舊閣基相距無百步。今廢爲軍營，秦伯和遣醫柴安恭來視家人瘡，柴邢州龍岡人。晚，褚誠叔來，誠叔嘗爲福州閩清尉，獲盜應格，當得京官，不忍以人死爲己利，辭不就。至今在選調，又有爲它邑尉者，亦獲盜，營賞甚力，卒得京官，將解去，入郡，過刑人處，輒掩目大呼，數日，神志方定。後至他郡，見通衢有石幢，問此何爲，從者曰：法場也。亦大駭叫呼。幾墜車。自此所至皆迂道以避刑人之地。人之不可有媿於心如此。移舟泊賞心亭下，秦伯和送藥。

十一日早，出建康城，至石頭，得便風張帆而行，然港淺而狹，行亦甚緩。宿大城岡，金陵岡隴重複，如梅嶺岡、石子岡、余讀如蛇婆岡，尤其著者也。居民數十家，亦有店肆。

十一日早，出夾，行大江，過三山磯，烈洲，慈姥磯，采石鎮，泊太平州江口。謝玄暉登三山還望京邑，李太白登三山望金陵，皆有詩。凡山臨江，皆有磯，水湍急，篙工併力撐之，乃能上。然今年閏餘秋早，水落已數尺矣。則盛夏可知也。三山自石頭及鳳凰臺望之，杳杳有無中耳。及過其下，則距金陵財五十餘里。晉伐吳，王濬舟師過三山，王渾要濬議事，濬舉帆曰：風利不得泊，卽此地也。是日便風，擊鼓挂帆而行，有兩大舟東下者，阻風泊浦漵，見之大怒，頓足詬罵不已。舟人不答，但撫掌大笑，鳴鼓愈厲，作得意之狀。江行掩速，常也得風者矜，而阻風者怒，可謂兩失之矣。世事蓋多類此者。記之以寓一笑。烈洲在江中，上有小山曰烈山，草木極茂密，有神祠在山巔，慈姥磯，磯之尤巖絕峭立者。徐師川有慈姥磯詩，序云：磯與望夫石相望，正可爲的對。而詩人未嘗挂齒牙，故其詩云：離鷺只說聞中恨，舐犢誰知目下情。然梅聖俞護母喪歸宛陵，發長蘆江口詩云：南國山川都不改，傷心慈姥舊時磯。師川偶忘之耳。聖俞又有過慈姥磯下，及慈姥山石崖上竹鞭詩，皆極高奇。與此山稱。采石一名牛渚，與和州對岸。江面比瓜洲爲狹，故隋韓擒虎平陳，及本朝曹彬下南唐，皆自此渡。然微風，輒浪作不可行。劉賓客云：蘆葦晚風起，秋江鱗甲生。王文公云：一風微吹萬舟阻，皆謂此磯也。磯卽南唐樊若冰獻策作浮梁，渡王師處。初若冰不得

志於李氏。詐祝髮爲僧。廬於采石山。鑿石爲窟。及建石浮圖。又月夜繫繩於浮圖。棹小舟急渡。引繩至江北。以度江面。既習知不謬。即亡走京師。上書。其後王師南渡。浮梁果不差尺寸。予按隋煬帝征遼。蓋嘗用此策。渡遼水。造三浮橋於西岸。既成。引趨東岸。橋短丈餘不合。隋兵赴水接戰。高麗乘岸上擊之。凌鐵杖戰死。始斂兵。引橋復就西岸。而更命何稠接橋。二日而成。遂乘以濟。然隋終不能平高麗。國朝遂下南唐者。實天意也。若冰力之有。方若冰之北走也。江南皆知其獻南征之策。或請誅其母妻。李煜不敢。但罷置池州而已。其後若冰自陳母妻在江南。朝廷命煜護送。煜雖憤切。終不敢違。厚賚而遣之。然若冰所鑿石窟及石浮圖。皆不毀。王師卒用以繫浮梁。則李氏君臣之暗且急。亦可知矣。雖微若冰。有不亡者乎。張文潛作平江南議。謂當縛若冰送李煜。使甘心焉。不然。正其叛主之辜而誅之。以示天下。豈不偉哉。文潛此說。實天下正論也。予自金陵得疾。是日方小愈。尙未能食。夜兩。

十二日早。移舟泛姑熟溪五里。泊闔武亭。初詢舟人云。江口泊船處。距城二十里。須步乃可入。及至闔武。乃止在城闔之外。微飲閩直學士左朝請。即知州周元特操。聞予病。與醫郭師顯俱來視疾。自都下相別。迨今八年矣。太平州。本金陵之當塗縣。周世宗時。南唐元宗失淮南。僑置和州於此。謂之新和州。改爲雄遠軍。國朝開寶八年。下江南。改爲平南軍。然獨領當塗一邑而已。太平與國二年。遂以爲州。且割蕪湖繁昌來屬。而治當塗。與興國軍同時建置。故分紀年以名之。

十三日。通判右朝請。即華禁。員外通判左朝奉。郎錢同仲。耕軍事判官左文林。郎趙子規。如當塗。縣右通直郎王權來。午後。入州見元特。呼郭醫就坐。間爲予切脈。且議所用藥。州正據姑熟溪北。土人但謂之姑溪。水色正綠。而澄澈如鏡。纖鱗往來可數。溪南皆漁家。景物幽奇。兩浮橋悉在城外。其一通宣城。其一可至浙中。姑熟堂最號得溪山之勝。適有客寓家其間。故不得至。又有一酒樓。登望尤佳。皆城之南也。往時溪流分一支貫城中。漚塞已久。近歲嘗浚治。然惟春夏之交暫通。今七月已絕流矣。李太白集。有姑熟十詠。予族伯父彥遠。嘗言東坡自黃州還。過當塗。讀之撫手大笑曰。賈物敗矣。豈有李白作此語者。郭功父爭以爲不然。東坡又笑曰。但恐是太白後身所作耳。功父甚愠。蓋功父少時。詩句俊逸。前輩或許之。以爲太白後身。功父亦遂以自負。故東坡因是戲之。或曰。十

詠及歸來乎。笑矣乎。僧伽歌。懷素草書歌。太白舊集本無之。宋次道再編時。貪多務得之過也。十四日晚晴。開南窗觀溪山。溪中絕多魚。時裂水面躍出。斜日映之。有如銀刀。垂釣挽罾者。彌望以故。價甚賤。僅使輩日皆饜飫。土人云。此溪水肥宜魚。及飲之。水味果甘。豈信以肥故多魚邪。溪東南數峯如黛。蓋青山也。十五日早。州學教授左文林郎吳博古敏叔。員外教授左文林郎楊恂信伯來。飯已。遊黃山東嶽廟廣福寺。遂登凌歊臺。嶽廟棟宇頗盛。本謂之黃山大監廟。大監者。不知何神。蓋淫祠也。今既爲嶽廟。而大監反寓食廡下。廣福本壽聖寺。以紹興壬午詔書改額。敗屋二十餘間。殘僧三四人。蕭然如古驛。主僧惠明。温州平陽人。凌歊臺。正如鳳皇兩花之類。特因山巔名之。宋高祖所營。面勢虛曠。高出氛埃之表。南望青山。龍山九井諸峯。如在几席。龍山卽孟嘉登高落帽處。九井山。有桓玄僭位壇。稍西。江中二小山相對。云東梁西梁也。北戶臨和州新城。樓櫓歷歷可辨。蓋自絕江至和州。財十餘里。李太白有黃山凌歊臺送族弟泛舟赴華陰詩。卽此地也。臺後有一塔。塔之後。又有亭。曰懷古云。余初至當塗。飲姑熟溪水。喜其甘滑。已而遍飲城中水。皆甘。蓋泉脈佳也。十六日。郡集於道院。歷遊城上亭榭。有坐歊亭。頗宜登覽。城濠皆植荷花。是夜。月白如晝。影入溪中。搖蕩如玉塔。始知東坡玉塔臥微瀾之句爲妙也。

## 卷四十五

### 入蜀記第三

十七日。郡集於青山李太白祠堂。二教授同集。祠在青山之西北。距山尙十五里。墓在祠後。有小岡阜起伏。蓋亦青山之別支也。祠莫知其始。有唐劉全白所作墓碣。及近歲張真甫舍人所作重修祠碑。太白烏巾白衣錦袍。又有道帽髦裘。侑食於側者。郭功甫也。早飯罷。遊青山。山南小市有謝玄暉故宅墓。今爲湯氏所居。南望平野極目。而環宅皆流泉奇石。青林文篠。真佳處也。遂由宅後登山。路極險峻。凡三四里。有兩道人持湯飲。迎勞於松石間。又里許。至一菴。老道人出迎。年七十餘。姓周。濰州人。居此山三十年。額頰如丹。鬚鬢無白者。又有李媪。八十矣。耳目聰明。談笑不衰。自言嘗得異人祕訣。菴前有小池。曰謝公池。水味甘冷。雖盛夏不竭。絕頂又有小亭。亦名謝公。

亭下視四山。如蛟龍奔放。爭赴川谷。絕類吾鄉舜山。但舜山之巔。豐沃夷曠。無異平陸。此所不及也。亭北望正對歷陽周生言。元顏亮入寇時。戰鼓之聲。震於山中云。夜歸舟次。已一鼓盡矣。坐間。信伯言桓温墓亦在近郊。有石獸石馬。製作精妙。又有碑。悉刻當時車馬衣冠之類。極可觀。恨不一到也。

十八日。小雨。解舟出姑熟溪。行江中。江溪相接。水清濁各不相亂。挽行夾中三十里。至大信口。泊舟。蓋自此出大江。須風便乃可行。往往連日阻風。兩小山夾江。卽東梁西梁。一名天門山。李太白詩云。兩岸青山相對出。孤帆一片日邊來。王文公詩云。崔嵬天門山。江水遶其下。梅聖俞云。東梁如仰蠶。西梁如浮魚。徐師川云。南人北人朝暮。東梁西梁今古山。皆得句於此也。水滸小兒賣菱芡蓮藕者甚衆。夜行堤上。觀月大信口。歐陽文忠公于役志。謂之帶星口。未詳孰是。于役志。蓋譏夷陵時所著也。

十九日。便風。過大小碣山。磯奇石巉絕。漁人依石挽罾。宛如畫圖。間所見過臬磯。在大江中。聳拔特起。有道士結廬其上。政和中。賜名寧淵觀。舊說臬磯有臬能害人。故得名。方郡縣奏乞觀額時。惡其名。因曰磯在水中。水常沃石。故曰澆磯。今觀屋亦二十餘間。然止一道人居之。相傳有二人。則其一輒死。故無敢往者。至蕪湖縣。泊舟吳波亭。知縣右通直郎呂昭問來。按漢丹陽郡有蕪湖縣。吳陸遜屯蕪湖。又杜預注春秋。楚子伐吳。克鳩茲。亦云在蕪湖。至東晉。乃改名于湖。不知所自。王敦反。屯于湖。今故城尙存。又有玩鞭亭。亦當時遺迹。唐温飛卿有湖陰曲。敘其事。近時張文潛以爲晉書所云帝至于湖。陰察營壘。當以于湖爲句。飛卿蓋誤讀也。作于湖曲以反之。劉夢得歷陽書事詩。敘道中事云。望夫人化石。夢帝日環營。蓋夢得自夔州移牧歷陽。過此邑也。邑人云。數年前。邑境有盜。發大墓。棺槨已壞。得鏡及刀劍之屬甚衆。斃塚有大將軍墓四字。或疑爲敦墓云。

二十日。寧國太平縣主簿左迪功郎陳炳來見。泛小舟往謝之。則寓寧淵觀下院。以提刑司檄來督大禮錢帛。寧淵在臬磯。隔大江。故置下院於近邑。道流十餘。壇宇像設甚盛。有觀主何守誠者。今遷居太一宮矣。炳字德先。婺州義烏人。自言其從姑得道。徽宗朝。賜號妙靜練師。結廬葛仙峯下。平生不火食。惟飲酒。嚼生果。爲人言禍福。死生。無毫釐差。每風日清和時。輒掩關獨處。或於戶外竊聽之。但聞若二嬰兒聲。或歌或笑。往往至中夜方止。莫有能測者。年九十。正旦。自言四月八日當遠行。果以是日坐逝。每爲德先言汝有仙骨。當遇異人。後因得疾。委頓有

皖山徐先生來餌以藥。卽日疾平。徐因留。教以絕粒。諍德先父母方望其成名。固不許。然自是絕滋味。日食淡湯餅及飯而已。如此者六年。益覺身輕。能日行二百里。會中第娶妻。復近葷血。徐遂告別。臨行。語德先曰。汝二紀後當復從我。究此事。德先送至谿上。方呼舟欲渡。徐褰裳疾行水上而去。呼之不覆應。德先至今悵恨。有棄官入瀾皖之意。予遂遊東寺。登王敦城以歸。城竝大江。氣象宏敞。邑出綠毛龜。就船賣者。不可勝數。將午。解舟。過三山磯。磯上新作龍祠。有道人半醉立巖崖峭絕處。下觀行舟。望之使人寒心。亦奇士也。江中江豚十數。出沒。色或黑或黃。俄又有物長數尺。色正赤。類大蜈蚣。奮首逆水而上。激水高三二尺。殊可畏也。宿過道口。

二十一日。過繁昌縣。南唐所置。初隸宣城。及置太平州。復割隸焉。晚泊荻港。散步堤上。遊龍廟。有老道人守之。台州仙居縣人。自言居此十年。日伐薪二束賣之。以自給。雨雪。則從人乞。未嘗他營也。又至一菴。僧言隔港卽銅陵界。遠山巖然。臨大江者。卽銅官山。太白所謂我愛銅官樂。千年未擬還。是也。恨不一到。最後至鳳凰山。延禧觀。觀廢於兵燹者四十餘年。近方興葺。羽流五六人。觀主陳廷瑞。婺州義烏縣人。言此古青華觀也。有趙先生。荻港市中人。父賣茗。先生幼名王九。年十三。疾亟。父抱詣青華。願使入道。是夕。先生夢老人引之登高山。謂曰。我陰翁也。出柏枝啗之。及覺。遂不火食。後又夢前老人。教以天篆數百字。比覺。悉記不遺。太宗皇帝召見。度爲道士。賜冠篋。易名自然。給裝錢遣還。遂爲觀主。祥符間。再召至京師。賜紫衣。改青華額曰延禧。先生懇求還山養母。得歸。一日。無疾而逝。門人葬之山中。行半途。棺忽大重。不可舉。其母曰。吾兒必有異。命發棺。果空無尸。惟劍履在耳。遂卽其處葬之。今塚猶在。謂之劍塚。自然。國史有傳。大概與廷瑞言頗合。惟劍塚一事無之。荻港蓋繁昌小墟市也。歸舟已夜矣。

二十二日。過大江。入丁家洲夾。復行大江。自離當塗。風日清美。波平如席。白雲青嶂。相遠映帶。終日如行圖畫。殊忘道塗之勞也。過銅陵縣不入。晚泊水洪口。江湖間謂分流處爲洪。王文公詩云。東江木落水分洪。是也。

二十三日。過陽山磯。始見九華山。九華本名九子。李太白爲易名。太白與劉夢得皆有詩。而劉至以爲可兼太華。女几之奇秀。南唐宋子嵩辭政柄。歸隱此山。號九華先生。封青陽公。由是九華之名益盛。惟王文公詩云。盤根離巨壯。其末乃修纖。最極形容之妙。大抵此山之奇。在修纖耳。然無含蓄敦大氣象。與廬阜天台異矣。岸傍荻花如



雪。舊見天井長老彥威云。廬山老僧用此絮紙衣。威少時在惠日。亦爲之。佛燈珣禪師見而大嘆云。汝少年。輒求溫暖如此。豈有心學道邪。退而問兄弟。則堂中百人。有荻花衣者。財三四。皆年七十餘矣。威愧恐。亟除去。泊梅根港。巨魚十數。色蒼白。大如黃犢。出沒水中。每出水輒激起。沸白成浪。真壯觀也。

二十四日。到池州。泊稅務亭子。州唐置。南唐嘗爲康化軍節度。今省。又嘗割青陽隸建康。今復故。惟所置銅陵東流二縣。及改秋浦爲黃池。今因之。蓋南唐都金陵。故當塗蕪湖銅陵繁昌廣德青陽并江寧上元溧陽溧水句容凡十一縣。皆隸畿內。今建康爲行都。而纔有江寧等五邑。有司所當議也。李太白往來江東。此州所賦尤多。如秋浦歌十七首。及九華山青溪白筍陂玉鏡潭諸詩是也。秋浦歌云。秋浦長似秋。蕭條使人愁。又曰。兩鬢入秋浦。一朝颯已衰。猿聲催白鬢。長短盡成絲。則池州之風物可見矣。然觀太白此歌。高妙乃爾。則知姑熟十詠。決爲贗作也。杜牧之池州諸詩正爾。觀之亦清婉可愛。若與太白詩竝讀。醇醜異味矣。初。王師平南唐。命曹彬分兵自荊州順流東下。以樊若冰爲鄉導。首克池州。然後能取蕪湖當塗。駐軍采石。而浮橋成。則池州今實要地。不可不備也。二十五日。見知州右朝議大夫直秘閣楊師中。通判右朝奉郎孫德錫。遊光孝寺。寺有西峯。聖者所留鐵笛。聖者生當吳武王楊行密時。陽狂不羈。好吹笛。能役鬼神蛟龍。嘗寓池州乾明寺。乾明卽光孝也。及去。留笛付主事僧。笛似銅鐵而非。色綠。而瑩潤如綠玉。不知何物。僧懼爲好事者所奪。郡官求觀之。輒出一凡鐵笛充數。予偶與監寺僧有舊。獨得一見。有石刻沈獻遠所作西峯銘。文辭古雅可愛。恨非其自書也。僧言貴池去城八十里。在秀山下。江之一支。別匯爲池。四隅皆因山石爲岸。產鯉魚。金鱗朱尾。味極美。本以此得貴池之名。秀山有梁昭明太子墓。拱木森然。今池州城西。有神甚靈者。曰九郎。或云九郎卽昭明晚登弄水亭。杜牧之所賦詩也。亭殊不葺。然正對清溪齊山。景物絕佳。州雖頗江。然據岡阜上。頗難得水。

二十六日。解舟。過長風沙羅刹石。李太白江上贈竇長史詩云。萬里南遷夜郎國。三年歸及長風沙。梅聖俞送方進士遊廬山云。長風沙浪屋許大。羅刹石齒水下排。歷此二險過湓浦。始見瀑布懸蒼崖。卽此地也。又太白長干行云。早晚下三巴。預將書報家。相迎不道遠。直到長風沙。蓋自金陵至此七百里。而望家來迎其夫。甚言其遠也。地屬舒州。舊最號湍險。仁廟時。發運使周懋役三十萬夫。疏支流十里以避之。至今爲行舟之利。羅刹石在大江

中正如京口鵬峯而稍大。白石拱起。其上叢篠喬木。亦有小神祠旂竿。不知何神也。西望羣山靡迤。巖嶂深秀。宛如吾廬。南望鏡中諸山。爲之累欬。宿懷家歎。懷姓也。吳有商書郎懷紱。見顧雍傳。

二十七日五鼓。大風自東北來。舟人不告。乘便風解船。過雁翅夾。有稅場。居民二百許家。岸下泊船甚衆。遂經皖口至趙屯未朝食。已行百五十里。而風益大。乃泊夾中。皖口卽王師破江南大將朱令贛水軍處。趙屯有戍兵。亦小市聚也。是日大風。至暮不止。登岸。行至夾口。觀江中驚濤駭浪。雖錢塘八月之潮不過也。有一舟掀簸浪中。欲入夾者再三。不可得。幾覆溺矣。號呼求救。久方能入。北望正見皖山。太白江上望皖公山詩云。巉絕稱人意。巉絕二字。不刊之妙也。南唐元宗南遷豫章。舟中望皖山。愛之。謂左右曰。此青峭數峯何名。答曰。舒州皖山。時方新失淮南。伶人李家明侍側。獻詩曰。龍舟千里颺東風。漢武潯陽事正同。回首皖公山色好。日斜不到壽盃中。元宗爲悲憤欬歎。故王文公詩云。南狩皖山非故地。北師淮水失名王。計其處。當去此不遠也。夜雨。

二十八日。過東流縣不入。自雷江口行大江。江南羣略。蒼翠萬疊。如列屏障。凡數十里不絕。自金陵以西。所未有也。是日。便風張颿。舟行甚速。然江面浩渺。白浪如山。所乘二千斛舟。搖兀掀舞。纔如一葉。過獅子磯。一名佛指磯。巖壁百尺。青林綠篠。倒生壁間。圖畫有所不及。猶恨舟行北岸。不得過其下。旁有數磯。亦奇峭。然皆非獅子比也。至馬當。所謂下元水府。山勢尤秀拔。正面山脚。直插大江。廟依峭崖。架空爲閣。登降者皆自閣。西崖腹小石徑。捫蘿側足而上。宛若登梯。飛甍曲檻。丹碧纒縵。江上神祠。惟此最佳。舟至石壁下。忽豎晦。風勢橫甚。舟人大恐失色。急下颿。趨小港。竭力牽挽。僅能入港。繫纜。同泊者四五舟。皆來助牽。早間同行一舟。亦蜀舟也。忽有大魚正綠。腹下赤如丹。躍起桅旁。高三尺許。人皆異之。是晚。果折樞破帆。幾不能全。亦可怪也。入夜。風愈厲。增十餘纜。迨曉。方少定。

二十九日。阻風馬當港中。風雨淒冷。初御被衣。有小舟冒風濤來。賣薪菜豨肉。亦有賣野蔬肉者。云獵蘆場中所得。飯已。發南岸。望馬當廟。北風吹人勁甚。至不能語。既暮。風少定。然怒濤未息。擊船終夜有聲。八月一日。過烽火磯。南朝自武昌至京口。列置烽燧。此山當是其一也。自舟中望山。突兀而已。及拋江過其下。嵌巖竇穴。怪奇萬狀。色澤瑩潤。亦與它石迥異。又有一石。不附山。傑然特起。高百餘尺。丹雘翠蔓。羅絡其上。如寶裝。

屏風。是日風靜。舟行頗遲。又秋深潦縮。故得盡見杜老所謂幸有舟楫遲。得盡所歷妙也。過澎浪磯。小孤山。二山東西相望。小孤屬舒州宿松縣。有戍兵。凡江中獨山。如金山。焦山。落星之類。皆名天下。然峭拔秀麗。皆不可與小孤比。自數十里外望之。碧峯巖然孤起。上干雲霄。已非它山可擬。愈近愈秀。冬夏晴雨。姿態萬變。信造化之尤物也。但祠宇極於荒殘。若稍飾以樓觀亭榭。與江山相發揮。自當高出金山之上矣。廟在山之西麓。額曰惠濟。神曰安濟夫人。紹興初。張魏公自湖湘還。嘗加營葺。有碑載其事。又有別祠在澎浪磯。屬江州彭澤縣。三面臨江。倒影水中。亦占一山之勝。舟過磯。雖無風。亦浪湧。蓋以此得名也。昔人詩有舟中估客莫漫狂。小姑前年嫁彭郎之句。傳者因謂小孤廟有彭郎像。澎浪廟有小姑像。實不然也。晚泊沙夾。距小孤一里。微雨。復以小艇遊廟中。南望彭澤都昌諸山。煙雨空濛。鷗鷺滅沒。極登臨之勝。徙倚久之而歸。方立廟門。有俊鶻搏水禽。京江東南去。甚可壯也。廟祝云。山有棲鶻甚多。

二日早。行未二十里。忽風雲騰湧。急繫纜。俄復開繫。遂行泛彭蠡口。四望無際。乃知太白開帆入天鏡之句爲妙。始見廬山及大孤。大孤狀類西梁。雖不可擬小姑之秀麗。然小孤之旁。頗有沙洲葭葦。大孤則四際渺瀰。皆大江望之如浮水面。亦一奇也。江自湖口分一支爲南江。蓋江西路也。江水渾濁。每汲用。皆以杏仁澄之。過夕乃可飲。南江則極清澈。合處加引繩。不相亂。晝抵江州。州治德化縣。卽唐之潯陽縣。柴桑栗里。皆其地也。南唐爲奉化軍節度。今爲定江軍。岸土赤而壁立。東坡先生所謂舟人指點岸如頰者也。泊湓浦。水亦甚清。不與江水亂。自七月二十六日至是。首尾財六日。其間一日阻風不行。實以四日半泝流行七百里云。

三日。移泊琵琶亭。見知州左朝請。耶周昇。強仲通。判左朝散。耶胡适。發運使。戶部侍郎。史正志。志道。發運司幹辦。公事程坦。履道。察推左文林。耶蔡。戡。定夫。始得夔州公移。

四日。遊天慶觀。李太白詩所謂溇陽紫極宮也。蘇黃詩刻。皆不復存。太白詩有一石。亦近時俗書。見觀主李守智。問玉芝。亦不能答。觀皆古屋。初不更兵燹。而遺迹掃地。獨太清殿老君像。乃唐人所塑。特爲奇古。真人女真仙官力士童子各二軀。又有唐明皇帝金銅像。衣冠如道士。而氣宇粹穆。有五十年安享太平富貴氣象。李守智者。隸州來安人。自言家故富饒。遇亂棄家爲道人。大將岳飛以度牒與之。始爲道士。至今畫岳氏父子事之。史志道招

飲於發運廳中。登高遠亭。望廬山。天氣澄霽。諸峯盡見。志道出新鼓鑄鐵錢。

五日。郡集於庾樓。樓正對廬山之雙劍峯。北臨大江。氣象雄麗。自京口以西。登覽之地多矣。無出庾樓右者。樓不甚高。而覺江山煙雲。皆在几席間。真絕景也。庾亮嘗爲江荆豫州刺史。其實則治武昌。若武昌南樓名庾樓。猶有理。今江州治所。在晉特柴桑縣之湓口關耳。此樓附會甚明。然白樂天詩固已云。潯陽欲到思無窮。庾亮樓南湓口東。則承誤亦久矣。張芸叟南遷錄云。庾亮鎮潯陽。經始此樓。其誤尤甚。

六日甲夜。有大燈毬數百。自湓浦蔽江而下。至江面廣處。分散漸遠。赫然如繁星麗天。土人云。此乃一家放五百。椀以禳災祈福。蓋江鄉舊俗云。

七日。往廬山。小憩新橋市。蓋吳蜀大路。市肆壁間。多蜀人題名。並溪橋木。往往皆三二百年物。蓋山之麓也。自江州至太平興國宮三十里。此適當其半。是日。車馬及徒行者。憧憧不絕。云上觀。蓋往太平宮焚香。自八月一日至七日乃已。謂之白蓮會。蓮社本遠法師遺迹。舊傳遠公嘗以一日借道流。故至今太平宮歲以爲常。東林寺亦自作會。然來者反不若太平之盛。亦可笑也。晚至清虛菴。菴在撥雲峯下。皇甫道人所居。皇甫名坦。嘉州人。出遊旁郡。獨見其弟子曹彌深。登紹興煥文閣。寶藏光堯皇帝御書。又有神泉清虛堂。皆宸翰題榜。宿清虛西室。曹君置酒堂中。炙鹿肉甚珍。酒尤清醇。夜寒。可耐火。

## 卷四十六

### 入蜀記第四

八日早。由山路至太平興國宮。門庭氣象極闊壯。正殿爲九天采訪使者像。袞冕如帝者。舒州灊山靈仙觀。祀九天司命真君。而采訪使者爲之佐。故南唐名靈仙曰丹霞府。太平曰通玄府。崇奉有自來矣。至太宗皇帝時。嘗遣中使送泥金絳羅雲鶴帔。仍命三年一易。神宗皇帝時。又加封應元保運真君。及賜塗金殿額。兩壁圖十真人。本吳生筆。建炎中。李成何世清二盜。以廬山爲巢。宮屋焚蕩無餘。先是山中有太一宮。摹吳筆於殿廡。及太平再興。復摹取太一本。所託非善工。無復髣髴。憩於雲無心堂。蓋冷翠亭故趾也。僂聲如大風雨。至使人毛骨寒慄。一宮

之最勝處也。采訪殿前有鐘樓，高十許丈，三層，累磚所成，不用一木，而欄檣聲飛，雖木工之良者，不能加也。但鐘爲磚所揜蔽，聲不甚揚，亦是一病。觀主胡思齋云：此一樓爲費三萬緡，鐘重二萬四千餘斤，又有經藏亦佳，扁曰雲章瓊室，太平規模，大概類南昌之玉隆。然玉隆不經焚，尙有古趣，爲勝也。遂至東林，太平興龍寺，寺正對香爐峯，峯分一支東行，自北而西，環合四抱，有如城郭。東林在其中，相地者謂之倒掛龍格。寺門外虎溪，本小澗，比年甃以磚，但若一溝，無復古趣。予勸其主僧法才去磚，使少近自然，不知能用吾言否。食已，復觀音泉啜茶，登華嚴羅漢閣，閣與盧舍閣鐘樓鼎峙，皆極天下之壯麗。雖閩浙名藍，所不能逮。遂至上方五杉閣，舍利塔，白公草堂。上方者，自寺後支徑，穿松陰，躡石磴而上，亦不甚高。五杉閣前，舊有老杉五本，傳以爲晉時物。白傳所謂大十尺圍者，今又數百年，其老可知矣。近歲，主僧了然輒伐去，殊可惜也。塔中作如來示寂像，本宋佛馱跋陀尊者，自西域持舍利五粒來葬於此草堂，以白公記考之，略是故處。三間兩注，亦如記所云。其他如瀑水蓮池，亦皆在高風逸韻，尙可想見。白公嘗以文集留草堂，後屢亡逸，真宗皇帝嘗令崇文院寫校，包以斑竹帙，送寺，建炎中又壞於兵。今獨有姑蘇版本一帙，備故事耳。草堂之旁，又有一故趾，云是王子醇樞密菴基。蓋東林爲禪苑，始於王公，而照覺禪師常總實第一祖，總公有塑像，殿重英特人也。宿東林。

九日，至晉慧遠法師祠堂，及神運殿焚香。憩官廳堂中，有耶舍尊者劉遺民等十八人像，謂之十八賢，遠公之側，又有一人執軍持侍立，謂之辟蛇童子。傳云：東林故多蛇，此童子盡拾取，投之蘄州。神運殿本龍潭，深不可測，一夕鬼神塞之，且運良材以作此殿，皆不知實否也。然神運殿三字，唐相裴休書，則此說亦久矣。官廳重堂，邃廡廚，廡備設，壁間有張文潛題詩，寺極大，連日遊歷，猶不能徧。唐碑亦甚多，惟顏魯公題名最爲時所傳。又有聰明泉，在方丈之西，卓錫泉，在遠公祠堂後，皆久廢不汲，不可食，爲之太息。食已，游西林乾明寺。西林在東林之西，二林之間，有小市曰雁門市，傳者以爲遠公雁門人，老而懷故鄉，遂髣髴雁門邑里。作此市，漢作新豐之比也。西林本晉江州刺史陶範捨地建寺，紹興十五六年間，方爲禪居，編小非東林比，又絕弊壞。主僧仁聰，閩人，方漸興葺，然流泉冷泠，環遶庭際，殊有野趣。正殿釋迦像，著寶冠，他處未見。僧云：唐塑也。殿側有慧永法師祠堂，永公蓋遠公之兄，像下一虎偃伏，又有一居士立侍，不知何人。方丈後有塔，不甚高，制度古樸，予登二級而止。東廡有小閣。

曰侍賢。蓋往時館客之地。今亦頽弊。東西林寺舊額。皆牛奇章八分書。筆力極渾厚。西林亦有顏魯公題名。書家以爲二林題名。顏書之冠冕也。舊聞廬山天池塔塔初成。有僧施經二匣。未幾塔震一角。經亦失所在。是日因登望以問僧。僧云誠然。或謂經乃刺血書。故致此異。又云。今年天池火。尺椽不遺。蓋旁野火所及也。晚復取太平宮路還江州。小憩於新亭。距州二十五里。過董真人煉丹井。汲飲。味亦佳。董真人者。奉也。

十日。史志道餉谷簾水數器。真絕品也。甘腴清冷。具備衆美。前輩或斥水品以爲不可信。水品固不必盡當。然谷簾卓然非惠山所及。則亦不可誣也。水在廬山景德觀。晚別諸人。連夕在山中。極寒。可擁爐。比還舟。秋暑殊未艾。終日揮扇。

十一日。解舟。吳發幹約待夔州書。因小留江口。望廬山。自到江州。至是凡十日。皆晴。秋高氣清。長空無纖雲。甚宜登覽。亦客中可喜事也。泊赤沙湖口。東北望。猶見廬山。老杜潭州道林詩云。脚插入赤沙湖。此湖當在湖南。然岳州華容縣及此。皆有赤沙湖。蓋江湖間地名多同。猶赤壁也。

十二日。江中見物。有雙角。遠望正如小犢。出沒水中有聲。晚泊牂臍嶽。隔江大山中。有火兩點若燈。開闔久之。問舟人。皆不能知。或云蛟龍之目。或云靈芝丹藥光氣。不可得而詳也。

十三日。至富池昭勇廟。以壺酒特豕。謁昭毅武惠遺愛靈顯王神。神。吳大帝時折衝將軍甘興霸也。興霸嘗爲西陵太守。故廟食於此。開寶中。旣平江南。增江淮神祠封爵。始封襄國公。宣和中。進爵爲王。建炎中。大盜張遇。號一窩蜂。擁兵過廟下。相率卜筮。一玦騰空中不下。一玦躍出戶外。羣盜惶恐引去。未幾遂敗。大將劉光世以聞。復詔加封。岳飛爲宣撫使。大葺祠宇。江上神祠。皆不及也。門起大樓曰卷雪。有釘洲正對廟。故廟雖俯大江。而可泊舟。釘洲者。以銳下得名。神妃封順祐夫人。神二子。封紹威紹靈侯。神女封柔懿夫人。皆有像。而後殿復有王與妃像。偶坐。祭享之盛。以夜繼日。廟祝歲輸官錢千二百緡。則神之靈可知也。舟人云。若精虔致禱。則神能分風以應。往來之舟。廡下有關雲長像。雲長不應祀於興霸之廟者。豈各忠所事。神靈共食。皆可以無媿邪。徹奠。自祠後步至旌教祠。寺爲酒務及酒官廨。像設斂置一屋。盡逐去僧輩。亦事之已甚者。富池蓋隸興國軍。

十四日。曉雨。過一小石山。自頂直削去半。與餘姚江濱之蜀山絕相類。拋大江。遇一木杙。廣十餘丈。長五十餘丈。

上有三四十家。妻子雞犬白碓皆具。中爲阡陌相往來。亦有神祠。素所未覩也。舟人云。此尙其小者耳。大者於楸上鋪土作蔬圃。或作酒肆。皆不復能入夾。但行大江而已。是日。逆風挽船。自平旦至日昃。纔行十五六里。泊劉官磯旁。蘄州界也。兒輩登岸。歸云。得小徑。至山後。有陂湖渺然。蓮芰甚富。沿湖多木芙蓉。數家夕陽中。蘆藩旁舍。宛有幽致。而寂然無人聲。有大梨。欲買之。不可得。湖中小艇采菱。呼之亦不應。更欲窮之。會見道旁設機。疑有虎狼。遂不敢往。劉官磯者。傳云漢昭烈入吳。嘗檣舟於此。晚觀大龜浮沉水中。

十五日。微陰。西風益勁。挽船尤艱。自富池以西。沿江之南。皆大山起伏如濤頭。山麓時有居民。往往作棚。持弓矢伏其上。以伺虎。過龍眼磯。江中拳石耳。磯旁山上有龍祠。晡後。得便風。次蘄口鎮。居民繁錯。蜀舟泊岸下甚衆。監稅乘義郎高世棟來。舊在京口識之。言此鎮歲課十五萬緡。雁翅歲課二十六萬緡。夜與諸子登岸。臨大江觀月。江面遠與天接。月影入水。蕩搖不定。正如金虬。動心駭目之觀也。是日。買熟藥於蘄口市。藥貼中皆有煎煑所須。如薄荷烏梅之類。此等皆客中不可倉卒求者。藥肆用心如此。亦可嘉也。

十六日。過新野夾。有石瀨茂林。始聞秋鶯。沙際水牛至多。往往數十爲羣。吳中所無也。地屬興國軍大治縣。當是土產所宜爾。晚過道士磯。石壁數百尺。色正青。了無竅穴。而竹樹迸根。交絡其上。蒼翠可愛。自過小孤。臨江峯嶂。無出其右。磯一名西塞山。卽玄真子漁父辭所謂西塞山前白鷺飛者。李太白送弟之江東云。西塞當中路。南風欲進船。必在荆楚作。故有中路之句。張文潛云。危磯插江生。石色擘青玉。殆爲此山寫真。又云。已逢斌媚散花峽。不泊艱危道士磯。蓋江行惟馬當及西塞。最爲湍險難上。拋江泊散花洲。洲與西塞相直。前一夕。月猶未極圓。蓋望正在是夕。空江萬頃。月如紫金盤。自水中涌出。平生無此中秋也。

十七日。過回風磯。無大山。蓋江濱石磧耳。然水急浪湧。舟過甚艱。過蘭溪。東坡先生所謂山下蘭芽短。浸谿者。買鹿肉供膳。晚泊巴河口。距黃州二十里。一市聚也。有馬祈寺。吳大帝刑馬壇。傳云吳攻壽春。刑白馬祭江神於此。自蘭谿而西。江面尤廣。山阜平遠。兩日皆逆風。舟人以食盡。欲來巴河糴米。極力牽挽。日皆行八九十里。蘇黃門譚高安。東坡先生送至巴河。卽此地也。張文潛亦有巴河道中詩云。東南地缺天連水。春夏風高浪捲山。十八日。食時方行。晡時至黃州。州最僻陋。少事杜牧之。所謂平生睡足處。雲夢澤南州。然自牧之王元之出守。又

東坡先生張文潛謫居。遂爲名郡。泊臨臯亭。東坡先生所嘗寓。與秦少游書。所謂門外數步卽大江是也。煙波渺然。氣象疎豁。見知州右朝奉郎直祕閣楊由義。通判右奉議郎陳紹復。州治陋甚。廳事僅可容數客。倅居差勝。晚菘舟竹園步。蓋臨臯多風濤。不可夜泊也。黃州與樊口正相對。東坡所謂武昌樊口幽絕處也。漢昭烈用吳魯子敬策。自當陽進駐鄂縣之樊口。卽此地也。

十九日。早游東坡。自州門而東。岡壘高下。至東坡。則地勢平曠開豁。東起一壟。頗高。有屋三間。一龜頭。曰居士亭。亭下面南。一堂頗雄。四壁皆畫。雲堂中有蘇公像。烏帽紫裘。橫按筇杖。是爲雲堂。堂東大柳。傳以爲公手植。正南有橋。榜曰小橋。以莫忘小橋流水之句得名。其下初無渠澗。遇雨則有涓流耳。舊止片石布其上。近輒增廣爲木橋。覆以一屋。頗敗人意。東一井曰暗井。取蘇公詩中走報暗井出之句。泉寒熨齒。但不甚甘。又有四望亭。正與雲堂相直。在高阜上。覽觀江山。爲一郡之最。亭名見蘇公及張文潛集中。坡西竹林。古氏故物。號南坡。今已殘伐無幾。地亦不在古氏矣。出城五里。至安國寺。亦蘇公所嘗寓。兵火之餘。無復遺迹。惟遠寺茂林啼鳥。以猶有當時氣象也。郡築於樓霞樓。本太守閻丘孝終公顯所作。蘇公樂府云。小舟橫截春江。臥看翠壁紅樓起。正謂此樓也。下臨大江。煙樹微茫。遠山數點。亦佳處也。樓頗華潔。先是郡有慶瑞堂。謂一故相所生之地。後毀以新此樓。酒味殊惡。蘇公瀟湯蜜汁之戲。不虛發。郡人何斯舉詩亦云。終年飲惡酒。誰敢憎督郵。然文潛乃極稱黃州酒。以爲自京師之外。無過者。故其詩云。我初謫官時。帝問司酒神。曰此好飲徒。聊給酒養真。去國一千里。齊安酒最醇。失火而得雨。仰哉天公仁。豈又潛謫黃時。適有佳匠乎。循小徑繚州宅之後。至竹樓。規模甚陋。不知當王元之時。亦止此。樓下荒草。卽赤壁磯。亦荊岡爾。略無草木。故韓子蒼待制詩云。豈有危巢與栖鶻。亦無陳迹但飛鷗。此磯。圖經及傳者。皆以爲周公瑾敗曹操之地。然江上多此名。不可考實。李太白赤壁歌云。烈火張天照雲海。周瑜於此敗曹公。不指言在黃州。蘇公尤疑之。賦云。此非曹孟德之困於周郎者乎。樂府云。故壘西邊。人道是當日周郎赤壁。蓋一字不輕下如此。至韓子蒼云。此地能令阿瞞走。則真指爲公瑾之赤壁矣。又黃人竇謂赤壁曰赤鼻。尤可疑也。晚復移舟菜園步。又遠竹園三四里。蓋黃州臨大江。了無港澳可泊。或云舊有澳。郡官厭過客。故塞之。二十日曉。離黃州。江平無風。挽船正自赤壁磯下過。多奇石。五色錯雜。粲然可愛。東坡先生怪石供是也。挽行十



四五里。江面始稍狹。隔江岡阜延袤。竹樹葱蒨。漁家相映。幽邃可愛。復出大江。過三江口。極望無際。泊戚磯港。二十一日。過雙柳夾。回望江山。遠山重復深秀。自離黃。雖行夾中。亦皆曠遠。地形漸高。多種菽粟蕎麥之屬。晚泊楊羅墩。大隄高柳。居民稠衆。魚賤如土。百錢可飽二十口。又皆巨魚。欲覓小魚飼貓。不可得。

二十二日。平旦微雨。過青山磯。多碎石及淺灘。晚泊白楊夾口。距鄂州三十里。陸行止十餘里。居民及泊舟甚多。然大抵皆軍人也。

二十三日。便風掛帆。自十四日至是。始得風。食時至鄂州。泊稅務亭。賈船客舫。不可勝計。銜尾不絕者數里。自京口以西。皆不及。李太白贈江夏韋太守詩云。萬舸此中來。連帆過揚州。蓋此郡自唐爲衝要之地。夔州逐兵來參。見知州右朝奉郎張郟之彥。轉運判官右朝奉大夫謝師稷。市邑雄富。列肆繁錯。城外南市亦數里。雖錢塘建康不能過。隱然一大都會也。吳所都武昌。乃今武昌縣。此州在吳名夏口。亦要害。故周公瑾求以精兵進住夏口。而晉武帝亦詔王濬唐彬。既定巴丘。與吳奮王戎共平夏口。武昌順流長驚也。自江州至此七百里。溯流。雖日得便風。亦須三四日。韓文公云。益城去鄂渚。風便一日耳。過矣。蓋退之未嘗行此路也。

二十四日。早。謝漕招食於漕園光華堂。依山亭館十餘。不甚葺。晚郡集於奇章堂。以唐牛思黯嘗爲武昌節度使也。

二十五日。觀大軍教習水戰。大艦七百艘。皆長二三十丈。上設城壁樓櫓。旗幟精明。金鼓鞞鞞。破巨浪往來。捷如飛翔。觀者數萬人。實天下之壯觀也。

二十六日。與統紆同遊頭陀寺。寺在州城之東隅石城山。山繚繞如伏蛇。自西亘東。因其上爲城。缺壞僅存。州治及漕司。皆依此山。寺毀於兵火。汴僧舜廣。住持三十年。與葺略備。自方丈西北躡支徑。至絕頂。舊有奇章亭。今已廢。四顧江山井邑。靡有遺者。李太白江夏贈韋南陵詩云。頭陀雲外多僧氣。正謂此寺也。黃魯直亦云。頭陀全盛時。宮殿梯空級。藏殿後有南齊王簡棲碑。唐開元六年建。蘇州刺史張庭圭溫玉書。韓熙載撰碑陰。徐鉉題額。最後云。唐歲在己巳。武昌軍節度觀察留後知軍州事楊守忠重立。前鄂州唐年縣主簿秘書省正字韓夔書。碑陰云。乃命猶子夔。正其舊本而刊寫之。以是知夔爲熙載兄弟之子也。碑字前後一手。又作溫字不全。蓋南唐母徐

過爲義祖而避其名。則此碑蓋襲重書也。碑陰又云皇上鼎新文物。教被華夷。如來妙旨。悉已徧窮。百代文章。罔不備舉。故是寺之碑。不言而興。按此碑立於己巳歲。當皇朝之開寶二年。南唐危蹙日甚。距其亡六年爾。熙載大臣。不以覆亡爲懼。方且言其主鼎新文物。教被華夷。固已可怪。又以窮佛旨。舉遺文。及興是碑爲盛。誇誕妄謬。真可爲後世發笑。然熙載死。李主猶恨不及相之。君臣之惑如此。雖欲久存。得乎。唐制。節度使不在鎮。而以副大使或留後居任。則云知節度事。此云知軍州事。蓋漸變也。唐年縣。本故唐時名。梁攻曰臨夏。後唐復。晉又改臨江。然歷五代。鄂州未嘗屬中原。皆遙改耳。故此碑開寶中建。而猶曰唐年也。至江南平。始改崇陽云。簡棲爲此碑。駢儷卑弱。初無過人。世徒以載於文選。故貴之耳。自漢魏之間。駢儷爲此體。極於齊梁。而唐尤貴之。天下一律。至韓吏部柳柳州。大變文格。學者翕然慕從。然駢儷之作。終亦不衰。故熙載錯號江左辭宗。而拳拳於簡棲之碑如此。本朝楊劉之文。擅天下。傳夷狄。亦駢儷也。及歐陽公起。然後掃蕩無餘。後進之士。雖有工拙。要皆近古。如此碑者。今人讀不能終篇。已坐睡矣。而況效之乎。則歐陽氏之功。可謂大矣。若魯直云。惟有簡棲碑。文章巋然立。蓋戲也。

## 卷四十七

### 入蜀記第五

二十七日。郡集於南樓。在儀門之南石城上。一曰黃鶴山。制度闊偉。登望尤勝。鄂州樓觀爲多。而此獨得江山之要會。山谷所謂江東湖北行畫圖。鄂州南樓天下無是也。下闕南湖。荷葉彌望。中爲橋。曰廣平。其上皆列肆。兩旁有水閣極佳。但以賣酒。不可往。山谷云。凭欄十里芰荷香。謂南湖也。是日早。微雨。晚晴。

二十八日。同章冠之秀才甫。登石鏡亭。訪黃鶴樓故址。石鏡亭者。石城山一隅。正枕大江。其西與漢陽相對。止隔一水。人物草木可數。唐沔州治漢陽縣。故李太白沔州泛城南郎官湖詩序云。白遷於夜郎。遇故人尙書郎張謂。出使夏口。沔州牧杜公。漢陽令王公。觴於江城之南湖。其後沔州廢。漢陽以縣隸鄂州。周世宗平淮南。得其地。復以爲軍。太白詩云。誰道此水廣。狹如一疋練。江夏黃鶴樓。青山漢陽縣。大語猶可聞。故人難可見。形容最妙。黃魯直嘗征江夏縣。睡起漢陽城。亦此意。老杜有公安送李晉肅入蜀。余下沔鄂。及登舟將適漢陽詩。而卒於耒水。可

恨也。漢陽負山帶江。其南小山有僧寺者。大別山也。又有小別。謂之二別云。黃鶴樓。舊傳費禕飛升於此。後忽乘黃鶴來歸。故以名樓。號爲天下絕景。崔灝詩最傳。而太白奇句。得於此者尤多。今樓已廢。故址亦不復存。問老吏云。在石鏡亭南樓之間。正對鸚鵡洲。猶可想見其地。樓榜李監篆。石刻獨存。太白登此樓。送孟浩然詩云。孤帆遠映碧山盡。惟見長江天際流。蓋帆樯映遠山。尤可觀。非江行久。不能知也。復與冠之出漢陽門遊仙洞。止是石壁數尺。皆直裂無洞穴之狀。舊傳有仙人隱其中。嘗啓洞出游。老兵遇之。得黃金數餅。後化爲石。東坡先生有詩紀其事。初不云所遇何人。且太白固已云。頗聞列仙人。於此學飛術。一朝向蓬海。千載空石室。今鄂人謂之呂公洞。蓋流俗附會也。有道人。澶州人。結廬洞側。設呂公像其中。洞少南。卽石鏡山麓。巖頑石也。色黃赤。皴駁了不能鑑物。可謂浪得名者。由江濱堤上還船。民居市肆。數里不絕。其間復有巷陌。往來憧憧如織。蓋四方商賈所集。而蜀人爲多。

二十九日早。有廣漢僧世全。左縣僧了證。來附從人舟。日昃。移舟江口。回望堤上。樓閣重複。燈火歌呼。夜分乃已。招醫趙隨爲靈照視脈。

三十日。黎明離鄂州。便風掛颿。沿鸚鵡洲南行。洲上有茂林神祠。遠望如小山。蓋稱正平被殺處。故太白詩云。至今芳洲上。蘭蕙不敢生。梁王僧辯擊邵陵王綸軍至鸚鵡洲。卽此地也。自此以南爲漢水。禹貢所謂嶓冢導漢。東流爲漢者。水色澄澈可鑑。太白云。楚水清若空。蓋言此也。過謝家磯。金雞嶼。磯不甚高。而石皆橫裂。如累層甃。得縮項鱸魚。重十斤。嶼中有聚落。如小縣。出鱸魚。居民率以賣鮓爲業。晚泊通濟口。自此入沌。沌讀如篆。字書云。水名。在江夏。過九月。則沌涸不可行。必由巴陵至荊渚。

九月一日。始入沌。實江中小夾也。過新潭。有籠祠。甚華潔。自是遂無復居人。兩岸皆葭葦彌望。謂之百里荒。又無挽路。舟人以小舟引百丈。入夜財行四十五里。泊叢葦中。平時行舟。多於此遇盜。通濟巡檢持兵來警邏。不寐達旦。

二日。東岸葦稍薄缺。時見大江渺瀰。蓋巴陵路也。晴時。次下郡。始有二十餘家。皆業漁釣。蘆藩茅屋。宛有幽致。魚尤不論錢。自此始復有挽路。登舟背望。竟陵遠山。泊白白。有莊居數家。門外皆古柳侵雲。

三日。自入沌。食無菜。是日。始得菘及蘆菹。然不肯斲根。皆刈葉而已。過八疊湫口。皆有民居。晚泊歸子保。亦有十餘家。多桑柘榆柳。

四日。平旦。始解舟。舟人云。自此陂澤深阻。虎狼出沒。未明而行。則挽卒多爲所害。是日早。見舟人焚香祈神。云。告紅頭須小使頭長年三老。莫令錯呼錯喚。問何謂長年三老。云。梢工是也。長讀如長幼之長。乃知老杜長年三老。長歌裏。白晝攤錢高浪中之語。蓋如此。因問何謂攤錢。云。博也。按梁冀能意錢之戲。注云。卽攤錢也。則攤錢之爲博。亦信矣。過網步。有二十餘家。在夕陽高柳中。短籬曬簪。小艇往來。正如畫圖所見。沌中之最佳處也。泊畢家池。地勢爽塏。居民頗衆。有一二家。雖茆茨結廬。而窗戶整潔。藩籬堅壯。舍傍有果園甚盛。蓋亦一聚之雄也。與諸子及二僧步登岸。遊廣福永固寺。闕然無一人。東偏白雲軒前。橙方結實。雖小而極香。相與烹茶破橙。抵暮乃還舟中。畢家池。蓋屬復州玉沙縣滄浪鄉云。

五日。泊紫湄。

六日。過東場。並水皆茂竹高林。隄淨如掃。雞犬閑暇。鶯鳴浮沒。人往來林樹間。亦有臨渡喚船者。使人悅然。如造異境。舟人云。皆村豪園廬也。泊雞鳴。

七日。泊漣江。

八日。早。次江陵之建寧鎮。蓋沌口也。晉王澄棄荊州。別駕郭舒不肯從。澄東下。乃留屯沌口。陳侯安都討王琳至沌口。皆此地也。阻風。大魚浮水中無數。凡行沌中七日。自是泛江。入石首縣界。夜觀隔江燒蘆場。煙焰亘天如火。城光照舟中皆赤。

九日。早。謁后土祠。道旁民屋。苦茆皆厚尺餘。整潔無一枝亂。挂帆拋江行三十里。泊塔子磯。江濱大山也。自離鄂州。至是始見山。買羊置酒。蓋村步以重九故。屠一羊。諸舟買之。俄頃而盡。求菊花於江上人家。得數枝。芬馥可愛。爲之頹然徑醉。夜雨極寒。始覆絮衾。

十日。阻風雨。遣小舟橫絕江面。至對岸買肉食。得大魚之半。又得一烏牡雞。不忍殺。畜於舟中。俄有村翁持茭菹一束來餉。不肯受直。遣人先之。晚晴。開船窗觀月。

十一日舟行。望西南一角。水與天接。舟人云。是爲潛軍港。古嘗潛軍伺敵於此。遙見港中有兩點正黑。疑其遠樹。則下不屬地。久之。漸近可辨。蓋二千五百斛大舟也。又有水禽雙浮江中。色白類鵝而大。楚人謂之天鵝。飛鷲絕高。有弋得者。味甚美。或曰。卽鵠也。泊三江口。水淺。舟行甚艱。自此遂不復有山。太白詩。山隨平野盡。江入大荒流。蓋荊渚所作也。

十二日。過石首縣。不入。石首自唐始爲縣。在龍蓋山之麓。下臨漢水。亦形勝之地。杜子美有送石首薛明府詩。卽此邑也。泊藕池。

十三日。泊柳子。夜過全證二僧舟中。聽誦梵語般若心經。此經惟蜀僧能誦。

十四日。次公安。古所謂油口也。漢昭烈駐軍。始更今名。規模氣象甚壯。兵火之後。民居多茆竹。然茆屋尤精緻可愛。井邑亦頗繁富。米斗六七十錢。知縣右儒林郎周謙孫來。湖州人。游二聖報恩光孝禪寺。二聖謂青葉髻如來。婁至德如來也。皆示鬼神力士之形。高二丈餘。陰威凜然可畏。正殿中爲釋迦。右爲青葉髻。號大聖。左爲婁至德。號二聖。三像皆南面。予按藏經。駒字函娑羅浮殊童子成道。爲青葉髻如來。青葉髻如來再出世。爲婁至如來。則二如來本一身耳。有碑言邑人一夕同夢二神人。言我青葉髻婁至德如來也。有二巨木。在江干。我所運者。俟鄣行者來。令刻爲我像。已而果有人自稱鄣行者。又善肖像。邑人欣然請之。像成人。皆謂酷類所夢。然碑無年月。不知何代也。長老祖殊。南平軍人。寺後有廢城。髣髴尙存。圖經謂之呂蒙城。然老杜乃曰。地曠呂蒙營。江深劉備城。蓋玄德子明。皆屯於此也。老杜曉發公安詩。注云。數月憩息此縣。按公移居公安詩云。水煙通徑草。秋露接園葵。而留別公安太易沙門詩云。沙村白雪仍含凍。江縣紅梅已放春。則是以秋至此縣。暮冬始去。其曰數月憩息。蓋爲此也。泊拜節亭。馴鷗低飛往來。竟日不去。

十五日。周令說縣本在近。北枕漢水。沙虛岸摧。漸徙而南。今江流。乃昔市邑也。又云。縣有五鄉。然共不及二千戶。地曠民寡如此。民耕尤苦。隄防數壞。歲歲增築不止。晚攜家再遊二聖寺。衆寮有維摩刻木像。甚佳。云沙市工人所爲也。方丈西有竹軒。頗佳。珠老說五祖法演禪師。初住四面山。子然獨處。凡二年。始有一道士來問道。乃請作知事。又三年。僧寶良來。與道士朝夕參叩。皆得法。於是演公之道。寔爲人知。而四方學者。始稍有至者。雖其後門。

人之盛稱天下。然終身不過數十衆。珠聞此於其師已菴禪師。荊州絕無禪林。惟二聖而已。然蜀僧出關。必走江浙。回者又已。自謂有得。不復參叩。故語云。下江者疾走如煙。上江者鼻孔撩天。徒勞他二佛打供。了不見一僧坐禪。

十六日。過白湖。渺然無津。拋江至升子舖。有天鵝數百。翔泳水際。日入。泊沙市。自公安至此六十里。自此至荆南陸行十里。舟不復進矣。老杜詩云。買薪猶白帝。鳴榔已沙頭。劉夢得云。沙頭檣干上。始見春江闊。皆謂此也。

十七日。日入後。遷行李過嘉州趙青船。蓋入峽船也。沙市堤上居者。大抵皆蜀人。不然。則與蜀人爲婚姻者也。

十八日。見知府賓政殿學士劉恭父珙。通判右奉議郎權嗣衍。左宣教郎陳孺。荆南。圖經以爲楚之郢都。梁元帝亦嘗都焉。唐爲江陵府。荆南節度。今因之。然牧守署銜。但云知荆南軍府。與永興河陽正同。初無意義。但沿舊而已。

十九日。郡集於新橋馬監。監在西門外四十里。自出城。卽黃茅彌望。每十餘里。有村疇數家而已。道遇數十騎。縱獵獲狐兔。皆繫鞍上。割鮮藉草而飲。云襄陽軍人也。是日極寒如窮冬。土人云。此月初。已嘗有雪。

二十日。倒檣竿。立牘牀。蓋上峽惟用牘及百丈。不復張帆矣。百丈以巨竹四破爲之。大如人臂。予所乘千六百斛舟。凡用牘六枝。百丈兩車。

二十一日。劉帥丁內艱。分趲兵之半負肩輿。自山路先歸夔州。是日。重霧四塞。

二十二日。五鼓。赴能仁院。建會慶節道場。中夜後。舟人祀峽神。屠一豨。

二十三日。奠劉帥母安定郡太夫人卓氏。劉帥受弔禮。與吳人同。

二十四日。見左朝奉郎湖北安撫司主管機宜文字牛達可。右奉議郎安撫司幹辦公事湯衡。右朝奉郎安撫同幹辦公事趙蘊。

二十五日。右文林郎知歸州興山縣高祁來。

二十六日。修船始畢。骨肉入新船。祭江瀆廟。用壺酒特豕。廟在沙市之東三四里。神曰昭靈孚應。威惠廣源王。蓋四瀆之一。最爲典祀之正者。然兩廡淫祠尤多。蓋荆楚舊俗也。司法參軍右迪功郎王師點。錄其叔祖君儀待制。

訟卦講義來。君儀嚴州人。師事先大父。精於易。然遺書不傳。講義止存一篇而已。然亦其少作也。

二十七日。解舟。擊鼓鳴鑼。舟人皆大噪。擁堤觀者如堵牆。泊新河口。距沙市三四里。蓋蜀人修船處。

二十八日。泊方城。有嘉州人王百一者。初應募爲船之招頭。招頭。蓋三老之長。顧直差厚。每祭神。得胙肉倍家人。既而船戶趙清。改用所善程小八爲招頭。百一失職怏怏。又不決去。遂發狂赴水。予急遣人拯之。流一里餘。三沒三踊。僅得出。一招頭得喪。能使人至死。況大於此者乎。

二十九日。阻風。

十月一日。過瓜州壩倉頭百里洲。泊沱潛。皆聚落。竹樹鬱然。民居相望。亦有村夫子聚徒教授羣童。見船過。皆挾書出觀。亦有誦書不輟者。沱江別名。詩江有沱。禹貢岷山導江。東別爲沱。是也。隨。則爾雅所謂春秋夏有水。冬無水曰潛也。

二日。泊桂林灣。全證二僧陸行來云。沿路民居。大抵多四方人。土著財十一也。舟人殺猪十餘口祭神。謂之開頂。三日。舟人分昨。行差晚。與兒輩登隄觀蜀江。乃知李太白荆門望蜀江詩。江色綠且明。爲善狀物也。自離塔子磯。至是始望見巴山。山在松滋縣。泊灌子口。蓋松滋枝江兩邑之間。松滋晉縣。自此入蜀江。枝江唐縣。古羅國也。江陵九十九洲在焉。晉柳約之羅述甄季之聞桓玄死。自白帝至枝江。卽此地也。歐陽文忠公有枝江山行五言二十四韻。蓋文忠赴夷陵時。自此陸行至峽州。故其望州坡詩云。崎嶇幾日山行倦。卻喜坡頭見峽州。灌子口。一名松滋渡。劉賓客有詩云。巴人淚應猿聲落。蜀客船從鳥道回。

四日。過楊木寨。蓋松滋有四寨。曰楊木車。牟高平。稅家云。泊龍灣。

五日。過白牟市。蓋峽州宜都縣境上。宜都。唐縣也。謁張文忠公天覺墓。殘伐墓木橫道。幾不可行。天覺之子直龍圖閣茂已卒。二孫。一有官。病狂易。一白丁也。初作墓江濱。已而不果葬。改葬山間。今墓是也。而舊墓亦不復毀。啓隧竄出入。中可容數十人坐。有道人結屋其旁守之。道人出一石刻草書云。莫將外物尋奇寶。須問真師決汞鉛。寄入瓊張子高。鍾離權始自王屋遊都下。弟子浮玉山人來乞此字。今又將西還。丹元子再請書卷之末。紹聖元年仲冬望日。權卽世。所謂鍾離先生。子高卽天覺。丹元子卽東坡先生與之醜倡者。後有魏泰道輔跋云。天覺修

黃籙醮法成。浮玉山人謂之曰。上天錄公之功。爲須彌山入瓊洞主。宜刻印謝帝而佩之。天覺不以爲信。故浮玉又出鍾離公書爲證。後丹元子又爲天覺求書卷未。又有徐注者跋云。天覺舟過真州。方出謁。有布衣幅巾者。徑入舟中。索筆大書。閱人呂洞賓來謁張天覺十字。擲筆卽去。而天覺適歸。墨猶未乾。注真州人。云親見之。墳前碑樓壁間。有詩一篇云。秋風十驛後。台星想見冰壺照。坐清霖雨已回公。且駕。挽鬚聊聽野王箏。三朝元老心方壯。四海蒼生耳已傾。白髮故人來一別。卻歸林下看昇平。蓋魏嶺輔贈天覺詩。後人所題者。唐立夫舍人亦有一詩。未句云。無碑堪墮淚。著句與招魂。宜都知縣右文林郎呂大辨來。伯赤崖。

## 卷四十八

### 入蜀記第六

六日。過荆門十二碛。皆高崖絕壁。巒巖突兀。則峽中之峻可知矣。過倍。望五龍及雞籠山。嵯峨正如夏雲之奇峯。荆門者。當以險固得名。碛上有石穴。正方。高可通人。俗謂之荆門。則妄也。晚至峽州。泊至喜亭下。峽州在唐爲硤州。後改峽。而印文則爲陝州。元豐中。郎官何洵直言。陝與陝相亂。請改鑄印文從山。事下少府監。而監丞歐陽發言。湖北之陝州。從阜從夾。夾從雨。入陝西之陝州。從阜從夾。夾從雨。人偏旁不同。本不相亂。恐四方謂小府監官。皆不識字。當時朝士之議。皆是發。而卒從洵直言。改鑄云。至喜亭記。歐陽公撰。黃魯直書。

七日。見知州右朝奉大夫葉安行字履道。以小舟遊西山甘泉寺。竹橋石磴。甚有幽趣。有靜練洗心二亭。下臨江山。頗疎豁。法堂之右。小徑數十步。至一泉。曰孝婦泉。謂姜詩妻龐氏也。泉上亦有龐氏祠。然歐陽文忠公不以爲信。故其詩曰。叢祠已廢姜祠在。事迹難尋楚語訛。又此篇馬章云。江上孤峯蔽綠蘿。初讀之。但謂孤峯蒙藤蘿耳。及至此。乃知山下爲綠蘿谿也。又至漢景帝廟。及東山寺。景帝不知如何。以有廟於此。歐陽公爲令時。有祈雨文。在集中。東山寺。亦見歐陽公詩。距望京門五里。寺外一亭。臨小池。有山如屏。環之。頗佳。亭前冬青及柏。皆百餘年物。遂至夷陵。縣令見縣左從政郎胡振。聽事東至喜堂。郡守朱虞部爲歐陽公所築者。已焚壞。柱礎尙存。規模頗雄深。又東。則祠堂。亦簡陋。肖像不類。可歎。聽事前一井。相傳爲歐陽公所浚。水極甘寒。爲一郡之冠。井旁一柵。合抱。



亦傳爲公手植。晚郡集於楚塞樓。遍歷爾雅臺錦嶂亭。亭前海棠二本。亦百年物。爾雅臺者。圖經以爲郭景純註。爾雅於此。又有絳雪亭。取歐陽公千葉紅梨詩。而紅梨已不存矣。

八日。五鼓盡。解船。過下牢關。夾江千峯萬嶂。有競起者。有獨拔者。有崩欲壓者。有危欲墜者。有橫裂者。有直坼者。有凸者。有窪者。有罅者。奇怪不可盡狀。初冬草木皆青蒼不彫。西望重山如闕。江出其間。則所謂下牢谿也。歐陽文忠公有下牢津詩云。入峽山漸曲。轉灘山更多。卽此也。繫船與諸子及證師登三游洞。躡石磴二里。其險處不可著脚。洞大如三間屋。有一穴通人過。然陰黑峻險尤可畏。綠山腹。僂僂自巖下。至洞前。差可行。然下臨溪潭。石壁十餘丈。水聲恐人。又一穴。後有壁。可居。鍾乳歲久垂地若柱。正當穴門。上有刻云。黃大臨弟庭堅。同辛紘子大方。紹聖二年三月辛亥來遊。旁石壁上刻云。景祐四年七月十日。夷陵歐陽永叔。下缺一字。又云。判官丁。下又缺數字。丁者。竇臣也。字元珍。今丁字下二字。亦髣髴可見。殊不類元珍字。又永叔但曰夷陵。不稱令。洞外溪上。又有一崩石偃仆。刻云。黃庭堅弟叔向子相姪槃。同道人唐履來游觀。辛亥舊題。如夢中事也。建中靖國元年三月庚寅。按魯直初謫黔南。以紹聖二年過此。歲在乙亥。今云辛亥者。誤也。泊石牌峽。石穴中有石如老翁持魚竿狀。略無少異。

九日。微風。過扇子峽。重山相掩。政如屏風扇。疑以此得名。登蝦蟆碛。水产品所載第四泉是也。蝦蟆在山麓。臨江。頭鼻吻領絕類。而背脊炮歲尤逼真。造物之巧。有如此者。自背上深入。得一洞穴。石色綠潤。泉泠泠有聲。自洞出。垂蝦蟆口鼻間。成水簾入江。是日極寒。巖嶺有積雪。而洞中溫然如春。碛洞相對。稍西有一峯。孤起侵雲。名天柱峯。自此山勢稍平。然江岸皆大石堆積。彌望正如濬渠積土狀。晚次黃牛廟。山復高峻。村人來賣茶菜者甚衆。其中有婦人。皆以青斑布帕首。然頗白皙。語音亦頗正。茶則皆如柴枝草葉。苦不可入口。廟靈感。神封嘉應保安侯。皆紹興以來制書也。其下卽無義灘。亂石塞中流。望之可畏。然舟過乃不甚覺。蓋操舟之妙也。傳云。神佐夏禹。始水有功。故食於此。門左右各一石馬。頗卑小。以小屋覆之。其右馬無左耳。蓋歐陽公所見也。廟後叢木。似冬青而非。莫能名者。落葉有黑文。類符篆。葉葉不同。兒輩亦求得數葉。歐詩刻石廟中。又有張文忠一贊。其詞曰。壯哉黃牛。有大神力。鞏聚巨石。百千萬億。劍戟齒牙。礮礮江側。壑激波濤。險不可測。威脅舟人。駭怖失色。剖牟醜酒。千載廟

食。張公之意似謂神聚石墜流以脅人求祭饗使神之用心果如此豈能巍然廟食千載乎蓋過論也夜舟人來告請無擊更鼓云廟後山中多虎聞鼓則出。

十日早以特豕壺酒祭靈感廟遂行過鹿肉虎頭史君諸灘水縮已三之二然湍險猶可畏泊城下歸州秭歸縣界也與兒曹步沙上回望正見黃牛峽廟後山如屏風疊嵯峨插天第四疊上有若牛狀其色赤黃前有一人如著帽立者昨日及今早雲冒山頂至是始見之因至白沙市慈濟院見主僧志堅問地名城下之由云院後有楚故城今尚在因相與訪之城在一岡阜上甚小南北有門前臨江水對黃牛峽城西北一山蜿蜒回抱山上有伍子胥廟大抵自荆以西子胥廟至多城下多巧石如盤壁湖口之類。

十一日過遠洞灘灘惡與骨肉皆乘輜陸行過灘灘際多奇石五色粲然可愛亦或有文成物象及符書者猶見黃牛峽廟後山太白詩云三朝上黃牛三暮行太遲三朝又三暮不覺鬢成絲歐陽公云朝朝暮暮見黃牛徒使行人過此愁山高更遠望猶見不是黃牛滯客舟蓋諺謂朝見黃牛暮見黃牛一朝一暮黃牛如故故二公皆及之歐陽公自荆渚赴夷陵而有下牢三游及蝦蟆碖黃牛廟詩者蓋在官時來游也故憶夷陵山詩云憶嘗祇吏役鉅細悉經觀其後又云荒煙下牢戍百仞塞溪漱蝦蟆噴水簾甘液勝飲酎亦嘗到黃牛泊舟聽猿狖也晚泊馬肝峽口兩山對立修聳摩天略如廬山江岸多石百丈縈絆極難過夜小雨。

十二日早過東瀾灘入馬肝峽石壁高絕處有石下垂如肝故以名峽其傍又有獅子巖巖中有一小石蹲踞張頤碧草被之正如一青獅子微泉泠泠自巖中出舟行急不能取嘗當亦佳泉也溪上又有一峯孤起秀麗略如小孤山晚抵新灘登岸宿新安驛夜雪。

十三日舟上新灘由南岸上及十七八船底爲石所損急遣人往拯之僅不至沉然銳石穿船底牢不可動蓋舟人載陶器多所致新灘兩岸南曰官漕平聲北曰龍門龍門水尤湍急多暗石官漕差可行然亦多銳石故爲峽中最險處非輕舟無一物不可上下舟人冒利以至此可爲戒云遊江濱北廟廟正臨龍門其下石罅中有溫泉淺而不涸一村賴之婦人汲水皆背負一全木盞長二尺下有三支至泉旁以杓挹水及八分卽倒坐旁石東盞背上而去大抵峽中負物率著背又多婦人不獨水也有婦人負酒賣亦如負水狀呼買之長跪以獻未嫁者率

爲同心髻。高二尺。插銀釵至六隻。後插大象牙梳。如手大。

十四日留驛中。晚以小舟渡江南。登山至江濱南廟。新修未畢。有一碑。前進士曾華旦撰。言因山崩石墜。成此灘。害舟不可計。於是著令。自十月至二月。禁行舟。知歸州尚書都官員外郎趙誠聞於朝。疏鑿之。用工八十日。而灘害始去。皇祐三年也。蓋江絕於天聖中。至是而復通。然灘害至今未能悉去。若乘十二月正月。水落石盡出時。亦可併力盡鑿去。銳石。然灘上居民。皆利於敗舟。賤賣板木。及滯留買賣。必搖沮此役。不則賂石工。以爲石不可去。須斷以必行。乃可成。又舟之所以敗。皆失於重載。當以大字刻石置驛前。則過者必自懲創。二者皆不可不講。當以告當路者。

十五日。舟人盡出所載。始能挽舟過灘。然須修治。遂易舟。離新灘。過白狗峽。泊舟與山口。肩輿遊玉虛洞。去江岸五里許。隔一溪。所謂香溪也。源出昭君村。水味美。錄於水品。色碧如黛。呼小舟以渡。過溪。又里餘。洞門小。纔袤丈。既入。則極大。可容數百人。宏敞壯麗。如入大宮殿中。有石成幢。蓋旛旗。芝草竹筍。仙人龍虎鳥獸之屬。千狀萬態。莫不逼真。其絕異者。東石正圓如日。西石半規如月。予平生所見巖竇。無能及者。有熙寧中謝師厚岑巖起題名。又有陳壽咨所作記。敘此洞本末。云唐天寶中。獵者始得之。比歸。已夜。風急不可秉燭。炬然月明如晝。兒曹與全師皆杖策相從。殊不覺崖谷之險也。

十六日。到歸州。見知州右奉議郎賈選子公。通判左朝奉郎陳端彥民瞻。館於報恩光孝寺。距城一里許。蕭然無僧。歸之爲州。纔三四百家。負臥牛山。臨江。州前卽人鮓壘。城中無尺寸平土。灘聲常如暴風雨。至隔江有楚王城。亦山谷間。然地比歸州差平。或云。楚始封於此。山海經。夏啓封孟除於丹陽城。郭璞註云。在秭歸縣南。疑卽此也。然史記成王封熊繹於丹陽。裴駟乃云在枝江。未詳孰是。

十七日。郡集於望洋堂。玩芳亭。亦皆沙石壑确之地。賈守云。州倉歲收秋夏二料。麥粟秔米。共五千餘石。僅比吳中一下戶耳。

十八日。初得艤船。瓮小。然底闊而輕。於上灘爲便。

十九日。郡集於歸鄉堂。欲以是晚行。不果。訪宋玉宅。在秭歸縣之東。今爲酒家。舊有石刻宋玉宅三字。近以郡人

漢太守家諱去之。或遂由此失傳。可惜也。

二十日。早離歸州。出巫峯門。過天慶觀。少留。觀唐天寶元年碑。載明皇夢老子事。巴東太守劉瑄所立。字畫頗清。逸。碑側題當時郡官吏胥姓名。字亦佳。又有周顯德中。荆南判官孫光憲爲知歸州。高從讓所立碑。從讓。蓋南平王家子弟。光憲亦知名。國史有事迹。蓋五代時。歸政皆隸荆渚也。殿前有柏。數百年物。觀下卽吒灘。亂石無數。飯於靈泉寺。遂登舟過業灘。亦名灘也。水落舟輕。俄頃遂過。

二十一日。舟中望石門關。僅通一人行。天下至險也。晚泊巴東縣。江山雄麗。大勝秣歸。但井邑極於蕭條。邑中纔百餘戶。自令廨而下。皆茅茨。了無片瓦。權縣事秣歸尉右迪功郎王康年。尉兼主簿右迪功郎杜德先來。皆蜀人也。謁寇萊公祠堂。登秋風亭。下臨江山。是日重陰微雪。天氣颼颼。復觀亭名。使人悵然。始有流落天涯之歎。遂登雙柏堂白雲亭。堂下舊有萊公所植柏。今已槁死。然南山重複。秀麗可愛。白雲亭則天下幽奇絕境。羣山環擁。層出間見。古木森然。往往二三百年物。欄外雙瀑。瀉石澗中。跳珠滅玉。冷入人骨。其下是爲慈溪。奔流與江會。予自吳入楚。行五千餘里。過十五州。亭榭之勝。無如白雲者。而止在縣廨聽事之後。巴東了無一事。爲令者可以寢飯於亭中。其樂無涯。而闕令。動輒二三年無肯補者。何哉。

二十二日。發巴東。山益奇怪。有夫子洞者。一竇在峭壁絕高處。人迹所不可至。然髣髴若有欄楯。不知所謂夫子者何也。過三分泉。自山竇中出。止兩派。俗云。三派有年。兩派中熟。一派或絕流饑饉。泊疲石。夜雨。

二十三日。過巫山凝真觀。謁妙用真人祠。真人卽世所謂巫山神女也。祠正對巫山峯巒。上入霄漢。山脚直插江中。議者謂大華衝廬。皆無此奇。然十二峯者。不可悉見。所見八九峯。惟神女峯最爲纖麗奇峭。宜爲仙真所託。祝史云。每八月十五夜月明時。有絲竹之音。往來峯頂。山猿皆鳴。達旦方漸止。廟後山半。有石壇平曠。傳云夏禹見神女。授符書於此。壇上觀十二峯。宛如屏障。是日。天宇晴霽。四顧無纖翳。惟神女峯上有白雲數片。如鸞鶴翔舞。裴徊久之不散。亦可異也。祠舊有烏數百。送迎客舟。自唐夔州刺史李貽詩。已云羣烏幸胙餘矣。近乾道元年。忽不至。今絕無一烏。不知其故。泊清水洞。洞極深。後門自山後出。但黠闇。水流其中。鮮能入者。歲旱祈雨頗應。權知巫山縣左文林郎冉徽之。尉右迪功郎文庶幾來。

二十四日早抵巫山。縣在峽中，亦壯縣也。市井勝歸峽二郡，隔江南陵山極高大，有路如線，盤屈至絕頂，謂之一百八盤。蓋施州正路。黃魯直詩云：「一百八盤播手上，至今歸夢繞羊腸。」即謂此也。縣廡有故鐵盆，底銳似半器狀，極堅厚，銘在其中。蓋漢永平中物也。缺處鐵色光黑如佳漆，字畫淳質可愛玩。有石刻魯直作盆記。大略言建中靖國元年，予弟叔向嗣直，自涪陵尉攝縣事，予起戎州來寓縣廡，此盆舊以種蓮，余洗滌乃見字。云：遊楚故離宮，俗謂之細腰宮，有一池，亦當時宮中燕遊之地，今湮沒略盡也。三面皆荒山，南望江山奇麗，又有將軍墓，東晉人也。一碑在墓後，跌陷入地，碑傾前欲壓，字纔半存。

二十五日，晡後至大谿口泊舟，出美梨，大如升。

二十六日發大谿口，入瞿唐峽，兩壁對聳，上入霄漢，其平如削成，仰視天如疋練，然水已落，峽中平如油盎，過聖姥泉，蓋石上一罇，人大呼於旁，則泉出屢呼，則屢出，可怪也。晚至瞿唐關，唐故夔州，與白帝城相連。杜詩云：「白帝夔州各異城，蓋言難辨也。」關西門正對灩澦堆，堆碎石積成，出水數十丈，土人云：「方夏秋水漲時，水又高於堆數十丈，肩輿入關，謁白帝廟，氣象甚古，松柏皆數百年物，有數碑，皆孟蜀時所立，庭中石筍，有黃魯直建中靖國元年題字，又有越公堂，隋楊素所創，少陵爲賦詩者，已毀，今堂近歲所築，亦甚宏壯，自關而東，即東屯少陵故居也。」二十七日早，至夔州，州在山麓沙上，所謂魚復永安宮也，宮今爲州倉，而州治在宮西北，甘夫人墓西南，景德中轉運使丁謂薛顏所徙，比白帝頗平曠，然失關險，無復形勢，在灩之西，故一曰灩西，土人謂山間之流通江者曰灩云。州東南有八陣墳，孔明之遺迹，碎石行列如引繩，每歲江漲，積上水數十丈，比退，陣石如故。

### 卷四十九

#### 詞六十七首

赤壁詞招韓無咎遊金山

禁門鐘曉，憶君來朝路。初翔鸞鶴，西府中臺推獨步。行對金蓮宮燭，盛繡華鞵，仙葩寶帶，看卽飛騰速。人生難料，一尊此地相屬。回首紫陌青門，西湖閑院，鎖千梢脩竹。素壁棲鴉，應好在。殘夢不堪重續。歲月驚心，功名看鏡。

短鬢無多綠。一歡休惜。與君同醉浮玉。

浣沙溪和無咎韻

懶向沙頭醉玉瓶。喚君同賞小窗明。夕陽吹角最關情。忙日苦多閑日少。新愁常續舊愁生。客中無伴怕君行。

又南鄭席上

浴罷華清第二湯。紅綿撲粉玉肌涼。娉婷初試藕絲裳。鳳尺裁成猩血色。螭奩熏透麝脐香。水亭幽處捧霞觴。

青玉案與朱景參會北嶽

西風挾雨聲翻浪。恰洗盡黃茆瘴。老慣人間齊得喪。千巖高臥。五湖歸棹。替卻凌煙像。故人小駐平戎帳。白羽

腰間氣何壯。我老漁樵君將相。小槽紅酒。晚香丹荔。記取蠻江上。

水調歌頭多景樓

江左占形勝。最數古徐州。遠山如畫佳處。縹渺著危樓。鼓角臨風悲壯。烽火連空明滅。往事憶孫劉。千里曜戈甲。

萬竄宿貔貅。露濡草。風落木。歲方秋。使君宏放談笑。洗盡古今愁。不見襄陽登覽。磨滅遊人無數。遺恨黯難收。

叔子獨千載。名與漢江流。

浪淘沙丹陽浮玉亭席上作

綠樹暗長亭。幾把離尊。陽關常恨不堪聞。何況今朝秋色裏。身是行人。清淚滌羅巾。各自消魂。一江離恨恰平分。安得千尋橫鐵鎖。截斷煙津。

定風波進賢道上見梅贈王伯壽

欲帽垂鞭送客回。小橋流水一枝梅。衰病逢春都不記。誰謂。幽香卻解逐人來。安得身閑頻置酒。攜手與君看

到十分開。少壯相從今雪鬢。因甚。流年羈恨兩相催。

南鄉子

歸夢寄吳橋。水驛江程去路長。想見芳洲初繫纜。斜陽。煙樹參差認武昌。愁鬢點新霜。曾是朝衣染御香。重到

故鄉交舊少。淒涼。卻恐它鄉勝故鄉。

南文集 卷四十九 詞

又

早歲入皇州。罇酒相逢盡勝流。三十年來真一夢。堪愁。客路蕭蕭兩鬢秋。蓬嶠偶重遊。不待人嘲我自羞。看鏡倚樓俱已矣。扁舟。月笛煙簑萬事休。

滿江紅

危堞朱欄。登覽處。一江秋色。人正似。征鴻社燕。幾番輕別。縱緒難忘當日語。淒涼又作它鄉客。問鬢邊。都有幾多絲。真堪織。楊柳院。秋千陌。無限事。成虛擲。如今何處也。夢魂難覓。金鴨微溫香縹緲。錦茵初展情蕭瑟。料也應。紅淚伴秋霖。燭前滴。

又夔州催王伯侍御尋梅之集

疎蕊幽香。禁不過。晚寒愁絕。那更是。巴東江上。楚山千疊。欹帽閑尋西瀼路。鞦韆笑向南枝說。恐使君。歸去上巖坡。孤風月。清鏡裏。悲華髮。山驛外。溪橋側。悽然回首處。鳳凰城關。顛顛如今誰領略。飄零已是無顏色。問行廚。何日喚賓僚。猶堪折。

感皇恩 伯禮立春生日

春色到人間。綵旛初戴。正好春盤細生菜。一般日月。只有僊家偏耐。雪霜從點鬢。朱顏在。溫詔鼎來。延英催對。鳳閣鸞臺看除拜。對衣裁穩。恰稱毬紋新帶。隨時方旋了。功名債。

又

小閣倚秋空。下臨江渚。漠漠孤雲不成雨。數聲新雁。回首杜陵何處。壯心空萬里。人誰許。黃閣紫樞。築壇開府。莫怕功名欠人做。如今熟計。只有故鄉歸路。石帆山脚下。菱三畝。

好事近 寄張真甫

羈雁未成歸。腸斷寶箏零落。那更凍醪無力。似故人情薄。瘴雲蠻雨暗孤城。身在楚山角。頰問劍南消息。怕還成疎索。

又

風露九霄寒。侍宴玉華宮闕。親向紫皇香案。見金芝千葉。碧壺仙露醞初成。香味兩奇絕。醉後卻騎丹鳳。看送萊春色。

又次宇文卷目韻

客路苦思歸。愁似鬢絲千緒。夢裏鏡湖煙雨。看山無重數。尊前消盡少年狂。慵著送春語。花落燕飛庭戶。數年光如許。

又

歲晚喜東歸。掃盡市朝陳迹。揀得亂山環處。釣一潭澄碧。賣魚沽酒醉還醒。心事付橫笛。家在萬重雲外。有沙鷗相識。

又

華表又千年。誰記駕雲孤鶴。回首舊曾遊處。但山川城郭。紛紛車馬滿人間。塵土汙芒屨。且訪葛仙丹井。看巖花開落。

又

揮袖別人間。飛躡峭崖蒼壁。尋見古僊丹竈。有白雲成積。心如潭水靜無風。一坐數千息。夜半忽驚奇事。看鯨波嗽日。

又

湓口放船歸。薄暮散花洲宿。兩岸白蘋紅蓼。映一簑新綠。有沽酒處便爲家。菱芡四時足。明日又乘風去。任江南江北。

又登梅仙山絕頂望梅

揮袖上西峯。孤絕去天無尺。拄杖下臨鯨海。數烟颿歷歷。貪看雲氣舞青鸞。歸路已將夕。多謝半山松吹。解慙留客。

又



小倦帶餘醒。澹澹數櫺斜日。驅退睡魔十萬。有雙龍蒼壁。少年莫笑老人衰。風味似平昔。扶杖凍雲深處。探溪梅消息。

又

覓箇有緣人。分付玉壺靈藥。誰向市塵深處。識遠天孤鶴。月中吹笛下巴陵。條華赴前約。今古廢興何限。歎山川如昨。

又

平旦出秦關。雪色駕車雙鹿。借問此行安往。賞清伊脩竹。漢家宮殿劫灰中。春草幾回綠。君看變遷如許。況紛紛榮辱。

又

秋曉上蓮峯。高躡倚天青壁。誰與放翁爲伴。有天壇輕策。鏗然忽變赤龍飛。雷雨四山黑。談笑做成豐歲。笑禪龍擲栗。

鷓鴣天送葉夢錫

家住東吳近帝鄉。平生豪舉少年場。十千沽酒青樓上。百萬呼盧錦瑟傍。身易老。恨難忘。尊前贏得是淒涼。君歸爲報京華舊。一事無成兩鬢霜。

又葭萌驛作

看盡巴山看蜀山。子規江上過春殘。慣眠古驛常安枕。熟聽陽關不慘顏。情服氣。懶燒丹。不妨青鬢戲人間。祇傳一字神仙訣。說與君知只是頑。

又

梳髮金盤剩一窩。畫眉鸞鏡暈雙蛾。人間何處無春到。只有伊家獨占多。微步處。奈嬌何。春衫初換麴塵羅。東鄰鬪草歸來晚。忘卻新傳子夜歌。

又

家住蒼煙落照間。絲毫應事不相關。斟殘玉瀝行穿竹。卷罷黃庭臥看山。貪嘯傲。任衰殘。不妨隨處一闌干。元知造物心腸別。老卻英雄似等閑。

又

插脚紅塵已是顛。更求平地上青天。新來有箇生涯別。買斷煙波不用錢。沽酒市。採菱船。醉聽風雨擁簑眠。三山老子真堪笑。見事遲來四十年。

又

嫩向青門學種瓜。只將漁釣送年華。雙雙新燕飛春岸。片片輕鷗落晚沙。歌縹緲。鷓鴣啞。酒如清露鮮如花。逢人問道歸何處。笑指船兒此是家。

又薛公蕭家席上作

南浦舟中兩玉人。誰知重見楚江濱。憑教後苑紅牙版。引上西川綠錦茵。纔淺笑。卻輕嗔。淡黃楊柳又催春。情知言語難傳恨。不似琵琶道得真。

驀山溪 送伯禮

元戎十乘。出次高唐館。歸去舊鷓行。更何人齊飛霄漢。瞿唐水落。惟是淚波深。催疊鼓。起牙樞。難鎖長江斷。春深驚禁。紅日宮甌暖。何處望音塵。歸清魂。層城飛觀。人情見憶。不敢恨相忘。梅驛外。蓼灘邊。只待除書看。

又遊三榮龍祠

窮山孤壘。臘盡春初破。寂寞掩空齋。好一箇無聊底我。嘯臺龍岫。隨分有雲山。臨淺瀨。蔭長松。閑據胡牀坐。三盃徑醉。不覺紗巾墮。畫角喚人歸。落梅村籃輿夜過。城門漸定。幾點妓衣紅。官驛外。酒壚前。也有閑燈火。

木蘭花 立春日作

三年流落巴山道。破盡青衫塵滿帽。身如西瀨渡頭雲。愁抵瞿唐關上草。春盤春酒年年好。試戴重簷判醉倒。今朝一歲大家添。不是人間偏我老。

朝中措 梅

幽姿不入少年場。無語只淒涼。一箇飄零身世，十分冷淡心腸。江頭月底，新詩舊夢，孤恨清香。任是春風不管，也曾先識東皇。

又代譚得稱作

怕歌愁舞懶逢迎。粧晚託春醒。總是向人深處，當時枉道無情。關心近日，啼紅密訴，剪綠深盟。杏館花陰恨淺，畫堂銀燭嫌明。

又

整整箴鼓餞流年。燭焰動金船。綵燕難尋前夢，酥花空點春妍。文園謝病，闌成久旅，回首淒然。明月梅山笛弄，和風禹廟鶯天。

臨江仙 離果州作

鳩雨催成新綠，燕泥收盡殘紅。春光還與笑人同。論心空眷眷，分袂卻匆匆。只道真情易寫，那知怨句難工。水流雲散各西東。半廊花院月，一帽柳橋風。

蝶戀花 離小益作

陌上簫聲寒食近。雨過園林，花氣浮芳潤。千里斜陽鐘欲暝。憑高望斷南樓信。海角天涯行略盡。三十年間，無處無遺恨。天若有情終欲問。忍教霜點相思鬢。

又

桐葉晨飄蛩夜語。旅思秋光，黯黯長安路。忽記橫戈盤馬處。散關清渭應如故。江海輕舟今已具。一卷兵書，

又

水漾萍根風卷絮。倩笑嬌颦，忍記逢迎處。只有夢魂能再遇。堪嗟夢不由人做。夢若由人何處去。短帽輕衫，夜宿州路。不怕銀缸深繡戶。只愁風斷青衣渡。

釵頭鳳

紅酥手。黃滕酒。滿城春色宮牆柳。東風惡。歡情薄。一懷愁緒。幾年離索。錯錯錯。春如舊。人空瘦。痕痕紅泡蛟綃透。桃花落。閑池閣。山盟雖在。錦書難託。莫莫莫。

清商怨 葭萌驛作

江頭日莫痛飲。乍雪晴猶凜。山驛淒涼。燈昏人獨寢。鴛機新寄斷錦。歎往事。不堪重省。夢破南樓。綠雲堆一枕。

水龍吟 榮南作

樽前花底尋春處。堪嘆心情全減。一身萍寄。酒徒雲散。佳人天遠。那更今年。瘴煙蠻雨。夜郎江畔。漫倚樓橫笛。臨窗看鏡。時揮淚。驚流轉。花落月明庭院。悄無言。魂消腸斷。憑肩攜手。當時曾效。畫梁栖燕。見說新來。綉縈塵暗。舞衫歌扇。料也羞顛顛。慵行芳徑。怕啼鶯見。

秋波媚 七月十六日晚登高興亭望長安南山

秋到邊城角聲哀。烽火照高臺。悲歌擊筑。憑高酌酒。此興悠哉。多情誰似南山月。特地莫雲開。灞橋煙柳。曲江池館。應待人來。

又

曾散天花蕊珠宮。一念墮塵中。鉛華洗盡。珠璣不御。道骨仙風。東遊我醉騎鯨去。君駕素鸞從。垂虹看月。天臺采藥。更與誰同。

采桑子

寶釵樓上粧梳晚。嬾上鞦韆。閑撥沉煙。金縷衣寬睡髻偏。鱗鴻不寄遼東信。又是經年。彈淚花前。愁入春風十四絃。

卜算子 詠梅

驛外斷橋邊。寂寞開無主。已是黃昏獨自愁。更著風和雨。無意苦爭春。一任羣芳妬。零落成泥碾作塵。只有香如故。

於園春 三榮橫谿閣小宴

粉破梅梢。綠動鶯叢。春意已深。漸珠簾低卷。筑枝微步。冰開躍鯉。林暖鳴禽。燕子扶疎。竹枝哀怨。濁酒一罇。和淚斟。憑欄久。歎山川冉冉。歲月駸駸。當時豈料如今。漫一事無成。霜鬢侵看。故人強半。沙堤黃閣。魚懸帶玉。貂映蟬金。許國雖堅。朝天無路。萬里淒涼。誰寄音。東風裏。有灞橋煙柳。知我歸心。

又

一別秦樓。轉眼新春。又近放燈。億盈盈倩笑。纖纖柔握。玉香花語。雪暖酥凝。念遠愁腸。傷春病思。自怪平生殊未曾。君知否。漸香消蜀錦。淚漬吳綾。難求繫日長繩。況倦客飄零。少舊朋。但江郊雁起。漁村笛怨。寒缸委燼。孤硯生冰。水繞山圍。煙昏雲慘。縱有高臺常怯。消魂處。是魚牋不到。蘭夢無憑。

又

孤鶴歸飛。再過遼天。換盡舊人。念繫纜枯塚。茫茫夢境。王侯螻蛄。畢竟成塵。載酒園林。尋花巷陌。當日何曾輕負春。流年改。歎圓腰帶剩。點鬢霜新。交親散落如雲。又豈料如今。幸眼明身健。茶甘飯軟。非惟我老。更有人貧。躲盡危機。消殘壯志。短艇湖中。閑采蓴。吾何恨。有漁翁共醉。谿友爲鄰。

憶秦娥

玉花驄。晚街金轡聲。瓊瓏。瓏。閑敲烏帽。又過城東。富春巷陌。花重。千金沽酒酬春風。酬春風。笙歌圍裏。錦繡叢中。

漢宮春 張園賞海棠 任園故蜀燕王宮也

浪迹人間。喜聞猿楚峽。學劍秦川。虛舟汎然不繫。萬里江天。朱顏綠鬢。作紅塵無事神仙。何妨在。鶯花海裏。行歌閑送流年。休笑放慵狂眼。看閑坊深院。多少嬋娟。燕宮海棠夜宴。花覆金船。如椽畫燭。酒闌時百炬吹煙。憑寄語。京華舊侶。幅巾莫換貂蟬。

又 初自南鄭來成都作

羽箭雕弓。憶呼鷹古壘。截虎平川。吹笳莫歸野帳。雪壓青氈。淋漓醉墨。看龍蛇飛落蠻牋。人謾許。詩情將略。一時才氣超然。何事又作南來。看重陽藥市。元夕燈山。花時萬人樂處。歌帽垂鞭。聞歌感舊。尚時時流涕尊前。君記

歌。封侯事在。功名不信由天。

月上海棠。成都城南有蜀王舊苑。名梅。皆二百餘年古木。

斜陽廢苑朱門閉。弔吳亡。遺恨淚痕裏。淡淡宮梅也。依然點酥剪水。凝愁處。似憶宣華舊事。行人別有淒涼意。折幽香誰與寄千里。佇立江皋。香難逢。驢頭歸騎。音塵遠。楚天危樓獨倚。宣華故蜀苑名。

又

窈房繡戶厭厭疾。歎春醒和悶。老時醒。燕子空歸。幾曾傳玉闌邊信。傷心處。獨展團窠瑞錦。熏籠猶歇。沉煙冷。淚痕深展轉看花影。漫撥餘香。怎禁他。峭寒孤枕。西窗曉。幾聲銀瓶玉井。

烏夜啼

金鴨餘香尚暖。綠窗斜日偏明。蘭膏香染雲鬟膩。釵墜滑無聲。冷落鞦韆伴侶。闌珊打馬心情。繡屏驚斷瀟湘夢。花外一聲鶯。

又

簷角楠陰轉日。樓前荔子吹花。鷓鴣聲裏霜天晚。疊鼓已催衙。鄉夢時來枕上。京書不到天涯。邦人訟少文移省。閑院自煎茶。

又

我校丹臺玉宇。君書蕊殿雲篇。錦官城裏重相遇。心事兩依然。攜酒何妨處處。尋梅共約年年。細思上界多官府。且作地行仙。

又

世事從來慣見。吾生更欲何之。鏡湖西畔秋千頃。鷗鷺共忘機。一枕蘋風午醉。二升菰米晨炊。故人莫訝音書絕。釣侶是新知。

又

素意幽棲物外。塵緣浪走天涯。歸來猶幸身強健。隨分作山家。已趁餘寒泥酒。還乘小雨落花。柴門盡日無人

到一徑傍谿斜。

又

園館青林翠樾。衣巾細葛輕紈。好風吹散霏微雨。沙路喜新乾。罷。閑展道書看。

小燕雙飛水際。流鶯百轉林端。投壺聲斷彈茶

又

從宦元知漫浪。還家更覺清真。蘭亭道上多脩竹。隨處岸綸巾。下。天地有閑人。

泉冽偏宜雪茗。杭香雅稱絲尊。脩然一飽西窗

又

紈扇嬋娟素月。紗巾縹緲輕煙。高槐葉長陰初合。清潤雨餘天。到。枕上聽新蟬。

弄筆斜行小草。鈎簾淺醉閑眠。更無一點塵埃

真珠簾

山村水館參差路。感羈遊。正似殘春風絮。掠地穿簾。知是竟歸何處。鏡裏新霜空自憫。問幾時。鸞臺黿署。遲莫。謾憑高懷遠。書空獨語。自古。儒冠多誤。悔當年。早不扁舟歸去。醉下白蘋洲。看夕陽鷗鷺。菰菜鱸魚都棄了。只換得青衫塵土。休願。早收身江上。一簑煙雨。

好事近

混迹寄人間。夜夜畫樓銀燭。誰見五雲丹竈。養黃芽初熟。春風歸從紫皇遊。東海宴暘谷。進罷碧桃花賦。賜玉塵千斛。

卷五十一

詞六十二首

柳梢青故蜀燕王宮海棠之盛爲成都第一今屬張氏

錦里繁華，環宮故邸。疊萼奇花，俊容妖姪。爭飛金勒，齊駐香車。何須幙障帷遮。寶盃侵。紅雲瑞霞。銀燭光中。清歌聲裏。休恨天涯。

又乙巳二月酉與彌別

十載江湖，行歌沽酒。不到京華。底事翩然。長亭煙草，衰鬢風沙。憑高目斷天涯。細雨外。樓臺萬家。只恐明朝。一時不見。人共梅花。

夜遊宮記夢寄師伯暉

雪曉清笳亂起。夢遊處。不知何地。鐵騎無聲望似水。想關河。雁門西。青海際。睡覺寒燈裏。漏聲斷。月斜窗紙。自許封侯在萬里。有誰知。鬢雖殘。心未死。

又宮詞

獨夜寒侵翠被。奈幽夢不成還起。欲寫新愁淚減紙。憶承恩。歎餘生。今至此。歎歎燈花墜。問此際。報人何事。咫尺長門過萬里。恨君心似危欄。難久倚。

安公子

風雨初經社。子規聲裏春光謝。最是無情。零落盡薔薇一架。況我今年。顛賴幽窗下。人盡怪詩酒消聲價。向藥爐經卷。忘却鶯窗柳榭。萬事收心也。粉痕猶在香羅帕。恨月愁花。爭信道如今都罷。空憶前身。便面章臺馬。因自來禁得心腸怕。縱遇歌逢酒。但說京都舊話。

玉蝴蝶王忠州家席上作

倦客平生行處。墜鞭京洛。解佩瀟湘。此夕何年。來賦宋玉高唐。繡簾開。香塵乍起。蓮步穩。銀燭分行。暗端相。燕羞鶯妬。蝶擾蜂忙。難忘。芳樽頻勸。峭寒新退。玉漏猶長。幾許幽情。只愁歌罷月侵廊。欲歸時。司空笑悶。微近處。丞相嗔狂。斷人腸。假饒相送。上馬何妨。

木蘭花慢夜發青城山玉華樓

闌邯鄲夢境。歎綠鬢。早霜侵。奈華岳燒丹。青谿看鶴。尙負初心。年來向濁世裏。悟真詮。秘訣絕幽深。養就金芝九



疏種成琪樹千林。星壇夜學步虛吟。露冷透瑤簪。對翠鳳披雲。青鸞遡月。宮闕蕭森。琅函一封奏罷。自鈞天帝。所有知音。卻過蓬壺嘯傲。世間歲月駸駸。

蘇武慢唐西安湖

澹靄空濛。輕陰清潤。綺語細塵初靜。平橋繫馬。畫閣移舟。湖水倒空如鏡。掠岸飛花。傍簷新燕。都似學人無定。歎連年戎帳。經春邊壘。暗凋顏鬢。空記憶。杜曲池臺。新豐歌管。怎得故人音信。羈懷易感。老伴無多。談麈久閑犀柄。惟有翛然。筆牀茶竈。自適筍輿煙艇。待綠荷遮岸。紅葉浮水。更乘幽興。

齊天樂左綿道中

角殘鐘晚。關山路。行人乍依孤店。塞月征塵。鞭絲帽影。常把流年虛占。藏鴉柳暗。歎輕負鶯花。謾勞書劍。事往關情。悄然頻動壯遊念。孤懷誰與強遣。市壚沽酒。酒薄怎當愁釀。倚瑟妍詞。調鉛妙筆。那寫柔情芳豔。征途自厭。況煙斂蕪痕。雨稀萍點。最是眠時。枕寒門半掩。

又三榮人日遊龍洞作

客中隨處閑消悶。來尋嘯臺龍岫。路斂春泥。山開翠霧。行樂年年依舊。天工妙手。放輕綠萱牙。淡黃楊柳。笑問東君。爲人能染鬢絲否。西州催去近也。帽簷風軟。且看市樓沽酒。宛轉巴歌。淒涼塞管。攜客何妨頻奏。征塵暗袖。漫禁得梅花。伴人疎瘦。幾日東歸。畫船平放溜。

望梅

壽非金石。恨天教老向。木程山驛。似夢裏來到南柯。這些子光陰。更堪輕擲。戍火邊塵。又過了。一年春色。數名姬駿馬。盡付杜陵。苑路豪客。長繩漫勞繫日。看人間俛仰。俱是陳迹。縱自倚。英氣凌雲。奈回盡鵬程。鍛殘鸞翮。終日憑高。情不見。江東消息。算沙邊。也有斷鴻。倩誰問得。

洞庭春色

壯歲文章。暮年勳業。自昔誤人。算英雄成敗。軒裳得失。難如人意。空喪天真。請看邯鄲當日夢。待炊罷黃梁。徐欠伸。方知道。許多時富貴。何處關身。人間定無可意。怎換得玉鱸絲葦。且釣竿漁艇。筆牀茶竈。閑聽荷雨。一洗衣

塵。洛水秦關千古後。尙棘暗銅駝。空愴神。何須更。幕封侯。定遠。圖像麒麟。

漁家傲 寄仲高

東望山陰何處是。往來一萬三千里。寫得家書空滿紙。沈清淚。書回已是明年事。寄語紅橋橋下水。扁舟何日尋兄弟。行徧天涯真老矣。愁無寐。鬢絲幾縷茶煙裏。

繡停針

歎半紀。跨萬里。素琴。頓覺衰謝。回首鷓鴣行英俊。並遊咫尺。玉堂金馬。氣凌嵩華。負壯略。縱橫王霸。夢經洛浦梁園。覺來淚流如瀉。山林定去也。卻自恐說著少年時話。靜院焚香。閑倚素屏。今古總成虛假。趁時婚嫁。幸自有湖邊茅舍。燕歸應笑。客中又還過社。

桃園憶故人并序

三榮郡治之西。因子城作樓觀。曰高齋。下臨山村。蕭然如世外。余留七十日。被命參成都戎幟而去。臨行。徙倚竟日。作桃源憶故人一首。

斜陽寂歷柴門閉。一點炊煙時起。雞犬往來林外。俱有蕭然意。衰翁老去。疎榮利。絕愛山城無事。臨去畫樓頻倚。何日重來此。

又高樓韻中

欄干幾曲高齋路。正在重雲深處。丹碧未乾人去。高棟空留句。離離芳草長亭暮。無奈征車不住。惟有斷鴉煙渚。知我頻回顧。

又

一彈指頃浮生過。隨甌元知當破。去去醉吟高臥。獨唱何須和。殘年還我從來我。萬里江湖煙舸。脫盡利名韉鏢。世界元來大。

又

城南載酒行歌路。冶葉倡條無數。一朵鞦紅凝露。最是關心處。鶯聲無賴催春去。那更兼旬風雨。試問歲華何

許芳草連天暮。

又題華山圖

中原當日三川震。關輔回頭煨燼。淚盡兩河征鎮。日望中興運。秋風霖滿青青鬢。老卻新豐英俊。雲外華山千仞。依舊無人問。

極相思

江頭疎雨輕煙。寒食落花天。亂紅墜素。殘霞暗錦。一段淒然。惆悵東君堪恨處。也不念冷落樽前。那堪更看。漫空相趁。柳絮榆錢。

一叢花

樽前凝佇漫魂迷。猶恨負幽期。從來不慣傷春淚。爲伊後、滿滿羅衣。那堪更是。吹簫池館。青子綠陰時。回廊簾影畫參差。偏共睡相宜。朝雲夢斷知何處。倩雙燕、說與相思。從今判了。十分顛顛。圖要箇人知。

又

仙姝天上自無雙。玉面翠蛾長。黃庭讀罷心如水。閉朱戶、愁近絲簧。窗明几淨。閑臨唐帖。深炷寶奩香。人間無藥駐流光。風雨又催涼。相逢共話清都舊。歎塵劫、生死茫茫。何如伴我。綠篔青鷁。秋晚釣瀟湘。

隔浦蓮近拍

飛花如趁燕子。直度簾櫳裏。帳掩香雲暖。金籠鸚鵡驚起。凝恨慵梳洗。粧臺畔。蘸粉纖纖指。寶釵墜。才醒又困。厭厭中酒滋味。牆頭柳暗。過盡一年春事。晷畫高樓怕獨倚。千里孤舟。何處煙水。

又

騎鯨雲路倒景。醉面風吹醒。笑把浮丘袂。寥然非復塵境。震澤秋萬頃。煙霏散。水面飛金鏡。露華冷。湘妃睡起。鬢傾釵墜。情整。臨風舞起。零亂塞鴻清影。河漢橫斜夜漏永。人靜。吹簫同過嶺。緜。

昭君怨

畫水蟲聲庭院。人倦懶搖團扇。小景寫瀟湘。自生涼。簾外蹴花雙燕。簾下有人同見。寶篆坼宮黃。炷熏香。

雙頭蓮 呈范至能侍制

華鬢星星。驚壯志成虛。此身如寄。蕭條病驥。向暗裏。消盡當年豪氣。夢斷故國山川。隔重重煙水。身萬里。舊社凋零。青門俊遊誰記。盡道錦呈繁華。歎官閑畫永。柴荆添睡。清愁自醉。念此際。付與何人心事。縱有楚梅吳檣。如何時東逝。空悵望。繪美菽香。秋風又起。

南歌子 送周機宜之益昌

異縣相逢晚。中年作別難。暮秋風雨客衣寒。又向朝天門外。話悲歡。瘦馬行霜棧。輕舟下雪灘。烏奴山下一林丹。爲說三年常寄夢。魂聞。

豆葉黃

春風樓上柳腰肢。初試花前金縷衣。娟娟娉娉不自持。曉粧遲。畫得蛾眉勝舊時。

又

一春常是雨和風。風雨晴時春已空。誰惜泥沙萬點紅。恨難窮。恰似衰翁一世中。

醉落魄

江湖醉客。投盃起舞遺烏犢。三更冷翠露衣濕。娟娟菱歌。催落半川月。空花昨夢休尋覓。雲臺離閣俱陳迹。元來只有閑難得。青史功名天卻無心惜。

鵲橋仙

華燈縱博。雕鞍馳射。誰記當年豪舉。酒徒一一取封侯。獨去作。江邊漁父。輕舟八尺。低篷三扇。占斷蘋洲煙雨。鏡湖元自屬閑人。又何必。君恩賜與。

又

一竿風月。一簑煙雨。家在釣臺西住。賣魚生怕近城門。況肯到紅塵深處。潮生理。權。潮平繫纜。潮落浩歌歸去。時人錯把比嚴光。我自是無名漁父。

又夜闌杜鵑

茆簷人靜。蓬窗燈暗。春晚連江風雨。林鶯巢燕總無聲。但月夜常啼杜宇。催成清淚。驚殘孤夢。又揀深枝飛去。故山猶自不堪聽。況半世飄然羈旅。

長相思

雲千重。水千重。身在千重雲水中。月明收釣筒。頭未童。耳未聾。得酒猶能雙臉紅。一尊誰與同。

又

橋如虹。水如空。一葉飄然煙雨中。天教稱放翁。側船篷。使江風。蟹舍參差漁市東。到時聞暮鐘。

又

面蒼然。鬢皤然。滿腹詩書不直錢。官閑常晝眠。晝凌煙。上甘泉。自古功名屬少年。知心惟杜鰲。

又

暮山青。暮霞明。夢筆橋頭艇子橫。蘋風吹酒醒。看潮生。看潮平。小住西陵莫較程。蓴絲初可烹。

又

悟浮生。厭浮名。回視千鍾一髮輕。從今心太平。愛松聲。愛泉聲。寫向孤桐誰解聽。空江秋月明。

菩薩蠻

江天淡碧雲如掃。蘋花零落蓴絲老。細細晚波平。月從波面生。漁家真箇好。悔不歸來早。經歲洛陽城。鬢絲添

幾莖。

又

小院蠶眠春欲老。新巢燕乳花如掃。幽夢錦城西。海棠如舊時。當年真草草。一櫂還吳早。題罷惜春詩。鏡中添

鬢絲。

訴衷情

當年萬里覓封侯。疋馬戍梁州。關河夢斷何處。塵暗舊貂裘。胡未滅。鬢先秋。淚空流。此生誰料。心在天山。身老

滄洲。

又  
衫初入九重城。結友盡豪英。蠟封夜半傳檄，馳騎諭幽并。時易失，志難成。鬢絲生。平章風月，彈壓江山，別是名。

生查子

山荷主恩，聊試扶犁手。新結小茆茨，恰占清江口。風塵不化衣，鄰曲常持酒。那似宦遊時，折盡長亭柳。

又

空燕委巢，院靜鳩催雨。香潤上朝衣，客少閑談麈。鬢邊千縷絲，不是吳蠶吐。孤夢泛瀟湘，月落聞柔櫓。

破陣子

至千鍾良易，年過七十常稀。眼底榮華元是夢，身後聲名不自知。營營端爲誰。幸有旗亭沽酒，何妨鬪紙題。幽谷雲蘿朝採藥，靜院軒窗夕對棋。不歸真箇癡。

又

破空花塵世，放輕昨夢浮名。蠟屐登山真率飲，筇杖穿林自在行。身閑心太平。料峭餘寒猶力，廉纖細雨初。苔紙閑題谿上句，菱唱遙聞煙外聲。與君同醉醒。

上西樓一名相見歡

頭綠暗紅稀，燕交飛。忽到當年行處，恨依依。灑清猿，歎人事，與心違。滿酌玉壺花露送春歸。

點絳脣

藥歸來，獨尋茆店，沽新釀。暮煙千嶂，處處聞漁唱。醉弄扁舟，不怕黏天浪。江湖上，遮回疎放，作箇閑人樣。

謝池春

歲從戎，曾是氣吞殘虜。陣雲高，狼烽夜舉。朱顏青鬢，擁雕戈西戍。笑儒冠自來多誤。功名夢斷，卻泛扁舟吳。漫悲歌，傷懷弔古。煙波無際，望秦關何處。歎流年，又成虛度。

又

賀監湖邊初繫放翁歸棹。小園林時時醉倒。春眠驚起。聽啼鶯催曉。歎功名、讓人堪笑。朱橋翠徑，不許京塵飛到。挂朝衣、束歸欠早。連宵風雨。捲殘紅如掃。恨樽前、送春人老。

又

七十衰翁，不減少年豪氣。似天山、淒涼病驥。銅駝荆棘。灑臨風清淚。甚情懷、伴人兒戲。如今何幸，作箇故谿歸計。鶴飛來、晴嵐暝翠。玉壺春酒。約羣仙同醉。洞天寒、露桃開未。

一落索

滿路遊絲飛絮。韶光將暮。此時誰與說新愁。有百轉、流鶯語。頻仰人間今古。神仙何處。花前須判醉扶歸。酒不到劉伶墓。

又

識破浮生虛妄。從人譏謗。此身恰是弄潮兒。曾過了千重浪。且喜歸來無恙。一壺春釀。雨簑煙笠傍漁磯。應不是封侯相。

杏花天

老來駒隙駸駸度。算只合、狂歌醉舞。金盃到手君休訴。看著春光又暮。誰爲倩、柳條繫住。且莫遣、城笳催去。殘紅轉眼無尋處。盡屬蜂房燕戶。

太平時

竹裏房櫳一徑深。靜悄悄。亂紅飛盡綠成陰。有鳴禽。臨罷闌亭無一事。自修琴。銅爐裊裊海南沉。洗塵襟。

戀繡衾

不惜貂裘換釣篷。嗟時人、誰識放翁。歸權借樵風穩。數聲聞、林外暮鐘。幽棲莫笑蝸廬小。有雲山、煙水萬重。半世向丹青看。喜如今、身在畫中。

又

無方能駐臉上紅。笑浮生、擾擾夢中。平地是、冲霄路。又何勞、千日用功。飄然再過蓮峯下。亂雲深、吹下暮鐘。訪

舊隱依然在。但鶴巢時有墮松。

### 風入松

十年裘馬錦江濱。酒隱紅塵。萬金選勝鸞花海。倚疎狂驅使青春。吹笛魚龍盡出。題詩風月俱新。自憐華髮滿紗巾。猶是官身。鳳樓常記當年語。問浮名何似身親。欲寄吳牋說與。這回真箇閑人。

### 真珠簾

燈前月下嬉遊處。向笙歌錦繡叢中相遇。彼此知名。纔見便論心素。淺黛嬌蟬風調別。最動人。時時偷顧。歸去想閑牕深院。調絃促柱。樂府初翻新譜。漫裁紅點翠。閑題金縷。燕子入簾時。又一番春暮。側帽燕脂坡下過。料也記前年崔護。休訴。待從今須與。好花爲主。

### 風流子 一名內家嬌

佳人多命薄。初心慕。德耀嫁梁鴻。記綠窗睡起。靜吟閑詠。句翻離合。格變玲瓏。更乘興素紈留喜墨。織玉撫孤桐。蟾滴夜寒。水浮微凍。鳳牋春麗。花砑輕紅。人生誰能料。堪悲處。身落柳陌花叢。空羨畫堂鸚鵡。深閉金籠。向寶鏡鸞釵。臨粧常晚。繡茵牙版。催舞還慵。腸斷市橋月笛。燈院霜鐘。

### 雙頭蓮

風卷征塵。堪歎處。青驄正搖金轡。客襟貯淚。漫萬點如血。憑誰持寄。佇想豔態幽情。歷江南佳麗。春正媚。怎忍長亭。匆匆頓分連理。目斷淡日平蕪。煙濃樹遠。微茫如薺。悲歡夢裏。奈倦客又是關河千里。最苦唱徹驪歌。重遲留無計。何限事。待與丁寧。行時已醉。

### 鷓鴣天

杖屨尋春苦未遲。洛城櫻筍正當時。三千里外歸初到。五百年前事總知。吹玉笛。渡清伊。相逢休問姓名誰。小車處士深衣叟。曾是天津共賦詩。

### 蝶戀花

禹廟蘭亭今古路。一夜清霜。染盡湖邊樹。鸚鵡杯深君莫訴。他時相遇知何處。冉冉年華留不住。鏡裏朱顏。畢



竟消磨去。一句丁寧君記取。神仙須是閑人做。

跋

先太史之文。於古則詩書左氏。莊騷史漢。於唐則韓昌黎。於本朝則曾南豐。是所取法。然稟賦宏大。造詣深遠。故落筆成文。則卓然自爲一家。人莫測其涯涘。蓋今學者。皆熟誦劍南之詩。繼稿雖家藏。世亦多傳寫。惟遺文自先太史未病時。故已編輯。而名以渭南矣。第學者多未之見。今別爲五十卷。凡命名及次第之旨。皆出遺意。今不敢紊。乃錄梓溧陽學宮。以廣其傳。渭南者。晚封渭南伯。乃自號爲陸渭南。嘗謂子適曰。劍南乃詩家事。不可施於文。故別名渭南。如入蜀記。牡丹譜。樂府詞。本當別行。而異時或至散失。宜用廬陵所刊歐陽公集例。附于集後。此皆子適嘗有疑而請問者。故備著于此。嘉定十有三年十一月壬寅。幼子承事郎知建康府溧陽縣主管勸農事子適謹書。

放翁富于文辭。諸體具備。惜其集罕見于世。馬氏通考載渭南集三十卷。今不傳。邇來吳中士夫。有抄而秘其本者。亦頗無詮次。紹興郡有刻本。去入蜀記。涸增詩九卷。據翁命子云。詩家事不可施于文。況十僅一二耶。既得光祿華君活字印本渭南文集五十卷。乃嘉定中翁幼子適編輯也。跋云。命名次第。皆出遺意。但舛板多謬多遺。因嚴加讎訂。并付剞劂。自秋徂冬。凡六月而書成。湖南毛晉記。

# 劍南詩藁序

前輩有欲補詩史一字之闕。終莫適其當者。夫發言寓意未必惟一字之工。或者窮思畢慮之弗逮。人才相去。乃爾遠耶。太守山陰陸先生劍南之作。傳天下。眉山蘇君林收拾尤富。適官屢邑。欲錄本。爲此部盛事。迺以纂次屬師尹。亦旣斂衽肅觀。則浩渺闔肆。莫測津涯。掩卷太息者久之。獨念吾儕自從事先生之門。間有疑闕。自公餘可以從容質正。幸來者見斯文大全。用是不敢辭。劍南詩藁六百九十四首。續藁三百七十七首。蘇君於集外得一千四百五十三首。凡二千五百二十四首。又口七首。釐爲口十卷。總曰劍南。因其舊也。文字傳襲失真。類不滿人意。其如此書得之所見。有以傳信而無疑。若夫發乎情性。充乎天地。見乎事業。忠憤感激。憂思深遠。一念不忘君。先生之志。且有當世巨公爲之發揮。非師尹敢任。淳熙十有四年臘月。幾望門人迪功郎監嚴州在城都稅務。枯齋鄭師尹謹書。

# 劍南詩藁目錄

卷一.....一

別會學士 送仲高兄宮學秩滿赴行在 題閣郎中溧水東臯園亭 和陳魯山十詩以孟夏草木長變  
屋樹扶疎爲韻十首 看梅絕句五首 春晚簡陳魯山 寄酬曾學士學宛陵先生體比得書云所寓廣  
教僧舍有陸子泉每對之輒奉懷 夜讀兵書 二月二十四日作 送曾學士赴行在 霽夜觀月 新  
夏感事 留題雲門草堂 送韓梓秀才十八韻 送陳德邵宮教赴行在二十韻 朱子雲園中觀花  
酬妙湛闍梨見贈妙湛能某其師璠公蓋嘗與先君遊云 次韻魯山新居絕句二首 寄陳魯山二首  
戲題江心寺僧房壁 泛瑞安江風濤貼然 平陽驛舍梅花 渡浮橋至南臺 出縣 還縣 雨晴遊  
洞宮山天慶觀坐間復雨 寄陳魯山正字 航海 海中醉題時雷雨初霽天水相接也 溪行二首  
自來福州詩酒殆廢北歸始稍稍復飲至永嘉括蒼無日不醉詩亦屢作此事不可不記也 東陽道中  
東陽觀醑醺 送李德遠寺丞奉祠歸臨川 送王嘉叟編修出佐南昌 送王龜齡著作赴會稽大宗丞  
二首 送杜起莘殿院出守遂寧 和會待制遊兩山三首 雨中出遊夜歸 謝李平叔郎中問疾 聞  
武均州報已復西京 喜小兒輩到行在 病起寄會原伯兄弟 送湯岐公鎮會稽 周洪道學士許折  
贈館中海棠以詩督之 送七兄赴揚州帥幕 閏二月二十日遊西湖 劉太尉挽歌辭二首 過林黃  
中食柑子有感學宛陵先生體 玉牒所迎駕望見周洪道舍人 送梁諫議 以石芥送劉韶美禮部劉  
比釀酒勁甚因以爲戲二首 出都 會原伯屢勸居城中而僕方欲自梅山入雲門今日病酒偶得長句  
奉寄 村居 看山 夏夜泛舟書所見 秋陰 盆池 比從人覓酒皆酸薄戲作此詩 買魚二首  
秋雨 晨起偶題 悲秋 寄張真父舍人二首 幽居 法寶璉師求竹軒詩 欲遊五峯不果往小詩  
寄瑩老 謝王彥光提刑見訪并送茶 送查元章赴夔漕 逍遙 病中簡仲彌性唐克明蘇訓直 送  
王景文 送呂彥升參謀 无咎兄郡齋燕集有詩末章見及敬次元韻 次韻无咎別後見寄 晚泊慈

姥磯下二首 七月十四夜觀月 夜宿陽山磯將曉大雨北風甚勁俄傾行三百餘里遂抵雁翅浦 望

江道中 秋夜讀書每以二鼓盡為節 往在都下時與鄒德章兵部同居百官宅無日不相從僕來佐豫

章而德章亦諳高安感事述懷作歌奉寄 寄答綿州楊齊伯左司 送全州趙都曹 病中作 夜夢從

數客雨中載酒出遊山川城闕極雄麗云長安也因與客馬上分韻作詩得遊字 去年余佐京口遇王嘉

叟從張魏公督師過焉魏公道免相嘉叟亦出守莆陽近辱書報魏公已葬衡山感歎不已因用所遺拄頰

亭詩韻奉寄 自詠示客 醉中歌 寄陶茂安監丞 燒香 寒食臨川道中 上巳臨川道中 寄別

李德遠二首 初夏道中 示兒子 重五同尹少稷觀江中競渡 過玉山辱芮國器檢詳留語甚勤因

寄此詩兼呈韓无咎右司 隨意 寄冀實之正言 遊山西村 觀村童戲溪上 雨霽出遊書事 殘

春 家園小酌二首 寄王嘉叟吏部 夜讀隱書有感 上虞逆旅見舊題歲月感懷 舜廟懷古 題

十八學士園 統分稻晚歸二首 衰病二首 霜風 小酌 十月苦蠅二首 丫頭巖見周洪道以進

士入都日題字 獨學 霜月 寄黃龍升老 贈進賢劉令 書室名可齋或問其義作此告之 寄酬

楊齊伯少卿

卷一

自笑 夜聞松聲有感 十二月一日二首 春日二首 僧房假榻 聞雨 休日有感 題徐子禮宗

丞自覺齋 送張叔潛編修造朝四首 有感 澗松 將赴官夔府書懷 送芮國器司業二首 春陰

投梁參政 宿楓橋 晚泊 金山觀日出 弔李翰林墓 雨中泊趙屯有感 黃州 武昌感事

夜思 哀郢二首 江陵道中作 石首縣雨中繫舟戲作短歌 初寒 醉歌 秋風 塔子磯 重陽

早寒 公安 沙頭 大寒出江陵西門 江夏與章冠之遇別後寄贈 題江陵村店壁 馬上 水

亭有懷 移船 將離江陵 六言 江上 旅食 滄灘 松滋小酌 晚泊松滋渡口二首 荆門冬

夜 繫舟下牢溪游三游洞二十八韻 三游洞前巖下小潭水甚奇取以煎茶 扇子峽山腹有草閣小

亭極幽邃意其非俗人居也 蝦蟆碚 黃牛峽廟 過夷陵適值祈雪與葉使君清飲談括蒼舊游既行

舟中雪作戲成長句奉寄 伯虎頭灘下 過東歸灘入馬肝峽 新安驛 秣歸醉中懷都下諸公示坐  
客 憩歸州光孝寺寺後有楚冢近歲或發之得寶玉劍佩之類 飲罷寺門獨立有感 泛溪船至巴東  
巴東遇小兩二首 秋風亭拜寇萊公遺像二首 巴東令廡白雲亭 謁巫山廟兩廡碑版甚衆皆言  
神在禹開峽之功而詆宋玉高唐賦之妄余亦賦詩一首 聞猿 瞿唐行 入瞿唐登白帝廟 登江樓  
雪中臥病在告戲作 雪晴 玉笈齋書事二首 記夢 懷西 山寺 躡磧 寒食 晚晴書事呈  
同舍 鄉中每以寒食立夏之間省墳客藥適逢此時悽然感懷二首 試院春晚 倚闌 自詠 午輿  
風雨中望峽口諸山奇甚戲作短歌 夜坐庭中 新蔬 初夏懷故山 初夏新晴 定拆號日喜而  
有作 睡起 四月二十九日作 苦熱 拆號前一日作 暴雨 西齋雨後 急雨 晚晴聞角有感  
夏夜起坐南亭達曉不復寐 夜登白帝城樓懷少陵先生 假日書事 林亭書事二首 遊臥龍寺  
久病灼艾後獨臥有感 秋晚病起 秋思 一病四十日天氣遂寒感懷有賦 登城 夔州重陽  
追懷曾文清公呈趙教授趙近嘗示詩 謝張廷老司理錄示山居詩二首 秋晴欲出城以事不果 南  
窗 遣興 九月三十日登城門東望悽然有感 初冬野興 東屯呈同遊諸公 別王伯高 書驛壁  
二首 醉中到白崖而歸 十二月十九日晚巫山送客歸回望西寺小閣縹緲可愛遂與趙郭二教授同  
遊抵夜乃還楚鄉偶得長句呈二君

卷二十一

三九

飯三折舖舖在亂山中 小市 酒無獨飲理 畏虎 戲題 蟠龍瀑布 題梁山軍瑞豐亭 馬上  
鄰山縣道上作 鄰水延福寺早行 岳池農家 過廣安弔張才叔諫議 果州驛 留樊亭三日王覺  
民檢詳日攜酒來飲海棠下比去花亦衰矣二首 柳林酒家小樓 南池 唐長慶中南池新亭碑在漢  
高帝廟側亭已失所在矣 聞杜鵑戲作絕句 鼓樓舖醉歌 登慧照寺小閣 春雨 風雨中過龍洞  
閣 驛舍海棠已過有感 簫箏驛 嘉川舖遇小兩景物尤奇 老君洞 大安病酒留半日王守復來  
招不往送酒解醒因小飲江月館 金牛道中遇寒食 曉發金牛 山南行 南鄭馬上作 和高子長

參議道中二絕 次韻張季長題龍洞 次韻子長題吳太尉雲山亭 送劉戒之東歸 周元吉蟠室詩

送范西叔赴召二首 寄鄧公壽 簡章德茂 自三泉泛嘉陵至利州 木瓜鋪短歌 夜抵葭萌惠

照寺寓榻小閣 太息二首 閬中作二首 遊錦屏山謁少陵祠堂 仙魚鋪得仲高兄書 自閬復還

漢中次益昌 驛亭小憩遺興 再過龍洞閣 自笑 三泉驛舍 嘉川鋪得檄遂行中夜次小柏 歸

次漢中境上 沔陽夜行 道中累日不肉食至西縣市中得羊因小酌 初離興元 自興元赴官成都

書事 兩中過臨溪古堞 南沮水道中 長木晚興 遺興 長木夜行抵金堆市 赴成都泛舟自

三泉至益昌謀以明年下三峽 壬辰十月十三日自閬中還興元遊三泉龍門十一月二日自興元適成

都復攜兒曹往遊賦詩 予行蜀漢間道出潭毒關下每憩羅漢院山光軒今復過之悵然有感 棧路書

事 雪晴行益昌道中頗有春意 思歸引 誌公院在劍門東五里院東石壁間有若僧負杖者杖端髻

髻有刀尺拂子之狀 劍門道中遇微雨 劍門關 劍門城北回望劍關諸峯青入雲漢感蜀亡事慨然

有賦 丹芝行 過武連縣北柳池安國院養泉試日鑄顧渚茶院有二泉皆甘寒傳云唐僖宗幸蜀在道

不豫至此飲泉而愈賜名報國靈泉云三首 宿武連縣驛 初入西州境述懷 綿州魏成縣驛有羅江

東詩云芳草有情皆礙馬好雲無處不遮樓戲用其韻 卽事 青村寺 行綿州道中 越王樓二首

東津 東山 綿州錄參軍廳觀姜楚公畫鷹少陵爲作詩者 羅江驛翠望亭讀宋景文公詩 鹿頭關

過龐士元廟 遊漢州西湖 嚴君平卜臺 梅花 拜張忠定公祠二十韻 成都歲暮始微寒小酌遣

興 再賦梅花 登塔 先主廟次唐貞元中張儼詩韻三首 睡起書事 西郊尋梅 分韻作梅花詩

得東字 宇文子友聞予有西郊尋梅詩以詩借觀次其韻 海棠 簡南禪勤長老 和譚德稱送牡丹

二首 初到蜀州寄成都諸友 自蜀州暫還成都奉簡諸公 摩訶池 三月十七日夜醉中作 嘉祐

院觀壁間文湖州墨竹 春晚書懷三首 偶憶萬州戲作短歌 驛舍見故屏風畫海棠有感 思政堂

東軒偶題 荔枝樓小酌二首 嘉陽官舍奇石甚富散棄無領略者予始取作假山因名西齋曰小山堂

爲賦短歌 望雲樓晚興 護國天王院故神霄玉清萬壽宮也廢圯略盡而規模尙極壯麗過之有感

登荔枝樓 再賦荔枝樓 能仁院前有石像丈餘蓋作大像時樣也

卷四

五八

謁凌雲大像 凌雲醉歸作 獨遊城西諸僧舍 西林院 聽事前紫薇花二本甚盛戲題絕句 同何

元立擎肩吾至東丁院汲泉煮茶二首 癸巳夏旁郡多苦旱惟漢嘉數得雨然未足也立秋夜三鼓雨至

明日晴後未止高下霑足喜而有賦二首 晚登望雲二首 立秋後十日風雨凄冷獨居有感 晦日西

窗懷故山 秋日懷東湖二首 小山之南作曲欄石磴繚繞如棧道戲作二篇 得成都諸友書勸少留

嘉陽戲作 道院 醉中感懷 玻瓈江 夜思 兩夜懷唐安 迎詔書 秋夜遣懷 送客至江上

兩中至西林寺 休日登花將軍廟小樓 深居 秋夜獨醉戲題 感事 醉鄉 夜讀岑嘉州詩集

次韻師伯渾見寄 社前一夕未昏輒寢中夜乃得寐 晚雨 社日 夜雨感懷 八月二十二日嘉州

大閱 九月六夜夢中作笑詩覺而忘之明日戲追補一首 重九會飲萬景樓 久客書懷 初報嘉陽

除官還東湖有期喜而有作 聞勾龍司戶會客山亭送酒殺及橄欖并簡諸同僚 九月十六日夜夢駐

軍河外遣使招降諸城覺而有作 何元立示九日詩臥病累日乃能次韻 成都行 聞虜亂有感 醉

歌 初寒 木山 寒夜遣懷 嘉陽絕無木犀偶得一枝戲作 兩後登西樓獨酌 喜晴 曉出城東

寶劍吟 十月一日浮橋成以故事宴客凌雲 聞王嘉叟訃報有作 出城至呂公亭按視修堤 登

樓 醉中作四首 觀大散關圖有感 嘉州守宅舊無後園因農事之隙爲種花築亭觀甫成而歸戲作

長句 連日扶病領客殆不能支枕上懷故山偶成 余往與宇文叔介同客山南今年叔介客死臨安十

月十一日夜忽夢相從取架上書共讀如平生讀未竟忽辭去留之不可曰欲歸校藥方既覺依然不能已

因賦此詩 金錯刀行 言懷 十月十九日與客飲忽記去年此時自錦屏歸山南道中小獵今又將去

此矣 冬日 十月十四夜月終夜如晝 下元日五更詣天慶觀寶林寺 梅花四首 西園 胡無人

公無渡河 長門怨 長信宮詞 銅雀妓 得韓无咎書皆寄使虜時寔東都驛中所作小闋 曉坐

斷碑歎 夜行至平羌憩大悲院 迓益帥馬上作 蜀酒歌 十一月八日夜燈下對梅花獨酌累日



勞甚頗自慰也 醉後草書歌詩戲作 古藤杖歌 歲晚書懷 累日倦甚不能觸客睡起戲作 種花

雨中登樓望大像 迎赦呈王志夫李德孺師伯渾 冬日 雨中睡起 十二月初一日得梅一枝絕

奇戲作長句 無題 快晴 獨坐 十二月十一日視築隄 題龍鶴菜帖 春愁曲 荀秀才送蠟梅

十枝奇甚 離嘉州宿平羌 瑞草橋道中作 遊修覺寺 晚步湖上 暮春 池上醉歌 四月五夜

見螢 塞上曲 夜聞塔鈴及泉聲

卷五.....七五

曉歎 苦筍 月下作二首 小宴 小閣納涼 晨雨 湖上筍盛出戲作長句 雨後集湖上 過大

蓬嶺度繩橋至杜秀才山莊 宿杜氏晨起遇雨 翠圍院 野飯 化成院 慈雲院東閣小憩 遊靈

鷲寺堂中僧闕然獨作禮開山定心尊者尊者唐人有問法者輒點胸示之時號點點和尚 桃源 白塔

院 急雨 東湖新竹 睡起試茶 五月五日蜀州放解榜第一人楊鑑具慶下孤生愴然有感 病酒

新愈獨臥蘋風閣戲書 神君歌 讀胡基仲舊詩有感 夏日湖上 對酒歎 病後暑雨書懷 雨聲

同何元立賞荷花追懷鏡湖舊遊 小樓 怡齋 龍湫歌 月夕 蒸暑思梁州述懷 湖上晚歸

秋聲 觀小孤山圖 飲酒 北窗梧葉坐間落四五有感 神山歌 久雨 古意 自唐安之成都

度笮 故袍 寓寶相有作 寓驛舍 題宇文子友所藏薛公鶴 宴西樓 月中歸驛舍 江濱池醉

歸馬上作 離成都後却寄公壽子友德稱 晨至湖上二首 池上見魚躍有懷姑熟舊遊 六月二十

五日曉出郊 作雨不成終夜極涼時去立秋五日也 池上晚雨 五十 記夢 凭欄 聽琴 秋思

醉書 樊氏莊龜泉 書懷二首 秋思三首 東園晚步 秋夜讀書戲作 太平花 日暮至湖上

秋興 秋色 秋聲 觀長安城圖 雨中作 夜讀了翁遺文有感 雷 龍眠畫馬 秋夜池上作

秋雨 臥病 夢入禪林有老宿方陞座或云通悟禪師也 蜀州大閣 放懷亭獨立有感 九月三

日同呂周輔教授遊大邑諸山 次韻周輔道中二首 憩黃秀才書堂 夜宿鶴鳴山 次韻周輔霧中

作 山中得長句戲呈周輔并簡朱縣丞 擣藥烏 出山 平雲亭 高秋亭 九日小疾不出 九日

試霧中僧所贈茶 我有美酒歌 次韻師伯渾見寄 自江源過雙流不宿徑行之成都 過綠楊橋  
五鼓自簇橋入府 客多福院晨起 雨中出謁歸畫臥 長歌行 夜食炒栗有感 秋夜懷吳中 遊  
三井觀 仙遊閣 寓居小菴纔表丈戲作 送華師從劍州張秘書之招

江上對酒作 自嘲 暮歸馬上作 臨別成都帳飲萬里橋贈譚德稱 夜宿二江驛 涉白馬渡慨然

有懷 瑞草橋 將之榮州取道青城 丈人觀 題丈人觀道院壁 宿上清宮 自上清延慶歸過丈

人觀少留 長生觀觀月 儲福觀 龍門洞 布金院 離堆伏龍祠觀孫太古畫英惠王像 登灌口

廟東大樓觀嶧江雪山 郫縣道中思故里 宿江原縣東十里張氏亭子未明而起 戲詠西州風土

宿彭山縣通津驛大風鄰園多喬木終夜有聲 眉州郡燕大醉中間道馳出城宿石佛院 雙柏 戊卒

說沉黎事有感 平羌道中望峨眉山慨然有作 次韻何元立都曹贈行 次韻楊嘉父先輩贈行 入

榮州境 井研道中 賴牟鎮早行 初到榮州 城上二首 西樓夕望 醉中懷眉山舊遊 登城望

西崦 甲午十一月十三夜夢右臂踊出一小劍長八九寸有光既覺猶微痛也 齋中夜坐有感 晚登

橫溪閣二首 昭德堂晚步 龍洞 客中夜寒戲作長謠 高齋小飲戲作 太液黃鵠歌有引 自唐

安徙家來和義出城迎之馬上作 乙未元日 別榮州 聞仲高從兄訃 夏日過摩訶池 早行 天

申筓前三日大聖慈寺華嚴閣燃燈甚盛遊人過於元夕 喜雨 夜聞浣花江聲甚壯 暑行憩新都驛

早發新都驛 謁諸葛丞相廟 自漢州之金堂過沈氏竹園小憩坐間微雨 自小雲頂上雲頂寺

馬上微雨 彌牟鎮驛舍小酌 遊彌牟菩提院庭下有凌霄藤附古楠其高數丈花已零落滿地 樓上

醉歌 伏日獨遊城西 五鼓送客出城馬上作 寓舍書懷 夜登城樓 試茶 成都大閱 書懷

遊大智寺 看月睡晚戲作 成都書事二首 雙溪道中 牛飲市中小飲呈坐客 自警 午寢 白

髮 明日午睡至暮復次前韻 醉中長歌 對酒 人日飲昭覺 上元前一日 上元二首 喜譚德

稱歸 春感 春晴暄甚遊西市施家園 花時遍遊諸家園十首 曉過萬里橋 自合江亭涉江至趙

園 春晴

卷七

一〇八

題明皇幸蜀圖 春寒連日不出 馬上偶成 夜宴 觀音院讀壁間蘇在廷少卿兩小詩次韻二首

錦亭 晚起 兩 春晚書懷 出朝天門繚長堤至劉侍郎廟由小西門歸 夜分讀書有感 中夜聞

大雪兩 春殘 武擔東臺晚望 行武擔西南村落有感 小飲房園 飯昭覺寺抵暮乃歸 自芳華

樓過瑤林莊 書懷 遊東郭趙氏園 卜居二首 馬上 夜登江樓 書歎 三月一日府宴學射山

對酒 題直舍壁 遊園覺乾明祥符三院至暮 遊合江園戲題 三月十六日作 食齋三首 次

韻范文淵 題醉中所作草書卷後 登子城新樓遍至西園池亭 小疾謝客 歸耕 聞孫巖老挂冠

歎仰之餘輒賦長句 松驪行 遣興 野意 雨中登安福寺塔 過野人家有感 幽居晚興 飯保

福 觀華嚴閣僧齋 閑中偶題二首 病中戲書三首 病起書懷二首 寺樓月夜醉中戲作三首

晚過五門 躬耕 晚興 夏夜大醉醒後有感 合江夜宴歸馬上作 齋居書事 午夢 江瀆池納

涼 晚步 姚將軍靖康初以戰敗亡命建炎中下詔求之不可得後五十年乃從呂洞賓劉高尙往來名

山有見之者予感其事作詩寄題青城山上清宮壁間將軍儻見之乎 客自鳳州來言岐雍間事悵然有

感 席上作 水亭偶題 避暑江上 夏白紵弁序 二首 久旱忽大雨涼甚小飲醉眠覺而有作

明日開霽益涼復得長句 夜讀東京記 感事 書歎 睡起 飯罷碾茶戲書 夢遊山水奇麗處有

古宮觀云雲臺觀也 月下醉題 野外劇飲示坐中 與青城道人飲酒作 銅壺閣望月 連日得兩

涼甚有作 待青城道人不至 劍客行 夜宴即席作 宿沱江彌勒院 學射道中感事 遊學射觀

次壁間韻 昇仙橋遇風雨大至憩小店 龍挂 芳華樓夜宴 遣興 六月九日夜步月至朝真觀

十日夜月中馬上作 百歲 獨飲醉臥比覺已夜半矣戲作此詩 蒙恩奉祠桐柏 和范待制月夜有

感 和范待制秋興三首 和范待制秋日書懷二首

卷八

一一四

遊學射山遇景道人 城東醉歸深夜復呼酒作此詩 融州寄松紋劍 歲晚 玉京行 步出萬里橋  
門至江上 晚步 數日寒頻減頗有春意感懷賦短歌 春愁 歲暮感懷 梅花 寺居夙興 萬里  
橋江上習射 關山月 出塞曲 戰城南 讀書二首 晚過保福 偶過浣花感舊遊戲作 夜讀唐  
諸人詩多賦烽火者因記在山南時登城觀塞上傳烽追賦一首 平明出小東門觀海 寺居睡覺二首  
樓上醉書 醉題 初春出遊 芳華樓夜飲二首 東門外遍歷諸園及僧院觀遊人之盛 城東馬  
上作二首 丁酉上元三首 後陵永慶院在大西門外不及一里蓋王建墓也有二石幢猶當時物又有  
太后墓琢石爲人馬甚偉 小飲趙園 和范舍人書懷 和范舍人病後二詩末章兼呈張正字二首  
江路見杏花 夜聞雨聲 海棠二首 張園海棠 登劍南西川門感懷 和范舍人永康青城道中作  
宿上清宮 登上清小閣 小憩長生觀飯已遂行 新津小宴之明日欲遊修覺寺以雨不果呈范舍  
人二首 眉州釋舍睡起 送范舍人還朝 過魚蛇市小寺 眉州作 過修覺山不果登覽 青城縣  
會飲何氏池亭贈譚德稱 題菴壁 幽居二首 浣花女 七月八日馬上作 江樓 夜登小南門城  
上 野步至青羊宮偶懷前年嘗劇飲於此 月夜江濱池納涼 華亭院僧房二首 乾明院觀畫 登  
城 秋日登仙遊閣 自詠 雜詠四首 大醉歸南禪弄影月下有作 訪楊先輩不遇因至石室 病  
酒戲作 訪昭覺老 晝臥 晚步江上 夜坐 夜行 悲秋 城北青蓮院方丈壁間有畫燕子者過  
客多題詩予亦戲作二絕句 睡起 天涯 暇日行城上同行追不能及 感秋 雙流旅舍三首 早  
行至江原 安仁道中二首 八月十四夜三叉市對月 豐橋旅舍作 文君井 白鶴館夜坐 南津  
勝因院亭子 登邛州譙門門三重其西偏有神仙張四郎畫像張蓋隱白鶴山中 書寓舍壁二首 次  
韻使君吏部見贈時欲遊鶴山以雨止 西巖翠屏閣 幽居院 中溪 天台院有小閣下臨官道予爲  
名曰玉霄 山中小雨得宇文使君簡問嘗見張仙翁乎戲作一絕 雨中山行至松風亭忽澄霽 贈宋  
道人 自山中泛舟歸郡城 次韻宇文使君山行 同王無玷羅用之訪臨邛道士墓 登太平塔 中  
夜投宿修覺寺 絕勝亭 雲谿觀竹戲書二絕 九月十日如漢州小獵於新都彌牟之間投宿民家

蠟罷夜飲示獨孤生三首 自廣漢歸宿十八里草市 東郊飲村酒大醉後作 九月十八夜夢避雨叩

一僧院有老宿年八十許邀留甚勤若舊相識者夢中為賦此詩 秋晚登城北門

卷九

一四二

秋興 夜飲 暮秋二首 夜雨有感 道室 飯罷戲作 初冬夜宴 冬夜醉歸復小飲 病酒述懷

數日喧妍頗有春意予閑居無日不出遊戲作 遣興 趙將軍弁序 江樓醉中作 曳策 謁漢昭

烈惠陵及諸葛公祠宇 遙夜 遠遊 大雪歌 簡譚德稱 排悶 夜意三首 玉局觀拜東坡先生

海外畫像 心太平菴 訪客至西郊 得都下八月書報蒙恩牧絳州 晚起二首 江樓吹笛飲酒大

醉中作 晚登子城 風興出謁 十一月三日過升仙橋作三絕 遣興 草堂拜少陵遺像 青羊宮

小飲贈道士 夜寒二首 書懷 記夢二首 醉中出西門偶書 訪客不遇 劍客行 故蜀別苑在

成都西南十五六里梅至多有兩大樹天矯若龍相傳謂之梅龍予初至蜀嘗為作詩自此歲常訪之今復

賦一首丁酉十一月也 閑意 飲罷夜歸 江亭冬望 大風登城 書雨 一笑 歲晚懷鏡湖舊隱

慨然有作 華髮 歎息 冬至 城南尋梅四首 書歎 感興二首 暮冬夜宴 枕上 謁石犀廟

江上散步尋梅偶得三絕句 漣漪亭賞梅 芳華樓賞梅 浣花賞梅 蜀苑賞梅 大醉梅花下走

筆賦此 之廣都顰鐵像院 廣都江上作 宿龍華山中寂然無一人方丈前梅花盛開月下獨觀至中

夜 次韻張季長正字梅花 次韻季長見示 廣都道中呈季長 看梅歸馬上戲作五首 別後寄季

長 中夜對月小酌 客愁 詩酒 道室夜意 道室晨起 城南王氏莊尋梅 遊萬里橋南劉氏小

園 過笮橋道中龍祠小留 道上見梅花 倚樓 寄王季夷 丁酉除夕 正月二日晨出大東門是

日府公宴移忠院 小飲落梅下戲作送梅 立春 初春出遊戲作 初春遣興三首 予年十六始識

葉晦叔於西湖上後二十七年晦叔之弟聲叔來為臨邛守相遇於成都晦叔沒久矣訪其遺文略無在者

乃賦此詩 初春探花有作 遊諸葛武侯書臺 觀花 張園觀海棠 月夕 夜飲即事 夜宴賞海

棠醉書 二月十六日賞海棠 即席 東歸有日書懷 眉州披風榭拜東坡先生遺像

訪青神尉廡借景亭蓋山谷先生舊遊也 舟過玉津 敘州三首 瀘州使君巖在城南一里深三丈有

泉出其左音中律呂木龍巖相距亦里許黃太史所嘗遊憩也 南定樓遇急雨 夜泊合江縣月中小舟

謁西涼王祠 風順舟行甚疾戲書 舟中對月 漁翁 涪州道中 涪州 北巖 平都山 忠州禹

廟 忠州醉歸舟中作 雨中遊東坡 龍興寺弔少陵先生寓居 遊萬州岑公洞 萬州放船過下巖

小留 白帝泊舟 醉中下瞿唐峽中流觀石壁飛泉 暮次秭歸 歸州重五 屈平廟 楚城 新灘

舟中作 舟出下牢關 峽口夜坐 峽州甘泉寺 峽州東山 江上觀月 初發夷陵 舟中夜坐

初到荊州 醉歸 出遊 大堤 阻風 初發荊州 泊公安縣 劉郎浦夜賦 小雨極涼舟中熟睡

至夕 岳陽樓 再賦一絕 乘大風發巴陵 通濟口 醉書 南樓 黃鶴樓 頭陀寺觀王簡栖碑

有感 夜熱 舟中偶書 燈下讀書 泊三江口 自雪堂登四望亭因歷訪蘇公遺迹至安國院 月

下步至臨臯亭 發黃州泊巴河遊馬祈寺 舟行蘄黃間雨霽得便風有感 南烹 泊蘄口泛月湖中

初見廬山 六月十四日宿東林寺 舟過小孤有感 雁翅夾口小酌 長風沙 泛小舟姑熟溪口

明日再遊又賦 過采石有感 將至金陵先寄獻劉留守 登賞心亭 夜泊龍廟回望建康有感

將至京口 荆谿館夜坐 泝谿 歸雲門 月下自三橋泛湖歸三山 懷成都十韻 湖村秋曉 夜

夢與宇文子友譚德稱會山寺若餞予行者明日黎明得子友書感歎久之乃作此詩 寒夜 偷閑 冬

夜聞雁有感 書懷 湖中暮歸 題齋壁 新葺門屋 吾廬 冬夜泛舟有懷山南戎幕 夢至成都

悵然有作二首 月夕 將入閩夜行之雲門 山中觀殘菊追懷眉山師伯渾 自雲門之陶山肩輿者

失道行亂山中有茅舍小塘極幽邃求見主人不可意其隱者也 冬夜聽雨戲作二首 適園 欲行雨

未止 比作陳下瓜麴釀成奇絕屬病瘍不敢取醉小啜而已 大雨中離三山宿天章寺 早飯千溪蓋

千吉故居也 贈楓橋化城院 老僧 雙橋道中寒甚 行牌頭奴寨之間皆建炎未避賊所經也 早

發奴寨 題繡川驛 夜行宿湖頭寺 衢州道中作 過靈石三峯二首 宿仙霞嶺下 道中病瘍夕

卷十一

不飲酒至魚梁小酌因賦長句 宿魚梁驛五鼓起行有感二首 夢藤驛二首 梅花絕句十首

對酒 遺興 建安雪 雪晴至後園二首 開元暮歸 書懷 遊鳳凰山 園中雜書四首 烹茶

病中久止酒有懷成都海棠之盛 北齋 出塞曲 思故山 送錢仲耕修撰 建寧重五 雨晴至園

中 夏日三首 發書畫還故山戲書 白髮 懷譚德稱 客思二首 建安遺興六首 病起偶到復

菴 前有樽酒行二首 遊南塔院 感懷 兩夜 夜坐偶書 長歌行 兩夜不寐觀壁間所張魏鄭

公砥柱銘 客談荆渚武昌慨然有作 書懷 平生 自詠 池亭夜賦 兩夜偶書 思歸 客懷

伏中官舍極涼戲作 夢與劉韶美夜飲樂甚 暑夜 客意 夜香 柴懷叔殿院世綵堂 月夜 雙

清堂夜賦 采蓮三首 橋南納涼 芒屨 荔子絕句二首 官舍夙興 書懷 風月 大將出師歌

婕妤怨 移疾 病中懷故廬 夏夜不寐有賦 綠淨亭晚興 憶山南二首 夕雨二首 試茶

蕭陽餉荔子 初秋書懷 建州絕無艾意頗思之戲作 憶昔 客思 初秋夢故山覺而有作四首

寓歎 雙清堂醉臥 醉書 憶唐安 秋懷二首 晝臥聞碾茶 月下獨行橋上 夜意 秋夜書懷

思故廬 兩夜 北窗哦詩因賦二首 傲裝 追感梁益舊遊有作 蒲陽昭武延平送兵漸集戲書

別建安絕句三首 初發建安 宿北巖院 書感 長汀道中 黃亭夜雨 遊武夷山 泛舟武夷

九曲溪至六曲或云灘急難上遂回二首 崇安縣驛 過建陽縣以雙鵝贈東觀道士為長生鵝觀俯大

梁鵝得其所矣武夷險絕處有仙船架崖壁間數日前大風吹墮船木數寸堅硬如石予偶得之皆此行奇

事也各賦一詩 紫谿驛二首 鵝湖夜坐書懷 信州東驛晨起 玉山縣南樓晚望 玉壺亭 步過

縣南長橋遊南山普寧院山高處有塔院及小亭縹緲可愛恨不能到 枕上感懷 晚過招賢渡 臥輿

奏乞奉祠留衢州皇華館待命 寓舍偶題 夙興 夜坐 偶得石室酒獨飲醉臥覺而有作 午睡

贈柯山老人 寓館晚興 葉相最高亭 婺州州宅極日亭 謝演師送梅二首 訪毛平仲問疾與

其子适同遊柯山觀王質爛柯遺跡 月巖 弋陽縣驛 弋陽道中遇大雪 雪中感成都 雪後苦寒

雪後苦寒

雪後苦寒

雪後苦寒

行饒撫道中有感 對酒 梅花 雪中尋梅二首 江上梅花

擬峴臺觀雪 舊在成都初春無事日訪昭覺保福正法諸刹甚可樂也追懷慨然因賦長句 園中賞梅

二首 正月十五日出郊至金石臺二首 六日小飲園中光景鮮妍紅梅已坼恍記在果州偶得絕句

聞雁 撫州上元 登擬峴臺 燈夕有感 庚子正月十八日送梅 初春懷成都 春雨 兩中遺懷

二首 晚晴 春晚 春晚坐講忽夢泛舟飲酒樂甚既覺悵然有賦 遣興 老去 兩夜 簡黎道士

臨川絕無佳酒時得一醉戲書 醉中懷江湖舊遊偶作短歌 三月二十一日 天祺節日飯罷小憩

思歸 齒痛有感 南窗睡起二首 初夏 讀程秀才詩 晨起 兩夜 得京書或怪久不通問

水亭 醉眠 感舊七首 晝臥聞百舌 寄呂博士 遊疎山 疎山東堂晝眠 山中作 觀蔬圃

東堂晨起有感 金谿道中 小憩前平院戲書觸目 遺興 兩後獨登擬峴臺 數日訴牒苦多慮甚

戲作 與黎道士小飲偶言及曾文清公慨然有感 念歸 五月十一日夜且半夢從大駕親征盡復漢

唐故地見城邑人物繁麗云西涼府也喜甚馬上作長句未終篇而覺乃足成之 兩夜二首 焚香晝睡

比覺香猶未散戲作二首 仲夏小旱方致禱忽大雨連日江水為漲喜而有作 冒雨登擬峴臺觀江漲

薤庭草 蛺蝶詞 大雨踰旬既止復作江遂大漲二首 燒丹示道流 書感 夏日 寄統 自訟

夏日晝寢夢遊一院闐然無人簾影滿堂惟燕躡筆絃有聲覺而聞鐵鐸風響琤然殆所夢也邪因得絕

句 虛堂 夢仙 自嘲 長歌行 對酒 自詠 夏日睡起 所居堂極涼雖三伏常有秋意也偶得

長句 兩後露坐小酌 日暮南窗納涼 中夜起登堂北小亭 登擬峴臺 夜意 道院遺興 夜行

至白鹿泉上 堂中以大盆漬白蓮花石菖蒲脩然無復暑意睡起戲書 初秋 書懷絕句五首 狂吟

聞雨 初秋小疾效俳諧體 兩後極涼簡篋中舊書有感 秋夜 抄書 晚自白鹿泉上歸 秋

早方甚七月二十八夜忽兩喜而有作 秋日小雨有感 書李商叟秀才所藏曾文清詩卷後 碧海行

道院遺興 夜酌 言懷 送客城西 兩夜 病中作 社日小飲 晚到東園 秋晚登擬峴望祥



符觀 秋思 病目廢書 感昔二首 視陂至崇仁村落 馬上 寄周洪道參政二首 北窗 登擬

峴 休日 別張教授歸獨登擬峴 晚晴至索笑亭 新釀熟小酌索笑亭 乾道初予自臨川歸鐘陵

李德遠范周士送別是日宿戰平風雨終夕今自臨川之高安復以雨中宿戰平悵然感懷二首 村舍小

酌 白塔道中乘臥輿行 宿城頭鋪小飲而睡 豐城村落小憩 再題 發豐城縣 豐城高安之間

憩民家景暉幽邃慨然懷歸 宿華嚴寺 寄奉新高令 高安州宅三詠三首 與高安劉丞遊大愚觀

壁間兩蘇先生詩

卷十二

二一五

宿黃仙觀兵火焚蕩之餘惟一殿突兀猶在黃仙蓋與許旌陽同時飛昇者 玉隆得丹芝 贈西山老人

病酒宿土坊驛 十一月上七日蔬飯驟嶺小店 進賢驛感懷 入臨川境馬上作 別楊秀才 發

臨川 早行 白干鋪別傳用之主簿 過茶黃鋪青松朱戶前臨大道絕似西陲亭驛悵然有作 青溪

道中行古松間因少留瀟茶而行 弋陽縣江上書觸目 乾封驛早行 過江山縣浮橋有感 衢州早

行書懷 航頭晚與二首 行至嚴州壽昌縣界得請許免入奏仍除外官感恩述懷 桐廬縣泛舟東歸

予欲自嚴買船下七里灘謁嚴光祠而歸會灘淺陸行至桐廬始能泛江因得絕句二首 漁浦二首

蕭山 辛丑正月三日雪 正月二十八日大雪過若耶溪至雲門山中 雪中登雲泉上方 衝雪至餘

慶覺林雪連日不止 大雪歌 雪霽歸湖上過千秋觀少留 二月四日作 新築山亭戲作 春晴出

遊 題山家壁 春晚風雨中作 北窗 山中晚興 夜登山亭 西村醉歸 自詠 閑中頗有四方

之志偶得長句 遣興二首 醉題 小園四首 步虛四首 醉中登避俗臺 立秋前三日夜坐庭中

偶賦 南堂臥觀月 夜坐獨酌 夜興 月夜泛小舟湖中三更乃歸 無題二首 自山中夜行還湖

上 大風新秋 月夕睡起獨吟有懷建康參政 病瘧後偶書 秋日聞蟬 感秋 南軒 夜坐 新

涼書事 聞蟬思南鄭 憶昔 病中夜興 秋夜 謝張時可通判贈詩編 酬莊器之賢良見贈 舟

過樊江憩民家具食 舟中作 九月三日泛舟湖中作 霜天晚興 九月六日小飲醒後作 書悲二

首 中夜起出門月露浩然歸坐燈下有賦 新寒 幽居 醉中步月湖上 東村 西村 題張幾仲  
所藏醉道士圖二首 山園草間菊數枝開席地獨酌 湖村月夕四首 卯酒徑醉走筆 山中望籬東  
楓樹有懷成都 暮秋有懷王四季夷 幽居 有懷 對酒 初冬 晝寢夢一客相過若有舊者夷粹  
可愛既覺作絕句記之 書歎 督下麥雨中夜歸 霜曉肩輿行湖上 杜門 橫塘 書事寄長老  
食齋十韻 冬暖頗有春意追憶成都昔遊悵然有作 忽忽 醉書山亭壁 十月旦日至近村 蔬  
圃絕句七首 冬夜不寐至四鼓起作此詩 蔬圃 夢中作 村居酒熟偶無肉食羹菜羹飲酒 辛丑  
十月諸公餽酒偶及百榼戲題長句 灌園 幽居 日出入行 午醉徑睡比覺已甲夜矣 簡蘇訓直  
判院莊器之賢良 醉眠曲 冬夜二首 夜話贈華師 臥病書懷 病中絕句六首 蔬園雜詠五首  
卯飲醉臥枕上有賦二首

卷十四

二三四

十月二十六日夜夢行南鄭道中既覺恍然攬筆作此詩時且五鼓矣 雨晴步至山亭欲遂遊東村不果

喜晴 對食 不睡 睡 憶荊州舊遊 五雲門晚歸 冬暖 歲暮 雪夜二首 禪室 炭盡地

爐危坐至夜分戲作 夜汲井水煮茶 雪後尋梅偶得絕句十首 寄朱元晦提舉 村居冬日 寓天

慶觀有林使君年八十七方燒丹云一黍米大可化汞一斤爲黃金梅道人年八十五善醫 宿天慶道院

贈林使君二首 冬夜 宴坐 夢中作 夜寒遣興 雪後出遊戲作 歲暮 記夢 立春後三日

作 短景 風雨旬日春後始晴 乍晴風日已和泛舟至扶桑壑徘徊西村久之 晨起南窗晴日可愛

戲作一絕 攜癯尊醉梅花下 城西接待院後竹下作 夜飲示坐中 夜從父老飲酒村店作 壬寅

新春 幽居春夜 讀書 晨起 昔在成都正月七日聖壽寺麻子市初春行樂處也偶晨興聞鄰村守

麻有感 獨孤生策字景略河中人工文善射喜擊劍一世奇士也有自峽中來者言其死於忠涪間感婦

賦詩 早春對酒感懷 曉出湖邊摘野蔬 涪飢之餘復苦久雨感歎有作 春晴泛舟 攜一尊尋春

湖上 晦前二日夜欲曉自湖中歸對殘月獨酌 春曉有感 夜觀秦蜀地圖 久雨小飲 有懷獨孤

景略 春雨復寒遺懷 春遊 海棠 寄仗錫平老借用其聽琴詩韻 五月十四日夜夢一僧持詩編

過予有暴雨詩語頗壯予欣然和之聯巨軸欲書未落筆而覺追作此篇 新塘觀月 觀張提刑周鼎

口占送巖師還大梅護聖 八月十四日夜湖山觀月 十五夜月色皎然有頃雲生遂不復見 夜聞秋

風感懷 玉局歌 醉歌 閉門 草書歌 野飲夜歸戲作 夜泊水村 幽居 與鄰翁登山亭 無

題 遣興 夢宴客大樓上命筆作詩既覺續成之 新塘夜歸 古風三首 累日無酒亦不肉食戲作

此詩 讀書 自妙相歸將至杜浦堰舟中作 秋興 哀北 琵琶 三江舟中大醉作 短歌行 悲

秋 步至西村 題接待院壁 九月晦日作四首 陶山遇雪覺林環菴主見招不果往 哭王季夷

樊江晚泊 蛾眉村旅舍作 娥江野飲贈劉道士 丈亭遇老人長眉及肩欲就之語忽已張帆吹笛而

去 寓舍聞禽聲 春晚 題瑩師釣臺圖 仗錫平老具舟車迎前天衣印老印悉遣還策杖訪之作絕

句奉送兼簡平二首 湖邊曉行 久雨杜門遺懷 梅雨陂澤皆滿 夜意二首 幽事 對酒戲作

夏雨 軍中雜歌八首 夏夜舟中聞水鳥聲甚哀若曰姑惡感而作詩 暮歸舟中二首 夏夜四首

北渚 夏日五鼓起戲書 雨夜 小立 徙倚 居山

卷十五.....二五三

秋興二首 八月五日夜半起飲酒作草書數紙 秋雨漸涼有懷興元三首 秋風曲 送宣書記并寄

其兄鑿才二公 起晚戲作 飲村店夜歸二首 兩夜感懷 寄葉道人 月下小酌 讀袁公路傳

鄰曲小飲 秋夜觀月二首 枕上 秋夕大風松聲甚壯戲作短歌 明河篇 夜聞鄰家治稻 浪迹

夜步庭下有感 題酒家壁 題書齋壁 贈貓 秋夕 秋雨排悶十韻 小舟航湖夜歸書觸目三

首 幽居書事二首 晚霽二首 雨後散步後園二首 示客 甲子晴 後一日復雨 紹興庚辰余

遊謝康樂石門與老洪道士痛飲賦詩既還山陰王仲信爲予作石門瀑布圖今二十有四年開圖感歎作

二首 兩中遺懷 秋思 秋雨歎 兩中小酌 衰病有感三首 兩止頓寒遂有晴意 秋晴出遊

悲秋四首 久雨道懷 野步書觸目 月下 九月十日 秋晴園中山禽絕多有感而賦 燈籠 舟

過南莊呼村老與飲示以詩二首 秋夜獨過小橋觀月 紹興中與陳魯山王季夷從兄仲高以重九日

同遊禹廟後三十餘年自三橋泛舟歸山居秋高雨霽望禹廟樓殿重複光景宛如當時而三人者皆下世

予亦衰病無聊慨然作此詩 雜興四首 予秋夜觀月得瘧疾枕上賦小詩自戲 後春愁曲并序 秋

花歎 寄題朱元晦武夷精舍五首 病思 病愈 病中忽有眉山士人史君見過欣然接之口占絕句

初寒 出塞曲 無題 道室即事 夙興 長安道 記夢 冬夜讀書 遊仙五首 過鄰家 山

園晚興 初冬出扁門歸湖上 新寒小醉睡起日已高戲作 太息 冬夜讀書 晚步 村舍 野步

至近村 夜坐油盡戲作二首 歲暮 幽居感懷 山中夜歸戲作短歌 狂歌 遲暮 種秫 擁爐

冬夜吟 讀書罷小酌偶賦 移花遇小兩喜甚為賦二十字 書生歎 冬夜醉解殘燈熒然起讀書

至明賦詩十韻 夜行 遊淳化寺 餘慶出遊夜歸 遊前山 齋前獨坐戲作 晚同僧至谿上 僧

飯 山店賣石榴取以薦酒 平水小憩 自若耶溪舟行杭鏡湖而歸 宴坐 遊山歸偶賦 六十吟

舒悲 山園晚興 獨立 探梅二首 遠興 張功甫許見訪以詩堅其約

夜夢與數客觀畫有八幅龍湫圖特奇客請予作詩其上書數十字而覺不復能記明且乃追補之亦髣髴

夢中意也 泛舟 夜聞大風感懷賦吳體 骨相 有感二首 城西晚眺 苦寒 夙興 冬夜讀書

甚樂偶作短歌 冬夜月下作 感憤 蓬戶 行後園 騎出遇獵徒有作 贈道侶 六言四首 作

雪未成自湖中歸寒甚飲酒作短歌 題傳神 閏月三夜舍西觀新月 獨夜 晚出偏門 蕙苴 答

鄭虞任檢法見贈 舟中曉賦 野興二首 月夜有感 落魄 遺興 湖村野興二首 看鏡 塞上

舟過會稽山下因繫舟遊近村迨暮乃歸 人日偶遊民家小園有山茶方開 過杜浦橋二首 上元

日晝臥 莊器之作招隱閣項平父諸人賦詩予亦繼作 春夜讀書感懷 宿能仁寺 寄題方伯謨遠

菴 雨中宿石帆山下民家 中夜雨霽月色入戶起飲酒一杯作絕句 贈石帆老人 僊上醉吟 囚

山 小園 鄉人或病予詩多道蜀中遨樂之盛適春日遊鏡湖共請賦山陰風物遂即杯酒間作四絕句

却當持以誇西州故人也四首 病中 病起 小築 記夢 久雨排悶 雨中泊舟蕭山縣驛 夜漏

欲盡行度浮橋至錢清驛待舟 江頭十日雨 柯橋客亭二首 小兩舟過梅市 曉枕 菓菜并序

吳娘曲 感舊 晨起閑步 初夏同桑躬世昌過鄰家 寓歎 春夏兩暘調適頗有豐歲之望喜而有

作 聞虜曾過歸漠北 初夏遊凌氏小園 偶得北虜金泉酒小酌二首 無題 戲贈 題少陵畫像

閑居書事 登臺遇雨避於山亭晚爨乃歸 村居書觸目 訪醫 夏夜讀書自嘲 夏日小宴 送

紫霄女道士四明謝君二首 醉中夜自村市歸 城北夜 秋夜舟中 日晚散步湖上遇小雨 安期

簫 曉望海山 山園草木四絕句 賽神曲 夜中起讀書戲作二首 秋夜出門觀月 雨中買酒鏡

湖酒樓 聞虜政衰亂掃蕩有期喜成口號二首 甲辰中秋無月十七夜獨徹然達旦 悲秋 農家秋

晚戲詠 病中作 秋夜讀書 病起 晨起 秋夜 雨中寄東村 山寺 天王廣教院在葢山東麓

予年二十餘時與老僧惠迪遊略無十日不到也淳熙甲辰秋觀潮海上偶繫舟其門曳杖再遊恍如隔世

矣 江月歌 初寒書懷 歲暮 晨興 村飲 夜半讀書罷出門徒倚久之歸賦長句 曝書偶見舊

藁有感 崑崙行 一室 得所親廣州書 幽居戲詠 幽事

卷十七 二八七

初冬雜題六首 閉戶 十月四日夜記夢 西路口山店 題海首座俠客像 送綽姪住菴吳興山中

二首 冬夜與溥菴主說川食戲作 仗錫平老自都城回見訪索怡雲堂詩 野飲 樊江觀梅 山亭

觀梅 射的山觀梅二首 別梅 憶梅 新晴午枕初起信筆 乙巳早春 小雨 南的遇大風雨

春晚至山中因訪陳道人 小隱 春興 會仲躬見過適遇予出留小詩而去次韻二首 睡起 病起

山居戲題二首 芒種後經旬無日不雨偶得長句 久雨喜晴十韻 盆池 月中過蜻蜒浦 六峯

項里看採楊梅連日留山中 雨中自項里夜至新塘捨舟步歸二首 夜聽竹間雨聲 泛三江海浦

獨酌有懷南鄭 秋日泛鏡中憩千秋觀 秋夕虹橋舟中偶賦 秋思 自嘲 豐年行 秋夜泊舟亭

山下 初秋山中作 秋夜讀書有感 晚涼登山亭 夜步 感秋 病中作 送猷講主赴李明府姜

山之招 雨中排悶 秋夜歌 病起鏡中見白髮此去七十無十寒暑矣偶得長句 初寒宴坐 溪行  
二首 讀書 自嘲用前韻 病中久廢遊覽悵然有感 新釀熟小飲二首 題徐淵子環碧亭亭有茶

山曾先生詩 雜興三首 大雪 遣興 委轡 雪中作 募筆驛 舟中感懷絕句呈太傅相公兼簡  
岳大用郎中三首 西與泊舟 錢清夜渡 夜歸 江北莊取米到作飯香甚有感 感興 新春 新

年 遊鏡湖 初春晚晴 偶讀山谷老境五十六翁之句作六十二翁吟 自開歲略無三日晴戲作長  
句 置酒梅花下作短歌 梅花已過闢東村一樹盛開特往尋之慨然有感 思蜀 書憤 南窗壁黃

柑獨酌有感 久雨驟晴山園桃李爛熳獨海棠未甚開戲作 臨安春雨初霽 延和殿退朝口號二首  
簡楊庭秀 飲張功父園戲題扇上 夜泛西湖示桑甥世昌 小舟過御園二首 自真珠園泛舟至

孤山 真珠園雨中作 還家二首 初歸偶到近村戲書 題跨湖橋下酒家 春遊至樊江戲示坐客  
暮春 天華寺前遇縣令過避之入寺僧皆晝睡 偶得海錯侑酒戲作 雨晴遊香山 春遊絕句

夜行玉笥樵風之間宿龍瑞 聞傅氏莊紫笑花開急棹小舟觀之 遊法雲寺觀韋老新葺小園 鹹齏  
十韻 長門怨 遣興 晨坐道室有感 晝臥 雨晴 宿石帆山下二首 小雨泛鏡湖 小憩村舍

平水 初夏山中 雨後 雲門溪上獨步 雲門過何山 明覺院 自雲門至上竈欲遊一二僧菴  
以雨不果 自上竈過陶山 四月 初夏閑居即事 夜汲 掛閣 初夏夜賦 新鑿城南舟中夜興

泊舟二首 飲伯山家因留宿 夜泛蜻蜓浦 晨起看山飲酒 枕上偶賦 自詠 題齋壁四首  
卷十八 三〇七

丙午五月大雨五日不止鏡湖渺然想見湖未廢時有感而賦 遊鄞 泊上虞縣 發丈亭二首 明州  
水亭獨酌十二韻 坐客有談狄魚眼眶之美者感歎而作 衰病不復能劇飲而多不見察戲作此詩

或以予辭酒爲過復作長句 行路難 千峯榭宴坐 喜雨二首 五鼓 官居戲詠三首 倦眼  
拜且表 早自烏龍廟歸 上丁 新秋 殘年 休日行郡圃 登北榭 小酌 焚香作墨審決訟吏  
皆退立一丈外戲作此詩 齋中閑詠 秋夜聞雨 自詠 秋懷 不寐 醉中戲作 頻夜夢至南鄭

小益之間慨然感懷二首 夜雨枕上 兩夜 安流亭俟客不至獨坐成詠 秋興二首 燕堂獨坐意

象殊憤懣 登子城作此詩 秋雨北榭作 次韻王給事見寄 病中夜半 卽事 歲晚懷故人 焉

嘗行二首 丙午初冬得心腹痛疾大下而愈羸耗不支方在告臥燕堂東偏聞民間前一夕被盜者慨然

有感 因王給事回使奉寄 病告中遇風雪作長歌排悶 冬夜戲作 夜坐二首 遣興 登紫翠樓

丙午十月十三夜夢過一大冢傍人爲余言此荆軻墓也按地志荆軻墓蓋在關中感歎賦詩 病起小

飲 冬夜讀書 夜坐觀小兒作擬毛詩欣然有賦 郡齋偶書三首 燈下閱吏牘有感 過放生池追

懷江公民表諫議池蓋公所創也 園中絕句二首 戲作 縱筆三首 病中偶得名酒小醉作此篇是

夕極寒 晨讀道書 後園獨步有懷張季長正字 老將效唐人體 書憤 晨起 雪 歲晚書懷

晨過天慶 冬夜 比得朋舊書多索近詩戲作長句 休日感興 病中偶書 寒夜 雪中獨酌 送

客 新晴 出城 立春日送客郊外 大雪自夜至旦欲午始晴 雪夜有感 雪中忽起從戎之興戲

作四首 十二月二十七日祭風師歸道中作 春晴 丁未正月春色已粲然露坐高風堂北觀種花

燕堂春夜 早春池上作 感興 東齋偶書 丁未上元月色達曉如晝予齋居屬貳車領客 自郊外

歸北望譙樓 馬上作 還舍 杏花 兩京 贈表弟江參議 讀書 夜登千峯榭 旬日公事頗簡

喜而有賦 聞鼓角感懷 社日小飲二首 昔日 新晴 倚闌 寄徑山印禪師 園中歸戲作 衣

曉東郊送客 暮春歎 曉雨二首 登千峯榭 晚春園中作 北窗 浮生 小壘 大閣後一日作

假 自嘲 曉出東城 初夏遇休日園中閒賦 小雨出西門五里至東嶽廟 初夏燕堂睡起 晡後

領客僅見燭而罷戲作短歌 讀宛陵先生詩 書歎

卷十九

曉出南山 聞韓无咎下世 官居書事二首 夏日北榭賦詩弈棋欣然有作 謁告歸臥晚登子城

迂使客出郊夜歸過市樓 秋夜登千峯榭待曉 九月初郊行 衰病 書意 秋懷 過村店有感

嚴州大閣 後園閑步 照緩瀑閣下池水 秋郊有懷四首 風興 聽事望馬目山 秋興二首 久

無暇近書卷慨然有作 嚴州多菊然率過重陽方開或舉東坡先生菊花開時即重陽之語余謂此猶是

未忘重陽者恐此花不肯也戲作一絕 地僻 吏責 張時可直閣書報已得請奉祠雲臺作長句賀之

累日文符沓至悵然有感三首 大風 冬夜讀書 再用前韻不以次 思歸 喜小兒病愈二首

初冬風雨驟寒作短歌 余年二十時嘗作菊枕詩頗傳于人今秋偶復采菊縫枕囊淒然有感二首 陶

淵明云三徑就荒松菊猶存蓋以菊配松也余讀而感之因賦此詩 蒼麥初熟刈者滿野喜而有作 有

自蜀來者因感舊遊作短歌 東吳女兒曲 兩夕 晚遊東園 小雨 初寒在告有感三首 馬上作

冬夜聞角聲二首 塞上曲 荊州歌 冬夜讀書 寓歎二首 燕堂東偏一室頗深暖盡日率困於

吏牘比夜乃得讀書其間戲作三首 懷鏡中故廬 書感 對酒 夢歸 蜀使歸寄青城上官道人

寄成都蓮道人 寄邛州宋道人 小齋壁間張王子喬梅子真李八百許旌陽及近時得道諸仙像每焚

香對之因賦長句 芳草曲 烏龍廟 寒夜移疾二首 寒夜讀書三首 有爲予言烏龍高嶮不可到

處有僧巖居不知其年予每登千峯樹望之慨然爲作二詩 楊庭秀寄南海集二首 夜坐示桑甥十韻

夢回 醉中草書因戲作此詩 閑步至鞠場值小雪 張季長學士自吳元遣人來因詢梁益間事悵

然有感 東齋夜興 烏龍雪 曉出東城馬上作 與建子振孫登千峯樹觀烏龍雪 述懷二首 到

嚴十五晦朔郡釀不佳求於都下既不時至欲借書讀之而寓公多祕不肯出無以度日殊惘惘也 雨中

獨酌 被酒徑臥比覺已五鼓矣 燈下讀玄真子漁歌因懷山陰故隱追擬五首 送客至望雲門外

題城南堂二首 故山葛仙翁丹井有偃松覆其上天矯可愛寄題 估客樂 楚宮行 妾命薄 晚登

千峯樹 晝睡 胸次鬱鬱偶取枯筆作狂草遂成長句 休日與客燕語既去聽小兒誦書因復作草數

紙 寄譙先生 寄姚太尉 累日多事不復能觀書感歎作此詩 北窗 讀范文正瀟灑桐廬郡詩戲

書 筍中偶得去年二月都下數詩 感寓 征婦怨效唐人作 雪 寒夜 縱筆二首 歲晚盤尊索

然戲書 立春前四日謝雪方拜天慶庭中雪復作 桐江行 屢雪二麥可望喜而作歌 丁未除夕前

二日休暇感懷二首 假中閉戶終日偶得絕句三首 除夜雪二首 戊申元日 初春感懷 閉閣



潯緩閣小立 睡起至園中

卷二十一

三四五

上書乞祠 春殘 三月二十日晚酌 次前韻 北窗閑詠 休日留園中至暮乃歸 北窗病起 自

東津泛舟至桐溪 迓客至大浪灘上 郊行 夏雨 雨中作 醉題 有懷青城霧中道友 梅雨初

晴迓客東郊 晚歸 休日登千峯樹遇大風雨氣象甚偉 雨中獨坐 舊識姜邦傑于亡友韓无咎許

近屢寄詩來且以无咎平日倡和見示讀之悵然作此詩附卷末 釣臺見送客罷還舟熟睡至覺度寺

泛富春江 宿漁浦 泝小江飯舟中 乞祠久未報 七月十日到故山削瓜淪茗脩然自適 曉興

感秋 秋夜有感 五鼓入城 飯罷忽鄰父來過戲作 秋夜讀書 夜坐忽聞村路報曉鐵牌二首

白雲自西來過書巢南窗 贈竹十韻 雜感五首 入城寓樹開元 夜出偏門還三山 四鼓酒醒起

步庭下 感憤秋夜作 反感憤 東齋 雨夜四鼓起坐至明 夜讀兵書 老歎 秋齋 齋中聞急

雨 老病追感壯歲讀書之樂作短歌 閑中戲書三首 采藥 過猷講主桑瀆精舍 自桑瀆泛舟歸

三山 訪野人家 塞上曲四首 硯湖弁序 泛湖 寓蓬萊館二首 夜還驛舍 舟中大醉偶賦長

句 行飯至新塘夜歸 雲門感舊 若耶溪上二首 秋雨頓寒偶書 新晴泛舟至近村偶得雙鰕而

歸 上書乞祠輒述鄙懷 泛湖上雲門 書歎 枕上作 老病無復宦情或者疑焉作此示之 拄杖

北望 歲晚感懷 大雨中作 繫舟平水步 初到行在 還都 宿監中偶作 四鼓出嘉會門赴

南郊齋宮 題張野夫監簿大招圖 簡譚德稱監丞 致齋監中夜與同官縱談鬼神效宛陵先生體

夜歸 次韻鄭唐老 五鼓赴太社獵祭 己酉元日 送潘德久使薊門 我夢 晨起有感 南省

宿直二首

卷二十一

三五九

夜歸塲街巷書事 馬上作 行在春晚有懷故隱 儀曹直廬 讀書 小昭慶院講僧舊在都下與之

相從今沒已久見畫像於院中作詩弔之 晨入省中偶書 春晚 觀潮 新晴馬上 過六和塔前江

亭小憩 春夕睡覺 送霍監丞出守盱眙 寄題徐載叔秀才東莊 入省 出省 和周元吉右司過  
 弊居追懷南鄭相從之作 尤延之侍郎屢求作遂初堂詩詩未成延之去國因以奉送 送張野夫寺丞  
 牧滁州 史院書事 病中數辱會無逸架閣見問今日忽聞徙居走筆奉簡因致卜鄰之約 喜楊廷秀  
 秘監再入館 次韻和楊伯子主簿見贈 簡何同叔 去國待潮江亭太常徐簿宋卿載酒來別 醉中  
 作行草數紙 雪夜小酌 卽事 到家旬餘意味甚適戲書 兩後復小雪 鯉魚行 雪夜作 晨起  
 野饋 醉中浩歌罷戲書 朝雨 春雨二首 記夢 野興二首 杭州夜歸二首 或問余近況示  
 以長句 估客有自蔡州來者感悵彌日二首 初夏郊行 重午 夏日 睡起見楊花滿庭偶書 梅  
 雨 醉歌 醉書秦望山石壁 秋夜 夜意 蝸廬 予十年間兩坐斥罪雖擢髮莫數而詩爲首謂之  
 嘲詠風月既還山遂以風月名小軒且作絕句二首 題梅漢卿醉經堂 得親舊書問近況以詩代書報  
 之 放逐 月下野步 自詠 午睡起遇急雨 夜雨暴至 睡起作帖數行 新秋 秋興二首 幽  
 居 山居食每不肉戲作 自笑 世上 夜歸偶懷故人獨孤景略 秋夜自近村歸 夜聞蟋蟀 秋  
 夜風雨暴至 月下小酌 鄰曲有未飯被追入郭者惘然有作 吾廬 飲酒望西山戲詠 小院 發  
 篋得故人書有感 秋光 晚秋風雨 幽居二首 故山四首 秋晚弊廬小葺一室過冬欣然有作  
 小室晚酌 冬晚山房書事二首 村居日飲酒對梅花醉則擁紙衾熟睡甚自適也 山居疊韻 寓歎  
 三首

卷二十一 三七一

贈惟了侍者二首 題湖邊旗亭 醉臥道邊覺而有賦 寓懷四首 喜事 甜羹 縱筆四首 自嘲  
 解嘲二首 春雨絕句六首 雨中臥病有感 舟中作 山園 聞虜亂 題千秋觀懷賀亭 禹祠  
 樊江 東關二首 練塘 娥江市 宿野人家 舟中遣懷 歸次樊江 夜過魯墟 有感 遊石帆  
 玉筍石旗諸山 信步近村 寒食省九里大墓 平水道中 五雲橋 小雨雲門溪上 雲門獨坐  
 泛湖至東涇三首 舟過梅塢胡氏居愛其幽邃爲賦一詩 北窗 聞蛙 晚春感事四首 山居 四

月三日同子坦子聿遊湖中諸山 梅仙塢小隱 盟雲 示兒 村居初夏五首 城東逆旅 江村初  
 夏 舟中作 東關二首 少微山 舟行至織女潭 書歎 小園獨立 觀蘇滄浪草書絹圖歌 睡  
 起書觸目 曉雨初霽 夏雨 自東涇度小嶺聞有地可卜菴喜而有賦 露坐 自笑 夜賦 書懷  
 醉後作小草因成長句 雨中作 詠史 登鵝鼻山至絕頂訪秦刻石且北望大海山路危甚人迹所  
 罕至也 六七月之交山中涼甚 幽居三首 園中雜詠三首 夏雨 夏夜二首 予所居南並鏡湖  
 北則陂澗重複抵海小舟縱所之或數日乃歸 王給事餉玉友 晚興 村園

卷一十二

三三五

七月一日夜坐舍北水涯戲作 病後登山亭 覽鏡 遣懷 開元寺小閣十四韻 寄題趙寬之主簿

慈順堂 郊居二首 新秋感事二首 八月一日微雨驟涼 秋雨三首 月下獨坐 秋日步至湖桑

墟西 秋社二首 秋思六首 以事至城南書觸目 舍西夕望 題城侍者峴山圖 題城侍者剡溪

圖 晚秋農家八首 湖上小閣 苦雨歎 遣懷 道石并序 三首 蘭亭 小葺村居 書陶靖節

桃源詩後 有叟 不寐 迢夜 秋晚思梁益舊遊三首 紹熙辛亥九月四日雨後白龍挂西北方復

兩三日作長句記之 蔬圃 農家 自喜 重九後風雨不止遂作小寒三首 城南上原陳翁以賣花

爲業得錢悉供酒資又不能獨飲逢人輒強與共醉辛亥九月十二日偶過其門訪之敗屋一間妻子飢寒

而此翁已大醉矣殆隱者也爲賦一詩 甜羹之法以菘菜山藥芋菜菔雜爲之不施醯醬山庖珍烹也戲

作一絕 暮秋書事 早自偏門入城晚出南堰門以歸 初寒 小舟自紅橋之南過吉澤歸三山二首

得猶於近村以雪兒名之戲爲作詩 晝睡 戲詠閑適 寓歎二首 獨夜 記九月二十六日夜夢

夢海山壁間詩不能盡記以其意追補四首 當食歎 睡鄉 晨興 初冬從父老飲村酒有作 懷

南鄭舊遊 冬夜讀書 余爲成都帥司參議成將軍漢卿爲成都路兵鈐相從無虛日余被召出蜀漢卿

坐法謫居於涪旣得自便因卜築爲涪人今年廣漢僧祖成來山陰乃言嘗至永嘉樂清縣柳市之廣福寺

有黃先生寓寺中煉丹及見則漢卿也余聞之感歎不已爲賦此詩 雜題六首 思蜀四首 散吏 題

劍溪瑩上人梅花小軸 夜夢遊驪山 枕上 五更讀書示子 夜坐 臥龍

卷一十四

三九七

野步晚歸 並山東南閑步至野人吳氏居乃歸 晝睡 連日有雪意戲書 兩蜀故人寄余閩中左驛  
題名石刻來皆二十餘年矣悵然有感 歲晚 夢斷 雨聲 農家 夜行湖上 冬夜讀書忽聞雞鳴  
梅花絕句十首 閉戶 小園竹間得梅一枝 梅花絕句二首 得林正父察院書問信甚勤以長句  
寄謝 蔬食戲書 歎俗 晚飯罷小立門外有作 觀梅至花涇高端午解元見尋二首 春雪 舟過  
季家山小泊 送王成之給事 山家 送傑上人歸成都二首 落魄 春晴出遊 題瑩上人二畫二  
首 和張功父見寄二首 山家暮春二首 讀王季夷舊所寄詩 題庠閣黎二畫二首 入雲門小憩  
五雲橋 黃昉小店野飯示子坦子聿 山園 入城至郡圃及諸家園亭遊人甚盛 次韻范參政書懷  
十首 春晚村居雜賦絕句六首 沽棗西酒小酌 戲詠村居二首 戲詠閑適三首 夜與兒子出門  
閑步 老景 初夏 晨起 月夜短歌 小軒 愛閑 靜院 雨晴 讀史有感 暮歸 仰首座求  
鈍菴詩 壁老求笑菴詩二首 浴罷 夜坐水次 六月十四日微雨極涼 十五日雲陰涼尤甚再賦  
長句 水亭晚眺 自詠 立秋前四日夜泛舟至跨湖橋 信筆三首 示兒 青山白雲歌 小市  
蓬萊館午憩 夢遊散關渭水之間

卷一十五

四一〇

秋夜 世事 夜半池上作 秋夜將曉出籬門迎涼有感二首 夏秋之交久不雨方以旱爲憂忽得甘  
樹喜而有作 藥圃 書歎 夜興 閑中頗自適戲書示客 新涼夜坐有作 荷花二首 醉中作  
題齋壁 老將二首 白髮 小雨 秋日郊居八首 七月十七日大雨極涼 雨中作 秋興三首  
兩夜南堂獨坐 夜不能寐復呼燈起坐戲作 喜晴 枕上 新作南門 寄成漢卿將軍 病臥  
晚晴 秋雨初晴有感 獨飲 小築 示兒 新晴 晨起坐南堂書觸目 壬子八月癸卯大風雨拔  
木飄瓦通夕不能寐 秋雨不止排悶 用短 覽鏡有感 哭徑山策老 松風 醉歌 秋夜讀書有

感 瀘州亂 東鄰築舍與兒輩訪之為小留 夜坐 西鄰亦新葺所居復與兒曹過之 有術士過門

謂余壽及九十 晚眺 秋日焚香讀書戲作 九月一日夜讀詩稿有感走筆作歌 上書乞再任仲佑

秋晚歲登戲作二首 舟中望禹祠蘭亭諸山 夜觀嚴光祠碑有感 閑趣 壬子九日登山小酌

舍北望水鄉風物戲作絕句 新黏竹隔作巽閣 禹跡寺南有沈氏小園四十年前嘗題小閣壁間偶復

一到而園已易主刻小閣于石讀之悵然 贈鏡中隱者 月夜作 記夢 感舊 小園 初冬 閑中

樂事二首 小舟 九月二十三夜小兒方讀書而油盡口占此詩示之 今年立冬後菊方盛開小飲

行飯暮歸 晝眠 睡覺聞兒子讀書 余得木杖於秦望山中今三十年矣隴蜀萬里未嘗相捨戲賦長

句贈之 步至近村 五鼓不得眠起酌一盃復就枕 醉倒歌 冬夜 默坐 日暮 遺興 泛舟

夜讀范至能攬轡錄言中原父老見使者多揮涕感其事作絕句 初冬掃東山之麓置數石于喬松巨竹

間以眺西山甚自適也 南堂脊記乃已三十年偶讀之悵然有感

卷一十一

醉臥松下短歌 霜草 冬夜 村東 小園 書適二首 狂夫 白髮 檢舊詩偶見在蜀日江濱池

醉歸之篇悵然有感 十一月四日風雨大作二首 冬日觀漁獵者 雨晴 病起 奉祠 假寐見海

山異甚作小詩記之 松下縱筆四首 拜勅口號二首 閑居 十一月十八日蒙恩再領仲佑鄰里來

賀謝以長句 題老學菴壁 冬晴日得閑遊偶作 示元禮 書巢冬夜待旦 醉後莊門望西南諸山

著書 探梅 歲暮風雨二首 自夏秋匱甚慨然有感 題四仙像四首 自責 自解 午睡起消

搖園中因登山麓薄暮乃歸 羣兒 久疾灼艾小愈晚出門外 風興弄筆偶書 縱筆 冬晴閑步東

村由故塘還舍作二首 十二月八日步至西村 夜聞湖中漁歌 忽得京書有感 晚步門外書觸目

親舊書來多問近況以詩答之 開書篋見韓无咎書有感 夜大雪歌 寄宇文成州 示子聿 雪

夜坐 春雨 夢與數客劇飲或請賦詩予已大醉縱筆書一絕覺而錄之 世事 二子 謝郭希呂

送石洞酒 飲酒 無題 雨雪兼旬有賦 北窗睡起 立春 曉枕 落梅二首 閑居無客所與度

送石洞酒 飲酒 無題 雨雪兼旬有賦 北窗睡起 立春 曉枕 落梅二首 閑居無客所與度

日筆硯紙墨而已戲作長句 壬子除夕 癸丑正月二日二首 避世行 稽山農 牧牛兒 讀書未  
終卷而睡有感 早春新晴 枕上聞禽聲 感舊 夜雨三首 初晴野步 明日復雨排悶二首 小  
室 淨世 紅梅二首 湖上 晴甫一日復大風雨連日不止遣懷 癸丑上元三夕皆大雨雪 寓歎

幽興 緙梅三首

卷二十一

四三六

僧廬 春日 春遊 懷昔 記夢 春陰 睡起行至門外有賦 早春四首 醉吟三首 贈劉政之

秀才 蓬門 龍鍾 送佛照光老赴徑山 春社有感 春社四首 村夜 山園遣興 次韻陳機宜

見贈 野意 戒殺 余年四十六入峽忽復二十三年感懷賦長句 山行 雨中排悶 杜敬叔寓僧

舍開軒松下以虛瀨名之來求詩 贈徑山鈺書記 五月一日作 春夏之交衰病相仍過芒種始健戲

作 自嗟 枕上述夢 雨中排悶 小軒夏夜涼甚偶得長句呈杜叔高秀才 憶昔 夏日晚興 老

翁 困甚戲書歲晚 戲詠山陰風物 老健 六月晦日作 喜雨 門外納涼 贈蘇趙叟兄弟 癸

丑七夕 共語 書歎 秋曉倚闌 癸丑七月二十七夜夢遊華嶽廟二首 僕頃在征西大幕登高望

關輔樂之每冀王師拓定得卜居焉暇日記此意以示子孫 讀陶詩 秋夜感舊十二韻 幽居 醉題

兩涼小欽戲作 題齋壁 書憤 秋興 兩夜排悶二首 秋日出遊戲作二首 兩中夕食戲作三

首 自警 寄方瞳胡先生 兩夕焚香 秋雨初霽徙倚門外有作 雨中作 贈老雞二首 秋晚閑

步鄰曲以予近嘗臥病皆欣然迎勞 兩夜 醉臥道傍 枕上聞急雨二首 得趙若川書因寄 夢至

洛中觀牡丹繁麗溢目覺而有賦 閑居對食書媿二首 秋夜獨酌 風雲交作戲題 自嘲 書室

數日秋氣已深清坐無酒戲題長句 五更起坐 谿上雜言 厭事 方池 癸丑重九登山亭追懷頃

在興元常以是日獵中梁山山下樂甚慨然賦詩予於是生六十有九年矣

卷二十一

四四八

感懷四首 出遊二首 讀杜詩偶成 秋夜卽事 物有可歎者因戲作數語以識之 老懷 對酒

東村散步有懷張漢州 晚寒自東村步歸 排悶六首 初寒病中有感 放歌行 山頭石 有客

幽居五首 野興四首 買油 繫舟二首 初冬至近村 古築城曲四首 山園 將軍行 古別離

寄子虞 泛舟自中堰入湖 夜歸舟中作 蓬萊閣聞大風 小出塞曲 冬日園中作 登山亭

拄杖歌 冬晴 冬夕二首 十月十五夜對月 久疾三首 舍北望牛頭山山有延勝寺先太傅書室

在焉六年前嘗泛小江往遊寺焚於陸寇書堂無復存矣 十月十九日大風作寒閉戶竟日 寄天封明

老 村居二首 十月下旬暄甚戲作小詩 霜天雜興三首 連日風雨寒甚夜忽大風明旦遂晴 懷

昔 寄題王俊卿看山堂二首 絕歎 風雨 晚過鄰曲 莫仲謙挽詞 病起 晚興 贈粉鼻 與

兒輩論李杜韓柳文章偶成 夢至小益 懷紹興間往還諸公 磨衲道衣 溪上作二首 小憩 癸

丑十一月下旬溫煥如春晦日忽大風作雪 占城櫻竹拄杖 西城 東城 斯道 病起山居日有幽

事戲作二首 蝸廬 冬夜讀書二首 十二月九日枕上作 記夢三首 鏡湖女

卷一十九

四六〇

水村曲 石洞餉酒 病退 偶書 讀史 飲石洞酒戲作 霜寒 賽神曲 涼州行 望夫石 江

村道中書觸目 采蓮曲 兀坐頗念遊歷山水戲作 五雜俎二首 漁扉 詠史 烏棲曲 古別離

書歎 十二月二十六夜聽雨 起晚 陳少監餉澄清堂酒 雪中作 甲寅元日予七十矣酒間作

短歌示子 七十 正旦後一日 立春 老境 偶懷小益南鄭之間悵然有賦 再用前韻不依次

北坡梅開已久一株獨不著花立春日忽放一枝戲作 人日 夜讀呂化光文章拙盡愛功名之句戲作

遇術士飲以卮酒 閑趣 正月二十日晨起弄筆 春夜讀書 春晴泛湖入城 書齋壁二首 春

日睡起 老病謝客或者非之戲作 永日無一事作詩自詒 窗前作小土山藝蘭及玉簪最後得香百

合併種之戲作 泛舟觀桃花五首 新闢小園五首 上巳小飲追憶乾道中嘗以是日病酒留三泉江

月亭悽然有感 晚步門外散懷二首 欲出遇雨 飢坐戲詠 蔬食 山亭 久不得張漢州書 春

晚村居 遊雲門諸巖若 與子坦子聿遊明覺十四韻 淨智西窗 小僧乞詩 西窗睡起 平水

三月二十五夜寤且不能寐二首 園中小飲 舟中夕望 四月一日作 舟行過梅市 山園雜賦四首 西窗 山頭鹿 夏四月渴雨恐布種代鄉鄰作插秧歌 雲童童行 葦逃行 閱雨二首 喜雨 初夏 村舍 烏啼 感舊 讀書至夜半燈盡欲睡慨然有感 遣興 農舍 四月晦日小雨 泛舟過吉澤 書歎 五月得雨稻苗盡立 薄醉遣懷

卷二十一

四七三

五月十一日夜坐達旦 題陽關圖 新暑書事 時雨 示客 南堂默坐 夏日 小酌 夏夜二首

看鏡二首 明妃曲 思遠遊 太息 六月二十六日夜夢赴季長招飲 夜分不寐起坐園中至旦

露坐 晨起 散步東邨 早秋四首 七月二十一日午睡夢泛江風濤甚壯覺而有賦 幽居戲贈

鄰曲 遣興二首 步至湖上寓小舟還舍五首 送王仲言倅泰州絕句二首 醉中作 秋夜書感

八月三日驟涼有感 南堂與兒輩夜坐 泛舟至魯墟 園蔬薦村酒戲作 兩夕排悶二首 雨中作

讀易 郊行夜歸有感 醉歌 買酒 秋雨歎 憂國 夜意 大風雨中作 題齋壁二首 窮途

貧病 秋晚四首 山村書所見二首 三年前嘗與兒輩步過東涇小嶺得勝處可營別墅貧不能成

偶復至其地悵然有感 園中秋夕 秋晴每至園中輒抵暮戲示兒子 醉睡初覺偶作 汪茂南提舉

挽詞二首 謝徐居厚汪叔潛攜酒見訪 喜鄭唐老相過 秋晚散步門外 寄徐秀才斯遠并呈莊賢

良器之 閑中 秋霽 晨起 篋篋謠二首寄季長少卿 闕極有作 自詠 夢苑參政 乞奉祠未

報食且不繼 山寺 大師魏國史公挽歌詞五首 三峽歌九首 十月三日泛舟湖中作 早行 晚

卷二十二

四八六

久雨 偶得長魚巨蟹命酒小飲蓋久無此舉也 泛舟湖山間有感 望永思陵二首 糟蟹 霜夜三

首 書室明煖終日婆娑其間倦則扶杖至小園戲作長句二首 初冬 買屐 十月晦日作 贈道友

五首 示子聿 老境 予所居三山在鏡湖上近取舍東地一畝種花數十株彊名小園因戲作長句



被命再領仲佑有感 冬夜戲書三首 幽居二首 送蘇召叟秀才入蜀效宛陵先生體 寄題哲上人

漫堂 冬夜獨酌 夜坐燈滅戲作 艾如張 上之回 雜詠園中菓字四首 閉戶二首 連日大寒

夜坐復苦飢戲作短歌 園中對酒作 孝宗皇帝挽詞三首 小兒入城 夜坐二首 縱筆五首 郊

行夜歸書觸目 閉戶 十一月五日夜半鶴作 晴和出遊湖山間 病思 寄子虞 紙閣午睡二首

夜分復起讀書 效蜀人煎茶戲作長句 書逆旅壁 嬾趣 閑中富貴二首 書近況寄蜀中道舊

醉中自贈 明日自和 雪中至近村 歲暮感懷以餘年諒無幾休日愴已迫爲韻十首 桐江哲上

人以端硯遺子聿纔半餘而質甚奇天將兩輒先流泚予爲效宛陵先生體作詩一首 立春前三日作

贈應秀才 春耕 首春連陰 夜坐 新春 得季長追懷南鄭幕府慨然有作 正月十一日夜夢與

亡友譚德稱相遇於成都小東門外既覺慨然有作 送陳吏部還朝 觀棋 春行 雨霽春色粲然喜

而有賦 幽思 贈持鉢道人 柳二首 山園雜詠五首

卷三十一.....四九九

兩夜書感二首 鏡湖 舟中戲書 春晚懷山南四首 春晚書齋壁 七十一翁吟 山茶一樹自冬

至清明後著花不已 晨起 春晚雜興六首 齋中雜題四首 老疾戲自贈 夜坐聞湖中漁歌 上

巳書事 對酒 自規 窮居有感 春夏之交風日清美欣然有賦三首 夜歸 農家歎 三月十一

日郊行 初夏行平水道中 初夏幽居偶題四首 晨起 小圃 幽居 夜賦 閑中書事二首 初

夏十首 四月旦作時立夏已十餘日 春夏之交鳴鳥百族惟布穀聲最悲急動人戲作十韻 倚杖

野步 竹窗晝眠 騰騰 幽棲二首 睡起 愁坐忽思南鄭小益之間二首 四月十三夜四更起讀

書 夏雨初霽題齋壁 東窗 聞臬 兩中示子聿 山園屢種楊梅皆不成枇杷一株獨結實可愛戲

作長句 夢遊山寺焚香煮茗甚適既覺悵然以詩記之 夏日 棗山二首 四月二十三日作二首

觀月 燔暑 晨起 閑思二首 梅天 夜坐 麥熟市米價減鄰里病者亦皆愈欣然有賦 兩中作

夜雨 乙卯重五 夏夜風雨極涼枕上口占 窮居 思蜀 五月二十三夜記夢 送葉尙書 路

傍曲三首 贈汪叔潛 出遊

卷二十二

五一

立秋後四日雨 夙興 存養堂爲汪叔潛作 感昔二首 病稍平示兒輩 野堂四首 七月下旬得

疾不能出戶者十有八日病起有賦 夢有餉地黃者味甘如蜜戲作數語記之 秋夜二首 病起憊甚

有歎 小舟晚歸二首 夜坐 幽事 病後衰甚非籃輿不能出門感歎有賦 秋思 題村店壁 病

去 白首 書病 舍北晚眺二首 夜闌篋中書偶得李德遠數帖因思昔相從時所言後多可驗感歎

有作 登東山 貧樂 乙卯重九 縱步近村 題齋壁 范參政挽詞二首 病後往來湖山間戲書

秋夜遣懷 初冬暄甚 贈湖上父老十八韻 初冬感懷二首 讀杜詩 記九月三十日夜半夢

小舟遊近村捨舟步歸四首 蜀僧宗傑來乞詩三日不去作長句送之 箴農 冬夜不寐 十月 讀

易二首 聞雁 悲歌行 村飲 鏡湖西南有山曰外山民某氏居之其居少西小潭受飛泉羣山環合

真異境也爲作短歌 十月十七日予生日也孤村風雨蕭然偶得絕句予生於淮上是日平旦大風雨駭

人及予墮地雨乃止二首 遊山舟中遇風雨戲作 一齒動搖似不可復留有感 山行 老學菴 枕

上偶成 舍北閑整作六字絕句 題菴壁二首 縱筆三首 十月二十八日夜雞初鳴時夢與數女仙

遇其一作詩示予頗哀怨如人間語惟末句稍異予戲之曰若無此句不可爲神仙矣其一從傍戒曰汝當

勿忘此規作詩者甚有愧色予頗悔之既覺賦兩絕句以解嘲二首 山行二首 貧甚作短歌排悶 過

張王行廟 秋月曲 卽事 悲歌行 讀李泌事偶書 晨起 喜雨 閑趣 自警 雨後二首 窗

黑 雨止行至門外戲作 野飲 雨夜有懷張季長少卿 雨中熟睡至夕二首 憶昔 燈下看梅

程泰之尙書挽詞二首 雨夕獨酌書感 白首 客言來自上臯道中以其語作一絕 睡起

卷二十四

五二三

歲暮 殘臘二首 一壺歌五首 屬疾 新歲 早春 太古 春夜 正月六日作 寄題吳斗南玩

芳亭 春初驟暄一夕梅盡開明日大風花落成積戲作三首 讀老子傳 示元用 春思 春望 丙

辰上元前一日 夜雨思枯蒼遊 春陰 寒夜歌 正月十六日園中偶賦 陵霄花 懷舊六首 夜

坐 入城舟中作 寓蓬萊館 過能仁光孝寺欲訪昕老會府中速客遂不果入 夜二鼓留西城門歸

三山 讀杜詩 蘇轍光節推挽歌詞 村翁 寄子布 落花 南窗 排悶 過鄰家戲作 看花

閒趣 春盡遣懷 二友 半丈紅盛開 感事四首 豐年行 四月一日夜漏欲盡起坐達旦 蓬萊

行 馮縣丞挽歌詞 幽居初夏四首 出蜀十九年故交零落殆盡慨然有作 憶天彭牡丹之盛有感

五月七日夜夢中作二首 急雨 夜中步月 晨起 枕上聞布穀聲 雨夜 焚黃 卽事 失鷓

鷓 贈童道人蓋與予同甲子 上方銛老求宿蘆詩宿蘆蓋所寫室名以其似漁舟也 夜坐園中至夜

分 六月二十四日夜分夢范至能李知幾尤延之同集江亭諸公請予賦詩記江湖之樂詩成而覺忘數

字而已 晨起 村飲示鄰曲 醉歸 二愛并序 蜻蜒浦 題韓運鹽竹隱堂絕句三首 突杜府君

初秋夜坐 宴坐自午至暮 舟中諫落長餘清暉輕橈弄溪渚之句蓋孟浩然耶溪泛舟詩也因以其

句爲韻賦詩十首

卷二十一

五三六

浮生 秋夜 秋夜紀懷三首 書懷 林居秋日 七月二十四日作 枕上作時聞臨海四明皆大水

書懷 秋陰至近村 閑居自述 秋雨初霽試筆 幽懷 雨後出門散步二首 秋夜示兒輩 七

十二歲吟 雨夜讀書二首 秋晚 新菊二首 九月二十八日五鼓起坐抽架上書得九域志依然有

感 題橋南堂圖 題吳參議達觀堂堂榜蓋朱希真所作也僕少亦辱知於朱公故尤感慨云 舍北搖

落景物殊佳偶作五首 自嘲 作夢 夜坐 北園雜詠十首 龜堂獨坐遣悶二首 復竊祠祿示兒

子 隴頭水 雪歌 春近 望永阜陵 初拜再領祠宮之命有感 醉中信筆作四絕句既成懼觀者

不知野人本心也復作一絕五首 臘月十九日午睡覺復酣臥至晚戲作 睡起至園中 北園籬外放

步 歲暮獨酌感懷 盆池 對食 踏蹬 海棠圖 丁巳正月二日雞初鳴夢至一山寺名鳳山其尤

勝處曰味軒予爲賦詩既覺不遺一字 初春 雨中作三首 縱筆 題慧老芋巖 立春日 病中作

二首 立春日二首 北望 上元夜作 長歌行 讀書 枕上作 書志 夜賦 晚步 漁歌 殘  
夢 書憤二首 小舟遊西涇度西岡而歸 春行 姜總管自築墓舍名醜菴求詩 湖上今歲遊人頗  
盛戲作四首 賞花至湖上 暮春二首 暮春

卷二十六

五四八

九里 清明 一百五日生 送李憲被召舊與其先侍郎遊從 初夏 幽居 閑適 病中夜賦 閒  
身 書感 衰病 雜題六首 自傷 雨後絕涼偶作 村居 久雨 七十三吟 會稽 泛舟 夜  
觀子虞所得淮上地圖 水村 題菴壁二首 晚歸舟中作 送嚴居厚棄官歸建陽溪莊 次朱元晦  
韻題嚴居厚溪莊圖 夢中遊禹祠 感懷 酒熟 病起遊近村 秋夜讀書示兒子 秋晚書感 王  
成之給事挽歌辭二首 書南堂壁二首 秋晚 晨起待子聿歸 信筆二首 龜堂東窗戲弄筆墨偶  
得絕句五首 次呂子益韻 舍北行飯書觸目二首 明日復得五字二首 十一月二十二日夜待子  
聿未歸 南窗 幽居 春近山中即事三首 雪夜感舊 將進酒 歲暮懷張季長 謝朱元晦寄紙  
被二首 送王季嘉赴湖南漕司主管官 菴中夜興 初春欲散步畏寒而歸 憶昔 戊午元日讀書  
至夜分有感二首 雜感十首 歎老 朝飢食齏麵甚美戲作二首 漁隱堂獨坐至夕 讀書 北望  
蘭 古梅 山腳散步由舍北歸三首 寄題連江陳氏拂石軒 得張季長書以大蓬見稱蓋以予寄  
祿官視昔秘書監也因作五字寄之 病足累日不能出菴門折花自娛 書意 新燕 北巖采新茶用  
忘懷錄中法煎飲欣然忘病之未去也 連日至梅仙塢及花涇觀桃花抵暮乃歸二首

卷二十七

五六〇

病中作 題郭太尉金州第中至喜堂 暮春 小園新晴二首 春晚感事二首 春晚園中作 題夷  
堅志後 幽居 聞鳥聲有感二首 與子虞子坦坐龜堂後東窗偶書 行年 東窗小酌二首 西林  
傳菴主求定菴詩二首 夏日五首 夜酌 夏夜四首 泛舟 感舊六首 書喜 自詠 露坐二首  
親舊或見嘲終歲杜門戲作解嘲 北窗 新秋以窗裏人將老門前樹欲秋爲韻作小詩十首 食新

有感貧居久蔬食至是方稍得肉 秋夕露坐作 有年 大雨 東西家 予自春夏屢病至立秋而愈  
作長句自賀 七月十一日雨後夜坐戶外觀月 王與道尙書挽詞二首 初秋 感秋 北窗試筆

秋思四首 新涼二首 自遣 自規 感舊四首 秋日獨酌 夙興 身世 憶昔 豐歲 村居  
中秋夜半後無雲而月色微淡尤爲絕景 夜賦 遣興 秋賽 寄題周丞相平園 兩三日歌 戲作

治生絕句 龜堂雜題四首 偶讀陳無己芍藥詩云一枝剩欲簪雙髻未有人間第一人蓋晚年所作也  
爲之絕倒戲作小詩 村舍 雨中作 江郊 閑趣三首 小飲 作字 晝眠起偶賦 小舟過吉澤

效王右丞 湖山雜賦五首 太息四首 學書 晚興 秋晴見天際飛鴻有感 初寒獨居戲作 夢  
觀牡丹 書喜三首 小飲罷行至湖塘而歸 病雁 澤居 秋穫歌 戊午重九 重九懷獨孤景略

晨鏡 秋霽遣懷 屏迹 初寒 風雨 龜堂自詠二首 閑居初冬作 病中排悶 季秋已寒節  
令頗正喜而有賦

卷二十八

秋懷 吳體寄張季長 嘲畜貓 立冬日作 初冬 醉題 新作火閣二首 舍北行飯 遣興二首

舟中三首 兩夜感舊 夜聞落葉 閉門 祠祿滿不敢復請作口號三首 過鄰家 舍北野望四  
首 書感 冬夜爐邊小飲 龜堂獨酌二首 冬夜作短歌 病愈 自遣 感舊二首 寒雨中偶賦

二首 壽考如富貴 午飯二首 題王仲信畫水石橫幅 治圃 冬日感興十韻 冬日出遊十韻  
思蜀三首 作雪二首 戲詠山家食品 耕罷偶書 兩夜 菴中晨起書觸目四首 三山杜門作歌

五首 老境二首 記戊午十一月二十四夜夢 六經示兒子 舍北晚步 對酒 夜坐求酒已盡嚼  
然有賦 食粥 寒夜 梅花六首 三山卜居今三十有三年矣屋陋甚而地有餘數世之後當自成一

村今日病少間作詩以示後人二首 南園觀梅 歲盡苦寒 己未新歲 歲首書事二首 初春 菴  
中獨居感懷三首 戲作貧詩二首 春日園中作 中春連日得雨雷亦應候 雨後微陰光景益奇復

得長句 春日小園雜賦二首 簡鄰里 客叩門多不能接往往獨坐至晚戲作 園中偶題四首 北

窗偶題四首 沈園二首

卷二十九

五九一

戲贈園中花 春思 贈燕 兩闕示兒子 讀晉書 春晚苦雨 燕 夜雨 寒食日九里平水道中

春晴自雲門歸三山 予數年不至城府丁巳火後今始見之 晚自北港泛舟還家 書懷 初夏

小築 喜雨 晨起 五月初病體益輕偶書 己未重五 五月七日拜致仕勅口號二首 致仕後即

事十五首 讀後漢書二首 新裁道帽示帽工 新製道衣示衣工 兩翁歌 五月中連夕風雨氣候

如高秋枕上有賦 前詩感慨頗深猶吾前日之言也明日讀而悔之乃復作此然亦未能超然物外也

兩後過近村 銘座 致仕後述懷六首 蝶 戲贈酒榼 題菴壁二首 泛舟澤中夜歸 書嬾 晨

起 夜坐 白樂天詩云倦倚繡牀愁不動緩垂綠帶鬢髮低遼陽春盡無消息夜合花前日又西好事者

畫之為倦繡圖此花以五六月開山中多于茨棘人殊不貴之為賦小詩以寄感歎 蟬 蟬 望露 久

雨路斷朋舊有相過者皆不能進 散步至三家村 村東晚眺二首 露坐二首 致仕後歲事有望欣

然賦詩 夜聞姑惡 村舍雜書十二首 逃暑小飲熟睡至暮二首 夜坐庭中達旦 讀前輩詩文有

感 自嘲 予讀元次山與瀼溪鄰里詩意甚愛之取其間四句各作一首亦以示予幽居鄰里四首 東

山避暑用轆轤體 喜雨 得故人書偶題 喜雨歌 老學菴井 長歌行 七月二日夜賦 自述

首 項羽 曹公

卷四十一

六〇四

夜雨 昔人有畫醉僧醉道士醉學究者皆見于傳記及歌詩中予暇日為各賦一首 次季長韻回寄

溪上小酌 齋中夜賦 讀舊臺有感 新秋 陳阜卿先生為兩浙轉運司考試官時秦丞相孫以右文

殿修撰來就試直欲首送阜卿得予文卷擢置第一秦氏大怒予明年既顯黜先生亦幾蹈危機偶秦公薨

遂已予晚歲料理故書得先生手帖追感平昔作長句以識其事不知衰涕之集也 書喜二首 幽居

雜興四首 贈鷺 贈鵲 東堂睡起 五鼓起坐待旦 功名 搔首 小雨釣歸 曉賦 念雨 遣

輿四首 讀林遠魏野二處士詩 紙墨皆漸竭戲作 讀隱逸傳 泛舟至東村 自詠 野興 讀書

客有見過者既去喟然有作二首 秋陰 八月九日晚賦 燕坐 村飲四首 秋雨益涼寫興 蔬

米偶不繼戲書 牧牛兒 與兒子至東村遇父老共語因作小詩 微雨午寢夢憩道傍驛舍若在秦蜀

間慨然有賦 晨起對鏡 村思 秋夜 醉中書懷 次韻鄭盱眙見寄并簡其甥劉君 書齋壁 一

老 戲用方外語示客 秋晚三首 次金溪宗人伯政見寄韻 新寒二首 村鄰會飲 試筆二首

孤村 絕緣以來衣食愈不繼小兒力園之殊未有涯予謂不若痛節用爾示以此詩 予宿疾多已失去

獨氣痛時作賦詩自寬 秋懷十首末章稍自振起亦古義也 九月七日子坦子聿俱出斂租穀雞初鳴

而行甲夜始歸勞以此詩 醉題埭西酒家二首 秋晚 省事 晨起頗寒飲少酒作草數幅 往事

步至東莊 秋思二首 讀退之人不知古今馬牛而襟裾之句有感 病愈看鏡 讀韓致光詩集 逆

旅書壁二首 初寒老身頗健戲書二首 子龍求煙雨軒詩口占絕句二首

卷四十一.....六一六

居室甚隘而藏書頗富率終日不出戶二首 無酒歎 讀書 醉賦 掩扉 六經二首 舟中作 秋

晚二首 西窗獨酌 冬初薄霜病軀益健欣然有賦 一錢 燈下讀書戲作 遊近山 示兒子 寄

懷陽周丞文璣周哥詩卷殊可喜 旅思 東村步歸二首 觀方外書 午睡初起二首 暮秋遣興二

首 種蔬 起晚戲作 老歎 新治暖室 暖閣 自詠 夜坐 初冬有感二首 題酒家壁 冬初

出遊二首 早飯後戲作二首 擬古四首 東村二首 倚闌 霜寒不能出戶偶書 冬晴與子坦子

聿遊湖上六首 夢蜀 歲晚二首 讀老子 貧病 洪雅葛仙硯 冬日讀白集愛其貧堅志士節病

長高人情之句作古風十首 十一月四日夜半枕上口占 齋中弄筆偶書示子聿 飢寒吟 病愈小

健戲作二首 祭竈與鄰曲散福 湖水愈縮戲作 夜坐 夢中作遊山絕句二首 大姪挽辭 書幸

二首 退居 北望感懷 白髮 老歎 作竹籬成因把酒其間戲題四十字 新養白雞毛羽如玉殊

可愛 新籬 龜堂雜興十首

己未冬至 冬至夜坐作短歌 新裁短褐接客以代戎服或以爲慢戲作 冬夜 書感 書意 試茶

對酒懷丹陽成都故人 三山卜居三十有四年矣老身七十有五兒輩亦頗宜學未爲非吉也偶作五

字示諸兒 村興 枕上 得建業倅鄭覺民書言虜亂自淮以北民苦徵調皆望王師之至 兩夜讀書

夢中作 題傳神 紀懷 新作柴門戲書 炊飯 愛閑 與子聿讀經因書小詩示之 登東山

己未歲暮 冬夜讀書示子聿八首 幽興 寓歎 夢題驛壁 新春 庚申元日口號六首 視東臯

歸 晚步舍東 人日東園 遊旅行 小雨初霽 獨夜 忍窮 開歲半月湖村梅開無餘偶得五詩

老病 三二年來夜夢每過吾廬之西一士友家觀書飲酒方夢時亦自知其爲夢也二首 上元兩

雜興二首 初春書喜 幽居無一事 贈道流 病中作 病愈偶書 小園獨酌 飯罷戲示鄰曲

春日六首 新晴野步 湖上作二首 夜行過一大姓家值其樂飲戲作 枕上作二首 悽懷行 春

聲 答客 閑中自詠二首 甲申兩 今歲遊花溼差晚戲作 枕上口占三首 贈謝正之秀才 連

日往來湖山間頗樂即席有作 贈貓 歎老 殘春 東村 晚步舍北歸 記夢 寄題揚州九曲池

投老 茅亭 貧甚翼常用酒杯 春晚泛湖歸偶賦

東園小飲四首 病退願思遠遊信筆有作 春晚開步門外 嘲布穀 題齋壁 龜堂晚興 長干行

發生 園中觀草木有感 恩賜龜紫二首 自警 獨夜 兩夕枕上作 喜晴 觀運糧圖 宇文

褒臣吏部子在蜀日與之遊至厚契闊死生二十年矣庚申三月忽夢相從如平生愴然有賦 阿姥 初

夏 讀書 喜晴 初夏北窗二首 書適 幽居初夏四首 獨醉 獨立 高臥 趙彥膚修撰挽辭

讀香奩集詩戲效其體 野步至村舍暮歸 述悲 江東韓漕晞道寄楊庭秀所贈詩來求同賦作此

寄之 兩夜 小橋 自笑 入梅 兩夜 燕 午枕 項里觀楊梅四首 夜歸 五月十一日睡起

示客 兩中作 舟中遣興 自嘲 齋中雜興十首 夏五月方閱兩忽大風兩三日未止二首 遣



興二首 六月一日曉賦 露坐 夜賦 乙夜納涼 五鼓 老態 枕上聞風鈴二首 寄贈湖中隱  
 者 觀畫山水 六月十八日立秋未旦起行山園口占 新秋 晨起自山園歸書室 初秋小雨 出  
 遊 對酒 自勉 新涼 醉中題民家壁 秋景 舟中作 雜興四首 自詠閑適 近村暮歸 秋  
 興 讀史有感三首

卷四十四

六五二

讀何斯舉黃州秋居雜詠次其韻十首 讀蘇叔黨汝州北山雜詩次其韻十首 新治火閣 枕上作二  
 首 初睡起有作 示友 述懷 枕上二首 病足久敗遊山之興山中道人多見問戲作示之 舟中  
 作 追懷胡基仲 十月八日九日連夕雷雨 西村 感事示兒孫 或遺木瓜有雙竇者香甚戲作  
 十月 初晴 梅花五首 對酒戲詠 冬夜 冬晴稍理舊學有感於懷 葺小園及東齋 讀經示兒  
 子 出遊不果 夢行秦晉間有作 聞雞鳴自警 嘲子聿 馬上口占 幽居 感事 初寒 寄題  
 季長飾菴 對食書媿 戲題酒家壁三首 十月二十八日夜風雨大作 夜寒燃火有感 農事休小  
 葺東園十韻 開東園路北至山脚因治路傍隙地雜植花草六首 連日治園至山亭又作五字四首  
 寒夜 掩卷有感 閑遊 野寺 三江 讀老子 新泉絕句二首 風雨 題菴壁二首 讀僊書作  
 讀淵明詩 寒夜枕上 新晴出門閑步 聞笛 鳴禽 食晚 午坐戲詠 戲詠鄉里食物示鄰曲  
 歲暮貧甚戲作 汪叔潛教授挽辭 汪給事太夫人程氏挽辭 太恭人諭氏挽辭 路乾 寒夜  
 乍晴至園中

卷四十五

六六五

十二月三日夜橋上看月 流年 山家五首 小舟白竹篷蓋保長所乘也偶借至近村戲作二首 稻  
 飯 殘臘二首 書志 數日不出門偶賦三首 寄題嚴居厚仲鈞軒 寄趙昌甫并簡徐斯遠 南園  
 觀梅 老身 獨處 醉中歌 排悶 庚申十二月二十一日西和州健步持子布書報已取安康襄陽  
 路將至九江矣悲喜交懷作長句二首 園中作 足疾 歲暮書懷二首 除夜 修路 金丹 平昔

二月三日春色粲然步至湖上 計子布歸程已過新安入畿縣界 東園觀梅 喜得建茶 春雨

春兩二首 初春感事二首 道室書事 先少師宣和初有贈晁公以道詩云奴愛才如蕭穎士婢知詩

似鄒康成晁公大愛賞今逸全篇偶讀晁公文集泣而足之 春日雜題六首 春日喧甚戲作 春日

書室獨夜 追感往事五首 書意二首 靖都行有序 春來食不繼戲作 紹興辛酉予年十七矣距

今已六十年追感舊事作絕句 獨坐視老奴灌園 雨晴風日絕佳徙倚門外三首 春遊 春雨三首

書懷 三月十六日至柯橋迎子布吏選二首 題施武子所藏楊補之梅 食野菜二首 予十許歲

即往來雲門諸山今復與諸子來追念悽然 雲門道中 龍瑞 禹寺 寄題張仲欽左司槃澗 園中

晚興 送陳希周赴安福令 春晚久雨排悶 甲子日晴 三月二十日兒輩出謁孤坐北窗二首 春

盡記可喜數事 立夏前二日作 老民二首 貧甚自勵 衡門 遊法雲 舟中作 貧居 初夏野

卷四十六 六七八

孟夏方渴雨忽暴熱雨遂大作 小池 衡門 海上作 朝飢示子聿 養氣 示友 早涼熟睡 初

夏 夏雨 倚樓 晚興二首 晨雨 戲作絕句以唐人句終之二首 述懷 閒中自詠 晨興 自

詒二首 西村 漁父 放歌行 苦貧 晨起至參倚齋示子聿 夏夜對月 夏夜 五月十日曉寒

甚聞布穀鳴有感 老歎 閉戶 長飢 山齋書事 贈道流 避暑松竹間 連日大雨門外湖水渺

然 午睡 窮居 梅雨 村居書事 閑中信筆二首其一追和陳去非韻其一追和王履道韻二首

題齋壁 夏日雜題八首 夏雨歎 物外雜題八首 過村舍 晝臥初起書事 夜雨有感 偶作夜

雨詩明日讀而自笑別賦一首 舍西晚眺示子聿 自訟 讀唐人樂府戲擬思婦怨 南堂納涼二首

中庭納涼二首 待旦二首 晨興二首 晚涼述懷 湖塘晚眺二首 小集 出門與鄰人笑談久

之戲作四首 魚池將涸車水注之 一齒動搖已久然餘皆堅甚戲作 晚至新塘 夜泛湖中 立秋

後作 覽鏡 早秋南堂夜興 菱歌 聞角 湖隄 秋旦 龜堂晨起 柳橋秋夕 道室雜題四首

卷四十七

儒生 秋夜 寺閣 秋暑夜興 漁父 省事 新涼書懷四首 七月十七晚行湖塘雷雨大作 七月十八夜枕上作 梅市 秋思 小舟湖中夜歸追和孟浩然夜歸鹿門歌 酒盡燒香 自述二首

風雨 白露前一日已如深秋有感二首 東村晚歸 秋望 郭西 舍北 夜坐示子聿 柳橋晚眺

秋興五首 嘉泰辛酉八月四日雨後殊凄冷新雁已至夜復風雨不止是歲八月一日白露二首 近

村民舍小飲 閑適二首 夜歸二首 自詠 老歎 秋社 晨起 中夜睡覺兩目每有光如初日歷

歷照物晁文元公自謂養生之驗予則偶然耳感而有作 錢道人不可飲酒食肉囊中不畜一錢所須飯及

草屨二物皆臨時乞錢買之非此雖強與不取也二首 枕上 山園書觸目 苦貧戲作 秋曉習感

秋夜 村舍二首 天涼時往來湖山間有作 兩夜歎 病足晝臥夢中謔諄乃誦尚書也既覺口占絕

句二首 新買啼雞 幽棲二首 秋日雜詠八首 望永阜陵 排悶 秋日晨起 出遊暮歸戲作

自詠 予出蜀日嘗遣僧則華乞籤於射洪陸使君祠使君以老杜詩為籤予得遣與詩五首中第二首其

言教戒甚至退休暇日因用韻賦五首 悲歌行 秋夜讀書 對食戲詠 懷昔 偶得雙鯽二首 秋

懷十首以竹藥閉深院琴樽開小軒為韻 示客 秋晚村舍雜詠二首 臥病累日羸甚復小健戲作

三首

卷四十八

縱筆四首 村興 賽神 小立 窮老 晚步舍東 述野人語二首 戲答野人二首 建安陳希周

官海南為予致兩拄杖其一促節竹其一桄榔也 排悶 九月十二日折菊 表姪江垌種竹名筠坡來

求詩 微雨 秋晚寓歎六首 秋晚湖上 縱遊歸泊湖橋有作 九月十八日至山園頗有春意 明

日又來天微陰再賦二首 雨後至近村二首 雨復作自近村歸 兩寒戲作 衡門晚眺 不寐 示

子虞 弊廬 予未冠即交諸名勝今無復在者感歎有作 夜雨 題嚴州王秀才山水枕屏 小飲示

座中 搔落吟 插花 兩過行視舍北菜園望北村久之二首 居三山時方四十餘今三十六年久

卷四十九

已謝事而連歲小稔喜甚有作 幽居 晴晴肩輿至湖上 戲作野興六首 道室書事 行飯至湖桑  
堰東小市 負日戲作 遊西村 初冬 遺懷 策杖 汲東山下井 園中作二首 園中 短篷  
自適 堂東小室深丈袤半之戲作 獨處二首 探梅至東村 讀史 漁翁二首 寓言三首 夜四  
鼓睡覺起行簷間觀新作南籬 客去追記坐間所言 疇昔 飲牛歌 牧羊歌 生日子聿作五字詩  
十首為壽追懷先親泫然有作 園中書觸目 養生 齊中雜興二首 江上 追憶征西幕中舊事四  
首 冬夜 冬日 冬朝 冬暮 風月 落葉 邠風 擁爐不出輒終日自嘲 嘲梅未開

七二四

自嘲 解嘲 野興 枕上 遠遊 晚遊 夜坐 酒熟醉中作短歌 冬夜讀書有感 散步湖上至

野人家 對食戲詠 昨非 遂初 小兩偶出鄰里小兒競隨吾後不知其意何也 書喜 書房雜書

二首 塞夕 讀經 讀史 讀劉蕡策 雨霰作雪不成大風散雲月色皎然 中夜苦寒 示子孫二

首 早梅 縱筆二首 歲暮雜感四首 自賈 懷舊用昔人蜀道詩韻 出遊 辛酉冬至 冬至後

一日書 客至 子聿入城 降魔 冬日二首 客去 自勉四首 午晴至園中 七姪歲暮同諸孫

來過偶得長句 苦寒 閑中書適二首 復湖 梅花絕句四首 跋馮氏蘭亭二首 十二月二日夜

夢與客並馬行黃河上憩於古驛二首 侍樓 讀書 讀史 閑遊 日暮 省事 雪中作 夢韓无

咎王季夷諸公 晴窗讀書自勉 冬夜讀史有感 大寒 自詠 晚興 雪後寒甚 雪晴步至舍傍

訪隱者 村野 初夜 雙松 兀兀 殘曆 戒言 聞松風有感 遺興二首 有道流過門留與

之語頗異口占贈之 閑記老境二首 小飲梅花下作 門外野望 自題傳神 歲暮貧甚戲書 晚

晴閑步鄰曲間有賦 誦書示子聿二首 十二月二十九日夜半雨雪作披衣起聽 辛酉除夕 除夕

卷五十一

七二六

開歲 箕卜 梅花絕句六首 立春前一日作 立春日 送子龍赴吉州掾 正月五日出遊 六日

雲重有雪意獨酌 閑甚戲作 莫笑 初春雜興五首 春曉 書感 壬戌正月十四日 十五日

高枕 送施武子通判 老學菴自規 兩夜 子聿以剛日讀易柔日讀春秋常至夜分每聽之輒欣然

忘百憂作長句示之 記夢 夜賦 杜叔高秀才兩雪中相過留一宿而別口誦此詩送之 曉賦 雪

後龜堂獨坐四首 二月一日作 過東鄰歸小憩 寄呂子和南廂 自述 呂氏子夔郎求詩 新晴

晚步湖堤歸偶作 春來食不足戲作 散步湖隄上時方濬湖水而稍渺瀰矣 老學菴 春晚 燕

堂雨後作 書感 後書感 村居書喜 中春偶書 夜泊 東岡櫻桃已過殊不知 別嚴和之二首

齋中雜題四首 春晚 社日小飲 山茶 春夜 春遊 北窗睡起 北窗懷友 舟中作二首

湖村春興 鄰餉 久雨 登山 讀易 村居書事二首 春晚書村落間事 雜興六首 南堂獨坐

春雨示鄰曲 讀書 新晴賞牡丹 對酒 病起遇晴有作 定命 假山小池二首 春欲盡天氣

始佳作詩自娛 自詠 西村勞農 題廬陵蕭彥毓秀才詩卷後二首 舍北溪上垂釣 三月二十二

日作

卷五十一

七三八

書感 寒食 西村暮歸 舍外彌望皆青秧白水喜而有賦 寄題太和陳誠之秀才遠明樓 蝸舍

東岡 首夏 贈曾溫伯邢德允 自述三首 示客 對食戲作二首 對酒戲作二首 夏初湖村雜

題八首 溪上露坐 北齋書志示兒輩 作盆池養科斗數十戲作 枕上 晨起 喜晴 讀夏書

幽栖 閑詠園中草木六首 夜雨 晨起 放翁 過鄰家 東園 曉出至湖桑埭 兩夜觀史 兩

復作 園中 湖上遇道翁乃峽中舊所識也 老學菴北作假山既成即雨彌月不止 苦雨二首 五

月初作 游西村贈隱者 彷徨 碌碌 讀陳蕃傳 夏日晨起 醉舞 北窗微陰 夏夜 村居

晚興 溪上 貧甚戲作長句示鄰曲 縱筆 入都 開局 感舊 贈陸伯政 兩夜 自局中歸馬

上口占 秋雨 秋夜 求月桂 秋思二首 史院書懷 楚辭所謂桂數見於唐人詩句及圖畫間今

不復見矣作二絕句屬山僧野人試求之 兩夜 九月初作四首 暮秋 重九不出遣懷 暇日 憶

三山 示子聿 車中作 初寒偶出 史院晚出 贈洞微山人 九月十四日夜雞初鳴夢一故人相

語曰我爲蓮華博士蓋鏡湖新置官也我且去矣君能暫爲之乎月得酒千壺亦不惡也既覺惘然作絕句  
記之 初寒對酒 午晴試筆 夜吟二首

卷五十一

七五一

閑詠二首 遊張園 客至 客去 無客 次韻黃宮教見贈 書直舍壁二首 韓太傅生日 懷故

山 西齋遣興 兩夜作 掩戶 臥疾 晚歸 寂寂 獨坐有懷杜伯高 李允蹈判院送酒四斗予

答書乃誤以爲二斗作小詩識愧 感舊贈超師 雜書四首 送子虞赴金壇丞 今日史課偶少暇戲

作五字 入局 縱筆四首 送襄陽鄭帥唐老 掩門四首 自嘲 乍晴出遊 送客至湖州市 題

史院壁四首 寄二子 訪客至北門抵暮乃歸 思除秘書監 寄題儒榮堂 夙興 館中書懷 雜

興十首以貧堅志士節病長高人情爲韻 送任夷仲大監 謝韓寶之直閣送燈二首 道山直舍 館

中營繕方一新而右文殿生芝草甚異 戲述淵明鳩漸遺事 雪夜 直舍獨坐思成都 歎老 冬曉

有懷梁益舊遊 孤坐無聊每思江湖之適 夢韓无咎如在京口時既覺枕上作短歌 出東城並江

而歸 子聿欲暫歸山陰見乃翁作惡遂不行贈以此詩 題趙生畫 題宣律師畫像 暇日弄筆戲書

三首 立春前後連日風雨 武林 立春後十二日命駕至郊外戲書觸目三首 春夜 訪客至近郊

車中作 倦飛 遺興 癸亥正月十日夜夢三山竹林中筍出甚盛欣然有作

卷五十二

七六一

謝徐志父帳幹惠詩編 河橋晚歸 謝王子林判院惠詩編 紹興癸亥余以進士來臨安年十九明年

上元從舅光州通守唐公仲俊招觀燈後六十年嘉泰壬戌被命起造朝明年癸亥復見燈夕遊人之盛感

歎有作 出謁晚歸 思歸示子聿 上元後連數日小雨作寒戲作四首 出湧金門 書志示子聿

入春念歸尤切有作 書房雜詠二首 獨立思故山 寓歎 後寓歎 新歲頗健寄青城故人 新年

七十有九 春日訪客於逆旅及郊寺感而有賦 二月二日夢中作 對酒作 西湖春遊 春晚用對

酒韻 題館中直舍壁 春晚懷故山 春社日效宛陵先生體四首 局中春興 久客 幽居 春日

絕句八首 歎老 春雨中偶賦 戲詠落花 思歸示兒輩 東軒花時將過感懷二首 江亭 對食

鮑食 記夢 初夜暫就枕 次林伯玉侍郎韻賦西湖春遊 湖中微雨戲作 與兒輩泛舟遊西湖

一日間晴陰屢易 贈呂次翁 得子聿到家山後書 題齋壁三首 小飲 贈傳神水鑑 春晚 天

竺曉行二首 初見石榴花 夢遊三首 江亭晚思 上章納祿恩畀外祠遂以五月初東歸五首 江

亭 題三茆邵道士雲隱二首 受外祠敕 感寓二首 肉食 贈成封州 予以壬戌六月十四日入

都門癸亥五月十四日去國而中有閏月蓋相距正一年矣慨然有賦二首 雨中別同朝諸公二首 出

城 宿北錢清 老伶 舟行錢清柯橋之間 官莖菜館 乍自京塵中得歸故山作五字識喜 初歸

雜詠七首

卷五十四.....七七四

湖上急雨 夏日獨居 溪上夜釣 幽事 風興 文章 閑遊四首 夏日 蜻蜓浦夜泊 幽興

避暑近村偶題 南堂夜坐 立秋前一夕作 憶昔 自嘲 夜坐庭中 養生 飲酒近村 遊山四

首 聞蛩二首 入秋遊山賦詩略無間日戲作五字七首識之以野店山橋送馬蹄爲韻 村居四首

六藝示子聿 七月十七夜五更起坐至旦 書懷四首 湖上秋夜 書感 示兒 書適二首 放慵

登臨 寓歎 居家 舟中作 築舍 雜感五首 送陳懷叔赴上界酒官卻還都下 歸三山入秋

益涼欣然有賦 子聿至湖上待其歸 晚行舍後 秋夜讀書有感二首 治圃 村醉 病臥 書悔

杭海 黃犢 秋夜 目昏頗廢觀書以詩記其始時年七十九矣 假山擬宛陵先生體 秋興二首

湖上夜歸 晨起 飯飽書臥戲作短歌 孤學 自嘲 試筆 秋思三首 晨起偶得五字戲題橐

後 野步 喜晴 自箴 自喜 自詒二首 對酒示坐中 秋晚衰疾稍平聊識喜懷 偶出至近村

書宛陵集後 鄉居 重九無菊有感

卷五十五.....七八六

記東村父老言 試筆 曠懷 夢行小盆道中二首 秋樹 雜感六首 柳橋秋夜 訪隱者不遇

卷五十六

蒼檜 農家歌 君子非好異 獨登東嶽 灌園 晨起 龜堂 罽漢 客有言太山者因思青城舊

遊有作 遊近村 疎雨 秋曉 癸亥初冬作 兀坐久散步野舍 法雲寺 小徑登東山繞行自西

北至溪上 笑睡 逆旅 東園 雜感四首 渡頭 小飲賞菊 與兒輩小集 舍北晚眺 書室獨

處欣然有詠 冬初至法雲 感憤 記老農語 村舍 自述 泊舟湖橋酒樓下 菴中雜書四首

連日暴下爾然不支戲作 大風 野興二首 若耶村老人 霜曉 山澤 遠遊 北窗 醉題 幽

居 連陰欲雪排悶 示子聿 項里溪上見珍禽曰溪鵲相隨數十步不去 冬夜對書卷有感 項王

祠 入城 出城 不入城半年矣作短歌遣興 先大父以元祐乙亥寓居妙明僧舍後百餘年當嘉泰

癸亥游復假榻一夕感歎成詠 志學 晚行舍北 幽居述事四首 十一月五夜風雪寒甚燃薪取煖

戲作五字 魯墟 曉雪二首 養生 夜讀羣仲至閩中詩有懷其人 獨意 十一月十三日夜作

故人趙昌甫久不相聞寄三詩皆傑作也輒以長句奉酬 夢中賦早行 兀兀 哺猿 與子坦子聿元

敏犯寒至東園尋梅 示諸孫 題齋壁二首 雜言示子聿 夜坐聞大風 歸老 懷舊絕句三首

道室雜詠三首 偶與客飲客去戲作 故里 齟齬 冬夜 枕上 寒暑 長溪東山容老索月谷幽

賞詩二首 梅 歲晚幽興四首 寄題胡基仲故居 雪夜 聽雪為客置茶果 獨夜 寄題王才臣

山居 夜賦 雪後二首 寒夜讀書 對食戲作六首 甲子立春前二日作 家居自戒六首 感貧

鄰曲 送客 夜寒起坐待旦 信手翻古人詩隨所得次韻二首 甲子歲元日 初春書懷七首初

春紀事二首 送子虞吳門之行 法雲僧房 陌上 獨立 春陰 閑味 聞虜亂代華山隱者作

春日 寄子虞 送子坦 送子遜 醉眠初起書事 見蜂采檜花偶作 對酒戲詠二首 夜興

老甚自詠二首 夜過魯墟 園中小飲 幽居春晚二首 梅花過後遊西山諸菴 梅僂塢花溼觀桃

李 家園賞花 聞金谿陸伯政下世 一春風雨大半有感 山行贈野叟二首 雲門道中 讀書有

感 大言雜興九首 春晚出遊六首



卷五十七

北窗 幽居雜題四首 題旅舍壁二首 出行湖山間雜賦四首 上巳 筍絕句 贈蘇召叟 贈趙

去華 道室述懷 春晚雨中作 晚行湖上 欲卜菴居未有勝地作詩識之 東窗遣興 獨酌 舟

中作 衰疾 示兒 野興 閑遊四首 炊米不繼戲作 暮行 小雨二首 送辛幼安殿撰造朝

初夏 自警 枕上 野步至近村 書懷示子適 三月三十夜聞杜宇 夜大雨連明晨起乃知之

聞虜亂次前輩韻 壯士吟次唐人韻 衰疾 書日用事二首 初夏出遊 初夏晝眠 農事稍閒有

作 夜雨 朝晴 北窗 遊山戲作 遣興二首 細雨 初暑 夙興 新堂 卽席四首 生涯

落花 四月廿二日微雨中次前輩韻 夜雨 夏日 久雨二首 舟中 繫船 復雨 書適 村社

禱晴有應 題北窗二首 晝坐聞牆外人聲殊敗幽思戲作 晨起行園中 葺舍 次韻林伯玉登臥

龍 道室雜詠六首 湖塘夜歸 東軒 夏日 斫脍 野飯 村酒 避雨 雨中短歌 散懷 南

堂 門屋納涼 幽居 露坐 暑中久不把酒盆池千葉白蓮忽開一枝欣然小酌因賦絕句二首

卷五十八

八二四

老馬 大熱 大雨 午睡 書意 卜居三山已四十年矣暇日有感聊賦五字二首 北窗 睡起已

亭午終日涼甚有賦 殘雨 溪上避暑二首 龜堂避暑 旅舍偶題 溪月 砭愚 雜興十首 病

瘧兩作而愈 露坐 戲詠 初秋書感 湖上 枕上 書懷 游昭牛圖 唐希雅雪鷗 葛蒲 吾

廬東北皆修竹茂林羽族來栖者不可數計感而有作 秋夜聞蘭亭天章寺鐘 閨雨 徒行短歌次前

輩韻 江樓次前輩韻 七月四日夜賦 出近村歸偶作 送子修入閩 書志 秋雨 雨後涼甚

屏迹二首 書事四首 雨後 幽居 書事 秋夜感遇十首以孤村一犬吠殘月幾人行爲韻 草書

歌 自傲 新秋二首 憫俗 塊坐齋中有感 新涼示子適時子適將有臨安之行 秋雨二首 講

學 野興四首 示元致 八月四日夜夢中作 明日復理夢中意作 又明日復作長句自規 示子

孫 秋夕 徂歲 村居遣興三首 甲子秋八月偶思出遊往往累日不能歸或遠至傍縣凡得絕句十

有二首雜錄入稿中亦不復詮次也

卷五十九

八三六

遊山 對酒 遣舟迎子適因寄古風十四韻 重寄子適 飯後偶題 秋興二首 台北行飯 舍南

野步 感昔五首 病齒 揮手 過鄰家 甲子秋八月丙辰雞初鳴時夢劉韶美示詩八篇高古可愛

明旦作此詩志之 山居 歸老 送子坦赴鹽官縣市征 寄子坦 書感 自扁門歸 遺興 詩酒

晚秋野興二首 舟中口占 閉門 暮秋六首 農舍四首 九月十日夜獨坐 述意 小疾自警

白龍 學易二首 閑中作 枕上 出遊五首 家居三首 贈隱者二首 貧中自戲 風雨夜坐

示村醫 秋雨 雜興六首 江亭 晚歸 懷昔 初寒示鄰曲 夢中作并序 初寒二首 鉅菜

對酒 夜臥久不得寐復披衣起呼燈作草書數紙乃復酣枕明旦作此詩記之 孤雲 自閑 贈雞

子適爲其長兄置酒予亦與焉作五字示之 太息三首 代鄰家子作 山行 行過西山至柳姑廟

晚歸 月夕幽居有感 寒夜將旦作 舍北獨步 山村道中思蜀 不如茅屋底四首 菜羹 十月

暄甚人多疾十六日風雨作寒氣候方少正作短歌以記之 冬夜題齋壁 自遣 蕩蕩 晨起

述感 甲子歲十月二十四日夜半夢遇故人於山水間飲酒賦詩既覺僅能記一二乃追補之二首 舟

中夜賦 舟中曉賦 漁家 遠遊 與兒孫小飲 遂初 與村鄰聚飲二首 夜坐示子虞 行飯暮

歸 寒雨中夜坐 枕上 卽事二首 雜感六首 閑中自嘲 暇日坐山麓松石間作 得子虞臨安

舟中書因寄 書喜二首 老學菴夜興 感昔七首 孤村 村舍書事 小葺居舍 冬至 夜坐示

子適兼示元敏 客懷 雜書幽居事五首 題齋壁 探梅 新移竹菽喜于得雨而池中鷓鴣乃以水

溢而去戲以長句記之 讀宛陵先生詩 勉學 道室試筆六首 治心 夜夢遇老人於松石間若舊

嘗從其遊者再拜敘問闊老人亦酬接甚至云 過鄰家 村飲 市飲 社飲 舟中作 風雲晝晦夜

遂大雪 大雪 雪夜 雪霽 雪後 夜寒與客燒乾柴取暖戲作 排悶 席上有舉呂居仁詩者因

卷六十一

八四九

次其韻示坐客 予使江西時以詩投政府丐湖湘一麾會召還不果偶讀舊臺有感 柳橋 鷗鷺  
感物 甲子歲暮 出遊至僧舍及逆旅戲贈絕句二首 歲暮出遊 出遊所至皆欣然相迎口占示之

題旅舍壁 野人舍小飲 自近村歸 夢華山 歲暮與鄰曲飲酒用前輩獨酌韻 山中飲酒 客  
亭 除夜

卷六十一

八六〇

乙丑元日 元日讀易 自開歲陰雨連日未止 枯菊二首 村舍雜興五首 夜興 示鄰曲 夢中

作 春雨 草堂 道室 旅次有贈 雜感五首以不愛入州府爲韻 自詠絕句八首 風月吟 年

光 龜堂 春晴 閉門二首 有所感 八十一吟 高吟 湖上作 賞花 園廬 乍晴行西村

書歎 新製小冠二首 書逆旅壁 倚樓二首 小雨 書歎 遷雞柵歌 春興 小園 二月晦日

夜夢欲卜居近邑道遇老父告以不利欣然從之 新晴病中作 示子適 窮居 春晚自近村歸 開

孫滿月 小築 春晚歎 鷓鴣 舍東四詠 示元敏 暮春四首 書感 晨起出南堂 春晚小飲

殘春二首 聞山步有虎 久雨初霽 初夏幽居雜賦七首 雨 自閔 蔬食 讀阮籍傳 杜宇

行 捕虎行 遺興 三齒墮歌 龜堂初暑 衰歎 初夏閑步村落間 夜興

卷六十一

八七一

寄十二姪 出塞四首借用秦少游韻四首 命駕 遊山遇雨 東籬雜題五首 書事二首 乙丑重

五二首 夏夜枕上 石帆夏日二首 仲夏風雨不已 幽居 齒落 雨中排悶 逆境 夜興 寄

題李季章侍郎石林堂 流年 雨中鋤藥 自嘲 世事 悲齒落自解 送十五郎適臨安 幽居夏

日二首 大雨 思雲門 夏夜 觀身 養氣 日用 村市醉歸 夏日感舊四首 雨後 東軒

寄子虞子適 寄張季長 夏夜二首 讀趙昌甫詩卷 海氣 村居 戒殺 庭中夜賦 秋近 歎

老 殘暑得小雨頗涼 乙丑夏秋之交小舟早夜往來湖中戲成絕句十二首 初秋四首 秋陰出遊

杜宇 養生 初秋夜賦二首 殘年 記夢 村飲 老鰥 對食作 七月十九日大風雨雷電

湖上 欲雨 秋懷四首 食新 予初仕爲寧德縣主簿而朱孝聞景參作尉情好甚篤後十餘年景參下世今又幾四十年忽夢見之若平生覺而感歎不已 讀書 諭鄰人三首 示小廝二首

卷六十二

八八三

秋雨 江村二首 山行 天王寺迪上人房五十年前友人王仲信同題名尚在 東窗偶書二首 乙丑七月二十九日夜分夢一士友風度甚高一見如宿昔出詩文數紙語皆簡淡可愛讀未終而覺作長句記之 示子適 小雨 舟中作二首 漁父二首 讀書示子適 秋夕 醉中錄近詩因題卷後 貧甚戲作絕句八首 自傲二首 雨後極涼 醉題 秋感 鼠敗書 秋望 秋夕 出遊 病中戲詠 書喜 春耕 秋思絕句六首 秋興 寓歎 北窗 閑思 秋光 秋夜思南鄭軍中 湖上 讀王摩詰詩愛其散髮晚未簪遺書行尙把之句因用爲韻賦古風十首亦皆物外事也 夢行益昌道中有賦 自規 幽興 記前輩語 貧居卽事六首 自詠 枕上作 秋曉聞禽聲五韻 對酒二首 示鄰里 重示 雨夜起行室中 閏月辛酉壬戌連日風雨癸亥早晴 秋思二首 閑遊三首 對鏡幽居書事二首 偶與客話峽中舊遊 讀老子次前韻 作籬 寓歎 衡門感舊 客中作 讀書示子適 老懷 沉縣 遊近村二首 小亭 記夢二首

卷六十四

八九六

養疾 客從城中來 暮秋中夜起坐次前韻 閑遊 自規 自笑 泛舟至鏡湖旁小市 懷舊 道院述懷二首 秋雨二首 聽雨 畏事 刈穫後書事二首 秋夜五鼓初起坐堂上至旦 習嬾自咎 雨夜枕上作 晚飯後多至門外並溪而歸 文章 枕上口占 乙丑九月三日晚雨驟晴西南新月如玉鉤重陽以八月置閏菊花粲然滿園喜甚作一絕記之 寓歎 村興 夜聞埭東賣酒鼓聲譁甚燈下晚殘示子適 秋晚書懷二首 初寒 黃昏小雨中驚憩蒼頭在傍云初未嘗得暝予乃甚適若熱寐者作五字記之 乾道之初卜居三山今四十年八十有一感事抒懷 視東臯歸小酌二首 梅市道中二首 古寺 夢中作二首 舟行魯墟梅市之間偶賦 衰疾 惜昔 雨後寒甚 入冬病體差健

而貧彌甚戲作 蜀漢 新開小室 初冬絕句二首 卽事六首 閑吟 自遣 記乙丑十月一日夜

夢二首 縱遊 村居書事六首 湖堤暮歸 題搨本姜楚公鷹二首 書巢五詠 感遇六首 幽興

題詹仲信所藏米元暉雲山小幅二首 詹仲信以山水二軸爲壽固辭不可乃各作一絕句謝之二首

有所懷 自嘲老態 十月十四夜夢與客分題得早行 紹興中予初仕爲寧德主簿與同官飲酒食

蠅房甚樂後五十年有餉此味者感歎有賦酒海者大勸盃容一升當時所尙也 病中兩夜 讀呂舍人

詩追次其韻五首 菴中晚思 枕上 冬夜 雜興二首

卷六十五

九〇八

稽山行 贈論命周雲秀才 自嘲 自寬 唐虞 幽事絕句六首 寄題廬陵王晉輔先輩桂堂 寄

題王晉輔專春堂 鼠屢敗吾書偶得狸奴捕殺無虛日羣鼠幾空爲賦此詩 讀唐書忠義傳 病後作

山中 夜思 晨起 老態二首 枕上 贈過門道人 道院雜興四首 山村經行因施藥五首

歎老 卽事二首 自賀 天氣作雪戲作 家風 十二月二日夜夢遊沈氏園亭二首 江干 獨行

過柳橋而歸 戲遣老懷五首 對鏡 晨起 吾年過八十二首 述志二首 排悶 舟中作 丙寅

元日 新晴 新歲 簡邗德允 簡蘇邵叟 東村 新曆歎 雪中二首 早春出遊二首 東籬三

首 村市醉歸 村夜 旅思 對酒作 遊東村 晨起 夢中作 春雨四首 村店 久雨薪炭食

飲俱不繼戲作 溪上 謝君寄一犂春雨園求詩爲作絕句二首 二月一日夜夢 新晴二首 望永

思陵 燈下小酌 春遊二首 春日雜賦五首 悲歌行 梅市暮歸三山 龜堂偶題二首 泛湖

卷六十六

九二一

園中作 寄題求志堂 贈過門道人 春晚二首 梨花三首 農桑四首 自嘲 春晚二首 閉戶

晨起 出遊四首 曳杖 自詠 雜興五首 雜感六首 兩聲 書感 書意 讀唐書 雜題四

首 栽牡丹 夜聞姑惡 哭開孫 晚春東園作二首 禽聲 秦皇酒甕下垂釣偶賦 出遊歸鞍上

口占 閑詠 兩 立夏 孤寂 明日觀孤寂詩不覺大笑作長句自解 初夏出遊三首 自詠 五

更聞兩思季長 醉中作 溪園 初夏閑居八首 子坦今秋鹽官市征當滿作絕句寄之 子邁調官  
得永平錢監待次甚遠寄詩寬其意蓋將與之偕行也 送韓立道守池州 野興四首 東齋雜書十二  
首 梅市 初夏幽居四首 泛舟至近村茅徐兩舍勞以尊酒 再次前韻 題陳伯予主簿所藏秦少  
游像 入梅并序 北窗雨中作 戲書觸目 四月二十八日作二首

卷六十七

九三三

倚筇 薄暑 晝寢二首 睡起二首 林間書意二首 示子邁 追涼小酌 暑夜泛舟二首 短歌  
行 小江 歸興二首 自春來數夢至閩中蒼溪驛五月十四日又夢作兩絕句記之二首 自嘲二首  
雨霽 大雨 社飲 采藥有感 觀邸報感懷 送子邁至梅市而歸 述閑 幽居 午暑 舟過  
道士莊 晨興 對酒 泛舟 地僻 東軒 季夏雜興四首 夏夜暑毒不少解起坐庭中二首 素  
飯 老態自遣 耒陽令曾君寄禾譜農器譜二書求詩 雨夜 柴門 賽神 菖蒲二首 迂拙 夏  
夜 夏末野興二首 示子孫 夜雨 劇暑 六月十夜風月佳甚起坐中庭有作 古井 菴中紀事  
用前輩韻 急雨 舍東追涼 酒藥 六月十七日大暑殆不可過然去伏盡秋初皆不過數日作此自  
遣 急雨遽涼 縱遊深山隨所遇記之四首 感中原舊事戲作 小涼 村居 城東 初秋露坐作  
短歌 池上 秋稼漸登識喜 野渡用前韻 秋後一日風雨 感事 久無客至戲作 乍涼 閑趣  
溪上 秋詞三首 秋思 老學菴北窗雜書七首 親舊見過多見賀強健戲作此篇 小病兩日而  
愈 秋興二首 日用四首

卷六十八

九四六

七月十一日見落葉 龜堂一隅開窗設榻爲小憩之地 南門晚眺 進德 次韻邢德允見贈 秋懷  
十首 出遊二首 東窗獨坐書懷 書歎 荷鋤 病臥 秋夜獨坐聞里中鼓吹聲 老歎 草堂  
齋中讀書罷有感 雨欲作步至浦口 鏡湖有鳥名水鳧鳴於春夏間若曰打麥作飯偶有所感而作  
自述 秋興十二首 秋夕書事二首 薄粥 拄杖 小築二首 一編 埭北 風雨 解嘲 識喜

寓興 老馬行·農家 對酒作 秋分後頓淒冷有感 即事示子邁 醉中絕句二首 種麥 秋  
 晚二首 秋穫後即事二首 行飯至湖上 晨出 老境 憶昔 自嘲 解嘲 新寒 夜歸 夢中  
 作 自勵 九月一日未明起坐 小疾偶書 初寒晨起 霜降前四日頗寒 題驛壁 閑遊 貧舍  
 寫興二首 秋晚雨中作 待旦 夜意 湖村 連夕熟睡戲書 小軒 曉寒 次韻朝陵葉院察見  
 寄 書意 九月下旬即事 城南 舟中記夢 送周郎 村舍得近報有感 貧歎 明日復作一首  
 自解 子虞調官行在寫鉞團巷初冬遽寒甚作絕句寄之二首

卷六十九

九五七

初冬步至東村 南門散策二首 思北鄰韓三翁西鄰因菴主南鄰章老秀才二首 二殿 大風不能  
 出戶 晚菊 舍南雜興三首 自詒二首 風霜 十月 記夢 幽興 夜聞雨聲 訪山家 自法  
 雲回過魯墟故居 旅舍 書几試筆 道室偶書 觀渡江諸人詩 村居閑甚戲作二首 夜投山家  
 四首 聞西師復華州二首 舟中 得趙昌甫寄予及子適詩 飯後登東山 東村 石堰村 袖手  
 幽居遣懷三首 湖上晚歸 宿村舍 村飲二首 食野味包子戲作 醉中作 感老 寺壁偶題  
 贈道流 冬夕閑詠 飯後自嘲 感舊二首 村老留飲 醉歌二首 力耕 春近 夜坐聞鼓聲  
 小室 老景 夜坐 晨起 貧述 自述 十一月廿七日夜分披衣起坐神光自兩背出若初日室  
 中皆明作詩志之 歲暮遣興二首 道室即事四首 泛舟過金家堰贈賣新王翁四首 冬晴 寄隱  
 士 幽事 去新春纔旬餘霽色可愛 作雪遇大風遂晴 冬夜 書意三首 山房 即事六首 戊  
 兵有新婚之明日遂行者予聞而悲之為作絕句二首 夢中作 啜茶示兒輩 雨中示鄰里 記出遊  
 所見 立春前七日聞有預作春盤邀客者戲作 春前六日作

卷七十

九六九

立春後作 舟中 小園春思二首 禹祠 今年開歲三日上元三夕立春人日皆大晴·題野人壁  
 小市 柳 見事 夜雨 自詒 初春幽居二首 自勉 春遊 晝坐 正月十六日送子虞至梅市

歸舟示子適 聞百舌 畜一雞報曉聲清圓而鳴每晚戲書絕句 書村落間事 行歌 開歲頗思江

湖遊適 憶昨三首 排悶 識喜 枕上作 近村 讀史二首 羸臥 春感 八十三吟 小園花

盛開 出遊歸臥得雜詩八首 感舊 寄翼立道 寓歎 春晚二首 幽事二首 讀李杜詩 煙波

即事十首 茅舍 子適入城三宿而歸獨坐凄然示以此篇 暮春新路至湖上示元敏 閱雨 春和

初遷坐堂中 春晴暄甚花開略無餘矣賦以寓感 春晚 春陰溪上小軒作 散策至湖上民家 枕

上聞雨聲 聞里中有鬪者作此示之 春寒 石帆山下 餘寒 自九里平水至雲門陶山歷龍瑞禹

祠而歸凡四日八首 春早得雨二首 春晚二首 春晚南堂晨起二首 見鶉補巢戲作 予素不工

書故硯筆墨皆取具而已作詩自嘲 春晚即事四首 懷昔 書感 夜中獨步庭下 九八一

憶昔 雜詠十首 曉思 幽居二首 幽居即事九首 醉歸二首 書南堂壁二首 五月雨 蠶麥

早至園中 憶雲門諸寺 贛士曾與宗字光祖以其居貧當谷園來求詩 以菜茹飲酒自嘲 五月

二十一日風雨大作 寄題栝蒼陳伯予主簿平楚亭 卽事 梅雨初霽 夏日雜題六首 晚興 急

雨 聽雨 窮居戲詠 讀窮居五字慨然有感復作一首自解 蒙恩封渭南縣伯因刻渭南伯印 題

門壁 雨霽 西村晚歸 連日雲興氣濁雨意欲成西南風輒大作比夜月明如晝 考古 殘春無幾

述意二首 南堂晨坐 記悔 東園晚興 晨起行園中 雷雨 戲書燕几二首 喜雨 閑適 早

晴 翦牡丹感懷 偶觀舊詩書歎 聞蜀盜已平獻馘廟社喜而有述 晚雨 雨晴 起晚自嘲 閑

中偶詠二首 晚步湖塘少休民家 獨酌罷夜坐 雨中出門閑望有作 示二子 道室秋夜二首

醉題 自詠二首 秋晴 門外獨望 貧歌 秋晚雜興十二首 霜風 贈丐士 贈目眇者 九九三

卷七十一 閑遊所至少留得長句五首 晚雨 翌日早晴 一雨二十日 入夏多雨雖止復作六月甲寅始大晴

題尊信齋并序 夏日雜詠四首 夏日四首 苦熱 予頃遊青城數從上官道翁遊暑中忽思其人



龜堂 夢中作二首 秋近頗有涼意 夜坐中庭涼甚 東偏小室去日最遠每為消暑之地戲作五

字 野寺 南堂雜興八首 新秋往來湖山間四首 北嶼 小室消暑 秋雨中作 目昏有感 幽

居 初秋即事二首 山庖 題道傍壁二首 訪野老 書適 憶蜀 生涯四首 對食作 曉思

戲書 梅市舟中作 孤店 過魯墟先太傅舊隱 步月 拄杖示子適 讀道書 秋日睡起 書意

寄題龔立道崑山樓閣堂 秋雨書感二首 弄筆 睡覺作二首 秋思十首 秋來苦貧戲作 晚

晴 對月二首 出近村晚歸二首 秋晚 犬雞 賣藥翁 書里中事 書室雜興四首 秋感 秋

夜二首

卷七十四.....一〇〇五

秋日村舍二首 村遊 吳歌 秋感二首 紹興辛未至丙子六年間予年方壯每遇重九多與一時名

士登高於戴山宇泰閣距開禧丁卯六十年憂患契闊何所不有追數同遊諸公乃無一人在者而予猶強

健慘愴不能已賦詩識之 結茅 老健 幽居即事二首 秋晚書感 小市暮歸 寓歎三首 題僧

菴 哭季長二首 魔境作頗思遠適賦此自遣 枕上 讀幽詩 北窗 小圃醉中作 秋冬之交雜

賦六首 海山 飲村酒 觀諸將除書 捫腹 醉歌 自歎 村翁 不寐 書志 東偏紙閣初成

小豎醉 雜興四首 示兒孫輩 雜賦六首 幽居 連日作陰頗有雨雪意 山房 梅市暮歸

法雲寺 郊居 作雪不成獨詠 聞雁 泛舟至蜻蜒浦小泊漁村 散策門外鄰叟怪其瘦 書警二

首 園中 冬晴行園中二首 懷青城舊遊 晚立 志喜 窮居 冬暖園中萱草蒼然海棠亦著花

可愛作路浚井皆近事也 即事示兒輩 小兩頗寒 題舍壁二首 仲冬書事 醉舞 思蜀二首

次韻李季章參政哭其夫人七首 試筆 屠希筆 寒夜吟 記夢 霜夜二首 歲暮 與野人散策

卷七十四.....一〇一七

書道室壁 書志 雪夕 書枕屏四首 二友 寄五郎兼示十五郎 鄰曲相過 東窗 曉寒 小

雪 書感 家釀頗勁戲作 食菴糝甚笑蓋蜀人所謂東坡羹也 雜興四首 幽情 醉歌 霜冷  
讀書雜言 東嶺 書戒 書齋壁 雪意 山房 晨起 兩雁 書文稿後 題虛執中書樓 歲晚  
六首 雀啄粟 老翁 寄子虞 雜詠四首 曉起折梅 累日濃雲作雪不成遂有春意 晚晴出行  
近村閑詠景物 道室戲詠 書感三首 臘月 雪作 卽事 或遺以兩大瓢因寓物外興 歲未盡  
前數日偶題長句五首 余得蘆竹拄杖于舍傍民家似蘆非蘆堅勁輕滑色如栗玉入手錯然微有聲它  
杖莫及作五字唐律記之 八十四吟二首 歲暮六首 書感 書適 學道 舟中作 得蜀信 送  
蘇趙叟赴省試 新春感事八首終篇因以自解 自歎 初春二首 簡傳十八官 開歲愈貧戲詠  
戊辰立春日二首 早春出遊 春寒 園居 郊行 野望 晨起 午坐

卷七十五

一〇二九

自警 春雨 春寒 自喜二首 簡湖中隱者 短歌示諸稚 王子猷謂竹爲此君白樂天謂酒爲此  
君予野處無客每對竹獨酌得小詩 會稽行 野飲 作野飲詩後一日復作此篇反之 春晴二首  
遺興二首 開歲屢作雨不成正月二十六日夜乃得雨明日行家圃有賦 書屋壁二首 與兒孫同舟  
泛湖至西山旁憩酒家遂遊任氏茅菴而歸 日暮自大匯村歸 八十四吟 晚步至湖上 春陰 題  
野店壁 題寺壁 題幽居壁二首 思夔州二首 梅開絕晚有感二首 園中晚飯示兒子 自詰  
野飲 茆亭 身世 家有兩瓢分貯酒藥出則使一童負之戲賦五字句 禹寺 旅遊二首 貧歎  
東窗四首 近村 石帆山下作 旦起二首 書況 閑中戲賦村落景物二首 予好把酒常以小戶  
爲苦戲述 春日對花有感 出遊遇雨而返二首 記閑 二感 題柴言山水四首 草亭獨坐 修  
居室賦詩自警 遜迹 春晴登小臺 魯墟舟中作 貧病戲書二首 又作二首自解 挾書一卷至  
湖上戲作 謝客相過 書幸 書歎 古興二首各五韻 病中有述二首各五韻 黃鴉吟 恩封渭  
南伯唐詩人趙嘏爲渭南尉當時謂之趙渭南後來將以予爲陸渭南乎戲作長句 幽居 肩輿至湖桑  
塿 半俸自戊辰二月置不復言作絕句二首 頭風戲作 茅齋 耕桑 春遊四首 蔬飯 海棠歌

園中作 書意三首 晚春二首

卷七十六

湖上 卽事 東籬雜書四首 山行 稻陂 兩夜思子處 醉中示客 散髮 病中觀辛夷花 小

艇 雜題四首 閒遊 病起初夏 衡門獨立 兩夜 山麓 北齋 禽言四首 道院偶述二首

初夏書感 贈邢芻甫 昔從戎南鄭日范西叔爲予書小臥屏今三十有八年矣悵然有懷 小雨 遣

懷二首 初夏喜事 夢蜀 閒遊二首 初夏二首 野興二首 自笑 喜晴 過鄰曲 題蘇虞叟

巖壑隱居 縱筆二首 北窗卽事二首 感物 園中把酒示鄰曲二首 書憂 門外獨立 感事六

言八首 幽居記今昔事十首以詩書從宿好林園無俗情爲韻 喜雨 初夏雜興六首 對酒作 獨

坐閑詠二首 水亭二首 書興 書感二首 暑雨二首 池亭夏晝二首 頃歲從南鄭屢往來興鳳

間暇日追懷舊遊有賦 掃除小園未竟歸臥 暑中北窗晝臥有作 羈懷 自詒四首

卷七十七

得雨露足遂有豐年意欣然口占 浴罷閒步門外而歸 初晴 枕上二首 讀史 今歲六月望後一

日立秋比常年涼意差早 異夢 貧病 涉溪 卽事四首 野性 閑行 伏中熱不可過中夜起坐

作詩寄五郎 暑中自遣 夜坐中庭 夜坐門外示子適 夜坐小飲 閑思 書村店壁 幽居 立

秋前九日大雨涼甚二首 寄太湖隱者 讀史四首 病戒 夏夜納涼 銘座 獨坐絕句二首 初

秋驟涼 新涼 書幸 獨遊 記夢 初秋自述 秋暑夜起追涼二首 小築 喜雨二首 秋夜

白鷗 靜室 秋興 欲雨二首 雜感十首以野曠沙岸淨天高秋月明爲韻 秋思十首 雞犬二首

秋來瘦甚而益健戲作 秋夜 秋興 閑詠 人壽至耄期 訪野人 熏蟲效宛陵先生體 吹笛

書幸 感事 晚晴 農家 寓歎二首 兩夜 秋懷四首 小室 贈道侶 舟中醉題二首 出

遊暮歸 園中作

卷七十八

卷七十九

小園獨酌

感舊 東園 秋夜 驛壁偶題三首 夜起思子虞 秋日次前輩新年韻五首 仲秋書事十首 步  
 屨 後死 思剡 故里 野意 意行至神祠酒坊而歸 訪村老 戲題僧巷 書意二首 南塘晚  
 步記鄰里語 稽山道中二首 讀近人詩 琴劍 戲題 溪上小雨 晚聞庭樹鴉鳴有感 秋夜齋  
 中二首 識塊 秋雨 秋來益覺頹健時一出遊意中甚適雜賦五字十首 遊近山僧菴 喜晴 阿  
 邇自閩中歸甫九歲頗有老成之風作此詩示之 農家六首 讀老子有感 鄰人送菰菜 書喜 秋  
 日徙倚門外久之 雙蝶 法雲寺上座求詩 詹仲信出示卜居詩佳甚作二絕句謝之 夜雨 晚秋  
 出門戲詠二首 消搖 堅頑 遣懷四首 初寒 閑行至西山民家 夜與子適說蜀道因作長句示  
 之 村舍七首 登山西望有懷季長 山行 二樂 村女 示子適 聞新雁有感二首 山村獨酌

秋思四首 覽鏡 雨晴 秋盡自遣二首 晝臥 獨坐 書感 舟中夜賦 舍傍晚步二首 自詠

二首 初冬 霜晴 初寒 題傳神 書感 宋都曹屢寄詩且督和答作此示之 獨飲 簡湖中隱

者 初冬雜詠八首 老歎 小園 冬夜思里中多不濟者愴然有感 宿近村 梅村野人家小憩

寄陳伯予主簿 夜坐憶剡溪 道上見村民聚飲 小江 短歌行 初寒 對鏡 書劍 城南道中

有感 寄子虞兼示子適 一年老一年 自東岡繚出舍北 有客 陳伯予見過喜予強健戲作 東

陽郭希呂呂子益送酒 夜坐 兩日意殊不懌作短歌自遣 戲書日用事 獨立 夢中江行過鄉豪

家賦詩二首既覺猶歷歷能記也 病中夜思 得子虞書言明春可歸 雜賦十二首 散懷 書壁二

首 冬日齋中即事六首 冬日排悶二首 法雲寺 自法雲歸 枯菊 聞吳中米價甚貴二十韻

寒夜偶懷壯遊書感 夢曾文清公 睡覺 湖邊小聚 雨二首 雨後快晴步至湖塘 兩日寒雨作

雪不成夜忽大雨遂晴 歲窮 凍坐 古意二首 雪意復作 醉書

卷八十

排闥 湖山尋梅二首 作雪寒甚有賦 書嬾 讀唐人愁詩戲作五首 讀書至夜分感歎有賦 擁

爐 隱趣 冬夜舟中作 湖山九首 齒髮 古謂不如意事十常八九雖出於好功名者之言閑中亦

未免此歎戲作七字一首 幽居歲暮五首 過湖上僧菴 夜坐戲作短歌 書歎二首 日暮自湖上

歸 晚步湖隄 夜寒 感舊 小雪 十二月十日暮小雪即止二首 遣興 貧居時一肉食爾戲作

臘月十四日雨 節物 讀書 春近 讀陶詩 夜雨寒甚 寄趙昌甫 稽山雪 招鄰父啜菜羹

讀論語 晨起 雪後 示福孫并示喜曾 微疾 簡僧求秦望山拄杖 遊山步二首 雪晴欲出

而路滑未通戲作二首 春日 示兒輩 雪後煎茶 夢中作 破屋歎 戊辰歲除前五日作新歲入

十有五矣 晨起復睡 梅二首 小疾治藥偶書二首 子適讀書常至夜分作此示之 歲暮作 除

夕 己巳元日 初春 新年書感 開歲連日大雪 飲酒 詩酒 人日雪後春寒二首 兩雪久無

來客亦不能出作長句排悶 書毫 初春遣興 讀書 雜興四首 後雜興四首 自詠二首 晚窗

卷八十一

遠遊二十韻 對酒 夜雨 己巳正月十八九間雪復大作不止 寄子虞 書夢 示子適 對食有

感二首 雪夜三首 初春 春日雜興十二首 小霽乘竹輿至柳姑廟而歸 春曉 肩輿歷湖桑堰

東西過陳灣至陳讓堰小市抵暮乃歸二首 書適 陳讓堰市中遇吳氏老自言七十六歲與語久之及

歸送予過市猶戀戀不忍去 午炊 古風二首 肩輿至石堰村 睡起遣懷 春晴 書感 野興

野步二首 稽山 緋桃開小酌 夜中獨步 春寒復作 大雨排悶二首 室中屏去長物戲作 對

酒 曝舊畫 予以淳熙戊戌歲自蜀歸時年五十四今三十有二年矣猶然強健得小詩自賀 花下小

酌二首 夜酌 數日不作詩 幽居示客二首 春日登小臺西望 醉賦 卽事 落花 春日 戲

畝園中春草二首 二月二十四日夜大風異常 兩夜與鄰翁飲用前輩韻 雜感四首 讀史二首

出遊二首 夜興戲作 酒熟書喜 湖上 春晚 食酪 六言六首 書意示子孫 暮春聽堂卽事

四首 莫辭酒 懷友 蘭亭道上四首 殘年 春老 睡起 自規 夜聞雷雨大作

卷八十一

賞山園牡丹有感 山居 閑詠五首 讀樂天詩 讀許渾詩 時鳥 齒髮歎 送春 初夏二首

初夏即事 古壽人至聞五郎頗有老態作長句自遣 郊行 小園 初夏雜興五首 思子虞 偶思

蜀道有賦 書意 贈倪道士二首 吳李孟達 送黃文叔守福州 初夏雜詠五首 卽事 漁扉

山行見三十年前題名悵然有賦 山房 縱筆四首 窗下戲詠三首 埭西小聚 老歎 衰甚書感

山行過僧菴不入 山行 夜窗 送邢芻甫入閩二首 從邢芻甫求桃竹拄杖 老雞 還東 行

東山下至南巖 書幸 放言 晚步門外 夏夜 鷗池 種菜四首 白首 東窗遣興三首 北窗

小酌 夏日十二首 睡起 雨中作 感物二首 舟中有賦 晨起獨行綠陰間 獨至遊菴避暑

菴在大竹林中二首 短歌行 山寺 明日復欲出遊而雨再用前韻 暇日登東岡 暴雨 幽事二

卷八十二

病起雜言 雨後二首 示客 蒸溽作雨排悶 夏中雜興六首 卽事八首 夏日幽居 枕上 題

望海亭亭在臥龍絕頂 露坐小隱 小憩臥龍山亭 晚涼 夏日六言四首 招客看山 舟中作

清暑 五月下旬大熱晦日夜得雨明且涼甚 黃氏冲和堂 暴雨 書意三首 浴罷 水鄉泛舟二

首 閑詠 江樓夜望 連日作雨苦熱 門外追涼 夏夜泛溪至南莊復回湖桑歸 雨後殊有秋意

寄規三首 新涼二首 追涼至安隱寺前 湖上夜賦二首 書適 羸老 卽事 晚興 郊行

喜雨 劉道士贈小葫蘆四首 自傲 雨中 書歎二首 題畫薄荷扇二首 秋興四首 晝睡 得

子虞壕上書 庭草 文章 秋日遺懷八首 自傲二首 生世 秋雨 思蜀 病思 術家言予今

歲畏四孟月而秋尤甚自初秋小疾屢作戲題長句 秋夕書事二首 小疾三首 病中作 縱筆二首

卷八十四

自立秋前病過白露猶未平遺懷二首 聖門 書齋壁 病後小健戲題 新晴 夢中作二首 疾小

愈縱筆作短章 病少愈偶作二首 書生 古驛 夜讀劉伯倫傳戲作 湖上晚望 村居即事三首

夜興 夢華山 寤歎四首 嘉定己巳立秋得膈上疾近寒露乃小愈十二首 病中臥聞春聲二首

病小減復作三首 病思六首 病中自遣三首 八月二十三夜夢中作 病少間作 秋晚幽居

病中思出遊 九月初作 四日夜雞未鳴起作 臥病雜題五首 讀華陀傳 家山 九月十一日疾

小間夜賦二首 一病七十日 西郊 蔬食 乙巳秋暮獨酌四首 秋晚 病中遣懷六首 六言二

首 野興 遠遊 反遠遊 病著 梅市 梅市書事 病減 幽居即事二首 羸疾 九月二十五

日雞鳴前起待旦 秋夕排悶十韻 宴坐二首 小室 舟次浦口 開爐 散懷二首

卷八十五.....一一四七

子虞嘗以十月離肥上喜而有作 病來 舟中晨起 江村 兀兀 道懷 柯山道上作 病後自詠

十月九日 三三孫十月九日生日翁翁為賦詩為壽 江路 初冬二首 夜坐二首 殘菊 久病

病小愈喜晴 租稅 初寒 呻吟 山墅 十月二十四日夜夢中送廬山道人歸山 病後晨興食

粥戲書 贈僧二首 遊山三首 農圃歌 贈拄杖 贈貓 宮詞 病中雜詠十首 雪 自笑 絕

句 題藥囊 末題二首 病中示兒輩 夢中行荷花萬頃中 示兒

# 劍南詩稟

## 卷一

### 別曾學士

兒時聞公名。謂在千載前。稍長誦公文。雜之韓杜編。夜輒夢見公。皎若月在天。起坐三歎息。欲見亡繇緣。忽聞高軒過。驩喜忘食眠。袖書拜轅下。此意私自憐。道若九達衢。小智妄鑿穿。所願瞻德容。頑固或少痊。公不謂狂疎。屈禮與周旋。騎氣動原隰。霜日明山川。匏繫不得從。瞻望抱悵悵。畫石或十日。刻楮有三年。賤貧未卽死。聞道期華顛。他時得公心。敢不知所傳。

### 送仲高兄宮學秩滿赴行在

兄去游東閣。才堪直北扉。莫憂持橐晚。姑記乞身歸。道義無今古。功名有是非。臨分出苦語。不敢計從違。

### 題閭郎中溧水東臯園亭

省中地禁清。畫長侍史深。注蕙籠香。榮名挽公公不住。東臯歸去栽花忙。麤麤華髮映朱紱。同舍半已排雲翔。正如少陵入嚴幕。本自不用尙書郎。向令封侯佩金印。不然草詔直玉堂。萬鍾會作夢幻過。三徑空歎松菊荒。樂天十年履道宅。贊皇一夕平泉莊。公看富貴定何物。一笑乃復坐此妨。東臯樂哉日成趣。簪花起舞當自強。知公能容賤子狂。請賦式微之二章。

### 和陳魯山十詩以孟夏草木長遶屋樹扶疎爲韻

言語日益工。風節顧弗競。杞柳爲栝栢。此豈真物性。病夫背俗馳。梁甫時一詠。奈何七尺軀。貴賤視趙孟。

又

唐虞亦人耳。四海可高謝。哀哉斗升故。諂妄兩憑架。心明物自賓。能整故能暇。會當棄人事。面壁度九夏。

又

六父昔在朝。騰上唯恐早。淡然清班中。灰寒而木槁。讖輪主中和。人才進耆老。至今下馬墳。不生刺人草。



櫻酪事已過。角黍配夏熟。尙憶少小時。綵縷繫腕玉。此生本幻戲。衰態轉眼足。三郎老無慘。始解歎絲木。

又

門無容車高。庭止旋馬廣。富貴固易耳。正恐卿慙長。時情競脂韋。家法獨醜髻。靜處看紛紛。桔槔勞俯仰。

又

至人貴其身。不使事物遷。捐身易富貴。明珠彈飛鳥。我願稱善人。題作墓上表。從來尺鷃樂。不羨飛鴻矯。

又

匆匆過三十。夢境日已盛。誰知歎亡羊。但有喜得鹿。本來作何面。認此逆旅屋。逢人吹布毛。出世不忍獨。

又

杜門殊省事。百巧輸一粗。燒香淨掃地。袖手了朝暮。君看瓦搥手。端自勝金注。塵機早見貸。不待雞竿樹。

又

萬物備於我。本來無欠餘。婁儒可憐生。西抹復東塗。斯文如大廈。傾壞要力扶。犬子真鼠輩。辛苦賣子虛。

又

風花憐寂寞。起舞爲我娛。舉酒謝風花。吾道殊不疎。汝開何自有。汝落何自無。居然會此理。吾汝皆如如。

看梅絕句

梅花宜寒更宜陰。摩挲拄杖過溪尋。幽香著人索管領。不信如今鐵石心。

又

梅花樹下黃茆丘。古人尙能愛花不。月淡煙深聽牧笛。死生常事不須愁。

又

荒陂十畝浴鸞鴨。折葦枯蒲寒意深。何處得船滿載酒。醉時繫著古梅林。

又

一物不向胸次橫。醉中談話坐中傾。梅花有情應記得。可惜如今白髮生。

又

老子舞時不須拍。梅花亂插烏巾香。尊前作劇莫相笑。我死諸君思此狂。

春晚簡陳魯山

春工我輩人。可許不待面。欲老更增奇。原野紅綠遍。向來苦摧傷。零雨雜飛霰。豈知袖此手。天定乃徐見。吾齋萬花間。輕衫稱團扇。飛花點書冊。戲蝶遊几研。吾衰未忘情。小句亦倩綉。持問陳元龍。試乞語一轉。

寄酬曾學士學宛陵先生體比得書云所寓廣教僧舍有陸子泉每對之輒奉懷

庭中下乾鵠。門外傳遠書。小印紅屈蟠。兩端黃蠟塗。開緘展矮紙。滑細疑卵膚。首言勞良苦。後問逮妻孥。中間勉以仕。語意極勤渠。字如老瘠竹。墨淡行疎疎。詩如古鼎篆。可愛不可摹。快讀醒人意。垢癢逢爬梳。細讀味益長。炙轂出膏腴。行吟坐臥看。廢食至日晡。想見落筆時。萬象聽指呼。亦知題詩處。綠井石髮蠹。公閑計有客。煎茶置風爐。倘公無客時。濯纓亦足娛。井名本季疵。思人理豈無。居然及賤子。媿謝思意殊。幾時得從公。舊學鋤荒蕪。古文講聲形。誤字辨魯魚。時時酌井泉。露芽奉瓢盂。不知公許否。因風報何如。

夜讀兵書

孤燈耿霜夕。窮山讀兵書。平生萬里心。執戈王前驅。戰死士所有。恥復守妻孥。成功亦邂逅。逆料政自疎。陂澤號飢鴻。歲月欺貧儒。歎息鏡中面。安得長膚腴。

二月二十四日作

棠梨花開社酒濃。南村北村鼓鑿鑿。且新麥熟得飽針。敢說穀賤復傷農。崖州萬里竄酷吏。湖南幾時起臥龍。但願諸賢集廊廟。書生窮死勝侯封。

送曾學士赴行在

二月侍燕觴。紅杏寒未拆。四月送入都。杏子已可摘。流年不貸人。俯仰遂成昔。事賢要及時。感此我心惻。欲書加餐字。寄之西飛翮。念公爲民起。我得怨乖隔。搖搖跋前旌。去去望車輒。亭鄣鬱將暮。落日澹陂澤。敢忘國士風。滌

位效臧獲。敬輸千一慮。或取二三策。公歸對延英。清閣方側席。民瘼公所知。願言寫肝膈。向來酷吏橫。至今有遺孽。織羅士破膽。白著民碎魄。詔書已屢下。宿蠹或未革。期公作醫和。湯劑窮絡脉。士生恨不用。得位忍辭責。併乞謝諸賢。努力光竹帛。

舜夜觀月

雲重真愁無散時。可憐不奈一風吹。清輝如此那休得。誰謾虛空作許疑。

新夏感事

百花過盡綠陰成。漠漠爐香睡晚晴。病起兼旬疎把酒。山深四月始聞鶯。近傳下詔通言路。已卜餘年見太平。取主不忘初政美。小儒惟有涕縱橫。

留題雲門草堂

小住初爲旬月期。二年留滯未應非。尋碑野寺雲生履。送客溪橋雪滿衣。親滌硯池餘墨蹟。臥看爐面散煙霏。仙年遊宦應無此。早買漁蓑未老歸。

送韓梓秀才十八韻

東髮走場屋。始得從君遊。燈火都城夜。風雨湖上秋。追隨不隔日。巖壑窮探搜。摩挲石屋背。搖兀闔門舟。酒酣耳頰熱。意氣蓋九州。夜臥相踴語。狂笑雜嘲謔。但恐富貴逼。肯懷貧賤憂。人事信難料。百戰竟不侯。我老農圃間。君落天南陬。相逢會稽市。感歎歲月遒。君從上都來。倘逢舊朋儔。我窮本天命。於人寧有求。但念侯君房。不知尙書不。君聞拊手笑。怪我狂未瘳。共談平生舊。只欲苦死留。如何忽決去。病瘧送無由。秋風墜桐葉。新霜犯貂裘。君騎馬蹄聲。中有千里愁。

送陳德邵宮教赴行在二十韻

相從何必早。白頭或如新。登門雖尙疎。數面自成親。昨者始見公。凜然鬚如銀。敗席留夷茗。寒廳無雜賓。平生重賢意。寸心竭生塵。樂哉得所從。貧病忘吟呻。恭惟大雅姿。信是邦國珍。廣文舊官長。二紀轉鴻鈞。恩仇快報復。福出笑顰。同舍事容悅。腰佩玉麒麟。羣詠更得志。後來如積薪。於時公淡如。位屈道則伸。法官親決事。收召極極

續。人才方雜沓。公仕益逡巡。欲以貴祝公。公豈慕要津。欲以窮託公。公豈私賤貧。頗欲述古誼。勸公勿愛身。此又公所存。豈待賤子陳。高颿泊江渚。歲晚風雨頻。願言添衣裘。寒陰能薄人。

朱子雲園中觀花

我鬢忽已白。君顏非復朱。花前一盃酒。不樂復何如。暮看枝上花。已覺不如早。富貴當及時。吾輩奈何老。我歌君起舞。竟日爲君留。安知花無情。不解替人愁。長安二三月。花滿上林中。祝君早得意。歸轡聽瓊瓏。

酬妙懺閣梨兒贈妙懺能某其師璘公蓋嘗與先君遊云

昔侍先君故里時。僧中最喜老璘師。高標無復鄉人識。妙寄惟應弟子知。山店煎茶留小語。寺橋看雨待幽期。可人不但詩超絕。玉子紋枰又一奇。

次韻魯山新居絕句

求得軒車心愧天。不如窮死却陶然。君曾布衣尙可活。那有日與須萬錢。

又

短牆缺處插疎籬。巷劣容車堂對陂。天下有公殊可賀。坐中著我不妨奇。

寄陳魯山陳時調官都下

諸公貴人識面稀。胸中璀璨漫珠璣。卽今舉手遮西日。應有流塵化素衣。舊學極知難少貶。吾儕持此欲安歸。夜來風雨空堂靜。忽憶燈前語入微。

又

天下無虞國論深。書生端合老山林。平生力學所得處。政要如今不動心。舊友幾年猶短褐。謫官萬里少來音。願公思此寬羈旅。靜勝炎曦豈易侵。

戲題江心寺僧房壁

史君千騎駐霜天。主簿孤舟冷不眠。也與史君同快意。臥聽鼓角大江邊。是夕浙丞嘉守亦宿此寺。

泛瑞安江風濤貼然

俯仰兩青空。舟行明鏡中。蓬萊定不遠。正要一颿風。

平陽驛舍梅花

江路輕陰未成雨。梅花欲過半沾泥。遠來不負東皇意。一絕清詩手自題。

度浮橋至南臺

客中多病廢登臨。聞說南臺試一尋。九軌徐行怒濤上。千艘橫繫大江心。寺樓鐘鼓催昏曉。墟落雲煙自古今。白髮未除豪氣在。醉吹橫笛坐榕陰。

出縣

匆匆簿領不堪論。出宿聊寬久客魂。稻壠牛行泥活活。野塘橋壞雨昏昏。槿籬護藥纔通徑。竹筧分泉自遍村。歸計未成留亦好。愁腸不用遶吳門。

還縣

霽色清和日已長。綸巾蕭散意差強。飛飛鷗鷺陂塘綠。鬱鬱桑麻風露香。南陌東村初過社。輕裝小隊似還鄉。哦詩忘却登車去。枉是人言作吏忙。

雨晴遊洞宮山天慶觀坐間復雨

近水松篁鎖翠微。洞天宮殿對清暉。快晴似爲醮醮計。急雨還妨燕子飛。道士晝閑丹竈冷。山童曉出藥苗肥。拂床不用勤留客。我困文書自怕歸。

寄陳魯山正字

平生交遊中。陳子我所敬。初猶似豪舉。晚乃拘淵靜。獨觀心地初。皎若虛室鏡。人知自渠事。道行君有命。青衫二十年。老色上鬚鬢。偶然預收召。瘦馬趁朝請。退食輒杜門。不省求捷徑。似聞石渠書。雖黃久未定。丁字猶恨曲。朋字竟須正。願君試思之。魚魯何足訂。

航海

我不如列子。神遊御天風。尙應似安石。悠然雲海中。臥看十幅蒲。彎彎若張弓。潮來湧銀山。忽復磨青銅。飢鶻掠

船舷。大魚舞虛空。流落何足道。豪氣蕩肺胸。歌罷海動色。詩成天改容。行矣跨鵬背。弭節蓬萊宮。

海中醉題時雷雨初霽天水相接也

羈遊那復恨。奇觀有南溟。浪蹴半空白。天浮無盡青。吐吞交日月。瀕洞戰雷霆。醉後吹橫笛。魚龍亦出聽。

溪行

蓬鷁鳴春雨。帆蒲掛暮煙。買魚尋近市。覓火就鄰船。愁臥醒還醉。灘行却復前。長年殊可念。力盡逆風牽。

又

冒雨牽何急。爭風力不餘。逢人問墟市。計日買新蔬。煙寺高簷出。山畚一老鋤。枕書醒醉裏。短髮不曾梳。

自來福州詩酒殆廢北歸始稍稍復飲至永嘉括蒼無日不醉詩亦屢作此事不可不記也

尊酒如江綠。春愁抵草長。但令閑一日。便擬醉千場。柳弱風禁絮。花殘雨漬香。客遊還役役。心賞竟茫茫。

東陽道中

風歛烏帽送輕寒。兩點春衫作碎斑。小吏知人當著句。先安筆硯對溪山。

東陽觀醑醺

福州正月把離杯。已見醑醺壓架開。吳地春寒花漸晚。北歸一路摘香來。

送李德遠寺丞奉祠歸臨川

送騎擁東城。煙帆如鳥輕。道行端有命。身隱更須名。盱食煩明主。胡沙暗舊京。臨分一襟淚。不獨爲交情。

送王嘉叟編修出佐南畝

玉殿求衣早。鸞臺退食遲。君看多故日。寧是棄言時。小作南州計。方觀急詔追。歸來上霄漢。莫遣此心移。

送王龜齡著作赴會稽大宗丞

有越踰千載。何人不宦遊。向來惟一范。真足壯吾州。高躅今誰繼。先生獨再留。登堂弔興廢。想像氣橫秋。

又

大將上兵符。軍容備掃除。恭惟陛下聖。方采直臣書。忽報分司去。還尋入幕初。宗藩雖舊識。莫遣得親疎。

送杜起莘殿院出守遂寧

羽檄聯翩晝夜馳。臣憂顧不在邊陲。軍容地密寧當議。陛下恩深不忍欺。白簡萬言幾慟哭。青編一傳可前知。平生所學今無負。未歎還鄉兩鬢絲。

和曾待制遊兩山

翰林碑立崔嵬上。待制詩題杳靄間。人天八萬四千塔。便合推爲第一山。

右題育王山明月堂

疎鐘迎客到溪亭。碧瓦朱欄相照明。想得松陰排萬衲。籃輿放處恰詩成。

右題天童山宿鷲亭

攀石捫蘿到更幽。玲瓏咫尺嬾窮搜。旁人不會當時意。爲欠門生作伴遊。

右題天童山更幽亭且以未到玲瓏爲恨

雨中出遊夜歸

△小爾南山路。今朝思出遊。難從子規請。寧遣竹雞憂。野店寒饒柿。煙津晚喚舟。歸來對燈火。未恨溼衣裘。

謝李平叔郎中問疾

吏部朝回早。幽人病始蘇。過門迂問訊。欹枕聽傳呼。綠瘦重裁帽。因衰學染鬚。投詩發公笑。試想此形模。

聞武均州報已復西京

△白髮將軍亦壯哉。西京昨夜捷書來。胡兒敢作千年計。天意寧知一日回。列聖仁恩深雨露。中興赦令疾風雷。懸知寒食朝陵使。驛路梨花處處開。

喜小兒輩到行在

阿綱學書蚓滿幅。阿繪學語鶯轉木。截竹作馬走不休。小車駕羊聲陸續。書窗浣壁誰忍嘆。曉啼也復可憐入。卻思胡馬飲江水。敢道春風無戰塵。傳聞賊棄兩京走。列城爭爲朝廷守。從今父子見太平。花前飲水勿飲酒。

病起寄會原伯兄弟

意象殊非昨。筋骸劣自持。衰如霜後木。愁抵盎中絲。風雪書來少。江山夢到遲。出門憂惘惘。倚杖獨移時。

送湯岐公鎮會稽

吳越東西州。浙江限其中。黃旗高十丈。大舟凌虛空。都人送留守。郡吏迎相公。江心波濤壯。帳下鼓角雄。樂哉公何慷慨。論則未同。永懷前年秋。羣胡方滿兇。閩在發薊北。戈船滿山東。舊盟顧未解。誰敢舉其鋒。公時立殿上。措置極雍容。南荒竄驕將。京口起元戎。奮勳與宿賁。屏氣聽指蹤。規模一朝定。強虜終歸窮。當時謂易耳。未見回天功。及今始大服。咨嗟到兒童。天心佑社稷。主聖肖祖宗。旌節早來朝。笑談折遐衝。

周洪道學士許折贈館中海棠以詩督之

嬋嬋柔絲不自持。更禁日炙與風吹。仙家見慣渾閑事。乞與人間看一枝。

送七兄赴揚州帥幕

初報邊烽照石頭。旋聞胡馬集瓜州。諸公誰聽芻蕘策。吾輩空懷吠犬憂。急雪打窗心共碎。危樓望遠髩俱流。豈知今日淮南路。亂絮飛花送客舟。

閏二月二十日遊西湖

西湖二月遊人稠。鮮車快馬巷無留。梨園樂工教坊優。絲竹悲激雜清謳。追逐上下暮始休。外雖狂醒樂則不。豈如吾曹淡相求。酒肴取具非預謀。青梅苦筍助獻酬。意象簡樸足鎮浮。尙慙一官自拘囚。未免疋馬從兩騶。南山老翁亦出遊。百錢自挂竹杖頭。

劉太尉挽歌辭

羌胡忘覆育。師旅備非常。南服更旄節。中軍鑄印章。馳書諭燕趙。開府冠侯王。赫赫今何在。門庭冷似霜。

又

堅壁臨江日。人疑制敵疎。安知百萬虜。銳盡浹旬餘。智出常情表。功如定計初。云何媚公者。不置篋中書。

過林黃中食柑子有感學宛陵先生體

博士得黃柑。甚愛不忍擘。持獻太夫人。遠附海上舶。故山饒氛霧。可使酒盃窄。豈無荔枝好。鑿飲恐不摘。相去三



千里無異娛旁側。乃知母子意更遠。未嘗隔。我昨往見君。從容弄書冊。藥分臘劑香。茶泛春芽白。主意願未厭。篋  
篋自搜索。敢謂甘旨餘。亦及此下客。霜包纔三四。氣可壓千百。重是慈孝物。不敢吐其核。甘寒雖遠齒。悲感已橫  
臆。半生無歡娛。初不爲涇阨。

玉牒所迎駕。望見周洪道舍人。

自卜河橋宅。清談喜屢陪。今年見騰蹕。不恨老氛埃。曉放宮門鑰。霜彫輦路槐。班回獨小立。爲待繡鞍來。

送梁諫議

湖海還朝白髮生。嬾隨年少事聲名。極知憂國人誰及。細看無心語自平。歸訪鄉人忘位重。乍辭言責覺身輕。籃  
輿避暑雲門寺。應過幽居聽水聲。游有菴。居在雲門。流泉遶屋。諫議舊所愛嘗。

以石芥送劉詔笑禮部劉比釀酒勁甚因以爲戲

古人重改陽城驛。吾輩欣聞石芥名。風味可人終骨體。尊前真見魯諸生。

又

長安官酒甜如蜜。風月雖佳嬾舉觴。持送盤蔬還會否。與公新釀鬪端方。

出都

重入修門甫歲餘。又攜琴劍返江湖。乾坤浩浩何由報。犬馬區區正自愚。綠熟且爲蓮社客。仔來喜對草堂圖。西  
廂屋了吾真足。高枕看雲一事無。

會原伯屢勸居城中而僕方欲自梅山入雲門今日病酒偶得長句奉寄

借得僧房似釣船。兼旬散髮薛江天。酒能作物真如此。窮乃工詩却未然。閑似白鷗雖自許。健如黃犢已無緣。秋  
高更欲移家去。先葺雲門屋數椽。

村居

富貴功名不擬論。且浮舴艋寄煙村。生憎快馬隨鞭影。寧作癡人記劍痕。樵牧相諧欲爭席。比鄰漸熟約論婚。晨  
春夜續吾家舊。正要遺風付子孫。

看山

小葦茆茨紫翠間。今年偷得半年閑。門前木落須霜曉。且看西南一角山。

夏夜泛舟書所見

山房猶復畏炎蒸。長掩柴門媿老僧。兩槳去搖東浦月。一龕回望上方燈。驚飛宿鳥時呼侶。騰起長魚有脫罾。夜半歸來步松影。真成赤腳踏層冰。

秋陰

微澤秋容淡。郊原曉氣清。雨來鳩有語。社近燕無情。拄杖扶腰痛。漁舟照眼明。苦吟緣病輟。隨意或詩成。

盆池

門外江濤湧雪堆。埋盆作沼亦何哉。兒曹不解渠翁意。新脫風波嶮處來。

比從人覓酒皆酸薄戲作此詩

酒盡聊憑折簡求。不知人要博涼州。牆隅棄置空三歎。露下螢飛奈此秋。

買魚

臥沙細肋何由得。出水纖鱗却易求。一夏與僧同粥飯。朝來破戒醉新秋。

又

兩京春蔘論斤賣。江上鱸魚不直錢。斫脰擣齋香滿屋。兩窗喚起醉中眠。

秋雨

漫道秋來雨。那無一日晴。只供高枕臥。不放小窗明。書冊頻開闔。山瓢任濁清。長年諳世味。不是故逃名。

晨起偶題

城遠不聞長短更。上方鐘鼓自分明。幽居不負秋來睡。末路偏諳世上情。大事豈堪重破壞。窮人難與共功名。風爐歛鉢生涯在。且試新寒芋糝羹。

悲秋

煙草淒迷八月秋。荒村絡緯戒衣裳。道人大欠修行力。平地閑生爾許愁。

寄張真父舍人

諸公方袞袞。無地著斯人。萬里夔州守。中朝禁省臣。孤帆秋上峽。五馬曉班春。想見懷明主。登臨白髮新。

又

天上紫微省。鬘花繞直廡。逢時身鼎貴。憂國鬢先疎。顛顛元當棄。牽聯也得書。猶能下榻否。擬卜瀘西居。

幽居

鷓鴣桑麻巷。幽幽水竹居。紉縫一獠婢。樵汲兩蠻奴。雨挾清砧急。籬懸野蔓枯。鄰村有鬻子。吾敢歎空無。

法寶理師求竹軒詩

南軒竹色映谿光。不減吾州五月涼。猶恨秋來鷗鷺少。須君更爲築橫塘。

欲遊五峯不果往小詩寄瑩老

東來恨不見湯休。千首清詩儻許求。要與茶山燈下讀。莫令侍者作蠅頭。茶山老人謂會待制。

謝王彥光提刑見訪并送茶

適英雄帷幄舊儒臣。肯顧荒山野水濱。不怕客嘲輕薄尹。要令我識老成人。飄回鼓轉東城暮。酒冽橙香一笑新。遙

想解醒須底物。隆興第一壑源春。

送查元章赴夔漕

柳色西門路。看公上馬時。亦知非久別。不奈自成悲。白髮劉賓客。青衫杜拾遺。分留端有待。剩賦竹枝詞。

逍遙

臺省諸公日造朝。放慵別駕媿逍遙。州如斗大真無事。日抵年長未易消。午坐焚香常寂寂。晨興晷字亦寥寥。時

平更喜戈船靜。閑看城邊帶雨潮。

病中簡仲孺性唐克明蘇訓直

移疾還家暫曲肱。依然耐久北窗燈。心如澤國春歸雁。身是雲堂早過僧。細雨佩壺尋廢寺。夕陽下馬弔荒陵。小

留莫厭時追逐。勝社年來冷欲冰。三君皆有歸志。故云。

### 送王景文

張公遂如此。海內共悲辛。逆虜猶遺種。皇天奪老臣。深知萬言策。不愧九原人。君近嘗奏策。風雨津亭暮。辭君淚滿巾。

### 送呂彥升參謀

楚塞蕭條久宿師。參謀承詔上丹墀。苦言到口真當發。聖度如天莫自疑。萬里寄聲長不遠。一尊相屬豈前期。遙憐霜曉朝衣冷。深愧江城睡足時。

### 无咎兄郡齋燕集有詩末章見及敬次元韻

坂樓畫角吹晚晴。梅花墮地草欲生。綺盤翠杓春滿眼。我胡不樂君將行。君歸吾黨共增氣。往往怪我衰涕橫。我來江干交舊少。見君不啻河之清。北風共愛地爐暖。西日同賞油窗明。微吟劇醉不知倦。坐閱漠臘逾周正。君文雄麗擅一世。凜凜武庫藏五兵。酸寒如我每自笑。顧辱刻畫爲虛聲。乃知好士如好色。遇合不必皆傾城。君方與世作水鏡。如此過許人將驚。千金敝帚有定價。周玉鄭鼠難強名。失言議罰不可緩。敬白府主浮金觥。君看失腳落塵土。豈復毫髮餘詩情。自傷但似路旁埃。雨剝風摧供送迎。

### 次韻无咎別後見寄

平日盃行不解辭。長亭况是送君時。幾行零落僧窗字。何限流傳樂府詩。歸思恰如重醞酒。歡情略似欲殘茶。龍蛇飛動無由見。坐媿文園屬思遲。詩來飄月。乃能和答。故云。

### 晚泊慈姥磯下二首

山斷峭崖立。江空翠鬣生。漫多來往客。不盡古今情。月碎知流急。風高覺笛清。兒曹笑老子。不睡待潮平。慈姥磯頭月。纖纖照酒盃。素秋風露重。久客鬢毛催。宿鳥驚還定。飛螢闔復開。平生四方志。老去轉悠哉。

### 七月十四夜觀月

不復微雲滓太清。浩然風露欲三更。開簾一寄平生快。萬頃空江著月明。

夜宿陽山磯將曉大雨北風甚勁俄頃行三百餘里遂抵雁翅浦

五更顛風吹急雨。倒海翻江洗殘暑。白浪如山潑入船。家人驚怖篙師舞。此行十日苦滯留。我亦蘆叢厭鳴鏞。書生快意輕性命。十丈蒲帆百夫舉。星馳電騫三百里。坡隴聯翩雜平楚。船頭風浪聲愈厲。助以長笛轟鼙鼓。豈惟澎湃震山嶽。直恐瀕洞連后土。起看草木盡南靡。水鳥號鳴集洲渚。稽首龍公謝風伯。區區未禱煩神許。應知老去負壯心。戲遣窮途出豪語。

望江道中

吾道非邪來曠野。江濤如此去何之。起隨烏鵲初翻後。宿及牛羊欲下時。風力漸添帆力健。鷓聲常雜雁聲悲。晚來又入淮南路。紅樹青山合有詩。

秋夜讀書每以二鼓盡爲節

腐儒碌碌歎無奇。獨喜遺編不我欺。白髮無情侵老境。青燈有味似兒時。高梧策策傳寒意。疊鼓摐摐迫睡期。秋夜漸長飢作祟。一盃山藥進瓊糜。

寄  
往在都下時與鄒德章兵部同居百官宅無日不相從僕來佐豫章而德章亦謫高安感事述懷作歌奉

巷南巷北秋月明。東家西家讀書聲。官閑出局各無事。冷落往往往思同盟。出門相尋索一笑。亦或邂逅因俱行。黃中掀髯語激烈。韶美堅坐書縱橫。子充清言喜置酒。赤梨綠柿相扶檠。寒燈耿耿地爐暖。宮門風順聞疎更。故交一作霜葉散。外物已付秋毫輕。兩窮相遭世果有。我與鄒子俱南征。豫章高安本一郡。挂帆起柁無三程。簿書衮衮不少借。懷抱鬱鬱何由傾。明年君歸我亦去。早卜三畝開柴荆。軟紅舊路莫重躡。二升脫粟同煨燼。

寄答綿州楊齊伯左司

磊落人爲磊落州。滕王閣望越王樓。欲憑夢去直虛語。賴有詩來寬旅愁。我老一官書紙尾。君行千騎試遨頭。遙知小寄平生快。春酒如川炙萬牛。

送全州趙都曹

霜葉無停聲。脂車有行色。正悲南浦秋。又送瀟湘客。啼飢兒頰紅。待養親髮白。努力事上官。世路日已迫。

病中作

豫章瀕大江。氣候頗不令。孟冬風薄人。十室八九病。外寒客肺胃。下瘴攻腳脛。俗巫醫不藝。嗚呼安託命。我始屏藥囊。治疾以清靜。幻妄消六塵。虛白全一性。三日體遂輕。成此不戰勝。長年更事多。苦語君試聽。

夜夢從數客雨中載酒出遊山川城闕極雄麗云長安也因與客馬上分韻作詩得遊字

有酒不謀州。能詩自勝侯。但須繩繫日。安用地埋憂。射雉侵星出。看花秉燭遊。殘春杜陵雨。不恨煙貂裘。

去年余佐京口遇王嘉叟從張魏公督師過焉魏公道免相嘉叟亦出守蒲陽近辱書報魏公已葬衡山

感歎不已因用所遺柱頰亭詩韻奉寄

河亭挈手共徘徊。萬事寧非有數哉。黃閣相君三黜去。青雲學士一麾來。中原故老知誰在。南嶽新丘共此哀。火冷夜窗聽急雪。相思時取近書開。

自詠示客

衰髮蕭蕭老郡丞。洪州又看上元燈。羞將枉直分尋尺。寧走東西就斗升。吏進飽諳籍紙尾。客來苦勸摸牀稜。歸裝漸理君知否。笑指廬山古澗藤。廬山僧近寄藤杖甚奇。

醉中歌

吾少貧賤真懼儒。貪食嗜味老不除。折腰斂版日走趨。歸來聊以醉自娛。長餅巨榼羅盃盂。不須漁翁勸三閭。牛尾膏美如凝酥。貓頭輪囷欲專車。黃雀萬里行頭顱。白鵝作鮓天下無。潯陽糖蟹徑尺餘。吾州之痺尤嘉蔬。珍盤鉅釘百味俱。不但項臠與腹腴。悠然一飽自笑愚。願爲口腹勞形軀。投劾行矣歸園廬。莫厭糲飯嘗黃菹。

寄陶茂安監丞

永州太守鬢毛殘。矍鑠猶能起據鞍。徵士雖思賦松菊。隱居未可挂衣冠。功名夢境元非實。歌舞山城且自寬。也勝鍾陵窮別駕。閉門無客遣憂端。

燒香

茹芝卻粒世無方。隨食江湖每自傷。千里一身曩泛泛。十年萬事海茫茫。春來鄉夢憑誰說。歸去君恩未敢忘。一寸丹心幸無愧。庭空月白夜燒香。

寒食臨川道中

百卉千花了不存。墮溪飛絮看無痕。家人自作清明節。老子來穿綠暗村。日落啼鴉隨野祭。雨餘荒蔓上頽垣。道邊醉飽休相避。作吏堪羞甚乞墀。

上巳臨川道中

二月六夜春水生。陸子初有臨川行。溪深橋斷不得渡。城近臥聞吹角聲。三月三日天氣新。臨川道中愁殺人。纔織女手桑葉綠。漠漠客舍桐花春。平生怕路如怕虎。幽居不省遊城府。鶴軀苦瘦坐長飢。龜息無聲淮默數。如今自憐還自笑。斂版低心事年少。儒冠未恨終自誤。刀筆最驚非素料。五更欹枕一悽然。夢裏扁舟水接天。紅蕖綠芰梅山下。白塔朱樓禹廟邊。

寄別李德遠

蕭蕭風雨臨川驛。邂逅連床若有期。自起挑燈貪夜話。疾呼索飯療朝飢。皆記前日相從時事。即今明月共千里。已占深林菓一枝。惜別自嫌兒女態。夢騎羸馬度芳陂。德遠所居名秋陂。

又

李侯不恨世賣友。陸子那須錢買山。出牧君當千里去。歸耕我判一生閑。中原亂後儒風替。黨禁興來士氣孱。復古主盟須老手。勉追慶曆數公閒。

初夏道中

桑間甚熟麥齊腰。鶯語惺惺野雉驕。日薄人家晒蠶子。雨餘山客買魚苗。豐年隨處俱堪樂。行路終然不自聊。獨喜此身強健在。又搖團扇著絳蕉。

示兒子

父子扶攜返故鄉。欣然擊壤詠陶唐。墓前自誓寧非隘。澤畔行吟未免狂。兩潤北窗看洗竹。霜清南陌課剝桑。秋

毫何者非君賜。回首修門敢遽忘。

重五同尹少稷觀江中競渡

楚人遺俗閱千年。簫鼓喧呼鬪畫船。風浪如山鮫綉橫。何心此地更爭先。

過玉山辱芮國器檢詳留語甚勤因寄此詩兼呈韓无咎右司

遼東歸老白襦羈。名字何堪遺世聞。便謂與公長契闊。不知留語故慙慙。詩章有便猶應寄。祿米無多切莫分。舊見檢詳俸甚薄。故有此戲。倘見右司煩說似。每因風月愴離羣。

隨意

隨着上漁舟。幽尋不預謀。清溪欣始泛。野寺憶前遊。豐歲雞豚賤。霜天柿栗稠。餘生知有幾。且置萬端憂。

寄龔實之正言

臺省諸公歲歲新。平生敬慕獨斯人。山林不恨音塵遠。夢寐時容笑語親。學道皮膚雖脫落。憂時肝膽尙輪囷。至和嘉祐須公了。乞向升平作幸民。

遊山西村

莫笑農家臘酒渾。豐年留客足雞豚。山重水複疑無路。柳暗花明又一村。簫鼓追隨春社近。衣冠簡朴古風存。從今若許閑乘月。拄杖無時夜叩門。

觀村童戲溪上

兩餘溪水掠堤平。閑看村童戲晚晴。竹馬踉蹌衝淖去。紙鳶跋扈挾風鳴。三冬暫就儒生學。村人惟冬三月禮見童入小學。千耦還從父老耕。識字粗堪供賦役。不須辛苦慕公卿。

雨霽出遊書事

十日苦雨一日晴。拂拭拄杖西村行。清溝泠泠流水細。好風習習吹衣輕。四鄰蛙聲已闐闐。兩岸柳色爭青青。辛夷先開半委地。海棠獨立方傾城。春工遇物初不擇。亦秀燕麥開無青。薺花如雪又爛熳。百草紅紫那知名。小魚誰取置道側。細柳穿頰危將烹。欣然買放寄吾意。草萊無地蘇疲氓。



殘春

殘春醉著釣魚菴。花雨娛人落半巖。豈是天公無皂白。獨悲世俗異酸鹹。安身似夢行當覺。談口如狂未易緘。已作沉舟君勿歎。年來何止闕千帆。

家園小酌

旋作園廬指顧成。柳陰已復著啼鶯。百年更把幾盃酒。一月元無三日晴。鷗鷺向人殊耐久。山林與世本無營。小詩漫付兒曹誦。不用韓公說有聲。

又

滿林春筍生無數。竟日鷗鷺來百回。衣上塵埃真一洗。酒邊懷抱得頻開。池魚往者憂奇禍。社櫟終然幸散材。世事紛紛心本懶。閉門豈獨畏嫌猜。

寄王嘉叟吏部

宿負煩公議。隆寬荷聖時。江湖真送老。藥餌且扶衰。撫事驚年往。懷人有夢知。敢嗟貧到骨。飲水誦君詩。嘉叟有漁隱堂詩。

夜讀隱書有感

平生志慕白雲鄉。俯仰人間每自傷。倦鶴摧頽寧望料。寒龜蹙縮且支牀。力探鴻寶尋奇訣。剩采青精試秘方。常鄙臞仙老山澤。要令仰首看飛翔。

上虞逆旅見舊題歲月感懷

舴艋爲家東復西。今朝破曉下前溪。青山缺處日初上。孤店開時鶯亂啼。倦枕不成千里夢。壞牆閑覓十年題。漆園傲吏猶非達。物我區區豈足齊。

舜廟懷古

雲斷蒼梧竟不歸。江邊古廟鎖朱扉。山川不爲興亡改。風月應憐感慨非。孤枕有時鶯喚夢。斜風無賴客添衣。千年回首消磨盡。輸與漁舟送落暉。

題十八學士圖

隋日昏墮東南傾。雷塘風吹草木腥。平時但忌黑色兒。不知乃有虬鬚生。晉陽龍飛雲滂滂。關洛萬里即日平。東征歸來脫金甲。天策開府延豪英。琴書閑暇永清晝。簪履光彩明華星。高參伊呂列佐命。下者才氣猶崢嶸。但餘一恨到千載。高陽繆公來竄名。老奸得志國幾喪。李氏誅徒連孤嬰。向令亟念履霜戒。危亂安得存勾萌。衆賢一佞禍尙爾。掩卷涕淚臨風橫。

統分稻晚歸

出裏一簞飯。歸收百把禾。勤勞解堪忍。餘暇更吟哦。歲惡增吾困。家貧賴汝多。村醪莫辭醉。羹芋學岷峨。是日作芋羹。

又

薄酒不自酌。夕陽須汝歸。橘包霜後美。豆莢雨中肥。路遠應加飯。天寒莫減衣。老懷憂自切。道眼看皆非。

衰病

衰病不浪出。閉門煙雨中。葦花添絮暖。葑火試爐紅。湖村采老蕪作火。甚妙。仕宦螿窠夢。功名馬耳風。山翁但更事。人看作神通。

又

病除猶老健。雨止得冬晴。覓句嗟心在。鈔書試眼明。朝寒添布褐。晚步出柴荆。外慕終無益。兒曹且力耕。

霜風

十月霜風吼屋邊。布裘未辦一絨綿。豈惟飢索鄰僧米。真是寒無坐客氈。身老嘯歌悲永夜。家貧撐拄過凶年。丈夫經此寧非福。破涕燈前一粲然。

小酌

槃箸貧猶設。杯盃老更耽。宗文樹雞柵。靈照挈蔬籃。徑醉眼花亂。高眠鼻息酣。覺來寒日晚。落葉擁茆菴。

十月苦蠅

村北村南打稻忙。浮雲吹盡見朝陽。不宜便作晴明看。撲面飛蠅未退藏。

又

十月江南未擁爐。癡蠅擾擾莫嫌渠。細看豈是堅牢物。付與清霜爲掃除。

丫頭巖見周洪道以進士入都日題字

烏巾白紵躡京塵。瑤樹瓊林照路人。西省歸來名蓋代。兩行墨色尙如新。

獨學

師友彫零身白首。杜門獨學就誰評。秋風棄扇知安命。小炷留燈悟養生。踵息無聲酣午枕。舌根忘味美晨烹。少年妄起功名念。豈信身閑心太平。黃庭經閑暇無事心太平。

霜月

沽草霜花白。寒窗月影新。鷺鴉時繞樹。吠犬遠隨人。出仕讒銷骨。歸耕病滿身。世間輸壞衲。切莫勸冠巾。

寄黃龍升老

讀書萬卷裂儒衣。黃金可成棄不爲。快哉天馬不可羈。開口便呼臨濟兒。諸方蹴躡莫支持。吾州一老偶得之。升爾佛智裕公。閉門夜付僧伽黎。明日聲價羽檄馳。弟子不必不如師。黃龍所立尤瑰奇。空山鬼火號狐狸。築屋千礎食萬緡。疑人不解公遊嬉。嫉怒塵碎門前碑。世衰道喪士自欺。山林亦復踐駭機。長謠寄公公試用。吾輩救此當何施。

贈進賢劉令

簿領塵埃裏。超然見鳳麟。性疎忘顧忌。學大有經綸。正論雖頻接。高標豈易親。向來相識晚。吾黨欠斯人。

書室名可齋或問其義作此告之

得福常廉稱自輕。坦然無媿亦無驚。平生祕訣今相付。只向君心可處行。

寄酬楊齊伯少卿

楊卿人材金百鍊。岐公座上初識面。十年萬事不須說。猶喜歸來且強健。題詩想見初削瓜。寄到茆堂已歸燕。辭

嚴意密敢輕讀。呼兒炷燈重把卷。卽今相望幾千里。何日蟬聯語忘倦。就令有使卽寄書。豈如無事長相見。

卷二

自笑

自笑平生醉後狂。千鍾使氣少年場。那知病葉先摧落。卽羨寒龜巧縮藏。藥物及時希老健。山家隨日了窮忙。凶年坐待新春麥。莫厭清吟雪夜長。

夜聞松聲有感

清晨放船落星石。大風吹颿如箭激。回頭已失廬山雲。卽上吳城觀落日。夜深龍歸擘祠門。入木數寸留爪痕。明朝就視心尚慄。腥風卷地雷霆奔。歸船買酒持自慰。性命平生驚屢戲。固知神怒有定時。波紋覺作魚鱗細。如今衰病臥林垌。霜覆茆簷月滿庭。松聲驚破三更夢。猶作當時風浪聽。余丙戌七月自京口移官豫章。冒風櫓自星子解舟。不半日至吳城山小憩。

十二月一日

病愈都忘老。晴和已似春。畦蔬青長甲。塘水綠生鱗。酒盃論交密。丹爐作夢新。窮居那敢恨。幸遠庾公塵。

東風吹斗柄。暖律變嚴凝。草色迷殘燒。溪流帶斷冰。兒書春日勝。女翦上元燈。莫笑蒲龜睡。山翁怯歲增。

春日

老夫一臥三山下。兩見城門送土牛。貧舍春盤還草草。暮年心事轉悠悠。湖光漲綠分煙浦。柳色搖金映市樓。藥餌及時身尚健。無風無雨且閑遊。

又

久拋朝幘頰重彈。華髮蕭然二寸冠。不恨淒涼侵晚境。猶能語笑向春盤。銀盃酒色家家綠。篝笠煙波處處寬。一片梅花無復在。卽嫌新煖換餘寒。

僧房假榻

過盡青山喚渡船。晚窗洗腳臥僧氈。剩償平日清游願。更結來生熟睡緣。吞啄漸稀如老鶴。鳴聲已斷似寒蟬。旁觀莫苦嘲癡鈍。此妙吾宗秘不傳。

聞雨

慷慨心猶壯。蹉跎鬢已秋。百年殊鼎鼎。萬事祇悠悠。不悟魚千里。終歸貉一丘。夜闌聞急雨。起坐涕交流。

休日有感

少年從宦地。休日喜無涯。坐上強留客。街頭旋買花。開軒催汛掃。脫帽共諠譁。村巷朋遊絕。逢春祇自嗟。

題徐子禮宗丞自覺齋

末俗紛紛只自譟。惟公肯向靜中觀。閒看此事從何得。正自它人著力難。茶熟松風生石鼎。香殘雲縷遶蒲團。江湖多少癡禪衲。蹋破青鞵覓話端。

送張叔潛編修造朝

此士名高北斗南。眼中獨許我同參。匆匆卻作臨分恨。一月何曾笑二三。

又

簡牘清閒勝校讐。題詩應肯寄夔州。東廚羊美聊堪飽。北面鈴稀莫強愁。東廣密院廣也。烹羊最珍。北面房行掃事。每聞鈴聲鷄至。則知有警。

又

北窗銅碾破雲腴。捫腹翛然一事無。安用雁行排院吏。正須魚貫看胡奴。院吏視屬官倨甚。每軍中解降胡至。密院屬官先見之。

又

芒屨年來漸頰穿。閉門日日只高眠。今朝出送張夫子。借得南鄰放鴨船。

有感

雲幄重重不易尋。庖廚性命走山林。但令有月同幽夢。更用何人識苦心。流輩漸稀知死近。鬢毛無色覺愁侵。平生自許忘情者。頗怪燈前感慨深。

澗松

藥出山來爲小草。楸成樹後困長藤。澗松鬱鬱何勞歎。卻是人間奈廢興。

將赴官夔府書懷

病夫喜山澤。抗志自年少。有時緣龜飢。妄出丐鶴料。亦嘗廁朝紳。退懦每自笑。正如怯酒人。雖愛不敢醺。一從南昌免。五歲嗟不調。朝廷每哀矜。幙府誤辟召。終然斂孤迹。萬里遊絕徼。民風雜莫徯。封域近無詔。淒涼黃魔宮。峭絕白帝廟。又嘗聞此邦。野陋可嘲誚。通衢舞竹枝。譙門對山燒。浮生一夢耳。何者可慶弔。但愁纏疊疊。把鏡羞自照。夔民多癩。無者十財一二耳。

送芮國器司業

此心知我豈非天。雙鬢皤然氣浩然。曾見灰寒百僚底。真能山立萬夫前。洛城霜重聽宮漏。晉水雲深著釣船。拈起吾宗安樂法。人生何處不隨緣。

又

往歲淮邊虜未歸。諸生合疏論危機。人材衰靡方當慮。士氣崢嶸未可非。萬事不如公論久。諸賢莫與衆心違。還朝此段宜先及。豈獨遺經賴發揮。

春陰

春風浩蕩作春陰。弱燕歸來不自禁。白塔昏昏纔半露。青山淡淡欲平沉。裘茸細雨初驚溼。屐齒新泥忽已深。直怕樓高生客恨。不因病起倦登臨。

投梁參政

浮生無根株。志士惜浪死。雞鳴何預人。推枕中夕起。游也本無奇。腰折百僚底。流離鬢成絲。悲咤猴如洗。殘年走巴峽。辛苦爲斗米。遽衝三伏熱。前指九月水。回首長安城。未忍便萬里。袖詩叩東府。得拜求望屨。平生寶易足。名

幸汚黃紙。但憂死無聞。功不挂青史。頗聞匈奴亂。天意殄蛇豕。何時燹姚師。大刷湄橋恥。士各奮所長。儒生未宜鄙。覆甌草軍書。不畏寒墮指。

宿楓橋

七年不到楓橋寺。客枕依然半夜鐘。風月未須輕感慨。巴山此去尙千重。

晚泊

半世無歸似轉蓬。今年作夢到巴東。身遊萬死一生地。路入千峯百嶂中。鄰舫有時來乞火。錢祠無處不祈風。晚潮又泊淮南岸。落日啼鴉戍堞空。

金山觀日出

繫船浮玉山。清晨得奇觀。日輪擘水出。始覺江面寬。遙波蹙紅鱗。翠鷺開金盤。光彩射樓塔。丹碧浮雲端。詩人窘筆力。但詠秋月寒。何當羅浮望。湧海夜未闌。

弔李翰林墓

飲似長鯨快吸川。思如渴驥勇奔泉。客從縣令初何有。醉竹將軍亦偶然。駿馬名姬如昨日。斷碑喬木不知年。浮生今古同歸此。回首桓公亦故阡。桓溫冢亦在當塗。

雨中泊趙屯有感

歸燕羈鳩共斷魂。荻花楓葉泊孤村。風吹暗浪重添纒。雨送新寒半掩門。魚市人煙橫慘淡。龍祠簫鼓鬧黃昏。此身且健無餘恨。行路雖難莫更論。

黃州

局促常悲類楚囚。遷流還歎學齊優。江聲不盡英雄恨。天意無私草木秋。萬里羈愁添白髮。一帆寒日過黃州。君看赤壁終陳迹。生子何須似仲謀。

武昌感事

百萬呼盧事已空。新寒擁褐一衰翁。但悲鬢色成枯草。不恨生涯似斷蓬。煙雨淒迷雲夢澤。山川蕭瑟武昌宮。西

遊處處堪流涕。撫枕悲歌與未窮。

夜思

露泣啼螿草。潮生宿雁汀。經年寄孤館。終夜託丘亭。楚澤無窮白。巴山何處青。四方男子事。不敢恨飄零。

哀郢

遠接商周祚最長。北盟齊晉勢爭強。章華歌舞終蕭瑟。雲夢風煙舊莽蒼。草合故宮惟雁起。盜穿荒冢有狐藏。離騷未盡靈均恨。志士千秋淚滿裳。

又

荊州十月早梅春。徂歲真同下阪輪。天地何心窮壯士。江湖從古著羈臣。淋漓痛飲長亭暮。慷慨悲歌白髮新。欲弔章華無處問。廢城霜露溼荆榛。

江陵道中作

山川雜吳楚。氣候接秋冬。水落魚可拾。霜清裘欲重。鄉遙歸夢短。酒薄客愁濃。白帝何時到。高吟醉臥龍。

石首縣雨中繫舟戲作短歌

庚寅去吳西適楚。秋晚孤舟泊江渚。荒林月黑虎欲行。古道人稀鬼相語。鬼語亦如人語悲。楚國繁華非昔時。章華臺前小家住。芡屋雨漏秋風吹。悲哉秦人真虎狼。欺侮六國囚侯王。亦知興廢古來有。但恨不見秦先亡。開窗酌汝一盃酒。等爲亡國秦更醜。驪山冢破已千年。至今過者無傷憐。

初寒

船尾寒風不滿旗。江邊叢祠常掩扉。行人畏虎少晨起。舟子捕魚多夜歸。芡葉翻翻帶宿雨。葦花漠漠弄斜暉。傷心到處聞砧杵。九月今年未授衣。

醉歌

老夫櫓竿插蒼石。水落岸沙痕數尺。江南秋盡未搖落。櫂葉離離楓葉赤。楚人自古多悲傷。道傍行歌猶感激。野花碧紫亦滿把。欄果青紅正堪摘。客中得酒薄亦好。江頭爛醉真不惜。千古興亡在目前。鬱鬱關河含暝色。飢鳴



垂翅掠舟過。此意與我同悽惻。三撫闌干恨未平。月明正照顏烏幘。

秋風

秋風吹客櫓。節物歎遐方。歲事忽云暮。吾行殊未央。霜清漢水綠。日落楚山蒼。此去三巴路。無猿亦斷腸。

塔子磯

塔子磯前艇子橫。一窗秋月爲誰明。青山不減年年恨。白髮無端日日生。七澤蒼茫非故國。九歌哀怨有遺聲。古來撥亂非無策。夜半潮平意未平。

重陽

照江丹葉一林霜。折得黃花更斷腸。商略此時須痛飲。細腰宮畔過重陽。

早寒

河鄂猶殘暑。荆巫已早寒。潦收灘正白。霜重葉初丹。節物元非惡。情懷自鮮歡。暮年更世事。唯有醉江干。

公安

地曠江天接。沙隲市井移。避風留半日。買米待多時。蝶冷停菰葉。鷗馴傍鷓枝。昔人勲業地。搔首歎吾衰。縣有呂子明舊城。

沙頭

游子行愈遠。沙頭逢暮秋。孫劉鼎足地。荆益犬牙州。鼓角風雲慘。江湖日夜浮。此生應袞袞。高枕看東流。

大寒出江陵西門

平明羸馬出西門。淡日寒雲久吐吞。醉面衝風驚易醒。重裘藏手取微溫。紛紛狐兔投深莽。點點牛羊散遠村。不爲山川多感慨。歲窮遊子自消魂。

江夏與章冠之遇別後寄贈

騎鶴仙人不可呼。一樽猶得與君俱。未應湖海無豪士。長恨乾坤有腐儒。壯歲光陰隨手過。晚途衰病要人扶。淒涼江夏秋風裏。况見新豐舊酒徒。

題江陵村店壁

背施三家市。黃茆十里岡。蓬飛風浩浩。塵起日茫茫。馳騁多從獸。鉏耰少破荒。行人相指似。此路走襄陽。

馬上

燈前薄飢陳鹽齏。帶睡強出行江隄。五更落月移樹影。十月清霜侵馬蹄。荒陂嗚咽已度雁。小市喔喔初鳴雞。可憐萬里覓歸夢。未到故山先自迷。

水亭有懷

漁村把酒對丹楓。水驛憑軒送去鴻。道路半年行不到。江山萬里看無窮。故人草詔九天上。老子題詩三硤中。笑謂毛錐可無恨。書生處處與卿同。

移船

沙際舟銜尾。相依作四鄰。暮年多感慨。分路亦酸辛。折竹占行日。吹簫賽水神。無勞問亭驛。久客自知津。

將離江陵

暮暮過渡頭。旦旦走隄上。舟人與關吏。見熟識顏狀。癡頑久不去。常恐遭誚讓。昨日倒檣干。今日聯百丈。買薪備兩雪。儲米滿瓶盎。明當遂去此。障袂先劍望。即今孟冬月。波濤幸非壯。潦收出奇石。霧卷見巖嶂。地峻多崎嶇。峽東少平曠。從來樂山水。臨老愈跌宕。皇天憐其狂。擇地令自放。山花白似雪。江水綠於釀。竹枝本楚些。妙句寄悽愴。何當出清詩。千古續遺唱。

六言

三巴亦有何好。萬里翩然獨尋。本意爲君說破。消磨夢境光陰。

江上

江上霜寒透客衣。閉窗羸臥不支持。羈孤形影真相弔。衰颯頭顱已可知。潦縮穩經行兩峽。竹疎曠見挂猿枝。清樽可置須勤醉。莫望功名老大時。

旅食

霜餘漢水淺。野迴朔風寒。炊黍香浮甑。烹蔬綠映盤。心安失粗糲。味笑出艱難。惟恨虛捐日。無書得縱觀。

滄灘

百夫正謹助鳴鑼。舟中對面不得語。須臾人散寂無譁。惟聞百丈轉兩車。嘔嘔啞啞車轉急。舟人已在沙際立。霖斂蘆村落照紅。雨餘漁舍炊煙煙。故鄉回首已千山。上峽初經第一灘。少年亦慕宦遊樂。投老方知行路難。

松滋小酌

西遊六千里。此地最淒涼。騷客久埋骨。巴歌猶斷腸。風聲撼雲夢。雪意接瀟湘。萬古茫茫恨。悠然付一觴。

晚泊松滋渡口

此行何處不艱難。寸寸強弓且旋彎。縣近歡欣初得菜。江回徙倚忽逢山。繫船日落松滋渡。跋馬雲埋澗瀨關。未滿百年均是客。不須數日待東還。

又

小灘拍拍鷗鷺飛。深竹蕭蕭杜宇悲。看鏡不堪衰病後。繫船最好夕陽時。生涯落魄惟耽酒。客路蒼茫自詠詩。莫問長安在何許。亂山孤店是松滋。

荆門冬夜

常飢龜老欲無腸。臥聽寒更自短長。香椀得閑聊作伴。酒盃因病頗相忘。有情窗罅恰通月。耐冷牖枝多得霜。歷盡風波知險阻。平生錯羨捕魚郎。

繫舟下牢溪游三游洞二十八韻

舊觀三峽圖。常謂非人情。意疑天壤間。豈有此崢嶸。畫師定戲耳。聊欲窮丹青。西遊過沔鄂。莽莽千里平。昨日到峽州。所見始可驚。乃知畫非妄。卻恨筆未精。及茲下牢戍。峯嶂畢自呈。下入裂坤軸。高鶩插青冥。角勝多列峙。擅美有孤撐。或如釜上甑。或如坐後屏。或如倨而立。或如喜而迎。或深如螺房。或疎如窗櫺。峨巍冠冕古。婀娜鬢鬢傾。其間絕出者。虎搏蛟龍窟。崩崖凜欲墮。脩梁架空橫。懸瀑瀉無底。終古何時盈。幽泉莫知處。但聞珞珞鳴。怪怪與奇奇。萬狀不可名。久聞三游洞。疾走忘病嬰。竇穴初漆黑。偃僕捫壁行。方虞觸蝮蛇。類見一點明。扶接困僮奴。

恍然出瓶罌。穹穹厦屋寬。滴乳成微泓。題名歐與黃。雲蒸蒼蘚平。穿林走鷲鷹。拂面逢飛駐。息倦盤石上。拾樵置茶鐺。長嘯答谷嚮。清吟和松聲。辭卑不堪刻。猶足寄友生。

三游洞前巖下小潭水甚奇取以煎茶

苔徑芒屨滑不妨。潭邊聊得據胡床。巖空倒看峯巒影。洞遠中含藥草香。汲取滿瓶牛乳白。分流觸石珮聲長。囊中日鑄傳天下。不是名泉不合嘗。

扇子峽山腹有草閣小亭極幽邃意其非俗人居也

絕境慰人心。誰家住玉岑。亂雲生翠竇。密雪灑青林。高閣臨空豁。孤亭隱邃深。定知非俗士。躡急不容尋。

蝦蟆碖

不肯爬沙桂樹邊。朵頤千古向巖前。巴東峽裏最初峽。天下泉中第四泉。留雪飲冰疑換骨。掬珠弄玉可忘年。清游自笑何曾足。疊鼓擎擎又解船。

黃牛峽廟

三峽東江流。崖谷互吐納。黃牛不負重。雲表恣蹴躡。吳船與蜀舸。有請神必答。誰憐馬遭刦。百歲創未合。拖師浪奔走。烹飪陳酒榼。紛然餽神餘。羹膋爭噉噉。空庭多落葉。日暮聲颯颯。奇文祭可辨。高古篆籀雜。村女賣秋茶。簪花髻髮匝。稚兒著背上。帖妥若在榻。山寒雪欲下。虎出門早闔。我行忽至此。臨風久嗚咽。

過夷陵適值祈雪與葉使君清飲談括蒼舊游既行舟中雪作戲成長句奉寄

巴楚夷陵酒最醇。使君風味更清真。少年恨不從豪飲。薄宦那知託近鄰。本擬笙歌娛病客。卻催雨雪惱行人。朝來凍手題詩寄。莫笑欹斜字不勻。

泊虎頭灘下

大舟已泊燈火明。小舟猶行聞觸聲。虎頭崔嵬鹿角橫。人生實難君勿輕。

過東澗灘入馬肝峽

書生就食等奔逃。道路崎嶇信所遭。船上急灘如退鷁。人緣絕壁似飛猱。口誇遠嶺青千疊。心憶平波綠一篙。猶

勝溪丁絕輕死。無時來往駕艖。峽中小船謂之艖。

新安驛

孤驛荒山與虎鄰。更堪風雪暗南津。羈遊如此真無策。獨立悽然默愴神。木盃汲江人起早。銀釵簇髻女粧新。蠻風弊惡蛟龍橫。未敢全誇見在身。

秣歸醉中懷都下諸公示坐客

長謠爲子說天涯。四座聽歌且勿譁。蠻俗殺人供鬼祭。敗舟觸石委江沙。此身長是滄浪客。何日能爲飽暖家。坐憶故人空有夢。尺書不敢到京華。

憩歸州光孝寺寺後有楚冢近歲或發之得寶玉劍佩之類

秣歸城畔躡斜陽。古寺無僧晝閉房。殘珮斷釵陵谷變。苦荊架竹井闌荒。虎行欲與人爭路。猿嘯能令客斷腸。寂莫倚樓搔短髮。剩題新恨付巴娘。

飲罷寺門獨立有感

一邑無平土。邦人例得窮。淒涼遠嫁婦。顛顛獨醒翁。今古闌干外。悲歡酒醕中。三巴不搖落。搔首對丹楓。州有屈大夫及明妃祠。

泛溪船至巴東

谿船莫嫌迤。船迤始相宜。兩槳行何駛。重灘過不知。荒村寇相縣。破屋屈平祠。不奈新愁得。啼猿挂冷枝。

巴東過小兩

暫借清溪伴釣翁。沙邊微雨溼孤篷。從今詩在巴東縣。不屬灞橋風雪中。

又

西遊萬里亦何爲。欲就騷人乞棄遺。到此宛然詩不進。始知才分有窮時。

秋風亭拜寇萊公遺像

江上秋風宋玉悲。長官手自葺茅茨。人生窮達誰能料。蠟淚成堆又一時。

又

豪傑何心後世名。材高遇事即崢嶸。巴東詩句澶州策。信手拈來盡可驚。

巴東令麟白雲亭

寇公壯歲落巴蠻。得意孤亭縹緲間。常倚曲闌貪看水。不安四壁怕遮山。遺民雖盡猶能說。老令初來亦愛閑。正使官清貧至骨。未妨留客聽潺湲。

謁巫山廟兩廡碑版甚衆皆言神佐禹開峽之功而詆宋玉高唐賦之妄予亦賦詩一首

真人翳鳳駕蛟龍。一念何曾與世同。不爲行雲求弭謗。那因治水欲論功。翱翔想見虛無裏。毀譽誰知溷濁中。讀盡舊碑成絕倒。書生惟慣詔王公。

聞猿

瘦盡腰圍不爲詩。良辰流落自成衰。也知客裏偏多感。誰料天涯有許悲。漢塞角殘人不寐。涓城歌罷客將離。故應未抵聞猿恨。況是巫山廟裏時。

瞿唐行

四月欲盡五月來。峽中水漲何雄哉。浪花高飛暑路雪。灘石怒轉晴天雷。千艘萬舸不敢過。篙工柁師心膽破。人陰拱待勢衰。誰敢輕行犯奇禍。一朝時去不自由。山腹空有沙痕留。君不見陸子歲暮來夔州。瞿唐峽水平如油。

入瞿唐登白帝廟

曉入大谿口。是爲瞿唐門。長江從蜀來。日夜東南奔。兩山對崔嵬。勢如塞乾坤。峭壁空仰視。欲上不可捫。禹功何巍巍。尙覩鑄鑿痕。天不生斯人。人皆化魚鼈。於時仲冬月。水各歸其源。灑灑屹中流。百尺呈孤根。參差層巖屋。邦人祀公孫。力戰死社稷。宜享廟貌尊。丈夫貴不撓。成敗何足論。我欲伐巨石。作碑累千言。上陳躍馬壯。下斥乘騾昏。雖慚豪偉詞。尙慰雄傑魂。君王昔玉食。何至歃雞豚。願言采芳蘭。舞歌薦精尊。

登江樓

已過瞿唐更少留。小船聊繫古夔州。瞿唐關即唐夔州也。簿書未破三年夢。杖屨先尋百尺樓。日暮雪雲迷峽口。歲窮舍火照關頭。野人不解徵官縛。尊酒應來此散愁。

雪中臥病在告戲作

面裂愁出門。指直但藏袖。誰云三峽熱。有此凜冽候。殷勤愧雪片。飛舞爲我壽。方驚四山積。已見萬瓦覆。豈惟寒到骨。遂覺疾在膝。地爐熾薪炭。噤坐連昏晝。梅花真強項。不肯落春後。俗人愛桃李。苦道太疎瘦。清芬終見賞。此事非速售。已矣吾何言。高枕聽簷溜。

雪晴

臘盡春生白帝城。俸錢雖薄勝躬耕。眼前但恨親朋少。身外元知得喪輕。日映滿窗松竹影。雪消竝舍鳥烏聲。老來莫道風情減。憶向煙蕪信馬行。

玉笈齋書事

莫笑新霜點鬢鬚。老來卻得少工夫。晨占上古連山易。夜對西真五嶽圖。叔夜曾聞高士嘯。孔賓豈待異人呼。眉間喜色誰知得。今日新添火四銖。

又

雪霽茆堂鐘磬清。晨齋枸杞一杯羹。隱書不厭千回讀。大藥何時九轉成。孤坐月魂寒徹骨。安眠龜息浩無聲。剩分松屑爲山信。明日青城有使行。時傳道人欲歸青城。

記夢

夢裏都忘困晚途。縱橫草疏論遷都。不知盡挽銀河水。洗得平生習氣無。

懷西

千載懷西路。今年著腳行。匆匆衰已具。渺渺恨難平。絕壁猿啼雨。深枝鵲報晴。亦知憂吏責。未忍廢詩情。

山寺

籃輿送客過江村。小寺無人半掩門。古佛負牆塵漠漠。孤燈照殿雨昏昏。喜投禪榻聊尋夢。懶爲啼猿更斷魂。要

識人間盛衰理。岸沙君看去年痕。缺籬時。水高數十丈。至冬盡落。

蜀嶺

鬼門關外逢人日。躡磧千家萬家出。竹枝慘戚雲不動。劍器聯翩日將夕。行人十有八九癯。見慣何曾羞顧影。江邊沽酒沙上臥。峽口月出風吹醒。人生未死信難知。顛顛夔州生鬢絲。何日畫船搖桂楫。西湖却賦探春詩。

寒食

政雲烘日欲成霞。灑水生紋淺見沙。又向蠻方作寒食。強持卮酒對梨花。身如巢燕年年客。心羨游僧處處家。賴有春風能領略。一生相伴遍天涯。

晚晴書事呈同舍以下十七首皆試院作

魚復城邊夕照紅。物華偏解惱衰翁。巴鶯有恨啼芳樹。野水無情入故宮。許國漸疎悲壯志。讀書多忘媿新功。因君共語增惆悵。京洛交遊欲半空。

鄉中每以寒食立夏之間省墳客變適逢此時悽然感懷

松陰繫馬啓朱扉。粗糝青紅正此時。守墓萬家猶有日。及親三釜永無期。詩成謾寫天涯感。淚盡何由地下知。富貴賤貧俱有恨。此生長廢蓼莪詩。

又

手持綠酒醉蒼苔。今歲何由疋馬來。清淚不隨春雨斷。孤吟欲和暮猿哀。皂貂破弊歸心切。白髮淒涼老境催。誓墓只思長不出。松門日日手親開。

試院春晚

病思蕭條掩綠罈。閑坊寂歷鎖朱門。故人別久難尋夢。遠客愁多易斷魂。漫漫晚花吹灑岸。離離春草上宮垣。此生飄泊何時已。家在山陰水際村。

倚闌

故山未敢說歸期。十口相隨又別離。小雨初收殘照晚。闌干西角立多時。



自詠

朝衣無色如霜葉。將奈雲安別駕何。鐘鼎山林俱不遂。聲名官職兩無多。低昂未免聞雞舞。慷慨猶能擊筑歌。頭白伴人書紙尾。只思歸去弄煙波。

午興

漸轉廊腰日。徐來峽口風。殮漿便北客。淖粥稱衰翁。槐晚纖纖綠。榴殘續續紅。賁輕仍飽食。三歎愧無功。

風雨中望峽口諸山奇甚戲作短歌

白鹽赤甲天下雄。拔地突兀摩蒼穹。凜然猛士撫長劍。空有豪健無雍容。不令氣象少滯滯。常恨天地無全功。今朝忽悟始歎息。妙處元在煙雨中。太陰殺氣橫慘澹。元化變態含空濛。正如奇材遇事見。平日乃與常人同。安得朱樓高百尺。看此疾雨吹橫風。

夜坐庭中

人靜風褰幔。更闌露炫衣。暗窗飢鼠齧。空廡冷螢飛。歲月背人去。鄉閭何日歸。脫巾還感歎。殘髮不勝稀。

新蔬

黃瓜翠苜最相宜。上市登盤四月時。莫擬將軍春薺句。兩京名價有誰知。

初夏懷故山

鏡湖四月正清和。白塔紅橋小艇過。梅雨晴時插秧鼓。蕪風生處采菱歌。沉迷簿領吟哦少。淹泊蠻荒感慨多。誰謂吾廬六千里。眼中歷歷見漁蓑。

初夏新晴

曲徑泥新晚照明。小軒纔受一牀橫。翩翩乳燕穿簾影。軟軟新篁解籜聲。藥物屏除知病減。夢魂安穩覺心平。深居不恨無來客。時有山禽自贊名。

定拆號日喜而有作

小雨如絲落復收。悄無人語但鳴鳩。挽鬚預想諸兒喜。倒指猶爲五日留。滿案堆書惟引睡。侵天圍棘不遮愁。爲

農父子長相守。謀計隨人學宦遊。

睡起時開試院中。已月餘矣。

深閉重門謝簿書。日長添得睡工夫。水紋竹簾涼如洗。雲碧紗幮薄欲無。半吐山榴看著子。新來梁燕見將雛。夢回茗椀聊須把。自掃桐陰置瓦爐。

四月二十九日作

假館猶三日。還家甫四旬。昏眸雲霧隔。衰鬢雪霜新。每酒雖慵近。病目止酒。囊詩却未貧。但愁門有客。流汗強冠巾。

苦熱

萬瓦鱗鱗若火龍。日車不動汗珠融。無因羽翮氛埃外。坐覺蒸炊釜甑中。石磳寒泉空有夢。冰壺團扇欲無功。餘威向晚猶堪畏。浴罷斜陽滿野紅。

拆號前一日作

飄零隨處是生涯。斷梗飛蓬但可嗟。稚子歡迎先入夢。從兵結束待還家。食眠屢失身多病。憂愧相乘髮易華。隔日寄聲爲薄具。石榴應有未開花。

暴雨

風怒欲掀屋。雨來如決隄。孤燈映窗滅。羈鳥就簷棲。暑令方炎赫。秋聲忽慘淒。傳聞漲江水。已斷瀼東西。

西齋雨後

香椀灰深微炷火。茶鐺聲細緩煎湯。百年浮世幾人樂。一雨虛齋三日涼。簾外微風斜燕影。池邊殘照斂螢房。紗幮石枕蕭然臥。付與今宵幽夢長。

急雨

陰雲屯破口。急雨過城頭。白舫投沙峽。青帘捲市樓。漂搖爭闔戶。壅溢共疏溝。抽得驅蠅手。題詩慰旅愁。

晚晴聞角有感

暑雨初收白帝城。小荷新竹夕陽明。十年塵土青衫色。萬里江山畫角聲。零落親朋勞遠夢。淒涼鄉社負歸耕。議郎博士多新奏。誰致當時魯二生。

夏夜起坐南亭達曉不復寐

風露青冥近九秋。脫巾扶杖冷飈颼。曲闌影外巴山月。畫角聲中楚塞愁。巢燕竝棲高棟穩。潛魚時躍小池幽。悠然坐待江城曉。紅日將昇碧霧浮。

夜登白帝城樓懷少陵先生

拾遺白髮有誰憐。零落歌詩遍兩川。人立飛樓今已矣。浪翻孤月尙依然。升沉自古無窮事。愚智同歸有限年。此意淒涼誰共語。夜闌鷗鷺起沙邊。

假日書事

萬里西來爲一飢。坐曹日日汗霑衣。但嫌憂長妨人樂。不恨疎慵與世違。雕檻迎陽花併發。畫梁避雨燕雙歸。放懷始得閑中趣。下馬何人又叩扉。

林亭書事

吏退林亭夏日長。烏紗白紵自生涼。遶簷密葉帷三面。覆水青萍錦一方。約束蠻僮收藥富。催呼稚子曬書忙。平生幽事還拈起。未覺巴山異故鄉。

又

期會文書日日忙。偷閑聊得臥方牀。花藏密葉多時在。風度疎簾特地涼。野艇空懷菱蔓滑。冰盆誰弄藕絲長。角聲喚覺東歸夢。十里平湖一草堂。峽中絕無菱藕。

遊臥龍寺

曉發魚復走瞿唐。沙頭喚渡倚胡牀。峒人爭趁五更市。我亦來追六月涼。殘星欲盡尙歷落。明河已淡餘蒼茫。翻翻林表鴉鵲語。渺渺煙邊鷗鷺行。過江走馬十五里。小寺殘僧真蕩爾。投鞭入門爲一笑。僻陋稱雄有如此。君不見天童徑山金碧浮虛宇。千衲梵唄層雲中。

久病灼艾後獨臥有感

白帝城高暮柝傳。幽窗搔首意蕭然。江邊雲煙初橫雁。牆下桐疎不庇蟬。計出火攻傷老病。臥聞蒿墮歎蠻煙。諸賢好試平戎策。斂退無心競著鞭。

秋晚病起

心靜病良已。翛然巾履輕。灰深地爐煖。日出紙窗明。宿雨全消瘴。新霜賸得晴。井梧殊可念。無葉送秋聲。

秋思

魚復城邊逢雁飛。白頭羈客恨依依。遠遊眼底故交少。晚歲人間樂事稀。雲重古關傳夜柝。月斜深巷擣秋衣。官閑况是頻移疾。藥鼎熒熒臥掩扉。

一病四十日天氣遂寒感懷有賦

幽人病起鬢毛殘。硤口樓臺九月寒。暮角又催孤夢斷。早霜初染一林丹。鄉閭乖隔知誰健。懷抱淒涼用底寬。麴米春香雖可醉。灑西新橘尙餘酸。

登城

簿領無時了。登臨亦快哉。樓危壓城起。硤迤東江來。病瘴拋書帙。思鄉泥酒盃。天寒水盡落。灑灑已崔嵬。

夔州重陽

夔州鼓角晚淒悲。恰是幽窗睡起時。但憶社醅授菊蕊。敢希朝士賜萸枝。山川信笑吾廬遠。天地無情客鬢衰。佳日掩門君莫笑。病來紗帽不禁吹。

追懷曾文清公呈趙教授趙近嘗示詩

憶在茶山聽說詩。親從夜半得玄機。常憂老死無人付。不料窮荒見此奇。律令合時方帖妥。工夫深處卻平夷。人間可恨知多少。不及同君叩老師。

謝張廷老司理錄示山居詩

顛顛經年客瘴鄉。把君詩卷意差強。古人三語猶嗟賞。况是珠璣滿錦囊。

又

老覺人間萬事非。但思茆屋映疎籬。秋衾已是饒歸夢。更讀山居二首詩。

秋晴欲出城以事不果

古人已去不可回。今人日夜歸泉臺。浮生細看只此是。到死自苦何爲哉。矜名飾詐竟一世。忍寒觸熱忘其駭。不令金樽映翠杓。坐待白骨生蒼苔。清秋九月瘴如洗。白鹽千仞高崔嵬。荒庭落葉不可掃。惟有叢菊爭先開。瓊西黃柑霜落爪。溪口赤梨丹染腮。熊肪玉潔笑香飯。鮓瓣花糝宜新醅。南窗病起亦蕭散。甚欲往探城西梅。一官底處不敗意。正用此時持事來。

南窗

流落逢知少。疎慵近俗多。悶拈如意舞。狂叩唾壺歌。巴酒禁愁得。金丹奈老何。南窗好風月。聊復此婆娑。

遣興

酒量愁翻減。詩聲老轉低。日高羹馬齒。霜冷駕雞栖。已判功名迹。寧論簿領迷。賴無權入手。軟弱實如泥。

九月三十日登城門東望懷然有感

減盡腰圍白盡頭。經年作客向夔州。流離去國歸無日。瘴癘侵人病過秋。菊蕊殘時初把酒。病中久止酒。秋末方能少飲。雁行橫處更登樓。蜀江朝暮東南注。我獨胡爲淹此留。

初冬野興

關北關南霜露寒。瓊東瓊西山谷盤。簞紋細細吹殘水。龜背時時出小灘。衰髮病來無復綠。寸心老去尚如丹。逆胡未滅時多事。卻爲無才得少安。

東屯呈同遊諸公

十月霜彫楓樹林。清溪白石稱幽尋。按行老子誅茆地。惆悵孤臣許國心。走馬平沙嫌路近。傳盃小閣喜寒侵。也思試索梅花笑。凍蕊疎疎欲不禁。

別王伯高

冷落何人肯見尋。斷絃塵匣愧知音。傾家釀酒猶嫌少。入海求詩未厭深。薄宦簿書常袞袞。中年光景易駸駸。香奩贈別非無意。共約跣趺看此心。

書驛壁

猿叫鋪前雪欲作。鬼門關頭路正惡。泥深三尺馬蹄弱。霜厚一寸客衣薄。朝行過棧暮渡竿。夜投破驛火燈爛。人生但要無媿怍。萬里竄身元不錯。

又

峽中山多甲天下。萬嶂千峯通一罅。峒民無地習耕稼。射麋捕虎連晝夜。女兒薄命天不借。青燈獨宿江邊舍。黎明賣薪勿悲吒。女生豈有終不嫁。

醉中到白崖而歸

醉眼朦朧萬事空。今年痛飲灑西東。僞呼快馬迎新月。卻上輕輿御晚風。行路八千常是客。丈夫五十未稱翁。亂山缺處如橫線。遙指孤城翠靄中。

十二月十九日晚巫山送客歸回望西寺小閣縹緲可愛遂與趙郭二教授同遊抵夜乃還楚鄉偶得長句呈二君

送客沙頭落日催。遙看重閣更同來。清尊與闕都傾盡。是日所攜酒俱飲盡。倦馬和詩總勒回。顛顛遠遊悲騎省。豪華前事記章臺。歸時燈火參差晚。自脫征衣拂帽埃。

卷二

飯三折鋪鋪在亂山中

平生愛山每自歎。舉世但覺山可玩。皇天憐之足其願。著在荒山更何怨。南窮閩粵西蜀漢。馬蹏幾歷天下半。山橫水掩路欲斷。崔嵬可陟流可亂。春風桃李方漫漫。飛棧凌空又奇觀。但令身健能強飯。萬里只作遊山看。

小市

小市門前沙作堤。杏花雖落不露泥。客心尙壯身先老。江水方東我獨西。暫憩軒窗仍汛掃。遠遊書劍亦提攜。子規應笑飄零慣。故傍茆簷盡意啼。

酒無獨飲理

酒無獨飲理。常恨欠佳客。忍得我輩人。豈計晨與夕。少年事虛名。歲月駒過隙。自從老大來。一日亦可惜。糟丘未易辦。小計且千石。頽然置萬事。天地爲幕帟。人生如刀礪。磨盡要有日。不須荷鋤隨。况問幾兩屐。

畏虎

滑路滑如苔。澀路澀若梯。更堪都梁下。一雪三日泥。泥深尙云可。委身餓虎蹊。心寒道上跡。魄碎茆葉低。常恐不自免。一死均豬雞。老馬亦甚畏。憐憫不敢嘶。吾聞虎雖暴。未嘗窺汝棲。狐行莫不止。取禍非排擠。彼讒實有心。平地生溝谿。哀哉馬新息。惹艾成珠犀。

戲題

走馬平欺刺繡坡。放船橫截亂絲渦。從來倚箇心平穩。遇險方知得力多。

蟠龍瀑布

遠望紛珠纒。近觀轉雷霆。人言水出奇。意使行人驚。人驚我何得。定非水之情。水亦有何情。因物以賦形。處高勢趨下。豈樂與石爭。退之亦隘人。強言不平鳴。古來賢達士。初亦願躬耕。意氣或感激。邂逅成功名。

題梁山軍瑞豐亭

我行都梁窘風雪。史君喜事能留客。瑞豐亭上一尊酒。渺渺郊原水初白。峽中地褊常苦貧。政令愈簡民愈淳。本來無事只畏擾。擾者才吏非庸人。都梁之民獨無苦。須晴得晴雨得雨。史君心愛稼如雲。時上斯亭按歌舞。歌闌舞罷史君醉。父老羅拜豐年賜。聖朝尙實抑虛文。縱產芝房非上瑞。

馬上

殘年流轉似萍根。馬上傷春易斷魂。烘煖花無經日蕊。漲深水過去年痕。迷行每問樵夫路。投宿時敲竹寺門。不信太平元有象。牛羊點點散煙村。

鄰山縣道上作

微雨晴時出驛門。亂鶯啼處過江村。挽花醉袖露餘馥。迎日征鞍借小溫。客路一身真弔影。故園萬里欲招魂。鬢毛無色心猶壯。藉草悲歌對酒尊。

鄰水延福寺早行

化蝶方酣枕。聞雞又著鞭。亂山徐吐日。積水遠生煙。淹泊真衰矣。登臨獨惘然。桃花應笑客。無酒到愁邊。酒偶盡。市酤不可飲。

岳池農家

春深農家耕未足。原頭叱叱兩黃犢。泥融無塊水初渾。雨細有痕秧正綠。綠秧分時風日美。時平未有差科起。買花西舍喜成婚。持酒東鄰賀生子。誰言農家不入時。小姑畫得城中眉。一雙素手無人識。空村相喚看繅絲。農家農家樂復樂。不比市朝爭奪惡。宦遊所得真幾何。我已三年廢東作。

過廣安弔張才叔諫議

春風疋馬過孤城。欲弔先賢涕已傾。許國肺肝知激烈。照人眉宇尙崢嶸。中原成敗寧非數。後世忠邪自有評。歎息知人真未易。流芳遺臭盡書生。

果州驛

驛前官路埃壘壘。歎息何時送我歸。池館鶯花春漸老。窗扉燈火夜相依。孤鸞怯舞愁窺鏡。老馬貪行強受鞿。到處風塵常撲面。豈惟京洛化人衣。

留樊亭三日王覺民檢詳日攜酒來飲海棠下比去花亦衰矣

留落猶能領物華。名園又作醉生涯。何妨海內功名士。共賞人間富貴花。

又

石衛尉家錦步障。移在樊家園館中。醉到花殘呼馬去。聊將俠氣壓春風。

柳林酒家小樓



桃花如燒酒如油。緩轡郊原當出遊。微倦放教成午夢。宿醒留得伴春愁。遠途始悟乾坤大。晚節偏驚歲月遒。記取晴明果州路。半天高柳小青樓。

南池杜詩所謂安知有蒼從萬頃侵坤軸者今已盡廢

二月鶯花滿闌中。城南搔首立衰翁。數莖白髮愁無那。高項蒼池事已空。陂復豈惟民食足。渠成終助霸圖雄。眼前碌碌誰知此。漫走叢祠乞歲豐。他上有漢高帝廟。

唐長慶中南池新亭碑在漢高帝廟側亭已失所在矣

池廢新亭亦已無。遺碑半滅臥春蕪。文章綺靡雖非古。今代詞人不辦渠。

聞杜鵑戲作絕句

半世羈遊厭路岐。憑鞍日日數歸期。勞君樹杪丁寧話。似勸飢人食肉糜。

鼓樓鋪醉歌

書生迫飢寒。一飽輕三巴。三巴未云已。北首趨褒斜。匆匆出門去。裘馬不復華。短帽障赤日。烈風吹黃沙。假裝先晨雞。投鞭後昏鴉。壯哉利閭閻。崖谷何谿笳。地荒多牧卒。往往聞蘆笳。我行春未動。原野今無花。稚子入旅夢。挽鬚勸還家。起坐不能寐。愁腸如轉車。四方丈夫事。行矣勿咨嗟。

登慧照寺小閣

少年富貴已悠悠。老大功名定有不。歲月消磨閑亭傳。山川遼邈弊衣裘。殺身有地初非惜。報國無時未免愁。局促每思舒望眼。雖非吾土強登樓。

春雨

江頭一夜雨。曉路無新花。我今爲陳人。感此重歎嗟。毅和挾雨曜。疾走不可遮。古今俛仰間。那暇惜物華。

風雨中過龍洞閣

飄然醉袖怒人扶。箇裏何曾有畏塗。卷地黑風吹慘澹。半天朱閣插虛無。闌邊歸鶴如爭捷。雲表飛仙定可呼。莫怪衰翁心膽壯。此身元是一枯株。

驛舍海棠已過有感

淒涼古驛官道傍。朱門沈沈春日長。暄妍光景老海棠。顛風吹花滿空廊。物生榮頓固其常。惜哉無與持一觴。遊蜂戲蝶空自忙。豈知笑人在西廂。我雖已老猶能狂。竚立爲爾悲容光。盛時不遇誠可傷。零落逢知更斷腸。

籌筆驛有武侯祠堂

運籌陳迹故依然。想見旌旗駐道邊。一等人間管城子。不堪譙叟作降牋。

嘉川鋪遇小雨景物尤奇

一春客路厭風埃。小雨山行亦樂哉。危棧巧依青嶂出。飛花併下綠巖來。面前雲氣翔孤鳳。腳底江聲轉疾雷。堪笑書生輕性命。每逢險處更徘徊。

老君洞有石刻載唐明皇幸蜀見老君於此

丹鳳樓頭語未終。崎嶇蜀道復相逢。太清宮闕俱煨燼。豈亦南來避賊鋒。

大安病酒留半日王守復來招不往送酒解醒因小飲江月館

江驛春醒半日留。更煩送酒爲扶頭。柳花漠漠嘉陵岸。別是天涯一段愁。

金牛道中遇寒食

乍換春衫一倍輕。况逢寒食十分晴。鶯穿驛樹惺惚語。馬過溪橋蹀躞行。畫柱綵繩喧笑樂。豔粧麗服角鮮明。誰知此日金牛道。非復當時鐵馬聲。紹興初虜大入。至金牛而還。

曉發金牛

客枕何時穩。忽忽又束裝。快晴生馬影。新暖拆花房。沮水春流綠。嶓山曉色蒼。阿瞞狼狽地。千古有遺傷。自金牛以西。皆明皇幸蜀路。

山南行

我行山南已三日。如繩大路東西出。平川沃野望不盡。麥隴青青桑鬱鬱。地近函秦氣俗豪。鞞韃蹴鞠分朋曹。首着連雲馬蹄健。楊柳夾道車聲高。古來歷歷興亡處。舉目山川尙如故。將軍壇上冷雲低。丞相祠前春日暮。國家

四紀失中原。師出江淮未易吞。會看金鼓從天下。卻用關中作本根。

南鄭馬上作

南鄭春殘信馬行。通都氣象尙崢嶸。迷空遊絮憑陵去。曳線飛鳶跋扈鳴。落日斷雲唐顯廢。德宗詔山南比南京。淡煙芳草漢壇平。近郊有韓信拜大將壇。猶嫌未豁胸中氣。目斷南山天際橫。城中望見長安南山。

和高子長參議道中二絕

梁州四月晚鶯啼。共憶扁舟罨畫谿。莫作世間兒女態。明年萬里駐安西。

又

豐年食少厭兒啼。覓得微官落五谿。大似無家老禪衲。打包還度棧雲西。

次韻張季長題龍洞

我昔謁紫皇。騎鳳跨虬龍。俯不見塵世。浩浩萬里空。謫隨尙遠遊。忽到漢始封。西望接蜀道。北顧連秦中。壯哉形勝區。有此蜿蜒宮。雷霆自鞞鞞。環玦亦璵璠。石屋如建章。萬戶交相通。來者各有得。盡取知無從。憑高三歎息。自古幾英雄。老我文字衰。揮毫看諸公。

次韻子長題吳太尉雲山亭

參謀健筆落縱橫。太尉清罇賞快晴。文雅風流雖可愛。關中遺虜要人平。

送劉戒之東歸

去國三年恨未平。東城况復送君行。難憑魂夢尋言笑。空向除書見姓名。殘日半竿斜谷路。西風萬里玉關情。蘭臺粉署朝回晚。肯記羸官數寄聲。

周元吉蟠室詩

天下有廣居。阿房非建章。賓餞日及月。闔閭陰與陽。山川坦然平。何者爲藩牆。孔公暨瞿聃。同坐此道場。哀哉世日隘。肝膽分界疆。蹙縮戰蝸角。崎嶇走羊腸。周先早得道。所證非復常。小室古城隅。宛如野僧房。能容人天衆。誰沓來燒香。三萬二千人。各據獅子牀。實際正如此。切忌錯商量。須彌芥子話。今夕當舉揚。

送范西叔赴召

天涯流落過重陽。楓葉捲丹已著霜。衰病強陪蓮幕客。淒涼又送石渠郎。杜陵雁下悲徂歲。笠澤魚肥夢故鄉。何恐從今長隔闊。舊交新貴例相忘。

又

欲駕征車勸小留。南山南畔更逢秋。數聲過雁催行色。一盞昏燈話別愁。自昔文章關治道。卽今臺閣要名流。白頭尙作書癡在。賸乞朱黃與校讎。

寄鄧公壽

高標瑤樹與瓊林。靈府清寒出苦吟。海內十年求識面。江邊一見卽論心。紛紛俗子常成市。噩噩微言孰賞音。卽道南池梅最早。要君攜手試同尋。

簡章德茂

殊方邂逅豈無緣。世事多乖復悵然。造物無情吾輩老。古人不死此心傳。冷雲黯黯朝橫棧。紅葉蕭蕭夜滿船。箇裏約君同著句。不應輸與灞橋邊。

自三泉泛嘉陵至利州

日日遭途處處詩。書生活計絕堪悲。江雲垂地灘風急。一似前年上峽時。

木瓜鋪短歌

鼓樓坡前木瓜鋪。歲晚悲辛利州路。當車礪礪石如屋。百里夷途無十步。溪橋缺斷水齧沙。崖腹崩頽風拔樹。虎狼妥尾擇肉食。狐狸豎毛啼日暮。冢丘短草聲窸窣。往往精靈與人遇。我生胡爲忽在此。正坐一飢忘百慮。五雷出門寒裂面。半夜燎衣泥滿袴。妻孥八月離夔州。寄書未到今何處。餘年有幾百憂集。日夜朱顏不如故。卽今寧省盛諸賢。細思寧是儒冠誤。

夜抵葭萌惠照寺寓榻小閣

亭驛驅馳腴肉消。故山歸夢愈迢迢。夜行觸尉那能避。且過隨僧不待招。雨後風雲猶慘澹。霜前草木已蕭條。哀

邊事事非平日。醉裏題詩亦復聊。

太息宿青山鋪作

太息重太息。吾行無終極。冰霜迫殘歲。鳥獸號落日。秋砧滿孤村。枯葉擁破驛。白頭鄉萬里。墮此虎豹宅。道邊新食人。膏血染草棘。平生鐵石心。忘家思報國。即今冒九死。家國兩無益。中原久喪亂。志士淚橫臆。切勿輕書生。上馬能擊賊。

又

凄凄復淒淒。山路我攀躋。僕病臥草間。馬困聲酸嘶。脫兔截道奔。窮狄上樹啼。崩湍一何哀。下落萬仞谿。昏黑投孤戍。洗我衣上泥。下愚不可遷。大惑終身迷。仕宦十五年。曾不飽糠粃。客路少睡眠。月白聞號雞。欲行且復止。虎來茆葉低。

閩中作

殘年作客遍天涯。下馬長亭便似家。三疊淒涼渭城曲。數枝閑澹閩中花。雙牋授管相逢晚。理鬢熏衣一笑譁。俱是邯鄲枕中夢。陸轅不用憶京華。

又

挽住征衣爲濯塵。閩州齋釀絕芳醇。鶯花舊識非生客。山水曾遊是故人。遨樂無時冠巴蜀。語音漸正帶咸秦。平生賸有尋梅債。作意城南看小春。

遊錦屏山謁少陵祠堂

城中飛閣連危亭。處處軒窗臨錦屏。涉江親到錦屏上。卻望城郭如丹青。虛堂奉祠子杜子。眉宇高寒照江水。古來磨滅知幾人。此老至今元不死。山川寂寞客子迷。草木搖落壯士悲。文章垂世自一事。忠義凜凜令人思。夜歸沙頭雨如注。北風吹船橫半渡。亦知此老憤未平。萬竅爭號泄悲怒。

仙魚鋪得仲高兄書

病酒今朝載臥輿。秋雲漠漠雨疎疎。閩州城北仙魚鋪。忽得山陰萬里書。

自蘭復還漢中次益昌

北首褒斜又幾程。驕雲未放十分晴。馬經斷棧危無路。風掠枯茆颯有聲。季子貂裘端已弊。吳中菰菜正堪烹。朱顏漸改功名晚。擊筑悲歌一再行。

驛亭小憩遺興

淡日微雲共陸離。曲闌危棧出參差。老松臨道闌千載。杜宇號山連四時。漢水東流那有極。秦關北望不勝悲。郵亭下馬開孤劍。老大功名頗自期。

再過龍洞閣

天險龍門道。霜清客子遊。一筇緣絕壁。萬仞俯洪流。著腳初疑夢。回頭始欲愁。危身無補國。忠孝兩堪羞。

自笑

自笑謀生事事疎。年來錐與地俱無。平章春韭秋菘味。拆補天吳紫鳳圖。食肉定知無骨相。珥貂空自誑頭顱。惟餘數卷殘書在。破篋蕭然笑獠奴。

三泉驛舍

殘鐘斷角度黃昏。小驛孤燈早閉門。霜氣峭深摧草木。風聲浩蕩卷郊原。故山有約頻回首。末路無歸易斷魂。短鬢蕭蕭不禁白。強排幽恨近清罇。

嘉川舖得檄遂行中夜次小柏

黃旗傳檄趣歸程。急服單裝破夜行。肅肅霜飛當十月。離離斗轉欲三更。酒消頓覺衣裘薄。驛近先看炬火迎。渭水函關元不遠。著鞭無日涕空橫。

歸次漢中境上

雲棧屏山闕月遊。馬蹄初喜躡梁州。地連秦雍川原壯。水下荆揚日夜流。遺虜孱孱寧遠略。孤臣耿耿獨私憂。良時恐作他年恨。大散關頭又一秋。

沔陽夜行

夜發沔陽驛。坡陀岡阜重。月斜欹帽影。霜重溼裘茸。野岸鳴枯葉。煙林度曉鐘。梁州明日到。一笑解衰容。

道中累日不肉食。至西縣市中得羊因小酌。

門外倚車轅。頽然就醉昏。棧餘羊絕美。壓近酒微渾。一洗窮邊恨。重招去國魂。客中無晤語。燈燼爲誰繁。

初離興元

夔裏何曾有去來。高城無奈角聲哀。連林秋葉吹初盡。滿路寒泥踣欲開。笠澤決歸猶小憩。錦城未到莫輕回。炊菰斫脍明年事。卻憶斯遊亦壯哉。

自興元赴官成都

平生無遠謀。一飽百念已。造物戲飢之。聊遣行萬里。梁州在何處。飛蓬起孤壘。憑高望杜陵。煙樹略可指。今朝忽夢破。跋馬臨濼水。此生均是客。處處皆可死。劍南亦何好。小憩聊爾爾。舟車有通塗。吾行良未止。

書事

生長江湖狎釣船。跨鞍塞上亦前緣。雲埋廢苑呼鷹處。雪暗荒郊射虎天。醪酒芳醇偏易醉。胡羊肥美了無羶。揚州雖有東歸日。閉置車中定悵然。

雨中過臨溪古墩

道邊相送驛邊迎。水隔山遮似有情。歲晚無聊莫相笑。君方雨立我泥行。

南沮水道中

禮舍臨湍瀨。層船聚小潭。山形寒漸瘦。雪意暮方酣。久客情懷惡。頻來道路諳。家山空悵望。無夢到江南。

長木晚興

沮水嶠山名古今。聊將行役當登臨。斷橋煙雨梅花瘦。絕壩風霜檉葉深。末路清愁常袞袞。殘冬急景易駸駸。故巢東望知何處。空羨歸鴉解滿林。

遣興

貂裘破弊色淒涼。塞上歸來路更長。老驥嘶鳴常伏櫪。寒龜藏縮正支牀。彫零客路新霜鬢。掃灑先師舊草堂。九

折阪頭休絕歎。世間何地不羊腸。

長木夜行抵金堆市

夜行長木村。重霧雜零雨。溼螢黏野蔓。寒犬吠雲塢。道壞交細泉。亭廢立遺堵。時時過農家。燈火照鳴杵。嗟予獨何事。無歲得安處。卽今窮谷中。性命寄豺虎。三更投小市。買酒慰羈旅。南詠東山詩。悵望懷往古。

赴成都泛舟自三泉至益昌謀以明年下三峽

詩酒清狂二十年。又摩病眼看西川。心如老驥常千里。身似春蠶已再眠。暮雪烏奴停醉帽。秋風白帝放歸船。飄零自是關天命。錯被人呼作地仙。

壬辰十月十三日自閬中還興元遊三泉龍門十一月二日自興元適成都復攜兒曹往遊賦詩

勝地惜輕別。短筇成後遊。門呀一境異。木落四山秋。野鴿翔深竇。蟠蛟據古湫。棧危縈峭壁。橋迴跨奔流。白雨穿林至。腥風卷地浮。真成起衰病。不但洗孤愁。登陟知難再。吟哦爲小留。回頭卽萬里。雲滿戴谿舟。

予行蜀漢間道出潭毒關下每憩羅漢院山光軒今復過之悵然有感

山光軒上幾閑遊。潭毒關前又小留。麥隴雪苗寒剡剡。松林風葉暮颼颼。馬行劍閣從今始。門泊吳船亦已謀。醉眼每嫌天地迤。盡將萬里著吾愁。

棧路書事

危閣聞鈴馱。湍流見磴船。汲江人負盎。騎馬客蒙氈。梨笑來秦地。橙香接楚天。癡頑殊耐事。隨處一欣然。

雪晴行益昌道中頗有春意

杜陵雁下歲將殘。疋馬西遊雪擁關。顛顛敢忘雙鬪路。掩掩遍看兩川山。春回柳眼梅鬚裏。愁在鞭絲帽影間。安得黃金成大藥。爲人千載駐顏顏。

思歸引

善泐不如穩乘舟。善騎不如謹持轡。妙於服食。不如寡欲。工於揣摩。不如省事。在天有命誰得逃。在我無求直差易。散人家風脫糾纏。煙蓑雨笠全其天。蒹絲老盡歸不得。但坐長飢須俸錢。此身不堪阿堵役。寧待秋風始投檣。



山林聊復取熊掌。仕宦真當棄雞肋。錦城小憩不淹邊。即是輕舸下峽時。那用更爲麟閣夢。從今正有鹿門期。  
誌公院在劍門東五里院東石壁間有若僧負杖者杖端髻髯有刀尺拂子之狀

江東爭奪纏妖祲。哀哉斯民亂方甚。錦幪老人蓋古佛。現身爲作大慈蔭。蕭翁八十尙兒癡。旛蓋鍾螺鬧中禁。當時此老默笑渠。大法棟梁身獨任。杖頭示人三轉語。開口喪身如飲鴆。紛紛放弒但可憐。何曾爲汝陳符讖。

劍門道中遇微雨

衣上征塵雜酒痕。遠遊無處不消魂。此身合是詩人未。細雨騎驢入劍門。

劍門關

劍門天設險。北鄉控函秦。客主固殊勢。存亡終在人。棧雲寒欲雨。關柳暗知春。羈客垂垂老。憑高一愴神。

劍門城北回望劍關諸峯青入雲漢感蜀亡事慨然有賦

自昔英雄有屈信。危機變化亦逡巡。陰平窮寇非難禦。如此江山坐付人。

丹芝行

劍山峨峨插穹蒼。千林萬谷蟠其陽。大丹九轉古所藏。靈芝三秀夜吐光。如火非火森有芒。朝陽欲升尙煌煌。何由斲取換肝腸。往駕素虬朝紫皇。

過武連縣北柳池安國院袁泉試日鑄顧渚茶院有二泉皆甘寒傳云唐僖宗幸蜀在道不豫至此飲泉而愈賜名報國靈泉云

滴憑珠瓊翠壁間。遭時曾得奉龍顏。欄傾甃缺無人管。滿院松風晝掩關。

又

行殿淒涼迹已陳。至今父老記南巡。一泓寒碧無今古。付與閑人作主人。

又

我是江南桑苧家。汲泉閑品故園茶。只應碧缶蒼鷹爪。可壓紅囊白雪芽。日鑄貯以小瓶。蠟紙丹印封之。願儲貯以紅藍綠蠶。皆有齒頁。

宿武連縣驛

平日功名浪自期。頭顱到此不難知。宦情薄似秋蟬翼。鄉思多於春繭絲。野店風霜做裝早。縣橋燈火下程遲。鞭寒熨手戎衣窄。忽憶南山射虎時。

初入西州境述懷

我無飛仙術。御氣周八極。寸步常依人。艱哉萬里役。自行劍關南。大道平如席。日高徐駕車。薄暮亦兩驛。及茲山愈遠。原野若加闊。茂樹冬不凋。寒花晚猶拆。昔我卜遠遊。至蜀龜輒食。弛裝有定處。嗚呼豈人力。頗傳岷山下。清淑無癘疫。士風尚豪舉。意氣喜遠客。新米家可求。借書亦易得。思吳雖不忘。所願少休息。吾聞古達人。雅志在山澤。豈無及物心。但恨俗褊迫。攬德雖成留。引去常勇決。駭機滿人間。著腳無上策。

綿州魏成縣驛有羅江東詩云芳草有情皆礙馬好雲無處不遮樓戲用其韻

老夫乘輿忽西遊。遠跨秦吳萬里秋。尊酒登臨遍山寺。歌辭散落滿江樓。孤城木葉蕭蕭下。古驛灘聲瀾瀾流。未許詩人誇此地。茂林脩竹憶吾州。

卽事

渭水岐山不出兵。卻攜琴劍錦官城。醉來身外窮通小。老去人間毀譽輕。捫蝨雄豪空自許。屠龍工巧竟何成。雅聞嶠下多區芋。聊試寒爐玉糝羹。

青村寺

十年淹泊望修門。臨水登山幾斷魂。短鬢星星身欲老。小樓微月宿青村。

行綿州道中

三年客江峽。萬死脫魚鼈。平地從今始。窮塗敢復論。園畦棋局整。坡壠海濤翻。瘦犢應多恨。泥塗伏短轅。

越王樓

上盡江邊百尺樓。倚欄極目暮江秋。未甘便作衰翁在。兩腳猶堪躡九州。

又

葡萄酒綠似江流。夜燕唐家帝子樓。約住管絃呼羯鼓。要渠打散醉中愁。

東津

歲暮涪江水歸壑。白沙渺然石壘确。蜀天常煥少雪霜。綠樹青林不搖落。闌干詰曲臨官道。煙靄參差望城郭。打魚斫脍修故事。豪竹哀絲奉歡樂。樂莫樂於新相知。笑人一笑回春姿。四方本是丈夫事。安用一生無別難。

東山

今日之集何佳哉。入關劇飲始此回。登山正可小天下。跨海何用尋蓬萊。青天肯爲陸子見。妍日似趣梅花開。有酒如涪綠可愛。一醉直欲空千壘。颺酥鵝黃出隴右。熊肪玉白黔南來。眼花耳熱不知夜。但見銀燭高花摧。京華故人死太半。歡極往往往濟生哀。聊將豪縱壓憂患。鼓吹動地聲如雷。

綿州錄參軍廳觀姜楚公畫鷹少陵爲作詩者

我來訪古涪之濱。不辭百罔冀一真。走馬朝尋海樓館。斫脍夜醉筋魚津。越王高樓亦已換。俯仰今古堪悲辛。督郵官舍最卑陋。棟撓極腐知幾春。巋然此壁獨亡恙。老槎勁翮完如新。向來劫火何自免。叱呵守護疑有神。妖狐九尾穴中國。共置不問如越秦。天時此物合致用。下韝指呼端在人。會當原野灑毛血。坐令萬里清煙塵。老眼還憂不及見。詩成肝膽空輪囷。

羅江驛翠望亭讀宋景文公詩

撲馬征塵拂不開。高亭欹帽一徘徊。蜀山地暖稀逢雪。閩歲春遲未見梅。陂水近人無鷺下。煙林藏寺有鐘來。朱公出牧曾題壁。錦段雖殘試剪裁。

鹿頭關過龐士元廟

士元死千載。凄惻過遺祠。海內常難合。天心豈易知。英雄今古恨。父老歲時思。蒼薛無情極。秋來滿斷碑。

遊漢州西湖

房公一跌叢衆毀。八年漢州爲刺史。遠城鑿湖一百頃。島嶼曲折三四里。小菴靜院穿竹入。危樹飛樓壓城起。空蒙煙雨媚松楠。顛倒風霜老葭葦。日月苦長身苦閑。萬事不理看湖水。向來愛琴雖一癖。觀過自足知夫子。畫船

載酒凌湖光。想公樂飲千萬場。歎息風流今未泯。兩川名醜避鵝黃。鵝黃漢中酒名。蜀中無能及者。

嚴君平卜臺

先生久已蛻氛埃。道上猶傳舊卜臺。乞得寒泉濯肝肺。真成萬里不虛來。臺後有大井。名曰仙井。相傳君平所鑿。

梅花

家是江南友是蘭。水邊月底怯新寒。畫圖省識驚春早。玉笛孤吹怨夜殘。冷淡合教閑處著。清臞難遣俗人看。相逢剩作樽前恨。索笑情懷老漸闌。

拜張忠定公祠二十韻

張公世外人。與蜀偶有緣。天將靖蜀亂。生公在人間。厥初大盜興。樂禍迭相捩。天子輟玉食。貴臣擁戎旆。生殺出喜怒。死者常差肩。公曰此何哉。從之吾欺天。河流觸地軸。砥柱屹不遷。奮從盡縱捨。飛章交帝前。上意竟開悟。至仁勝兇殘。貴臣不極賞。追還黜其權。安危關社稷。豈惟蜀民全。後來有阿童。握兵事開邊。晚策睦州功。上公珥金蟬。勢張不可禦。北鄉挑幽燕。神京遂邱墟。迄今天步艱。時無忠定公。孰能折其奸。我來拜遺祠。喬木含蒼煙。死者不可作。愀然衰涕潛。憤切感虜禍。慷慨思公賢。春秋送迎神。誰爲歌此篇。

成都歲暮始微寒小酌遣興

革帶頻移紗帽寬。茶鐺欲熟篆香殘。疎梅已報先春信。小雨初成十月寒。身似野僧猶有髮。門如村舍強名官。鼠肝蟲臂元無擇。遇酒猶能罄一歡。

再賦梅花

老來愛酒賸狂顛。况復梅花到眼邊。不怕幽香妨靜觀。正須疎影伴癡仙。松筠共歎冰霜晚。桃李從教雨露偏。此去西湖八千里。破愁一笑得無緣。

登塔

冷官無一事。日日得閑遊。壯哉千尺塔。攝衣上上頭。眼力老未減。足疾新有瘳。幸茲濟勝具。俯仰隘九州。雪山西北橫。大江東南流。畫棟雲飛涌。鐵鐸風聲遒。旅懷忽惻愴。涕下不能收。十年辭象魏。萬里懷松楸。仰視去天咫。絕

叫當聞不。帝閣守虎豹。此計終悠悠。

先主廟次唐貞元中張儼詩韻

猾賊挾至尊。天命矜在己。豈知高帝業。煌煌漢中起。

又

吳蜀本唇齒。悲哉乃連兵。盡銳下三峽。誰使復兩京。

又

洛陽化爲灰。棘生銅駝陌。討賊志不成。父老泣陵柏。廟在惠陵側。

睡起書事

京華豪飲醕千鍾。濯錦江邊怯酒濃。烈士壯心雖未減。狂奴故態有誰容。折梅著句聊排悶。閉戶焚香剩放慵。午枕如雷君莫怪。西風吹夢過吳松。

西郊尋梅

西郊梅花矜絕艷。走馬獨來看不厭。似羞流落蒙市塵。寧墮荒寒傍茆店。翛然自是世外人。過去生中差一念。淺顰常鄙桃李學。獨立不容鶯蝶覘。山礬水仙晚角出。大是春秋吳楚僭。餘花豈無好顏色。病在一俗無由砭。朱欄玉砌渠有命。斷橋流水君何欠。嗟余相與頗同調。身客劍南家在剡。淒涼萬里歸無日。蕭颯二毛衰有漸。尙能作意晚相從。爛醉不辭盃澁澁。

分韻作梅花詩得東字

殘寒籬落清霜後。疎影池塘淡月中。北客同春俱稅駕。南枝與我兩飄蓬。從來遇酒千鍾少。此外評花四海空。惟恨廣平風味減。坐看徐庾擅江東。

宇文子友聞予有西郊尋梅詩以詩借觀次其韻

拾遺遺跡付緇郎。槁葉凝塵欲滿堂。已恨罽毼孤勝踐。更堪風雨病幽芳。蘭蓀千古有同調。蜂蝶一春空自忙。馬上得詩歸絕歎。故園三徑久成荒。

原  
书  
缺  
页

原  
书  
缺  
页

瀟然酒病兩無聊。小篆吹香已半消。喚起十年闍嶺夢。蘋桐花畔見紅蕉。蘇軾。嘉州謂之百日紅。

荔枝樓小酌

碧瓦朱欄已半摧。強呼歌舞試樽罍。邦人莫訝心情嬾。新出鸞花海裏來。

又

病與愁兼怯酒船。巴歌聞罷更悽然。此身未死長爲客。回首夔州又二年。

嘉陽官舍奇石甚富散棄無領略者予始取作假山因名西齋曰小山堂爲賦短歌

昔人何人愛巖壑。爲山未成儲犖确。散落支床壓酒槽。大或專車小拳握。幽人邂逅爲絕歎。脩綆趣取寒泉濯。峭峯幽竇相吐吞。翠嶺丹崖渺聯絡。石不能言意可解。問我胡爲憐寂寞。人間與廢自有數。昔棄何傷今豈樂。斯言妙矣予則陋。敢對石友辭罰爵。爲君寬作十日留。在眼便同真著腳。

望雲樓晚興

小閣東南獨詠詩。此生終與世差池。夕陽明處蒼煙合。樓燕歸時畫角悲。人與江山均是夢。心非風月尙誰知。舊交幾歲音塵隔。三撫闌干有所思。

護國天王院故神霄玉清萬壽宮也廢圮略盡而規模尙極壯麗過之有感

太霄帝君神霄府。一日靈書行海寓。築宮奔走誰敢後。萬牛挽材山作礎。步虛夜半落雲間。玉磬謬謬鸞鶴舞。帝師丞相領使名。侍晨校籍紛如雨。洛陽臨淮小脾睨。御史立奏投裔土。從來桑門喜嘲競。舉國冠巾噤無語。古傳東海會揚塵。君看此地亦荆棘。覽旌仙仗空遺堵。甃缺臺傾知幾春。牧兒驅牛醫庭草。誰記劍佩來朝真。斜陽卻上筍輿去。溝水冷冷愁殺人。

登荔枝樓

平羌江水接天流。涼入簾櫳已似秋。喚作主人元是客。知非吾土強登樓。閑憑曲檻常忘去。欲下危梯更小留。公事無多廚釀美。此身不負負嘉州。薛能詩。不負嘉州只負身。

再賦荔枝樓



只道文書撥不開。未妨高處獨徘徊。山橫瓦屋披雲出。水自牂牁裂地來。暝入簾陰吹細雨。涼生樓角轉輕雷。癡頭也擬忘鄉國。不奈城頭暮角哀。

能仁院前有石像丈餘。蓋作大像時樣也。

江閣欲開千尺像。雲龕先定此規模。斜陽徙倚空三歎。嘗試成功自古無。

### 卷四

謁凌雲大像

出郭幽尋一笑新。徑呼艇子截煙津。不辭疾步登重閣。聊欲今生識偉人。泉鏡正涵螺髻綠。浪花不犯寶趺塵。一泉泓然正在髻下。每歲漲水。不能及佛足。始知神力無窮盡。丈六黃金果小身。觀無量壽經云。或現小身丈六八尺。

凌雲醉歸作

峨嵋月入平羌水。歎息吾行俄至此。謫仙一去五百年。至今醉魂呼不起。玻瓈春滿琉璃鍾。玻黎春。眉州酒名。宦情苦薄酒與濃。飲如長鯨渴赴海。詩成放筆千觴空。十年看盡人間事。更覺麴生偏有味。君不見蒲萄一斗換得西涼州。不如將軍告身供一醉。

獨游城西諸僧舍

我是天公度外人。看山看水自由身。蘇崖直上飛雙屐。雲洞前頭岸幅巾。萬里欲呼牛渚月。一生不受庾公塵。非無好客堪招喚。獨往飄然覺更真。

西林院

一邦盡對江邊像。試比西林總不如。院門對大像最正。羣玉蕭森開土宅。五雲飛動相君書。寺額五字。唐相裴翊書。遺矣可愛。磴危漸覺山爭出。屐響方驚閣半虛。安得棄官長住此。一盃香飯薦珍蔬。

聽事前紫薇花二本甚盛戲題絕句

紅藥紫薇西省春。從來惟慣對詞臣。閭囚自是龔官分。無奈名花解笑人。

同何元立蔡肩吾至東丁院汲泉煮茶

一州佳處盡裴回。惟有東丁院未來。身是江南老桑苧。諸君小住共茶盃。

又

雪芽近自峨眉得。不減紅囊顧渚春。旋置風爐清樾下。它年奇事記三人。

癸巳夏旁郡多苦旱。惟漢嘉數得雨。然未足也。立秋夜三鼓雨。至明日晡後未止。高下霑足。喜而有賦。畫簷鳴雨早秋天。不喜新涼喜有年。眼裏香秔三萬頃。寄聲父老共欣然。

又

五十衰翁髮半華。猶能把酒醉天涯。絲毫美政何曾有。惟把豐年贈漢嘉。

晚登望雲

一出修門又十年。輩流多已珥金蟬。衰如蠹葉秋先覺。愁似鰥魚夜不眠。輦路疎槐迎駕處。苑城殘日泛湖天。君恩未報身今老。徙倚危樓一恹然。

又

晚來煙雨暗江干。烽火遙傳畫角殘。看鏡功名空自許。上樓懷抱若爲寬。青楓搖落新秋令。白髮淒涼舊史官。鮑見少年輕宿土。可憐隨處強追歡。

立秋後十日風雨淒冷獨居有感

急雨鳴瓦溝。尖風入窗罅。紗籠耿青燈。寂寂新秋夜。誰言簿領中。乃復有此暇。稍繙書冊讀。已念灰火跨。那知是羈客。恍若在家舍。睡晚且熟眠。洗沐官有假。明日晦日也。

晦日西窗懷故山

今朝休日仍無客。茶罷西窗臥解衣。白髮已侵殘夢境。綠苔應滿舊漁磯。桃源雞犬塵凡隔。杜曲桑麻夢想歸。賴有小山聊慰眼。幽篁叢桂雨霏霏。

秋日懷東湖

小閣東頭罨畫池。秋來長是憶幽期。身如葉燕臨歸日。心似堂僧欲動時。病思羈懷惟付酒。西風落日更催詩。故知歲暮常多感。不獨當年宋玉悲。

又

罨畫池邊小釣磯。垂竿幾度到斜暉。青蘋葉動知魚過。朱閣簾開看燕歸。歲晚官身空自悶。途窮世事巧相違。邊州客少巴歌陋。誰與愁城略解圍。

小山之南作曲欄石磴繚繞如棧道戲作二篇

羈遊隨處得哦詩。掃甃軒窗每恨遲。已幻小山寬客恨。更添危磴作兒嬉。偶留塞上寧無數。徑返湖邊已有期。誰遣化工娛此老。幽花微拆綠苔滋。

又

更退庭空剩得閑。一窗如在翠微間。半崖縈棧遊秦路。疊嶂生雲入剡山。真有巖居臨絕壑。但無漁艇繫寒灣。躋攀自苦君休笑。寸步何曾不險艱。

得成都諸友書勸少留嘉陽戲作

一坐五十日。癡頑良可哀。新涼爲醉地。少訟作慵媒。市柳風煙慘。汀蘋歲月催。遠官從漫浪。垂老嬾低回。市柳汀蘋皆屬唐安。

道院

四壁長苔痕。經旬掩綠樽。雨聲清夢境。燈影伴吟魂。搖落悲徂歲。漂流憶故園。擬騷無傑語。千古愧湘沅。

醉中感懷

早歲君王記姓名。只今顛顛客邊城。青衫猶是鷓鴣行。白髮新從劍外生。古戍旌旗秋慘淡。高城刁斗夜分明。壯心未許全消盡。醉聽檀槽出塞聲。

玻璃江眉州共飲亭蓋取東坡共飲玻璃江之句追懷舊遊戲作以補西州樂府

玻璃江水千尺深。不如江上離人心。君行未過青衣縣。妾心先到峨眉陰。金罇共酌不知曉。月落煙渚天橫參。車輪無角那得住。馬蹄不方何處尋。空憑尺素寄幽恨。縱有絳綸誰知音。愁來只欲掩屏睡。無奈夢斷聞疎砧。古樂府。安得雙車輪。一夜生四角。唐人詩云。長安塵土中。馬蹄到處重。駟馬蹄不方。何處認郎蹤。

夜思

蒼顏華鬢久低摧。歎息何堪歲月催。殘暑已隨團扇去。新涼還傍短檠來。月痕澹澹侵苔砌。雲葉蕭蕭覆水臺。薄領沈迷無日了。試憑詩思洗氛埃。

兩夜懷唐安

歸心日夜逆江流。官柳三千憶蜀州。小閣簾櫳頻夢蝶。平湖煙水已盟鷗。螢依溼草同爲旅。雨滴空階別是愁。堪笑邦人不解事。區區猶借陸君留。蜀人舊語。謂唐安有二千官柳。四千琵琶。溼草依草沒。梅宛陵詩。

迎詔書

憶瞻鑾仗省門前。扇影鞭聲下九天。寂寞嘉州迎詔處。忽聞鼓吹卻悽然。

秋夜遣懷

江雲傍簷山雨細。羈客空堂臥荒鷺。心如秋燕不安巢。迹似春萍本無抵。官身奔走何時定。病眼朦朧誰欲閉。壯遊不復記墜鞭。夜語誰能懷擁髻。詩情已減但微吟。酒戒漸堅纔小噉。從今更擬著幽禪。半世佞俚真誤計。

送客至江上

多事經旬不出城。今朝送客此閑行。郊原遠帶新晴色。人語中含樂歲聲。天際斂雲山盡出。江流收漲水初平。故園社友應惆悵。五歲無端棄耦耕。

雨中至西林寺

胸中荆棘費鉏耜。正藉幽尋暫解紛。不盡長江來畫玉。半空飛閣對凌雲。昏昏橫霧憑軒見。杳杳疎鐘隔岸聞。珍重山僧迎客意。螭奩一縷起微熏。小軒下臨竿江。發源自大渡河。

休日登花將軍廟小樓

林間縹緲出層樓。欄角蒼茫萬頃秋。曾是胸中著雲夢。不妨此地少遲留。

深居

作吏難堪簿領迷。深居聊復學幽棲。病來酒戶何妨小。老去詩名不厭低。零落野雲寒傍水。霏微山雨晚成泥。自憐甫里家風在。小摘殘蔬遶廢畦。

秋夜獨醉戲題

弊袍羸馬遍天涯。恰似伶優著處家。社甕嫩醅初泛蟻。寒缸殘燼自成花。幽窗照影烏巾折。醉手題詩淡墨斜。莫恨久爲蛾下客。江湖歸去得雄誇。

感事

清班曾見六龍飛。晚落天涯遠日畿。邊月空悲新雪鬢。京塵猶染舊朝衣。江山壯麗詩難敵。風物蕭條醉絕稀。賴有東湖堪吏隱。寄聲籬菊待吾歸。

醉鄉

醉鄉卜築亦佳哉。但苦無情白髮催。癡欲煎膠黏日月。狂思入海訪蓬萊。辭巢歸燕先秋去。泣露幽花近社開。莫惜傾家供作樂。古人白骨有蒼苔。

夜讀岑嘉州詩集

漢嘉山水邦。岑公昔所寓。公詩信豪偉。筆力追李杜。常想從軍時。氣無玉關路。公詩多從戎。西邊時所作。至今蠶簡傳。多昔橫槩賦。零落財百篇。崔嵬多傑句。工夫刮造化。音節配韶護。我後四百年。清夢奉巾屨。晚途有奇事。隨牒得補處。羣胡自魚肉。明主方北顧。誦公天山篇。流涕思一遇。

次韻師伯渾見寄

眉山漢嘉東西州。估船日日到津頭。不得講書一行字。倚遍臨江百尺樓。黃鐘大呂忽復見。繡段英瑤何足酬。願約青神王夫子。來醉萬景作中秋。

社前一夕未昏輒寢中夜乃得寐

祠事當行懼不任。未昏強臥擁孤衾。三更自笑元無睡。萬事從來忌有心。簷角河傾秋耿耿。牀頭蟲語夜愔愔。若耶溪上蘋花老。倦枕何人聽越吟。

晚雨

蕭瑟度橫塘。霏微映繚牆。壓低塵不動。灑急土生香。聲入楸梧碎。清分枕簟涼。回頭忽陳迹。簷角挂斜陽。

社日

百穀登場酒滿卮。神林簫鼓晚清悲。蟬依疎柳長言處。燕委空巢大去時。幼學已忘那用忌。鄉俗小兒女社日忌習業。微孽自樂不須醫。古謂社酒治蠶。傷心故里雞豚集。父老逢迎正見思。

夜雨感懷

老來每惜歲崢嶸。幾爲巴歌判宿醒。白帝草生時入夢。錦官花重更關情。簾疎夜雨侵燈疊。枕冷秋風遞角聲。定許何時理歸棹。酒狂猶解賦蕪城。

八月二十二日嘉州大閱

陌上弓刀擁寓公。水邊旌旆卷秋風。書生又試戎衣窄。山郡新添畫角雄。郡舊止角四枝。近方增如式。早事樞庭。虛畫策。晚遊幕府媿無功。草間風輩何勞磔。要挽天河洗洛嵩。

九月六夜夢中作笑詩覺而忘之明日戲追補一首

吾家笑疾自士龍。我才雖卑笑則同。紛紛世事何足計。盡付撫掌掀髯中。清樽可醉風月好。虛空萬象皆絕倒。問君此笑是喜不。道得老夫輸一籌。

重九會飲萬景樓

粲粲黃花手持。登高聊答此佳時。纖雲不作看山祟。斗酒聊寬去國思。落日樓臺頻徙倚。西風鼓笛倍淒悲。彭城戲馬平生意。強爲巴歌一解頤。是日作竹枝歌舞。

久客書懷

行役飽看山。沉綿剩得閑。忘憂緣落魄。耐老爲癡頑。射虎臨秦塞。騎驢入蜀關。芳洲蘭可佩。幽磴桂堪攀。欸乃聲

繞楚。限隔句帶蠻。嘉州帶哀董諸蠻。悠然長自遣。故里幾時還。

初報嘉陽除官還東湖有期喜而有作

塞上經秋幾醉醒。羈愁滅盡鬢邊青。烽傳八詔登樓看。歌奏三巴忍淚聽。好語忽聞還印綬。歸心先已繞林垌。呼兒結東從今日。鵲語燈花故有靈。累夕燈有花。今早釀登遠舍。皆紀實事。

聞勾龍司戶會客山亭送酒殺及橄欖并簡諸同僚

東山如高人。吾輩豈易見。君獨不出門。終日與相面。陰晴煙雨月。朝暮知幾變。聞君交不瀆。冠佩未嘗燕。弛張要  
有時。一笑山未譴。高秋得佳日。折簡喚諸彥。風流非俗飲。歌舞參筆硯。但恨五日尹。阻造三語掾。余力臥疾。清樽  
遣分似。霜果亦可薦。爛醉君勿辭。光景真掣電。

九月十六日夜夢駐軍河外遣使招降諸城覺而有作

殺氣昏昏橫塞上。東竝黃河開玉帳。晝飛羽檄下列城。夜脫貂裘撫降將。將軍檄上汗血馬。猛士腰間虎文鞞。階  
前白刃明如霜。門外長戟森相向。朔風卷地吹急雪。轉盼玉花深一丈。誰言鐵衣冷徹骨。感義懷恩如挾纊。腥臊  
窟穴一洗空。太行北嶽元無恙。更呼斗酒作長歌。要遣天山健兒唱。

何元立示九日詩臥病累日乃能次韻

何郎戲寫菊花秋。落筆縱橫豈易酬。豪士乃能爲老伴。寓公那得稱遨頭。早衰不耐危亭冷。夜冷。凭席翁亭欄杆。  
得疾數日。獨臥空驚畫角愁。病起尙思尋宿約。一樽從子醉東樓。

成都行

倚錦瑟。擊玉壺。吳中狂士遊成都。成都海棠十萬株。繁華盛麗天下無。青絲金絡白雪駒。日斜馳遣迎名姝。燕脂  
褪盡見玉膚。綠鬢半脫嬌不梳。吳綾便面對客書。斜行小草密復疎。墨君秀潤瘦不枯。風枝雨葉筆筆殊。月浸羅  
裳清夜徂。滿身花影醉索扶。東來此歡墮空虛。坐悲新霜點鬢鬚。易求合浦千斛珠。難覓錦江雙鯉魚。

聞虜亂有感

前年從軍南山南。夜出馳獵常半酣。玄熊蒼兕積如阜。赤手曳虎毛毵毵。有時登高望鄠杜。悲歌仰天淚如雨。頭

顧自揣已可知。一死猶思報明主。近聞索虜自相殘。秋風撫劍淚洶瀾。雒陽入陵那忍說。玉座塵昏松栢寒。儒冠忽忽垂五十。急裝何由穿袴褶。羞爲老驥伏櫪悲。寧作枯魚過河泣。古樂府枯魚詩云。枯魚過河泣。何時復還入。作書與勛諫。相教謹出入。

### 醉歌

我飲江樓上。闌干四面空。手把白玉船。身遊水精宮。方我吸酒時。江山入胸中。肺肝生崔嵬。吐出爲長虹。欲吐輒復吞。頗畏驚兒童。乾坤大如許。無處著此翁。何當呼青鸞。更駕萬里風。

### 初寒

江路常逢雨。山城早得寒。蘭凋初解佩。菊老尙加餐。嘉陽有崇蘭。以八九月盛開。節物知何負。情懷自鮮歡。浮生看已熟。不必夢邯鄲。

### 木山

枯楠千歲遭風雷。披枝折幹吁可哀。輪囷無用天所赦。秋水初落淨江來。嵌空宛轉若耳聾。峭瘦拔起何崔嵬。珠宮貝闕留不得。忽出洲渚知誰推。書窗正對雲洞啓。叢菊初傍幽篁栽。是間著汝頗宜稱。摩挲朝暮真千回。天公解事兩十日。洗盡泥滓滋葑苔。一丘一壑吾所許。不須更慕明堂材。

### 寒夜遣懷

臨觴本不飲。憂多自成醉。四方行萬里。不見埋憂地。憶昔入京都。寶馬搖香鬃。酣飲青樓夜。歌聲在半空。去日不可挽。華髮忽垂頰。娟娟峨眉月。相對作淒冷。月落照空牀。不寐聽寒蟬。早知憂隨人。何用去故鄉。

### 嘉陽絕無木屋偶得一枝戲作

久客紅塵不自憐。眼明初見廣寒仙。只饒籬菊同時出。尙占江梅一著先。重露溼香幽徑曉。斜陽烘蕊小窗妍。何人更與蒸沉水。金鴨華燈惱醉眠。

### 兩後登西樓獨酌

老覺人間無一欣。強尋高處看歸雲。天空列嶂開圖畫。水落寒江學篆文。四海道途行泰半。百年光景近中分。交



遊賴有貓生在。正向愁時能策勳。

喜晴

西風吹雨冷淒淒。道上行人白晝迷。聊挾重雲取朝日。未容嘉穀臥秋泥。年豐郡府疏文檄。蠻遁邊亭息鼓鼙。寄語農家莫遊惰。冬閑正要飽鉏犁。

曉出城東

渺渺長江下估船。亭亭孤塔隱蒼煙。不堪異縣蕭條地。更遇初寒慘澹天。中褐已成歸有約。箠瓢未足去無緣。包羞強索侏儒米。豪舉何人記少年。

寶劍吟

幽人枕寶劍。殷殷夜有聲。人言劍化龍。直恐異風竄。不然憤狂虜。慨然思遠征。取酒起酹劍。至寶當潛形。豈無知君者。時來自施行。一匣有餘地。胡爲鳴不平。

十月一日浮橋成以故事宴客凌雲

陰風吹雨白晝昏。誰掃雲霧升朝暉。三江水縮獻洲渚。九頂秀色欲塞門。西山下竹十萬箇。江面便可馳車轅。巷無居人亦何怪。釋耒來看空山村。竹枝短轉秋猿苦。桑落微灑春泉渾。衆賓共醉忘燭跋。一徑卻下緣雲根。走沙人語若潮卷。爭橋炬火如星繁。肩輿睡兀到東郭。空有醉墨留衫痕。十年萬事俱變滅。點檢自覺惟身存。寒燈夜永照耿耿。臥賦長句招羈魂。

聞王嘉叟訃報有作

嗚呼嘉叟今信死。哭君寢門淚如水。我初入都都不妄交。傾倒如君數人耳。籠燈躡雪夜相過。劇論懸河駭鄰里。地爐燔栗美芻豢。石鼎烹茶當醪醴。上書去國何勇決。作詩送君猶壯偉。十年偶復過都門。君方草制西垣裏。鬢髮班白面骨生。心頗疑君遠如此。西來例不候達官。每欲寄聲中輒止。隻雞絮酒縱有時。雙魚素書長已矣。生前客履紛滿戶。身後人情薄於紙。懸知海內莆陽公。獨念遺孤爲經紀。

出城至呂公亭按視修堤

翠竊橫山澹日昇。孤亭聊借曲欄憑。霜威漸重江初縮。農事方休役可興。重阜護城高歷歷。千夫在野築登登。窮公僅踵前人迹。伐石西山恨未能。西州築堤巖竹貯紅石。不二年輒壞。意謂如吳中取大石鑿成。則可支久。異日當有辨此者。

登樓

從來好境過人間。無奈勞生自欠閑。江近時時吹白雨。樓高面面看青山。歌聲哀怨傳三峽。行色淒涼帶百蠻。嘉陵近諸蠻。流落愛君心未已。夢魂猶綴紫宸班。

醉中作

晚途豪氣未低摧。一飲猶能三百盃。爛爛目光方似電。齟齬鼻息忍如雷。

又

駕鶴孤飛萬里風。偶然來憩大峨東。持盃露坐無人會。要看青天入酒中。

又

會賜琳腴白玉京。狂歌起舞蜀人驚。卻騎黃鶴橫空去。今夕垂虹醉月明。

又

畫角三終夜未闌。詩憑飛閣喜天寬。月明滿地江風急。吹落幽人紫綺冠。

觀大散關圖有感

上馬擊狂胡。下馬草軍書。二十抱此志。五十猶癯儒。大散陳倉間。山川鬱盤紆。勁氣鍾義士。可與共壯圖。坡陀咸陽城。秦漢之故都。王氣浮夕靄。宮室生春蕪。安得從王師。汛掃迎皇輿。黃河與函谷。四海通舟車。士馬發燕趙。布帛來青徐。先當營七廟。次第畫九衢。偏師縛可汗。傾都觀受俘。上壽太安宮。復如正觀初。丈夫畢此願。死與蟻螻殊。志大浩無期。醉膽空滿臚。

嘉州守宅舊無後園因農事之隙爲種花草亭觀甫成而歸戲作長句

吾州山水西州冠。正欠雄樓并傑觀。奇峯秀嶺待彈壓。明月清風須判斷。三峨舊不到郡齋。創爲詩人供几案。煙

雲舒卷水墨圖。草木青紅錦繡段。一時冠蓋共登臨。百年父老俱驚惋。榮回舞袖試弓彎。宛轉歌聲學珠貫。佳人蜂蝶爭邊鬢。上客龍蛇看揮翰。寓公雖作一月留。梅發東湖歸思亂。兒戲聊成此段奇。陳迹應留後人歎。明朝艇子拆平菑。卻伴謫仙遊汗漫。

連日扶病領客殆不能支。枕上懷故山偶成。

已強迂疎假印章。更扶衰病主盃觴。功名已判初心負。豪俠都無故態狂。靜覺此身猶外物。懶思與世永相忘。清泉白石生來事。曲几明窗味最長。

余往與宇文叔介同客山南。今年叔介客死臨安。十月十一日夜忽夢相從。取架上書共讀如平生讀未竟。忽辭去留之不可。曰欲歸。枝藥方既覺。依然不能已。因賦此詩。

羶魂顛顛遠相尋。髀斷肩寒帶苦吟。歸枝藥方緣底事。知君死抱濟時心。

金錯刀行

黃金錯刀白玉裝。夜穿浮扉出光芒。丈夫五十功未立。提刀獨立願入荒。京華結交盡奇士。意氣相期共生死。千年史策恥無名。一片丹心報天子。爾來從軍天漢濱。南山曉雪玉嶙峋。嗚呼楚雖三戶能亡秦。豈有堂堂中國空無人。

言懷

蘭碎作香塵。竹裂成直紋。炎火熾崑岡。美玉不受焚。孤生抱寸志。流離敢忘君。釀桂餐菊英。潔齋三沐熏。孰云九關遠。精意當徹聞。捐軀誠有地。賈勇先三軍。不然齋恨死。猶冀揚清芬。願乞一棺地。葬近要離墳。

十月十九日與客飲。忽記去年此時。自錦屏歸山南道中。小獵。今又將去。此矣。

去年縱獵韓壇側。玉鞭自探南山雪。今年痛飲蜀江邊。金盃卻吸峨眉月。竹枝歌舞新教成。凄怨傳得三巴聲。城頭築觀出雲雨。峨眉正與闌干平。酒酣詩就擲盃去。醉蹋玻璃江上路。懸知幽澗斷橋邊。已有梅花開半樹。

冬日

短景忽忽過。新寒麀麀來。客遊聊戲耳。世事亦悠哉。綠動連村麥。香吹到處梅。錦城花柳窟。歸去看春回。

十月十四夜月終夜如畫

月從海東來。徑尺鎔銀盤。西行到峨眉。玉宇萬里寬。幽人耿不寐。弄影清夜闌。五城十二樓。漂渺香霧間。不知何仙人。亭亭倚高寒。欲語不得往。悵望冰雪顏。叩頭儻見哀。容我躡素鸞。掬露以爲漿。屑玉以爲餐。冷冷漱齒頰。皓濯肺肝。逝將從君遊。人間苦無歡。

下元日五更詣天慶觀寶林寺

朝罷琳宮謁寶坊。強扶衰疾具簪裳。擁裘假寐籃輿隱。夾道吹煙樺炬香。樓外曉星猶磊落。山頭初日已蒼涼。嗚騶應有高人笑。五斗驅君早夜忙。

梅花

老厭紛紛漸鮮歡。愛花聊復客江干。月中欲與人爭瘦。雪後偷憑笛訴寒。野艇幽尋驚歲晚。紗巾亂插醉更闌。尤憐心事淒涼甚。結子青青亦帶酸。

又

月地雲階暗斷腸。知心誰解賞孤芳。相逢只怪影亦好。歸去始驚身染香。渡口耐寒窺淨綠。橋邊凝怨立昏黃。與卿俱是江南客。剩欲尊前說故鄉。

又

玄冥行令肅冰霜。牆角疎梅特地芳。屑玉定煩修月戶。堆金難買破天荒。了知一氣環無盡。坐笑千林凍欲僵。力量世間誰得似。挽回歲律放春陽。

又

折得名花伴此翁。詩情恰在醉魂中。高標不合塵凡有。尤物真窮造化功。霧雨更知仙骨別。鉛丹那悟色塵空。前身姑射疑君是。問道端須順下風。

西園

半掩朱門辭徑斜。翠屏繡谷忽給鈇。高高低下天成景。密密疎疎自在花。江近夕陽迎宿鷺。林昏殘角促歸鴉。吾

舟已繫津南岸。喚客猶能一笑譁。

胡無人

鬚如蝟毛磔。面如紫石稜。丈夫出門無萬里。風雲之會立可乘。追奔露宿青海月。奪城夜踰黃河冰。鐵衣度磧兩颯颯。戰鼓上隴雷憑憑。三更窮虜送降款。天明積甲如丘陵。中華初識汗血馬。東夷再貢霜毛鷹。羣陰伏。太陽昇。胡無人。宋中興。丈夫報主有如此。笑人白首蓬窗燈。

公無渡河聞雅安守頌死於嘉陵江代其家人作

大莫大於死生。親莫親於骨肉。河不可憑兮。非有難知。言之不從兮。繼以痛哭。望雲九井兮。白浪嵯峨。劓肝憑血兮。不從奈何。秋風颯颯兮。紙錢投波。從公於死兮。下鮑蛟鼉。

長門怨

寒風號有聲。寒日慘無暉。空房不敢恨。但懷歲暮悲。今年選後宮。連娟千蛾眉。早知獲譴速。悔不承恩遲。聲當徹九天。淚當達九泉。死猶復見思。生當長棄捐。

長信宮詞

憶年十七兮。初入未央。獲侍步輦兮。恭承寵光。地寒祚薄兮。自貽不祥。讒言乘之兮。暴殲日彰。禍來嶮峨兮。勢如壞牆。當伏重誅兮。鼎耳劍鉞。長信雖遠兮。匪棄路旁。歲給絮帛兮。月賜稻粱。君舉玉食兮。犀箸誰嘗。君御朝衣兮。誰進熏香。婕妤才人兮。儼其分行。千秋萬歲兮。永奉君王。妾雖益衰兮。尚供蠶桑。願置幽館兮。組織玄黃。欲訴不得兮。仰呼蒼蒼。佩服忠貞兮。之死敢忘。

銅雀妓

武王在時教歌舞。那知淚灑西陵土。君已去兮妾獨生。生何樂兮死何苦。亦知從死非君意。偷生自是慙天地。長夜昏昏死實難。孰知妾死心所安。

得韓无咎書寄使虜時宴東都驛中所作小闕

大梁二月杏花開。錦衣公子乘傳來。桐陰滿第歸不得。金轡玲瓏上源驛。上源驛中搥畫鼓。漢使作客胡作主。舞

女不記宜和粧。慮兒盡能女真語。書來寄我宴時詩。歸鬢知添幾縷絲。有志未須深感慨。築城會據拂雲詞。唐中  
受降城在拂雲祠。

曉坐

低枕孤衾夜氣存。披衣起坐默忘言。瓶花力盡無風墮。爐火灰深到曉溫。空曩時時聞鼠齧。小窗一一送鴉翻。悠  
然忽記幽居日。下榻先開水際門。

斷碑歎興元姚節度園以折碑爲石筍文猶可識蓋梁蕭懿墓碑簡文爲太子時撰法道美可愛

二蕭同起南蘭陵。正如文叔與伯升。至今人悲大蕭死。痛恨不見梁家興。崇崇之陵久爲谷。豈惟羣盜分珠玉。斷  
碑槎牙棄道邊。文字班班猶可讀。剝剝苔蘚一悽然。俯仰人間幾變遷。世人作碑君勿哂。千載園林須石筍。

夜行至平羌憩大悲院

憶昨遊天台。夜投石橋宿。水聲亂人語。炬火散山谷。穿林有驚鷓。截道多奔鹿。今夕復何夕。此境忽在目。蒼茫陂  
十里。清淺溪數曲。微霜結裘茸。落葉拂帽屋。下馬憩村寺。頽然睡清熟。覺來窗已白。殘燈猶煜煜。

迂益帥馬上作

馬上遙看江上山。白雲紅樹畫圖間。經年簿領無休日。却向忙中得少閒。

蜀酒歌

漢州鶉黃鸞鳳雛。不驚不搏德有餘。眉州玻璃天馬駒。出門已無萬里塗。病夫少年夢清都。曾賜虛皇碧琳腴。文  
德殿門晨奏書。歸局黃封羅百壺。十年流落狂不除。遍走人間尋酒壚。青絲玉瓶到處酤。鶉黃玻璃一滴無。安得  
豪士致連車。倒瓶不用杯與盃。琵琶如雷聒坐隅。不愁渴死老相如。

十一月八日夜燈下對梅花獨酌累日勞甚頌自慰也

奔走人間無已時。夜窗喜對出塵姿。移燈看影憐渠瘦。掩戶留香笑我癡。冷豔照杯欺黼黻。孤標逼硯結冰澌。本  
來難入繁華社。莫向春風怨不知。

醉後草書歌詩戲作

朱樓矯首隘八荒。綠酒一舉累百觴。洗我堆阜崢嶸之胸次。寫爲淋漓放縱之詞章。墨翻初若鬼神怒。字瘦忽作蛟螭僵。寶刀出匣揮雪刃。大舸破浪馳風樑。紙窮擲筆霹靂響。婦女驚走兒童藏。往時草檄喻西域。颯颯聲動中書堂。余嘗草丞相魯公以下與夏國主書於政事堂。一收朝跡忽十載。西掠三巴窮夜郎。山川荒絕風俗異。賴有酒美猶能狂。醉中自脫頭上幘。綠髮未許侵微霜。人生得喪良細事。孰謂老大多悲傷。

古藤杖歌

我有古藤杖。天矯蛟龍形。生於峭壁絕磳上。乃是會稽山陰之蘭亭。歷吳入楚上巴峽。北遊直看秦山青。夜飛或隨暴雨去。旦歸常帶流熬腥。與子扶攜各老大。勿復狡獪誇神靈。惓惓從此常倚壁。聽我夜誦黃庭經。

歲晚書懷

殘歲堂堂去。新春鼎鼎來。夢移鄉國近。酒挽壯心回。暖律初催柳。晴光併上梅。東湖有歸日。衰抱得頻開。已遣人筮新中。

累日倦甚不能觴客睡起戲作

粉闌紅蕩罽俎薄。不如止酒得安眠。無心已破浮生夢。有力聊輕造化權。脫髮滿梳真老矣。斷香縈几故翛然。晚知古佛中邊語。正合蒙莊內外篇。

種花

西園作戲喚春回。桃李陰陰三萬栽。不是無心看開遍。錦江煙柳待歸來。時將遺成都。

雨中登樓望大像

去年寒雨中。騎驢度劍閣。今年當此時。臥聽邊城柝。巍巍千尺像。與我兩寂寞。交遊閱四海。此老差可託。但當頻自省。諸惡誓莫作。時時一憑高。相望要不作。桑間戒三宿。堅坐豈渠樂。卻應輸老夫。新春買芒屨。

迎赦呈王志夫李德孺師伯渾

平明置騎傳詔函。帝意欲與東皇參。青城回仗國人喜。金雞啣赦天恩覃。吾君愛民靡不到。黃紙字密如吳蠶。紀元故事極用九。聖政盡美方登三。赦書改明年元。嗟余久已去魏闕。夢想豹尾猶毵毹。過郊一月方拜赦。始知身

落天西南。歡呼已怪。衰病愈。踏舞更覺春風酣。何當與子歸共載。二月起。柁江如藍。

各日

幸是元無了事。癡偷閑。聊復學兒嬉。午窗弄筆臨唐帖。夜几研朱勘楚詞。山峻已無梅可折。江清猶有蟹堪持。舊交乖隔音塵斷。安得歌呼共一卮。蜀中惟嘉州有蟹。

雨中睡起

磔磔寒禽無定棲。纖纖小雨欲成泥。松鳴湯鼎茶初熟。雪積爐灰火漸低。一氣推移均野馬。百年蒙覆等醯鷄。青山黃葉闌亭路。憶喚鄰翁共架犁。

十二月初一日得梅一枝絕奇戲作長句今年於是四賦此花矣

高標已壓萬花羣。尙恐嬌春習氣存。月兔搗霜供換骨。湘娥鼓瑟爲招魂。孤城小驛初飛雪。斷角殘鐘半掩門。盡意端相終有恨。夜寒敲玉倩誰溫。

無題

畫閣無人畫漏稀。離情病思兩依依。釵梁雙燕春先到。筆柱鸞鴻暖不歸。迎得紫姑占近信。裁成白紵寄征衣。晚來更就鄰姬問。夢到遼陽果是非。

快晴

地闌天開斗柄回。今朝紅日遍池臺。新陽蘇醒春前柳。輕暖醫治雪後梅。瓦屋螺青披霧出。錦江鴨綠抱山來。衰翁也逐兒童喜。旋撥文書近酒盃。

獨坐

巾帽欹傾短髮稀。青燈照影夜相依。跨邊草木春遲到。故國湖山夢自歸。茶鼎松風吹謾謾。香奩雲縷散緜緜。羸驂敢復和鑿鑿。只願蓮山首稽肥。

十二月十一日視築隄

江水來自蠻夷中。五月六月聲摩空。巨魚穹龜牙鬚雄。欲取闌市爲龍宮。橫隄百丈臥霧虹。始誰築此東平公。今



年樂哉適歲豐。吏不相倚勇赴功。西山大竹織萬籠。船舸載石來亡窮。橫陳屹立相疊重。置力尤在水廟東。我登高原相其衝。一盾可受百箭攻。蜿蜒其長高陸隆。截如長城限羌戎。安得椽筆記始終。插江石崖堅可礮。

題龍鶴菜帖東坡先生元祐中與其里人史彥明主簿書云新春龍鶴菜羹有味舉箸想復見憶邪

先生直玉堂。日羞太官羊。如何夢故山。曉枕春蔬香。春蔬尙云爾。况我舊朋友。萬里一紙書。殷勤問安否。先生高世人。獨恨不早歸。坐令龍鶴菜。猶愧首陽薇。

春愁曲客話成都戲作

處叢至今三十餘萬歲。春愁歲歲常相似。外大瀛海環九州。無有一洲無此愁。我願無愁但歡樂。朱顏綠鬢常如昨。金丹九轉徒可聞。玉兔千年空擣藥。蜀姪雙姪姪姪嬌。醉看恐是海棠妖。世間無處無愁到。底事難過萬里橋。

荀秀才送蠟梅十枝奇甚爲賦此詩

與梅同譜又同時。我爲評香似更奇。痛飲便判千日醉。清狂頓減十年衰。色疑初割蜂脾蜜。影欲平欺鶴膝枝。插向寶壺猶未稱。合將金屋貯幽姿。

離嘉州宿平羌

初挈囊衣宿水村。蕭然一掃舊棠痕。本來信手忘工拙。卻爲無心少怨恩。自笑遠遊諸馬上。已營小築老雲根。淡煙疎雨平羌路。便恐從今入夢魂。

瑞草橋道中作

經年簿書無少暇。款段今朝欣一跨。瑞草橋邊水亂流。青衣渡口山如畫。老翁醉著看龍鍾。小婦出窺聞姪姪。荒陂吹笛晚呼牛。古路倚梯晨采柘。殘花零落不禁折。香草丰茸如可藉。郵亭慈竹筍穿籬。野店蒲萄枝上架。功名垂世端有數。利欲昏心喜乘鱗。羈窮自笑豈人謀。閒放每欲從天借。草根蟲語祇自悲。風裏蓬征安稅駕。祖師補處浣花村。會傍清江結茆舍。

遊修覺寺

上盡蒼崖百級梯。詩囊香椀手親攜。山從飛鳥行邊出。天向平蕪盡處低。花落忽驚春事晚。樓高剩覺客魂迷。興

闌掃榻禪房臥。清夢還應到剡溪。

晚步湖上

雲薄漏春暉。湖空弄夕霏。沾泥花半落。掠水燕交飛。小倦聊扶策。新晴旋減衣。幽尋殊未已。畫角喚人歸。

暮春

忙裏偷閑慰晚途。春來日日在東湖。凭欄投飯看魚際。挾彈驚鴉護雀雛。俗態似看花爛漫。病身能鬪竹清癯。一樽是處成幽賞。風月隨人不用呼。

池上醉歌

我欲築化人中天之臺。下視四海皆飛埃。又欲造方士入海之舟。破浪萬里求蓬萊。取日挂向扶桑枝。留春挽回北斗魁。橫笛三尺作龍吟。腰鼓百面聲轉雷。飲如長鯨海可竭。玉山不倒高崔嵬。半酣脫幘髮尙綠。壯心未肯成低摧。我妓今朝如花月。古人白骨生蒼苔。後當視今如視古。對酒惜醉何爲哉。

四月五夜見螢

蜀州官居富水竹。四月螢火遶梁飛。流年迫人不相貸。客子倦遊何日歸。

塞上曲

三尺鐵如意。一枝玉馬鞭。笑把出門去。萬里行無前。當道何崔嵬。云是玉門關。方當置屯守。征人何時還。馬色如雜花。鎧光若流水。肅肅不敢譁。遙望但塵起。日落戍火青。煙重塞垣紫。回首五湖秋。西風開芡蕒。

夜聞塔鈴及泉聲

山泉瀉幽竇。塔鈴搖天風。清音無時盡。靜夜尤瓌瓏。嗟我走紅塵。市聲聒欲聾。多生耳根業。賴此一洗空。夢騎白鳳凰。佩玉朝珠宮。覺來撫枕歎。月滿草堂中。

卷五

曉歎

一鴉飛鳴。蜜已白。推枕欲起。先歎息。翠華東巡五十年。赤縣神州滿戎狄。主憂臣辱古所云。世間有粟吾得食。少年論兵實狂妄。諫官劾奏當竄殛。不爲孤囚死嶺海。君恩如天豈終極。容身有祿愧滿顏。賊賊無期猴獍臆。未聞含桃薦宗廟。至今銅駝沒荆棘。幽井從古多烈士。悵悵可令長失職。王師入秦駐一月。傳檄足定河南北。安得揚鞭出散關。下令一變旌旗色。

苦筍

藜藿盤中忽眼明。駢頭脫髓白玉嬰。極知耿介種性別。苦節乃與生俱生。我見魏徵殊媚嫵。約束兒童勿多取。人才自古要養成。放使千霄戰風雨。

月下作

池上迎微風。柏間蹋涼月。冷然醉夢醒。一洗煩惱熱。嗟予世外人。火食常嘔噎。易求雲表露。難覓太古雪。况欲試秘方。瓊漿和玉屑。俯首居俗間。愁若鷹在紲。惟茲服月芒。比歲稍得訣。但今天無雲。豈復計圓缺。玉鈞定誰挂。冰輪了無斂。詩成獨高詠。靈府炯澄澈。

又

畏暑不巾履。步月櫂短筇。瘦身髮鬢鬢。顧影如孤松。徑幽螢闔開。池漲魚唼鳴。飛泉穿北垣。珠玉相撞舂。東湖更奇絕。百畝銀初鎔。但能抱琴往。絕恨欠鶴從。重露傾荷盤。微風墮芙蓉。歡言笑清夜。縹緲吹疎鐘。空中飛仙人。粲然冰雪容。笑我老塵世。不記瑤臺逢。

小宴

洗君鸚鵡盃。酌我蒲萄醅。冒雨鶯不去。過春花續開。英雄漫青史。富貴亦黃埃。今夕湖邊醉。還須秉燭回。

小閣納涼

侵牀月白病全蘇。掠面風清酒欲無。渺渺塘陰下鷗鷺。蕭蕭秋意滿菰蒲。縱輸煙燄橫孤艇也。勝京塵暗九衢。莫遣良工更摹寫。此詩端是臥遊圖。

晨雨

揮汗驅蚊廢夜眠。清晨一雨便脩然。涼生池閣衣巾爽。潤入園林草木鮮。青弱雲腹開闢茗。翠覺玉液取寒泉。飯餘一枕華胥夢。不怪門生笑腹便。

湖上筍盛出戲作長句

鱖鱖穿苔瑇瑁簪。按行日夜待成林。餐渠百尺干霄氣。見我平生及物心。剩插藩籬憂玉折。豫期風雨聽龍吟。明年又徙囊衣去。誰與平安報好音。

雨後集湖上

野水交流自滿畦。芳池新漲恰平堤。花藏密葉多時在。鶯占高枝盡日啼。繡袂寶幫催結束。金尊翠杓共提攜。白頭自喜能狂在。笑襲蠻牋落醉題。

過大蓬嶺度繩橋至杜秀才山莊

度笮臨千仞。梯山躡半空。溼雲朝暮雨。陰壑古今風。亭觀參差見。闌干詰曲通。柳空叢篠出。松偃翠蘿蒙。負籠銀釵女。鉏畚鶴髮翁。何由有餘俸。小築此山中。

宿杜氏晨起遇雨

怪藤十圍蔽白日。老木千尺干青霄。水泛戛灘竹作舫。陸行跨空繩繫橋。陰陰古屋精靈語。慘慘江雲蛟鱉驕。吾道非耶行至此。諸公正散紫宸朝。

翠圍院

曉入翠圍寺。擁門千萬峯。山空鳥自命。林茂鹿相從。嫋嫋風中笮。昏昏雲外鐘。將歸興未盡。清嘯倚長松。

野飯

蕙實炊明珠。苦荀饌白玉。輪囷斲區芋。芳辛采山藪。山深少鹽酪。淡薄至味足。往往八十翁。登山逐奔鹿。可憐城南社。零落依澗曲。面餘作詩瘦。趨拜尚不俗。杜氏自譜。以爲子美下。留一子守荒花舊業。其後避成都亂。徙眉州大壩。或徙大蓬云。病夫益倦遊。頗願老窮谷。是家吾所慕。食菜如食肉。時能喚鄰里。小甕酒新漉。何必懷故鄉。下箸厭雁鶩。

化成院

翠圍至化成。七里幾千盤。肩輿掀蒲淖。歎息行路難。緣坡忽入谷。蜿蜒蒼龍蟠。孤塔插空起。雙栴當夏寒。飛展到上方。漸覺所見寬。前山橫一几。稻陂白漫漫。肥僧大腰腹。呀喘趨迎官。走疾不得語。坐定汗未乾。高人遺世事。踟踈穴蒲團。作此望塵態。豈如返巾冠。日落聞鹿鳴。感我平生歡。客遊殊未已。芳歲行當闌。

慈雲院東閣小憩

橫閣院東偏。翛然拂榻眠。香濃煙穗直。茶嫩乳花圓。巖倚團團柱。筒分細細泉。憑誰爲題版。榜作小壺天。

遊靈鷲寺堂中僧闌然獨作禮開山定心尊者尊者唐人有問法者輒點胸示之時號點點和尚

半世吳松理釣絲。蜀山著腳豈前知。雲堂已散三三衆。卯塔空尋點點師。戴雪數峯臨峭絕。浮花一水舞淪漪。寺西望雪山下臨桃源。勞生未盡能重到。應掃流塵讀此詩。

桃源

木缺橋橫一徑微。斷煙殘靄晚霏霏。十年倦客明雙眼。五月遊人換夾衣。翠峽東成寒練靜。蒼崖憾落素蛟飛。爾來自笑癡頑甚。著處吟哦不記歸。

白塔院時小雨初霽

冷翠千竿玉。浮嵐萬幅屏。凭欄避微雨。挈笠遇歸僧。殘日明樓角。屯雲擁塔層。溪山屬閑客。隨意倚枯藤。

急雨

炎炎赤日當空燒。簿書圍坐如居窰。黑雲壓簷忽峩峩。急雨鼎來風駕潮。彈壓旱氣蘇枯焦。祝融退聽不敢驕。父老歌舞看稻苗。殺雞買酒更相邀。我亦巾褐涼蕭蕭。酒醒點滴聞梧蕉。珍簟不御扇罷搖。安用萬里登凌歊。

東湖新竹

插棘編籬謹護持。養成寒碧映淪漪。清風掠地秋先到。赤日行天午不知。解籜時聞聲箨箨。放梢初見葉離離。官閑我欲頻來此。枕簟仍教到處隨。

睡起試茶

笛材細織含風漪。蟬翼新裁雲碧帷。端谿硯璞斲作枕。素屏畫出月墮空江時。朱欄碧甃玉色井。自候銀鉶試蒙頂。門前剝啄不嫌渠。但恨此味無人領。

五月五日蜀州放解榜第一人楊鑑具慶下孤生愴然有感

甲午五月之庚寅。淵魚躍起三江津。震雷霹靂兩夜達晨。我知決定非凡鱗。人生富貴不逮親。萬鍾五鼎空酸辛。少年得祿羞常珍。調節滋味躬爨薪。徹食奉盥授悅巾。此樂豈復論賤貧。嗟我不孝負鬼神。俯仰二記悲如新。仕宦空飽息與嬾。左右供養無復辰。子行射策對楓宸。綵衣楚楚暎華紳。沂江亟歸娛老人。切勿著意長安春。

病酒新愈獨臥蘋風閣戲書

用酒驅愁如伐國。敵雖摧破吾亦病。狂呼起舞先自困。閉戶垂帷真廟勝。今朝屏事臥湖邊。不但心空兼耳靜。自燒沉水瀟紫筍。聊遣森嚴配堅正。紫筍蒙頂之上者。其味尤重。追思昨日乃可笑。倚醉題詩恣豪橫。逝從屈子學獨醒。免使曹公怪中聖。

神君歌謁英顯廟作

泰山可爲礪。東海可揚塵。惟有壯士志。死生要一伸。我夢神君自天下。威儀奕奕難具陳。飛龍駕車不用馬。訶前殿後皆鬼神。奇形詭狀密如魚鱗。幟幟鬚鬚爭扶車輪。黑纛白旄。其來無垠。黃霧紫氛。合散輪囷。考錄魑魅。號呼吟呻。約束蛟螭。天矯服馴。後車百兩載美人。巾襜鮮麗工笑顰。金尊翠杓溢芳醇。琵琶篋篋飾怪珍。世間局促常悲辛。神君歡樂千萬春。嗚呼。生不封侯死廟食。丈夫豈得抱志長默默。

讀胡基仲舊詩有感

少日飛騰翰墨場。暮年相見尙昂藏。沈沙舟畔千帆過。剪翮籠邊百鳥翔。訪古每思春竝轡。說詩仍記夜連牀。匆匆去日多於髮。不獨悲君亦自傷。

夏日湖上

烏帽筇杖散客愁。不妨胥史雜沙鷗。迎風枕簟平欺暑。近水簾櫳探借秋。茶竈遠從林下見。釣筒常向月中收。江湖四十餘年夢。豈信人間有蜀州。

對酒歎

鏡雖明。不能使醜者妍。酒雖美。不能使悲者樂。男子之生。桑弧蓬矢射四方。古人所懷何磊落。我欲北臨黃河觀禹功。犬羊腥膻塵漠漠。又欲南適蒼梧弔虞舜。九疑難尋眇聯絡。惟有一片心。可受生死託。千金輕擲重意氣。百舍孤征赴然諾。或攜短劍隱紅塵。亦入名山燒大藥。兒女何足顧。歲月不貸人。黑貂十年弊。白髮一朝新。半酣耿耿不自得。清嘯長歌裂金石。曲終四座慘悲風。人人掩淚無人色。

病後暑雨書懷

髮毛蕭颯疾初平。雲物輪囷氣未清。水漲小亭無路到。雨多幽草上牆生。窗昏損滅讎書課。屋老時聞墮瓦聲。止酒亡聊還自笑。少年豪飲似長鯨。

雨聲

暑氣滿天地。薄暮加煩促。清風吹急雨。集我北窗竹。竹聲蕭蕭固自奇。况得雨聲相發揮。令人忽憶雲門寺。半夜長松墮雪時。

同何元立賞荷花追懷鏡湖舊遊

少狂欺酒氣吐虹。一笑未了千觴空。涼堂下簾人似玉。月色冷冷透相竹。三更畫船穿藕花。花爲四壁船爲家。不須更踏花底藕。但嗅花香已無酒。花深不見畫船行。天風空吹白紵聲。雙槳歸來弄湖水。往往湖邊人已起。即今憔悴不堪論。賴有何郎共此尊。紅綠疎疎君勿歎。漢嘉去歲無荷看。

小樓

吾州近在西山麓。雪山萬仞臨冰谷。小樓森森閣三伏。清簾疎簾對碁局。肌膚淒凜起芒粟。肝肺崢嶸疊瓊玉。香泉向夕初罷浴。桐竹生風吹細縠。九衢憧憧車擊轂。黃塵赤日汗可掬。還家欲休客陸續。借與此詩令一讀。

怡齋

東湖仲夏草樹荒。屋古無人亭午涼。萱房微呀不見日。笱籜自解時吹香。野藤蟠屈入窗罅。溼菌扶疎生屋梁。跨溝數椽最幽翳。漲水及檻雨敗牆。靜涵青蘋舞舞藻荇。閑立白鷺浮鷺鴦。芙蓉雖瘦亦瀾漫。照眼翠蓋遮紅粧。水紋

珍簾欲卷卻團團。素扇嬾復將。天風忽送塔鈴語。喚覺清夢遊瀟湘。

龍湫歌

環湫巨木老不花。蒼淪千尺龍所家。爪痕入木欲數寸。觀者心掉不敢譁。去年大旱綿千里。禾不立苗麥垂死。林神社鬼無奈何。老龍欠伸徐一起。隆隆之雷浩浩風。倒卷江水傾虛空。鱗間出火作飛電。金蛇夜掣層雲中。明朝父老來賽雨。大巫吹簫小巫舞。祠門人散月娟娟。龍歸抱珠湫底眠。

月夕

我昔隱天台。夜半遊句曲。弄月過垂虹。萬頃一片玉。煙艇起菱唱。水風吹釣絲。更欲小徙倚。恐失初平期。今年遊青城。三十六峯巒。白雲反在下。使我毛骨寒。天如玻璃鍾。倒覆溼銀海。素壁行其間。草木盡光彩。姮娥顧我笑。手撫玉兔兒。莫怪世人生白髮。秋風桂老欲無枝。

蒸暑思梁州述懷

宣和之末予始生。遭亂不及遊司井。從軍梁州亦少慰。土脈深厚泉流清。季秋嶺谷浩積雪。二月草木初抽萌。夏中高涼最可喜。不省舉手驅蟲蟲。藏冰一出賣滿市。玉璞堆積寒崢嶸。柳陰夜臥千駟馬。沙上露宿連營兵。胡笳吹隨涼水月。烽燧傳到山南城。最思出甲成秦隴。戈戟徹夜相摩聲。兩年劍南走塵土。肺熱煩促無時平。荒地昏夜蛙閣閣。食案白日蠅營營。何時王師自天下。雷雨傾洞收欃槍。老生衰病畏暑溼。思卜鄠杜開柴荆。

湖上晚歸

地僻多幽事。官閑慰古心。晚花藏密葉。新筍補疎林。碩果畦丁獻。芳醪稚子斟。碧雲遮日盡。歸路更蕭森。

秋聲

人言悲秋難爲情。我喜枕上聞秋聲。快鷹下韝爪背健。壯士撫劍精神生。我亦奮迅起衰病。唾手便有擒胡興。弦開雁落詩亦成。筆力未饒弓力勁。五原草枯首稽空。青海蕭蕭風卷蓬。草罷捷書重上馬。卻從鑿駕下遼東。

觀小孤山圖

江平風不生。鏡面渺千里。舳舻萬斛舟。遠望一點耳。大孤江中央。四面峭插水。小孤特奇麗。丹翠凌雲起。重樓蓬



殿神之家。帳中美人粲如花。遊人徙倚欄干處。俊鶻橫江東北去。

飲酒

陸生學道欠力量。胸次未能和盎盎。百年自笑足悲歡。萬事聊須付酣暢。有時堆阜起嶢嶢。大呼索酒澆使平。世間豈無道師與禪老。不如閉門參麴生。朋舊年來散如水。惟有鐺杓同生死。一日不見令人愁。晝夜共處終無尤。世言有毒在麴蘖。腐脇穿腸凝血脉。人生適意即爲之。醉死愁生君自擇。

北窗梧葉坐間落四五有感

高梧一葉脫。便覺秋不遠。晨起髮滿梳。吾衰孰云晚。古來追電足。歷塊或小踈。金鼓噪陳間。此任豈驚蹇。女子則多怨。丈夫當自反。默觀憂患機。推見生死本。山林嫌獨往。臺省亦袞袞。會稽歸去來。臯橋住筌穩。

神山歌

吾聞海中五神山。其根戴以十五鼈。一朝六鼈被釣去。岱輿員嶠沉洪溝。尙餘三山巖然在。當時不沒爭秋毫。如何蓬萊又已淺。忽見平地生藜藿。伏羲迨今幾萬歲。世事如火煎油膏。妻妾不敢待翁命。治水無暇憐兒號。避諱奔楚僅得免。歷聘返魯終不遭。老聃關尹亦又死。人實危脆無堅牢。有口惟可飲醇醪。有手惟可持霜螯。勿令他人復笑汝。後有萬世來滔滔。

久雨

昏昏風雨暗東湖。恰似梅黃四月初。高樹送聲驚客枕。小池分溜入清渠。飛蛟屏迹知何在。團扇生塵已暗疎。須信西遊有奇事。今年三伏夜觀書。

古意

繼足銅飢鷹。鷹飽意未平。伏櫪豈不安。老驥終悲鳴。士生固欲達。又懼徒富貴。素願有未伸。五鼎淡無味。茅屋秋兩漏。稻陂春水深。長歌傾濁酒。舉世不知心。

自唐安之成都

出門猶苦雨。度壑喜新晴。日正車無影。風高蓋有聲。疎疎稚苗立。鬱鬱晚桑生。宿醉行猶倦。無人爲解醒。

度渚江原縣

翩翩飄飄祚受風。行人疾走綠虛空。回觀目眩浪花上。小跌身裏蛟涎中。汗沾兩握色如菜。數乘此險私自怪。九折元非叱馭行。千金空犯垂堂戒。此身老大足悲傷。歲歲天涯憶故鄉。安得畫船明月夜。滿川歌吹入盤盞。盤盞姑蘇二門名。

故袍

青衫猶是國工裁。破篋塵侵手自開。莫笑渾如霜葉闇。兩朝曾見聖君來。

寓寶相有作

掃地鏡面清。燒香雲氣潤。道人敬愛客。危坐目不瞬。童子髡兩髦。經禪亦精進。我來願同龕。歡喜無少吝。臨堂坐夜分。佛燈看隨燼。清晨爽如秋。攝衣相問訊。道在氛埃表。此語其殆信。永愧小阮高。超然棄鬢髮。從子縮囊其婦。爲僧廬山。

寓驛舍予二至成都皆館于是

閑坊古驛掩朱扉。又憩空堂綻客衣。九萬里中鯤自化。一千年外鶴仍歸。遶庭數竹饒新筍。解帶量松長舊圍。惟有壁間詩句在。暗塵殘墨兩依依。

題宇文子友所藏薛公鶴

仙人騏驥絕世稀。卵生凡禽似而非。宮保妙筆窮化機。綺衣玄裳真令威。千年華表聊一歸。回首幸脫乘軒譏。喙吞不恨菽米微。從吾曹遊安得肥。

宴西樓

西樓遺迹尙豪雄。錦繡笙簫在半空。萬里因循成久客。一年容易又秋風。燭光低映珠幃麗。酒暈徐添玉頰紅。歸路迎涼更堪愛。摩訶池上月方中。

月中歸驛舍六月十四日

歲歲常爲錦水行。驛前雙堠慣逢迎。草深閑院蟲相語。人靜空廊月自明。病起酒徒嘲小戶。才衰詩律媿長城。何

時卻泛耶溪路。臥聽菱歌四面聲。

江濱池醉歸馬上作

久住西州似宿緣。笙歌叢裏著華顛。每嗟相見多生客。卻憶初來尙少年。迎馬綠楊爭拂帽。滿街丹荔不論錢。浮生何處非羈旅。休問東吳萬里船。

離成都後卻寄公壽子友德稱

蕭條常閉爵羅門。點檢朋儕幾箇存。吾道將爲天下裂。此心難與俗人言。逢時尙可遺三代。掩卷何由作九原。寄語龜城舊交道。新涼殊憶共清尊。

晨至湖上

劍南無劇暑。長夏更宜人。蹄鳥常終日。幽花不減春。荷香浮綠酒。藤露落烏巾。莫作天涯想。翛然夢裏身。

又

園古逢秋好。身閑與懶宜。空堂賞踈豁。重閣望參差。竹粉有新意。松風含古姿。低回慙祿米。官事少於詩。

池上見魚躍有懷姑熟舊遊

兩過回塘漲碧漪。幽人閑照角巾欹。銀刀忽裂圓波出。宛似姑溪晚泊時。

六月二十五日曉出郊

劍南作客歲再淹。正如病翼遭網黏。短衣射虎性所樂。不耐齷齪垂車幘。今晨偶出得一快。欣然意若脫楚鉗。曉星已踈更磊磊。殘月欲盡猶纖纖。雞鳴已與夜漏斷。鴉起似逐朝陽暹。揚鞭走馬忘老憊。自笑狂疾何由砭。

作雨不成終夜極涼時去立秋五日也

雲映星芒澹。風闌雨腳回。體輕知病去。氣爽喜秋來。踈放拋烏帽。歌呼覆綠盃。東歸定何日。灑灑欲崔嵬。

池上晚雨

烏紗白葛一枝筇。罨畫池邊遡晚風。雲葉初生高樹外。雨聲已到亂荷中。憑闌頓覺氛埃遠。回首方知暑毒空。閱世萬端惟小忍。何人更事似衰翁。

五十

五十未名老。無如衰疾何。肺肝空激烈。顏鬢已蹉跎。夜宴看長劍。秋風舞短蓑。此身如砥柱。猶足闕頽波。

記夢

夢泛扁舟禹廟前。中流拂面風冷然。樓臺縹緲知幾疊。雲物點綴多餘妍。蓮房芡觜采無主。漁歌菱唱聲滿川。夢中了了知是夢。卻恐燕語來驚眠。弄橈願謂共載客。乖離不記經幾年。卽今相逢兩幻質。轉盼變滅如飛煙。斯言未竟客大笑。人生寓世豈獨堅。元章嘉叟君所見。一別丹旄俱翩翩。君知夢覺本無異。勿爲畫甍流饑涎。我慙俛首夢亦斷。尙覺細浪鳴船舷。

凭欄

蟬噤晚尤壯。鴉栖久未安。不成浮舴艋。故作凭闌干。露重傾荷蓋。風尖蹙芡盤。新秋動歸思。更覺五湖寬。

聽琴

疎簾曲檻蘋風涼。細腰美人藕絲裳。綠藤水文穿矮牀。玉指纖纖彈履霜。高林鶯轉日正長。幽澗泉鳴夜未央。哀思不怨和而莊。有齊淑女禮自防。世人但惑青樓倡。琵琶篋裏雜胡羌。試聽一曲醒汝狂。文姬指法傳中郎。

秋思

烈日炎天欲不禁。喜逢秋色到園林。雲陰映日初蕭瑟。露氣侵簾已峭深。衰髮凋零隨槁葉。苦吟凄斷雜疎砧。隔來不得中原信。撫劍何人識壯心。

醉書

似閑有俸錢。似仕無簿書。似長免事任。似屬非走趨。病能加餐飯。老與酒不疎。婆娑東湖上。幽曠足自娛。時時喚客醉。小閣臨紅蕖。釣魚斫銀絲。擘荔見玉膚。檀槽列四十。遺聲傳故都。豈惟豪兩川。自足誇東吳。但恨詩不進。榛荒失耘耨。何當掃纖黠。傑作追黃初。

樊氏莊龜泉

曳尾穹龜不負圖。一泓寒碧照庭除。醉中只合長來此。臥聽蠻童放轆轤。

書懷

楚澤巴江兩鬢殘。夕陽又是倚闌干。敢言日與長安遠。惟恨天如蜀道難。客枕五更歸夢短。新詩千首後人看。青簾白舫何時發。醉聽琵琶興已闌。唐安絃索爲兩川冠。

又

西風蕭瑟晚吹衣。又見亭臯木葉飛。已是中年頗作惡。更堪秋日送將歸。時何守遺青城。黃塵顏鬢無人識。青史功名與願違。彊把一盃還徑醉。羈懷何必不依依。

秋思

大面山前秋笛清。細腰宮畔暮灘平。吳檣楚柁動歸思。隴月巴雲空復情。萬里風塵舊朝士。百年鉛槧老書生。水村漁市從今始。安用區區海內名。

又

燕燕成歸秋景奇。頗容老子醉哦詩。山晴更覺雲含態。風定閑看水弄姿。痛飲何由從次道。竝遊空復憶安期。天涯又作經年客。莫對青銅恨鬢絲。

又

西風吹葉滿湖邊。初換秋衣獨慨然。白首有詩悲蜀道。清宵無夢到鈞天。迂疎早不營三窟。流落今寧直一錢。把酒未妨餘興在。試憑絲管餞流年。

東園晚步

久客天涯憶故園。疆名官寺只衝門。秋桐蠹遍無全葉。古柳吹斜出半根。痛飲每思尊酒窄。微官空羨布衣尊。何時定下三巴去。思臥孤舟聽斷猿。

秋夜讀書戲作

別駕生涯似蠹魚。簡編垂老未相疎。也知賦得寒儒分。五十燈前見細書。

太平花花出劍南似桃四出千百包。駢萃成朵天聖中獻至京師仁宗賜名太平花。

扶牀踉蹌出京華。頭白車書未一家。宵旰至今勞聖主。痕痕空對太平花。

日暮至湖上

籃輿晚繞湖。樂此新秋涼。粉落竹方老。紅凋荷更香。天宇無纖雲。仰視鴻鵠翔。小樓久不登。撫檻悲慨慷。浮生寄一夢。共盡無彭殤。况我數月客。轉眼促去裝。顧作兒女態。徘徊惜流光。簷角迎夜月。林間送斜陽。四年已五遷。終歲常遑遑。安得一茆屋。歸老樵風旁。會稽山南有嶺名。槎風溼。其上即若耶。

秋興

無處逢秋不黯然。驛前斜日渡頭煙。吟肩雅與寒飈稱。歸夢頻爭社燕先。百歲猶穿幾兩屐。千詩不及一囊錢。故應身世如團扇。已向人間耐棄捐。

秋色

一段淒涼傍酒盃。中年剩作楚囚哀。迢迢似伴明河出。慘慘如隨落照來。客路半生常淚眼。鄉關萬里更危臺。蓼汀荻浦江南岸。自入秋來夢幾回。

秋聲

蕭騷拂樹過中庭。何處人間有此聲。漲水雨餘晨放闌。騎兵戰罷夜還營。閑憑曲几聽雖久。彊撫哀絃寫不成。暑退涼生君勿喜。一年光景又崢嶸。

觀長安城圖

許國雖堅鬢已斑。山南經歲望南山。橫戈上馬嗟心在。穿塹環城笑虜孱。隄者言虜穿壁三重。環長安城。日暮風煙傳隴上。秋高刁斗落雲間。三秦父老應惆悵。不見王師出散關。

雨中作

方驚歲更端。不覺秋已孟。雖云暑毒埃。無奈風雨橫。荷空湖面闊。葉脫樹枝勁。百卉亦已衰。非復昔華盛。遊子老忘歸。一榻臥衰病。欲談無客來。向壁弄塵柄。

夜讀了翁遺文有感

秋雨蕭蕭夜不眠。挑燈開卷意凄然。吾曹自欲期千載。世論何曾待百年。當日公卿笑迂闊。卽今河洛污腥膻。陰陽消長從來事。玩易深知屢絕編。公有易傳。

雷

君不見冬月雷。深藏九地底。寂默如寒灰。紛紛槁葉木。盡脫。齏齏蟄戶蟲。爭坏。堅冰積雪一朝盡。風搖天邊斗柄回。雷聲卻擊九地出。殷殷似挾春俱來。魚龍振鱗熟睡醒。桃李一笑韶顏開。候耕老農喜欲舞。掀泥百草知誰催。惟嗟婦女不解事。深屋揜耳藏嬰孩。吾聞陰陽有常數。非時動靜皆爲蓄。無人爲報阿香道。時來何至勞卿推。

龍眠畫馬

國家一從失西陲。年年買馬西南夷。瘴鄉所產非權奇。邊頭歲入幾番一作數皮。崔嵬叟骨帶火印。離立欲不禁風吹。圉人太僕空列位。龍媒汗血來何時。李公太平官京師。立仗慣見渥洼姿。斷縑歲久墨色暗。逸氣尙若不可羈。贊奇好古自一癖。感事憂國空餘悲。嗚呼安得毛骨若此三千疋。銜枚夜度桑乾磧。

秋夜池上作

短髮颺颺病骨輕。臨池閒看露荷傾。月明何與浮雲事。正向圓時故故生。

秋雨

西山雲千重。東園泥一尺。可憐牆下路。十日無履迹。空庭桐葉盡。古甃土花碧。坐懷江湖間。病鴈溼羽翮。寒窗向人青。衰髮垂領白。孤吟更不寐。聊伴候蟲噴。

臥病

人生寓一氣。血脉日夜流。秋毫或壅隔。百體若相仇。嗟予少多艱。衣食拙自謀。方寸叢百慮。如箭集射侯。奔走連數歲。呻吟劇茲秋。生死亦何有。成壞同一漚。胡爲不自愛。森然起戈矛。一笑衆妄滅。霜天鷹睨鞴。呼兒屏藥蠹。吾疾今其瘳。

夢入禪林有老宿方陞座或云通悟禪師也

塵埃車馬何憧憧。聾頭鼠目厭妄庸。樂哉夢見德人容。巍巍堂堂人中龍。舉頭仰望太華峯。攝衣欲往路無從。忽

然夢斷難再逢。空記說法聲如鐘。

蜀州大閱八月二十七日

曉東戎衣一悵然。五年奔走遍窮邊。平生亭障休兵日。慘澹風雲閣武天。戎隴舊遊真一夢。渡遼奇事付他年。劉琨晚抱聞雞恨。安得英雄共著鞭。

放懷亭獨立有感

葦叢枯倒蓼花紅。小立東湖更向東。委肉本知居几上。翦翎何恨著籠中。一筇信腳乾坤迤。百榼澆愁寵辱空。誰道窮途知舊少。此心念念與天通。

九月三日同呂周輔教授遊大邑諸山

大邑知名杜叟詩。山中仍值菊花時。節旄落盡羈臣老。髀肉生來壯士悲。豪舉每嫌盃綠淺。癡頑頗怪鬢絲遲。廣文別乘官俱冷。相伴寬爲五日期。

次韻周輔道中

山靈喜我馬蹄聲。正用此時秋雨晴。日淺風斜江上路。蘆花也似柳花輕。

又

從來重九如寒食。天氣微陰正自佳。莫問茱萸賜朝士。一尊隨處有黃花。

憩黃秀才書堂

吾生如虛舟。萬里常泛泛。終年厭作客。著處思繫纜。道邊何人居。花竹頗閑淡。門庭淨如拭。窗几光可鑑。堂上滿架書。朱黃方點勘。把茅容卜鄰。老死更誰憾。

夜宿鵝鳴山。山蓋張天師學道之地。事與史合。

西遊萬里已關天。采藥名山亦宿緣。老柏干霄如許壽。幽花泣露爲誰妍。苔黏石磴捫蘿上。燈耿雲房掃榻眠。安得仙翁索米術。一生留此弄寒泉。索米謂五斗米法。

次韻周輔霧中作



一日籃輿十過溪。丹莢黃菊及佳時。端居恐作他年恨。聯轡聊成此段奇。側磴下臨重澗黑。亂雲高出一峯危。何時鬪輔胡塵靜。大華山頭更卜期。

山中得長句戲呈周輔并簡朱縣丞

鶴鳴山空無鶴來。青霞嶂深天壁開。千巖角逐五吞吐。一峯拔起矜崔嵬。日光微漏潭見底。青霞嶂。碧玉瓜。皆霧中佳處。水氣上薄雲成堆。幽禽飛鳴報客至。奇樹璀璨知誰栽。花藤怪蔓白晝暗。奔獲落狄無特哀。路窮尙蹶一千級。忽見密竹藏樓臺。共言神僧昔住此。至今光景如天台。楮筇負笠出復沒。喜動婦人驚提孩。高人何至作狡獪。無乃翫世聊相誅。不然學道窮實際。詎捨正大崇奇瓌。儒林丈人學擅世。餘事尙壓蔡與崔。名山未死可再到。此士一失難重陪。贊府摘山事如織。擺撥領客何奇哉。境幽神儻不可住。歸倩玉手傳金盃。朱君有侍兒。許爲客出。

擣藥烏霧中有此鳥鳴聲清絕正如杵藥

白髮無情日日生。散愁聊復作山行。幽禽似欲朝衰病。故學禪房杵藥聲。

出山

出山似與高人別。回首時時一悵然。它日再來緣要熟。遍題名姓綠巖邊。

平雲亭大邑

滿榼芳醪何處傾。金龜背上得同行。天垂綠野三邊盡。雲與朱闌一樣平。煙樹微茫疑誤墨。風松蕭瑟有新聲。黃花未吐無多恨。也勝湘纍拾落英。

高秋亭大邑

三日山中醉復醒。徑歸回首愧山靈。從今惜取觀書眼。長看天西萬壑青。

九日小疾不出

病厭追遊嬾舉觴。今年閉戶作重陽。香煙裊裊閑縈几。書卷紛紛靜滿牀。斜日更增秋慘淡。黃花應怪客淒涼。長安光景還如昨。誰醉城南杜曲旁。昔官都下。每以九日遊西湖諸寺。

九日試霧中僧所贈茶

少逢重九事豪華。南陌離鞍擁鈿車。今日蜀州生白髮。瓦爐獨試霧中茶。

我有美酒歌

我有美酒起自斟。勸君一卮爲君吟。素衣未遂京塵化。綠鬢已受吳霜侵。三巴塗路何欽望。五溪霧潦多毒淫。虎豹夜嘯裂崖谷。魑魅晝出矜山林。身如槁葉墮幽穽。窅窅何啼千尺深。無因剖胸出此心。一寸孤忠天寶臨。

次韻師伯渾見寄

窮鄉久客易消魂。短髮秋來白幾分。夢泛扁舟鏡湖月。身騎瘦馬劍關雲。萬釘寶帶知何用。九轉金丹幸有聞。欲與先生同此計。會營茅舍近江濱。伯渾隱龍山。僕亦有結茅蕺津之意。

自江源過雙流不宿徑行之成都

斷笳飄飄挂渡頭。臨江立馬喚漁舟。少城已破繁華夢。老境聊尋汗漫遊。斜日驛門雙堠立。早霜風葉一林秋。詩材滿路無人取。準擬歸驂到處留。

過綠楊橋

過縣東馳十里遙。行吟不覺度谿橋。磴輪激水無時息。酒旆迎風盡日搖。半掩店門燈煜煜。橫穿村市馬蕭蕭。秦吳萬里行幾遍。莫恨尊前綠鬢凋。

五鼓自簇橋入府

曉月有餘光。秋樹無濃影。野煙浩無際。陂路行愈永。堰聲何澎湃。露氣正淒冷。忽然客愁破。更覺詩律整。昔人千載意。忙裏一笑領。山林豈難歸。吾計自不猛。

客多福院晨起

萬鯨傳響徹修廊。喚起衰翁曉夢長。萬事可憐隨日出。一生常是伴人忙。馳驅深厭交飛蓋。息偃何時靜炷香。四到錦城身愈老。更堪重入少年場。

雨中出謁歸畫臥

宿雨盈車轍。秋風漲帽裙。愛閑惟兀兀。應俗苦紛紛。病眼添花暈。醜顏散縵紋。歸來炷香臥。窗底看微雲。

長歌行

人生不作安期生。醉入東海騎長鯨。猶當出作李西平。手梟逆賊清舊京。金印煌煌未入手。白髮種種來無情。成都古寺臥秋晚。落日偏傍僧窗明。豈其馬上破賊手。哦詩長作寒螿鳴。興來買盡市橋酒。大車磊落堆長鉶。哀絲豪竹助劇飲。如鉅野受黃河傾。平時一滴不入口。意氣頓使千人驚。國讎未報壯士老。匣中寶劍夜有聲。何當凱還宴將士。三更雪壓飛狐城。

夜食炒栗有感。偏舍待朝朝士。往往食此。

齒根浮動歎吾衰。山栗炮燂療夜飢。喚起少年京輦夢。和寧門外早朝來。

秋夜懷吳中

秋夜挑燈讀楚辭。昔人句句不吾欺。更堪臨水登山處。正是浮家泛宅時。巴酒不能消客恨。蜀巫空解報歸期。灞橋煙柳知何限。誰念行人寄一枝。

遊三井觀

三井久知名。暇日偶一訪。棟宇壞欲盡。基址尙闊壯。畫牆皆國工。煙雲儼天仗。旌旄亞戈戟。佩玉雜弓鞬。太古實傑作。筆落九天上。吳生名擅世。睥睨未肯讓。規模遠有考。意象豪不放。最奇老癯仙。骨立神愈王。石恪雖少怪。用筆亦跌宕。兩姝淡蛾眉。非復火食狀。塵埃久侵蝕。風雨無蓋障。好事未易逢。寧能久亡怠。雍洛劫火餘。妙迹盡凋喪。斯遊恐難繼。佇立增悄愴。

仙遊閣

張公一去二百載。傑閣依然橫霧中。徒倚看碑仍看畫。時聞柏子落秋風。

寓居小菴。纒裘丈戲作

早衰甚畏寒。颼颼厭空館。登閣望東菴。亭亭長一織。欣然願暫寓。竹底門可款。外看磔蝟毛。仰視覆鵝卵。席纒置錐地。牖若窺天管。瓦爐香不去。菅寢衾易暖。頗疑漁菴結。又類土室窳。家具止囊衣。弛擔著亦滿。客來勿嗤陋。老

我善用短槍能設胡牀。相喚共茗碗。

送華師從劍州張秘書之招

三年相伴錦江頭。一日翩然不可留。官冷蓬門無客戀。時清劍閣有僧遊。關山默數來時路。風月懸知別後愁。禪版經龕有餘暇。頻登高處望西州。

卷六

江上對酒作

把酒不能飲。苦淚滴酒觴。醉酒蜀江中。和淚下荆楊。樓櫓壓湓口。山川蟠武昌。石頭與鍾阜。南望鬱蒼蒼。戈船破浪飛。鐵騎射日光。胡來即送死。詎能犯金湯。汴洛我舊都。燕趙我舊疆。請書一尺檄。爲國平胡羌。

自嘲

華子中年百事忘。嵇生仍坐嬾爲妨。病於榮宦冥心久。老向端閑得味長。對客欲談還憤憤。讀書纔過已茫茫。青絲帳暖黃紬穩。聊借東菴作睡鄉。

暮歸馬上作

石筍街頭日落時。銅壺閣上角聲悲。不辭與世終難合。惟恨無人麤見知。寶馬俊遊春浩蕩。江樓豪飲夜淋漓。醉來剩欲吟梁父。千古隆中可與期。

臨別成都帳飲萬里橋贈譚德稱

成都城南萬里橋。蘆根蘋末風蕭蕭。暖花碾草鉤車小。駐坡驀澗青鸞驕。入門翠徑絕窈窕。臨水飛觀何岧峩。判無功名著不朽。惟仗詩酒寬亡聊。迎霜早已足雉兔。微冷便欲思狐貂。喜看縷膾曠盤箸。恨欠斫蟹加橙椒。坐中譚侯天下士。龍馬毛骨矜超遙。烏犀白紵謫仙樣。但可邂逅不可招。今年一戰誠餘子。風送六翮凌青霄。美人再拜乞利市。醉墨飛落生蛟綯。我衰於世百無用。十年不趁含元朝。華纓肯傍蕭颯鬢。寶帶那束龍鍾腰。祝君好去事明主。日望分喜來漁樵。遊談引類亦細事。寄酒且解相如消。

夜宿二江驛

雞鳴原前風折樹。夜到雙流雨如注。樺皮溼透點不明。旋設篝爐燎衣袴。重城回首一夢散。錦障氈車渺無處。新聲猶傍耳邊來。殘酒半隨風力去。飛觴縱飲亦何樂。憤憤不堪長閉戶。丈夫要爲國平胡。俗子豈識吾所寓。

涉白馬渡慨然有懷

我馬顧影嘶。忽涉白馬津。雖非黃河上。撫事猶悲辛。太行之下吹虜塵。燕南趙北空無人。袁曹百戰相持處。大牟堂堂自來去。

瑞草橋

柘葉颺颺雪意驕。檐頭雙兔遇歸樵。宿醒未解題詩癩。虛過風流瑞草橋。

將之榮州取道青城

倚天山作海濤傾。看遍人間兩赤城。青城山。一名赤城。而天台之赤城乃予舊遊。自笑年年隨宦牒。不如處處說閑行。草痕沙際猶餘綠。楓葉霜餘已帶頽。歸去還堪詫兒輩。錦囊三十六崢嶸。

丈人觀

黃金篆書扁朱門。夾道巨竹屯蒼雲。崖嶺剗若天地分。千柱耽耽壓其垠。纓冠肅謁丈人君。廣殿空庭吹寶熏。摩娑畫橋手爲蹶。異哉山斲與土積。物怪慙慙冠丘憤。仙人佩玉雜悅怱。手整貂冠最不羣。欲去不忍恨日曛。道翁采藥晝夜勤。松根茯苓獲兼斤。人之植立彊骨筋。狗杞羣吹聲信猜。山爐小甑吹幽芬。朱顏不飲常自醺。我亦宿誦五千文。一念之差隨世紛。逝將從翁走如麋。隱書秘訣何由聞。

題丈人觀道院壁

斷香浮月磬聲殘。木影如龍布石壇。偶駕青鸞塵世窄。閑吹玉笛洞天寒。奇香滿院晨炊藥。異氣穿巖夜浴丹。卻笑飛仙未忘俗。金貂猶著侍中冠。孫太古畫范長生作舉手。整貂蟬像。神氣尤奇逸。

宿上清宮

九萬天衢浩浩風。此身真是一枯蓬。盤蔬采掇多靈藥。閣道攀躋出半空。累盡神仙端可致。心虛造化欲無功。金

丹定解幽人意。散作山椒百炬紅。夜中山谷火煜然。俗謂聖燈。意古藏丹所化也。

自上清延慶歸過丈人觀少留

再到蓬萊路欲平。卻吹長笛過青城。空山霜葉無行迹。半嶺天風有嘯聲。細棧跨雲縈峭絕。危橋飛柱插澄清。玉華更控青鸞住。要倚欄干待月明。玉華樓名。

長生觀觀月

碧天萬里月正中。清夜弭節長生宮。廣寒忽墮人間世。但怪步虛聲散瑤臺空。四山沉沉萬籟寂。天矯髯龍舞娉婷。客弭紹老仙期不來。獨倚欄干吹玉笛。道人不怕九霄寒。銀闕冰壺處處看。天台四萬八千丈。明年照我扶藜杖。

儲福觀唐玉真公主修真之地

路轉屏風疊。雲藏帝子家。窮幽行犖确。息倦倚槎牙。綠蘚封茶樹。清霜折藥花。世無勾漏令。誰此養丹砂。

龍門洞

我來香積守。清晨歷龍門。孤峯撐蒼昊。大壑裂厚坤。古穴吹腥風。峭壁挂爪痕。水浮石楠花。崖絡葛蒲根。橫策意未饜。褰裳探其源。絕境豈可名。恨我詩語煩。須臾蒼雲合。便恐白雨翻。東走得平野。萬里扶桑暎。

布金院

萬里西來了宿緣。憑鞭欹帽過年年。山寒院落開爐月。霜重郊原斲芋天。淺碧鱗鱗人度約。長空杳杳鳥衝煙。夜投蕭寺清無寐。樓角三更月滿川。

離堆伏龍祠觀孫太古畫英惠王像

岷山導江書禹貢。江流蹴山山爲動。嗚呼秦守信豪傑。千年遺迹人猶誦。決江一支溉數州。至今禾黍連雲種。孫翁下筆開生面。岌嶭高冠壓屋棟。徒木遺風雖峭刻。取材尙足當世用。寥寥後世豈乏人。尺寸未施譏已衆。要官無責空賦祿。軒蓋傳呼真一閥。奇勳偉績曠世無。仁人志士臨風慟。我遊故祠九頓首。夜過神君了非夢。披雲激電從天來。赤手騎鯨不施鞚。

登灌口廟東大樓觀峭江雪山

我生不識柏梁建章之宮殿。安得峩冠侍遊宴。又不及身在滎陽京索間。擐甲橫戈夜酣戰。胸中迫隘思遠遊。泝江來倚岷山樓。千年雪嶺闌邊出。萬里雲濤坐上浮。禹迹茫茫始江漢。疏鑿功當九州半。丈夫生世要如此。齋志空死能無歎。白髮蕭條吹北風。手持卮酒酌江中。姓名未死終磊磊。要與此江東注海。

郫縣道中思故里

衰髮不勝簪。馳驅豈復堪。客魂迷劍外。歸思滿天南。江路灘聲壯。雲停雪意酣。空懷小叢碧。細酌破吳柑。

宿江原縣東十里張氏亭子未明而起

寸廩驅人卒歲勞。一官坐失布衣高。劍南十月霜猶薄。江上五更雞亂號。孤枕擁衾尋短夢。青燈照影著征袍。客愁相續無時斷。那得并州快剪刀。

戲詠西州風土

衍沃綿千里。融和被四時。蠶叢角歌吹。石室盛書詩。綠樹藏漁市。清江繞佛祠。吾行更堪樂。載酒上墓頭。

宿彭山縣通津驛大風鄰園多喬木終夜有聲

木欲靜。風不止。子欲養。親不留。夜誦此語涕莫收。吾親之沒今幾秋。尙疑捨我而遠遊。心冀乘雲反故丘。再拜奉觴陳膳羞。陶盜治米糲叟叟。木甌炊麩香浮浮。毛蠶屑桂調甘柔。雜鼈煮臙長魚臄。夜敷枕席視衾綯。晨起熏籠進衣裘。哀樂此志終莫酬。有言不聞九泉幽。北風歲晚號松楸。哀哉萬里爲食謀。

眉州郡燕大醉中間道馳出城宿石佛院

玻璃春作江水清。紫玉簫如雛鳳鳴。漏聲不聞看炮燭。俠氣未減欺飛觥。單車萬里信有數。二年三過寧忘情。釵頭玉茗妙天下。坐上見白山茶。格韻高絕。瓊花一樹真虛名。酒酣忽作檀公策。問道絕出東關城。清歌未斷去已遠。回首樓堞空崢嶸。貂裘狐帽醉走馬。陌上應有行人驚。徑投野寺睡正笑。魚鼓忽報江天明。

雙柏

雙柏屹相向。剛嚴如巨人。龍吟風雨夕。山立雪霜晨。閱世易成古。剗心不復春。扶顛要力量。歲晚莫全身。

戊卒說沉黎事有感

亭障會無闕歲寧。頻聞夷落犯王靈。孤城月落窳魂哭。百里風吹戰血腥。瘴重厭看茅葉赤。春殘不放柳條青。焦頭爛額知何補。弭患從來貴未形。

平羌道中望峨眉山慨然有作

白雲如玉城。翠嶺出其上。異境忽墮前。心目久蕩漾。別來二百日。突兀喜亡念。飛仙遙舉手。喚我一稅鞅。此行豈或使。屏迹事幽曠。何必故山歸。更破萬里浪。

次韻何元立都曹贈行元立用陳後山送蘇公詩韻

嘉榮東西川。此別不爲遠。徘徊凌雲寺。決去未遽忍。登高望故人。煙樹參差見。懸知今日夢。不隔重城鍵。平生相從意。百年有未滿。結聚青城雲。期子在歲晚。

次韻楊嘉父先輩贈行

貞元舊朝士。太學老諸生。半世不偶諧。殘年正飄零。危坐但愁悲。一笑黃河清。佳客如晨星。俗子如春萍。奇哉今日事。諸賢送東征。吸酒盃當空。綴詩筆勿停。明發復百憂。君聽馬蹄聲。

入榮州境

一起一伏黃茅岡。崔嵬破丘孤。兔殿烟烟空。日清無光。單單終日行。牟臆。村落聚看如鷺鬢。亦有銀釵伏短牆。黃旗鐵鼙鼓其鏡。豨角鳴咽吹斜陽。長筒汲井熬雪霜。轆轤咿啞官道傍。渺然孤城天一方。傳者或云古夜郎。其民簡朴士甚良。千里鬱爲詩書鄉。閉閣掃地焚清香。老人處處是道場。

井研道中

窮冬景方促。下嶺路微平。地瘦竹無葉。風乾茅有聲。客遊空自入。歸計與誰評。尙喜長亭下。雲穿夕照明。

賴牟鎮早行

孤燈照影聽初雞。攬轡情懷倍慘悽。雪作未成雲意鬧。茅荒無際客魂迷。觸寒手指藏猶裂。長嶮圖書棄不攜。老去有文無賣處。等閑題遍蜀東西。

初到榮州



亂山缺處城樓呀。雙旗蕭蕭晚吹笳。煙深綠桂臨絕壑。霜落殘瀨鳴寒沙。廢臺已無隱士嘯。遺宅上有高人家。鈴齋下榻約僧話。松陰枕石放吏衙。盃羹最珍慈竹筍。餅水自饗山薑花。地爐堆獸爇石炭。瓦鼎號蜩秋煎茶。少年遠遊無百里。一飢能使行天涯。豈惟慣見蓬婆雪。直恐遂泛星河槎。故葉肯作兒女戀。異境會向鄉閭誇。一盃醅醉曠自墮。燈下髮影看鬢髮。

城上

雙雙黃犢臥斜陽。葉葉丹楓著早霜。沙水自鳴如有恨。野花無主爲誰芳。郵筒味醜愁濡甲。巴曲聲悲怯斷腸。賴有生平管城子。不妨驅使答風光。

又

濯錦豪華夢不通。巋然孤壘亂山中。行歌滿道知人樂。露積連村見歲豐。萬瓦新霜掃殘障。一林丹葉換青楓。鵝黃名醞何由得。且醉盃中琥珀紅。榮州酒赤而勁甚。糴黃。廣漢酒名。

西樓夕望

夜郎城裏歎途窮。賴有西樓著此翁。溪鳥孤飛寒瀟外。野人參語夕陽中。蒼天可恃何曾老。白髮緣愁卻未公。俗態十年看爛熟。不如留眼送歸鴻。

醉中懷眉山舊遊

勁酒少和氣。哀歌無歡情。故鄉不敢思。登高望錦城。錦城那得去。髣髴慕頤路。遙知尊前人。指我題詩處。我雖流落夜郎天。遇酒能狂似少年。想見東郊攜手日。海棠如雪柳飛綿。虞嘉術者袁牧童。謂予明年春分後當還西州。

登城望西崦

登城望西崦。數家斜照中。柴荆晝亦閉。乃有太古風。慘淡起炊煙。寂歷下釣筒。土瘦麥苗短。霜重桑枝空。恐是種桃人。或有采芝翁。何當宿樓上。月明照夜春。

甲午十一月十三夜夢右臂踊出一小劍長八九寸有光既覺猶微痛也

少年學劍白猿翁。曾破浮生十歲功。玉具挂頤誰復許。蒯緱彈缺老猶窮。牀頭忽覺蛟龍吼。天上方驚牛斗空。此

夢怪奇君記取。佩刀猶得世三公。

齋中夜坐有感

荒山爲城溪作壕。風鼓巨木聲翻濤。鳴鼻乘屋彈不去。狐狸欺人怒豎毛。雨來紅鶴更可惡。爭巢一似嬰兒號。城  
孤屋老草木茂。正坐人少此輩豪。急呼五百具畚鍤。欲掀窟穴窮腥臊。忽然語罷卻自笑。殘年何至與汝鏖。浣花  
江色綠如黛。春波瀾灑浮輕舸。行當繫纜柳陰下。仰聽鶯語傾香醪。

晚登橫溪閣

樓鼓聲中日又斜。憑高愈覺在天涯。空桑客土生秋草。野渡虛舟集晚鴉。瘴霧不開連六詔。俚歌相答帶三巴。故  
鄉可望應添淚。莫恨雲山萬疊遮。

又

犖确坡頭筇竹枝。西臨村路立多時。賣蔬市近遷家早。煮井人忙下麥遲。榮多鹽井。秋冬收薪茅取急。病客情懷  
常怯酒。山城老景盡供詩。晚來試問愁多少。只許高樓橫笛吹。

昭德堂晚步

笑喚枯筇躡夕陽。探春聊作靜中忙。高枝鵲語如相命。幽徑梅開祇自香。苔蝕斷碑驚世換。鐘來廢寺覺城荒。謫  
仙未必無遺恨。老欠題詩到夜郎。

龍洞在榮州東南一里許

峭崖磨天如立壁。桫欂橫走松倒植。呀然一岫驚倒人。空洞坡陀三百尺。幽陰宜爲異物託。角爪痕存猶可識。想  
當蟠螫未奮時。腥風逼人雲霧百。一朝偶爲旱歲起。卷海作雨飛霹靂。向來伊呂正如此。莘渭千年有遺迹。我欲  
酌酒招蜿蜒。安用辛苦常行天。太平洋內多豐年。歸來故祠聽管絃。

客中夜寒戲作長語

孤翁癡鈍如寒蠅。霜夕不暝愁嚴凝。寢衣觸體起芒粟。鼻息噓潤成冰凌。瑟瑟默數嚴譙鼓。耿耿獨看幽窗燈。支  
牀龜老共夜永。號月雞冷同晨興。白狐紫貂了不暖。何況蜀錦并吳綾。靜思忽得安樂法。人生所欠絮與緡。十年

一衲尙可過。不信請視匡山僧。

高齋小飲戲作

梅花又發鬼門關。坐覺春風萬里寬。荔子陰中時縱酒。竹枝聲裏彊追歡。丁年漢使殊方老。子夜吳歌昨夢殘。白帝夜郎俱不惡。兩公補處得憑欄。予五年間。自夔客榮。

太液黃鵠歌有引

漢始元元年春二月。黃鵠下建章宮太液池中。公卿上壽。賜諸侯王列侯宗室金錢。予夜讀漢書。追作歌一首。

建章宮裏春風寒。太液水生池面寬。中人馳奏黃鵠下。龍旗豹尾臨池看。芹香藻暖鵠得意。左右從官呼萬歲。須臾傳詔宴公卿。躍聲如雷動天地。時平宮省遊樂多。黃鵠刷羽涵恩波。小臣珥筆龍墀下。願繼前朝天馬歌。

自唐安徙家來和義出城迎之馬上作

身如林下僧。處處常寄包。家如梁上燕。歲歲旋作巢。豈惟人所憐。顧影每自嘲。眼看佳山水。不得結把茅。造物困豪傑。如視餓虎哮。要令出精神。感激使叫呌。頗思投筆去。走馬盤雲旂。三更冒急雪。大戰梁楚郊。

乙未元日除夕得制司檄催赴官

五十人間老大身。更堪從此數新春。整整漏鼓催窗色。急急文書動驛塵。病後光陰常自惜。客中節物爲誰新。壯心只向郵亭盡。自揣頭顱莫問人。

別榮州正月十日

浮生歲歲俱如夢。一枕輕安亦可人。偶落山城無事處。暫還老子自由身。嘯臺載酒雲生屨。仙穴尋梅雨墊巾。便恐清遊從此少。錦城車馬漲紅塵。嘯臺在富義門外一里。號孫登嘯臺。雙溪王氏有石穴。黃太史勝曰地仙洞。

聞仲高從兄訃

去國萬里遊。發書三日哭。久矣吾已衰。哀哉公不淑。寄書墨未乾。玉立在我目。天高鬼神惡。生世露電速。丹心抱忠貞。白首悲放逐。九閻不可叫。百身何由贖。文章果何罪。一斥獨不復。上壽阿母前。悔不早碌碌。

夏日過摩訶池

烏帽翩翩白紵輕。摩訶海上試閑行。淙淙野水鳴空苑。寂歷斜陽下廢城。縱轡迎涼看馬影。袖鞭尋句聽蟬聲。白頭散吏元無事。却爲興亡一愴情。

早行

筇馬踐槐影。紗籠吹蠟香。憑鞭尋斷夢。側帽受微涼。病骨更疎放。衰懷罷激昂。道邊雙石筍。笑我伴人忙。

天申節前三日大聖慈寺華嚴閣燃燈甚盛遊人過於元夕

萬瓦如鱗百尺梯。遙看突兀與雲齊。寶簾風定燈相射。綺陌塵香馬不嘶。星隕半空天宇靜。蓮生陸地客心迷。歸途細踏槐陰月。家在花行更向西。予官居在花行。距寺數里。

喜雨五月二十二日

黃塵赤日欲忘生。一夜新涼滿錦城。兩急驟增車轍水。泥深漸壯馬蹄聲。蚊蠅斂迹知無地。燈火於人頓有情。市遠雞豚不須問。小畦稀甲已堪烹。

夜聞浣花江聲甚壯

浣花之東當笮橋。奔流激橋橋爲搖。分洪初疑兩蛟舞。觸石散作千珠跳。壯聲每挾雷雨橫。巨勢潛借鼉鼉驕。夢回聞之坐太息。鐵衣向日東征遼。銜枚度磧沙颯颯。盤梨斷隴風蕭蕭。不然投檄徑歸去。短篷臥聽錢塘潮。

暑行憩新都驛

細細黃花落古槐。江臯不雨轉輕雷。長空烏破蒼煙去。落日人從綠野來。散策意行尋水石。脫巾高臥避氛埃。羈遊未羨端居樂。看月房湖又一回。

早發新都驛

喔喔江村雞。迢迢縣門漏。河漢縱復橫。繁星明如晝。愛涼趣上馬。未曉閱兩垓。高林起宿鳥。絕澗落驚犬。寺樓插蒼煙。沙泉瀉幽竇。我行忽萬里。坐歎關河溜。官如廣文冷。面作拾遺瘦。今年盍歸哉。勿落春雁後。

謁諸葛丞相廟彌牟八陳原上

漢中四百天所命。老賊方持太阿柄。區區梁益豈足支。不忍安坐觀異姓。遺民亦知王室在。閭位那干天統正。公雖已沒有神靈。猶假賊手誅鍾鄩。前年我過沔陽祠。再拜奠俎哀淚迸。潔齋請作送迎詩。精忠大義神其聽。

自漢州之金堂過沈氏竹園小憩坐間微雨

修修萬竹壓康莊。碧玉椽圍一尺彊。雲節煙梢誰暇賞。馬蹄車轍可憐忙。帽邊忽隨吹香句。肘後舊傳醫俗方。更覺清遊天所惜。坐來飛雨度橫塘。

自小雲頂上雲頂寺

素衣雖成緇。不爲京洛塵。躍馬上雲頂。欲呼飛仙人。飛仙不可呼。野僧意甚真。煎茶清越下。童子拾墮薪。我少本疎放。一出但坐貧。縛袴屬羶鞵。哀哉水雲身。此地雖暫寓。失喜忘吟呻。故溪歸去來。歲晚思鱸鱸。

馬上微雨

三日觸毒暑。衣垢背汗浹。今日殊蕭然。涼雨吹醉頰。瘦松無橫枝。蠶竹少全葉。堵蓮乃可念。依竝如放妾。豈惟人意適。我馬亦振鬣。遠村有歸人。清溪爭晚涉。

彌牟鎮驛舍小酌

郵亭草草置盤盂。買果煎蔬便有餘。自許白雲終醉死。不論黃紙有除書。角巾墊雨蟬聲外。細葛含風日落初。行遍天涯身尚健。卻嫌陶令愛吾廬。

遊彌牟菩提院庭下有凌霄藤附古楠其高數丈花已零落滿地

絳英翠蔓亦佳哉。零亂空庭碼瑙盃。過雨新花天有意。定知閑客欲閑來。佛經云。天風吹萎花。更用新好者。

樓上醉歌

我遊四方不得意。陽狂施藥成都市。大瓢滿貯隨所求。聊爲疲民起憔悴。飄空夜靜上高樓。買酒捲簾邀月醉。醉中拂劍光射月。往往悲歌獨流涕。刻卻君山湘水平。斫卻桂樹月更明。太白詩。刻卻君山好。平鋪湘水流。老杜詩。新御月中桂。俯光應更多。丈夫有志苦難成。修名未立華髮生。

伏日獨遊城西

幕府重來老令威。山川良是昔人非。癡兒已遣了官事。伏日元知當早歸。避熱幽花房自斂。迎秋高樹葉先飛。論詩敢補先師處。僭拂江頭舊釣磯。

五鼓送客出城馬上作

夜漏餘十刻。涼颼如九秋。灘聲聒酒醒。月色照人愁。落魄悲孤宦。龍鍾怯遠遊。此生那可料。六歲劍南州。

寓舍書懷

借得茅齋近笮橋。羈懷病思兩無聊。春從豆蔻梢頭老。日向樽蒲齒上消。叢竹曉兼風力橫。高梧夜挾雨聲驕。書生莫倚身常健。未畫凌煙鬢已凋。

夜登城樓

天上何蒼蒼。四序浩旋斡。異哉今年熱。炊爨不可活。夜分睡復起。搖筆腕欲脫。登城西樓。月露渺空闊。憑欄弄清影。涼颼入蕉葛。溼螢沾草根。驚鷓起木末。亦知難久留。襟袍資一豁。人事迭廢興。天理交予奪。羲和不停馭。去若弦上筈。此熱會當衰。歲晚備裘褐。

試茶

蒼爪初驚鷹脫鞵。得湯已見玉花浮。睡魔何止避三舍。歡伯直知輸一籌。日鑄焙香懷舊隱。谷簾試水憶西遊。銀餅銅碾俱官樣。恨欠纖纖爲捧甌。

成都大閱

千步毬場爽氣新。西山遙見碧嶙峋。令傳雪嶺蓬婆外。聲震秦川渭水濱。旗腳倚風時弄影。馬蹄經雨不霑塵。屬纊縛袴毋多恨。久矣儒冠誤此身。

書懷

萬里馳驅坐一飢。自憐無計脫塵鞿。身留幕府還家少。眼亂文書把酒稀。客路更逢秋色晚。故山空有夢魂歸。芋羹豆飯元堪飽。錯用人言恨子威。

遊大智寺

脫髮紛滿梳。衰顏不堪照。百年忽已半。去日如過燒。平生功名心。上馬無燕趙。爾來閱世故。萬事驚錯料。豈無舊朋儔。聯翩半廊廟。誰能伴此老。沂峽聽猿叫。錦城得數公。意氣如再少。偷閑訪野寺。繫馬追一笑。新糟厭玉狸。畏酒亦復醜。古股黜顛豪。壞壁冠佩肖。摩挲宋公詩。句法歎高妙。正如覽裳曲。零落得遺調。歸途繚長堤。掠面霜氣峭。佳遊不可忘。落筆君勿銷。

看月睡晚戲作

香火課夙興。風月留晚睡。直言散吏閑。亦未盡無事。舊聞雲臺翁。高枕閱塵世。至今青嶂間。鼻息亂松吹。平生寡嗜好。所願究此味。千年一欠伸。笑看巖花墜。

成都書事

劍南山水盡清輝。濯錦江邊天下稀。煙柳不遮樓角斷。風花時傍馬頭飛。萼羹笏似稽山笑。斫脍魚如笠澤肥。客報城西有園賣。老夫白首欲忘歸。

又

大城少城柳已青。東臺西臺雪正晴。鶯花又作新年夢。絲竹常聞靜夜聲。廢苑煙蕪迎馬動。清江春漲拍堤平。尊中酒滿身疆健。未恨飄零過此生。

雙溪道中

曉山笮橋門。天低日未暎。綠波寒淡淡。白霧遠昏昏。古路亂車轍。行人驚雁羣。征塗不須厭。蓬轉本無根。

牛飲市中小飲呈坐客

牛飲橋頭小市東。店門繫馬一尊同。已能自置功名外。尙欲相期意氣中。褐擁紫茸迎曉日。酒醺紅浪醉春風。從今共約無疎索。竹外梅花欲惱公。

自警

乳烹佛粥遽如許。菜簇春盤行及時。草木欣欣渠得意。乾坤浩浩我何私。慎材所忌多輕用。學道嘗從不自欺。且暮置規君勿怪。修身三省自先師。

午癡

眼腥朦朧不自支。欠伸常恨到牀遲。庭花著雨晴方見。野客敲門去始知。灰冷香煙無復在。湯成茶椀徑須持。頽然卻自嫌疏放。旋了生涯一首詩。

白髮

我生實多遭。九折行晚途。憂傷日熏心。驚見頰與顙。稍生秋風時。競出寒雨餘。星星初尙稀。纖纖不可除。昔如春柳妍。今作霜蓬枯。蓬枯有再綠。念我豈得如。平昔樂方外。固與功名疏。投箸三歎息。金丹豈無書。

明日午睡至莫復次前韻

酒分醺然入四支。華胥祝駕不應遲。殘年已覺衰難彊。萬事無如睡不知。幸有琴書供枕藉。安能冠帶更支持。紅爐過盡灰如雪。獨守青燈坐畫詩。

醉中長歌

闌干斗柄搖天東。人間一夜回春風。注桃染柳歲相似。惟我衰顏非昔紅。可憐逢春不自感。更欲使氣驚兒童。煙郊射雉錦臆碎。水亭供鱸金盞空。歸穿南市萬人看。流星突過連錢驄。高樓作歌詩自寫。墨光燭焰交長虹。人生未死貴適意。萬里作客元非窮。故人夜直金鑾殿。僵臥獨聽宮門鐘。

對酒

扇邊生怕庾公塵。索笑來遊錦水濱。四野雲齊初釀雪。一枝梅動已催春。綠尊有味能消日。白髮無情不貸人。商略此生何所恨。太平時得自由身。

人日飲昭覺

天涯羈旅逢人日。病起消搖集寶坊。雪水初融錦江漲。梅花半落綠苔香。家山松桂年年長。幕府文書日日忙。自笑餘生有幾許。一菴借與得深藏。

上元前一日

異縣客遊久。今年春事遲。峭寒增酒價。微雨惱燈期。老態人未覺。孤愁心自知。停車呼病婦。彊出伴諸兒。



上元

細細香塵暗六街。魚鱗淺碧暮雲開。新粧褰幕全身見。誤馬隨車一笑回。酒釀頓忘風力峭。夜長猶恨漏聲催。京華舊侶彫零盡。短髮成絲心未灰。

又

病起衰顏非昔紅。偷閑聊與少年同。一規寒玉挂樓角。千點華星來坐中。久戍遺民雖困弊。承平舊鎮尙繁雄。歸時瘦馬崔嵬影。定有遊人笑此翁。

喜譚德稱歸

少鄙章句學。所慕在經世。諸公薦文章。頗恨非素志。一朝落江湖。爛熳得自恣。討論極王霸。事業窺華涓。孔明景略間。卻立頗毗睨。從人無一欣。對食有三喟。譚侯信豪雋。可共不朽事。天涯再相見。握手更拭淚。欲尋西郊路。斗酒傾意氣。浩歌君和我。勿作尋常醉。

春感

少時狂走西復東。銀鞍駿馬馳如風。眼看春去不復惜。只道歲月來無窮。初遊漢中亦未覺。一飲尙可傾千鍾。又魚浪藉潦水濁。獵虎蹴躡南山空。射獮命中萬人看。毬門對植雙旗紅。華堂卻來弄筆硯。新詩醉草誇坐中。劍關南山纔幾日。壯氣摧縮成衰翁。雪霜蕭颯已滿鬢。蛟龍鬱屈空蟠胸。鄰園杏花忽爛熳。推枕彊起隨遊蜂。邊看百匝幾歎息。吹紅洗綠行怱怱。暮年逢春尙有幾。常恐春去尋無踪。青錢三百幸可辦。且判爛醉酤郵筒。

春晴暄甚遊西市施家園

稅駕名園半日留。遊絲飛蝶晚悠悠。驟暄不爲海棠計。長晝只添鸚鵡愁。老去自驚詩酒減。客中偏覺歲時遒。東風好爲吹歸夢。著我松江弄釣舟。

花時遍遊諸家園

看花南陌復東阡。曉露初乾日正妍。走馬碧雞坊裏去。市人喚作海棠顛。

又

爲愛名花抵死狂。只愁風日損紅芳。綠章夜奏通明殿。乞借春陰護海棠。

又

翩翩馬上帽簷斜。盡日尋春不到家。偏愛張園好風景。半天高柳臥殘花。

又

花陰掃地置清尊。爛醉歸時夜已分。欲睡未成欹倦枕。輪囷帳底見紅雲。

又

宣華無樹著啼鶯。惟有摩訶春水生。故老能言當日事。直將宮錦裏宮城。

又

枝上猩猩血未晞。尊前紅袖醉成圍。應須直到三更看。畫燭如椽爲發輝。

又

重萼丹砂品最高。可憐寂寞棄蓬蒿。會當車載金錢去。買取春歸亦足豪。小東門外有千葉朱砂海棠一株。奇麗絕代。在荒園中。人罕見者。

又

絲絲紅萼弄春柔。不似疎梅只慣愁。常恐夜寒花索寞。錦茵銀燭按涼州。

又

飛花盡逐五更風。不照先生社酒中。輸與新來雙燕子。御泥猶得帶殘紅。今年二月二日社。而海棠已墮。

又

海棠已過不成春。絲竹淒涼鎖暗塵。眼看燕脂吹作雪。不須零落始愁人。

又

曉出錦江邊。長橋柳帶煙。豪華行樂地。芳潤養花天。擁路看欹帽。窺門笑墜鞭。京華歸未得。聊此送流年。

又

自合江亭涉江至趙園

政爲梅花憶兩京。海棠又滿錦官城。鴉藏高柳陰初密。馬涉清江水未生。風掠春衫驚小冷。酒潮玉頰見微頰。殘年飄泊無時了。腸斷樓頭畫角聲。

春晴

一庭無絮鬪身輕。百尺遊絲弄午晴。靜喜香煙縈曲几。臥驚玉子落紋枰。新春易失遽如許。薄宦忘歸何似生。安得一船東下峽。江南江北聽鶯聲。

卷七

題明皇幸蜀圖

天寶政事何披猖。使典相國胡奴王。弄權楊李不足怪。阿瞞手自裂紀綱。八姨富貴尙有理。何至詔書褒五郎。天寶末。下詔雪張易之兄弟。盧龍賊騎已洶洶。丹鳳神語猶琅琅。人知大勢危繫卵。天稔奇禍如崩牆。臺省諸公獨耐事。歌詠功德卑虞唐。一朝殺氣橫天末。疋馬西奔幾不脫。向來諂子知幾人。賊前稱臣草間活。劍南萬里望秦天。行殿春寒聞杜鵑。老臣九齡不可作。魚蠹蛛絲金鑑篇。

春寒連日不出

海棠花入燕泥乾。梅子枝頭已帶酸。老去嬾尋年少夢。春分不減社前寒。著書敢望垂千載。嗜酒猶須隱一官。正是閑時無客過。小庭斜日倚闌干。

馬上偶成

城南城北紫遊韉。貴日閑行看似忙。刺水離離葛葉短。連村漠漠豆花香。夕陽有信催殘角。春草無情上繚牆。我亦人間倦遊者。長吟聊復愴興亡。

夜宴

酒浪搖春不受寒。燭花垂燼忽堆盤。山川路遠人將老。絲管聲逾夜向闌。四海交朋更聚散。百年光景雜悲歡。自憐病眼猶明在。更把名花半醉看。是夕得范希元家晚海棠數枝。繁麗一城所無。

觀音院讀壁間蘇在廷少卿兩小詩次韻

揚鞭暮出錦官城。小院無僧有月明。不信道人心似鐵。隔城猶送擗衣聲。

又

老去癡頑不受鑄。姓名身後更須傳。世間商略無歸處。只合長齋繡佛前。

錦亭

天公爲我齒頰計。遣飫黃甘與丹荔。又憐狂眼老更狂。令看廣陵芍藥蜀海棠。周行萬里逐所樂。天公於我元不薄。貴人不出長安城。寶帶華纓真汝縛。樂哉今從石湖公。大度不計艷豔聲。夜宴新亭海棠底。紅雲倒吸玻璃鍾。琵琶絃繁腰鼓急。盤鳳舞衫香霧溼。春醪凸盞燭光搖。素月中天花影立。遊人如雲環玉帳。詩未落紙先傳唱。此邦句律方一新。鳳閣舍人今有樣。

晚起

新晴窗日弄春妍。幌小屏深意自便。長恨病多妨痛飲。卻緣客少得安眠。雛鶯故故啼簷角。飛絮翩翩墮枕前。欲著衣裳還懶起。重尋殘夢一悠然。

雨

映空初作繭絲微。掠地俄成箭鏃飛。紙帳光遲鏡曉夢。銅鑪香潤覆春衣。池魚鱗鱗隨溝出。梁燕翩翩接翅歸。惟有落花吹不去。數枝紅溼自相依。

春晚書懷

萬里西遊爲覓詩。錦城更付一官癡。脫巾漉酒從人笑。拄笏看山頗自奇。疎雨池塘魚避釣。曉鶯窗戶客爭某。老來怕與春爲別。醉過殘紅滿地時。

出朝天門繚長堤至劉侍郎廟由小西門歸

曉從北郭過西城。十里沙堤似席平。檐日向人供帽影。微風傍馬助鞭聲。歡情寂寂隨年減。俗事紛紛逐日生。到處每求佳水竹。晚途牢落念歸耕。

夜分讀書有感

光陰百歲已中分。擬結茅茨老白雲。萬里誰憐新臥疾。九重猶記舊能文。枕邊得句題屏疊。馬上看山隔帽羃。終恨無勞糜廩粟。夜窗聊策讀書勳。

中夜聞大雷雨

雷車駕雨龍盡起。電行半空如狂矢。中原腥羶五十年。上帝震怒初一洗。黃頭女真褻魂魄。面縛軍門爭請死。已聞三箭定天山。何啻殲甲齊熊耳。捷書馳騎奏行宮。近臣上壽天顏喜。閭門明日催賀班。雲集千官摩劍履。長安父老請移躡。願見六龍臨渭水。從今身是太平人。敢憚安西九千里。

春殘

石鏡山前送落暉。春殘回首倍依依。時平壯士無功老。鄉遠征人有夢歸。首稽苗侵官道合。蕪菁花入麥畦稀。倦遊自笑摧頹甚。誰記飛鷹醉打圍。

武擔東臺晚望

顛賴西窗已一翁。登高意氣尚豪雄。關河霸國興亡後。風月詩人醉醒中。病起頓驚雙鬢改。春歸一掃萬花空。欄邊徙倚君知否。直到吳天目未窮。

行武擔西南村落有感

騎馬悠然欲斷魂。春愁滿眼與誰論。市朝遷變歸蕪沒。壩谷飭飭互吐吞。一徑松楠遙見寺。數家雞犬自成村。最憐高冢臨官道。細細煙莎遍燒痕。有大家高數丈。旁又一冢差小。莫知何代人也。俗號太子墓。

小飲房園

宦遊到處即忘家。況得閑身管物華。疎索故人緣病酒。折除厚祿爲看花。泥新高棟初巢燕。萍匝荒池已集蛙。斟酌人生要行樂。燈前起舞落烏紗。

飯昭覺寺抵暮乃歸

身隨黃塵每慨然。攜兒蕭散亦前緣。聊憑方外巾盂淨。一洗人間匕箸羶。靜院春風傳浴鼓。畫廊晚雨溼茶煙。潯

光寮裏明窗下。借我消搖過十年。

自芳華樓過瑤林莊

春晚江邊草過腰。雨餘樓下水平橋。名花未落如相待。佳客能來不費招。欄角峭風羅袖薄。柳陰斜日玉驄驕。此身醉死元關命。敢笑聞雞趁早朝。

書懷

詩不能工浪得窮。幾年袞袞看諸公。摧頹已作驥伏櫪。留滯敢嫌船逆風。消日劇棊疎竹下。送春爛醉亂花中。倚樓看鏡俱癡絕。贏得煙蓑伴釣翁。

遊東郭趙氏園

清晨呼馬出。馭吏請所之。錦城浩如海。我亦無與期。有花卽入門。莫問主人誰。下馬據胡牀。傲睨忘訶譏。人言白頭翁。胡爲尙兒癡。老翁故不癡。借花發吾詩。詩句帶花香。東風不敢吹。徘徊雙蛺蝶。許汝鼻端知。

卜居

歷盡人間行路難。老來要覓數年閑。供家米少因添鶴。買宅錢多爲見山。池面紋生風細細。花根土潤雨斑斑。借春乞火依鄰里。剩釀村醪約往還。

又

南浮七澤弔沉湘。西泝三巴掠夜郎。自信前緣與人薄。每求寬地寄吾狂。雪山水作中濡味。蒙頂茶如正焙香。儻有把茅端可老。不須辛苦念還鄉。

馬上

春殘馬上意悵悵。縱轡微吟過數坊。綠樹成帷連藥市。清流如帶繞毬場。城荒鼓角增悲壯。苑廢雲煙尙莽蒼。堪笑年來向詩嬾。還家古錦只空囊。

夜登江樓

平生胸中無滯留。曠然獨與造物遊。天風駕我周寓縣。夜半忽過江邊樓。樓前茫茫天地闊。萬頃月浸空江秋。雲

階無塵鷺鶴舞。玉笛裂石魚龍愁。肺肝澄澈納灑氣。毛髮慘慄臨寒流。世間回首真一夢。誰能更念酬恩讎。

書歎

早得虛名翰墨林。謝歸忽已歲時侵。春郊射雉朝盤馬。秋院焚香夜弄琴。病酒閉門常兀兀。哦詩袖手久愔愔。浮沉不是忘經世。後有仁人識此心。

三月一日府宴學射山

北出昇仙路少東。據鞍自笑老從戎。百年身世酣歌裏。千古功名感慨中。天遠僅分山髣髴。霧收初見日瞳矐。橫空我欲江湖去。誰借冷然禦寇風。

對酒

閑愁如飛雪。入酒即消融。好花如故人。一笑盃自空。流鶯有情亦念我。柳邊盡日啼春風。長安不到十四載。酒徒往往成衰翁。九環寶帶光照地。不如留君雙頰紅。

題直舍壁

文書那得廢哦詩。羞作羣兒了事癡。付與後人評此老。一丘一壑過元規。

遊園覺乾明祥符三院至暮

成都再見春事殘。雖名閑官實不閑。門前車馬鬧如市。案上文檄高於山。有時投錄輒徑出。略似齊客偷秦關。日斜僕夫已整駕。顧景欲駐愁嚙訕。豈知今朝有此樂。放浪一笑開衰顏。抽身黃塵烏帽底。得意翠木清泉間。褰裳危磴窮學確。洗耳古澗聽淙澗。豈惟頓覺宇宙廣。政爾一散腰腳頑。似聞青城縹緲處。待我歸綴仙官班。俊鷹解條卽萬里。豈比倦翼方知還。

遊合江園戲題

朱朱白白池臺間。好風妍日開未殘。我來覓醉苦草草。常恨不如花意閑。山雞飛起亂花落。下上青林穿翠壑。世間動步卽有拘。常恨不如禽意樂。人言功名恐不免。我願徜徉娛歲晚。熟計姪書理白魚。何如縱獵牽黃犬。成都四郊如砥平。安得雙輪馳出城。鞚飛塵起望不見。從騎尋我鳴鶻聲。

三月十六日作

石筍街西風景幽。醉眠萬事付悠悠。倦遊我已七年客。促駕春無三日留。枝上蝶稀紅藥老。會中蠶起綠桑柔。功名隨甌誰能問。羞作飢鷹夜掣鞬。

食齋

日日思歸飽蕨薇。春來齋美忽忘歸。傳誇真欲嫌茶苦。自笑何時得瓠肥。

又

采采珍蔬不待畦。中原正味壓蓴絲。挑根擇葉無虛日。直到開花如雪時。

又

小箸鹽醢助滋味。微加薑桂發精神。風爐歛鉢窮家活。妙訣何曾肯授人。

次韻范文淵

簞瓢氣已壓膏粱。不傍朱門味更長。細看高人忘寵辱。始知吾輩可憐傷。巖扃勾漏新丹竈。香火匡廬古道場。剩欲與君堅此約。它年八十鬢眉蒼。近有術者言僕壽只八十。

題醉中所作草書卷後

胸中磊落藏五兵。欲試無路空崢嶸。酒爲旗鼓筆刀染。勢從日落銀河傾。端溪石池濃作墨。燭光相射飛縱橫。須臾收卷復把酒。如見萬里煙塵清。丈夫身在要在立。逆虜運盡行當平。何時夜出五原塞。不聞人語聞鞭聲。

登子城新樓遍至西園池亭

狂夫無計奈狂何。何況登臨逸興多。千疊雪山連滴博。一支春水入摩訶。吟餘騎省霜侵鬢。釣罷玄真雨滿蓑。逐虜榆關期尙遠。不妨隨處得婆娑。

小疾謝客

小疾深居不喚醫。消搖更覺勝平時。癡人未害看周易。名士真須讀楚辭。綠徑風斜花片片。畫廊人靜雨絲絲。晚來頓覺清羸甚。自置篝爐煮粟糜。



歸耕

遠牒人間壽欲疎。歸耕且復補東隅。甑炊地碓新春米。衣拆天吳舊繡圖。有圖免煩官送菜。叩門翻喜吏徵租。不愁問字無來客。惟欠揚雄宅一區。

聞孫巖老挂冠歎仰之餘輒賦長句

聖賢在世龍行天。出處何至爲物牽。後人競作駒伏轅。未死奄奄如九泉。鄆孫公者山澤仙。蟻巖玉骨寒入肩。哦詩調苦亂磨蠲。燥墨澆字醜不妍。諸公好之挽使前。六丁力盡山巖然。奏書告老不待年。脫手徑上嶮山巔。吾儕一官自糾纏。俛首鞭箠不自憐。彊欲作詩誦公賢。事偉辭卑難並傳。

松蘿行

巖行千里亦何得。垂首伏櫪終自傷。松閣千年棄澗壑。不如殺身扶明堂。士生抱材願少試。誓取燕趙歸君王。閉門高臥身欲老。鬪雞相蹴儻數行。正令咿嚶死牀簧。豈若橫身當戰場。半酣浩歌聲激烈。車輪百轉盤愁腸。

遣興

鷓鴣料無多又掃空。今年真是浣花翁。放教綠酒關身事。留得朱顏在鏡中。挾彈園林芳徑雨。投竿窗檻小溪風。癡頑自笑歸何日。家在東吳更向東。

野意

小東門外曳筇枝。白葛烏紗自一奇。閑客逍遙無吏責。茂陰清潤勝花時。茶經每向僧窗讀。菰米仍於野艇炊。便覺眼邊歸路近。鏡湖禹廟見參差。

雨中登安福寺塔俗謂之黑塔

平生喜登高。醉眼無疆界。北顧極幽并。東望跨海岱。喟然撫手歎。從古幾成敗。英雄如過鳥。城郭但遺塊。今朝上黑塔。千里曠無礙。忽驚風霆掣。坐覺天地晦。急雨挾龍腥。溽暑爲摧壞。皇天念蟠鬱。令我寄一快。那知書生狂。自倚心眼大。更思駐潼關。黃河看如帶。

過野人家有感

縱轡江臯送夕暉。誰家井臼映荆扉。隔離犬吠窺人過。滿箔蠶飢待葉歸。吳人直謂桑白葉。世態十年看爛熟。家山萬里夢依稀。躬耕本是英雄事。老死南陽未必非。

幽居晚興

借鉏斲藥喜微香。汲井澆花趁晚涼。願次何曾橫一物。尊前尙欲笑千場。錦江秋雨芙蓉老。笠澤春風杜若芳。歸去自佳留亦樂。夢中何處是吾鄉。

飯保福

縫雨雲低未放晴。閉門作病憶閑行。攝衣丈室參耆宿。曳杖長廊喚弟兄。飽飯即知吾事了。免官初覺此身輕。歸來更欲誇妻子。學煮雲堂芋糝羹。

觀華嚴閣僧齋閣下自西月初至七月末日飯僧數千人

拂劍當年氣吐虹。暗鳴坐覺朔庭空。早知壯志成癡絕。悔不藏名萬衲中。

閑中偶題

楚澤巴山歲歲忙。今年睡足向禪房。只知閑味如茶永。不放羈愁似草長。架上漢書那復看。牀頭周易亦相忘。客來拈起清談麈。且破西窗半篆香。

又

久矣雲衢斂羽翰。退飛更覓一枝安。七千里外新閑客。十五年前舊史官。花底清歌春載酒。江邊明月夜投竿。疑頑直爲多更事。莫怪胸懷抵死寬。

病中戲書

五十忽過二。流年消壯心。避人便小疾。移竹喜微陰。洗甕閑寫酒。焚香靜斲琴。鏡中青鬢在。切莫遣愁侵。

微疾錢餘災。時須藥裏開。禽驚杵聲去。蜂認蜜香來。閉戶知長日。全生幸散材。晚涼幽興動。彊到竹邊回。

又

食筍動衰疾。清羸逾兩旬。藥囊隨臥起。詩句雜吟呻。架足書籤蠹。窗凝酒榼塵。免從官乞假。且喜是閑身。

病起書懷

病骨支離紗帽寬。孤臣萬里客江干。位卑未敢忘憂國。事定猶須待闔棺。天地神靈扶廟社。京華父老望和鑾。出師一表通今古。夜半挑燈更細看。

又

酒酣看劍凜生風。身是天涯一秃翁。捫蝨劇談空自許。聞雞浩歎與誰同。玉關歲晚無來使。沙苑春生有去鴻。人壽定非金石永。可令虛死蜀山中。

寺樓月夜醉中戲作

素壁徐升天宇閑。連峯積雪蒼茫間。樓臺是處可見月。無此巉巖羣玉山。

又

水精盞映碧琳腴。月下泠泠看似無。此酒定從何處得。判知不是文君壚。

又

海山縹緲玉真妃。貪看冰輪不肯歸。樓上三更風露冷。旋圍步障換羅衣。

晚過五門

五門路四月。乳鴉啼綠樹。閑遊但喜日初長。薄暑始知春已去。樓頭風高無雙旂。畫角聲中日還暮。馬蹄特無斷時。老盡行人路如故。

躬耕

莫笑躬耕老蜀山。也勝菜把仰園官。喚回癡夢塵機息。空盡閑愁酒地寬。無復短衣隨李廣。但思微雨過蘇端。十年世事茫如海。輪與閑人靜處看。

晚興

老病愁趨畫戟門。天教高臥浣花村。山林獨往雜屠釣。世界皆空誰怨恩。書說要經言觀空之法。自一城一國一

世界至三千大千世界皆空。千卷蠹書忘歲月。一尊濁酒信乾坤。與來倚杖清江上。斷角疎鐘正斂昏。

夏夜大醉醒後有感

少時酒隱東海濱。結交盡是英豪人。龍泉三尺動牛斗。陰符一編役鬼神。客遊山南夜望氣。頗謂王師當入秦。欲傾天上河漢水。淨洗關中胡虜塵。那知一旦事大繆。鑿鑿劍閣霜毛新。卻將覆甕草檄手。小詩點綴西州春。素心雖願老巖壑。大義未敢忘君臣。雞鳴酒解不成寐。起坐肝膽空輪囷。

合江夜宴歸馬上作

零露中宵溼綠苔。江郊縱飲亦荒哉。引盃快似黃河瀉。落筆聲如白雨來。纖指醉聽箏柱促。長檠時看燭花摧。頭顛自揣應虛死。馬上長歌寄此哀。

齋居書事

慵養金丹換鬢鬢。微霜正要稱清癯。平生風露充蟬腹。到處雲山寄鶴羈。道室焚香勤守白。虛窗點易靜研朱。自知世事難諧偶。不待幽人夜見呼。

午夢

苦愛幽窗午夢長。此中與世暫相忘。華山處士如容見。不覓仙方覓睡方。

江濱池納涼

雨過荒池藻荇香。月明如水浸胡牀。天公作意憐羈客。乞與今年一夏涼。

晚步

屏居無俗事。薄暮行溪園。斷續風蟬噪。俯仰露葉飜。月出照西壁。參差見簷痕。新沐懶不櫛。清冷入髮根。臨流揮羽扇。對月傾芳尊。寄謝南昌尉。何必隱市門。

姚將軍靖庚初以戰敗亡命建炎中下詔求之不可得後五十年乃從呂洞賓劉高尙往來名山有見之者予感其事作詩寄題青城山上清宮壁間將軍儻見之乎

造物困豪傑。意將使有爲。功名未足言。或作出世資。姚公勇冠軍。百戰起西陲。天方覆中原。殆非一木支。脫身五

十年世人識公誰。但驚山澤間。有此熊豹姿。我亦志方外。白頭未逢師。年來幸廢放。儻遂與世辭。從公遊五嶽。稽首餐靈芝。金骨換綠髓。歛然松杪飛。

客自鳳州來言岐雍間事悵然有感

交襄山河古帝京。逆胡數盡固當平。千門未報甘泉火。萬耦方觀渭上耕。前日已傳天狗墮。去年十一月天狗墮。以安。聲甚大。今年寧許佛狸生。會須一洗儒酸態。獵罷南山夜下營。

席上作

綠波畫樂浣花船。清簟疎簾角黍筵。一幅葛巾林下客。百壺春酒飲中仙。散懷絲管繁華地。寄傲江湖浩蕩天。浮世升沉何足計。丹成碧落珥貂蟬。青城山中有孫太古畫碧落侍中范長生舉手整貂蟬像持妙。

水亭偶題

水樹閑拈玉笛吹。十年疎放負明時。溝中木斷誰曾問。空裏蓬征自不知。金井梧桐生晝寂。綠池蘋藻弄風漪。人生行樂從來事。此理何須更細推。

避暑江上

古熱厭城市。初夜臨江湍。風從西山來。頗帶積雪寒。堰聲靜尤壯。噴薄如急灘。頓遠車馬喧。更覺衣裳單。斷岸吐吹月。恨不三更看。且隨螢火歸。城扉欲橫闌。

夏白紵弁序

古有四時白紵。亦有止作一時者。丙申五月在成都。烈暑可畏。戲作夏白紵二首。

翠母屏薄望如空。水精簾疎不礙風。笑人獨立何所似。白玉芙蓉秋水中。素綃細織冰蠶繭。清寒不受人間暑。晚來浴罷綠窗閑。自把新詩教鸚鵡。

又

翔鸞矯矯離風塵。眼明見此絕代人。紗窗弄筆消永日。臨得黃庭新逼真。飛梅縹緲今何夕。月與玉人同一色。下廉不爲九霄寒。自要玲瓏看團璧。

久旱忽大雨涼甚小飲醉眠覺而有作

暑雨蕭蕭滴夜長。曉窗探借九秋涼。金荷淺酌閑傳酒。銀葉無煙靜炷香。舒雁且爲賒死計。鳴鳩便欲策勳忙。散人亦未全無事。枕藉琴書滿一牀。

明日開霽益涼復得長句

睡起東窗照眼明。朝陽爛熳作新晴。已聞雨斷空階滴。更覺風從細葛生。蚊蝶飛來停酒榼。石榴飄落糝棋枰。四時好處閑方覺。不枉今年住錦城。

夜讀東京記

海東小胡辜覆冒。敢據神州竊名號。幅員萬里宋乾坤。五十一年讎未報。煌煌藝祖中天業。東都實宅神明隲。卽今犬豕穴宮殿。安得旄頭下除掃。竇玉大弓久不獲。臣子義敢忘巨盜。景靈太廟威神在。北鄉慟哭猶可告。壯士方當棄軀命。書生詎忍開和好。孤臣白首困西南。有志不伸空自悼。

感事

青鬢當時映綠衣。堯功曾預記巍巍。玄都春老人何在。華表天高鶴未歸。流輩凋疎情話少。年光遞暮壯心違。倚樓不用悲身世。倦鷁無風亦退飛。

書歎

三代藏寶器。世守參河圖。埋湮則已矣。可使列市區。文章有廢興。蓋與治亂符。慶曆嘉祐間。和氣扇大鑪。數公實主盟。渾灑配典謨。開闢始歐王。誓奮遠會蘇。大駕初渡江。中原皆避胡。吾猶及故老。清夜陪坐隅。論文有脈絡。千古著不誣。俯仰四十年。綠髮霜蓬枯。孤生尊所聞。秉節不敢渝。久幽士固有。速售理則無。世方亂珉玉。吾其老江湖。

睡起

睡味清酣鼻息輕。碧嚮文簾喜涼生。片雲過處失簾影。急雨來時聞瓦聲。索虜尙憑三輔險。散關未下九天兵。白頭漫倚詩書在。手製鯨魚意未平。

飯罷碾茶戲書

江風吹雨暗衡門。手碾新茶破睡昏。小餅戲龍供玉食。今年也到浣花村。

夢遊山水奇麗處有古宮觀云雲臺觀也

神遊忽到雲臺宮。太華彩翠明秋空。曲廊下闕白蓮沼。小閣正對青蘿峯。林間突兀見古碣。雲外縹緲聞疎鐘。襦衣紗帽瘦如削。遺像恐是希夷翁。窮搜未遍忽驚覺。半窗朝日初瞳矇。卻思巉然五千仞。可使常隨胡塵中。小臣味死露肝膈。願屬靈駕臨崢嶸。何當真過此山下。百尺孀嬭龍旗風。

月下醉題

黃鵠飛鳴未免飢。此身自笑欲何之。閉門種菜英雄老。彈劍思魚富貴遲。生擬入山隨李廣。死當穿冢近要離。一樽彊醉南樓月。感慨長吟恐過悲。

野外劇飲示坐中

悲歌流涕遣誰聽。酒隱人間已半生。但恨見疑非節俠。豈忘小忍就功名。江湖舟楫行安往。燕趙風塵久未平。飲罷別君攜劍起。試橫雲海翦長鯨。

與青城道人飲酒作

君不見大傅晚歲具海舟。歸歆極意東山遊。翰林偶脫夜郎譴。大醉賦詩黃鶴樓。兩公窮達何足道。司是逸氣橫清秋。我無一事行萬里。青山白雲聊散愁。有酒不換西涼州。無酒不典鸚鵡裘。不作王猛傲睨坐捫髀。不作寧戚悲歌起飯牛。五雲覆鼎金丹熟。笙鶴飄然戲十洲。

銅壺閣望月

銅壺閣上看明月。身在千尋白銀闕。十年肺渴今夕平。皓然胸次堆冰雪。恨無仙掌出雲表。更取陸露和玉屑。夜闕三數下危梯。明日人間火雲熱。

連日得雨涼甚有作

九淵龍起跨蒼茫。聊爲西州洗亢陽。曉看空濛知歲稔。夜聞點滴覺心涼。紗幮不下蚊蠅靜。焙火微溫書畫香。睡

足何須雲夢澤。如雷鼻息撼鄰牆。

待青城道人不至

我亦從來薄世緣。偶然采藥到西川。慵追萬里騎鯨客。且伴千年化鶴仙。金鼎養丹瞰海日。玉壺取酒醉江天。朝來坐待方平久。讀盡黃庭內外篇。

劍客行

我友劍俠非常人。袖中青蛇生細鱗。騰空頃刻已千里。手決風雲驚鬼神。荆軻專諸何足數。正豈入燕誅逆虜。一身獨報萬國讎。歸告昌陵淚如雨。

夜宴卽席作

宣華輦路收牛羊。摩訶龍池草茫茫。宮殿半盡綠繚牆。南風遠吹禾黍香。草間白骨橫秋霜。何由喚起酹一觴。癡人走死聲利場。我獨感此惜流光。蘋花開時風榭涼。笑人縹緲如鸞翔。幾年曠日藥未央。非子之故爲誰狂。

宿沱江彌勒院

兩足破塘盜。庭空草樹荒。衰年愁客路。野寺憩衣囊。蛙吹喧孤枕。蚊雷動四廊。青燈照無寐。寂寞數更長。

學射道中感事

學射山前宿雨收。籃輿穿輦自生愁。得閑何惜傾家釀。漸老真須秉蠶遊。道廢尙書猶乞米。時來校尉亦封侯。自憐白首能豪在。車轍何因遍九州。

遊學射觀次壁間詩韻

走遍人間鬢尙青。爾來樂事滿餘齡。傍潭秋爽鉏甘菊。登嶽春暄采茯苓。閑倚松蘿論劍術。靜臨窗几勘丹經。嚴光本是逃名者。安用天文動客星。

昇仙橋遇風雨大至憩小店

觸熱真疑墮火灰。雨如飛鏃亦佳哉。空江魚鼈從龍起。平野雷霆擁馬來。正怪橫吹屋茅盡。俄聞下擊澗松摧。晚來日漏風猶急。臥看柴扉闔復開。



龍挂

成都六月天大風。發屋動地聲勢雄。黑雲崒嵬行風中。凜如鬼神塞虛空。霹靂迸火射地紅。上帝有命起伏龍。龍尾不卷曳天東。壯哉雨點車軸同。山摧江溢路不通。連根拔出千尺松。未言爲人作年豐。偉觀一洗芥蒂胸。

芳華樓夜宴

射虎將軍老不侯。尙能豪縱醉江樓。笙歌雜沓娛清夜。風露高寒接素秋。少日壯心輕玉塞。暮年幽夢墮滄洲。人間清絕沅湘路。常笑靈均作許愁。

遣興

老子從來薄宦情。不辭落魄錦官城。生前猶著幾兩屐。身後更須千載名。樓外雪山森曉色。井邊風葉戰秋聲。一尊尙有臨邛酒。卻爲無憂得細傾。邛州宇文吏部餉酒絕佳。

六月九日夜步月至朝真觀

朝斗真人有舊祠。追涼老子曳筇枝。從來步月難爲客。此夕聽琴合有詩。竹院沉沉聞漏永。玉繩耿耿看星移。慙更作重來約。迨及冰輪未缺時。

十日夜月中馬上作

身遊碧海跨鯨魚。心似寒冰貯玉壺。衣溼三更清露墜。眼明萬里片雲無。橫空孤鶴曾相識。散髮飛仙定可呼。老向人間無復意。逝將從此謁清都。

百歲

百歲紛紛易白頭。一年鼎鼎又清秋。壯心空似驪伏櫪。病骨敢懷狐首丘。屠釣論交成酒隱。山林高臥得天遊。莫悲晚節功名誤。卽死猶堪贈醉侯。

獨飲醉臥比覺已夜半矣戲作此詩

澤畔元非慕獨醒。散人一飲費經營。也知世少蘇司業。安得官如阮步兵。醉著面顏驚少壯。澆餘胸次失崢嶸。更聞莫厭殘燈火。臥聽空廊絡緯聲。

蒙恩奉祠桐柏

少年曾綴紫宸班。晚落危途九折艱。罪大初聞收郡印。恩寬俄許領家山。羈鴻但自思煙渚。病驥寧容著帶閑。回首觚稜渺何處。從今常寄夢魂間。

和范待制月夜有感

榆枋正復異鵬飛。等是垂頭受轡韉。坐客笑談嘲遠志。故人書札寄當歸。醉思葦菜黏篙滑。饑憶鱸魚墜釣肥。誰遣貴人同此感。夜來風月夢苔磯。

和范待制秋興

策策桐飄已半空。啼螿漸近房櫳。一生不作牛衣泣。萬事從渠馬耳風。名姓已甘黃紙外。光陰全付綠尊中。門前刺啄誰相覓。賀我今年號放翁。

又

睡臉餘痕印枕紋。秋衾微潤覆爐熏。井桐搖落先霜盡。衣杵淒涼帶月聞。佛屋紗燈明小像。經奩魚蠹蝕真文。身如病驥惟思臥。誰許能空萬馬羣。

又

山澤沉冥氣尚豪。鬢絲未遠歎蕭條。已忘海運鯤鵬化。那計風微燕雀高。萬里客魂迷楚峽。五更歸夢隔胥溝。故知有酒當勤醉。自古寧聞死可逃。

和范待制秋日書懷二首游自七月病起蔬食止酒故詩中及之

閑窗貝葉對旁行。不覺城笳報夕陽。嗜酒步兵猶未達。拂衣司諫亦成忙。室無摩詰持花女。囊有婆娑等餽香。欲與衆生共安隱。秋來夢不到鱸鄉。陳文惠公松江詩云。西風斜日鱸魚鄉。傳本或誤作香字。張文潛嘗辨之。

又

故人無字寄相思。敢向窮途怨不知。老病已全惟欠死。貪嗔雖斷尚餘疑。數莖雪鬢江湖遠。九轉金丹日月遲。奮粟山苗俱可飽。明年東去隱峨眉。

卷八

遊學射山遇景道人

肩輿適青郊。飛屐登翠麓。餘霜未泫瓦。晨日初掛木。推門覓黃冠。避客似奔鹿。雖無與晤語。清坐意亦足。豈知逢此土。曠度超世俗。欣然同一笑。齒頰粲冰玉。探囊贈奇草。甘香勝芍藥。試臨清鏡照。衰髮森已綠。出門恣幽討。老仙有遺躡。丹竈雖已空。藥丸過山谷。嗟予迫遲暮。冠蓋厭追逐。結茅遠人境。此計亦已熟。若人真我友。玉字當共讀。客來不知處。雞犬望雲屋。

城東醉歸深夜復呼酒作此詩

冬夜走馬城東回。追風逐電何雄哉。五門鼓動燈火鬧。意氣忽覺如章臺。歸來脫靴靴滿霜。月明如水浸野堂。梅花滿手不可負。催熾獸炭傳清觴。書生所懷未易料。會與君王掃燕趙。只愁漸老不禁寒。臥載轎車君勿笑。

融州寄松紋劍

十年學劍勇成癡。騰身一上三千尺。術成欲試酒半酣。直躡丹梯削青壁。青壁一削平無蹤。浩歌卻過蓮花峯。世人仰視那得測。但怪雪刃飛秋空。老胡畏誅奉約束。假息漁陽運上谷。願聞下詔遣材官。恥作腐儒常碌碌。

歲晚

歲晚城隅車馬稀。偷閑聊得掩荆扉。征蓬滿野風霜苦。多稼連雲雁鶩肥。報國有心空自信。結茅無地竟安歸。浣花道上人誰識。華表千年老令威。

玉京行觀煉丹作

玉京清都奉紫皇。赤明開皇劫茫茫。有路坦如馳康莊。惜哉背之趨死鄉。絳陵朱兒朝吐光。森然箭鏃攢玉牀。潔齋山棲祓不祥。朝餐夕食芝朮香。縹囊藥笈出祕方。日精月華鍊陰陽。爐開沐浴浴時日長。清夜玉杵闐琳房。服之刀圭換肝腸。三十六帝參翔翔。下視一笑爭奪場。壘壘枯冢壓北邙。

步出萬里橋門至江上

久坐意不憚。捲卷聊出遊。一筇吾事足。安用車與騶。浮生了無根。兩踵躡百州。常憶航巨海。銀山卷濤頭。一日新雨霽。微茫見流求。在福州。泛海東望。見流求國。西行亦足快。縱獵南山秋。騰身刺猛虎。至今血濺裘。命薄每自笑。校尉略已侯。短劍隱市塵。浩歌醉江樓。頗疑屠博中。可與共奇謀。丈夫等一死。滅賊報國讎。徙倚萬里橋。寒日隨前洲。

晚步

院荒有古意。僧少無人學。徘徊楠陰下。賞此落日明。著書亦何急。寂寞身後名。今年復止酒。歌舞陳空觥。不如且消搖。出門隨意行。看竹入廢園。望江上高城。纖纖素月出。霜露蒼煙橫。此夕當復奇。嶽山吹玉笙。

數日寒頓減。頗有春意。感懷賦短歌

微陰寒不力。破臘春暗動。林梢報梅白。水際聞鳥哢。鷓鴣漸整翮。一一勞目送。應憐飛蓬客。猶作浣花夢。平生江淮間。裘馬事豪縱。豈知老畏死。齋鉢受蔬供。忍饑每自笑。小飲未敢痛。何以慰寂寥。臥聽壓春甕。

春愁

春愁茫茫塞天地。我行未到愁先至。滿眼如雲忽復生。尋人似瘴何由避。客來勸我飛觥籌。我笑謂客君罷休。醉自醉倒愁自愁。愁與酒如風馬牛。

歲暮感懷

征塵十載暗戎衣。虛負名山采藥期。少日親甄曾草檄。卽今橫槊尙能詩。昏昏殺氣秋登陸。颯颯飛霜夜出師。會有英豪能共此。鏡中未用歎吾衰。

梅花

冰崖雪谷木未芽。造物破荒開此花。神全形枯近有道。意莊色正知無妄。高堅政要飽憂患。放棄何遽愁荒遐。移根上苑亦過計。竹籬茅屋真吾家。平生自嫌亦自許。妙處可識不可誇。金樽翠杓未免俗。篝火爲試江南茶。

寺居夙興

閑居無一事。睡少自夙興。空庭翠巖合。高樹紅日昇。曳杖遶四廊。悄然不逢僧。廚煙俄漠漠。角鼓亦登登。晨粥香

滿堂梁肉坐可憎。匡山在何許。吾將買行滕。

萬里橋江上習射

坡隴如瀟東北傾。胡牀看射及春晴。風和漸減雕弓力。野迥遙聞羽箭聲。天上檣槍端可落。草間狐兔不須驚。丈夫未死誰能料。一箭他年下百城。

關山月

和戎詔下十五年。將軍不戰空臨邊。朱門沉沉按歌舞。廐馬肥死弓斷弦。戍樓刁斗催落月。二十從軍今白髮。笛裏誰知壯士心。沙頭空照征人骨。中原干戈古亦聞。豈有逆胡傳子孫。遺民忍死望恢復。幾處今宵垂淚痕。

出塞曲

佩刀一刺山爲開。壯士大呼城爲摧。三軍甲馬不知數。但見動地銀山來。長戈逐虎祁連北。馬前曳來血丹臆。卻回射雁鳴綠江。箭飛雁起連雲黑。清泉茂草下程時。野帳牛酒爭淋漓。不學京都貴公子。唾壺麈尾事兒嬉。

戰城南

王師出城南。塵頭暗城北。五軍戰馬如錯繡。出入變化不可測。逆胡欺天負中國。虎狼雖猛那勝德。馬前嗷嗷爭乞降。滿地縱橫投劍戟。將軍駐坡擁黃旗。遺騎傳令勿自疑。詔書許汝以不死。毀粟何爲汗如洗。

讀書

面骨嶢嶢實欲踈。退藏只合臥蝸廬。自嫌尙有人間意。射雉歸來夜讀書。

又

歸老寧無五畝園。讀書本意在元元。燈前目力雖非昔。猶課蠅頭二萬言。時方讀小本通鑑。

晚過保福

堂靜僧閑普請疎。爐紅氈暖放參餘。蓮花池上容投社。椰子身中海著書。茶試趙坡如潑乳。芋來犀浦可專車。放翁一飽真無事。擬伴圓頭日把鉏。

偶過浣花感舊遊戲作

憶昔初爲錦城客。醉騎駿馬桃花色。玉人攜手上江樓。一笑鉤簾賞微雪。寶釵換酒忽徑去。三日樓中香未滅。市人不識呼酒仙。異事驚傳一城說。至今西壁餘小草。過眼年光如電掣。正月錦江春水生。花枝缺處小舟橫。閑倚胡牀吹玉笛。東風十里斷腸聲。

夜讀唐諸人詩多賦烽火者因記在山南時登城觀塞上傳烽追賦一首

我昔遊梁州。軍中方罷戰。登城看烽火。川迴風裂面。青熒竝駱谷。隱騎連鄠縣。月黑望愈明。雨急滅復見。初疑雲罅星。又似山際電。豈無酒滿尊。對此不能噉。低頭媿虎韞。零落白羽箭。何時復關中。卻照甘泉殿。

平明出小東門觀梅

知心多別離。慰眼易零落。東風吹梅花。爛漫照城郭。晴日千堆雪。偏宜馬上看。逢迎無幾日。不惜犯春寒。明年花發時。我在兩京道。花香固無盡。我亦未遽老。脫帽髮如漆。看花心未灰。平戎那得妨持酒。會有詩傳劍外來。

寺居睡覺

虛窗寂寂夜三更。燈斂殘光避月明。老懶只貪春睡笑。媿聞童子誦經聲。

又

心地安平曉夢長。忽聞魚鼓動修廊。披衣起坐清羸甚。想像雲堂炷粥香。僧雜菜餌之屬作粥。名炷粥。

樓上醉書

丈夫不虛生世間。本意滅虜救河山。豈知蹭蹬不稱意。八年梁益凋朱顏。三更撫枕忽大叫。夢中奪得松亭關。中原機會嗟屢失。明日席留留餘潯。益州官樓酒如海。我來解旗論日買。酒酣博塞爲歡娛。信手梟盧喝成采。牛背爛爛電目光。狂殺自謂元非狂。故都九廟臣敢忘。祖宗神靈在帝旁。

醉題

裘馬清狂錦水濱。最繁華地作閑人。金壺投箭消長日。翠袖傳盃領好春。幽鳥語隨歌處拍。落花鋪作舞時茵。悠然自適君知否。身與浮名若箇親。

初春出遊

春風初來滿刁州。江水照人如潑油。犢車芳草南陌頭。家家傾貲事遨遊。萬里橋西繫黃駟。爲君一登散花樓。半年長齋廢觥籌。興來忽典千金裘。小桃婀娜弄芳柔。紅蘭茁芽滿春州。墻邊女兒不解愁。鬪草纔罷還藏鈎。可憐世人自拘囚。盎中乾坤舞蜉蝣。百年苦短去日遒。問君安用萬戶侯。

芳華樓夜飲

春風射雉苑城旁。走馬還來入醉鄉。夜暖酒波搖燭焰。舞回粧粉鏢花光。浮生一笑常難必。此樂它年未易忘。莫作五陵豪俠看。奚奴歸路有詩囊。

又

結客追遊亦樂哉。城南城北古池臺。香生赭汗連錢馬。光溢金船撥雪醅。難覓長繩縶日住。且憑羯鼓喚花開。一春政使渾無事。醉到清明得幾回。

東門外過歷諸園及僧院觀遊人之盛

馬上哦詩畫鞭。東城南陌去翩翩。微風盪水魚鱗浪。薄日烘雲卵色天。隔屋鳩鳴閑院落。爭門花簇小鞦韆。病來久已疎杯酌。春物撩人又破禪。

城東馬上作

古寺名園處處行。翩然南陌復東城。手柔弓燥獵徒喜。耳熱酒酣詩興生。月似有情迎馬見。鶯如相識向人鳴。摩挲病眼還三歎。猶擬中原看太平。

又

割鮮藉草醉春醪。仰看鳴籟百尺高。杜老何妨希稷契。孔明本自陋袁曹。邊頭插羽無傳檄。篋裏盤鵬有舊袍。寄語長安衆年少。妓圍不似獵圍豪。

丁酉上元

突兀毬場錦繡峯。遊人土女擁千重。月離雲海飛金鏡。燈射冰簾掣火龍。信馬隨車紛醉飲。賣薪買酒到耕農。今年自笑真衰矣。但覺憑鞍睡思濃。

又  
鼓吹連天沸五門。燈山萬炬動黃昏。笑人與月正同色。客子折梅空斷魂。寶馬暗塵思磴路。釣船孤火夢江村。古來漫道新知樂。此意何由可共論。

又  
放翁也入少年場。一笑燈前未歇狂。翠袖成圍欺月冷。氈車爭道覺塵香。蠻酥點綴春風早。楚餌留連夜漏長。結綺莫辭侵曉色。昔人萬里看西涼。

後陵永慶院在大西門外不及一里蓋王建墓也有二石幢猶當時物又有太后墓球石爲人馬甚偉  
院闕淒涼俯舊邦。恨流衰袞似長江。穿殘已歎金甌盡。缺落空餘石馬雙。攬飯飢烏占寺鼓。避人飛鼠上經幢。阿和乳臭崇齋壺。堪笑昏童束手降。

小飲趙園

少年結騎厭追歡。漸老方知一笑難。邂逅偶能成午醉。登臨未覺怕春寒。高林橫籜丹青轉。亂蝶爭花錦繡團。滿眼風光索翠壓。酒盃須似蜀江寬。

和范舍人書懷

歲月如奔不可遮。卽今楊柳已藏鴉。客中常欠尊中酒。馬上時看簷上花。末路淒涼老巴蜀。少年豪舉動京華。天譴久矣先成佛。多病維摩尙在家。

和范舍人病後二詩末章兼呈張正字

放衙元不爲春醒。澹蕩江天氣未清。欲賞園花先夢到。忽聞簷雨定心驚。香雲不動薰籠暖。蠟淚成堆斗帳明。關隴宿兵胡未滅。祝公垂意在尊生。

又

士生不及慶曆初。下方元祐當勿疎。請看蛟龍得雲雨。豈比烏雀馴階除。舍人起視北門草。學士歸著東觀書。劍外老農亦吐氣。釀酒畦花常晏如。



江路見杏花

我行院花村。紅杏紅於染。數樹照南陂。一林藏北嶺。雖慚嶺梅高。繁麗豈易貶。雨絲飛復止。雲葉低未斂。似嫌風日緊。護此燕脂點。身閑得縱觀。無語吾所歎。

夜聞雨聲

高簷夜雨瀉淋漓。起擁寒衾旋炷香。春事豈堪頻破壞。客愁不可復禁當。長鉶磊落輪郭釀。輕騎聯翩報海棠。著意物華君莫笑。世間得喪更茫茫。

海棠

十里迢迢望碧雞。一城晴雨不曾齊。今朝未得平安報。便恐飛紅已作泥。

又

蜀地名花擅古今。一枝氣可壓千林。譏彈更到無香處。常恨人言太刻深。

張園海棠

洛陽春信久不通。姚魏開落胡塵中。揚州千葉昔曾見。已歎造化無餘功。西來始見海棠盛。成都第一推燕宮。池臺掃除凡木盡。天地眩轉花光紅。慶雲墮空不飛去。時有絳雪縈微風。蜂蝶成團出無路。我亦狂走迷西東。此園低樹猶三丈。錦繡卻在青天上。不須更著刀尺裁。乞與齊奴開步障。

登劍南西川門感懷

自古高樓傷客情。更堪萬里望吳京。故人不見暮雲合。客子欲歸春水生。瘴癘連年須藥石。退藏無地著柴荆。諸公勉畫平戎策。投老深思看太平。

和范舍人永康青城道中作

風驅雨壓無浮埃。驂驛千騎東方來。勝遊公自輩王謝。淨社我亦追宗雷。岷山樓上一徒倚。如地始闢天初開。廓然眼界三萬里。山一螿埵水一杯。世間幻妄幾變滅。正自不滿吾曹哈。丈夫本願布衣老。達士詎覺蒼顏催。君看神君歲食牟四萬。處處棄骨高成堆。西山老翁飽松麩。造物賦予何遠哉。

宿上清宮

永夜寥寥憩上清。下聽萬壑度松聲。星長頓覺去人近。風雨何曾敗月明。是夕山下風雨。絕頂月明健曉。早歲文辭妨至道。中年憂患博虛名。一菴儻許西峯住。常就巢仙問養生。上官道人巢居山中。

登上清小閣

樓觀參差倚晚晴。偶然信腳得閑行。欲求靈藥換凡骨。先挽天河洗俗情。雲作玉峯時特起。山如翠浪盡東傾。何因從此橫空去。笙鶴飄然過洛城。

小憩長生觀飯已遂行

清絕長生觀。再遊疑後身。人間空石劫。物外自壺春。道士青精飯。先生烏角巾。回頭增悵望。倦馬撲征塵。

新津小宴之明日欲遊修覺寺以雨不果呈范舍人

風雨長亭話別離。忍看清淚濕燕脂。酒光搖蕩歌雲暖。不似西樓夜宴時。

又

新津渡頭船欲開。山亭準擬把離盃。不如意事十八九。正用此時風雨來。

眉州驛舍睡起

平生百無能。一懶每自喜。胡爲八年間。逐食走萬里。身如盤汞轉。心似爐丹死。事君未免媿。富貴不如已。雨餘古驛涼。晝寐無錯履。澹然得高臥。睡思極清美。心平了無夢。驚覺何自起。尙嫌漆園蝶。肯作南柯螳。斜陽生木影。龍蛇滿窗紙。煎茶儻已熟。一笑問童子。

送范舍人還朝

平生嗜酒不爲味。聊欲醉中遺萬事。酒醒客散獨悽然。枕上屢揮憂國淚。君如高光那可負。東都兒童作胡語。常時念此氣生癭。况送公歸觀明主。皇天震怒賊得長。三年胡星失光芒。旄頭下掃在旦暮。嗟此大議知誰當。公歸上前勉畫策。先取關中次河北。堯舜尙不有百蠻。此賊何能穴中國。黃扉甘泉多故人。定知不作白頭新。因公併寄千萬意。早爲神州靖虜塵。

過魚蛇市小寺

六月苦多雨，肩輿走江村。過市居人集，陟險兵子喧。日昃休野市，汛掃開北軒。霧氣如蒼虬，天矯出洞門。溪湄見白石，糾結菖蒲根。游魚去甚健，投餌棄不吞。嗟予獨何爲，貪祿忘故園。馳驅不自恤，面有風沙痕。俯仰二十年，竟孤明主恩。寄謝衆君子，努力蘇元元。

眉州作

屬舟久不泛蟆津，常恐黃塵解污人。爛醉破除千日懣，予不至眉山三年矣。狂吟判斷四州春。此行自成都歷永康，唐安至眉山。汀洲漸歎蘋花老，風露初嘗荔子新。便欲騎鯨東海去，勝游未忍別峨岷。

過修壩山不果登覽

前日泛江時，雨昏失南山。今日迎我馬，鬢髯擁髻鬟。白塔映朱閣，間見青林間。問我豈忘之，揚鞭亟西還。西還亦聊爾，行矣來憑欄。擾擾紅塵中，豈無一日閑。會復廣此詩，大書榜其顏。但恐厄風雨，清游天所慳。

青城縣會飲何氏池亭贈譚德稱

赤日黃塵行路難，青城縣裏得偷閑。十年去國悲霜鬢，六月登樓望雪山。辭客千言猶落筆，美人斗酒未酡顏。憑誰喚住譚夫子，更與徘徊水石間。

題菴壁

偶向城南卜草廬，二年浪迹寄樵漁。大牀獨臥夢猶在，萬衆橫行策竟疎。清濁戲分春甕酒，朱黃閑勘夜窗書。衰顏安用頻看鏡，日日元知有不如。

幽居

殊方飄泊向誰論，小住僧廬亦所欣。得飽罷揮求米帖，愛眠新著毀茶文。摘蔬籃小露清露，斲藥鉏輕帶溼雲。從此生涯足幽事，宦遊虛用半生勤。

又

剡曲故廬歸未得，暫從地主借茅茨。桃花春水夢不到，菰菜秋風心自知。強健猶穿幾兩屐，榮華正似一鉤絲。此

心炯炯無人會。煙雨蒼茫獨立時。

浣花女

江頭女兒雙髻丫。常隨阿母供桑麻。當戶夜織聲啞啞。地爐豆豉煎土茶。長城嫁與東西家。柴門相對不上車。青裙竹筍何所嗟。插髻燦燦牽牛花。城中妖姝臉如霞。爭嫁官人慕高華。青驪一出天之涯。年年傷春抱琵琶。

七月八日馬上作

溝水浸新月。街槐生碧煙。明河七夕後。倦馬五門前。小市燈初鬧。高樓鼓已傳。賦詩寬客恨。哦罷卻凄然。

江樓

急雨洗殘瘴。江邊閑倚樓。日依平野沒。水帶斷槎流。擣紙荒村晚。呼牛古巷秋。腐儒憂國意。此際入搔頭。

夜登小南門城上

曳杖上江城。清宵破二更。月回高樹影。風壯急灘聲。野艇魚罾舉。優場炬火明。湖塘正如此。回首憶柴荆。予故山在鏡湖之南。

野步至青羊宮偶懷前年嘗劇飲於此

錦官門外曳枯筇。此地天教著放翁。萬事元無工拙處。一官已付有無中。拳雲柏樹瘦蛟立。繞郭江流清鏡空。欲把酒盃終覺懶。緩歌曾醉落花風。

月夜江濱池納涼

微逕荒城曲。叢祠野水邊。月能從我醉。風欲驚人仙。靜看黏螢草。遙聞采芡船。熱官那有此。留滯莫尤天。

華亭院僧房

半闌朱門見綠苔。幽花仍傍小山開。劍南七月暑未退。明日更攜棋篋來。

又

悠悠馬上困思茶。休歇僧房到日斜。殿背無人緣錢滿。小盆零落珊瑚花。

乾明院觀畫

唐年蘭若占閑坊。名畫蕭條半在亡。敝敝踈篁常似雨。陰陰古屋自生涼。入門疊鼓初催講。喚馬斜陽欲滿廊。顯晦熟思真有數。萬金奇跡棄顏牆。院中有黃筌花竹幾二十壁多已壞矣。

登城

我登少城門。四顧天地接。大風正北起。號怒撼危堞。九衢百萬家。樓觀爭茂業。臥病氣壅塞。放目意頗愜。永懷河洛間。煌煌祖宗業。上天祐仁聖。萬邦盡臣妾。橫流始靖康。趙魏血可蹀。小胡寧遠略。爲國恃剽劫。自量勢難久。外狃中已懼。籍民備勝廣。陞戟畏荆聶。誰能提萬騎。大呼去羣孽。擁馬鬣。奇兵四面出。快若霜掃葉。植旗朝受降。馳驛夜奏捷。豺狼一朝空。狐兔何足獵。遺民世忠義。泣血受汗脅。繫箭射我詩。往檄五陵俠。

秋日登仙遊閣

馬蹄連早暮。車塵細如霧。誰知此路邊。高閣下風馭。頗傳秋月夕。語笑聯杖屨。始知仙與人。混迹無異處。我來想鸞鶴。稽首祈一顧。飛仙不可見。惟與白雲遇。白雲如有情。傍我欄角住。借問何山來。雲驚卻飛去。

自詠

華髮蕭蕭居士身。江頭風雨折烏巾。無人問字尤宜嬾。有吏徵租未是貧。薄宦儻來難倚仗。舊交漸少每酸辛。敲門且復尋僧話。要結他生物外因。

雜詠

青羊宮中竹暗天。白馬廟畔柏如山。琴尊處處可消日。車馬紛紛自欠閑。

又

石犀廟壩江已回。陵谷一變吁可哀。卽今禾黍連雲處。當日帆檣隱映來。

又

微風飜蘋荇葉白。落日漠漠稻花香。出門縱轡何所詣。萬里橋南追晚涼。

又

世事盛衰誰得知。惠陵煙草掩柴扉。陵邊人家叢竹裏。燈火喧呼迎婦歸。

大醉歸南禪弄影月下作

昔我變姓名。釣魚散花洲。有船不用楫。江急聽自流。卽今客錦城。醉過百花樓。天風吹笳輿。快若凌空遊。月露皓無際。指點隘九州。君看塵土中。頗有此樂不。題詩碧玉簡。飛仙相答酬。酒醒墮何處。樓臺海山秋。

訪楊先輩不遇因至石室

訪客客已去。追涼成獨行。衣冠嚴漢殿。草木拱秦城。古甃蒼苔滑。空庭落日明。出門還慙恍。列屋打碑聲。牆東卽石經堂。

病酒戲作

新秋風月佳。數夕破酒戒。飲少輒醉眠。衰早頗自怪。高春未離枕。眩轉疑屋壞。家人具雞豚。熟視不能噉。尙無千里草。敢覓鏡湖蟹。一盃苦買齋。價直娑婆界。

訪昭覺老

久矣耆年罷送迎。喜聞革履下堂聲。遊山笑我驀直去。過夏憐君太瘦生。庭際楠陰凝晝寂。牆頭鵲語報秋晴。功名已付諸賢了。長作閑人樂太平。

晝臥

秋暑侵人氣力微。燒香高枕掩齋扉。弄姿野籜晴猶斂。作態江雲晚未歸。身外極知皆夢事。世間隨處有危機。故山松菊今何似。晚矣淵明悟昨非。

晚步江上

萬里橋邊帶夕陽。隔江漁市似清湘。山林獨往吾何恨。車馬交流渠自忙。高柳陰中扶拄杖。平沙穩處據胡牀。故人京國無消息。安得相攜笑此涼。

夜坐

大風橫吹斗柄折。迅雷下擊山壁裂。放翁閉戶寂不聞。楞嚴卷盡燈花結。

夜行

紅藤拄杖扶衰病。村北村南破夜行。閑繞長堤逐螢火。戲臨荒沼問鼃聲。倦遊但有笭簪興。久客真諳襪襪情。安得故人同一醉。三更城上看河傾。

悲秋

一拋篋笠雪溪舟。八載梁州復益州。纔破繁華海棠夢。又驚搖落井梧秋。曉班無復趨行殿。晚境惟思老寢丘。病肺經旬疎酒盞。愁來惟是上南樓。

城北青蓮院。方丈壁間有畫燕子者。過客多題詩。予亦戲作二絕句。

一雙掠水燕來初。萬點飛花社雨餘。辛苦成巢君勿笑。從來吾亦愛吾廬。

又

明窗短壁拂蛛絲。常是江邊送客時。留滯錦城生白髮。不如巢燕有歸期。

睡起

閑身喜午睡。睡起日猶早。茂竹青入簷。幽花紅出草。苔錢亦滿砌。護惜不忍掃。宦情本自疎。此地可忘老。

天涯

天涯到處自生愁。游子征塵暗弊裘。燈火青熒五門夜。風煙索莫二江秋。帝城漫誦新詩句。客路難逢舊輩流。送老把茅須早決。此生何止四宜休。

暇日行城上同行追不能及

疾步登城殊未竟。欣然一笑擲筇枝。正當閑似白鷗處。不減健如黃犢時。秋野煙雲橫慘淡。暮天樓閣倚參差。高吟醉舞忘歸去。乞與丹青畫怪奇。

感秋

西風繁杵擣征衣。客子關情正此時。萬事從初聊復爾。百年彊半欲何之。畫堂蟋蟀怨清夜。金井梧桐辭故枝。一枕淒涼眠不得。呼燈起作感秋詩。

雙旒旅舍

孤市人稀冷欲冰。昏昏一盞店家燈。開門拂榻便酣寢。我是江南行腳僧。

又

西風黃葉滿江村。瘦馬來穿渡口雲。動地傳呼逢醉尉。誰何禁殺故將軍。

又

每因髀肉歎身閑。聊欲勤勞鞍馬間。黑稍黃旗端未免。會衝風雪出榆關。

早行至江原

喔喔鳴雞促起程。飀飀飛鷺導孤征。旆旄盡落歸猶遠。帶眼頻移瘦自驚。小市蕭條黃葉滿。斷橋零落綠苔生。居人猶復多愁思。何況天涯倦客情。

安仁道中

千古臨邛路。飄然偶獨遊。病身那迫老。遠客更禁秋。水退橋未葺。渡閑船自流。飛騰付年少。回首思悠悠。

又

三驛未爲遠。衰翁愁出門。食程多卒卒。失睡每昏昏。天大圍平野。江回隔近村。何時有餘俸。小築占雲根。

八月十四夜三叉市對月

去年看月簾邊樓。雲錦微光如玉鈎。主人不樂客歎息。清歌空送黃金舟。今年看月三叉市。纖雲不作良宵祟。素娥命駕洗客愁。我亦傾杯邀共醉。風露萬里方渺然。冰輪無轍行碧天。盈盈耿耿意無盡。月不忍落人忘眠。一言欲報廣寒殿。茅簷華屋均相見。明年萬事不足論。但願月滿人常健。

豐橋旅舍作

我本山林人。心期在塵表。出門消底物。兩屨萬事了。羣兒何足愠。爲爾常悄悄。今朝山中路。更喜相識少。三叉市人醉爭席。豐橋逆旅留饋食。小婦梳髻高一尺。梭聲札札當戶織。

文君井

落魄西州泥酒盃。酒酣幾度上琴臺。青鞋自笑無羈束。又向文君井畔來。相如琴臺在成都城中。文君井在邛州。



相傳爲卓氏故宅。

白鶴館夜坐

竹聲風雨交。松聲波濤飆。我坐白鶴館。燈青無晤言。廓然心境寂。一洗吏卒喧。袖手哦新詩。清寒媿雄渾。屈宋死千載。誰能起九原。中間李與杜。獨招湘水魂。自此競摹寫。幾人望其藩。蘭荈看翡翠。煙雨啼青猿。豈知雲海中。九萬擊鵬鷖。更闌燈欲死。此意與誰論。

南津勝因院亭子

南江平無風。如鏡新拂拭。漁舟不點破。潏潏千頃碧。閉干西北角。雲散山爭出。陂陀競南走。翠入窗戶窄。江山不世情。作意娛此客。豈無尊中酒。豪飲非宿昔。明當還成都。塵土埋馬跡。後巖在眼中。飛去無羽翼。後巖在鳳凰山後七八里。山水尤奇絕。

登邛州譙門門三重其西偏有神仙張四郎畫像張蓋隱白鶴山中

浮雲在腳底。千里在眼邊。攀躋忽至此。倚柱眩欲顛。車馬細如蠅。紛紛衢路間。嗟汝何爲者。馳驅窮歲年。我本澹蕩人。此心實愛閑。向來出處際。不媿咫尺天。風吹哦詩聲。十里搖西山。懸知老仙翁。爲我一粲然。

書寓舍壁

天與癡頑不解愁。未埋病骨且閑遊。山於拄杖橫時看。路到芒屨破處休。初擬燒丹住南嶽。卻因學劍客西州。秋風巾褐添蕭爽。又作臨邛十日留。

又

落佩頹冠慣放慵。經旬寓館古臨邛。西偏取路橫穿竹。北向開門倒看松。醉後蹇驢歸蕙閣。來支枕睡高春。鶻鳴山谷曾遊處。剩欲扶犁學老農。鶻鳴一名鶻鳴。在邛之大邑縣。

次韻使君吏部見贈時欲遊鶴山以雨止

幙頭江上約同行。白鶴峯前辱寄聲。青史功名男子事。後堂歌舞故人情。午甌誰致葉家白。春甕旋撥耶官清。登覽不嫌鳩喚雨。十年芒屨慣山程。

西巖翠屏閣

把酒孤亭半日留。西巖獨擅鶴山秋。也知絕境終難賦。且喜閑身得縱遊。鶴起危巢時磔磔。鹿鳴深澗暮呦呦。人生適意方爲樂。甲第朱門祇自囚。

幽居院

久隨塵沙裏。幽尋始此行。侵雲千嶂合。披草一僧迎。薜潤泉時滴。崖傾竹倒生。登高忽平曠。回首失崢嶸。老矣猶孤客。歸哉念耦耕。結廬殊未定。此地頗關情。

中溪

散人無俗事。日日山中行。今朝中溪寺。妙絕不可名。幽處萬木合。忽然千頃平。綠黛染晴嶂。白雲如玉城。巖花勸小酌。天風吹獨醒。雖無九臯鶴。奇哉此松聲。我如折翼鵬。回盡九萬程。脫屣擲拄杖。於此錢餘生。

天台院有小閣下臨官道予爲名曰玉霄

竹輿衝雨到天台。綠樹陰中小閣開。勝作玉霄君會否。要知散吏按行來。予所領崇道觀蓋在天台山中。玉霄峯下。

山中小雨得宇文使君簡問嘗見張仙翁乎戲作一絕

張仙挾彈知何往。清嘯穿林但可聞。拾得鐵丸無處用。爲君打散四山雲。張四郎常挾彈。視人家有災疾者。輒以鐵丸擊散之。

兩中山行至松風亭忽澄霽

煙雨千峯擁髻鬟。忽看青嶂白雲間。卷藏破墨營丘筆。卻展將軍著色山。

贈宋道人

我不如昔人騎鶴上九天。玉簡奏事虛皇前。平生齋養氣羸全。兩腳馳走輕如煙。烏道懸崖忽飛燹。戲擲短劍聲鏗然。轉盼跳下千仞淵。已復取劍升層巔。騰猿俊鶴爭後先。飢食松花掬飛泉。金骨綠髓漸凝堅。口哦七字黃庭篇。西來欲訪挾彈仙。丹經劍訣更精研。嗟哉一失五百年。作詩付子勿妄傳。

自山中泛舟歸郡城

我呼小艇浮南津。落日亂山衝半輪。背船雙鷺低掠水。下灘峭風冷逼人。中流回望始太息。煙中白塔高嶙峋。適從彼來忽在此。老夫拄杖捷有神。尉曹堆盤笠澤膾。秀才瀉榼中山春。豈惟外物不挂眼。醉後兀爾忘吾身。朝冠行卽挂神武。買犢遂欲耕峨岷。金丹自喜日日長。白髮未許年年新。擁橋炬火遠已闌。歸舍睡息清而勻。明朝笑謂同載客。有腳莫踏東華塵。

次韻宇文使君山行

城中望西山。爽氣固可致。不如山中行。衣履染濃翠。使君資高逸。鐵馬奏橫吹。平郊何曠蕩。修竹亦清闕。旣聞蘇門嘯。遂挹浮丘袂。似嫌太清絕。開宴盡主意。戲留楚臺雲。寶鬢鬪姿媚。珠貫按歌聲。泉湧發詩思。歸來殊不倦。吏牘闕千紙。卻笑江左人。把酒輒遺事。下客亦未衰。尙可提萬騎。安能學胡公。危苦寄鶴翅。仙人胡安學。道西巖。跨鶴上昇。山以此得名。

同王無玷羅用之訪臨邛道士墓

樂天詩句本嘲訖。那有人從碧海來。五百年間逢好事。披榛來訪此崔嵬。

登太平塔

我從平地來。忽寄百尺巔。眼力與腳力。初不減少年。漸高山愈出。杳杳浮雲煙。舉手捫參旗。日月磨螳旋。天風忽吹衣。便欲從此仙。且復下梯去。著書未終篇。

中夜投宿修覺寺

陸走崔嵬水下隴。客中更復客它邦。晚離方井雲藏市。夜渡新津火照江。人語紛紛投野寺。牀敷草草寄僧窗。五更風雨妨歸夢。臥看殘燈吐半缸。

絕勝亭

蜀漢羈遊歲月侵。京華乖隔少來音。登臨忽據三江會。飛動從來萬里心。地勝頓驚詩律壯。氣增不怕酒盃深。一琴一劍白雲外。揮手下山何處尋。

雲谿觀竹戲書二絕句

氣蓋冰霜勁有餘。江邊見此列仙癯。清寒直入人肌骨。一點塵埃住得無。

又

溪光竹色兩相宜。行到溪橋竹更奇。對此莫論無肉瘦。閉門可忍十年飢。

九月十日如漢州小獵於新都彌牟之間投宿民家

適從邛州歸。又作漢州去。天低慘欲雪。遊子悲歲暮。十年辭京國。疋馬厭道路。陸火炎高岡。江雲暗空成。角弓寒始勁。霜鶻飢更怒。邂逅成小獵。尺箠聊指呼。北連武侯祠。南並稚子墓。合圍蹙窮鹿。設伏截狡兔。壯哉帶箭雉。耿介死不顧。吾寧暴天物。戰法因得寓。黃昏過民家。休馬燎裘袴。割鮮盛燔炙。毛血灑庭戶。老姥亦復奇。汛掃邀我駐。丈夫儻未死。千金酬此遇。

獵罷夜飲示獨孤生

客途孤憤只君知。不作兒曹怨別離。報國雖思包馬革。愛身未忍貨羊皮。呼鷹小獵新霜後。彈劍長歌夜雨時。感慨卻愁傷壯志。倒瓶濁酒洗餘悲。

又

關輔何時一戰收。蜀郊且復獵清秋。洗空狡穴銀頭鶻。突過重城玉腕驪。賊勢已衰真大慶。士心未振尙私憂。一樽共講平戎策。勿爲飛鳶念少遊。

又

白袍如雪寶刀橫。醉上銀鞍身更輕。帖草角鷹掀兔窟。憑風羽箭作鷓鳴。關河可使成南北。豪傑誰堪笑死生。欲疏萬言投魏闕。燈前攬筆涕先傾。

自廣漢歸宿十八里草市

月黑叩店門。燈青坐牀簾。飯羸雜沙土。菜瘦等草棘。泰然均一飽。未覺異玉食。我豈兒女哉。口腹爲怨德。古人恥懷祿。不仕當力穡。從今扶犁手。終老謝翰墨。

東郊飲村酒大醉後作

丈夫無苟求。君子有素守。不能垂竹帛。正可死隴畝。邯鄲枕中夢。要是念所有。持枕與農夫。亦作此夢否。今朝櫟林下。取醉村市酒。未敢羞空囊。爛漫詩千首。

九月十八夜夢避雨叩一僧院有老宿年八十許邀留甚勤若舊相識者夢中爲賦此詩

晝簷急雨傾高秋。夜投丈室燈幽幽。蒼年擁毳雪滿頭。拂拭牀敷邀我留。離貌戲擲香出喉。蓬蓬結成蒼玉毳。鸞童揭簾待者憂。觸散香煙當罰油。

秋晚登城北門

幅巾藜杖北城頭。卷地西風滿眼愁。一點烽傳散關信。兩行雁帶杜陵秋。山河與廢供搔首。身世安危入倚樓。橫槊賦詩非復昔。萋魂猶繞古梁州。

卷九

秋興

成都城中秋夜長。燈籠蠟紙明空堂。高梧月白繞飛鶴。衰草露溼啼寒螿。堂上書生讀書罷。欲眠未眠偏斷腸。起行百匝幾歎息。一夕綠髮成秋霜。中原日月用胡曆。幽州老酋著柘黃。滎河溫浴底處所。可使長作旃裘鄉。百金戰袍鴈鶩盤。三尺劍鋒霜雪寒。一朝出塞君試看。且發寶雞暮長安。

夜飲

引劍酣歌亦壯哉。要君共覆手中盃。秋鴻陣密橫江去。暮角聲酣戰雨來。莫恨皇天無老眼。請看白骨有青苔。中年倍覺流光速。行矣西郊又見梅。

暮秋

時序中年速。風霜客路長。孤愁巴月白。清夢楚山蒼。燈暗秋銜壁。鐘疎夜殷床。端居有微祿。不敢恨殊方。

又

萬里歸無策。八年淹此留。羞蒙子公力。寧倦長卿遊。聽雨瀟湘夜。飛鷹鄴杜秋。更須論富貴。此計亦悠悠。

夜雨有感

北風吹雨暗江郊。十月僧廬旋補茆。病馬敢希三品料。驚禽聊借一枝巢。少時諸老爭求識。晚歲殊方罕定交。閉戶不妨新得趣。丹經盈篋手親抄。

道室

一室冷如水。人疑在定僧。手稱丹竈火。紗護佛龕燈。食減形雖槁。心虛氣自凝。平生坐忘論。字字欲銘膺。

飯罷戲作

南市沽濁醪。浮蠟甘不壞。東門買彘骨。醃醬點橙臠。蒸雞最知名。笑不數魚蟹。輪囷暈浦芋。磊落新都菜。欲廣老饕賦。畏破頭陀戒。況予齒日疎。大嚼敢屢嘬。杜老死牛飢。千古懲禍敗。閉門餌朝霞。無病亦無債。

初冬夜宴

絲管紛紛獨滿堂。臯盧擲罷夜飛觴。帷犀風定歌雲暖。香獸煙濃漏箭長。泛菊已成前日夢。探梅又續去年狂。醉歸自笑摧頽甚。冷逼貂裘怯曉霜。

冬夜醉歸復小飲

野外歸來晚。空庭露氣新。乍晴雲妬月。多病酒欺人。倚杖行吟久。投盃起舞頻。早梅消息動。春事漸關身。

病酒述懷

閑處天教著放翁。草廬高臥作橋東。數莖白髮悲秋後。一盞青燈病酒中。李廣射歸關月墮。劉琨嘯罷塞雲空。古人意氣憑君看。不待功成固已雄。

數日暄妍頗有春意予閑居無日不出遊戲作

小春花蕾索春饒。已有暄風入紫貂。村路雨晴鳩婦喜。射場草綠雉媒嬌。苑邊結客飛金勒。樓上誰家弄玉簫。莫怪夕陽歸獨後。早梅喚我度谿橋。蜀宣華苑在蘆祠側上。

遣興

昔舊日獨謝。將如此老何。憑拈如意舞。狂叩唾壺歌。郡縣輕民力。封疆恃虜和。功名莫看鏡。吾意已蹉跎。

趙將軍分序

客爲予言靖康建炎間。關中奇士趙宗印者。提義兵擊虜。有衆數千。所向輒下。虜不敢當。會王師敗於富平。宗印知事不濟。大慟於王異略廟。盡以金帛散其下。被髮入華山。不知所終。予感其事。爲作此詩。我夢遊太華。雲開千仞青。壁山瀉黃河。萬古仰巨靈。往者禍亂初。氛祲於太寧。豈無臥雲龍。一起奔風霆。時事方錯謬。三秦盡羶腥。山河銷王氣。原野失大刑。將軍散髮去。短劍斲茯苓。定知三峯上。爛醉今未醒。

江樓醉中作

淋漓百榼宴江樓。秉燭揮毫氣尚遒。天上但聞星主酒。人間寧有地埋憂。生希李廣名飛將。死慕劉伶贈醉侯。戲語佳人頻一笑。錦城已是六年留。退之詩云。越女一笑三年留。

曳策遊房園作

慈竹蕭森拱廢臺。醉歸曳策一徘徊。紛紛落日牛羊下。黯黯長空霰雪來。三峽猿催清淚落。兩京梅傍戰塵開。客懷已是淒涼甚。更聽城頭畫角哀。

謁漢昭烈惠陵及諸葛公祠宇

兩止風益豪。雪作雲不動。淒涼漢陵廟。衰草臥翁仲。畫妓空箏竿。土馬關羈鞅。壤沃黃犢耕。柏密幽鳥暝。尙想忠武公。身任社稷重。整整渭上營。氣已無岐雍。少須天意定。破賊寧患衆。興亡信有數。星隕事可痛。陵邊四五家。弗竹居接棟。手斲紙上箔。居民皆以造紙爲業。語熟酒鳴甕。雖嗟生理微。亦足追飢凍。劉葛固雄傑。閱世均一夢。論高常近迂。才大本難用。九原不可作。再拜臨風慟。

遙夜

遙夜兩聲急。惜惜窗戶幽。開編堯舜在。得句鬼神愁。同俗愚儒鼻。容身壯士羞。燈殘不成睡。曉角動南樓。

遠遊

遠遊行復歲華新。懶學劉郎問大鈞。一點不蒙稽古力。十分合作臥雲身。苦寒與酒頓增價。小雨爲梅先辟塵。擬

佩一壺江路去。花邊醉墮白綸巾。

大雪歌。累日作雪。竟不成。戲賦此篇。

長安城中三日雪。潼關道上行人絕。黃河鐵牛僵不動。承露金盤凍將折。虬鬚豪客狐白裘。夜來醉眠寶釵樓。五更未醒已上馬。衝雪卻作南山遊。千年老虎獵不得。一箭橫穿雪皆赤。擎空爭死作雷吼。震動山林裂崖石。曳蹄擁路千人觀。觸體作枕皮蒙鞍。人間壯士有如此。胡不來歸漢天子。

簡譚德稱

幼輿骨相稱山巖。自要閑遊不避讒。錦里先生爲老伴。玉霄散吏是頭銜。探春苑路花簪帽。看月江樓酒滿衫。惟恨題詩無逸氣。媿君障馬與風颺。

排悶

世事何知與願違。十年高臥看羣飛。獵圍花市無人問。漁艇煙村有夢歸。銀燭焰長搖酒浪。寶刀佩穩壓戎衣。君看白首寒窗客。俠氣縱橫亦未非。

夜意

名姓人誰記。形骸老漸侵。酒慳停劇飲。詩退負高吟。兩隔疎更斷。雲藏古院深。衰遲常兀兀。惆悵少年心。

又

心清知睡少。氣定覺神凝。但有一無媿。無妨百不能。燈昏如隔霧。研冷欲生冰。兀爾遺身世。東窗待日升。

又

瘴地晨霜薄。郊墟暮雨昏。啼螿如有恨。微火解相溫。末路真無策。孤忠敢自言。輪囷肝膽在。白首倚乾坤。

玉局觀拜東坡先生海外畫像

商周去不遠。盛哉漢唐宋。蘇公本天人。謫墮爲世用。太平極嘉祐。珠玉始包貢。公車三千牘。字字岌飛動。氣力倒犀象。律呂諧鸞鳳。天驥西極來。矯矯不受鞚。飛騰上臺閣。廢放落雲夢。至寶不侵蝕。終亦老侍從。晚途遷海表。萬里天宇空。豈惟騎鯨魚。遂欲跨螭螭。心空物莫撓。氣老筆愈縱。批糠郊祀歌。遠友清廟頌。我生雖後公。妙句得吟



佩。整衣拜遺像。千古尊正統。

心太平。菴余取黃庭語名所寓室。

天下本無事。庸人擾之耳。胸中故懋然。忿欲定誰使。本心倘不失。外物真一蠹。困窮何足道。持此端可死。空齋夜方中。窗月淡如水。忽有清磬鳴。老夫從定起。

訪客至西郊

城城敗葉飛。黯黯寒雲低。村墟與市里。觸目一慘悽。今日病體輕。駕言適城西。丹柿滿野店。青帘出江隄。獵騎載雉兔。樵擔懸鶉雞。居人各自得。使我念故谿。故谿不敢說。况復朝金閨。傷哉鬻雪翁。歲晚猶牧羝。下愚不自還。大惑終身迷。君恩何由報。力耕愧黔黎。

得都下八月書報蒙恩收絃州

鳳城書到錦江邊。故里歸期愈渺然。掌上山川初入夢。壺中日月尙經年。方輪落落難推轂。倦馬駸駸怕著鞭。未佩魚符無吏責。看花且作拾遺顛。成期尙在明年冬。

晚起

賣劍捐書絕世緣。掩關高枕送流年。久從道士學踵息。誰管門生嘲腹便。化蝶飛時嗟昨夢。睡蛇去後喜安眠。欠伸看起東窗日。也似金鑿過八甌。

又

學道逍遙心太平。幽窗鼻息憶牀聲。柳花無蒂蠻氈煖。龜甲有紋繪帳明。候起兒童陳盥櫛。笑衰人客鬪柴荆。此生睡足無餘念。安用元戎報五更。

江樓吹笛飲酒大醉中作

世言九州外。復有大九州。此言果不虛。僅可容吾愁。許愁亦當有許酒。吾酒釀盡銀河流。酌之萬斛玻璃舟。酣宴五城十二樓。天爲碧羅幕。月作白玉鉤。織女織慶雲。裁成五色裘。披裘對酒難爲客。長揖北辰相獻酬。一飲五百年。一醉三千秋。卻駕白鳳驂。班虬下與麻姑戲。玄洲錦江吹笛餘一念。再過劍南應小留。

晚登子城

江頭作雪雪未成。北風吹雲如有營。驅車出門何所詣。一放吾目登高城。城中繁雄十萬戶。朱門甲第何崢嶸。錦機玉工不知數。深夜窮巷聞吹笙。國家自從失河北。煙塵漠漠暗兩京。胡行如鬼南至海。寸地尺天皆苦兵。老吳將軍獨護蜀。坐使井絡無檣槍。名都壯邑數千里。至今不聞戎馬聲。安危自古有倚伏。相持默默非敵情。棘門灑上勿見戲。犬羊豈憚渝齊盟。

夙興出謁

增酒狂無敵。居家煩有餘。苦寒愁手版。笑睡付肩輿。覓句吟哦慣。逢人省識疎。亦知歸去好。無地著蝸廬。

十一月三日過升仙橋作

三過升仙不暇炊。橋邊買麩療朝飢。紛紛滿座誰能識。大似新豐獨酌時。

又

鬩手金鞭天馬駒。冰河雪谷笑談無。只言燕趙多奇士。豈必書生盡腐儒。

又

橋邊沙水綠蒲老。原上煙蕪黃犢閑。老子真成興不淺。憑鞍歸夢遶家山。

遣興

蓬壺舊隱已微茫。浪迹紅塵樂未央。縱酒山南千日醉。看花劍外十年狂。新詩刻燭驚詞客。駿馬追風戲鞠場。要是世間男子事。不須臺省競飛翔。

草堂拜少陵遺像

清江抱孤村。杜子昔所館。虛堂塵不掃。小徑門可款。公詩豈紙上。遺句處處滿。人皆欲拾取。志大才苦短。計公客此時。一飽得亦罕。兀窮端有自。寧獨坐房瑄。至今壁間像。朱綬意蕭散。長安貂蟬多。死去誰復算。

青羊宮小飲贈道士

青羊道士竹爲家。也種玄都觀裏花。微雨晴時看鶴舞。小窗幽處聽蜂衙。藥爐宿火熒熒爇。醉袖迎風獵獵斜。老

我一官真漫浪。會來分子淡生煙。

夜寒

清夜焚香讀楚詞。寒侵貂褐歎吾衰。輕冰滿研風聲急。忽記山陰夜雪時。

又

斗帳重茵香霧重。膏梁那可共功名。三更騎報河冰合。鐵馬何人從我行。

書懷

武擔山上望京都。誰記黃公舊酒壚。宿負本宜輪左校。寬恩猶聽補東隅。一官漫浪行將老。萬卷縱橫只自愚。甫里松陵在何許。古人投劾爲尊鱸。

記夢

烏巾白紵憶當年。抵死尋春不自憐。顛顛劍南雙鬢改。夢中猶上暗門船。

又

團臍霜蟹四腮鱸。樽俎芳鮮十載無。塞月征塵身萬里。夢魂也復醉西湖。

醉中出西門偶書

古寺閑房閉寂寥。幾年耽酒負公朝。青山是處可埋骨。白髮向人羞折腰。末路自悲終老蜀。少年常願從征遼。醉來挾箭西郊去。極目寒蕪雉兔驕。

訪客不遇

風急斜吹帽。泥深亂濺衣。杜門常畏罵。訪客卻空歸。老馬牽蹄癩。枯槐無葉飛。馳驅幾時了。散髮憶苔磯。

劍客行

世無知劍人。太阿混凡鐵。至寶棄泥沙。光景終不滅。一朝斬長鯨。海水赤三月。隱見天地間。變化豈易測。國家未滅胡。臣子同此責。浪迹潛山海。歲晚得劍客。酒酣脫匕首。白刃明霜雪。夜半報讎歸。斑斑腥帶血。細讎何足問。大恥同憤切。臣位雖卑賤。臣身可屠裂。誓當函胡首。再拜奏北闕。逃去變姓名。山中餐玉屑。

故蜀別苑在成都西南十五大里梅至多有兩大樹夭矯若龍相傳謂之梅龍予初至蜀嘗爲作詩自此歲常訪之今復賦一首丁酉十一月也

昔年會賦西郊梅。茫茫去日如飛埃。即今衰病百事懶。陳迹未忘猶一來。蜀王故苑犁已遍。散落尙有千雪堆。珠樓玉殿一夢破。煙蕪牧笛遺民哀。兩龍臥穩不飛去。鱗甲脫落生莓苔。精神最遇雪月見。氣力苦戰冰霜開。羈臣放士耿獨立。淑姬靜女知誰媒。摧傷雖多意愈厲。直與天地爭春回。蒼然老氣壓桃杏。笑我白髮心尙孩。微風故爲作嫵媚。一片吹入黃金壘。

閑意

柴門雖設不曾開。爲怕人行損綠苔。妍日漸催春意動。好風時捲市聲來。學經妻問生疎字。嘗酒兒斟澀灑盃。安得小園寬半畝。黃梅綠李一時栽。

飲罷夜歸

老病畏多酌。退閑愁夜行。市燈疎欲盡。樓月澹初生。露冷莎蛩咽。天高塞雁征。歸來羞自喜。擁被聽疎更。

江亭冬望

霜落江清水見魚。偶來徙倚草亭孤。雪天黯淡常如晚。煙樹微茫直欲無。下澤乘車終碌碌。上方請劍漫區區。擬將疎逸消豪氣。尋罷酒徒尋獵徒。

大風登城

風從北來不可當。街中橫吹人馬僵。西家女兒午未粧。帳底爐紅愁下牀。東家喚客宴畫堂。兩行玉指調絲簧。錦繡四合如垣牆。微風不動金猊香。我欲登城望大荒。勇欲爲國平河滄。才疎志大不自量。西家東家笑我狂。

書雨

仲冬候始寒。丙夜天正黑。雨來挾風助。吼擊不遺力。聲如拔高山。勢若伐強國。初憂老柏折。遂恐石筍踣。乾坤本無心。百神各效職。蛟龍鬪歲暮。豪橫理莫測。農功幸已成。龍怒亦會息。屋漏何足言。袖手姑默默。

一笑

半醉微吟不怕寒。江邊一笑覺天寬。莫愁艇子急衝雨。何遜梅花頻倚闌。萬事任從皮外去。百年聊作夢中觀。放翁縱老狂猶在。倒盡金壺燭未殘。

歲晚懷鏡湖舊隱慨然有作

公府還家鬢未秋。鏡湖南畔決歸休。讀書精舍豈輕出。采藥名山成遠遊。白墮興來猶小醉。青精材足更何求。俗間毀譽惟堪笑。常隘韓公咎斗牛。

華髮

華髮蕭蕭老蜀關。倦飛可笑不知還。人生只似駒過隙。世事莫驚雷破山。光景半銷樽酒裏。英豪或隱博徒間。車帷閉置真何樂。書劍飄然未厭閑。

歎息

國家圖籙合中興。歎息吾寧粥飯僧。賣劍買牛衰可笑。壞裳爲袴老猶能。曉過射圃雲藏壘。夜讀兵書雨灑燈。安得龍媒八千騎。要令窮虜畏飛騰。

冬至

歲月難禁節物催。天涯回首意悲哀。十年人向三巴老。一夜陽從九地來。上馬出門愁斂版。還家留客強傳杯。探春漫道江梅早。盤裏酥花也鬪開。

城南尋梅得

老子今年嬾賦詩。風光料理鬢成絲。青牟宮裏春來早。初見梅花第一枝。

又

黯淡江天雪欲飛。竹籬藪掩傍苔磯。清愁滿眼無人說。折得梅花作伴歸。

又

青煙漠漠暗西村。問訊梅花置一尊。冷淡生涯元不惡。卻嫌歌吹合江園。成都故事。合江園官梅開及五分。卽府君領客來遊。

又  
籬邊細路竹間庵。一段風流擅劍南。吾國以香爲佛事。客來試向鼻端參。

書歎

歷盡危塗井與參。鬢毛飽受雪霜侵。平生不可俗子眼。後世誰知吾輩心。河洛方行胡正朔。山林虛度醉光陰。浩歌未闕先投枕。衰病常憂感慨深。

感興

少小遇喪亂。妄意憂元元。忍飢臥空山。著書十萬言。賊亮負函貸。江北煙塵昏。奏記本兵府。大事得具論。請治故臣罪。深絕衰亂根。言疎卒見棄。袂有血淚痕。爾來十五年。殘虜尙遊魂。遺民淪左袵。何由雪煩冤。我髮日益白。病骸寧久存。常恐先狗馬。不見清中原。

又

高帝王蜀漢。天下豈易圖。幡然用其鋒。項羽不支梧。嗟余昔從戎。久戍南鄭墟。登高望夕烽。咫尺咸陽都。羣胡本無政。剽奪常自如。民窮訴蒼天。日夜思來蘇。連年况枯旱。關輔尤空虛。安得節制帥。弓刀肅馳驅。父老上牛酒。善意不可孤。諸將能辦此。機會無時無。

暮冬夜宴

官機錦茵金蹙鳳。舞娃釵墮雙竇重。竇爐三尺香吐霧。畫燭如椽風不動。主人愛客情無已。箏聲未斷歌聲起。亦知百歲等朝露。便恐一歡成覆水。爐紅酒綠春爲同。坐上梅花連夜開。堂前咫尺異氣候。冰合平池霜壓階。

枕上

枕上三更雨。天涯萬里遊。蟲聲憎好夢。燈影伴孤愁。報國計安出。滅胡心未休。明年起飛將。更試北平秋。

謁石犀廟

閑過石犀祠。登堂一歎歎。江回陵谷變。碑斷市朝非。有王蜀時修廟碑銘。荒園連塞壘。斜陽映夕霏。興亡俱昨夢。惆悵跨驢歸。

江上散步尋梅偶得三絕句

小園風月不多寬。一樹梅花開未殘。剝啄敲門嫌特地。緩拖藤杖隔籬看。

又

鐘殘小院欲消魂。漠漠幽香伴月痕。江上人家應勝此。明朝更出小南門。萬里橋門。一名小南門。

又

小南門外野人家。短短疎籬綠白沙。紅稻不須鸚鵡啄。清霜催放兩三花。

澹齋亭賞梅

判爲梅花倒玉卮。故山幽夢憶疎籬。寫真妙絕橫窗影。徹骨清寒蘸水枝。苦節雪中逢漢使。高標澤畔見湘纍。詩成怯爲花拈出。萬斛塵襟我自知。

芳華樓賞梅

素娥竊藥不奔月。化作江梅寄幽絕。天工丹粉不敢施。雪洗風吹見真色。出籬藏塢香細細。臨水隔煙情脈脈。一春花信二十四。縱有此香無此格。放翁年來百事情。唯見梅花愁欲破。金壺列置春滿屋。寶髻斜簪光照坐。百榼淋漓玉塵飛。萬人辟易銀鞍過。不惟豪橫壓清臞。聊爲詩人洗寒餓。

浣花賞梅

老子人間自在身。拈梅不惜損烏巾。春回積雪層冰裏。香動荒山野水濱。帶月一枝低弄影。背風千片遠隨人。石家樓上貪吹笛。肯放朝朝玉樹新。

蜀苑賞梅

十里溫香撲馬來。江頭還見去年梅。喜開剩欲邀明月。愁落先教掃綠苔。跌宕放翁新醉墨。淒涼廢苑舊歌臺。盛衰自古無窮事。莫向昆明歎劫灰。

大醉梅花下走筆賦此

閉門坐歎息。不飲輒千日。忽然酒興生。一醉須一石。簷頭花易老。旗亭酒常窄。出郊索一笑。放浪謝形役。把酒梅

花下不覺日既夕。花香襲襟袂。歌聲上空碧。我亦落烏巾。倚樹吹玉笛。人間奇事少。頗謂三勅敵。酒闌江月上。珠樹挂寒壁。便疑從此仙。朝市長掃迹。醉歸亂一水。頓與異境隔。終當騎梅龍。海上看春色。梅龍蓋蜀苑中故物也。

之廣都憩鐵像院

歲暮天苦寒。風雨復乘之。道邊得古寺。欣然具晨炊。瘦樹立中庭。斷蔓絡短籬。小僧爲設爐。童子燒槁枝。坐令手足柔。髭間失冰澌。敬禮龕中像。盡讀廡下碑。少年志四方。故里了不思。晚知行路難。更覺遊子悲。一官始巴夔。剡曲歸何時。置之勿復道。爛醉忘天姪。

廣都江上作

微波不搖江。纖雲不行天。我來倚杖立。天水相澄鮮。平遠望不盡。日落自生煙。梅花耿獨立。雪樹明前川。好風吹我衣。春色已粲然。東村聞酒笑。買醉上漁船。

宿龍華山中寂然無一人方丈前梅花盛開月下獨觀至中夜

梅花如高人。枯槁道愈尊。君看空谷。豈比倚市門。我來整冠佩。潔齋三沐熏。亦思醉其下。燕嬾恐續君。敬抱綠綺琴。玄酒挹古罇。月明流水閑。一洗世濁昏。摸寫香與影。計君已厭聞。老我少傑思。尙喜非陳言。

次韻張季長正字梅花

倚橋臨水似催詩。戲伴鶉黃上柳絲。萬里西湖驚斷夢。二年東閣憶幽期。巖嘗官唐安。插瓶直欲連全樹。簪帽憑誰揀好枝。一味淒涼君勿歎。平生初不願春知。

次韻季長見示

倚遍南樓十二欄。長歌相屬寫悲歡。空懷鐵馬橫戈意。未試冰河墮指寒。成敗極知無定勢。是非元自要徐觀。中原阻絕王師老。那敢山林一枕安。

廣都道中呈季長

天上石渠郎。能來伴楚狂。風霜朝並轡。燈火夜連牀。江水不勝綠。梅花無賴香。劇談那得住。出處要平章。

看梅歸馬上戲作



平明南出笮橋門。走馬歸來趁未昏。漸老更知閑有味。一冬強半在梅村。

又

本爲梅花判痛飲。卻嗅梅香消宿醒。日欲落時始上馬。青羊宮前聞發更。

又

一點不雜桃李春。一水隔斷車馬塵。恨不來爲清夜飲。月中香露溼烏巾。

又

江路疎籬已過清。月中霜冷若爲情。不如折向金壺貯。畫燭銀燈看到明。

又

江郊車馬滿斜暉。爭趁南城未闔扉。要識梅花無盡藏。人人襟袖帶香歸。

別後寄季長

俗子俗到骨。一揖已溷人。不知此曹面。何處得許塵。我非作崖壑。汝自不可親。道途逢使君。令我生精神。頓增江山麗。更覺風月新。對林得晤語。傾倒夜達晨。亟起忘縛袴。小醉或纏巾。線出錦城南。問訊江梅春。煎茶憩野店。喚船截煙津。淒涼弔廢苑。蕭散誇閑身。暮歸度略洑。月出水鱗鱗。思君去已遠。此會何由頻。

中夜對月小酌

今夕復何夕。素月流清輝。徘徊入我堂。化作白玉墀。栖鳥滿高樹。空庭結煙霏。可憐如許景。早眠人不知。我幸與周旋。一醉那得辭。整我接羅巾。對我翡翠卮。清愁不可耐。三嗅梅花枝。

客愁

騎馬出門無所詣。端居正爾客愁侵。蒼顏白髮入衰境。黃卷青燈空苦心。天下極知須雋傑。書生何恨死山林。消磨未盡胸中事。梁甫時時尙一吟。

詩酒

酒隱凌晨醉。詩狂徹旦歌。憫憐蝸左角。嘲笑蠟南柯。風月隨長笛。江湖入短蓑。平生會心處。最向漆園多。

道室夜意

寒泉漱酒醒。午夜誦仙經。茶鼎聲號蚪。香盤火度螢。齋心守玄牝。閉目得黃寧。寄語山中友。因人送茯苓。

道室晨起

紙帳晨光透。山爐宿火燃。雞鳴猶喔喔。鴉起已翩翩。形槁寒巖木。心凝古澗泉。何須更臨鏡。斷是一癯仙。

城南王氏莊尋梅

酒池積槁葉。芴屋圍疎籬。可憐庭中梅。開盡無人知。寂寞終自香。孤貞見幽姿。雪點滿綠苔。零落尙爾奇。我來不須晴。微雨正相宜。臨風兩愁絕。日暮倚筇枝。

遊萬里橋南劉氏小園

佳園寂無人。滿地梅花香。閑來曳拄杖。臘月日已長。朱橋架江面。欄影搖波光。奇哉小垂虹。夢破鱸魚鄉。汀鷺一點白。煙柳千絲黃。便欲喚釣舟。散髮歌滄浪。可憐隔岸人。車馬日夜忙。我歸門復掩。寂歷挂斜陽。

過笮橋道中龍祠小留

江邊龍廟何年作。白浪花中插朱閣。朝曦漸上宿霧收。春氣已動晨霜薄。我來倚欄一悵然。蘆花滿空如柳綿。安得身爲雙白鷺。飛上灘頭卻飛去。

道上見梅花

載酒房湖風日美。探梅喜折一枝新。今朝忽向街頭見。萬萼千跗俗卻春。

倚樓

滅盡朱顏白髮新。高樓徙倚默傷神。未酬馬上功名願。已是人間老大身。太史周南方臥疾。拾遺劍外又逢春。一杯且爲江山醉。百萬呼盧迹已陳。

寄王季夷

平生素子最知心。巴隴飄零歲月侵。萬里喜聞身尙健。五更惟有夢相尋。插花意氣狂如昨。中酒情懷病至今。共約暮年須強飯。天台履阜要登臨。

丁酉除夕

母生過五十。光景如飛鴻。寒暑倏仰間。四序忽已終。殊方感飄泊。晚境嗟龍鍾。桃符與爆竹。頰復隨兒童。不寐非守歲。燕坐夜過中。氣定神自凝。海日何曠曠。豈惟三彭逃。坐覺六入空。徂年勿惆悵。闕世方無窮。

正月二日晨出大東門是日府公宴移忠院

成都春事早。開歲已暄妍。蠶尾傳盃後。遨頭出郭前。爭門金轆轤。滿野繡鞦韆。白髮花邊醉。何妨似少年。

小飲落梅下戲作送梅一首

零落梅花不自由。斷腸容易付東流。與人又作經年別。問月應知此夜愁。已是狂風卷平野。更禁橫笛起危樵。何時小雪山陰路。處處尋香繫釣舟。

立春

鬢毛蕭颯寸心灰。生怕新年節物催。幸是身閑朝睡笑。忽聞鼓吹打春回。

初春出遊戲作

綠窗百舌喚春眠。問柳尋花意已便。京洛化衣無夢去。邯鄲觀伎有詩傳。銅壺閣下閑欵帽。石鏡坊前戲墜鞭。酒隱人間君勿誚。定勝山澤作臞仙。

初春遣興始於志退而終於懷懣許國之忠亦臣子大義也

爛熟思來怕熱官。退飛心地喜輕安。栖魚正可取熊掌。食肉何須知馬肝。放眼柳梢初暗動。褪花梅子已微酸。典衣剩作江頭醉。莫謂天涯苦解歡。

又

大隱悠悠未棄官。俸錢雖薄卻心安。人方得意矜蝸角。天豈使予爲鼠肝。佳日劇甚忘旅恨。短衣馳射壓儒酸。小桃楊柳爭時節。載酒江頭罄一歡。

又

白髮凄凉故史官。十年身不到長安。即今天末弔形影。何日上前傾肺肝。孤憤書成詞激烈。五噫歌罷意辛酸。此

懷欲說無人共。安得相攜素所歡。

予年十六始識葉晦叔於西湖上。後二十七年晦叔之弟聲叔來爲臨邛守。相遇於成都。晦叔沒久矣。訪其遺文。略無在者。乃賦此詩。

故人零落久山丘。誰記京華第一流。曹霸揮毫空萬馬。庖丁投刃解千牛。相逢夢境何勞記。追想情言未免愁。雷電取將遺稿盡。他年虛有茂陵求。

初春探花有作

燈山昨夢歎匆匆。便恐新春過眼空。千縷未搖官柳綠。一梢初放海棠紅。金羈絡馬閑遊處。彩筆題詩半醉中。流落天涯何足道。年年常策探花功。

遊諸葛武侯書臺

沔陽道中草離離。臥龍往矣空遺祠。當時典午稱猾賊。氣喪不敢當王師。定軍山前寒食路。至今人祠丞相墓。松風想像梁甫吟。尙憶幡然答三顧。出師一表千載無。遠比管樂蓋有餘。世上俗儒寧辨此。高臺當日讀何書。

觀花

我遊西川醉千場。萬花成圍柳著行。紅錦地衣舞霓裳。翠簷繡袂天寶粧。清歌一發無留觴。嫋嫋餘聲榮杏梁。黃金絡馬照路光。自譏羈離觀海棠。搜奇選勝日夜忙。不惟燕宮碧雞坊。暮歸奚奴負錦囊。路人爭看放翁狂。

張園觀海棠

朝陽照城樓。春容極明媚。走馬蜀錦園。名花動人意。嚴妝漢宮曉。一笑初破睡。定知夜宴歡。酒入妖骨醉。低鬟羞不語。困眼嬌欲閉。雖豔無俗姿。太息真富貴。結束吾方歸。此別知幾歲。黃昏廉纖雨。千點裏紅痕。

月夕

醉從東郭歸。散髮臨前楹。呼僮淨掃地。勿使斲月明。庭空臥松影。簷迴送鐸聲。鐘斷心境寂。露下毛髮清。出門碧霧合。九陌無人行。坐令錦官城。化作白玉京。

夜飲卽事

天涯久客我何堪。聊喜燈前得縱談。磊落金盃薦糖蟹。纖柔玉指破霜柑。燭圍寶馬人將起。花墜紗巾酒正酣。更作茶甌清絕夢。小窗橫幅畫江南。

夜宴賞海棠醉書

便便癡腹本來寬。不是天涯強作歡。燕子歸來新社雨。海棠開後卻春寒。醉誇落紙詩千首。歌費纏頭錦百端。深院不聞傳夜漏。忽驚蠟淚已堆盤。

二月十六日賞海棠

常年春半花事竟。今年春半花始盛。衰翁不減少年狂。走馬直與飛蝶競。妍華有露洗愈明。纖弱無風播不定。莫放飄零作紅雨。剩看倩笑臨粧鏡。溪梅枯槁墮巖谷。山杏輕浮真妾媵。欲誇絕豔不勝說。縱欠濃香何足病。華燈銀燭搖花光。翠杓金船豪酒興。夜闌感事獨凄然。繁枝空折誰堪贈。

卽席

解缺名園眼倍明。殷勤翠袖勸飛觥。海棠紅杏欲無色。蚊蝶黃鸝俱有情。去日不留春漸老。歸舟已具客將行。倦遊短鬢無多綠。生怕尊前唱渭城。

東歸有日書懷

萬里橋邊白版扉。三年高臥謝塵鞿。半窗竹影棋僧去。滿棹蘋風釣伴歸。看鏡已添新雪鬢。聽雞重拂舊朝衣。故人零落今無幾。華表空悲老令威。

眉州披風榭拜東坡先生遺像

蜿蜒回顧山有情。平鋪十里江無聲。孕奇蓄秀當此地。鬱然千載詩書城。高臺老仙誰所寫。仰視眉宇寒崢嶸。百年醉魂吹不醒。飄飄風袖筇枝橫。爾來逢迎厭俗子。龍章鳳姿我眼明。北扉南海均夢耳。謫墮本自白玉京。惜哉畫史未造極。不作散髮騎長鯨。故鄉歸來要有日。安得春江變酒從公傾。

訪青神尉廨借景亭蓋山谷先生舊遊也

造朝下白帝。弔古遊青神。城頭三間屋。聊得岸我巾。元祐太史公。世寧有斯人。瘴煙侵玉骨。老作宜州民。至今杖履地。來者猶酸辛。密竹翦已空。喬木亦半薪。陂池獨渺然。中有鷗鷺馴。人生能自足。一尉可終身。三歎下城去。捩柁春江津。

舟過玉津

玻璃江上送殘春。疊鼓催颿過玉津。蜀苑鶯花初破夢。巴山風月又關身。幅巾久已忘朝幘。短劍惟思隱市塵。莫倚諸公容此老。西曹那許吐車茵。

敘州

臺船衝雨入戎州。縹緲山橫杜若洲。須信時平邊埃靜。傳烽夜夜到西樓。州治西樓。

又

文章何罪觸雷霆。風雨南谿自醉醒。八十年間遺老盡。壞堂無壁草青青。無等院山谷故居。

又

楚梅吳檣又遠遊。浣花行樂夢西州。千尋鐵鎖還堪恨。空鎖長江不鎖愁。鎖江亭。

廬州使君巖在城南一里深。三丈有泉出其左。音中律呂木龍巖。相距亦里許。黃太史所嘗遊憩也。

雲間刁斗過邊州。沙際丘亭艤客舟。漲水方憂三峽險。短筇猶作兩巖遊。蛟龍矯矯峯雲起。琴筑泠泠繞榻流。未死人生誰料得。會來攜客試茶甌。

南定樓遇急雨

行遍梁州到益州。今年又作度瀟遊。江山重複爭供眼。風雨縱橫亂入樓。人語朱離逢峒獠。棹歌欸乃下吳舟。天涯往還歸心懶。登覽茫然卻欲愁。

夜泊合江縣月中小舟謁西涼王祠

懸瀑雪飛舞。奇峯玉嶙峋。搗碎一江月。來謁西涼神。我雖不識神。知是山水人。不敢持笏來。袒褐整幅巾。出我囊

中香。羞我南谿蘋。杯隄玻璃春。盤橫水精鱗。出門意恟悅。煙波浩無津。安得結茆地。與神永爲鄰。

風順舟行甚疾戲書

昔者遠戍南山邊。軍中無事酒如川。呼盧喝雉連暮夜。擊兔伐狐窮歲年。壯士春蕪臥白骨。老夫展鏡悲華顛。可憐使氣尙未減。打鼓順流千斛船。

舟中對月

百壺載酒遊凌雲。醉中揮袖別故人。依依向我不忍別。誰似峨眉半輪月。月窺船窗挂凄冷。欲到渝州酒初醒。江空裊裊釣絲風。人靜翩翩葛巾影。哦詩不睡月滿船。清寒入骨我欲仙。人間更漏不到處。時有沙禽背船去。

漁翁

江頭漁家結茆廬。青山當門畫不如。江煙淡淡兩疎疎。老翁破浪行捕魚。恨渠生來不讀書。江山如此一句無。我亦衰遲慚筆力。共對江山三歎息。

涪州道中

遠客喜歸路。清遊逾昔聞。雨添山翠重。舟壓浪花分。洛叟經名世。張侯勇冠軍。郡境有伊川先生故居。及張益德祠。懷人不可覯。袖手對爐熏。

涪州

古壘西偏曉繫舟。倚欄搔首思悠悠。欲營丹竈竟無地。地產丹砂。不見荔枝空遠遊。官道近江多亂石。人家避水半危樓。使君不用勤留客。瘴雨蠻雲我欲愁。太守招飲辭不住。

北巖有程正叔先生祠堂

艤船涪州岸。攜兒北巖遊。播櫂橫大江。褰裳躡高樓。兩昏山半失。江漲地欲浮。老矣寧再來。爲作竟日留。烏帽程丈人。閉戶本好修。駭機一朝發。議罪至竄投。黨禁久不解。胡塵暗神州。修怨以稔禍。哀哉誰始謀。小人無遠略。所懷在私讎。後來其鑑茲。賦詩識巖幽。

平都山忠州豐都縣

名山近江步。蠟屐得閑行。奔鹿衝人過。藏丹徹夜明。唐碑多斷蝕。梁殿半欹傾。洞口雲常湧。簷牙柏再榮。行逢負籠客。臥聽送船聲。乞我誅卯地。靈苗得共烹。

忠州禹廟

古郡巴蠻國。空山夏禹祠。鴉歸暗庭柏。巫拜薦江離。草蔓青緣壁。苔痕紫滿碑。欲歸頻悵望。回棹夕陽時。

忠州醉歸舟中作

耿耿船窗燈火明。東樓欽罷恰三更。不堪酒渴兼消渴。起聽江聲雜雨聲。垂首道塗悲曠老。滿懷風露覺蟬清。蘭亭禹廟山如畫。安得飄然送此生。

雨中遊東坡

木蓮花下竹枝歌。歡意無多感慨多。更恐他年有遺恨。曉來衝雨上東坡。

龍興寺弔少陵先生寓居

中原草草失承平。戍火胡塵到兩京。扈蹕老臣身萬里。天寒來此聽江聲。以少陵詩考之。蓋以秋冬間寓此州也。寺門聞江聲甚壯。

遊萬州岑公洞岑公隨時人居此二十年得道仙去

大業征遼發閩左。軍興書檄煎膏火。此時也復有閑人。自引巖泉拾山果。後六百歲吾來遊。洞中正夏淒如秋。乳石床平可坐臥。水作珠簾月作鈎。十年神遊入極表。淨名坐覺秋豪小。試問岑公迎我不。鶴飛忽下青松杪。

萬州放船過下巖小留

畫船四月滿旗風。飲散匆匆鷁首東。醉裏偏憐江水綠。意中已想荔枝紅。斷碑零落莓苔遍。幽澗淙潺略約通。一疋寧無好東絹。憑誰畫此碧玲瓏。

白帝泊舟

客路閑無事。津亭爽有餘。峽江春漲減。灩岸夜燈疎。老矣孤舟裏。依然十載初。倦遊思稅駕。更覺愛吾廬。

醉中下瞿唐峽中流觀石壁飛泉



吾舟十丈如青蛟。乘風翔舞從天下。江流觸地白鹽動。灩澦浮波真一馬。主人滿酌白玉盃。旗下畫鼓如春雷。回頭已失瀼西市。奇哉一削千仞之蒼崖。蒼崖中裂銀河飛。空裏萬斛傾珠璣。醉面正須迎亂點。京塵未許化征衣。

暮次秭歸

朝披南陵雲。夕揖建平樹。啼鴉隨客櫂。落日滿孤戍。惡灘不可說。石芒森如鋸。浪花一丈白。吹沫入窗戶。是身二非我。底處著憂怖。酒酣一枕睡。過盡鮫鱗怒。欣然推枕起。曳杖散予步。殷勤沙際柳。記我維舟處。

歸州重五

鬪舸紅旗滿急湍。船窗睡起亦閑看。屈平鄉國逢重五。不比當年角黍盤。屈平祠在州東南五里歸鄉院。蓋平居也。

屈平廟

委命仇讎事可知。章華荆棘國人悲。恨公無壽如金石。不見秦嬰係頸時。

楚城

江上荒城猿鳥悲。隔江便是屈原祠。一千五百年間事。只有灘聲似舊時。

新灘舟中作三峽新灘尤險今已平矣

江路桃花浪已生。新灘穩過失崢嶸。九年行半九州地。三峽歸無三日程。繫纜便增筇杖興。倚窗時聽棹歌聲。遲未覺詩情減。又襲吳牋賦楚城。

舟出下牢關

大舸凌驚濤。飛度青玉峽。虛壁雲濛濛。陰洞風颯颯。拂天松蓋偃。入水山脚插。炎曦忽摧破。亭午手忘箑。懸知夜喜。月白宿沙夾。曠哉七澤遊。盟鷗不須敵。

峽口夜坐

三峽至此窮。兩壁猶峭立。估船無時行。婦盜有夜汲。風生樹影動。月碎水流急。草根綴微露。螢火飛熠燿。吾行四旬纔抵楚西邑。浩歌散鬱陶。還舟覓衣壑。

峽州甘泉寺

江上甘泉寺。登臨擅一州。山亭喜無恙。老子得重遊。灘急常疑雨。林深欲借秋。歸途更清絕。倚杖喚漁舟。

峽州東山

十年不踏東山路。今日重爲放浪行。老矣判無黃鶴舉。歸哉惟有白鷗盟。新秧刺水農家樂。修竹環溪客眼明。已駕巾車仍小駐。綠蘿亭下聽鶯聲。

江上觀月

暗浪衝舟鞞鞞聲。夷陵城下正三更。十分傾酒禁風力。一點無雲祟月明。久坐不知衣露溼。浩歌時有水禽驚。詩成莫駕長鯨去。自是虛皇白玉京。

初發夷陵

雷動江邊鼓吹雄。百灘過盡失途窮。山平水遠蒼茫外。地闊天開指顧中。俊鷁橫飛遙掠岸。大魚騰出欲凌空。今朝喜處君知否。三丈黃旗舞便風。

舟中夜坐

風露浩無際。星河淡欲傾。遙知並船客。聞我詠詩聲。水鳥橫江去。漁舟背月行。神情不成寐。隱几待窗明。

初到荊州

萬里泛仙槎。歸來鬢未華。蕭蕭沙市雨。淡淡渚宮花。斷岸添新漲。高城咽晚笳。船窗一樽酒。半醉落烏紗。

醉歸

持酒江頭到夕霏。愁城頓覺解重圍。澄波宜月移船看。醉面便風走馬歸。末路已驚添白髮。故人頻報上黃扉。疆隨官簿真成賴。乞我吳松舊釣磯。

出遊

萬里崎嶇蜀道歸。荊州非復壯遊時。行吟自怪詩情減。坐睡人驚酒量衰。卷地風號雲夢澤。黏天草映伏波祠。一枝藤杖平生事。擊鼓開帆未恨遲。

大堤

日晚大堤行。莽然千里平。天低垂曠野。風壯撼高城。列肆居茶估。連營宿戍兵。纍纍北門垠。候盡望神京。荊州臣東都纔十七八程。

阻風

沙市三日風。萬鼓鳴船頭。欲去不得發。臥對青燈幽。聽兒誦離騷。可以散我愁。微言入孤夢。悅與屈宋遊。睡起銅瓶響。欣然喚茶甌。吾道無淹速。風伯非所尤。

初發荊州

淋漓牛酒起檣干。健鶻飛如插羽翰。破浪乘風千里快。開頭擊鼓萬人看。鶻聲不斷朝陽出。旗脚微舒宿雨乾。堪笑塵埃洛陽客。素衣如墨據征鞍。

泊公安縣

秦關蜀道何遼哉。公安渡頭今始回。無窮江水與天接。不斷海風吹月來。船窗簾捲螢火鬧。沙渚露下蘋花開。少年許國忽衰老。心折柁樓長笛哀。

劉郎浦夜賦

平生遠遊心。睥睨萬里窄。今年下三巴。放浪浮七澤。菰蒲無遠近。但覺風索索。浪高星辰湮。天碧河漢白。十年散醉髮。未易著朝幘。守符倘可乞。來作瀟湘客。

小兩極涼舟中熟睡至夕

舟中一雨掃飛蠅。半脫綸巾臥翠藤。清夢初回窗日晚。數聲柔艣下巴陵。

岳陽樓

身如病鶴短翅翎。雨雪飄灑號沙汀。天風忽吹不得住。東下巴峽泛洞庭。軒皇張樂雖已矣。此地至今朝百靈。雄樓岌業鎮吳楚。我來舉手捫天星。帆檣纔放已隱隱。雲氣亂入何冥冥。鼉鼉出沒蛟鱉橫。浪花遮盡碧山青。黃衫仙翁喜無恙。袖劍近到城南亭。眼前俗子敗人意。安得與翁同醉醒。

再賦一絕

江風吹雨濯征塵。百尺闌干爽氣新。不向岳陽樓上醉。定知未可作詩人。

乘大風發巴陵

雪濺浪方作。翠颭山欲浮。奇哉萬頃湖。著我十丈舟。三老請避風。叱去非汝憂。神物識忠信。壯士憎滯留。擊鼓催  
挂帆。揮手別岳州。仰視羣鷁翔。下闌百怪囚。衡湘清絕地。恨不從此遊。聊須百斛酒。往醉庾公樓。

通濟口

朝發嘉魚縣。晚泊通濟口。睡起喜微涼。船窗一杯酒。長魚吹浪聲。恐人巨鼉露背浮。齋淪。今夕風生月復暗。寄語  
舟人更添纜。

醉書

青草渡頭波接天。山翁吟嘯自悠然。朝餐偶過賣魚市。晚泊時逢迎荻船。投老未除游俠氣。平生不作俗人緣。一  
樽酌罷玻璃酒。高枕窗邊聽雨眠。偶餘眉州酒一樽。獨酌餘辭。

南樓

十年不把武昌酒。此日關邊感慨深。舟楫紛紛南復北。山川莽莽古猶今。登臨壯士興懷地。忠義孤臣許國心。倚  
杖譚然斜照晚。秦吳萬里入長吟。

黃鶴樓

手把仙人綠玉枝。吾行忽及早秋期。蒼龍鬬角歸何晚。黃鶴樓中醉不知。江漢交流波渺渺。晉唐遺迹草離離。平  
生最喜聽長笛。裂石穿雲何處吹。

頭陀寺觀王簡栖碑有感

舟車如織喜身閑。獨訪遺碑草棘間。世遠空驚閩陵谷。文浮未可敵江山。老僧西逝新成塔。舊守東歸正掩關。笑  
我驅馳竟安往。夕陽飛鳥亦知還。庚寅通武昌。與太守張之彦遊景日。詩頭陀有老僧持律精甚。

夜熱

觸熱行萬里。煩促詎可論。泊船鄂州步。終日如炮燔。搖扇腕欲脫。揮汗白雨翻。推枕再三起。散髮臨前軒。秋近更

漏長。天旱星宿繁。甘樹何時來。太息憂元元。鄂州頗閱用。

舟中偶書

老子西遊萬里回。江行長夏亦佳哉。晝眠初起報茶熟。宿酒半醒聞雨來。漢口船開催疊鼓。淮南帆落亞高桅。四方本是丈夫事。白首自憐心未灰。

燈下讀書

少年喜書策。白首意未足。幽窗燈一點。樂處超五欲。而況黃州路。小雨漁村宿。蕭蕭蒹葭聲。爲我洗暑毒。琅然誦經史。少倦兒爲續。何必效萊公。長夜醉畫燭。

泊三江口

暹明離武昌。薄暮次黃岡。勿言觸熱行。一兩三日涼。北窗荻蕭蕭。南窗江茫茫。玄雲一池墨。碧綫半篆香。尙無車馬塵。况復爭奪場。徐行勿挂帆。此樂殊未央。

自雪堂登四望亭因歷訪蘇公遺迹至安國院

我醉飛屐登孱顏。拄杖出沒風煙間。三山葱蘢蛟鱉靜。九關蕭穆虎豹閑。幾年金骨煉綠髓。此日始得窮躋攀。老仙歸侍紫皇案。空有野水流淙潺。蜿蜒翠阜圍綠野。似嶺非嶺山非山。向來龍蛇滿雪壁。雷電下取何時還。名花亦已天上去。居人指似題詩處。九十一翁不識公。我抱此恨知無窮。定惠院已廢。海棠亦不復在。安國老僧景微年九十一。自言東坡去黃後四年方生。

月下步至臨臯亭

芒鞋踏松陰。迨此船未發。清遊豈無伴。三友風露月。山川鬱盤紆。鷗鷺浩滅沒。當年老先生。想像散醉髮。浮生等昨夢。久已埋玉骨。吾儕幸彊健。何事拘簪笏。

發黃州泊巴河遊馬祈寺

南望武昌山。北望齊安城。楚江萬頃綠。著我畫舫橫。雲帆不須挂。鼙鼓不須鳴。淡然隱曲几。山水相逢迎。疎雨漏薄日。非陰亦非晴。晚泊巴河市。小陌聞屐聲。紫髯刑馬地。一怒江漢清。中原今何如。感我白髮生。

舟行蘄黃間雨霽得便風有感

天青雲白十分晴。帆飽舟輕盡日行。江底魚龍貪晝睡。淮南草木借秋聲。好山縹緲何由住。華髮蕭條只自驚。莫怪時人笑踈懶。宦情元不似詩情。

南烹

十年流落魄南烹。初見鱸魚眼自明。堪笑吾宗輕許可。坐令羊酪借尊羹。

泊蕪口泛月湖中

炎天倦長路。月夕泛平湖。晃漾披銀闕。清寒住玉壺。釣絲縈藻荇。篷艇入菰蒲。自別蜻蜒浦。斯遊十載無。予故廬在蜻蜒港東南。暑月常與客泛舟至中夜。

初見廬山

從軍憶在梁州日。心擬西征草捷書。鐵馬但思經太華。布帆何意拂匡廬。計謀落落知誰許。功業悠悠定已疎。尙喜東林尋舊社。月明清露溼芙蓉。

六月十四日宿東林寺

看盡江湖千萬峯。不嫌雲夢芥吾胸。戲招西塞山前月。來聽東林寺裏鐘。遠客豈知今再到。老僧能記昔相逢。虛窗熟睡誰驚覺。野碓無人夜自春。

舟過小孤有感

小孤山畔峭帆風。又見煙鬟縹緲中。萬里客經三峽路。千篇詩費十年功。未嘗滿箸蒲芽白。先看堆盤鱸鱸紅。商略人生爲何事。一蓑從此入空磯。

雁翅夾口小酌

爐煙淡將散。江雨細欲無。回風吹衣襟。晴光滿菰蒲。隱几樂此時。清和如夏初。犬吠船丁歸。小市得笑蔬。歡言酌清醪。俯以案上書。雖云泊江渚。何異歸林廬。

長風沙

江水大月無津涯。驚濤駭浪高吹花。精聲已出雁翅浦。荻夾喜入長風沙。長風自古三巴路。檣竿參差雜煙樹。南

船北船各萬里。淒涼小市相依住。歌呼雜沓燈火明。黃昏風死浪亦平。勞苦舟師剩沽酒。安穩明朝到池口。

泛小舟姑熟溪口

姑溪綠可染。小艇追晚涼。棹進破樹影。波動搖星芒。荻深漁火明。風遠水草香。尙想錦袍公。醉眼隘八荒。坡陁青山冢。斷碣臥道旁。悵望不可逢。乘雲遊帝鄉。溪東南卽青山大白墓。

明日再遊又賦

舟中如甑炊。端坐畏暵死。未能踏增冰。且復呼艇子。纖纖新月低。玉鉤沈野水。微風生蘋末。塵抱真一洗。可憐黃山塔。突兀暮煙裏。依然十年前。看我行萬里。兩槳且勿搖。橫舟小灘尾。得詩偶長吟。宿鷺爲驚起。

過采石有感

短衣射虎早霜天。歎息南山又七年。唾手每思雙羽箭。快心初見萬樓船。平波漫漫看浮馬。一作繁鳥。高柳陰陰聽亂蟬。明日重尋石頭路。醉鞍誰與共聯翩。

將至金陵先寄獻劉留守

梁益羈遊道阻長。見公便覺意差彊。別都王氣半空紫。大將牙旗三丈黃。江面水軍飛海鶴。帳前羽箭射天狼。歸來要了浯溪頌。莫笑狂生老更狂。

登賞心亭

蜀棧秦關歲月邁。今年乘興卻東遊。全家穩下黃牛峽。半醉來尋白鷺洲。黯黯江雲瓜步雨。蕭蕭木葉石城秋。孤臣老抱憂時意。欲請遷都涕已流。

夜泊龍廟回望建康有感

我醉行水上。身輕如飛煙。魚龍互悲嘯。伴我夜不眠。羽扇揮浮雲。月挂牛斗間。河漢橫復斜。風露方浩然。坡陁石頭城。寂莫七百年。世事感予懷。竦身入青天。

將至京口

臥聽金山古寺鐘。三巴昨夢已成空。船頭坎坎回帆鼓。旗尾紆紆下水風。城角危樓時鶴碧。林間雙塔夕陽紅。銅

瓶愁汲中灑水。不見茶山九十翁。頃在京口。嘗取中灑水寄曾文清公。

### 荆谿館夜坐

河漢無聲天正青。三三五五滿天星。草根冷露黏濕螢。幽人岸巾坐津亭。憶下襄唐浮洞庭。陽臺繫船夢娉婷。朱門重重夜不扃。四山猿鳥啼青冥。人生無蒂風中萍。幸我夢斷狂已醒。繡轡金絡帶萬釘。何如故山鋤茯苓。

### 泝谿

射的峯前禹廟東。短篷三扇臥衰翁。閑攜清聖濁賢酒。重試朝南暮北風。水落痕留紅蓼節。雨來聲滿綠蒲叢。衝煙莫作匆匆去。擬看溪丁下釣筒。

### 歸雲門

萬里歸來值歲豐。解裝鄉墅樂無窮。甌炊飽雨糊菱紫。箴絡迎霜野柿紅。壞壁塵埃尋醉墨。孤燈餅餌對鄰翁。微官行矣闕山去。又寄千巖夢想中。

### 月下自三橋泛湖歸三山

素壁初升禹廟東。天風爲我送孤篷。山橫玉海蒼茫外。人在冰壺縹緲中。茅舍燈青聞吠犬。蘋汀煙淡見鷺鳴。白頭尙耐清寒在。安得終年伴釣翁。

### 懷成都十韻

放翁五十猶豪縱。錦城一覺繁華夢。竹葉春醪碧玉壺。桃花駿馬青絲鞵。鬪雞南市各分朋。射雉西郊常命中。壯士臂立綠條鷹。佳人袍畫金泥鳳。椽燭那知夜漏殘。銀貂不管晨霜重。一梢紅破海棠回。數蕊香新早梅動。酒徒詩社朝暮忙。日月匆匆迭賓送。浮世堪驚老已成。虛名自笑今何用。歸來山舍萬事空。臥聽糟牀酒鳴瓮。北窗風雨耿青燈。舊遊欲說無人共。

### 湖村秋曉

劍閣秦山不計年。卻尋剡曲故依然。盡收事業漁舟裏。全付光陰酒榼邊。平野曉聞孤唳鶴。澄湖秋浸四垂天。九關虎豹君休問。已向人間得地仙。



夜夢與宇文子友譚德稱會山寺若饒予行者明日黎明得子友書感歎久之乃作此詩

夜夢集山寺。二三佳友生。相顧慘不樂。若有千里行。在門僕整駕。臨道離嘶鳴。我友顧謂我。天寒戒晨征。遲速要當到。徐驅勿貪程。丁寧及藥餌。依依有餘情。鄰鐘忽驚覺。鴉翻窗欲明。作詩謝我友。有使頻寄聲。

寒夜

小隱謝城市。新寒尋褐袍。秋燈依壁暗。夜雨挾風豪。俗自隨時異。身寧與世鏖。殘年更何事。持蟹酌松醪。

偷閑

老向人間未拂衣。偷閑聊喜息塵機。丹楓斷岸秋來早。淡日孤村客到稀。偶憶雪溪攜鶴去。卻從雲肆買蓑歸。酒徒莫笑生涯別。久矣淵明悟昨非。

冬夜聞雁有感

從軍昔戍南山邊。傳烽直照東駱谷。軍中罷戰壯士閑。細草平郊恣馳逐。洮州駿馬金絡頭。梁州毬場日打毬。玉杯傳酒和鹿血。女真降虜彈箜篌。大呼拔幟思野戰。殺氣當年赤浮面。南遊蜀道已抵摧。猶按胡牀飛百箭。豈知蹭蹬還江邊。病臂不復能開弦。夜聞雁聲起太息。來時應過桑乾磧。

書懷

愁向東華躡軟紅。暫歸舊隱樂無窮。石池洗藥涓涓水。漁艇投竿嫋嫋風。盡日醉醒菱唱裏。鄰家來往竹陰中。何須列戟長安第。四面雲山擁此翁。

湖中暮歸

弄櫂漁舟水濺衣。興闌卻傍柳邊歸。風平別浦沈新月。日落前村鎖夕霏。乍起鷺行橫野去。欲栖鴉陣暗天飛。詩情自合江湖老。敢恨功名與願違。

題齋壁

葺得湖邊屋數椽。茅齋低小竹窗妍。墟煙寂歷歸村路。山色蒼寒釀雪天。性懶杯盤常偶爾。地偏雞犬亦翛然。早知粟里多幽事。虛走人間四十年。

新葺門屋

林棲四壁空。百事從簡易。缺籬寒未補。幽戶夜不閉。東偏欲廣屋。厚費敢輕譏。設關力可具。稚子請遂事。呀然兩竹扉。寧復志容駟。西山正當前。浩蕩納空翠。下臨漁樵路。橫鎖風月地。惟愁俗客來。剝啄驚午睡。

吾廬

吾廬雖小亦佳哉。新作柴門廝綠苔。拄杖每闌歸鶴入。釣船時帶夕陽來。墟煙隔水霏霏合。籬菊凌霜續續開。千里安期那可得。笑呼鄰父共傳杯。

冬夜泛舟有懷山南戎幕

釣船東去掠新塘。船迳篷低露箔香。十里澄波明白石。五更殘月伴清霜。飄飄楓葉無時下。嫋嫋菱歌盡意長。誰信梁州當日事。鐵衣寒枕綠沉槍。

夢至成都悵然有作

春風小陌錦城西。翠箔珠簾客意迷。下盡牙籌閑縱博。刻殘畫燭戲分題。紫氍毹暖帳中醉。紅叱撥驕花外嘶。孤夢淒涼身萬里。令人憎殺五更雞。

又

宦途元不羨飛騰。錦里豪華歷五陵。紅袖引行遊玉局。華燈圍坐醉金繩。階前汗血洮河馬。架上霜毛海國鷹。世事轉頭誰料得。一官南去冷如冰。

月夕

開戶滿庭雪。徐看知月明。微風入叢竹。復作雪來聲。俗塵不待掃。凜然肝肺清。村深無漏鼓。鶴唳報三更。將入閩夜行之雲門

東鷺並偏門。籃輿兀睡昏。紡燈穿壁罅。吠犬闌籬根。久客悲行役。清愁怯夢魂。餘生猶幾出。回首付乾坤。

山中觀殘菊追懷眉山師伯渾

空山菊花瘦如棘。傾倒滿地枝三尺。陰風冷雨不相貸。爛草蒼苔共狼藉。人雖委棄渠自香。詎必泛酒登華堂。君

不見仁人志士窮死眉山陽。空使後世傳文章。

自雲門之陶山肩輿者失道行亂山中有茅舍小塘極幽邃求見主人不可意其隱者也

陂池幽處有茅堂。井臼蕭條草樹荒。小鴨怯波時聚散。病蔬傷蠹半青黃。童兒衝雨收魚網。婢子聞鐘上佛香。我亦暮年思屏迹。數椽何計得連牆。

冬夜聽雨戲作

少年交友盡豪英。妙理時時得細評。老去同參惟夜雨。焚香臥聽畫齋聲。

又

邊籬點滴如琴筑。支枕幽齋聽始奇。憶在錦城歌吹海。七年夜雨不曾知。

適園

春殘猶看少城花。雪裏來嘗北苑茶。未恨光陰疾騎隙。但驚世界等河沙。功名塞外心空壯。詩酒樽前髮已華。官柳弄黃梅放白。不堪倦馬又天涯。

欲行雨未止

幽幔依燈影。空階送雨聲。暫歸仍客路。投老倍鄉情。眼澀書難讀。心搖夢易驚。病多常怕醉。酒盡卻思傾。

比作陳下瓜齏釀成奇絕。屬病瘍不敢取醉小啜而已。

聖蔓扶疎采擷忙。麴生系出古淮陽。躡成明月團團白。釀作新鶉淡淡黃。醅甕秋寒驚凜冽。糟牀夜注愛淋浪。西齋幽事新成譜。首爲高人替此方。酒方昔得之胡甚仲。

大雨中離三山宿天章寺

苦雨催寒不肯晴。晚來餘勢更縱橫。雲如山壞長空黑。風似潮回萬木傾。要借關河供遠眼。不辭泥淖困初程。解衣一笑僧窗下。幾兩青鞋了此生。

早飯干糜蓋干吉故居也

劍外歸來席未溫。南征浩蕩信乾坤。峯回內史曾遊地。竹暗仙人舊隱村。白髮孤翁鉏麥壠。茜裙小婦闌籬門。行

行莫動鄉關念。身似流槎豈有根。

贈楓橋化城院老僧

老宿禪房裏。深居罷送迎。爐紅豆萁火。糝白芋魁羹。義祔年年補。紗燈夜夜明。門前霜半寸。笑我事晨征。

雙橋道中寒甚

裂面霜風快似濂。重重裘袴晚仍添。梅當官道香撩客。山逼籃輿翠入簾。男子坐爲衣食役。年光常向道途掩。古來共說還家樂。豈獨全憑長楚鉞。

行牌頭奴寨之間皆建炎未避賊所經也

今朝霜薄風氣和。霽色滿野行人多。沙平水淺木葉下。搖撼瘦口生微波。建炎避兵奔竄地。誰料白首重經過。四十餘年萬事改。惟有青嶂高嵯峨。安得西國葡萄酒。滿酌南海鸚鵡螺。侑以吳松長絲之玉脰。送以邯鄲騎齒之清歌。向來喪亂汝所記。大地凜凜憂干戈。偶然不死到老大。爲底苦惜朱顏酡。

早發奴寨

暖徹衣篝蠟炬明。鄰雞喔喔促殘更。丈夫雖有四方志。客子終悲千里行。月落龍蛇蟠木影。山空風雨起灘聲。上車莫恨晨霜冷。又得脩途一日晴。

題繡川驛

繡川池閣記曾遊。落日欄邊特地愁。白首卽今行萬里。淡煙依舊送孤舟。歸心久負鱸魚膾。春色初回杜若洲。會買一蓑來釣雨。憑誰先爲謝沙鷗。

夜行宿湖頭寺

臥載籃輿黃葉村。疎鐘杳杳隔谿聞。清霜十里伴微月。斷雁半行穿亂雲。去國不堪心破碎。平戎空有膽輪囷。烟蘊樂石應如舊。誰勒中原第一勳。

衢州道中作

耿耿孤忠不自勝。南來清夢遶觚稜。驛門上馬千峯雪。寺壁題詩一硯冰。疾病時時須藥物。衰遲處處少交朋。無

情最恨寒沙雁。不爲愁人說杜陵。

過靈石三峯

奇峯迎馬駭衰翁。獨嶺吳山一洗空。拔地青蒼五千仞。勞渠蟠屈小詩中。

又

曉日曛曛雪未殘。三峯傑立插雲間。老夫合是征西將。胸次先收一華山。

宿仙霞嶺下

吾生真是一枯蓬。行偏人間路未窮。暫聽朝雞雙闕下。又騎羸馬萬山中。重裘不敵晨霜力。老木爭號夜谷風。切勿重尋散關夢。朱顏改盡壯圖空。連日風霜可畏。自去梁州。未嘗有此寒也。

道中病瘍久不飲酒至魚梁小酌因賦長句

我行浦城道。小疾屏杯酌。癯疥何足言。亦復妨作樂。此身會當壞。百歲均電雹。胡爲過自惜。憊臥困鍼烙。未嘗膽險喁。況敢烹郭索。今朝寓空驛。窗戶寒寂寞。悠然忽自笑。頓解貪愛縛。紅燭映綠樽。奇哉萬金藥。

宿魚梁驛五鼓起行有感

憶從南鄭客成都。身健官閑一事無。分騎霜天伐狐兔。張燈雪夜擲臯盧。百憂忽隨新衰境。一笑難推舊酒徒。投宿魚梁溪邊屋。五更聽雨擁篝爐。

又

少時談舌坐生風。管葛奇才自許同。閉戶著書千古計。變名學劍十年功。酒醒頓覺狂堪笑。睡起方知夢本空。它日故人能憶我。葛仙磯畔覓漁翁。若耶溪有葛仙公釣磯。

夢藤驛

倦馬投孤驛。一峯青壓門。蕭條秋浦路。荒陋夜郎村。地瘴霜常薄。林深日易昏。百年常作客。排悶近清樽。

又

又入千山去。真成萬里行。今年自成都。八千餘里赴行在。又千餘里入閩。履霜常早駕。秉炬或皆征。古驛怪藤合。

荒陂羣雁鳴。客中常少睡。歸夢若爲成。

梅花絕句

空谷佳人洛浦仙。洗粧真態更嬋娟。廣平莫倚心如鐵。撩起清愁又破禪。

又

月中疎影雪中香。只爲無言更斷腸。曾與詩翁定花品。一丘一壑過姚黃。會文清公嘗問予。梅與牡丹孰勝。予以此答。

又

折得梅花愧滿頭。文書堆案正如山。輸君一覺脩然夢。長在清泉白石間。

又

濯錦江邊憶舊遊。纒頭百萬醉青樓。如今莫索梅花笑。古驛燈前各自愁。

又

蜀王小苑舊池臺。江北江南萬樹梅。只怪朝來歌吹鬧。園官已報五分開。成都合江園。蓋故蜀別苑。梅最盛。自初開。監官日報府。報至開五分。則府主來宴。遊人亦覲集。

又

湖上梅花手自移。予所居在山陰鏡湖。小橋風月最相宜。主人歲歲常爲客。莫怪幽香怨不知。

又

吾州古梅舊得名。雲蒸雨瀆綠苔生。一枝只好僧窗看。莫售千金入鳳城。古梅枝幹皆苔蘚。樹下甚貴重之。

又

探春歲歲在天涯。醉裏題詩字半斜。今日溪頭還小飲。冷官不禁看梅花。

又

地館登臨雪半消。梅花與我兩無聊。青羊宮裏應如舊。腸斷春風萬里橋。

又

今年真負此花時。醉帽何曾插一枝。漸老情懷多作惡。不堪還作送梅詩。去年在成都曾賦詩送梅。

卷十一

對酒

識字記姓名。擊劍一人敵。孫吳相斫書。了解亦何益。不如黃金鑿。激激春波碧。欣然對之笑。未飲愁已釋。白頭生黑絲。蒼頡桃李色。金丹空九轉。正恐無此力。朝飲續五斗。暮飲髡一石。寄謝采芝翁。無爲老青壁。

遣興

西州落魄九年餘。濯錦江頭已結廬。誰遣徑歸朝鳳闕。不令小住奉魚書。余將赴夔覺。被命東歸。塵埃眯目詩情盡。疾病侵人酒興疎。寄語鸞花休入夢。世間萬事有乘除。

建安雪

建谿官茶天下絕。香味欲全須小雪。雪飛一片茶不憂。何況蔽空如舞鷗。銀瓶銅碾春風裏。不枉年來行萬里。從渠荔子腴玉膚。自古難兼熊掌魚。

雪晴至後園

病扶藤杖覓殘梅。牢落情懷怕酒盃。約束園丁勤灑掃。新年作意待春來。

又

寶馬東風擁犢車。碧雞坊裏擅豪華。南來強作尋春夢。何處如今更有花。

開元暮歸

白髮書生不自珍。天涯又作宦遊身。谿橋煙淡偏宜晚。野寺花遲未覺春。日暖登山思謝屐。病餘漉酒負陶巾。茹芝卻粒平生事。回首巖扉一愴神。寺在紫芝山下。

嘗饌

耀錦江頭成昨夢。紫芝山下又新年。久因多病踈雲液。近爲長齋進玉筵。啼鳥傍籬春寂寂。飛花掠水晚翩翩。支離自笑生涯別。一炷爐香繡佛前。

遊鳳凰山

窮日文書有底忙。幅巾蕭散筆山堂。一樽病起初浮白。連焙春邊未過黃。坐上清風隨壺柄。歸途微雨發松香。臨溪更覓投竿地。我欲時來小作狂。

園中雜書

蕭蕭慈竹鳥呼風。宛似山光小閣東。剩欲杖藜尋昨夢。更添紅綻綠陰中。山光閣在禪寺關下。

又

北窗看鏡意凄然。夢斷梁州已七年。獵獵綵旗春日晚。不堪花外見鞦韆。山南歸隱長成。世間處處有之。

又

筍生密密復疎疎。來看偏宜曉雨餘。乞與人間作圖畫。幅巾短褐小籃輿。

又

殘花委地筍掀泥。香輓詩箋到處攜。幽夢欲成誰喚覺。半窗斜日鷓鴣啼。

烹茶

胸生可論交。正自畏中聖。年來衰可笑。茶亦能作病。噎嘔廢晨飧。支離失宵暝。是身如芭蕉。寧可與物競。兔甌試玉塵。香色兩超勝。把玩一欣然。爲汝烹茶竟。

病中久止酒有懷成都海棠之盛

碧雞坊裏海棠時。彌月兼旬醉不知。馬上難尋前夢境。樽前誰記舊歌辭。目窮落日橫千嶂。腸斷春風把一枝。說與故人應不信。茶煙禪榻鬢成絲。

北齋

新竹侵幽幔。疎蓮散遠汀。研朱朝點易。搗麝夜潢。一作橫。經。巖壑知心賞。琴樽樂性靈。會當煩太史。一奏少微星。



出塞曲

千騎爲一隊。萬騎爲一軍。朝踐狼山雪。暮宿榆關雲。將軍羽箭不虛發。直到祈連無雁羣。踐履春雷收陣鼓。蜿蜒驚蛇射生弩。落蕃還民立道邊。白髮如霜淚如雨。穉魄胡兒作窮鼠。競裹胡頭改胡語。陣前乞降馬前舞。檄書夜入黃龍府。

思故山

千金不須買畫圖。聽我長歌鏡湖湖。湖山奇麗說不盡。且復爲子陳吾廬。柳姑廟前魚作市。道士莊畔菱爲租。一彎畫橋出林薄。兩岸紅蓼連菰蒲。陂南陂北鴉陣黑。舍西舍東楓葉赤。正當九月十月時。放翁艇子無時出。船頭一束書。船後一壺酒。新釣紫鱖魚。旋洗白蓮藕。從渠貴人食萬錢。放翁癡腹常便便。暮歸稚子迎我笑。遙指一抹西村煙。

送錢仲耕修撰

姑熟溪邊識勝流。十年重見豈人謀。自應客路難爲別。不是陽關作許愁。傑直公看鼉禁月。倦遊我夢鏡湖秋。殷勤爲報中朝舊。睡足平生是建州。

建寧重五

罪微入戶黃梅雨。磊落堆盤碧筒黍。病來一滴不飲酒。但嗅菖蒲作端午。人生忽忽東逝波。白頭奈此節物何。去年已作歸州客。今年建州更愁絕。歸州猿吟鳥啼裏。屈沱醉歸詩滿紙。屈沱蓋屈原故居。楚人謂江之別流爲沱。卽今憶此那可得。西望歸州三歎息。

雨晴至園中

入夏經月雨。園路久已荒。今朝偶一到。蒿艾如人長。豈惟鼃黿豪。頗覺蜂蝶狂。悵然懷故山。舍東百本桑。迨此積雨餘。枝葉沃以光。父老適相遇。藉草揮一觴。一觴頽然醉。笑語相扶將。賦詩示兒子。此樂未易忘。

夏日

微風過中庭。庭樹颯有聲。穿簾徐入座。巾屨有餘清。

又  
展畫發古香。弄筆娛畫寂。是中亦何好。使我喜忘食。

又  
呼兒整吾駕。駕言返林廬。可使臨老眼。常親車文書。

發書畫還故山戲書

昨日遣畫筇。今日發書篋。空齋惟一牀。窗影亂風竹。平生鑽故紙。夙好老尤篤。奇哉掃除盡。蟬蛇三萬軸。豈惟息

白髮

白髮千莖綠鬢稀。臥看鸚鵡刺天飛。平生竊鄙貢公喜。故里但思陶令歸。清坐了無書可讀。近盡遺書筇。殘年

懷譚德稱

譚子文章舊有聲。幾年同客錦官城。江樓列炬千鍾飲。花市聯鞍一字行。人世絕知非昨夢。天真堪笑博浮名。空齋獨夜蕭蕭雨。枕上詩成夢不成。

客思

千里關山道路賒。可憐客子費年華。杯觴灑灑紅燒酒。風露盈盈紫笑花。孤月有情來海嶠。雙魚無信到天涯。此生那得常飄泊。歸臥東溪弄釣車。

又

兩鬢星星久倦遊。淒涼況復寓南州。未甘蟋蟀專清夜。已歎梧桐報素秋。綺語安能敵生死。熱官正欲快恩讎。空堂飽作東歸夢。夢泊嚴灘月滿舟。舟行還山陰。道出七里灘。

建安遣興

建安酒薄客愁濃。除卻哦詩事事慵。不許今年頭不白。城樓殘角寺樓鐘。

錦城重到歎無期。忽憶書臺步月時。白浪黏天鮫鱗橫。夢中識路亦何爲。

又

今歲清詩欠百篇。強尋筆硯意茫然。秋風有句君知否。合在嚴光釣瀨邊。

又

古今清絕沅湘路。臥想蒲帆十幅開。不是避人思遠適。肺肝塵土要詩才。

又

綠沈金鎖少時狂。幾過秋風古戰場。夢裏都忘閩嶠遠。萬人鼓吹入平涼。

又

刺虎騰身萬目前。白袍濺血尙依然。聖時未用征遼將。虛老龍門一少年。

病起偶到復菴

經旬羸臥法登臨。偶憶東菴試一尋。新竹初成迷棧路。菴後依古城有小徑百步。斷雲不散抱城陰。陂池綠靜聽

魚樂。亭館蒼涼草樹深。欲把一盃無奈嬾。病來觸目動歸心。

前有樽酒行

虛堂雨過生涼颼。勸君一醉君勿辭。去年不知今歲事。明年萬事今得知。舊時扶牀問歲兒。還鄉同訊令人悲。冢

又

丘累累在者誰。紙錢雨濕抱樹枝。君去六十有幾時。更望七十何其癡。求師學道亦已遲。謝客努力從鷗夷。綠酒盞盞盈芳樽。清歌嫋嫋留行雲。美人千金織寶帶。水沈龍腦作燎焚。問君胡爲慘不樂。四紀妖氛暗幽朔。諸人但欲口擊賊。茫茫九原誰可作。丈夫可爲酒色死。戰場橫屍勝牀第。華堂樂飲自有時。少待擒胡獻天子。

遊南塔院

小破文書夢。閑成杖履遊。澗幽泉激激。院靜竹修修。病骨涼如洗。歸心浩莫收。船輕不載石。一葉亂沙鷗。

感懷

半年建安城。士友闕還往。出門每太息。還舍猶愴怳。有酒誰與傾。得句空自賞。踈直觸人情。低回泚吾穎。豈無佳山水。正爾寄夢想。何當載親朋。煙浦搖兩槳。

兩夜

一兩遂通夕。安眠失百憂。窗扉淡欲曉。枕簟凜生秋。蠶燭爭碁道。金尊數酒籌。依然錦城夢。忘卻在南州。

夜坐偶書

衰髮蕭疎雪滿簪。暮年光景易駸駸。已甘身作溝中斷。不願人知髮下音。病鶴摧頽分薄俸。悲蛩斷續和微吟。向來誤有功名念。欲挽天河洗此心。

長歌行

人生宦遊亦不惡。無奈從來宦情薄。既不能短衣射虎在南山。又不能鬪鷄走馬宴平樂。惟有釣船差易具。問君胡爲不歸去。片雲雨暗玉筍峯。斜日人爭石旗渡。渡頭酒壚堪醉眠。白酒醇醲鱸魚鮮。菰米如珠炊正熟。尊羹似酪不論錢。翁唱菱歌兒舞榭。醉耳那知朝市鬧。城門幾度送迎官。睡擁亂蓑呼未覺。

兩夜不寐觀壁間所張魏鄭公砥柱銘

疾風三日橫吹雨。竹倒荷傾可憐汝。空堂無人夜向中。臥看牀前燭花吐。壯懷耿耿誰與論。檣床老龜不能語。世間豈無一好漢。叱咤暗鳴氣吞虜。壁間三丈砥柱銘。貞觀太平如更覩。何當鼓吹渡河津。下馬觀碑馳馬去。

客談荆渚武昌慨然有作

去歲出蜀初東遊。蛾舸大牖下荊州。便風轉頭五百里。吟嘯已在黃鶴樓。戲拈鐵笛吹出塞。水涵月落魚龍愁。明朝喧傳古仙過。碧玉帶束黃絕裘。豈知一官自桎梏。簿書期會無時休。豐城寶劍已化久。我自吐氣冲斗牛。洞庭四萬八千頃。蟹舍正對蘆花洲。速脫衣冠挂神武。散髮爛醉垂虹秋。

書懷

青城結雲巢。擬住三千年。御風偶南遊。萬里棲素煙。翠裘綠玉杖。白日凌青天。招呼方瞳翁。邂逅烏爪仙。朝誅陰

陽歌。暮誦道德篇。玉童持碧簡。笙鶴來翩翩。海邊武夷山。小留賞宿緣。火食非所樂。巾褐常翛然。清時未免出。頗  
息世俗傳。行矣秋風高。去采玉井蓮。

平生

平生涉世似虛舟。不著胸中一點愁。已用浮雲看富貴。肯緣華屋歎山丘。戴溪寒釀千峯雪。屢瀨聲酣七里秋。好  
景人間隨處有。未埋白骨且閑遊。

自詠

遊戲人間歲月多。癡頑將奈此翁何。放開繩箠牛初熟。照破乾坤鏡未磨。日落苔磯閑把釣。雨餘蓬舵亂堆蓑。明  
朝不見知何處。又向江湖醉踏歌。

池亭夜賦

池上小亭幽。清宵秉燭遊。荷盤時瀉露。螢火早知秋。有感歲時速。無聲河漢流。殊方不堪住。歸夢繞滄洲。

兩夜偶書

高臥空堂風雨來。更闌頻看燭花摧。新涼蕭爽秋期近。多病侵尋老境催。萬事極知終變滅。一官那得久低回。床  
頭幸有楞伽在。更炷爐香手自開。

思歸

平生無宦情。方外久浪迹。往來梁益間。一笑頗自得。花穠錦城酒。月白瞿唐笛。咿啞下江艣。跌宕登山屐。巴東煙  
雨秋。渭上風雪夕。至今客枕夢。萬里不能尺。誰知建安城。觸目非夙昔。冥冥瘴霧細。澌澌蠻江碧。出門無交朋。嗚  
呼吾何適。歸哉故山路。詎必須暖席。

客懷

客懷耿耿向誰語。世事茫茫空自知。堅坐癩窮牛渚怪。倦遊何恨雁門蹄。眼前客共一盃酒。身後人傳千首詩。報  
與故交當賀我。計歸猶及菊花時。

伏中官舍極涼戲作

盡障東西日。洞開南北堂。漏從閑處永。風自遠來涼。客愛炊菰美。僧誇瀹茗香。曉來秋色起。蕭蕭滿筠牀。

夢與劉韶美夜飲樂甚

死生契闊十年餘。欲語交情涕已濡。夢裏偶同清夜宴。醉中猶攬故人鬚。岸巾談笑今誰記。滿腹詩書只自愚。我亦與公同此病。早收身世老江湖。

暑夜

毒暑彌三伏。微涼起二更。月窗風竹亂。煙渚露荷傾。寂寞借書讀。清羸扶杖行。無功耗官廩。太息負平生。

客意

山行曳杖水擎舟。走過茫茫禹畫州。蝴蝶夢魂常是客。芭蕉身世不禁秋。早因食少妨高臥。晚憶茶甘作遠遊。龍焙一嘗端可去。無心更爲荔枝留。

夜香

杖老誤乘傳。竊食慙無功。清夜一炷香。實與天心通。忤物雖至愆。許國猶孤忠。一念倘自欺。百年寧有終。上帝職造化。生殺操至公。稽首矢此心。其敢累兒童。

柴懷叔殿院世綵堂

卷服貂冠世間有。榮悴紛紛翻覆手。不如御史老萊衣。世綵堂中奉春酒。北斗爲觴山作豆。鳳竹鸞絲太中壽。今年宗祀降恩綸。太中拜前公拜後。嗚呼人誰無父母。盛事有及公家否。萬鍾苦晚三釜薄。人生此恨十八九。我欲殺青書孝友。愧非太史馬牛走。聖朝若遣采詩官。尙可爲公圖不朽。

月夜

小醉初醒月滿牀。玉壺銀闕不勝涼。天風忽送荷香過。一葉飄然憶故鄉。

雙清堂夜賦

陸子病少間。獨臥谿上堂。人靜魚自躍。風定荷更香。素月行中天。流螢失孤光。歸鳥飛有聲。度此十里塘。嗟我獨何事。遲暮客異鄉。太息搔短髮。起視夜未央。

采蓮

蘸水朱扉不上關。采蓮小舫夜深還。一樽何處無風月。自是人生苦欠閑。

又

雲散青天挂玉鉤。石城艇子近新秋。風鬟霧鬢歸來晚。忘卻荷花記得愁。

又

帝青天映麴塵波。時有遊魚動綠荷。回首家山又千里。不堪醉裏聽吳歌。

橋南納涼

曳杖來追柳外涼。畫橋南畔倚胡牀。月明船笛參差起。風定池蓮自在香。半落星河知夜久。無窮草樹覺城荒。碧筒莫惜頽然醉。人事還隨日出忙。

芒屨

芒屨一雙青。筇枝九節輕。登山猶健在。投檄太遲生。滿意竹風冷。入懷溪月明。清秋故不遠。回首憶尋盟。

荔子絕句

驛騎星馳亦快哉。筠籠露濕手親開。不應相與無平素。曾忝戎州刺史來。

又

放翁遊蜀十年回。病眼茫茫每嬾開。怪底酒邊光景別。方紅江綠一時來。

官舍風興

朝陽淡淡挂窗櫺。桐葉無風忽自零。不復扶頭傾白墮。但知臨目養黃寧。新蔬帶露來幽圃。脩綆飛泉瀆廣庭。一出文書又圍繞。正應高臥盡頽齡。

書懷

功名富貴兩茫茫。惟有躬耕策最長。吏牘沈迷妨養疾。囊衣結束待還鄉。洲中未種千頭橘。宅畔先栽百本桑。書寄子公吾自嬾。故人不是總相忘。

風月

老來苦無伴。風月獨見知。未嘗費招呼。到處相娛嬉。披襟萬里快。弄影三更奇。淋漓蜀苑酒。散落江樓詩。狂歌撼山川。醉墨飛蛟螭。聊將調俗子。更遣半生疑。

大將出師歌

將軍北伐辭前殿。恩詔催排苑中宴。紫陌驚塵中使來。青門立馬羣公餞。繡旗雜沓三十里。畫鼓敲鐃五千面。行營暮宿咸陽原。滿朝太息傾都競。天聲一震胡已亡。捷書奕奕如飛電。高秋不閉玉關城。中夜罷傳青海箭。可汗垂泣小王號。不敢跳奔那敢戰。山川圖籍上有司。張掖酒泉開郡縣。還朝策勛兼將相。詔假黃鉞調金鉉。丈夫未遇誰得知。昔日新豐笑貧賤。

婕妤怨

妾昔初去家。鄰里持草箱。共祝善事主。門戶望寵光。一入未央宮。顧盼偶非常。稗齒不慮患。傾身保專房。燕婉承恩澤。但言日月長。豈知辭玉陛。翩若葉隕霜。永巷雖放棄。猶慮重謗傷。悔不侍宴時。一夕稱千觴。妾心剖如丹。妾骨朽亦香。後身作羽林。爲國死封疆。

移疾

朝來移疾臥虛堂。暫屏文書日更長。鷗鷺近人情漸熟。簾櫳欲雨意先涼。紗巾自照清池影。蕊笈閑銷古篆香。莫恨微霜侵綠鬢。爲渠歎盡少年狂。

病中懷故廬

我家山陰道。湖山淡空濛。小屋如舴舺。出沒煙波中。天寒橘柚黃。霜落襪履紅。祈蠶簫鼓鬧。賽雨雞豚空。又魚有竭作。刈麥無遺功。去年一月留。行役嗟匆匆。今年歸興動。艤舟待秋風。社飲可欠我。寄書約鄰翁。

夏夜不寐有賦

急雨初過天宇濕。大星磊落纔數十。飢鶻掠簷飛磔磔。冷螢墮水光熠熠。丈夫無成忽老大。箭羽凋零劍鋒泯。徘徊欲睡復起行。三更猶凭闌干立。



綠淨亭晚興

綠淨亭邊物色奇。放翁睡起曳筇枝。新涼已似雁來後。微雨卻如梅熟時。綠竹成陰藏細棧。朱闌倒影入清池。登臨獨恨非吾土。不爲城頭畫角悲。

憶山南

紹裘寶馬梁州日。盤槩橫戈一世雄。怒虎吼山爭雪刃。驚鴻出塞避鷗弓。朝沿箬笠畫清油裏。暮醉笙歌錦幄中。老去據鞍猶矍鑠。君王何日伐遼東。

又

醉墨淋漓酒百盃。轅門山色碧崔嵬。打毬駿馬千金買。切玉名刀萬里來。結客漁陽時遣簡。踏營渭北夜銜枚。十年一夢今誰記。閉置車中只自哀。

夕雨

屣屣行莎徑。移牀臥草亭。風聲雜溪瀨。雨氣挾龍腥。奕奕空中電。昏昏雲罅星。徂年又如許。吾鬢得長青。

又

獨夜初傳漏。空齋半掩扉。候蟲燈下語。水鳥雨中歸。客舍愁彈劍。京塵怯化衣。故人招隱意。字字莫相違。

試茶

北窗高臥鼾如雷。誰遣香茶挽夢回。綠地毫甌雪花乳。不妨也道入闈來。

蒲陽餉荔子

江驛山程日夜馳。筠籠初拆露猶滋。星毬鏤玉雖奇品。終憶戎州綠荔枝。

初秋書懷

二十年前已二毛。即今何恨鬢蕭騷。孤燈自伴詩情苦。俗子從嫌醉眼高。煙外暮鐘來遠寺。雨餘秋漲集空壕。思歸更向文書嬾。此手惟堪把蟹螯。

建州絕無艾意頗思之戲作

鄉國雞頭賣早秋。綠荷紅纈最風流。建安城裏西風冷。白棗堆盤看卻愁。

憶昔

憶昔西遊變姓名。微園屠肆押豪英。淋漓縱酒滄溟窄。慷慨狂歌華岳傾。壯士有心悲老大。窮人無路共功名。生涯自笑惟詩在。旋種芭蕉聽雨聲。

客思

裘馬平生喜遠遊。暮年顛顛向南州。文書與睡中分日。衰病和愁總怕秋。無復雪郊看射虎。但思煙浦聽呼牛。還家誰道無餘俸。倒囊猶堪買釣舟。

初秋夢故山覺而有作

破水白茫茫。草煙濕霏霏。牧童一聲笛。落日無餘暉。遙山已漸隱。村巷亞竹扉。老翁延我入。苦謝柿栗微。幸逢歲有秋。一醉君勿違。念此動中懷。命駕吾將歸。

又

犬吠舍前後。月明村東西。岸草蛩亂號。庭樹鳥已栖。我僕城中還。擔頭有懸雞。小兒勸我飲。村酒拆赤泥。我醉不自覺。頽然葛巾低。著書笑蒙莊。蒼芋物自齊。

又

昔我東歸時。父老迎船頭。開篷相勞苦。怪我領雪稠。故山何負君。且作數月留。豈知席未煖。疋馬來南州。蠻花四時紅。瘴霧日夜浮。歸哉不可遲。勿與婦子謀。

又

杜宇真吾交。勸去恨不速。忠告輸肝肺。厚意均骨肉。陋哉鷓鴣語。揣我貧念祿。竹雞更鄙淺。泥淖憂車軸。秋風嚴瀨清。春雨戴溪綠。行矣勿復疑。照影巾一幅。

寓歎

千載前人每暗同。眼邊俗客馬牛風。作文要可張子布。飲酒思從陳孟公。半世氛埃成潦倒。幾時蓑釣入空濛。一

菴處處皆堪老。莫怕無山著此翁。

雙清堂醉臥

客裏逢秋醉似泥。空堂獨臥意淒迷。亂號庭樹西風急。斜掛城樓北斗低。末路敢貪請纈料。微官久厭駕雞棲。平生玉局經行地。擬乞冰銜隨剡溪。

醉書

半年愁病劇。一雨喜涼新。稍與藥囊遠。初容酒醖親。浩歌驚世俗。狂語任天真。我亦輕餘子。君當恕醉人。

憶唐安

南鄭戍還初過蜀。朝衫與鬢猶爭綠。逢春飲酒似長鯨。醉裏千篇風雨速。唐安池館夜宴頻。激激玉船搖畫燭。紅索琵琶金縷花。百六十絃彈法曲。曲終卻看舞霓裳。娟娟官腰細如束。明朝解醒不用酒。起尋百畝東湖竹。歸吳寂莫時自笑。縱有詩情誰省錄。今年二頃似可謀。去斲雲根結茅屋。

秋懷

暮年身世轉悠悠。又向天涯見早秋。昨夜月明今夜雨。關人何事總成愁。

又

星斗闌干河漢流。建州風物更禁秋。年來多病題詩懶。付與鳴蛩替說愁。

晝臥聞碾茶

小醉初消日未晡。幽窗催破紫雲腴。玉川七釜何須爾。銅碾聲中睡已無。

月下獨行橋上

新秋未再旬。月露已浩然。放翁一幅巾。與影俱翩僂。飛橋挂澄谿。幽竇鳴細泉。開歲纔俛仰。已近搖落天。殊古久滯留。感此歲月遷。歸來看青燈。悄愴不得眠。

夜意

火雲夕方收。草露秋已白。堂空燈欲翳。壁壞蟲自噴。四顧寂無人。獨立岸吾憤。窮通何足論。等是百年客。何能爲

一飽半世出下策。布帆幸無恙。誰謂江海迄。

秋夜書懷

斷香漠漠繞藤牀。新月娟娟轉畫廊。鄉遠每勞千里夢。兩慳未放九秋涼。衰遲分作驥伏櫪。斂退敢求錐出囊。剩喜今年有奇事。嚴邊灘下繫歸航。

思故廬

平生一束書。不爲屋廬計。微官寄郵傳。俯仰閱半世。草堂白雲邊。日夜長松桂。柴門入幽夢。落日亂蟬噓。宦遊有句好。海角愁瘴癘。拂衣便可耳。勿使老春聲。

兩夜

小雨初涼夜。殘燈欲暗時。病多愁近酒。心弱怯題詩。舊友殊方少。歸耕晚歲宜。回頭語孤影。此意有君知。

北窗哦詩因賦

二十年來賦遠遊。一窗又復寄南州。雙鷗戲兩陂塘曉。亂葉飄風院落秋。顏鬢蹉跎愁覽鏡。江山重復怯登樓。平生事業詩千首。殘稿從教處處留。

又

露下螢飛仲秋月。山圍水繞建安城。病多不辨酒中聖。身遠且令心太平。數卷蠹書行老矣。一盂蔬飯太憎生。白雲只在簷間宿。聽我清宵詠句聲。

假裝

絕物離人恨未能。聊爲旦過打包僧。蹇驢渺渺秋山雨。孤榻昏昏夜店燈。酒量已隨詩共退。客愁仍與病相乘。頽然衰颯嗟誰識。俠氣當年蓋五陵。

追感梁益舊遊有作

西遊萬里倚朱顏。肯放尊前一笑慳。蜀苑妓圍欺夜雪。梁州獵火滿秋山。晚途忽墮塵埃裏。樂事渾疑夢寐間。呼世變遷君勿歎。劇談猶是詫鄉關。

莆陽昭武延平送兵漸集戲書

鼓聲晨統角。聲暮鳴。鳴。作官了何事。空歎歲月徂。送兵稍稍集。秣馬脂吾車。風霜迫搖落。殘暑亦已無。野渡明丹楓。破驛吹黃榆。聊收作詩料。未用厭征途。

別建安絕句

三十年來雲水僧。常挑鉢袋繫行縵。信緣不作礙窠窟。即是吾家無盡燈。

又

楚澤吳山已慣行。武夷從昔但聞名。北巖小寺長汀驛。且喜遊山第一程。

又

欵帽揚鞭晚出城。驛亭燈火向人明。多情葉上蕭蕭雨。更把新涼送客行。

初發建安

小雨初收雲未歸。吾行迨及晚秋時。寒沙新雁無人問。露井殘桐有客悲。征袂拂霜晨喚馬。驛窗剪燭夜題詩。悠然且作尋山想。夢裏功名莫自期。

宿北巖院

車馬紛紛送入朝。北巖燈火夜無聊。中年到處難爲別。也似初程宿灞橋。岑參詩云。初程莫早發。且宿灞橋頭。語意至工。

書感

溪路人家尙闔扉。彊扶衰僊著征衣。百年朝露古所歎。一櫂秋風吾欲歸。楚客長號沽白璧。漢宮太息遺明妃。鑠金消骨從來事。老矣何心踐駭機。

長汀道中

晚過長汀驛。溪山乃爾奇。老夫惟坐歎。造物爲陳詩。鳥送穿林語。松垂拂澗枝。憑鞍久忘發。不是馬行遲。

黃亭夜雨去武夷四十里

未到名山夢已新。千峯拔地玉嶙峋。黃亭一夜風吹雨。似爲遊人洗俗塵。

### 遊武夷山

少讀封禪書。始知武夷君。晚乃遊斯山。秀傑非昔聞。三十六奇峯。秋晴無纖雲。空巖雞晨號。峭壁丹夜曦。巢居寄千仞。鴻荒想羲軒。風雨蛻玉骨。難以俗意論。丹梯不容躋。修夏亦畏捫。沂灘進小艇。愧驚白鷺羣。學道雖恨晚。養氣敢不勤。宦遊非本志。寄謝鶴與猿。

### 泛舟武夷九曲溪至六曲或云灘急難上遂回

暮年脚力倦躋攀。借得扁舟臥看山。怪怪奇奇何所似。綠蘿溪入下牢關。

又

一葉凌風入峽來。山童指點幾崔嵬。急流勇退平生意。正要沿從半道回。

### 崇安縣驛

驛外清江十里秋。雁聲初到荻花洲。征車已駕晨窗白。殘燭依然伴客愁。

過建陽縣以雙鶩贈東觀道士爲長生鶩觀俯大溪鶩得其所矣武夷險絕處有仙船架崖壁間數日前

大風吹墮船木數寸堅硬如石予偶得之皆此行奇事也各賦一詩

閑泛晴波唼綠萍。卻衝微雨傍煙汀。會稽內史如相遇。換取黃庭一卷經。

### 右雙鶩

斷崖幽洞白雲深。縹緲仙槎無古今。飛下一峯相勞苦。卻疑天外有知音。

### 右墮木

### 紫谿驛信州鉛山縣

他鄉異縣老何堪。短髮蕭蕭不滿簷。旋買一尊持自賀。病身安穩到江南。

又

雲外丹青萬仞梯。木陰合處子規啼。嘉陵棧道吾能說。略似黃亭到紫谿。

鵝湖夜坐書懷

士生始墮地。孤矢志四方。豈若彼婦女。齷齪藏閨房。我行環萬里。險阻真備嘗。昔者戍南鄭。秦山鬱蒼蒼。鐵衣臥枕戈。睡覺身滿霜。官雖備幕府。氣實先顏行。擁馬涉沮水。飛鷹上中梁。勁酒舉數斗。壯士不能當。馬鞍挂狐兔。燔炙百步香。拔劍切大肉。峻然如餓狼。時時登高望。指顧無咸陽。一朝去軍中。十載客道傍。看花身落魄。對酒色淒涼。去年忝號召。五月觸瞿唐。青衫暗欲盡。入對衰涕滂。今年復詔下。鴻雁初南翔。俯仰未闕歲。上恩實非常。夜宿鵝湖寺。槁葉投客牀。寒燈照不寐。撫枕慨以慷。李靖聞征遼。病僊更激昂。裴度請討蔡。奏事猶衷創。我亦思報國。夢繞古戰場。

信州東驛晨起

衣上征塵鬢畔霜。信州古驛憩歸裝。悲歌未肯彈長劍。豪氣猶能臥大牀。半暗殘燈搖北壁。常飢老馬臥東廂。鄰雞唱罷衣篝暖。自笑行人日日忙。

玉山縣南樓晚望

小樓在何許。正在南溪上。空濛過釣船。斷續聞漁唱。征途苦偏仄。舒嘯喜清曠。安得此溪水。爲我變春醞。

玉壺亭

玉壺亭上小徘徊。閑對殘荷把一盃。冠蓋交馳期會急。長官未必辦頻來。

步過縣南長橋游南山普寧院山高處有塔院及小亭縹緲可愛恨不能到

偶扶藜杖過南津。野寺長橋發興新。暫就清溪照鬢鬢。不妨翠霧濕衣巾。山縈細棧疑無路。樹落崩崖欲壓人。朝暮有程常猝猝。何因攜酒上嶙峋。

枕上感懷

五更攪轡山路長。老夫誦書聲琅琅。古人已死心則在。度越秦漢窺虞唐。三更投枕窗月白。老夫哦詩聲嘖嘖。淵源雅頌吾豈敢。屈宋藩籬或能測。一代文章誰汝數。老不能閑真自苦。君王雖賞于薦于。無奈宮中須羯鼓。

曉過招賢渡

老馬骨嶮然。虺虺不受鞭。行人爭晚渡。歸鳥破秋煙。湖海淒涼地。風霜搖落天。吾生半行路。搔首送流年。

臥興

白首躬耕已有期。鳳城歸路卻遲遲。臥裏擁被聽秋雨。占盡人間好睡時。

奉乞奉祠留衢州皇華館待命

世念蕭然冷欲冰。更堪衰與病相乘。從來幸有不材木。此去真爲無事僧。見見霞。耐辱豈惟容唾面。寡言端擬學銘膺。尙餘一事猶豪舉。醉後龍蛇滿劍鏃。

寓舍偶題

轉徙身飄梗。淹留等繫匏。雁孤依遠塔。鳩拙寄空巢。寒日頽梨頰。清霜長橘包。平生黜道士。歲晚欲深交。

風興

客中睡眠少。常以雞鳴興。新炭熾宿火。膏油續殘燈。焚香倚蒲團。外靜中已凝。榮辱兩不到。淡如秋水澄。出定窗已白。炯炯寒日昇。厨人作芋糝。供此在家僧。

夜坐

老知世事謾紛紛。紙帳蒲團自策勳。一夜北風吹裂屋。石樓無耳不曾聞。

偶得石室酒獨飲醉臥覺而有作

初寒思小飲。名酒忽墮前。素甕手自傾。色苦秋澗泉。浩歌復起舞。與影俱翩僊。一笑遺宇宙。未覺異少年。詩人不聞道。苦歎歲月遷。豈知汝南市。自有壺中天。河洛久未復。銅鞮棘森然。秋風歸去來。虛老玉井蓮。

午睡

風霜踐殘歲。我乃羈旅人。如何得一室。牀敷暖如春。午枕挾小醉。鼻息撼四鄰。心安了無夢。一掃想與因。逡巡起頰面。覽鏡正幅巾。聊呼蟹眼湯。滄我玉色塵。

贈柯山老人

柯山老人九十餘。亂髮不櫛瘦如枯。百穿千結一布袴。得酒一吸輒倒壺。自言少年不蓄學。有錢徑付酒家壚。人



生辦此真良圖。棄官從翁許我無。

寓館晚興

隨牒人間不自憐。衢州孤驛更蕭然。百年細數半行路。萬事不如長醉眠。髮短經秋真種種。腹寬耐事只便便。晚窗商略惟當飲。安得黃花到眼邊。今年九月將盡。竟未見菊。

葉相最高亭

高亭新築冠龜峯。眼力超然信不同。膚寸法雲澤天下。大千沙一作法。界納胸中。春遊到處羣花擁。夜宴歡時百榼空。劉白老來忘世味。只思詩酒伴裴公。裴晉公留守東都。白樂天。劉夢得以分務與晉公倡酬。

婺州州宅極目亭

尙書曳履上星辰。小爲東陽作主人。朱閣凌空雲縹緲。青山繞郭玉嶙峋。似聞旋教新歌舞。且慰重臨舊吏民。莫倚闌干西北角。即今河洛尙胡塵。

謝演師送梅

早梅時節到江南。已判樽前酒滿衫。輸與西鄰明上座。解從大庾嶺頭參。

又

折送江梅意不疎。要教相對鬪清臙。爲君著向明窗下。試問山翁具眼無。

訪毛平仲問疾與其子适同遊柯山觀王質爛柯遺跡

籃輿訪客過仙村。千載空餘一局存。曳杖不妨呼小友。還家便恐見來孫。林巒巖絕秋風瘦。樓堞參差暮氣昏。酒笑魚肥吾事畢。一菴那得住雲根。

月巖

幾年不作月巖遊。萬里重來已白頭。雲外連娟何所似。平羌江上半輪秋。

弋陽縣驛

大兩山中采藥回。子頭巖畔覓詩來。喚船野渡逢迎雪。攜酒溪頭領略梅。久客愁心端欲拆。何時笑口得頻開。慙

勲記著今朝事。破驛空廊葉作堆。

弋陽道中遇大雪

我行江郊暮猶進。大雪塞空迷遠近。壯哉組練從天來。人間有此堂堂陣。少年頗愛軍中樂。跌宕不耐微官縛。憑鞍寓目一悵然。思爲君王掃河洛。夜聽軟簾窗紙鳴。恰似鐵馬相磨聲。起傾斗酒歌出塞。彈壓胸中十萬兵。

雪中感成都

憶在西州遇雪時。繡筵處處百花圍。烏絲闌展新詩就。油壁車迎小獵歸。感事鏡鸞悲獨舞。寄書箏雁恨慵飛。愁多自是難成醉。不爲天寒酒力微。

雪後苦寒行饒撫道中有感

殘雪暮還結。朔風晴更寒。重裘猶粟膚。連酌無辭顏。指直不可握。終日縮袖間。十年走萬里。何適不艱難。附火財須臾。攬轡復慨歎。恨不以此勞。爲國戍玉關。

對酒

温如春色爽如秋。一棹燈前自默酬。百萬愁魔降未得。故應用爾作戈矛。

又

歎息人真未易知。暮年始覺麴生奇。個中妙趣誰堪語。最是初醺未醉時。

梅花臨州道中見梅數樹憔悴特甚

我與梅花有舊盟。即今白髮未忘情。不愁索笑無多子。惟恨相思太瘦生。身世何曾怨空谷。風流正自合傾城。增冰積雪行人少。試倩羈鴻爲寄聲。

雪中尋梅

莫遣扁舟興盡回。正須衝雪看江梅。楚人原未知真色。施粉何曾太白來。

又

幽香淡淡影疎疎。雪虐風饑亦自如。正是花中巢許輩。人間富貴不關渠。

江上梅花

老來樂事少關身。猶喜尊前見玉人。豈是淒涼偏薄命。自緣纖瘦不禁春。娟娟月上明江練。黯黯天低糝玉塵。絕  
澗斷橋幽獨處。護持應有主林神。

卷十一

擬峴臺觀雪

垂虹亭上三更月。擬峴臺前清曉雪。我行萬里跨秦吳。此地固應名二絕。山川滅沒雪作海。亂墜天花自成態。狂  
歌痛飲豪不除。更憶銜枚馳出塞。蘆摧葦折號飢鴻。欲傅粉墨無良工。摩挲東絹三歎息。收入放翁詩卷中。明朝  
青天行日轂。萬瓦生煙失瓊玉。世間成壞本相尋。卻看晴山暈眉綠。

舊在成都初春無事日。訪昭覺保福正法諸刹甚可樂也。追懷慨然。因賦長句。

憶在西川集寶坊。幅巾蕭散日初長。伊蒲塞饌分香積。優鉢羅花散道場。客路逢春增感慨。舊遊回首已微涼。新  
晴強作尋幽計。有底文書作許忙。

園中賞梅

開盡千葩百卉春。此花風味獨清真。江邊曉雪愁欲語。馬上夕陽香趁人。慰眼紅苞初報信。回頭青子又生仁。羈  
遊偏覺年華速。徙倚闌干一愴神。

又

行遍茫茫禹畫州。尋梅到處得閑遊。春前春後百回醉。江北江南千里愁。未愛繁枝壓紗帽。最憐亂點糝貂裘。一  
寒可賀君知否。又得幽香數日留。

正月十五日出郊至金石臺

漸老惜時節。思遊那可忘。雪晴天淺碧。春動柳輕黃。笑語寬衰疾。登臨到夕陽。未須催野渡。聊欲據胡牀。

又

開歲多休暇，官身亦暫閑。樓臺先晝永，花柳向春慳。啼鳥隨遊轡，和風慳醉顏。更憐歸路好，破墨數峯山。曉符見西南，巖山如畫。

六日小飲園中，光景鮮妍，紅梅已坼，恍記在梁州，偶得絕句。

輕裘駿馬金泉路，金泉羞謝自然輕舉之地。默數新春又九年，風景不殊人自老。忽驚作夢到臨川。

聞雁

過盡梅花把酒稀，熏籠香冷換春衣。秦關漢苑無消息，又在江南送雁歸。

撫州上元

江月微雲外，街泥小雨餘。人如虛市散，燈似曉星疎。羈雁同身世，新霜上鬢鬚。明年更清絕，魚火對茅廬。

登擬峴臺

層臺縹緲壓城闌，倚杖來觀浩蕩春。放盞樽前千里目，洗空衣上十年塵。縈迴水抱中和氣，平遠山如繡藉人。更喜機心無復在，沙邊鷗鷺亦相親。

燈夕有感

芙蓉紅綠亦參差，睡起燒香強賦詩。萬里錦城無夢到，豈惟虛負放燈時。

庚子正月十八日送梅

滿城桃李爭春色，不許梅花不成雪。世間尤物無盛衰，萬點縈風愈奇絕。我行柯山眠酒家，初見窓前三四花。恨無壯士挽斗柄，坐令東指催年華。今朝零落已可惜，明日重尋更無迹。情之所鍾在我曹，莫倚心腸如鐵石。

初春懷成都

我昔薄遊西適秦，歸到錦城逢早春。五門收燈藥市近，小桃妖妍狂殺人。蜀中入春惟小桃先開，似垂絲海棠。賞  
裳法曲華清譜，燕妬身輕鶯學語。歌舞更休轉盼間，但見宮衣換金縷。世上悲歡豈易知，不堪風景似當時。病來  
幾與麴生絕，禪榻茶煙雙鬢絲。

春雨

冬旱土不膏。愛此春夜雨。四郊農事興。老穉迭歌舞。相呼長沮耕。分喜樊遲圃。豐年已在目。亭墮靜桴鼓。我歸未有期。一官寄倉庾。幸復寬簡書。不敢恨羈旅。

雨中遣懷

病中草草度年華。睡起匆匆日易斜。抵死愁禁千斛酒。薄情雨送一城花。鏡湖煙水搖朱舫。錦里香塵走鈿車。此夢即今都打破。不妨寂寞往天涯。

又

霏霏春雨細如絲。正是春寒欺客時。心向宦途元淡薄。夢尋鄉國苦參差。樓前新漲綠三尺。牆外尙餘紅幾枝。擺撥簿書呼酒榼。南湖西塔有幽期。

晚晴

水聲瀾灑赴回塘。簾影疎疎遶四廊。靜院數盃傾白墮。幽窗一枕夢清湘。潤侵書笥深防蠹。暖徹衣篝剩得香。解組徑歸應更樂。偷閑猶足傲羲皇。

春晚

五十六翁身百憂。年來轉覺此生浮。山川信美故鄉遠。天地無情雙鬢秋。社後燕如歸客至。春殘花不爲人留。一觴一詠從來事。莫笑扶衰又上樓。

春晚坐講忽夢泛舟飲酒樂甚既覺悵然有賦

夢泛扁舟逸興多。畫檣搖蕩麴生波。微風簸簸生蒲葦。小雨霏霏濕芰荷。舞落烏紗從歲去。歌酣白紵奈情何。年來惟覺華胥樂。莫遣茶甌戰睡魔。

遣興

老子癡頑慣轉蓬。殘年嬾復問窮通。敕書雖未除詩債。盟府猶當策酒功。桐嶺市回人踏月。柘岡月落鳥呼風。摩生觸處無真實。豈獨南柯是夢中。

老去

老去時時病。春來日日陰。文書有期會。山水負登臨。倦客風埃眼。孤臣狗馬心。餘寒欺短褐。莫惜酒盃深。

雨夜

百紫千紅占歲華。又隨風雨捲泥沙。卽今空有夢爲蝶。當日曾將命乞花。倦枕殘燈人寂寞。幽窗小草字欹斜。悲歡變滅何窮已。學得山僧自一家。

簡黎道士

滿箔吳蠶繭漸稀。四郊膏雨麥方秋。道人昔是茶山客。病叟新爲藥市遊。蒼蒼凋零誰晤語。篇章璀璨尙風流。蘭亭剡曲春光好。倘肯相從弄釣舟。

臨川絕無佳酒時得一醉戲書

有酒時劇飲。無酒徒浩歎。庭花五六株。老子獨婆娑。誰云苦寂寞。在我亦已多。管絃萬二千。一笑謝天魔。夢作青城去。翠磴捫松蘿。又爲平荒遊。素月沉煙波。覺來撫几歎。奈此桎梏何。流年不貸人。去去如飛梭。

醉中懷江湖舊遊偶作短歌

無渡河。浪花無蒂高崢嶸。莫登樓。茫茫芳草難爲情。華軒寶馬只好路旁看。冷金伐石空留後世名。古來惟有竹林諸人稱達生。一醉之外萬事鴻毛輕。可憐癡人競聲利。坐使方寸森五兵。散花洲上青山橫。野魚可膾菰可烹。脫冠散髮風露冷。臥看江月金盃傾。

三月二十一日作

蹴踘牆東一市譁。鞦韆樓外兩旗斜。及時小雨放桐葉。無賴餘寒開椽花。明月吹笙思蜀苑。軟塵騎馬夢京華。懽情滅盡朱顏改。節物催人只自嗟。

天祺節日飯罷小憩

臥聽午漏隔花傳。簾裏花殘有斷煙。莫放轆轤鳴玉井。偷閑要補五更眠。

思歸

白髮滿青鏡。悵然山水身。那因五斗米。常作半途人。涉世風波惡。思歸懷抱真。會當求鉞斧。送老鏡湖濱。

齒痛有感

眼暗頭童負聖時。齒牙欲脫更堪悲。暮年漸解人間事。蒸食哀梨亦自奇。

南窗睡起

夢中忘卻在天涯。一似當年錦里時。狂倚寶箏歌白紵。醉移銀燭寫烏絲。酒來郫縣香初壓。花送彭州露尙滋。起坐南窗成絕歎。玉樓乾鵲誤歸期。

又

晝漏迢迢暑氣清。不妨小倦帶餘醒。夢從隨客聲中斷。愁向湘屏曲處生。風度簾旌紅浪颭。窗明香岫碧雲橫。閑情賦罷憑誰寄。悵望壺天白玉京。

初夏

百葉盈榴照眼明。桐陰初密暑猶清。深深簾幕度香縷。寂寂房櫳聞燕聲。細煨詩聯憑棊几。靜思棋劫對楸枰。浣花光景應如昨。回首西州一愴情。芒花四月十九日也。

讀程秀才詩

程子晚相得。居然一坐傾。新詩欲飛動。病眼爲開明。英妙非凡質。衰遲長後生。吾徒可相賀。五字有長城。

晨起

一官又寄汝江頭。落魄文園故倦遊。榻上鐸聲悲破夢。簷邊桐葉冷生秋。暮年作吏寧長策。薄祿糜人尙小留。晨起憑欄歎衰甚。接羅紗薄髮飈飈。

兩夜

兩鬢新霜換舊青。客遶身世等浮萍。少年樂事消除盡。兩夜焚香誦道經。

得京書或怪久不運問

慣向江湖鍛羽翰。雲霄那敢接鸞鷟。百年未必如炊久。萬事真須作夢看。白首據鞍慚俠氣。清燈顧影歎儒酸。手遮西日成何味。還我平生舊釣竿。

水亭

日淡暑猶薄。雨餘風更清。翛然水亭立。試此葛衣輕。曬粉憐孤蝶。穿枝喜晚鶯。誰知簿書裏。也復得吾生。

醉眠

達士如鴟夷。無客亦自醉。癡人如撲滿。多藏作身祟。放翁亦何長。偶自遠聲利。胸中白如練。不著一毫偽。醉來酣午枕。晴日雷起鼻。寄謝敲門人。予方有公事。

感舊絕句

鴉翎墜前山。猿馬雞蹤橋下水。連天金丹煉成不肯服。且戲人間五百年。

又

鵝黃酒邊綠荔枝。鵝黃。廣漢酒名。綠荔枝出敘州。摩訶池上納涼時。冰紈不畫豔驚女。卻寫江南白紵辭。

又

南市夜夜上元燈。西鄰日日是清明。青氈犢車碾花去。黃金馬鞭穿柳行。

又

十月新霜兔正肥。佳人駿馬去如飛。纖腰嫋嫋戎衣窄。學射山前看打圍。

又

半紅半白官池蓮。紅。廣漢池。半醒半醉女郎船。鴛鴦驚起何曾管。折得雙頭喜欲顛。

又

紅葉琵琶出嘉州。四絃彈盡古今愁。胡沙漫漫紫塞曉。漢月娟娟青冢秋。

又

笑人傳酒清夜闌。欲歌未歌愁遠山。蒲萄一斗元無價。換得涼州也是閑。

畫臥聞百舌

兩後郊原已遍犁。陰陰簾幙燕分泥。閑眠不作華胥計。說與春鳥自在啼。紅雨謂百舌爲春鳥。



寄呂博士

薄宦東西蜀。僑居太少城。休論九年謫。喜識萬人英。別久心常折。書來眼未明。功名君自力。丘壑我平生。

遊疎山

我願匹馬飛騰遍九州。如今苦無褰屨與驪駒。葛陂之龍又難致。兀兀安得忘吾愁。幸餘一事差可喜。雲山萬里芒鞋底。曳杖行穿嶓冢雲。試茶手挹香溪水。江西山水增怪奇。疎山之名舊所知。惜哉不見侏儒師。尙想薪水俱空時。寺門欲近山苦拆。老樹蒼崖含古色。挂包便住吾豈能。一來要是疎山客。

疎山東堂晝眠

飯飽眼欲閉。心閑身自安。樂超六欲界。笑過八珍盤。香縷縈簾斷。松風逗枕寒。吾兒原解夢。爲我轉雲團。是日。始子分茶。

山中作

朱墨紛紛訟滿庭。半年初得試山行。燒香掃地病良已。飲水飯蔬身頓輕。日落三通傳浴鼓。雨餘千耦看農耕。故巢光景還如此。爲底淹留白髮生。余書堂在雲門寺西。

觀蔬圃

菘芥可菹芹可羹。晚風咿轧桔槔聲。白頭狐宦成何味。悔不畦蔬過此生。

東堂晨起有感

不解飛車越九州。青鞋處處爲山留。百年未盡且作夢。三日閑行聊散愁。世上幾經華表柱。尊前好在黑貂裘。龍泉幸是無人斲。暮露光芒上斗牛。

金谿道中

雲閣苦竹市。雨來烏石岡。駕犂雙犢健。鷓鴣一村香。天地君恩重。風埃吏責忙。敢辭坡路滑。且領筍輿涼。

小憩前平院戲書觸目

道邊小寺名前平。殘僧二三屋半傾。旁分千畦畫楸局。正對一山橫翠屏。修織弱蔓上幽援。一作拔。堅瘦穉柏當

前榮稻秧正青白鷺下。桑椹爛紫黃鸝鳴。村虛賣茶已成市。林薄打麥惟聞聲。泥行扶犁吒新犢。野饑燒筍炊香。杭。十年此樂發夢想。忽然到眼難爲情。上車欲去復回首。那將暮境供淨名。

遣興

小麥登場雨熟梅。閉門病眼每慵開。酒盃不解爲愁敵。書卷纔開作睡媒。骨朽空名垂斷簡。冢荒殘碣臥蒼苔。紛紛傾奪知何得。老覺人間但可哀。

兩後獨登擬峴臺

高城斷處閣橫空。目力雖窮與未窮。燕子爭泥朱檻外。人家曬網綠洲中。誰能招喚三秋月。我欲憑陵萬里風。更比峴山無楚輩。論交惟是一枝筇。

數日訴牒苦多憊甚戲作

江南五月暑猶薄。梅子正黃風雨惡。庭中訟獠不貸人。急甚常如虎遭縛。空齋鼠迹留几塵。賦詩飲酒疑前身。脫歸徑臥與壁語。敢恨無人問良苦。

與黎道士小飲偶言及曾文清公慨然有感

臨川稅駕忽數月。嗜睡愛閑常閉門。君詩始愜病僧意。吾道難爲俗人言。秋雨淒淒黃葉寺。春風酣酣綠樹村。曾公九原不可作。一尊破涕誦招魂。

念歸

江城五月朝暮雨。兩腳纔收水流礎。酒盃未把愁作病。塵柄欲拈誰共語。有時暫解簿書圍。獨坐藤牀看香縷。林塘渺渺鳩正慵。簾幙陰陰燕新乳。湖山舊隱入我夢。白首忘歸獨安取。一生花裏醉春風。卽今願作扶犁翁。

五月十一日夜且半夢從大駕親征盡復漢唐故地見城邑人物繁麗云西涼府也喜甚馬上作長句未

終篇而覺乃足成之

天寶胡兵陷兩京。北庭安西無漢營。五百年間置不問。聖主下詔初親征。熊羆百萬從鑿窰。故地不勞傳檄下。築城絕塞進新圖。排仗行宮宣大赦。岡巒極目漢山川。文書初用淳熙年。駕前六軍錯錦纈。秋風鼓角聲滿天。苜蓿

峯前盡停障。平安火在交河上。涼州女兒滿高樓。梳頭已學京都樣。

兩夜

牆西泥三寸。牆東草三尺。可憐白鹿泉。蛙黽紛狼藉。濕螢如隕星。入戶黏几席。病夫本嗜睡。況此風雨夕。永懷瀟西寺。更憶山南驛。陳迹不可追。昏然墮吾幘。

又

簷高兩聲壯。堂豁霧氣入。飛螢照畫棟。相逐光熠熠。向來經春旱。蒼耳暗原隰。微官又厚責。撫事百憂集。三日雨不休。四野苗盡立。登高思賦詩。簿書縛人急。

焚香畫睡比覺香猶未散戲作

小屏煙樹遠參差。吏散身閑與睡宜。誰似爐香念幽獨。伴人直到夢回時。

又

燕梁寂寂篆煙殘。偷得勞生數刻閑。三疊秋屏護琴枕。臥遊忽到懷西山。

仲夏小旱方致禱忽大雨連日江水爲漲喜而有作

旱苗垂槁歎何堪。大雨誰知變立談。翠麓青林吞欲盡。惡風白浪戰方酣。江翻龜窟連雲澤。雷挾龍腥起雪潭。從此年豐真小事。炷香終日坐蒲龕。

冒雨登擬峴臺觀江漲

雨氣分千嶂。江聲撼萬家。雲翻一天墨。浪蹴半空花。噴薄侵虛閣。低昂泛斷槎。壯遊思夙昔。乘醉下三巴。

雍庭草

露草煙蕪與砌平。羣蛙得意亂疎更。微涼要作安眠地。放散今宵鼓吹聲。

蚊蝶詞

蚊蝶子。去復來。草長齊腰花亂開。蜜蜂辛苦爲人計。林鶯百轉胡爲哉。嗟爾蚊蝶獨得意。飛來飛去無嫌猜。追花逐絮闌干角。人生安得如汝樂。

大雨踰旬既止復作江遂大漲

牆角蚊雷喧甲夜。溼星昏昏出雲罅。臨堂仰占久歎咩。懸知龍君未稅駕。行人困苦泥沒胯。居人悲啼江入舍。便晴猶可望秋稼。努力共禱城南社。

又

一春小雨憂旱暵。熟睡湫潭坐龍懶。以勤蹟孺護其短。水浸城門渠不管。傳聞霖潦千里遠。榜舟發粟敢不勉。空村避水無雞犬。茆舍夜深燈火燄。民家避水多依丘阜。以小舟載米艱之。

燒丹示道流

昔燒大藥青牛谷。磊落玉牀收箭鏃。扶桑朝曦謹火候。仙掌秋露動沐浴。帶間小瓢鬼神術。異氣如虹夜穿屋。點成黃金棄山海。揮手人間一裘足。明年服丹徑仙去。洞庭月冷吹橫玉。相逢只恐驚倒君。毛髮毵毵垂地綠。

書感

半世狂疎踐破機。暮年持此欲安居。會憑香火消前業。已築茆茨訟昨非。余村居築小軒。以昨非名之。薄俗慣看翻覆手。憂心空復倒顛衣。煙蓑雪笠家風在。送老湖邊一釣磯。

夏日

病退身初健。時清吏更休。竭蜂窺硯水。慵燕息簾鉤。碁局每坐隱。屏山時臥遊。真成愛長日。未用憶新秋。

寄統

大兒挈藥囊。小兒負書笈。共作蘭亭遊。詎必羣賢集。言此二十年。白首終未踐。汝復守荆扉。經年不相見。楚越天一涯。書疏何由頻。諸弟亦可憐。說兄輒酸辛。江城秋尚遠。桐葉落可埽。悵然懷故谿。菱絲雨中老。

自訟

家弊須微祿。年衰尚遠遊。未逃朋友責。更遣吏民羞。采藥思長往。傳書卻小留。微風入桐葉。分我一簾秋。

夏日晝寢夢遊一院闌然無人簾影滿堂惟燕躡箏絃有聲覺而聞鐵鐸風響璆然殆所夢也邪因得絕

句

桐陰清潤雨餘天。簷鐸搖風破晝眠。夢到畫堂人不見。一雙輕燕蹴箏絃。

虛堂

著氣虛堂一點無。爽如秋露貯冰壺。滄州未遽浮舴舢。碧井聊聽放轆轤。肅肅清風生薤簟。酣酣美酒付紗幮。惱人不奈奴兵輩。環抱文書待日晡。紅百率以申初治文書。至暮夜乃已。

夢仙夢朝謁大官殿。仰視去天甚近星。皆大如月氣候清寒。如十月間時庚子六月一日也。

中宵遊帝所。廣殿綴仙官。天逼星辰大。霜清劍佩寒。賦詩題碧簡。侍宴跨青鸞。惆悵塵緣重。夢殘更未殘。

自嘲

夜作看花夢。朝賦飲酒詩。吾夢固忘矣。詩亦聊自欺。荒園無佳花。牽牛漫疎籬。給酒月四斗。官供酒。月止四斗耳。一觴難屢持。悲歡有定數。夫至誰得知。願從大鈞問。一笑在何時。

長歌行

燕燕尾涎涎。橫穿乞巧樓。低入吹笙院。鴨鴨鶯鶯啾啾。朝浮杜若洲。暮宿蘆花夾。嗟爾自適天地間。將傳命侶意甚閑。我今獨何爲。一笑乃爾慳。世上悲歡亦偶然。何時爛醉錦江邊。人歸華表三千歲。春入笙篴十四絃。

對酒

簾鐸鳴雜珮。簾旌動微波。我老懶讀書。如此長日何。名酒來清江。嫩色如新鵝。奇俎映玉盤。珍鮓開綠荷。萬事姑置之。適然酣且歌。宦遊亦何好。且復小婆娑。秋風雲門道。踏月捫青蘿。

自詠

夢歸不恨故山深。霜雪今年已滿簷。報國有心身潦倒。養生無術病侵尋。晨興聊取經遮眼。夜坐時憑易洗心。安用更爲逃暑飲。虛堂三復自蕭森。

夏日睡起

簾紋似秋水。含風覺微漪。帳幅如春煙。縹緲不受吹。團扇墮枕邊。皎皎素月暉。非睡復非覺。心定息自遲。茶熟我亦起。寒泉掬珠璣。浮瓜空把玩。甚矣今年衰。

所居堂極涼。雖三伏常有秋意也。偶得長句。

高棟虛簷六月涼。野人誰遣寄華堂。炎威自避重重幙。清吹時生曲曲廊。白苧出箱開疊雪。甘瓜隨刃落輕霜。憑誰爲報金羈客。滿帽京塵有底忙。

兩後露坐小酌

閉門誰與率頽年。旋掃桐陰近酒邊。病久一春稀見蝶。雨多六月始聞蟬。官倉求飽真聊爾。山墅懷歸每惘然。從此讀書仍復嬾。惟留白眼望青天。

日暮南窗納涼

冠蓋塵沙得我憎。脫巾聊喜髮鬢鬢。素娥東湧行空闊。清吹南來掃鬱蒸。團扇正閑看破墨。矮牀欹臥怯文藤。扁舟歸去應尤樂。莫羨金盃賜苑冰。

中夜起登堂北小亭

幽人曳杖上青冥。掠面風輕宿醉醒。朱戶半開迎落月。碧溝不動浸疎星。舍聲格磔頻移樹。花影扶疎自滿庭。歎息明年又安往。此身何啻似浮萍。

登擬峴臺

顛顛思吳客。淒涼擬峴臺。一年秋欲到。兩鬢老先催。裊裊菱歌斷。翩翩水鳥來。倚闌哦五字。未穩莫輕回。

夜意

灑地移牀曲檻前。葛衣蕭爽接羅偏。庭空秋近露沾草。月落夜闌星滿天。靜待微風停素扇。旋消殘酒漱寒泉。翛然自與氛埃遠。安用騎鯨學水仙。

道院遣興

微官不復歎頭顛。高棟虛窗樂有餘。中夜塔鈴空際語。整秋庭樹月中疎。甌炊青飯留巖客。露點朱毫勸玉書。猶恨未成歸剡曲。小舟閑采白芙蕖。

夜行至白鹿泉上

小兩病良已。新秋夜漸長。隔城聞鶴唳。出戶逐螢光。荒徑穿蒙密。遙空望莽蒼。泉聲落瓊珮。肝肺爲清涼。

堂中以大盆贖白蓮花石。菖蒲脩然無復暑意。睡起戲書。

海東銅盆面五尺。中貯澗泉涵淺碧。豈惟冷浸玉芙蓉。青青菖蒲絡奇石。長安火雲行日車。此間暑氣一點無。紗櫺竹簾睡正美。鼻端雷起驚僮奴。覺來隱几日初午。碾就壑源分細乳。卻拈燥筆寫新圖。八幅冰綃瘦蛟舞。

初秋

煙螢相逐照高棟。又見一年風露秋。流落江湖常踽踽。掃平河洛轉悠悠。簿書終日了官事。尊酒何時寬客愁。擬倩天風吹夢去。浩歌起舞散花樓。

書懷絕句

不到天台三十年。草菴猶記宿雲邊。老僧曉出松門去。手挈軍持取澗泉。

又

憶過棲賢見蜀僧。雲堂十月冷生冰。定回藪藪聞窗雪。一椀琉璃照佛燈。蜀僧左縣海辨也。

又

丈人稱西山谷盤。麻姑祠前松檟寒。仙翁欲覓渺無處。聞在青溪浴大丹。仙翁謂謙先生。

又

早佩黃庭兩卷經。不應靈府雜籟腥。憑君爲買金鴉背。歸去秋山斲茯苓。

又

未駕青鸞返帝鄉。三江七澤路茫茫。看山看水無程數。漁艇爲家艾作糧。

狂吟

浮世何須宇宙名。一狂自足了平生。秋風湘浦紉蘭佩。夜月緱山聽玉笙。學劍慣曾遊紫閣。結巢終欲隱青城。年來自笑彌耽酒。百斛蒲萄未解醒。

聞雨

潭底垂龍喚不應，驕陽似欲敗西成。虛堂永夜耿無睡，起聽四郊車水聲。

初秋小疾效俳諧體

宿疾逢秋劇，衰容逐日添。專房一竹几，列屋萬牙籤。今年傳書頗多，遣悶憑清聖。忘情付黑甜。晚來風月好，一笑捲疎簾。

兩後極涼料簡篋中舊書有感

日昃小雨不至晡，雨雖未足涼有餘。細泉泠泠咽幽竇，清吹策策驚高梧。笠澤老翁病蘇醒，欣然起理西齋書。十年燈前手自校，行間顛倒黃與朱。區區樸學老自信，要與萬卷歸林廬。爾來世俗喜變古，鑿空飾詐無根株。愀然撫几三太息，力薄抱恨何由祛。蘭臺漆書非己責，且爲籤牒除蠹魚。

秋夜

湖海秋初到，房櫳夜轉幽。露濃驚鶴夢，月冷伴蛩愁。生計依微祿，年光墮遠遊。嚴灘已在眼，早晚放孤舟。去年發自三衢舟行，泛七里湖，歸山陰，今竟當爲此行也。

抄書

書生習氣重，見書喜欲狂。擿黷澣剝藤，辛苦補散亡。且作短檠伴，未暇名山藏。改家借籤帙，舊友餉朱黃。借書于王韓晁會諸家，而呂周輔字文子友，近寄朱黃墨。皇墳探八索，奇字窮三蒼。儲積山崇崇，探求海茫茫。一笑語兒子，此是卻老方。

晚自白鹿泉上歸

坐穴藜牀愧未能，酌泉聊喜曳枯藤。詩從病後功殊少，酒到愁邊量自增。事業何由垂竹帛，笑談空覺負交朋。興闌卻逐棲鴉返，寂寞西窗已上燈。

秋旱方甚七月二十八夜忽雨喜而有作

嘉穀如焚稗草青，沉憂耿耿欲忘生。鈞天九奏驚韶樂，未抵虛簷瀉雨聲。

秋日小雨有感



七月江邊暑已微。虛窗臥看兩霏霏。淒涼蛩伴草根語。憔悴鵲從天上歸。志士酒酣看寶劍。美人淚盡倚鴛機。嗟予亦有新秋感。遙憶蒼苔滿釣磯。

書李商叟秀才所藏曾文清詩卷後

隴蜀歸來兩鬢絲。茶山已作隔生期。西風落葉秋蕭瑟。淚灑行間讀舊詩。

碧海行

碧海如鏡天無雲。衆真東謁青童君。九奏鏗鏘洞庭樂。八角森茫龍漢文。共傳上帝新有詔。蚩尤下統旄頭軍。徑持河洛還聖主。更度遼碣清妖氛。幽州蠟炬一炬盡。安用咸陽三月焚。藝祖騎龍在帝左。世上但策雲臺勳。

道院遣興

滿鏡新霜老可驚。十年煙隴廢春耕。黃絲黑黍有歸夢。白髮蒼顏無宦情。浮世不堪供把玩。安心隨處是修行。尙嫌未到無爲地。酷愛朝鐘暮磬聲。

夜酌

迢夜澆愁賴麴生。燈前忽見臥長瓶。比紅有句狂猶在。染白無方老已成。園徑露瑩黏溼草。塔簷風鐸亂疎更。悲愁要是騷人事。未必忘情勝有情。

言懷

莫笑生涯似斷蓬。向來諸俠避豪雄。報仇使氣風塵裏。吹竹彈絲錦繡中。樂事眼看成昨夢。倦遊心伏作衰翁。論交尙喜筇枝在。白鹿泉邊朔晚風。

送客城西

倦客憑鞍半醉醒。秋光滿眼歎頽齡。日斜野渡放船小。風急漁村攤網腥。客思不堪聞斷雁。詩情彌半在郵亭。歸來更恨城笳咽。煙火昏昏獨掩屏。

雨夜

庭院蕭條秋意深。銅爐一炷海南沉。幽人聽盡芭蕉雨。獨與青燈話此心。

病中作

浮世寄酣枕。勞生居漏船。已悲身老大。更著病沈綿。親舊動千里。歡娛無百年。牀頭周易在。端擬絕韋編。

社日小飲

社日西風吹角巾。一尊彊醉汝江濱。杏梁燕子還堪恨。歸去匆匆不報人。

晚到東園

岸幘尋青土。憑軒待素娥。官身苦日短。荒圃得秋多。醉眼輕浮世。羈懷激浩歌。功名從蹭蹬。詩酒且婆娑。

秋晚登擬峴望祥符觀

放翁局促留江干。愛此樓前煙水寬。兩昏回望殿空兀。秋晚剩覺山蒼寒。中原未復猴橫臆。故里欲歸身屬官。雲外飛仙故不遠。喚渠小爲駐青鸞。

秋思

黃落梧桐覆井牀。莎根日夜泣寒螿。老生窺鏡鬢成雪。俊鶻掣講天欲霜。破虜誰持白羽扇。從軍曾擁綠沈槍。壯心自笑何時豁。夢遶祁連古戰場。

病目廢書終日危坐

肺渴常止酒。目昏復捐書。蒲團坐袖手。一窗寬有餘。心知世緣薄。分與鐘鼎疎。湛然千勿淵。養此徑寸珠。光明照憂患。何適不自娛。白雲可與友。晴空閑卷舒。

感昔

常記東園按舞時。春風一架晚薔薇。尊前不展鴛鴦錦。只就殘紅作地衣。成都小東門外趙氏園。

又

八陣原頭縱獵歸。割鮮藉草酒淋漓。誰知此夕西窗裏。一盞青燈獨詠詩。八陣原在成都廣漢之間。

視陂至崇仁村落

津亭徙倚客衣單。秋盡江南亦已寒。雁翅不禁疎雨溼。楓林初染早霞丹。少年已歎儒冠誤。暮境更知行路難。倦

馬歸來踏殘日長吟聊得寫憂端。

馬上

客遊多感慨。老病少歡欣。去去穿村市。翻翻吹帽幕。天低落平野。雁遠入寒雲。漸覺江城近。秋笳馬上聞。

寄周洪道參政

半生篷艇弄煙波。最愛三湘欸乃歌。擬作此行公勿怪。胸中詩本漸無多。

又

菱舟煙雨久思歸。貪戀明時未拂衣。乞與一城教睡足。猶能覓句寄黃扉。

北窗

白首微官只自囚。青燈明滅北窗幽。五更風雨夢千里。半世江湖身百憂。壯志已孤金鎖甲。倦遊空攬黑貂裘。灞亭夜獵猶堪樂。敢恨將軍老不侯。

登擬峴

翠阜圍平野。朱樓壓綠牆。風回半汀雁。雲護一天霜。有地聊容拙。無方可療狂。白頭詩興亡。吟罷意差彊。

休日

賜休暫許養衰殘。靜院偷然晝掩關。釀酒移花調護悶。弄琴洗硯破除閑。與人多忤讒消骨。報國無功愧滿顏。一寸歸心向誰說。小屏依約剡中山。

別張教授歸獨登擬峴

小閣徹朱扉。停車暫息機。行人呼晚渡。幼婦浣秋衣。霜樹欹危堞。風鴉滿落暉。登臨客愁裏。況是送將歸。

晚晴至索笑亭

中年苦肺熱。賸喜見新霜。登覽江山笑。經行草樹荒。堂空響棋子。盞小聚茶香。與盡扶藜去。斜陽滿畫廊。

新釀熟小酌索笑亭

新釀黃如脫殼鷄。小園持盞暫婆娑。文章不進技止此。仕宦忘歸人謂何。宿業簿書昏病眼。夢遊煙雨溼漁蓑。醉

中笑向兒童說。白髮今年添幾多。

乾道初予自臨川歸鍾陵李德遠范周士送別于西津是日宿戰平風雨終夕今自臨川之高安復以兩中宿戰平悵然感懷

故人已作山頭土。倦客猶鄣陌上塵。十五年間真一夢。又騎羸馬涉西津。

又

十五年前宿戰平。長亭風雨夜連明。無端老作天涯客。還聽當時夜雨聲。

村舍小酌

野性安衡茅。僕屋愁兢兢。上不補縣官。下有肉食慚。雖非策雲驥。實鄙作鷓蠶。失計不容悔。漁糞換朱藍。少壯尚可力。老大真難堪。今朝意頗輕。村舍寄半酣。玉版烹雪筍。金苞擘霜柑。豈惟寫我憂。亦以稅我驂。弄筆作一笑。何用與客談。遂巡上車去。溼翠浮煙嵐。

白塔道中乘臥輿行

小疾載臥輿。獨飲亦薄醉。朝離戰平館。午過白塔市。清寒正宜嬾。搖兀更益睡。所嗟下程早。不得究此味。忽憶從軍時。雪夜馳鐵騎。壯心誰復識。撫事有餘愧。

宿城頭鋪小飲而睡

亭傳臨江滸。牀數息我勞。屋茅殘月冷。庭樹北風颼。墟市饒新兔。村場有濁醪。氣衰仍病著。小飲不能豪。

豐城村落小憩

霜信催寒力尚微。郵亭繫馬旋添衣。平郊極目冬耕遍。小婦簪花晚餉歸。孤宦每隨征雁遠。故人已似曉星稀。上書自效真須猛。菘正堪炊蟹正肥。

再題

柴門數頃秋。半日爲遲留。老驥厭伏櫪。飢鷹思下韝。野橋危欲斷。山雨落還收。何許丹青手。端能寫此愁。

發豐城縣

豐城古縣已再遷。出郭十步江渺然。冷雲四合欲下雪。柔櫓數聲初放船。孤村燈火照破驛。客子何以娛今夕。不辭金盃醉十分。要看玉花深一尺。

豐城高安之間憩民家景趣幽邃爲之慨然懷歸

數家聚雲根。細路入叢薄。巖巖石渠水。來往一略約。有無鄰里通。笑語婦子樂。濁醪時相就。青蔬缺鹽酪。日暮歸閉門。續火星煒燐。先期畢租稅。老不入城郭。嗟予獨何事。早插紅塵腳。故山未成歸。悵望有餘怍。

宿華嚴寺

夜宿華嚴寺。人扶到上方。喚僧同看畫。避佛旋移牀。小雨不成雪。烈風還作霜。鐘殘燈漸暗。跌坐默焚香。

寄奉新高令

小雨催寒著客袍。草行露宿敢辭勞。歲饑民食糟糠窄。吏情官倉鼠雀豪。只要閭閻寬箠楚。不須亭障肅弓刀。九重屢下丁寧詔。此責吾曹未易逃。

高安州宅三詠

丹井神仙李八百煉丹處

丹成人已仙。遺龜亦已平。尙餘松根井。鏘然環玦聲。我來試一啜。槁面還童嬰。祝君勿關鑰。人人遣長生。井有關橋護之。

劍池李八百洗劍窟

我壯喜學劍。十年客峨眉。毫髮恐未盡。屠釣求隱淪。今年獨何幸。見此度世人。夜深來較術。雷雨戰江津。

偃松

巨松偃青蓋。闕世巋獨存。頗疑古仙翁。藏丹在其根。或是結靈藥。百尺有伏龍。終隨風雨化。不死何足言。

與高安劉丞遊大愚觀壁間兩蘇先生詩

野性縱壑魚。官身墮穿虎。適得建溪春。頗憶松下脯。微霜初變寒。短景已過午。佳客能聯翩。老宿相勞苦。懷哉兩蘇公。去日不可數。泉局一埋玉。世事幾炊黍。吾儕生苦晚。佇立久惻楚。尙想來遊時。黃鍾廣大呂。

卷十二

宿黃仙觀。兵火焚蕩之餘。惟一殿突兀。猶在黃仙蓋。與旂旌陽同峙。飛昇者。

披宅儻然上碧虛。神仙豈亦愛吾廬。重門不改雲山色。古殿猶存劫火餘。翠木蕭森高蔽日。黃冠貧窶自畦蔬。幾年安得長來此。一椀松肪讀隱書。

玉隆得丹芝

何用金丹九轉成。手持芝草已身輕。祥雲平地擁笙鶴。便自西山朝玉京。

贈西山老人

生世不把筆。殘年惟澣園。負春來並舍。賣畫到前村。勤苦供租稅。清貧遺子孫。從來棲遁志。剩欲與翁言。

病酒宿土坊驛

少時見酒喜欲舞。老大畏酒如畏虎。一日飲酒三日病。客路那堪夜聞雨。雨聲蕭蕭宿空堂。不寐始知更漏長。賣藥思從伯休隱。愛花卻笑拾遺狂。

十一月上七日蔬飯驛嶺小店

新秬炊飯白勝玉。枯松作薪香出屋。冰蔬雪菌競登槃。瓦鉢甌中俱不俗。曉途微雨壓征塵。午店清泉帶脩竹。建谿小春初出碾。一碗細乳浮銀粟。老來畏酒厭芻豢。卻喜今朝食無肉。尚嫌車馬苦縻人。會入青雲騎白鹿。

進賢驛感懷明日當歸至臨川

環走幾千里。馳歸亦再旬。征途饒感慨。訟牒費精神。風雪常欺客。文章本誤身。小詩無傑思。猶得常吟呻。

入臨川境馬上作

投老糜身簿領間。卻因馬上得偷閑。秦旬敢恨常爲客。一飯何曾不對山。銅鏡無情欺白髮。霜風有力散顰顏。今宵要看浮橋月。儘放征驂晚入關。

別楊秀才

歲暮江頭又語離。淡煙衰草不勝悲。俗人憤憤寧知子。心事悠悠欲語誰。燈暗想傾燒悶酒。路長應和贈行詩。人生但要身強健。一笑相從自有時。

發臨川

見客道傍店。添衣江上村。陂長風浩浩。山遠霧昏昏。虛日人聲合。凶年菜色繁。扶衰歸北闕。何以報君恩。

早行

江路迢迢馬首東。臨川一夢又成空。日高未眩晨霜白。風勁先消卯酒紅。山市人經餓鐘後。孤生身老道途中。著身穩處君知否。射的峯前臥釣篷。

白干舖別傅用之主簿

我行忽百里。送客亦已空。傅子獨眷眷。旦暮隨此翁。謝之不肯去。瘦馬衝北風。泥濘及馬臆。霜飛逼裘茸。茅店得小語。慨然念年凶。不作兒女悲。道義相磨礱。我歸亦何爲。魚鳥愁池籠。君乃臺閣人。鸞鳳儀笙鏞。若耶邊青山。予草堂在若耶溪上。天祿摩蒼穹。此別各努力。出處何必同。

過茱萸舖青松朱戶前臨大道絕似西陲亭驛悵然有作

茱萸小驛夕陽愁。搔首臨風感舊遊。渾似軍行散關路。但無鼓吹動涼州。

青溪道中行古松間因少留滄茶而行

露溼青松細細香。旋呼拄杖踏斜陽。三生舊發遊山願。一卷新傳辟穀方。雲外未論笙鶴近。塵中實厭簿書忙。拾樵汲澗俱清絕。聊爲煎茶一據牀。

弋陽縣江上書觸目

縣前奇哉一江水。日暮風吹碧鱗起。客恨征塵忽如洗。不用金筓刮眸子。丹楓岸邊雪色蘆。下有老翁方捕魚。欲求妙思貌畫圖。王維鄭虔今世無。

乾封驛早行

己巳被驛書。乙亥戒徂兩。扶衰犯霜露。疲憊不可狀。夜行星滿天。晨起雞初唱。槁枝燒代燭。凍菜擷供餉。三年走

萬里天幸苟亡恙。深知賦材薄。自笑得名妄。宣濕望玉座。何以待諮訪。春紅色如藍。歸舟行可榜。

過江山縣浮橋有感

堪笑行人日日忙。又扶衰病過浮梁。灘流急處水禽下。桑葉空時村酒香。枯槁敢懷貧雨露。飢腸自憫犯風霜。宦途商略無安處。早晚歸耕剡曲旁。

衢州早行

鄰雞已三號。殘燭無一寸。參差發行囊。迢遞望前頓。滿靴霜若雪。破面風抵刃。敢辭行路難。漸喜京邑近。少年奉朝請。親見堯授舜。飄然如脫葉。跼蹐垂七閩。風埃暗征袍。歲月集衰鬢。餘生迫歸休。周行愧英俊。

航頭晚興嚴州

山色蒼寒野色昏。下程初閉驛亭門。不須更把澆愁酒。行盡天涯憤斷魂。

又

落葉孤村晚下程。癡雲殘日半陰晴。篝爐火煖牀敷穩。臥聽黃鸝穀穀聲。

行至嚴州壽昌縣界得請許免入奏仍除外官感恩述懷

曉傳尺一到江村。拜起朝衣漬淚痕。敢恨帝城如日遠。喜聞天語似春溫。翰林惟奉還山詔。湘水空招去國魂。聖主恩深何力報。時從天末望修門。

桐廬縣泛舟東歸

桐江艇子去乘月。笠澤老翁歸放慵。一尺輪囷霜蟹笑。十分嶽瀾社醅濃。宦遊何管路九折。歸臥恨無山萬重。醉裏試吹蒼玉笛。爲君中夜舞魚龍。

予欲自嚴買船下七里灘謁嚴光祠而歸會灘淺陸行至桐廬始能泛江因得絕句

客星祠下渺煙波。欠我扁舟舞短蓑。不爲窮冬怕灘惡。正愁此老笑人多。

又

桐廬縣前鷓鴣聲急。蒼煙茫茫白鳥雙。亂山日落潮未落。勝絕不減吳松江。



漁浦

桐廬處處是新詩。漁浦江山天下稀。安得移家常在此。隨潮入縣伴潮歸。

又

漁翁持魚叩舷賣。炯炯綠瞳雙臉丹。我欲從之遊已遠。菱歌一曲暮江寒。

蕭山

素衣已免染京塵。一笑江旁整幅巾。入港綠潮深蘸岸。披雲白塔遠招人。功名姑付未來劫。詩酒何孤見在身。會向桐江謀小築。浮家從此往來頻。

辛丑正月三日雪

開歲尙殘冬。佳哉雪意濃。潤歸千里麥。聲亂五更鐘。簾隙收初密。牆隅積已重。龍團笑羔酒。狐腋襲貂茸。危檻臨欹竹。幽窗聽墮松。忽思西戍日。憑堞待傳烽。予從戎日。嘗大雪中登興元城上高興亭。待平安火至。

正月二十八日大雪過若耶溪至雲門山中

山中看雪醉騎驢。清賞真成十載無。高壓孤峯增峭絕。斜傾叢竹失枝梧。松肪火暖眠僧榻。羊糝香擁地爐。病骨雖癯猶健在。未應遺作臥遊圖。

雪中登雲泉上方

瀟瀟雲堆上。茫茫雪海中。煎茶誇坐客。打竹課蠻童。冰谷鳴飢鶴。煙汀立斷鴻。歸來更堪喜。封火滿爐紅。僧以葑爲火。

衝雪至餘慶覺林雪連日不止

策蹇清吟涉若耶。灞橋猶恨近京華。山前千頃誰種玉。座上六時天散花。林雀無聲溪狗斷。炊煙不動竹籬斜。勝遊更覺平生少。未羨銀河泛客槎。

大雪歌

若耶溪頭朝暮雪。鴉鵲隨死長松折。橫飛忽已平屐齒。亂點似欲粧簾額。放翁憑閣喜欲顛。摩挲拄杖呼兒莫。

辭從我上嵯峨。此景與子同清絕。銀盃拌蜜非老事。石鼎煎茶且時啜。題詩但覺退筆鋒。把酒未易生耳熱。扶衰忍冷君勿笑。報國寸心堅似鐵。漁陽上谷要一行。馬蹄蹴踏河冰裂。

雪霽歸湖上過千秋觀少留

縱轡不嫌遠。逢山猶一登。夕陽陂渺渺。殘雪塔層層。折竹橫遮道。飢鳥下啄冰。欲歸還小駐。倚杖對峻嶒。

二月四日作

早春風力已輕柔。瓦雪消殘玉半溝。飛蝶鳴鳩俱得意。東風應笑我閒愁。

新築山亭戲作

危檻凌風出半空。怪奇造化欲無功。天垂繚白縈青外。人在紛紅駭綠中。日月匆匆雙轉轂。古今杳杳一飛鴻。酒酣獨臥林間石。未許塵寰識此翁。

春晴出遊

一春羶半病。頗廢山澤遊。今晨忽良已。風日亦清柔。朝飧具冷餅。瘦骨辭重裘。穉荷出溝港。芳杜滿河洲。勿言酒苦薄。一笑失百憂。且當詠尋壑。詎必賦登樓。

題山家壁

山中無傳漏。猿鳴知既夕。芳藤上幽援。素月照高壁。主人殊喜事。歡若有夙昔。稚子檠竹槩。炊黍持餉客。卜鄰雖未辨。清嘯聊自適。衰病久廢詩。筆端歎荆棘。

春晚風雨中作

箕踞藜牀岸幅巾。何妨病酒住湖濱。駕風浪作連三日。掃地花空又一春。樂事清宵當秉燭。畏途平地有摧輪。顏然耐辱君無怪。元是人間澹蕩人。

北窗

九陌黃塵早暮忙。幽人自愛北窗涼。清吟微變舊詩律。細字閑抄新酒方。草木扶疎春已去。琴書蕭散日初長。破甕臨罷搗頤久。又破銅匱半篆香。

山中晚興

薄酒亦陶然。僂蹇澗石側。巾墮拄杖橫。意象頗自得。青山受落日。忽作玻璃色。躊躇不忍去。下磴天已黑。

夜登山亭

飛觀崢嶸天宇寬。幽人半醉凭闌干。三山渺渺鸞鶴遠。七澤茫茫蓑笠寒。清吹拂林橫玉笛。紫雲覆鼎熟金丹。童顏綠鬢無人識。回首塵寰一夢殘。

西村醉歸

俠氣崢嶸蓋九州。一生常恥爲身謀。酒寧剩欠尋常債。劍不虛施細碎鏃。見孟東野詩。岐路凋零白羽箭。風霜破弊黑貂裘。陽狂自是英豪事。村市歸來醉跨牛。

自詠

三十年前接俊遊。卽今身世寄滄洲。但聲不辨諧韶濩。暮氣寧能徹斗牛。綠酒可人消永日。黃鸝多事管閑愁。吹笙跨鶴何時去。剩欲平章太華秋。

閑中頗有四方之志。偶得長句

世論紛紛枉見仇。吾身自計本悠悠。讀書漸嬾惟思睡。歷酒初成不怕愁。蜀棧冷雲侵瘦馬。楚江籠月繫孤舟。興來會作飄然去。更續騷人賦遠遊。

遣興

綠髮凋零白髮多。山林未死且婆娑。無端竹俗坐狂耳。甚欲讀書如嬾何。雨過亂蕪堆野艇。月明長笛和菱歌。此中得意君須領。莫愛車前印幾窠。

又

遠簷新葉著啼鶯。睡起東窗一榻橫。愁袞袞來疑有約。春堂堂去恨無情。鶻飛局上新棋勢。龍吼牀頭古劍聲。莫歎柴荆無客到。綠尊還對暮山傾。

醉題

坎止流行五十秋。胸中不解著閑愁。浩歌野渡驚雲起。狂舞空庭挽月留。性本自然憎截鶴。器非大受愧函牛。平生最愛巖灘路。早晚貂裘換釣舟。

小園

小園煙草接鄰家。桑柘陰陰一徑斜。臥讀陶詩未終卷。又乘微雨去鋤瓜。

又

歷盡危機歇盡狂。殘年惟有付耕桑。麥秋天氣朝朝變。蠶月人家處處忙。

又

村南村北鷓鴣聲。水刺新秧漫漫平。行遍天涯千萬里。卻從鄰父學春耕。

又

少年壯氣吞殘虜。晚覺丘樊樂事多。駉馬寶刀俱一夢。夕陽閑和飯牛歌。

步虛

微風吹碧海。細細生龍鱗。半醉騎一鶴。去謁青華君。謔來天風急。吹我過緱山。鏘然哦詩聲。清曉落人間。人間仰視空浩浩。遠孫白髮塵中老。初見姬翁禮樂新。千九百年如電掃。

又

瀛海日月淵。蓬壺仙聖宅。駕鶴一時遊。海面日夜窄。人生蜉蝣耳。一聞瓦甃中。天地廣如許。誰能發其蒙。丹書千卷藏一塵。子能求之勿從人。晴窗趺坐春滿腹。崑崙待得丹芝熟。

又

曩者過洛陽。宮闕侵雲起。今者過洛陽。蕭然但荒壘。銅駝臥深棘。使我惻愴多。可憐陌上人。亦復笑且歌。世事茫茫幾成壞。萬人看花身獨在。北邙秋風吹野蒿。古冢漸平新冢高。

又

一瓢小如醜。芳醪溢其中。醉此一市人。吾瓢故無窮。不言術神奇。要見心廣大。鱗豆有德色。笑子乃爾隘。岳陽樓

中橫笛聲。分明爲子說長生。金丹養成不自服。度盡世人朝玉京。

醉中登避俗臺

半醉行歌上古臺。脫巾散髮謝氛埃。但知禮豈爲我設。莫管客從何處來。剡曲煙波菱蔓滑。耶溪風露藕花開。老來世事渾成癩。一榼幽尋未擬回。

立秋前三日夜坐庭中偶賦

絳闕清都侍宴還。天風搖珮夜珊珊。月輪桂滿蟾初冷。星渚橋空鵲尙閑。一鶴每臨雲雨上。幾人虛老市朝間。試將綠髮窺清鏡。未愧僊姝玉鍊顏。李元稹詩云。河漢女。玉鍊顏。雲輿往往到人間。

南堂臥觀月

河漢橫斜星宿稀。臥看涼月入窗扉。恍如北戍梁州日。睡覺清霜滿鐵衣。

夜坐獨酌

玉宇沉沉夜向闌。跨空飛閣倚高寒。一壺清露來雲表。聊爲幽人洗肺肝。

夜興

鶴瘦龜飢與靜宜。更闌徙倚並清池。月當三五初盈夜。河直西南欲落時。浩浩醉歌羣鷺起。翩翩孤影角巾欹。飛仙授我青瑤簡。索賦山中夜興詩。

月夜泛小舟湖中三更乃歸

落日愁思把釣鉤。南鄰借得采菱舟。湖心月上明如畫。樹杪風生冷逼秋。壯歲功名慚汗馬。暮年心事許沙鷗。桐江一葉真奇策。莫爲兒曹作滯留。

無題

半醉凌波過月旁。水精宮殿桂花香。素娥定赴瑤池宴。侍女皆騎白鳳凰。

又

出關脩眉淡薄妝。丁東環佩立西廡。人間浪作新秋感。銀闕瓊樓夜夜涼。

自山中夜行還湖上

火雲崢嶸水車鳴。行人畏熱不敢寧。蕭然一馬兩園丁。缺月照我影伶仃。荒雞起早忽再唱。北斗低盡餘三星。扁舟菱歌正嫋嫋。糞冢鬼火何熒熒。迎人漸見鏡湖白。回首已失秦山青。道邊野店得小憩。一盃濁酒傾殘瓶。登盤絕愛畦韭美。轆釜未厭谿鱗腥。丈夫所要飽辛苦。文叔尙困蕪菴亭。

大風

今年毒熱不可支。白汗如雨愁織緯。皇天悔禍爲一洗。秋風作意來如期。聲如怒濤撼坤軸。夜半折我南齋竹。幽人屢起得奇觀。鳳尾襪襪一窗綠。

新秋

天河漸近鵲橋時。一夜風吹斗柄移。金井梧桐元未覺。畫廊蟋蟀已先知。青燈耿耿還相伴。白髮蕭蕭只自悲。猶勝玉門關外客。臥聽沙雁數歸期。

月夕睡起獨吟有懷建康參政

月上虛堂一榻橫。斷香漠漠欲三更。隔簾清露挾秋氣。繞樹驚鴉啼月明。只怪夢尋千里道。不知愁作幾重城。苦吟更恨知心少。西望金陵闕寄聲。

病瘧後偶書

秋色已蕭然。曲肱清夜眠。孤燈欺病後。薄酒慰愁邊。藥物從人乞。文章畏客傳。惟應一蓬艇。湖海送凋年。

秋日聞蟬

斷角斜陽觸處愁。長亭搔首晚悠悠。世間最是蟬堪恨。送盡行人更送秋。

感秋

南山射虎漫英雄。投老還鄉一秃翁。世味掃除和蠟盡。生涯零落併錐空。秋驚蠹葉凋殘綠。病著衰顏失舊紅。笠澤松陵家世事。一竿惟是待西風。

南軒

今年秋早涼。七月已蕭然。南軒修竹下。枕簟終日眠。時將半殘夢。聽此欲斷蟬。推枕起太息。四序忽已遷。功名隨渺莽。衰疾方沈懸。新月獨多情。窺窗猶娟娟。

夜坐

虛堂夜無寐。顧影歎玲嶷。露溼螢黏草。雲迷雁落汀。舊書開蠹簡。濁酒倒殘甌。流落知無憾。危機實飽經。

新涼書事

臥看烏篆印蒼苔。窗戶涼生亦樂哉。鳴樹亂蟬催日落。拂墀飛葉報秋來。病餘已覺身如寄。醉裏卻憐心尙孩。排日從今占幽事。折殘籬菊探溪梅。

聞蟬思南鄭

昔在南鄭時。送客褒谷口。金羈叱撥駒。玉盃蒲萄酒。醉歸涉漾水。鳴蟬在高柳。回鞭指秦中。所懼壯心負。人生豈易料。蹭蹬十年後。蟬聲恍如昔。而我已白首。逆胡亡形具。輿地淪陷久。豈無好少年。共取印如斗。

憶昔

憶昔浮江發劍南。夕陽船尾每相銜。楠陰暗處尋高寺。荔子紅時宿下巖。高寺在瀘州。下巖在雲安軍。咬口烹豬賽龍廟。沙頭伐鼓挂風帆。區區陳迹何由記。惟有征塵尙滿衫。

病中夜興

病瘡秋來久未平。草堂遙夜不勝清。疾風遞響驚林葉。列宿收芒避月明。百計不能逃白髮。一生堪笑役虛名。釣車且作桐江夢。莫念安西萬里行。

秋夜

秋氣侵帷夢不成。一燈西壁翳還明。風高露井無桐葉。雨急煙村有雁聲。擊筑誰同燕市飲。賃春方作會稽行。從來自許知何等。堪歎江湖白髮生。

謝張時可通判贈詩編

聖朝中興六十年。君家文武何聯翩。先生劍履冠麟閣。後嗣簪纓陪甘泉。流傳到君愈卓犖。投我千篇皆傑作。未

分玉帳。殺鷓鴣。且擅詩人一丘壑。爾來士氣日靡靡。文章光價俱不起。君今已似鸞鷟雲。更看他年龍驤水。  
醉莊壽之賢良見贈

先朝六科題策士。事業功名何壯偉。元祐復科才數年。所得洵三俄復也。中興思賢形夢想。感德自是朝廷美。純  
袴小兒壞人事。賜帛西歸困窮紙。諸公相親歎才難。一士臥雲誰挽起。時時過我時共語。曷置千年元不死。高談  
麤麤有脈絡。橫得虛名吾可恥。烏巾白紵塞路衢。祇柱頽波望吾子。

舟過樊江憩民家具食

旅食何妨笑蕨薇。夕陽來叩野人扉。蕭蕭短鬢秋初冷。寂寂空村歲暮饑。琴岸刺船驚雁起。煙波吹笛喚牛歸。詩  
情剩向窮途得。蹭蹬人間未必非。

舟中作

斷岸飲艤艤。清波跳吟吟。紅橋未斜日。白塔已昏鐘。詩律與年邁。客愁如酒濃。宋公題壁處。橫鶴抱孤峯。誓心寺  
有宋考功詩。而予所未到。望之慨然。

九月三日泛舟湖中作

兒童隨笑放翁狂。又向湖邊上野航。魚市人家滿斜日。菊花天氣近新霜。重重紅樹秋山晚。獵獵青帘社酒香。隣  
曲莫辭同一醉。十年客裏過重陽。予自庚寅至辛丑。始見九日于故山。

霜天晚興

薄霜門巷不勝清。小立湖邊夕照明。紅顏帶芒收晚稻。綠苞和葉摘新橙。閑評琴價留僧話。靜聽松聲領鶴行。壯  
志消磨渾欲盡。西風莫動玉關情。

九月六日小飲醒後作

短劍悲秦俠。高歌憶楚狂。酒醒愁袞袞。香冷夢侵侵。屋老垣衣茂。池深石髮長。地爐須早計。衰病怯新霜。

書悲

今日我復悲。堅臥腳踏壁。古來共一死。何至爾寂寂。秋風兩京道。上有胡馬跡。和我壯士廢。憂國清淚滴。關河入



指顧忠義勇折激。常恐埋山丘。不得委鋒鏑。立功老無期。建議賤茸職。賴有墨成池。淋漓豁胸臆。

又

丈夫孰能窮。吐氣成虹霓。釀酒東海乾。累鞠南山齊。平生塞旗手。頭白歸扶犁。誰知蓬窗裏。中有鐵馬嘶。何當受詔出。函谷封丸泥。築城天山西。開府蕭關西。萬里掃塵煙。三邊無鼓鼙。此意恐不遂。月明號荒雞。

中夜起出門。月露浩然歸。坐燈下有賦。

月白萬瓦霜。露重四山雨。開門忽驚歎。秋色已如許。去蜀如昨日。坐閱四寒暑。無才屏駟蹟。有罪宜野處。平生萬里心。收斂臥環堵。朱顏逝不留。白髮生幾縷。人言尺蠖屈。要有黃鵠舉。功名非老事。歲晚忍羈旅。

新寒

病怯新寒欲不禁。南窗擁褐夜情懣。江湖跌宕送餘日。書劍蕭條孤壯心。杜曲新愁隨斷雁。遼陽遺恨入疎砧。此懷擬向何人說。賴有昏燈伴苦吟。

幽居

松陵甫里舊家風。晚節何妨號放翁。衰極睡魔殊有力。愁多酒聖欲無功。一編蠹簡晴窗下。數捲一作捲疎籬落木中。退士所圖惟一飽。諸公好焉致年豐。

醉中步月湖上

閨餘時節早。天氣已凄冷。悠哉曳杖行。樂此清夜永。霜風蝕病骨。林月寫孤影。新詩得復忘。薄酒吹易醒。浮生役聲利。百歲常鼎鼎。清遊倘可繼。終老謝人境。

東村

塘路東頭烏柏林。偶攜藤杖得幽尋。桃源汗陌自來往。輞口雲山無古今。遠浦過帆供極目。暮天橫雁入微吟。歸來更覺愁無那。剩放燈前酒椀深。

西村

湖塘西去兩三家。杖履經行日欲斜。蹙蹙水紋生細縠。蜿蜿沙路臥修蛇。早餘蟲鏤園蔬葉。寒淺蜂爭野菊花。老

去郊。居多樂事。脫巾未用歎蒼華。

題張幾仲所藏醉道士圖

千載風流賀季真。畫圖髣髴見精神。邇來祭酒皆巫祝。眼底難逢此輩人。

又

臥聽牀頭壓酒聲。起行籬下摘新橙。一尊久欠敲門客。風味何人似麴生。

山園草間菊數枝開席地獨酌

屋東菊畦蔓草荒。瘦枝出草三尺長。碎金狼藉不堪摘。掃地爲渠持一觴。日斜大醉叫墮幘。野花村酒何曾擇。君不見詩人跌宕例如此。蒼耳林中留太白。

湖村月夕

客路風塵化素衣。閑愁冉冉鬢成絲。平生不負月明處。神女廟前聞竹枝。

又

錦城曾醉六重陽。回首秋風每斷腸。最憶銅壺門外路。滿街歌吹月如霜。

又

金尊翠杓猶能醉。狐帽貂裘不怕寒。安得驊騮三萬疋。月中鼓吹渡桑乾。

又

誰持綠酒醉幽人。鶴氅筠枝發興新。今夜湖邊有奇事。青山缺處涌冰輪。

卯酒徑醉走筆

少時憑酒剩狂顛。摘宿綠雲欲上天。才盡氣衰空自笑。一盃纔放已頽然。

山中望籬東楓樹有懷成都

五門西角紅樓下。一樹丹楓馬上看。回首舊遊如夢裏。西風吹淚倚闌干。紅樓蜀工所作。在五門西南角。

暮秋有懷王四季夷

鏡湖西畔小茅茨。紅葉黃花秋晚時。天闊素書無雁寄。夜闌清夢有燈知。功名蹭蹬初何憾。朋舊乖離未免悲。遙想扁舟五湖口。阻風中酒又成詩。

幽居

老子堪吟老轉癡。幽居喜及早寒時。芋魁加糝香出屋。菰首芡白也。顛倒朱黃思誤字。縱橫黑白戲拈棋。此懷敢向今人說。骨朽諸賢卻見知。

有懷

筇杖斜斜倚素屏。北窗遙夜冷如冰。何時得與平生友。作字觀書共一燈。

對酒

醫從和扁來。未著卻老方。吾晚乃得之。莫如麴蘖良。一盃臉生春。况復累十觴。坐令桃花紅。換盡霜葉黃。看鏡喜欲舞。追還少年狂。但恨寶釵樓。胡沙隔咸陽。芳華雖無念。萬里遙相望。寶釵樓。咸陽旗亭也。芳華樓在咸陽合江。亂感歎徑投枕。悲歡兩茫茫。

初冬

鉏犁滿野及冬耕。時聽兒童叱犢聲。逐客固宜安散地。閑民何幸樂昇平。雪花漫漫香將熟。綠葉離離薺可烹。飯飽身閑書有課。西窗來趁夕陽明。

晝寢夢一客相過若有舊者表粹可愛既覺作絕句記之

夢中何許得嘉賓。對影胡牀岸幅巾。石鼎烹茶火煨栗。主人坦率客情真。

書歎

多病文園苦滯留。時時皓歎攬貂裘。縱無夜雨何曾寐。不爲秋風也自愁。今歲頓驚絲鬢改。此生難繼錦江遊。欲談舊事無人共。日落鴉歸又倚樓。

督下麥雨中夜歸

細雨闌村墟。青煙煙廬舍。兩兩犢並行。陣陣鴉續下。紅稠水際蓼。黃落屋邊柘。力作不知勞。歸路忽已夜。犬吠闌

籬隙燈光出門罅。豈惟露沾衣。乃有泥沒膝。誰憐甫里翁。白首學耕稼。未言得一飽。此段已可畫。

霜曉肩輿行湖上

去去出柴關。巾車古陌間。晨霜染丹葉。宿霧淡青山。登覽身猶健。歌呼酒每慳。殷勤鏡湖水。聊爲照衰顏。

杜門

寂寞山深處。崢嶸歲暮時。燒灰除菜蝗。讀如橫字去聲。送羊謝牛醫。覓水晨澆藥。燈窗夜覆棋。杜門君勿怪。遲暮少新知。

橫塘

橫塘南北埭。西東拄杖飄然樂未窮。農事漸與人滿野。霜寒初重雁橫空。參差樓閣高城上。寂歷村墟細雨中。新買一蓑苔樣綠。此生端欲伴漁翁。是日。偶買蓑衣。甚妙。

書事寄長老

素屏烏几野人廬。山色蒼寒十月初。兩足四郊耕欲遍。霜高萬木脫無餘。一尊窗下澆愁酒。數卷牀頭引睡書。寄語住菴劉老宿。不應隨俗向人疎。

食菘十韻

合菜種早韭。生計似庾郎。舍西種小菓。戲學蠶叢鄉。惟濟天所賜。青青被陵岡。珍美屏鹽酪。耿介凌雪霜。采擷無翻日。烹飪有秘方。候火地爐煖。加糝沙鉢香。尙嫌雜筍蕪。而況汗膏粱。炊杭及糲麩。得此生輝光。吾儕實易足。捫腹喜欲狂。一掃萬錢食。終老稽山旁。

冬煖頗有春意追憶成都昔遊悵然有作

濯錦江邊罨畫樓。金鞭曾護犢車遊。紛紛萬事反平覆。落落一身掩此留。刻燭賦詩空入夢。傾家釀酒不供愁。探春歌吹應如昨。亦有朋儕記我不。

忽忽

忽忽復悠悠。頻驚歲月遒。若無船貯酒。將奈斛量愁。列炬燕宮夜。成都故菊時。燕王宮。今屬張氏。每蒙爲一城之

冠。呼鷹漢廟秋。南鄭漢高帝廟。予從戎時。多獵其下。凋年莫多感。夢境付滄州。

醉書山亭壁

物外陽狂五百年。扁舟又繫鏡湖邊。飛昇未抵簪花樂。遊宦何如聽雨眠。綠蟻澆尊芳醞熟。黑蛟落紙草書顛。忽拈玉笛橫吹去。說與傍人是地仙。

十月旦日至近村

鴨腳葉黃烏臼丹。草煙小店風雨寒。荒年人家雞黍迨。芋糲豆飯供時節。村童上牛踏牛鼻。吹笛聲長入雲際。今年雖飢卻少安。縣吏不來官放稅。

蔬圃絕句

擬種蕪菁已是遲。晚菘早韭恰當時。老夫要作齋盂備。乞得青秧趁雨移。

又

百錢新買綠蓑衣。不羨黃金帶十圍。枯柳坡頭風雨急。憑誰畫我荷鉏歸。

又

青青蔬甲早寒天。想像登盤已墮涎。更欲鉏畦向東去。園丁來報竹行鞭。

又

瓦壘浮屠盆作池。池邊紅蓼兩三枝。貪看忘卻還家飯。恰似兒童放學時。

又

小橋只在槿籬東。溝水穿籬曲折通。煙雨空濛最堪樂。從教打濕敗天公。

又

衝雨衝風不怕寒。晚來日出短蓑乾。邊畦拾塊真爲樂。莫作陶公運甕看。

又

嬾隨年少愛花狂。且伴羣兒鬪草忙。行遍山南山北路。歸時新月浸橫塘。

冬夜不寐至四鼓起作此詩

秦吳萬里車轍遍。重到故鄉如隔生。歲晚酒邊身老大。夜闌枕畔書縱橫。殘燈無焰穴鼠出。槁葉有聲村犬行。八十將軍能滅虜。白頭吾欲事功名。高麗有讖云。當有八十老將平之。李英公實應是讖。

蔬圃

山翁老學圃。自笑一何愚。磽瘠才三畝。勤劬賴兩奴。正方畦畫局。微潤土融酥。蕪闕荆榛盡。鉅犁磊塊無。過溝橫略狗。聚甕起浮屠。拾園中瓦礫。作小塔。隙地成瓜。授餘功及芋區。如絲細生菜。似鴨爛蒸壺。此事今真辦。東歸不爲鱸。

夢中作

拓地移屯過酒泉。第功圖像上凌煙。事權皂纛兼黃鉞。富貴金貂映玉蟬。油築毬場飛駿裏。錦裁步障貯嬋娟。擁塗士女千層看。應記新豐舊少年。

村居酒熟偶無肉食菘菜羹飲酒

歌鳳偃仰類楚狂。畏犧齷齪笑蒙莊。著書幸可俟後世。對客從嗔臥大牀。三畝青蔬了盤飭。一缸濁酒具盃觴。丈夫窮達皆常事。富貴何妨食萬羊。李文鏡嘗與吳人云平生當食萬羊。

辛丑十月諸公餽酒偶及百榼戲題長句

喜事諸公尙見存。尺書時到爵羅門。已邀風月成三友。聊對湖山倒百尊。醉墨淋漓動高壁。狂歌悲壯落前村。悠然睡起西窗黑。一點青燈又斷魂。

灌園

少攜一劍行天下。晚落空村學灌園。交舊凋零身老病。輪囷肝膽與誰論。

幽居

破屋頽垣霧雨昏。幽人終日掩柴門。因鋤衰草通南阜。偶洗叢篁見北村。短褐奇溫等狐腋。寒蔬脆美敵熊羆。冬來酒戶微增舊。萬事應須付一尊。

日出入行

吾聞開闢來。白日行長空。扶桑誰曾到。崦嵫不可窮。但見旦且升。天東。但見暮暮入地中。使我倏忽成老翁。鏡裏衰鬢成霜蓬。我願一日一百二十刻。我願一生一千二百歲。四海諸公常在座。綠酒金尊終日醉。高樓綺繡中天開。樂作畫鼓如春雷。勸爾白日無西頽。常行九十萬里胡爲哉。

午醉徑睡比覺已甲夜矣

自我歸城西。已復再見冬。雖未挂衣冠。其實別老農。好事或餉酒。石室酒最醲。一醉輒至暮。臥聞湖寺鐘。心安病自除。愈煖夢欲重。化作孤鶴去。雲唵巢長松。

簡蘇訓直判院莊器之賢良

行盡天涯白髮新。槿籬竹屋著閑身。讀書遠且失衰病。食菜終年安賤貧。正使寄聲無薛孟。不妨同里有荀陳。從今杖屨時相過。花柳村村次第春。

醉眠曲

老夫暮年少嗜好。但願無事終日眠。斜風急雨勢方橫。低窗小閣且幽妍。樽紅酒綠足。困暇橙黃蟹紫窮芳鮮。一盃一盃意忽倦。徑撥紙帳投蠻氈。鼻間鼾聲欲撼屋。手中書冊正隨前。不知校事白中書。那管門生懶與便。讀書萬卷晚乃悟。妙者此訣秘不傳。是醒是醉人草測。非夢非覺中了然。疑駁百年露電總。將舉一試臂欠煎。金丹未轉顧未暇。且向人間稱睡仙。

冬夜

歲晚風霜惡。將如迢夜何。殘燈挑更暗。寒犬吠偏多。支枕成孤賦。懷人起浩歌。梅花不解飲。誰伴詩顏酡。

又

忽忽流年恨。悠悠蜀夜情。向人燈欲語。違舍漏如傾。夢每輕千里。愁偏怯五更。殷勤桑落酒。且爲解餘醒。

夜話贈華師

少喜洛陽俠。今成衡嶽僧。深培地爐火。明照佛龕燈。囊裏晨霜白。禪心古澗澄。猶能遍參在。爲我買行藤。

臥病書懷

衰衰年光挽不留。即今已白五分頭。病中對酒猶思醉。夢裏逢人亦說愁。青海戰雲臨賊壘。黑山飛雪覆貂裘。丈夫有志終難料。憔悴漁村死即休。

病中絕句

酒錢自昔從人乞。詩思出門何處無。青鷄織蓬菅織席。此生端欲老江湖。

又

半脫貂裘雪滿鞍。慣將豪舉壓儒酸。病來意氣渾非昨。一炷香煙帳底看。

又

酒味醺人睡味濃。午時高枕到昏鐘。經旬不見西窗日。世上應無嬾似儂。

又

造物之年憫我勞。微痾得遂閉門高。黃紬被暖青氎穩。不怕郊原雪意豪。

又

青燐猶有佛燈明。點滴時聞竹露聲。欲睡不成還起坐。麗譙風順報三更。

又

少時談舌挾風雷。病後逢人口懶開。安得東臯隱君子。相看無語只銜盃。

蔬園雜詠

菘

兩送寒聲滿背蓬。如今真是荷鋤翁。可憐遇事常遲鈍。九月區區種晚菘。

燕菁

往日燕菁不到吳。如今幽圃手親鉏。憑誰爲向曹瞞道。徹底無能合種蔬。

葱



瓦盆麥飯伴隣翁。黃菌青蔬放筯空。一事尙非貧賤分。芼羹僭用大官葱。鄉園有大官葱。比常葱差小。

菓

昏昏霧雨暗衡茅。兒女隨宜治酒殺。便覺此身如在蜀。一盤籠餅是豌豆。蜀中雜處肉作巢。餛飩佳甚。唐人正謂餛飩爲籠餅。

芋

陸生晝臥腹便便。歎息何時食萬錢。莫謂蹲踞少風味。賴渠撐拄過凶年。

卯飲醉臥枕上有賦

天寒朝泥酒。熟醉臥蓬窗。雨勢平吞野。風聲倒卷江。漁蓑傲狐腋。菜把笑羊腔。常笑潮陽守。南征畏下瀧。

又

一榻臥空舍。四山風雨聲。病多書倚閣。寒極酒施行。孤憤歌彌放。端憂涕易橫。羣胡滿河洛。志士若爲情。

### 卷十四

十月二十六日夜夢行南鄭道中既覺恍然攬筆作此詩時且五鼓矣

孤雲兩角不可行。望雲九井不可渡。蟠冢之山高插天。漢水滔滔日東去。高皇試劍石爲分。草沒苔封猶故處。將壇坡陀過千載。中野疑有神物護。我時在幕府。來往無晨暮。夜宿沔陽驛。朝飯長木鋪。雪中痛飲百榼空。蹴踏山林伐狐兔。魍魎北山虎。食人不知數。孤兒寡婦讎不報。日落風生行旅懼。我聞投袂起。大噉聞百步。奮戈直前虎人立。吼裂蒼崖血如注。從騎三十皆秦人。面青氣奪空相顧。國家未發渡。遼師落魄。人間傍行路。對花把酒學醜藉。空辱諸公誦詩句。即今衰病臥在牀。振臂猶思備征戍。南人孰謂不知兵。昔者亡秦楚三戶。

兩晴步至山亭欲遂遊東村不果

村陋垣屋頽。歲晚風雨橫。泥塗絕還往。糝粥餐衰病。藥囊雜書卷。白髮滿清鏡。一榻臥兼旬。不踐牆下徑。烏鵲忽報晴。霜重節候正。厭供凍硯愁。頗動蠟屐興。山極快遠眺。松吹愜幽聽。地瘦藥苗稀。葉脫木枝勁。東村未爲遠。腳

力不濟勝。三歎入荆扉。跣跡學僧定。

喜晴

衡門病臥動經旬。歲晚況堪風雨頻。晴日一窗殊慰眼。清霜萬瓦更宜人。開書頓失昏花墜。試茗初看白乳新。南埭東陂從此好。剩將紅蕊插烏巾。

對食

人苦不知足。貪欲浩無窮。豹胎日鑿既。萍藜卻時供。飲豚以人乳。萬乘亦改容。方其未遇時。鷄犬動英雄。哀哉王相國。計隨飯後鐘。所以賢達士。一視約與豐。我亦蹭蹬者。羈遊半生中。木槩飽藜藿。笑與玉食同。口腹嗟幾何。曾是役我躬。放箸一笑粲。賦詩曉愚公。

不睡

城遠不聞鐘鼓傳。孤村風雨夜騷然。但悲綠酒欺多病。敢恨青燈笑不眠。水冷硯蟾初薄凍。火殘香鴨尙微煙。虛窗忽報東方白。且復緜緜繡佛前。

睡

紙帳青氈暖有餘。昏昏信腳到華胥。凍醪有力勤推挽。春茗無端苦破除。半熟擁衾聞急雨。乍回推枕覓殘書。箇中得意君知否。萬戶一作里生封未必如。

憶荊州舊遊

書劍萬里行翩翩。度關登隴常慨然。射麋雲夢最樂事。至今曠快思楚天。落筆千言不加點。班荆百榼命割鮮。有時憑陵呼五白。笑人辛苦作太玄。君不見將軍昔忍跨下辱。京兆晚爲人所憐。功名富貴自古只如此。不如馳射樂飲終殘年。

五雲門晚歸

高城帶遠林。落日動寒砧。行客自朝暮。青山無古今。衰遲慙逸氣。憂患足危心。溪迳帶歸艇。何時春水深。

冬暖

今年歲暮無風雪。塵土肺肝生客熱。經旬止酒臥空齋。吳蟹秦酥不容設。日憂疾疫被齊民。更畏螟蝗殲宿麥。濃  
穠薄穀不可得。太息何時見三白。老夫壯氣橫九州。坐想提兵西海頭。萬騎吹笳行雪野。玉花亂點黑貂裘。

歲暮

吳中寒氣薄。歲暮亦和風。移樹木村北。尋僧渡港東。露葵收半綠。霜稻杵微紅。一飽無餘念。吾生正不窮。

雪夜

書卷紛紛雜藥囊。擁衾時炷海南香。衰遲自笑壯心在。喜聽北風吹雪牀。

又

村路雪泥人斷行。佛燈一點絳紗明。山前栖鶻歸何晚。磔磔風傳勁翮聲。

禪室

早誇劇飲無勍敵。晚覺安禪有宿因。赫赫心光誰障礙。縣縣鼻息自輕勻。蒲龕紙帳藏身穩。香奩燈籠作夢新。勿  
爲霜寒憶溫暖。少林立雪彼何人。

炭盡地爐危坐至夜分戲作

短景窗易黑。長宵爐少紅。直令貧到骨。未害氣如虹。志士元謀道。儒生敢諱窮。霜嚴雞喔喔。但愧讀書功。

夜汲井水煮茶

病起罷觀書。袖手清夜永。四鄰悄無語。燈火正淒冷。山童亦睡熟。汲水自煎茗。鏘然鞦韆聲。百尺鳴古井。肺腑凜  
清寒。毛骨亦蘇省。歸來月滿庭。惜踏疎梅影。

雪後尋梅偶得絕句十首

雪晴蕭散曳筇枝。小塢尋梅正及時。臨水登山一年恨。十分說似要渠知。

又

青帝宮中第一妃。寶香熏徹素綃衣。定知謫墮不容久。萬斛玉塵來聘歸。榻中四更轉。輪玉塵九斛。

又

銀燭檀槽醉海棠。老來非復錦城狂。疎梅對影太清淡。爲拂焦桐彈履霜。

又

雪裏芬芳亦偶然。世人便謂占春前。飽知桃李俗到骨。何至與渠爭著鞭。

又

雙鶻飛來噪午晴。一枝梅影向窗橫。幽人宿醉閑欹枕。不待聞香已解醒。

又

竹籬曲曲水邊村。月澹霜清欲斷魂。商略前身是飛燕。玉肌無粟立黃昏。

又

相逢未易可疎親。不是登牆宋玉鄰。林下風標許誰比。直須江左謝夫人。

又

春近山中日漸長。重重雲峯閉幽香。神仙不飲塵凡酒。素面看人醉後狂。

又

蕊殿仙姝下界遊。偶來稅駕剡溪頭。君看月裏橫枝影。盡是蒼龍與翠虬。

又

清霜夜夜奈寒何。賴是知心有素蛾。枉道疎枝不禁笑。主人歡意自無多。

寄朱元晦提舉

市聚蕭條極。村墟凍餒稠。勸分無積粟。告糴未通流。民望甚飢渴。公行胡滯留。徵科得寬否。尙及麥禾秋。

村居冬日

溪轉樵風路。林藏禹會村。簷冰垂玉塔。山月涌金盆。畏客常稱疾。耽書不出門。尙嫌城市近。更擬卜雲根。

寓天慶觀有林使君年八十七方燒丹云一黍米大可化汞一斤爲黃金梅道人年八十五嘗醫

世路崎嶇久已忘。道腴禪悅度年光。故攜囑士降龍鉢。來寄高人夢蝶牀。只道燒金有劉向。不知賣藥是韓康。日

長坐覺非塵世。庭檜花開蜂蜜香。

宿天慶道院

衰病厭多事。清遊諧夙心。夜深樓突兀。歲晚柏蕭森。汲井洗靈藥。焚香橫素琴。身閑境自勝。城市亦山林。

贈林使君

使君物外闊年華。厭聽奴兵早暮衙。雙屐踏雲呼野渡。一瓢斝月醉梅花。紅爐點汞閑消日。烏几繙經不憶家。我亦岷山有歸處。約君同載泝三巴。

又

松檜陰中百步廊。我來剝啄叩琳房。魚腸寶劍餘蛟血。鴉嘴金鋤帶藜香。弱水蓬萊風浩浩。赤明龍漢劫茫茫。何妨付與神丹訣。教跨青鸞到帝鄉。

冬夜

窮巷蕭條早閉門。北窗燈火夜昏昏。老于俗事不挂眼。愁憶故人空斷魂。急雪打窗飛礫細。狂風卷野怒濤翻。土牀紙帳寒無寐。彊把村醅不厭渾。

宴坐

身寄窮山裏。心安一事無。新傳小止觀。漸解半跏趺。急雪鳴窗紙。孤燈耿地爐。老來元少睡。且復兀枯株。

夢中作

路平沙軟淨無泥。香草丰茸沒馬蹄。擣紙聲中春日晚。恍然重到浣花溪。

夜寒遣興

道人頽然寄北窗。愁魔百萬一笑降。夜闌酒渴有奇夢。吞楚七澤吳三江。孤村蕭蕭雨解雪。寒大噤臥飢鼠齧。擁衾危坐待天明。白首忍窮心似鐵。

雪後出遊戲作

小嶽平岡雪陸離。幽人又賦探春詩。典琴沽酒元非俗。著屐觀碑又一奇。大度乾坤容落托。多情風月笑衰遲。吾

生也似梅花淡。燕未歸來蝶不知。

歲暮

半生浪走跨秦吳。白首還如筮仕初。凍芋瀾醪邀里巷。昏煙溼雪暗郊墟。窮空敢恨寒無弼。憂患元因出有車。笑掩陳編聊自慰。古來富貴羨樵漁。

記夢

世事紛紛觸眼新。何由常作夢中身。遠遊萬里纔移刻。豪飲千場不忤人。鼓吹滿城壺日晚。鶯花如海洞天春。是間可老君知否。莫信人言想與因。

立春後三日作

拂面氈毳巷柳黃。穿簾細細野梅香。春回江表常年早。日向山中特地長。千古事終輸釣艇。一毫憂不到禪房。綠尊掩罷惟須睡。高枕看人舉世忙。

短景

短景迫窮冬。日月如鳥過。衡門窘風雨。衰病不可那。疎疎屋茅漏。獵獵窗紙破。鼠豪冒燈出。人倦掩屏臥。中都舊朋儕。零落今幾箇。弄筆欲遣愁。孤吟誰與和。

風雨旬日春後始晴

風吹過雁作斜行。雨洗殘梅只淡香。南浦春回波漸綠。東菴睡起日初長。詩囊屬稿漸新思。博齒爭豪悔昔狂。莫向晴窗對明鏡。朱顏減盡鬢蒼蒼。

乍晴風日已和泛舟至扶桑埭徘徊西村久之

十日風雨今日晴。衰病忽減思閑行。接籬一幅煙霧薄。舴艋八尺覺驚輕。亭亭孤塔遠天碧。曲曲深巷斜陽明。數家茅屋門晝掩。不聞人聲聞碓聲。身似龐公不入城。東阡南陌錢餘生。新年倘有豐年喜。買酒漁村看太平。

晨起南窗晴日可愛戲作一絕

蕭散山林一幅巾。天公乞與自由身。茅簷不似宮墀暖。日滿南窗也可人。

攜樽尋醉梅花下

樽饜作尊容斗許。擁腫輪囷元媚嫵。肯從放翁來住山。誰云置身不得所。山房寂寞久不飲。作意欲就梅花語。我病鮮歡花更甚。日暮淒涼泣殘雨。人生萬事雲茫茫。一醉常恐俗物妨。正須仙人冰雪膚。來伴老子鐵石腸。花前起舞花底臥。花影漸東山月墮。攜樽未竭狂未休。笑起題詩識吾過。

城西接待院後竹下作

水邊小丘因古城。上有巨竹數百箇。一徑蛇蟠不容腳。平處乃可十客坐。裊裊共看風枝舞。欬欬時聽春籟墮。古佛不粧香火冷。瘦僧如腊袈裟破。門前西去長安路。日夜舳舻銜尾過。老夫本乏臺省姿。且就清陰曲肱臥。

夜飲示坐中

胡雁叫羣寒夜長。崢嶸北斗天中央。達人太觀眇萬物。烈士壯心懷四方。縱酒長鯨渴吞海。草書瘦蔓飽經霜。付君詩卷好收拾。後五百年無此狂。

夜從父老飲酒村店作

旗亭濁酒典衣沽。蟹舍老翁折簡呼。夜中醉歸騎草驢。鬼昂不須宗武扶。丹徒布衣有箠略。漁陽突騎莫枝梧。牀頭金盡何足道。肝膽輪囷橫九區。

壬寅新春

半生常是道邊人。歲晚初收事外身。濁酒一樽聊永日。小園三畝亦新春。尙無枕寄邯鄲夢。那有衣沾京洛塵。門外煙波三百里。鏡湖三百里。此心惟與白鷗親。

幽居春夜

暮景催人雪鬢雙。十年始復反吾邦。雲逢佳月每避舍。酒壓閑愁如受降。三弄笛聲初到枕。一枝梅影正橫窗。要知清夢遊何許。不釣桐江即錦江。

讀書

放翁白首歸剡曲。寂莫衡門書滿屋。藜羹麥飯冷不嘗。要足平生五車讀。校讎心苦謹塗乙。吟諷聲悲雜歌哭。三

蒼奇字已殺青。九譯旁行方著錄。有時達旦不滅燈。急雪打窗聞簌簌。倘年七十尙一紀。墜典斷編真可續。客來不怕笑書癡。終勝牙籤新未觸。

晨起

小雨溼清曉。新鶯啼早春。年光驚病眼。節物屬閑身。巴峽東連楚。嶓山北控秦。遠遊端可繼。敢恨素衣塵。

昔在成都正月七日聖壽寺麻子市初春行樂處也偶晨興聞鄰村守麻有感  
樂事新年憶錦城。城南麻市試春行。如今老病茅簷底。臥聽兒童赫嶽雀聲。

獨孤生策字景略河中人工文善射喜擊劍一世奇士也有自峽中來者言其死于忠涪間感涕賦詩

憶昨騎驢入蜀關。旗亭邂逅一開顏。氣鍾太華中條秀。文在先秦兩漢間。寶劍憑誰占斗氣。名駒竟失養天閑。身今老病投空谷。回首東風歸自憐。

早春對酒感懷

探花疇昔喜春回。老大空驚節物催。芳叢旋開新壓酒。好枝猶把未殘梅。書生歲惡甘藜莧。志士時平死草萊。初聞獨孤策死。欲豁孤懷誰晤語。夜彈長劍有餘哀。

曉出湖邊摘野蔬

浩歌振履出茅堂。翠蔓丹芽采擷忙。且勝堆盤供首宿。未言滿斛進橫榔。行迎風露衣巾爽。淨洗殮葷匕飭香。著句誇張君勿笑。故人方厭太官羊。

游饑之餘復苦久雨感歎有作

道傍縱負去何之。積雨仍愁麥不支。爲國憂民空激烈。殺身報主已差池。屬饜糠粃猶多愧。徙倚柴荆只自悲。十載西遊無惡歲。羨他慢下足蹲鴟。予在蜀幾十年。未曾逢歲歉也。

春晴泛舟

兒童莫笑是陳人。湖海春回發興新。雷動風行驚蟹戶。前一日聞雷。天開地闢轉鴻鈞。鱗鱗江色張石黛。嫋嫋柳絲搖麴塵。欲上蘭亭卻回棹。笑談終覺愧清真。



攜一尊尋春湖上

酒裏真須勉策勳。百年何啻是中分。花梢已點猩猩血。水面初生瑟瑟紋。一世極知均腐骨。萬鍾元自付浮雲。浩歌不恨無人和。但惜鷺飛白鷺羣。

晦前二日夜欲曉自湖上歸對殘月獨酌

小閣對寒蟾。山尊盡更添。方看一輪滿。又歎兩頭纖。脈脈離雲嶠。娟娟傍畫簷。五更情露下。不恨客衣霑。

春曉有感

山杏溪桃續續開。緩歌誰與共傳盃。年來只有追歡夢。百舌無情又喚回。

夜觀秦蜀地圖

往者行省臨秦中。我亦急服叨從戎。散關塵雲俯賊壘。清渭如帶陳軍容。高旌纒鈔嚴玉帳。畫角悲壯傳霜風。咸陽不勞三日到。幽州正可一炬空。意氣已無雞鹿塞。單于合入蒲萄宮。燈前此圖忽到眼。白首流落悲塗窮。吾皇英武同世祖。諸將行策雲臺功。狐臣昧死欲自薦。君門萬里無由通。正令選壯不爲用。筆墨尙可輸微忠。何當勒銘紀北伐。更擬草奏祈東封。

久雨小飲

春來日日風雨橫。老去時時衰病攻。門外回塘初漲綠。尊前槁面慙生紅。未除瘴氣每自笑。欲吐狂言無與同。安得并刀剪簷溜。憑高萬里望晴空。

有懷獨狐景略

富貴世間元不乏。此君才大獨難成。暗鳴意氣千人廢。爛雅風流一座傾。韜略豈勞平大敵。文章亦足主齊盟。荒山野水涪州路。腸斷西風雜露聲。

春雨復寒遣懷

去日堂堂挽不回。新年又傍鬢邊來。雨聲欲作海棠祟。書卷只爲春睡媒。村舍瘦蔬供薄酒。地爐微火伴殘灰。皓然忽起金鞭興。潦水嵒山安在哉。

春遊

平生樂行役，不耐常閉戶。今朝新雨霽，一笑整巾屨。青猿導幽蹊，春草伴微步。雖云尊酒薄，蔬果亦略具。辛夷發高枝，楊柳吹墮絮。行歌不知遠，落日呼野渡。橫林已棲鴉，淺水猶立鷺。歸來意頗豪，古錦有新句。

海棠

今日春已半，風雨停出遊。餅中海棠花，數酌相獻酬。尙想錦官城，花時樂事稠。金鞭過南市，紅燭宴西樓。千林誇盛麗，一枝賞纖柔。狂吟恨未工，爛醉死即休。那知茅簷底，白髮見花愁。花亦如病姝，掩抑向客羞。尤物終動人，要非桃杏儔。東風萬里恨，浩蕩不可收。

寄仗錫平老借用其聽琴詩韻

放翁久矣無此客，闌戶兒童皆動色。寒食不食人嗔死，素硬銀瓶我心惻。千金易得一士難，晚途淹泊眼愈寒。豈知一旦乃見子，傑語豪筆無僧酸。門前清溪天作底，細細風吹穀紋起。倚欄一笑誰得知，愛子數詩如此水。江湖安得常相從，浩歌相踏臥短篷。功名渠自有人了，留我錦中雙頰紅。

五月十四日夜夢一僧持詩編過予有暴雨詩語頗壯予欣然和之聯巨軸欲書未落筆而覺追作此篇黑雲塞空萬馬屯，轉盼白雨如傾盆。狂風疾雷憾乾坤，壯哉潤壑相吐吞。老龍騰擊下天閭，鱗間火作電脚奔。巨松拔起千年根，浮槎斷梗何足論。我詩欲成醉墨翻，安得此雨洗中原。長河袞袞來崑崙，鷓鴣下看黃流渾。

新塘觀月

攜酒新塘南，中夜欲忘歸。貪看月滿湖，不覺露溼衣。天高鶴聲厲，風急螢火稀。此夕不一醉，行歎破鏡飛。漁家亦喜事，未掩水際扉。皇天有公道，處處皆清暉。

觀張提刑周鼎

他人富貴堆金壁，曼舞妖歌誇坐客。清心好古誰似公，漢庭諸人推博識。一朝得此周廟器，買不論貨空四壁。苔痕洗盡銅色見，坐臥摩挲欲忘食。蠻童捧出客爲起，恍如清廟陪劍履。腹中奇字粲龜魚，嶧山之碑那得比。知公原是功名人，看罷握手同悲辛。鐫京洛邑在何許，猿腹秋風吹虜塵。

口占送巖師還大梅護聖

放翁白髮已蕭然。黃紙新除玉局仙。寄語山頭老師叔。欲分茅舍度殘年。常禪師偈云。更移茅舍入深居。謂護聖也。

八月十四日夜湖山觀月

長空露洗玻璃碧。紫金之盤徑三尺。忽看擘地出人間。桂樹扶疎如淡墨。攬衣獨立鏡湖邊。風露萬頃秋渺然。開帆詎必入東海。騎鯨便可追飛仙。冰壺玉瀝侵骨冷。醉看孤鸞舞清影。夜闌歸舍人已眠。卻倩天風爲吹醒。

十五夜月色皎然有頃雲生遂不復見

北望但空闊。南望橫羣山。青天無騎行素月。寥寥永夜非人間。九醞漿成老仙醉。六銖衣薄天宮寒。翠眉真人不火食。小立環佩風珊珊。橫空邀我海山去。縹緲萬里驂青鸞。相攜一笑在雲表。徐看玉宇飛金盤。

夜聞秋風感懷

西風一夜號庭樹。起攬戎衣淚濺襟。殘角聲催關月墮。斷鴻影隔塞雲深。數篇零落從軍作。一寸淒涼報國心。莫倚壯圖思富貴。英豪何限死山林。

玉局歌

玉局祠官殊不惡。銜如冰清俸如鶴。酒壺釣具常自隨。五尺新蓬織青箔。倚樓看鏡待功名。半世兒癡晚方覺。何如醉裏泛桐江。長笛一聲吹月落。蔣公新冢石馬高。謝公飛旆凌秋濤。微霜莫遣侵鬢綠。從今二十四考書玉局。

醉歌

往時一醉論斗石。坐人飲水不能敵。橫戈擊劍未足豪。落筆縱橫風雨疾。雪中會獵南山下。清曉嶙峋玉千尺。道邊狐兔何曾問。馳過西村尋虎跡。貂裘半脫馬如龍。舉鞭指麾氣吐虹。不須分弓守近塞。傳檄可使腥羶空。小胡逋誅六十載。狺狺獬子勢已窮。聖朝好生貨拏戮。還爾舊穴遼天東。

閉門

寂寂雲山千萬重。閉門不忍歎塗窮。高秋酒熟雪浮瓮。中夜劍歸雷吼空。近報犬羊逃漠北。豈無貔虎定關中。君

王猶記孤忠在。安得英豪共此功。

草書歌

傾家釀酒三千石。閒愁萬斛酒不敵。今朝醉眼爛巖電。提筆四顧天地窄。忽然揮掃不自知。風雲入懷天借力。神龍戰野昏霧腥。奇鬼攜山太陰黑。此時驅盡胸中愁。搥牀大叫狂墮幘。吳棧蜀素不快人。付與高堂三丈壁。

野飲夜歸戲作

青海天山戰未鏖。即今塵暗舊戎袍。風高乍覺弓聲勁。霜冷初增酒興豪。未辦大名垂宇宙。空成慟哭向蓬蒿。灑亭老將歸常夜。無奈人間兒女曹。

夜泊水村

腰間羽箭久凋零。太息燕然未勒銘。老子猶堪絕大漠。諸君何至泣新亭。一身報國有萬死。雙鬢向人無再青。記取江湖泊船處。臥聞新雁落寒汀。

幽居

遶屋蟻蟻碧玉峯。個中天遣養疎慵。捐書已歎空虛腹。得酒還澆磊塊胸。曲几坐看窺戶月。短篷臥聽隔城鐘。柴桑自有歸來意。枉道人間不見容。

與鄰翁登山亭

數掩蘊籬圍夕照。一間茅舍背陰崖。吾生擾擾實無樂。人事悠悠那可諧。憂患向來侵綠鬢。登臨此日費青鞋。京華舊友凋零盡。野老逢迎一散懷。

無題

輕輦旣車赴密期。追歡最數牡丹時。新春欲近猶貪喜。舊愛潛移不自知。寶鏡塵生驚悵望。鈿箏絃絕雁參差。玉壺莫貯臙脂淚。從湮泥金帶上詩。

遣興

平生與俗馬牛風。落魄人間亦未窮。綠綺奏終香縷碧。烏絲書罷鬪花紅。夢中吳蜀山川近。醉後周秦戰伐空。投

老飄然君勿笑。也勝魚鳥在池籠。

夢宴客大樓上。命筆作詩既覺續成之。

表裏江山亦樂哉。華纓滿座敵鄒枚。歌從郢客樓中聽。獵向樊姬墓上回。梅蕊香清篸寶髻。熊躡味美按新醅。眼邊歷歷興亡事。欲賦章華恐過哀。

新塘夜歸

煙月茫茫十里堤。數聲漁唱埭東西。旋燒新兔傾村酒。扶得歸來醉似泥。

古風

少年慕黃老。雅志在山林。火食亦彊勉。寧有婚宦心。失脚墮世網。衰病忽侵尋。放逐適天幸。獨恨山未深。一牀元不睡。翛然橫素琴。開門毛髮冷。湖閣月欲沈。

又

賀鑑未嘗死。江天醉初醒。逸少亦度世。弭節過蘭亭。吾本淡薄人。轉徙如蓬萍。聊憑一盃綠。駐此雙鬢青。邂逅兩仙翁。笙鶴遊青冥。還家不能食。濁世紛羶腥。

又

功名如博戲。大叫或作盧。文辭組繡耳。初不擊賢愚。負恃已可笑。憎嫉真區區。平生學金丹。我豈斯人徒。嘯歌醉自和。顏鬢老不枯。卻後三百年。煙雨釣鏡湖。

累日無酒亦不肉食戲作此詩

小築精廬剝曲傍。枵然蟬腹與鷓腸。酒錢覓處無司業。齋日多來似太常。雲碓旋春菰米滑。風爐親候藥苗香。明年更入南山去。要試囊中服玉方。

讀書

讀書四更燈欲盡。胸中太華蟠千仞。仰呼青天那得聞。窮到白頭猶自信。策名委質本爲國。豈但空取黃金印。故都即今不忍說。空宮夜夜飛秋燐。土初許身輩稷契。歲晚所立慚廉龐。正看憤切詭成功。已復雍容託觀覲。雖然

知人要未易。詎可例輕天下士。君不見長松臥壑困風霜。時來屹立扶明堂。

自妙相歸將至杜浦堰舟中作

斜陽發東郭。初夜轉西城。寺閣疎鐘動。漁村遠火明。蒼茫林靄滅。撲瀉水禽驚。漸喜吾廬近。遙聞過埭聲。

秋興

樵風溪上弄扁舟。濯錦江邊憶舊遊。豪竹哀絲真昨夢。爽砧繁杵又驚秋。墜枝橘熟初堪翦。浮盞醅香恰受留。莫道身閒總無事。孤燈夜夜寫清愁。

哀北

太行天下脊。黃河出崑崙。山川形勝地。歷世多名臣。哀哉六十年。左衽淪胡塵。抱負雖奇偉。沒齒不得伸。老夫實好義。北望常酸辛。何當擁黃旗。徑涉白馬津。窮追殄犬羊。旁招出鳳麟。努力待傳檄。勿謂吳無人。

琵琶

西蜀琵琶邏妙槽。梨園舊譜鬱輪袍。繡筵銀燭燕宮夜。一飲千鍾未足豪。故蜀燕王宮。今爲張氏海棠園。

三江舟中大醉作

志欲富天下。一身常苦飢。氣可吞匈奴。束帶向小兒。天公無由問。世俗那得知。揮手散醉髮。去隱雲海涯。風息天鏡平。濤起雪山傾。輕帆入浩蕩。百怪不可名。虹竿秋月鉤。巨鰲尙可求。滅迹從今逝。回看隘九州。

短歌行

百年鼎鼎世共悲。晨鐘暮鼓無休時。碧桃紅杏易零落。翠眉玉頰多別離。涉江采菱風敗意。登樓待月雲爲祟。功名常畏謗讒興。富貴每同衰病至。人生可歎十八九。自古危機無妙手。正令插翮上青雲。不如得錢即沽酒。

悲秋

秋燈如孤螢。熠燿耿窗戶。秋雨如漏壺。點滴連早暮。我豈楚逐臣。慘愴出怨句。逢秋未免悲。直以憂國故。三軍老不戰。比屋困征賦。可使江淮間。歲歲常列戍。

步至西村

一飽無餘事。西村偶獨行。撻筇息微倦。汲井漱餘醴。川闊雁平度。谷虛雲亂生。絕知豐歲樂。笑語隔柴荆。

題接待院壁

笙歌淒咽離亭晚。回首高城半掩門。疊疊遠山橫翠靄。娟娟新月耿黃昏。未嫌雙鷓妨欹枕。自是孤舟易斷魂。遙想河橋落帆處。隔江微火認漁村。

九月晦日作

菊枝傾倒不成叢。柯葉凋零已半空。自是老來多感慨。不應蕭瑟爲秋風。

又

山路清寒近探梅。振衣高處興悠哉。飛鳴杳杳江天闊。一片愁從萬里來。

又

錦城誰與寄音塵。望斷秋江丈六鱗。正使傾家供麴蘖。定知不解醉愁人。

又

炊煙漠漠衝門寂。寒日昏昏倦鳥還。數樹丹楓映蒼檜。天工解作范寬山。

陶山遇雪覺林遷菴主見招不果往

山中大雪二尺彊。道邊虎跡如槐大。衰翁畏虎復畏寒。招喚不來公勿怪。梨花開時好風日。走馬尋公作寒食。不須沽酒引陶潛。箭筈蕨芽如蜜甜。

哭王季夷

迢遙天馬渥洼來。萬里修途忽勒回。爽氣卽今猶可想。舊遊何處不堪哀。夢中有客徵殘錦。地下無爐鑄橫財。欲酌一尊身尙病。鬣封春露溼蒼苔。

樊江晚泊

碧雲吞日天欲暮。城西搦柁城東路。蓴羹菰飯香備船。正是江頭落帆處。荻洲漁火遠更明。煙水蒼茫聞雁聲。不是綠尊能破悶。白頭客路若爲情。

蠟眉村旅舍作

小雨初收景氣和。青苔狼藉落梅多。曲肱野店睡斜日。濯足溪橋鳴細波。久厭俗情生眼白。近承天詔賜顏酡。予  
自壬寅冬兩頰復丹。騎鯨未返蓬壺去。此路猶須幾浩歌。

娥江野飲贈劉道士

春光盎盎催官柳。柳色黃如醖中酒。橋邊微徑恣幽尋。世外高人共攜手。參差茅舍出木末。隱映酒旗當浦口。插  
花處處引村童。失道時時問耕叟。客堪共醉百無一。事不諧心十常九。日斜潮落不可留。孤舟欲上頻搔首。

丈亭遇老人長眉及肩欲就之語忽已張帆吹笛而去

颯颯長眉綠覆肩。欲推壽數意茫然。若非楚國庚寅歲。定是堯時丙子年。銅笛一聲驚宿鷺。蒲帆數幅破晴煙。遙  
知乘醉江湖去。黃鶴樓頭又放顛。

寓舍聞禽聲

日暖林梢鶉鳩鳴。稻陂無處不青青。老農睡足猶慵起。支枕東窗盡意聽。

春晚

兩足人家插稻秧。鸛生鄰女采桑黃。萬花掃迹春將暮。百草吹香日正長。閒覓啼鶯穿北嶺。戲隨飛蝶過東岡。飄  
然且喜身疆健。不忝兒曹笑老狂。

題瑩師釣臺圖

竿藁老子釣魚處。開卷令人雙眼明。未可忽忽便持去。夜窗吾欲聽灘聲。

仗錫平老具舟車。迎前天衣印老印。悉遣還策杖。訪之作二絕句奉送兼簡平

又

魚鼓聲中白氎巾。南山筍蕨一番新。長安不是無卿相。林下平津獨可人。

湖邊曉行



蹇驢清曉掠湖堤。緩轡迎涼帽影低。露坼渚蓮紅漸開。兩催陂稻綠初齊。先秋葉已時時墮。失旦雞猶續續啼。不是老來忘睡美。戴星南畝慣扶犁。

久雨杜門遣懷

風雨蕭蕭臥掩關。經旬登覽負溪山。也知解送豐年喜。無奈難消永日閑。平野橫吹看凌厲。畫簷高瀉聽淙潺。城闌路斷吾何恨。濁酒枯魚亦破顏。

梅雨陂澤皆滿

雨暗迷行路。溪深沒舊痕。江汪牛渚白。盎盎酒醅渾。暖浸千畦稻。橫通十里村。羣蛙更堪笑。鼓吹鬧黃昏。

夜意

幌外燈青見鼠行。林梢月黑有梟鳴。只言中夏夜偏短。萬里夢回天未明。

又

睡覺鄰雞已再啼。蓬窗燈暗雨淒淒。東家蹇驢不用借。明日門前一尺泥。

幽事

老境俗緣減。閑居幽事多。去沙通斷澗。插援讓新荷。碁罷看山臥。釣歸播棹歌。餘年端有幾。風月且婆娑。

對酒戲作

去日奔輪不啻過。凌煙勳業已蹉跎。只言一寸丹心在。無奈千莖白髮何。色比鵝雛京口酒。聲如珠貫睢城歌。身閑取醉真當勉。莫學癡人夢蠶窠。

夏雨

清風起湖濱。急雨來天末。蚊蠅遽退聽。松竹例蘇活。奇聲集空庭。爽氣生細葛。素秋雖尙遙。聊喜寬肺渴。

軍中雜歌

三受降城無墜城。賊來殺盡始還營。漠南漠北靜如掃。清夜不聞胡馬聲。

又

秦人萬里築長城。不如壯士守北平。曉來磧中雪一丈。洗盡膾脰春草生。

又

匈奴莫復倚長戈。來款軍門早乞和。鐵騎如山尙可避。飛將軍來汝奈何。

又

名王金冠玉蹀躞。面縛纛下聲呱呱。槁街未遽要汝首。賣與酒家鉗作奴。

又

三月未春冰塞川。冬月苦寒雪闌天。紫髯將軍曉射虎。嚇殺胡兒箭似椽。

又

北面行臺號令新。繡旗豹尾渡河津。檄書纔下降書至。不用兒郎打女真。

又

漁陽兒女美如花。春風樓上學琵琶。如今便死知無恨。不屬番家屬漢家。

又

北庭茫茫秋草枯。正東萬里是皇都。征人樓上看太白。思婦城南迎紫姑。

夏夜舟中聞水鳥聲甚哀若曰姑惡感而作詩

女生穢深閨。未省窺牆滯。上車移所天。父母爲他門。妾身雖甚愚。亦知君姑尊。下牀頭雞鳴。梳髻著襦裙。堂上奉灑掃。廚中具饔飧。青青摘葵莧。恨不美熊蹯。姑色少不怡。衣袂溼淚痕。所冀妾生男。庶幾姑弄孫。此志竟蹉跎。薄命來讒言。放棄不敢怨。所悲狐大恩。古路傍陂澤。微雨鬼火昏。君聽姑惡聲。無乃譴婦魂。

暮歸舟中

五月未劇暑。暮從城市還。斷虹低飲澗。落日遠銜山。蟹舍叢蘆外。菱舟薄藕間。詩情終草草。虛遣鬢毛斑。

又

湖水綠可愛。弄橈衝夕霏。林昏漁火壯。山轉寺鐘微。老歎世情惡。窮知心事違。回頭語孤鶴。伴我莫先飛。

夏夜

夏夜忽已半。東岡月初生。起行遶庭樹。愛此露滴聲。漂流憶安臥。局促念遐征。幽懷誰晤語。華觴還自傾。

又

螢火喜暗庭。桐葉矜冷雨。幽人悄不寐。獨夜誰與處。乾坤信無情。歲月遠如許。明發視鏡中。鬢絲添幾縷。

又

庭荒蔓草長。堂豁爽氣人。悠然推枕起。聊作倚杖立。飛螢亦避雨。黏棟光熠熠。南鄰輸稅歸。小婦愁夜汲。

又

結屋在郊墟。翛然謝炎燠。窗扉故闕寂。水竹亦幽邃。飛蟲望燈集。栖燕衝雨至。石枕與葛幮。笑哉今夕睡。

北渚

北渚露濃蘋葉老。南塘雨過藕花稀。新秋漸近蟬更急。殘日已沉鴉未歸。銅鏡面顏無藥駐。玉關勦業與心違。一蓑一笠生涯在。且醉蒼苔舊釣磯。

夏日五鼓起戲書

老雞喔喔桑樹顛。明星磊磊茅屋邊。我興視夜不復眠。坐看朝曦浴虞淵。開窗清風來穆然。拂几洗研整蠹編。火雲崔嵬忽滿天。安得羲和徐著鞭。

雨夜

急雨如河瀉瓦溝。空堂臥對一燈幽。老雞多事彊知曉。落葉無情先報秋。身未蓋棺誰可料。尊常有酒莫閑愁。功名老大從來事。且復長歌起飯牛。

小立

曠懷塵事外。小立綠陰間。舉世皆嫌拙。平生剩得閒。江郊雲易暗。旱歲雨終慳。欲醉尊無酒。悠然對暮山。

徙倚

漁扉夕不掩。徙倚欲三更。月正樹無影。露濃荷有聲。崢嶸歲將晚。悄悄恨難平。坐念中原沒。男兒恐浪生。

居山

涉世緣雖薄。居山味自長。穿雲雙屐歷。洗藥一溪香。有酒作臉纈。無愁供鬢霜。遠天渺歸鶴。千載付茫茫。

卷十五

秋興

白髮蕭蕭欲滿頭。歸來三見故山秋。醉憑高閣乾坤迥。病入中年日月遒。百戰鐵衣空許國。五更畫角只生愁。明朝煙雨桐江岸。且占丹楓繫釣舟。

又

暮境何堪與病瓊。西風落葉擁亭臯。極知世上人情惡。且放江邊醉眼高。應俗紛紛何日了。詠詩混混寄吾豪。碧油金鎖平生意。未許人言學楚騷。

八月五日夜半起飲酒作草書數紙

有漏神仙有髮僧。碧欄欹枕對秋燈。忽然起索三升酒。颯颯蛟龍入剡藤。

秋雨漸涼有懷與元

八月山中夜漸長。雨聲燈影共淒涼。遙知南鄭風霜早。已有寒熊犯獵場。

又

十年前在古梁州。痛飲無時不慣愁。最憶夜分歌舞歇。臥聽秦女擘箜篌。

又

清夢初回秋夜闌。牀前耿耿一燈殘。忽聞兩掠蓬窗過。猶作當時鐵馬看。

秋風曲

秋風吹雨鳴窗紙。壯士不眠推枕起。牀頭金盡酒尊空。樞馬相看淚如洗。鴻門霸上百萬師。安西北庭九千里。帳前畫角聲入雲。隴上鐵衣光照水。橫飛渡遼健如鶻。談笑不勞投馬箠。堂堂羽檄從天下。夜半斫營屏可鄙。拾蟻

讀書定何益。投筆取封當努力。百斤長刀兩石弓。飽將兩耳聽秋風。

送宣書記并寄其兄曇才二公

在吳識曇公。至蜀識才公。彌天宣書記。晚乃得從容。是家固多賢。天遣慰我窮。初秋夏末時。衲子各西東。子獨惜此別。共語夜燭紅。怪我耐逆境。萬事一笑空。子顧知我否。視身如枯蓬。枯蓬未變滅。姑當付之風。家世無高年。我今六十翁。俯仰幾時客。結束已匆匆。那時須臾景。更受憂患攻。願言早來歸。相就衰晚菴。

起晚戲作

地偏身飽閑。秋爽睡殊美。老雞每愧渠。三唱呼未起。廚人罷晨汲。童子愁屣履。情慵雖可嘲。安靜良足喜。心空夢亦少。酣枕甘若醴。不學多事人。南柯豪衆蟻。

飲村店夜歸

致主初心陋漢唐。暮年身世落農桑。草煙牛跡西山口。又臥旗亭送夕陽。

又

澹澹村膠君勿辭。橙椒香笑白鵝肥。醉中忘卻身今老。戲逐螢光躡雨歸。

雨夜感懷

點滴空階雨送涼。青燈對影獨癡傷。身如病木驚秋早。心似鯨魚怯夜長。鑄得黃金猶有術。掃空白髮定無方。蕭然禪榻君休笑。一卷殘書枕伴傍。

寄葉道人

白首不堪憂患纏。要將樂事餞流年。尋山猶費幾兩屐。貯酒真須百斛船。若信王侯等螻蟻。可因富貴失神仙。老杜詩。王侯與蠅蟻。共盡隨丘墟。太白詩。富貴與神仙。踐踏成兩失。驚人亦莫摩銅狄。秦華松風足晝眠。

月下小酌

昨日雨邊簷。孤燈對搔首。今夜月滿庭。長歌倚衰柳。世變浩無窮。成敗翻覆手。人生最樂事。臥聽壓新酒。我歸自梁益。零落滄親友。紛紛墮鬼錄。何人得長久。後生多不識。詎肯顧衰朽。一杯無與同。敲門喚鄰叟。

讀袁公路傳

成敗相尋豈有常。英雄最忌數悲傷。蕪蕪豆粥從來事。何恨郵亭坐簞牀。

鄰曲小飲

早稻喜登場。相呼集野堂。迎霜新兔美。近社濁醪香。荏屋滴殘雨。竹籬圍夕陽。新豐不須作。真箇是吾鄉。

秋夜觀月

夢回殘燭耿房櫺。杳杳江天叫斷鴻。病骨不禁風露重。披衣小立月明中。

又

誰琢天邊白玉盤。亭亭破霧上高寒。山房無客兒貪睡。常恨清光獨自看。

枕上

香冷燈昏夢自驚。清愁冉冉帶餘醒。夜長誰作幽人伴。惟是蛩聲與月明。

秋夕大風松聲甚壯戲作短歌

人生不自憐。坐受外物械。榮華難把玩。俄頃皆變壞。山棲亦何有。耳目差曠快。秋郊多烈風。夜壑起松籟。初聞尙蕭瑟。髣髴聽嚴瀨。忽如倒巨浸。便欲飏大塊。又疑楚漢戰。傾洞更勝敗。不然六月雨。雷電奔百怪。三更勢稍斂。鐵馬歸入塞。孰能從吾遊。洗汝胸次隘。

明河篇

明河八月轉分明。炯如素練西南傾。年年歲歲見河漢。坊坊曲曲聞嗒聲。良人萬里事征行。碓聲中有玉關情。遙知鐵衣冷如水。指點明河白髮生。磧中草死駱駝鳴。萬里卻望長安城。兒生總角爺未見。歸心頓覺封侯輕。漢家自古有夷狄。付與窮荒何足惜。只願天狼無光太白低。還家爲婦說安西。

夜聞鄰家治稻

二頃春蕪廢不耕。半生名宦竟何成。歸來每羨農家樂。月下風傳打稻聲。

懷迹

浪迹人間四十年。鏡中不覺已華顛。山川慘澹秋多感。燈火青熒夜少眠。壯志已忘榆塞外。高情正在酒壚邊。扁舟不恨無人識。且復長歌入暮煙。

夜步庭下有感

夜邊中庭百匝行。秋風傳漏忽三更。星辰北拱疎還密。河漢西流縱復橫。鷺鷥遶枝棲不穩。冷螢穿竹遠猶明。書生老抱平戎志。有淚如江未敢傾。

題酒家壁

明主何曾棄不才。書生飄泊自堪哀。煙波東盡江湖遠。雲棧西從隴蜀回。宿雨送寒秋欲晚。積衰成病老初來。酒香菰脆丹楓岸。強遣樽前笑口開。

題書齋壁

隨分琴書適性情。乍寒偏愛小窗明。旋煎粟粟留僧話。故種芭蕉待雨聲。丹藥驗方非畏死。文章排悶不求名。是間幽事君知否。莫怪經秋少入城。

贈貓

裹鹽迎得小狸奴。盡護山房萬卷書。慚愧家貧策勳薄。寒無氈坐食無魚。

秋夕

羈魂虛仗些詞招。病骨那禁積毀消。亂葉打窗寒有信。昏燈照幔夢無聊。棧邊老驢心空在。囊下殘桐尾半焦。百感忽生推枕起。碧霄銀漢正迢迢。

秋雨排悶十韻

今夏久無雨。從秋卻少晴。空濛迷遠望。蕭瑟送寒聲。衣潤香偏著。書蒸蠹欲生。壤簷聞瓦墮。漲水見堤平。溝溢池魚出。天低塞雁征。螢飛明闇廡。蛙鬧雜疎更。藥醜時須焙。舟閑任自橫。未憂荒楚菊。直恐敗吳杭。夜永燈相守。愁深酒細傾。浮雲會消散。鼓笛賽西成。

小舟航湖夜歸書觸目

雲黑風號不見星。古丘叢木聚精靈。舟人已過微相語。兩兩三三鬼火青。

又

龜製半空雲黯黯。船浮積水浪憑陵。茫然不辨身何處。猶喜東南見塔燈。

又

造望湖塘炬火迎。纔歸村舍雨如傾。長途回首知安在。催喚兒童暖酒鐙。

幽居書事

莫歎人間苦不諧。清時有味是歸來。已因積毀成高臥。更借陽狂護散才。正欲清言聞客至。偶思小飲報花開。紛紛爭奪成何事。白骨生苔但可哀。

又

安命知天更不疑。幽居最愛早寒時。手中書墮初酣枕。窗下燈殘正劇碁。鮮鯽每從溪女買。香菰時就釣船炊。山陰清絕君須記。雪裏騎驢未辦詩。

晚霽

雨斷簷餘滴。雲疎日漏明。人其如積潦。天自活疲氓。溪碓春香稻。霜叢翦綠橙。書生久愁臥。作意賦新晴。

又

漲水返舊壑。浮雲歸故山。園丁藝蔬去。鄰婦賃春還。喬木蒼煙外。孤村落照間。莫嫌樽酒薄。且用破愁顏。

雨後散步後園

淡日輕雲未快晴。涓涓溝水去無聲。爲憐一徑新苔綠。別就牆陰取路行。

又

澤國霜遲木未疎。秋來更覺愛吾廬。芭蕉綠潤偏宜墨。戲就明窗學草書。

示客

十年奔走每思歸。剩喜湖邊晝掩扉。社燕免教嘲作客。海鷗曾是信忘機。暉暉晚日收新稻。漠漠新寒試夾衣。留



春盤殮君勿笑。一畦蔬甲摘初稀。

甲子晴

今日甲子晴。秋稼始可言。老農喜相覓。隨事具雞豚。掃地設菅席。酌酒老瓦盆。耳熱仰視天。何異傾金尊。牛羊散墟落。霽色滿衡門。起舞屬父老。勿恨此酒渾。

後一日復雨

一兩三日水抹隄。南村北村雲淒淒。天公約束龍返穴。不忍嘉穀沈塗泥。日光清薄潦未縮。起視又歎行雲西。初纔浙瀝灑窗戶。俄已湍瀉鳴溝溪。豐凶相乘若翻手。振救小緩輒噬臍。窮閭腐儒不預此。且收芋栗寬兒啼。

紹興庚辰余遊謝康樂石門與老洪道士痛飲賦詩既還山陰王仲信爲予作石門瀑布圖今二十有四年開圖感歎作

二十餘年別石門。燈前感舊欲消魂。人生萬事皆如夢。自笑區區記劍痕。

又

愛酒黃冠鬢如雪。石門邂逅一樽同。懸知久作此山土。愁對畫圖秋雨中。

雨中遣懷

秋稼連雲飽不疑。寧期一敗莫支持。雨如梅子初黃日。水似桃花欲動時。正晝蚊蟲驅不去。終宵鼃黽怒何爲。凶年氣象堪流涕。禾把紛紛滿竹籬。

秋思

秋來情味更堪論。身寄城南五畝園。委轡看山無鐵轡。梅聖俞馬名。拾樵煎茗有青猿。王元之小童名。陂塘夜雨添新漲。原野煙蕪減舊痕。豈是平生少親友。略無人肯訪孤村。

秋雨歎

點點滴滴雨到明。悽悽惻惻夢不成。窗間殘燈暗欲滅。匣中孤劍鏗有聲。少年讀書忽頭白。一字不試空虛名。公車自驚心實恥。新豐獨飲人所驚。太行千仞插雲立。黃流萬里從天傾。遺民久憤汗左衽。孱虜何足煩長纆。霜風

初高鷹隼擊。天河下洗煙塵清。投筆急裝須快士。令人絕憶獨孤生。獨孤策藜人。前歲死於峽中。

兩中小酌

晨起占雲日日西。吾廬煙雨正淒迷。愁看場上禾生耳。且泥盃中酒到臍。窗日幾時飛野馬。憑天惟是舞醯雞。前村著屐猶通路。自摘金橙擣餿齏。

衰病有感

衰與病相乘。山房冷欲冰。在家元是客。有髮亦如僧。愁絕窮秋雨。情親獨夜燈。西鄰有甘井。聊得曲吾肱。

又

倦枕先雞覺。寒汀伴雁孤。寂寥誰省錄。衰疾且枝梧。鶴骨秋添瘦。龜腸夜自呼。蓋棺吾事定。未敢泣窮途。

又

竊宦一周星。歸如化鶴丁。灰心成寂寂。霜鬢失青青。小智空自貴。大愚元不靈。客來應絕倒。扶病講丹經。

兩止頓寒遂有晴意

霧雨昏昏地氣騰。盤中朝暮厭驅蠅。未看霽色排陰翳。先覺清寒洗鬱蒸。喚客喜傾新熟酒。讀書貪趁欲殘燈。明朝樂事真當賀。山北山南曳瘦藤。

秋晴出遊

雨餘清冷近霜天。拄杖閑拖不挂錢。黃葉舞風初款款。碧渠通溜正錢錢。無情日馭工催老。耐事天公聽放顛。薄暮行歌並湖去。有人偷樣畫癡仙。

悲秋

形骸枯槁病侵陵。少睡長飢一老僧。霜夜羈愁更無賴。莫收書策且留燈。

又

蕭蕭衰鬢點新霜。人靜房樞易斷腸。等是閉門愁裏過。任教風雨壞重陽。

又

殘年孤寂不禁秋。醉自淒涼醒更愁。富貴空成守錢虜。吾今何止百宜休。司空表聖自言有四宜休。

又

小兩簾櫳慘淡天。醉中偏藉亂書眠。夢回有恨無人會。枕伴橙香似昔年。

久雨道懷

暮年惜日月。木落輒動心。閉居念親友。所願聞足音。風雨斷官道。吾廬兀幽深。渺渺雲水鄉。蕭蕭蘆荻林。草茂麋鳴蛙。天闊無來禽。四顧此何處。悠悠付孤斟。

野步書觸目

村落初過雨。園林殊未霜。幽花雜紅碧。野橘半青黃。飛鷺橫秋浦。啼鴉滿夕陽。最憐山腳水。撩亂入陂塘。

月下

月白庭空樹影稀。鵲棲不穩繞枝飛。老翁也學癡兒女。撲得流螢露濕衣。

九月十日

不須扇障庾公塵。散地翛然學隱淪。風帽可憐成昨夢。菊花已覺是陳人。昏昏但苦餘醒在。草草久無佳句新。歎息吾生行已矣。老來歲月似奔輪。

秋晴園中山禽絕多有感而賦

九日秋陰一日晴。山禽應喜我閑行。幽吭弄暖閑相命。勁翮凌風遠有聲。熟果啄餘看核墮。細枝銜得欲巢成。名園美蔭不飛去。似比交朋猶有情。

燈籠

我年十六遊名場。靈芝借榻棲僧廊。鐘聲纔定履聲集。弟子堂上分兩廂。燈籠一樣薄臘紙。瑩如雲母含清光。還家欲學竟未暇。歲月已似奔車忙。書生白首故習在。顛倒簡牘紛朱黃。短檠雖復作老伴。目力眩晃不可常。平生所好忽入手。摩挲把挈喜欲狂。蘭膏激灑支蓬且。秋雨蕭瑟輸新涼。討論廢忘正塗乙。遂欲盡發萬卷藏。所嗟晝病終難勉。非復當年下五行。

舟過南莊呼村老與飲示以詩

我昔過此時。荷花粲雲錦。今我復來遊。霜露已悽凜。鄉鄰福苦薄。積雨敗垂稔。禾頭耳觶觶。熟計難高枕。新懼憂吾君。歲暮詔發廩。勿言村醪薄。排悶聊共飲。

又

玄雲吞落日。大風東北起。隔林鳴兩鳩。當道行衆蟻。晴來未三日。雨候乃復爾。我場何時乾。嘉穀在泥滓。豐凶歲所有。遊情古所恥。努力教子孫。天公終可倚。

秋夜獨過小橋觀月

湖上蕭蕭葉落頻。小橋東畔岸綸巾。乍圓素月升寒壁。欲散微雲蹙細鱗。有酒便應遺世事。得閑隨處勝官身。笑談但恨朋遊少。安得幽人與卜鄰。

紹興中與陳魯山王季夷從兄仲高以重九日同遊禹廟後三十餘年自三橋泛舟歸山居秋高雨霽望

禹廟樓殿重復光景宛如當時而三人者皆下世予亦衰病無聊慨然作此詩

重樓傑閣倚虛空。紅日蒼煙正鬱葱。鄉國歸來渾似鶴。交朋零落不成龍。人生真與夢何校。我輩故應情所鍾。淚漬清詩卻回棹。不眠一夜聽鳴蛩。

雜興

風雨雞喔喔。雪霜柏森森。獨居雖無友。二物感我深。

又

萬物各有時。蟋蟀以秋鳴。我老自少眠。那得憎此聲。

又

環水入我廬。萍葉黏半扉。日出水返壑。念汝何由歸。

又

清霜染丹葉。秋晚粲如春。回首風吹盡。天公解戲人。

予秋夜觀月得瘧疾枕上賦小詩自戲

貪看霜月步亭臯。不覺寒侵范叔袍。且倚誦詩驅瘧鬼。斷無人寄碧腴膏。唐小說載鄭虔妻病瘧。杜子美教誦子璋醜體血模糊等句。以卻之。又元微之謫江陵。病瘧。白樂天自長安寄以碧腴膏。

後春愁曲分序

予在成都作春愁曲。頗爲人所傳。偶見舊藁。悵然有感。作後春愁曲。

六年成都擅豪華。黃金買斷城中花。醉狂戲作春愁曲。素屏紈扇傳千家。當時說愁如夢寐。眼底何曾有愁事。朱顏忽去白髮生。真墮愁城出無計。世間萬事元悠悠。此身長短歸山丘。閉門堅坐愈生愁。未死且復秉燭遊。

秋花歎

秋花如義士。榮悴相與同。豈比輕薄花。四散隨春風。黃菊抱殘枝。寂寞臥寒雨。拒霜更可憐。和蒂浮煙浦。古來結交意。正要共死生。讀我秋花詩。可代丹雞盟。

寄題朱元晦武夷精舍

先生結屋綠巖邊。讀易懸知屨絕編。不用采芝驚世俗。恐人謗道是神仙。

又

蟬蛻巖間果是無。世人妄想可憐渠。有方爲子換凡骨。來讀晦菴新著書。

又

身閑剩覺溪山好。心靜尤知日月長。天下蒼生未蘇息。憂公遂與世相忘。

又

齊民本自樂衡門。水旱那知不自存。聖主憂勤常旰食。煩公一一報曾孫。

又

山如嵩少三十六。水似邛郫九折途。我老正須閑處著。白雲一半肯分無。

病思

夜窗孤影怯青燈。瘦著秋衣欲不勝。光景正如寒圃蝶。情懷卻羨病寮僧。篝爐冷落燒殘葉。禮榻欹斜倚古藤。莫怪頽然遺世事。鬢絲日日鏡中增。

病愈

數夕高齋病始輕。物華凋落歲崢嶸。蟹黃旋擘鱸涎墜。酒淥初傾老眼明。提筆詩情還跌宕。倒牀藥裏尙縱橫。閑愁恰似憎人睡。又起挑燈聽雨聲。

病中忽有眉山士人史君見過欣然接之口占絕句

鶯語初聞喜復驚。依然如有故鄉情。絳羅餅餠玻璃酒。何日暮頭伴我行。眉州以羅裏餅餠。至二十四子。號羅義餠。玻璃春。郡酒名也。亦爲西州之冠。

初寒

我窮不自活。萬事付天公。今年寒苦晚。霧雨常縹緲。雖道裘褐憂。坐念疾病攻。清夜喜不寐。萬木號西風。新霜纔幾何。瘴癘一掃空。曉看烏臼林。已有數葉紅。微雲時去來。寒日猶矍矍。振衣起出戶。一笑尋鄰翁。

出塞曲

北風吹急雪。夜半埋氈廬。將軍八千騎。萬里逐單于。漠家如天巨萬邦。歡呼動地單于降。鈴聲南來金閃爍。赦書已報經沙漠。

無題

碧玉當年未破瓜。學成歌舞入侯家。如今顛倒篷窗裏。飛上青天妒落花。

道室即事

一簪殘雪寄林亭。手把黃庭兩卷經。琴調養心安澹泊。爐香挽夢上青冥。隨緣久已均憂喜。玩世惟須半醉醒。溪父園公殊未見。頽然誰與共忘形。

風興

青燈黃卷擁篝爐。殘髮垂蓬未暇梳。略似諸生勤夜課。絕勝小吏迫晨趨。雞聲喔喔寒猶力。月影離離淡欲無。幽

致滿前君不領。枉因留滯歎頭顱。

長安道

千夫登登供版築。萬手丁丁供斲木。歌樓舞榭高入雲。複幕重簾晝燒燭。中使傳宣騎飛鞚。連官候見車擊轂。豈惟炎熱可炙手。五月瞿唐誰敢觸。人生易盡朝露晞。世事無常壞陂復。士師分鹿真是夢。塞翁失馬猶爲福。君不見野老八十無完衣。歲晚北風吹破屋。

記夢

夜夢有客短褐袍。示我文章雜詩騷。措辭磊落格力高。浩如怒風駕秋濤。起伏奔蹶何其豪。勢盡東注浮千艘。李白杜甫生不遭。英氣死豈埋蓬蒿。晚唐諸人戰雖墨。眼暗頭白真徒勞。何許老將擁弓刀。遇敵可使空壁逃。肅然起敬豎髮毛。伏讀百過聲嘈嘈。惜未終卷雞已號。追寫尙足驚兒曹。

冬夜讀書

茂陵病後非平昔。瘦骨玲瓏短髮疎。紅燭悔從長夜飲。青燈喜對少年書。聖賢親見生非晚。忿慾俱空死有餘。破屋頽垣君勿笑。更闌絃誦滿吾廬。

遊仙羅縯谷選放翁詩有遊仙七言古詩一首卽飄飄初珥玉段三絕句合成者附記于此

飄飄鸞鶴香難攀。萬里東遊海上山。應有世人遙稽首。紫簫餘調落雲間。

又

鳳舞鸞歌宴藥宮。碧桃花下醉千鍾。紅塵謫滿重歸去。花未開殘宴未終。

又

玄圃春風賜宴時。雙成獨奏玉參差。侍晨飲醕虛皇喜。一段龍綰索進詩。

又

初珥金貂謁紫皇。仙班最近玉爐香。爲憐未慣叢霄冷。獨賜流霞九盞饌。

又

玉殿吹笙第一仙。花前奏罷色悽然。憶曾偷學春愁曲。謫在人間五百年。

過鄰家

今日病良已。筇枝發興新。高居遺世事。一笑過吾鄰。夕照明丹葉。秋風老白蘋。素衣雖化盡。不爲犯京塵。

山園晚興

傳盃誰與豁幽悰。霜晚黃花未滿叢。過雁一聲寒露外。短籬數掩夕陽中。易雖病裏猶能讀。詩到愁邊始欲工。惟  
有功名真已矣。嬾將華髮對青銅。

初冬出扁門歸湖上

桑柘枝空葉作堆。斜陽更著角聲催。雲歸玉笥茫茫去。水下蘭亭曲曲來。稻壠受犁寒欲遍。漁船入市晚爭回。紹  
裘破弊霜風冷。愁對青燈撥盃醅。

新寒小醉睡起日已高戲作

倦眼矇矓睡易成。華胥稅駕不多程。金重枕穩當霜夕。氈暖屏深擁宿醒。栩栩蝶魂閑自適。絲絲蠹息靜無聲。幽  
棲豈是忘微祿。正怕條鈴擾五更。

太息

閑將白髮照清溝。太息年光逝不留。勦業無期著書晚。此生與世判悠悠。

冬夜讀書

平生喜藏書。拱壁未爲寶。歸來稽山下。爛漫恣探討。六經萬世眼。守此可以老。多聞竟何用。綺語期一掃。幽居出  
戶稀。衰病擁爐早。青燈照黃卷。作意勿草草。

晚步

地爐附殘火。將夕烏雀喧。食已了無事。扶杖閑出門。披披歸雲陣。淡淡新月痕。平生足憂患。歲晚信乾坤。緩步牛  
牟巷。浩歌桑柘村。九原不可作。吾意與誰論。

村舍



空谷人稀到。新寒病頓輕。晨霜催小獵。宿雨潤新耕。草莽秦馳道。雲煙越故城。千金不磨滅。惟有暮山橫。

野步至近村

隨意出柴荆。清寒作晚晴。風吹雁北鄉。雲帶月東行。童稚爭追逐。漁樵習送迎。白頭寧復仕。惟此餒餘生。

夜坐油盡戲作

金樽畫燭少年豪。白首孤燈不厭勞。夜漏雖深書未竟。半缸誰與續殘膏。

又

欲盡殘燈更有情。可憐剪斷讀書聲。區區紙上太癡計。一笑開門看月明。

歲暮

離離井上桐。鬱鬱牆下桑。零落豈不悲。無奈中夜霜。蟋蟀更可念。歲暮依客牀。客亦自孤寂。衣篝歇殘香。一燈挂西壁。耿耿青無光。援筆欲寫愁。三喟不成章。

幽居感懷

偶傍楓林結數椽。東歸也復度流年。汀洲雁下依殘水。墟里人行破夕煙。十月風霜欺客枕。五更鼓角滿江天。散關清渭應如昨。回首功名一愴然。

山中夜歸戲作短歌

駿馬不用換美妾。名酒不用博涼州。霜天飲酒騎馬出。馳獵蹴躡川原秋。少年意薄萬戶侯。白首乃作窮山囚。箭鋒豈必盡狐兔。胸次聊欲平山丘。夜歸湖上酒初醒。莊舍蕭條燈火冷。解刀自笑太羸生。卻染松煤飛兔穎。

狂歌

少年雖狂猶有限。遇酒時能傲憂患。即今狂處不待酒。混混長歌老巖澗。拂衣即與世俗辭。掉頭不受朋友諫。挂帆直欲截煙海。策馬猶堪度雲棧。枵然癡腹肯貯愁。天遣作盜盛黎覓。髮垂不櫛性所便。衣垢忘濯心已慣。眼前故人死欲無。此生行矣風雨散。羞爲塵土伏轅駒。寧作江湖斷行雁。

遲暮

遲暮固多感。況此歲擘嶮。霜霰忽已集。夜聞絡緯鳴。青燈不解語。依依有餘情。銅瓶裏寒泉。中作笙簫聲。沈憂能傷人。一夕白髮生。蓬萊渺雲海。金丹幾時成。

種秫

種秫供留客。移花待探春。愁邊開樂國。鬧裏作閑身。鬢髮今如此。頭顱莫問人。白鷗非避俗。野性自難馴。

擁爐

睡少人人笑老生。擁爐孤坐欲三更。月移西去失花影。風自北來傳漏聲。鼎煎茶非俗物。雁燈開卷愜幽情。興來自喜猶彊健。一紙清詩取次成。

冬夜吟

昨夜凝霜皎如月。碧瓦鱗鱗凍將裂。今夜明月卻如霜。竹影橫窗更清絕。造物有意娛詩人。供與詩材次第新。飢鳴病鶴自無寐。山窮水絕誰爲鄰。西村梅花消息動。唧唧寒醅漸鳴瓮。儘將醉帽插幽香。此生莫作長安夢。

讀書罷小酌偶賦

歲晚淒涼冰雪晨。頽垣破屋鏡湖濱。浮生亦念古有死。壯氣要使胡無人。黃卷展殘三太息。綠尊酌罷一頓伸。躬耕不預差科事。猶向清時作幸民。

移花遇小兩喜甚爲賦二十字

獨坐閑無事。燒香賦小詩。可憐清夜雨。及此種花時。

書生歎

君不見城中小兒計不疎。賣漿賣餅活有餘。夜歸無事喚僮侶。醉倒往往眠街衢。又不見蠟頭男子手把鉏。丁字不識稱農夫。筋力雖勞憂患少。春秋社飲常歡娛。可憐秀才最誤計。一生衣食囊中書。聲名纔出衆毀集。中道不復能他圖。抱書餓死在空谷。人雖可罪汝亦愚。嗚呼人雖可罪汝亦愚。曼倩豈即賢侏儒。

冬夜醉解殘燈熒然起讀書至明賦詩十韻

冬夜厭久坐。頗幸一醉眠。滿酌文舉尊。徑臥子敬氈。鼻雷未及作。眼電遽瞭然。孤燈如秋螢。喚我開陳編。初欲限

一卷。隨手紛聯翩。歡然不知疲。忽已晨烏遷。嗟我行六十。衰病迫殘年。仕進今永塞。文章後誰傳。飽食而安寢。此計定自賢。勿學草玄翁。死爲人所憐。

夜行

路長憂炬盡。馬弱畏泥深。腸斷猿啼樹。魂驚鬼嘯林。艱危窮自慣。寒苦老難禁。回首金牛道。加鞭負壯心。須自小益覆南鄭。夜宿金牛驛。時方大寒。人馬俱欲僵仆。今十二年矣。

遊淳化寺

蕭寺久不到。偶來幽興長。燈穿珠九曲。蜂釀蜜千房。兩過山橫翠。霜新橘弄黃。年衰道不進。珍重一爐香。僧問拯迷。如何是祖師西來意。師曰。古殿一爐香。拯迷卽薄化也。

餘慶出遊夜歸

杖藜尋勝愜幽情。芒屨如飛病體輕。迎客野梅纔半吐。避人山雉尙徐行。東谿水落灘聲壯。南嶺雲酣雪意成。薄暮歸來僧已定。佛龕獨對一燈明。

遊前山

兀兀無歡意。閑遊未擬回。屐聲驚雉起。風信報梅開。山雪堆僧衲。溪流動蟄雷。平生一桐帽。自惜犯塵埃。

齋前獨坐戲作

閉戶學僧坐。頽然遺世情。虛窗鶴飛影。枯葉犬行聲。雪擁杉灰煖。雲垂紙帳明。情饒不可耐。一笑聽華鯨。

晚同僧至谿上

耽耽臥石熊當道。矯矯長松龍上天。不怕雪雲寒到骨。喚僧扶杖立橋邊。

僧飯

雲碓春杭白。齋廚爨桂香。百窮慚燕領。一飽慰龜腸。舉世知心少。平生爲口忙。何當棄簪笏。終老掩山房。

山店賣石榴取以薦酒

山色蒼寒雲釀雪。旗亭據榻興悠哉。麴生正欲相料理。催喚風流措措來。

平水小憩

葦食草菴中。肩輿小市東。霧收山淡碧。雲漏日微紅。酒旆村場近。罾船浦溆通。平生喜行路。小住莫匆匆。

自若耶溪舟行杭鏡湖而歸

換馬亭前煙火微。鬪牛橋畔行人稀。雲山慘澹少顏色。霜日青薄無光輝。新酒籩成桑正落。美人信斷雁空歸。高樓何處吹長笛。清淚無端又溼衣。

宴坐

鼓樂弦歌萬二千。天魔剩欲破幽禪。道人袖手心如水。一點紗燈夜悄然。

遊山歸偶賦

此生本寄一浮漚。歸臥茅茨又四秋。習氣未除惟痛飲。幻軀偶健且閑遊。買蓑山縣雲藏市。橫笛江城月滿樓。與世沈浮最安樂。莫思將相快恩讎。

六十吟

人生久矣無百年。六十七十已爲壽。嗟予忽忽蹈此境。衰髮如蓬面枯瘦。孤松摧折老爛壑。病馬淒涼依棧豆。尙無籌策活目前。豈有功名付身後。壁疎風入燈焰搖。地爐火盡寒蕭蕭。胸中白虹吐千丈。庭樹葉空衣未纈。

舒悲

嗜酒苦猖狂。畏人還齷齪。老病始悔歎。天下無此錯。管葛逝已久。千古困俗學。捫蝨論大計。使我思景略。中原失枝梧。胡塵暗河洛。天道莫遠測。士氣伏不作。煌煌東觀書。無乃太寂寞。丈夫不徒死。可作一丘貉。歲晚計愈疎。撫事猴零落。

山園晚興

病骨初輕野興濃。閑扶拄杖夕陽中。草枯陂澤涓涓水。木落園林淅淅風。楊子淒涼老天祿。馬周顛顛客新豐。壯心未與朱顏改。一笑憑高送斷鴻。

獨立

獨立柴荆外。頽然一秃翁。亂山吞落日。野水倒寒空。憂患工催老。飄零敢諱窮。漁歌亦何恨。悽斷滿西風。

探梅

半吐幽香特地奇。正如官柳弄黃時。放翁頗具尋梅眼。可愛南枝愛北枝。

又

江路雲低糝玉塵。暗香初探一枝新。平生不喜凡桃李。看了梅花睡過春。

遠興

莫言人世足悲傷。只爲詩情合斷腸。窗檻雨晴湖澹澹。郊墟煙重月茫茫。梅花調苦愁三弄。竹葉香清泥一觴。閉戶終年嗟局促。不如新雁到衡湘。

張功甫許見訪以詩堅其約

零落汀蘋露氣清。北窗昨夜已秋聲。書來屢有入東約。坐上極思虛左迎。激烈賦詩殷金石。縱橫落筆走蛟鯨。吾曹此事期千載。老眼相逢剩要驚。

### 卷十六

夜夢與數客觀畫有八幅龍湫圖特奇客請予作詩其上書數十字而覺不復能記明日乃追補之亦髣髴夢中意也

髣髴夢中意也

高堂閣畫娛嘉賓。巨幅小卷縱橫陳。其間一圖最傑作。命意落筆驚倒人。奇峯峭立插地軸。飛瀑崩瀉垂天紳。壽藤老木幻荒怪。深潭危棧愁鬼神。忽然白晝起雷電。始覺異物蟠淵淪。陰雲四興誅老魃。甘澍連夕蘇疲民。豈惟陂澤苗盡立。已活億萬介與鱗。文章與畫共一法。腕力要可回千鈞。錯鉢不到便懸隔。用意雖盡終苦辛。君看此圖凡幾筆。一一圓勁如秋草。乃知世間有絕藝。天造草昧參經綸。吾言未竟且復止。剩發幽奧天公嗔。

泛舟

女牆鬱鬱帶斜暉。短棹還從剡曲歸。木葉經霜渾欲盡。人家近水自相依。逢迎俗客言多忤。顛沛窮途計易非。雪

裏閉門殊不惡。故貂雖弊勝無衣。

夜聞大風感懷賦吳體

故都宮闕汗羶腥。原野久稽陳大刑。未須校尉戍西域。先要將軍空朔庭。意言揮戈可退日。身乃讀書方聚螢。病起窗前髮如雪。夜聞風聲孤涕零。

骨相

骨相元知薄。功名敢自期。病侵彊健日。閑過聖明時。形勝輪臺地。飛騰瀚海師。江湖雖萬里。猶擬綴聲詩。

有感

書生事業絕堪悲。橫得虛名毀亦隨。怖懼幾成牀下伏。艱難何啻劍頭炊。貧監河粟元知誤。乞尉遲錢更覺癡。已卜一菴鵝鼻谷。鵝鼻谷在秦望山。秦刻石之所。崖巖巖峻。可無芝木療朝飢。

又

讀遍名山萬卷藏。殘年肯受俗低昂。正須嘯詠風濤上。未至悲辛酒肉旁。夢裏功名誰復計。閑中日月不勝長。虛皇有詔君知否。盡賜江湖作醉鄉。

城西晚眺

嫋嫋城笳咽。熒熒漁火青。霜凋兩岸柳。水浸一天星。靜看船歸浦。遙聞雁落汀。倚闌幽興極。不敢恨飄零。

苦寒

凍硯時能出苦吟。濁醪亦復慰孤斟。誰知冰雪凝嚴候。自是乾坤愛育心。癘鬼盡驅人意樂。遺蝗一洗麥根深。但嫌景短妨書課。樓鳥紛紛又滿林。

夙興

病後精神殊未減。披衣每起待晨雞。愛書不厭如平壑。戒酒新嚴似築堤。莫歎茅茨常局促。猶勝簿領苦沈迷。迎長漸近丹當熟。已覺溫溫下徹臍。

冬夜讀書甚樂偶作短歌

衰病作書祟。常恨無新功。兔甌供茗粥。睡思一洗空。郊居近城闔。漏鼓傳瑟瑟。紺帙開爛漫。牙籤紛疊重。朱黃參筆墨。照映燈花紅。魯壁汲冢祕。天遣慰困窮。衰衣窺藻火。宗廟聽笙鏞。端居得至樂。生世豈不逢。藜藿冷未噉。短褐忘嚴冬。拜手謝造物。不須黑頭公。

冬夜月下作

造物寧能困此翁。浩歌庭下答松風。煌煌斗柄插天北。熠熠月輪生海東。皂纛黃旗都護府。峨冠長劍大明宮。功名晚遂從來事。白首江湖未歎窮。

感懷

今皇神武是周宣。誰賦南征北伐篇。四海一家天歷數。兩河百郡宋山川。諸公尙守和親策。志士虛捐少壯年。京洛雪消春又動。永昌陵上草芊芊。

蓬戶

蓬戶真堪設爵羅。歲時野老自相過。人情靜處看方見。詩句窮來得最多。枕上長歌時激烈。樽前一笑且婆娑。白頭萬事都經過。莫爲悲傷損太和。

行後園

霜風吹枯桑。落葉乾有聲。陂池日已涸。沙水見底清。人生非金石。歲暮難爲情。安得天邊鶴。駕之以遐征。

曉出遇獵徒有作

出門萬瓦粲晨霜。忽憶行軍起裹創。賣劍買牛身已老。搴旗斬將夢猶狂。奇才古有潛屠肆。豪氣今誰寓獵場。狐兔草間何足問。合留長箭射天狼。

贈道侶

崎嶇世路久知難。準擬丹成王鍊顏。十載尋人遍巖穴。一樽隨處對溪山。蘇門畫寂聞舒嘯。函谷秋清候度關。剩欲相招同此事。疑君未辦一生閑。

六言

功名正恐不免。富貴酷非所須。鐵馬未平遠碣。釣船且醉江湖。

又

噉飯一簞不盡。結廬環堵猶寬。常得奉祠玉局。不須草詔金鑾。

又

烏有翁邊黃酒。無何鄉裏尋花。把定東風一笑。今年別是生涯。

又

壯歲京華羈旅。暮年湖海清狂。勿倚新知可樂。笑中自刃如霜。

作雪未成自湖中歸寒甚飲酒作短歌

黑雲垂到地。飛霰如細礫。我從湖上歸。散髮醉吹笛。少年志功名。目視無堅敵。慘淡古戰場。往往身所歷。寧知事大謬。白首猶寂寂。淒涼武侯表。零落陳琳檄。報主知何時。誓死空憤激。天高白日遠。有淚無處滴。

題傳神

鹽車心愧渥洼姿。邂逅風雲安自期。鬢雪豈無歸漢日。飯牛猶有相齊時。君看短褐琴橫膝。誰許蛾冠劍拄頤。白髮蕭蕭雖億矣。時來或將渡遼師。李英公平遼東時已八十餘。

閏月三夜舍西觀新月

平生絕愛初三月。況是平池浸玉鈞。老去人間朋舊少。一樽誰與話清愁。

獨夜

城上長更續短更。江平天迴雁方征。燈明紙帳雪霜色。火熱銅瓶風雨聲。濁酒未傾心已怯。細書時讀眼猶明。蕭然一室平生慣。蠹下何須擁萬兵。

晚出偏門

一段新愁帶宿醒。半欹烏帽策驢行。村墟香動梅初破。裘褐寒輕雪未成。渡口人爭紅日晚。沙邊雁帶碧煙橫。悠然又覓長堤路。腸斷城樓畫角聲。



蕙政蜀人謂其實爲蕙米唐安所出尤奇

初遊唐安飯蕙米。坎成不減雕胡美。大如芡實白如玉。滑欲流匙香滿屋。腹腴項鬣不入盤。況復殮酪誇甘酸。東歸思之未易得。每以問人人不識。嗚呼奇材從古棄。草菅君試求之籬落間。

答鄭虞任檢法見贈

臥龍山前秋雨晴。鄭子過我如夙昔。照人眉宇寒巉巖。懸知筆有千鈞力。鏡湖歲暮霜葉空。乃聞載酒同諸公。歸來湖山皆動色。新詩一紙吹清風。文章要須到屈宋。萬仞青霄下鸞鳳。區區圓美非絕倫。彈丸之評方誤人。

舟中曉賦

小艇下滄浪。吳歌特地長。斜分半船月。滿載一篷霜。香甌炊菰白。醇醪點蟹黃。宦遊元爲口。莫恨老江鄉。

野興

玉門關外何妨死。飯顆山頭不怕窮。春瓮已成花欲動。了無一事著胸中。

又

狡臂將軍老未衰。氣吞十萬羽林兒。南山射虎自堪樂。何用封侯高帝時。

月夜有感

炯炯水輪升。澹澹玉宇碧。高樓傾美酒。一醉不容失。陸生獨何事。閉戶飽岑寂。年來負風月。豈止此一夕。平生酒邊身。欲老每自惜。夜闌耿不寐。浩歌出金石。

落魄

落魄東吳莫笑儂。今年要不負春風。閑愁擲向乾坤外。永日移來歌吹中。酒浪欲爭湖水綠。花光卻妒舞衫紅。公卿憂責如山重。肯信人間有放翁。

遣興

壯年一箭落雙鷗。野餉如今擷藥苗。寒與梅花同不睡。悶尋鸚鵡說無僂。烏絲闌上詩初就。綠綺聲中酒半消。老去可憐風味在。未應山海混漁樵。

湖村野興

十里疎鐘到野堂。五更殘月伴清霜。已知無奈姮娥冷。瘦損梅花更斷腸。

又

山色空濛雨點微。醉中不覺濕蓑衣。何妨乞與丹青本。一棹橫衝翠鷺歸。

看鏡

局促人間百不如。每看清鏡歎頭顱。醉來風月心雖在。老去軒裳夢已無。棋劫正忙停晚餉。詩聯未穩晝寒爐。乘除尙喜身彊健。六十登山不用扶。

塞上

塞上今年有事宜。將軍承詔出全師。精金錯落八尺馬。刺繡鮮明五丈旗。上谷飛狐傳號令。蕭關積石列城隍。不應幕府無班固。早晚燕然刻頌詩。

舟過會稽山下因繫舟遊近村迨暮乃歸

六十齒髮衰。歲月如逝波。秦王酒瓮邊。知復幾經過。欣然捨畫楫。仄步捫青蘿。一徑入幽谷。四面聞樵歌。白雲忽破碎。翠木相蕩摩。激激春塘滿。柳陰戲雙鵝。浮生百憂中。此樂願豈多。日暮吾其歸。已恐爛斧柯。

人日偶遊民家小園有山茶方開

人日西郊路。晨光射淺灘。停橈喜蕭散。照影歎衰殘。社酒香浮瓮。春蔬綠滿盤。山茶雖慰眼。不似海雲看。成都海雲寺山茶花。一樹千苞。特爲繁麗。

過杜浦橋

橋外波如鴨頭綠。杯中酒作鵝兒黃。山茶花下醉初醒。卻過西村看夕陽。

又

橋北雨餘春水生。橋南日落暮山橫。問君對酒胡不樂。聽取菱歌煙外聲。

上元日畫臥

積雨連上元。孤愁臥空館。宿醒殊未解。欲起意復嬾。牀敷蠻氍毹。被擁吳綾暖。殘香碧縷細。軟火紅焰短。雖云少睡眠。聊喜屢展轉。昏昏忽已暮。一笑呼茗椀。

莊器之作招隱閣項平父諸人賦詩予亦繼作

諸公共賦反招隱。細字斜行肯見傳。語到淮南小山作。人如江左永和年。一窗蘿月禁春瘦。萬壑松風撼晝眠。我亦尙嫌林谷淺。因君更擬斲雲煙。

春夜讀書感懷

荒林鼻獨嘯。野水鵝羣鳴。我坐蓬窗下。答以讀書聲。悲哉白髮翁。世事已匏更。一身不自恤。憂國涕縱橫。永懷天寶末。李郭出治兵。河北雖未下。要是復兩京。三千同德士。百萬羽林營。歲周一甲子。不見胡塵清。賊酋竇孱王。賊將非人英。如何天此時。坐待姦雄生。我死骨即朽。青史亦無名。此詩尙不作。丹心尙誰明。

宿能仁寺

小爾暗江城。倦客寄僧榻。孤燈如秋螢。清夜自開闔。遙憐萍青青。厭聽窺閣閣。窗明竟無寐。卯酒倒殘榼。

寄題方伯善遠菴

方侯胸中負經濟。議論源流有根柢。借令不用老山林。尙欲著書垂萬世。百年苦短萬世長。榮利一時真聚斲。渠曹定自別肺肝。今夕不爲明且計。

雨中宿石帆山下民家

老覺山行倦。閑便水宿幽。雨泥看放鴨。煙草聽呼牛。檠箸煩頻勸。窗扉喜小留。餘年竟何事。高枕送悠悠。

中夜雨鬢月色入戶起飲酒一杯作絕句

吹盡浮雲天宇清。城頭疊鼓報三更。平生無此一杯酒。玉筍峯頭看月生。玉筍峯在石帆之南。

贈石帆老人

地僻林深客到稀。高春未起閉柴扉。新松鬱鬱三千本。密竹蕭蕭一尺圍。溪叟旋分菰米滑。山童新采蕨芽肥。因君更作長閑想。麟閣雲臺竟是非。

溪上醉吟

行行不知溪路深。但怪素月生遙岑。不辭醉袖拂花絮。與子更醉青蘿陰。

四山

垣屋參差綠樹邊。四山光景饒華顛。平川極目思秦地。大澤浮空憶楚天。刺虎射麋俱已矣。舉杯開劍忽悽然。此生終遣英雄笑。棘沒銅駝六十年。

小園

松菊僅三畝。作園真彊名。馴禽驚不去。熟果墜無聲。倦就盤陀坐。閑拈柳栗行。茅亭亦疎豁。憑檻看春耕。

鄉人或病予。詩多道蜀中。邀樂之盛適。春日遊鏡湖。共請賦山陰。風物遂卽杯。酒間作四絕句。卻當持以誇西州故人也。

嫩日輕雲淡拖天。撲燈過後賣花前。便從水閣杭湖去。捲起朱簾上畫船。

又

舫子窗扉面面開。金壺桃杏間尊罍。東風忽送笙歌近。一片樓臺泛水來。

又

湖波綠似鴨頭深。一日春晴直萬金。好事誰家鬪歌舞。方舟齊榜出花陰。

又

花光柳色滿牆頭。病酒今朝嬾出遊。卻就水亭開小宴。繡簾銀燭看歸舟。

病中

風雨暗江天。幽窗起復眠。忍窮安晚境。留病歷災年。客助修琴料。僧分買藥錢。餘生均逆旅。未死且陶然。

病起

開歲忽六十。病餘閑炷香。春光向客淡。夜漏爲愁長。已老雞豚社。永違鸚鵡行。蒼龍西角月。孤夢墮微茫。

小築

小築茅茨鏡水濱。天教靜處著閑身。平原不復賦豪士。甫里但思歌散人。翠壁微泉時的皦。衡門疊嶂曉嶙峋。子虛謾辱諸公賞。萬里輕鷗豈易馴。

記夢

東吳春暮寒猶重。睡笑不聞城角動。身雖衰情怕出門。江山尙入幽窗夢。夢到青羊看修竹。道人告我丹將熟。試求一黍換肝腸。他日重來駕黃鶴。青羊宮在成都南門外浣花道中。

久雨排悶

一春略無十日晴。兩腳纔斷雲已生。奇葩摧敗等青莧。嘉穀漂蕩隨浮萍。書生病臥苔及榻。煙薪燎衣熏欲盲。腰頑足痺空歎息。咫尺不得行中庭。讀書窗黑不見字。彈琴絃緩那成聲。老盆濁酒且復醉。兩部鼓吹方施行。

雨中泊舟蕭山縣驛

端居無策散閑愁。聊作人間汗漫遊。晚笛隨風來倦枕。春湖帶雨送孤舟。店家菰飯香初熟。市擔蓴絲滑欲流。自笑勞生成底事。黃塵陌上雪蒙頭。

夜漏欲盡行度浮橋至錢清驛待舟

潮生抹沙岸。雲薄漏月明。江頭曉色動。鴉起人未行。扶攜度長橋。仰視天宇清。遙憐繫舟人。聽我高屐聲。水檻得小憩。一笑拄杖橫。澄漪弄孤影。微風吹宿醒。憊然方寸間。不受塵事撓。寄語市朝人。此樂未易名。

江頭十日雨

江頭十日雨。兩止春已盡。殘紅如掃空。草木皆綠潤。村墟櫻筍鬧。節物團圓近。可憐笠澤翁。百憂集雙鬢。賦詩空自清。學道了不進。林間一甌茶。晤語君勿吝。

柯橋客亭

小市初晴已過春。朱櫻青杏一番新。灞陵老子無人識。暫借郵亭整角巾。

又

梅子生仁燕護雛。遶簷新葉綠扶疎。朝來酒興不可耐。買得釣船雙鰕魚。

小兩舟過梅市

故故催詩靄雨蓬。悠悠破夢隔雲鐘。遙看漁火兩三點。已過暮山千萬峯。老矣自應埋病骨。歸哉莫念抗塵容。停橈小住青楓岸。吳市高人黨可逢。

曉枕

曉枕鶯聲帶夢聽。忽看淡日滿窗櫺。閑愁誰遣濃如酒。醉過殘春不解醒。

菓菜并序

蜀蔬有兩巢。大巢。豌豆之不實者。小巢。生稻畦中。東坡所賦元修菜是也。吳中絕多。名漂搖草。一名野蠶豆。但人不知取食耳。予小舟過梅市得之。始以作羹。風味宛如在醴泉蟆頭時也。

冷落無人佐客庖。庾郎三九困譏嘲。此行忽似蟆津路。自候風爐煮小巢。

吳娘曲

鏡奩蠶出千黑蟻。釵梁梅小雙青豆。吳娘十四未知愁。羅衣已覺傷春瘦。閑尋女伴過西家。鬪草歸來日未斜。睡睫濛濛嬌欲閉。隔簾微雨壓楊花。

感舊

醉眼常輕兒女曹。西遊對客尙能豪。縷金羯鼓龜茲樂。鏤玉琵琶邏娑槽。巫峽已回行雨夢。錦江空憶浣花遨。閑情何計都除盡。爲覓并州快剪刀。

晨起閑步

飛紅掠地送春忙。嫩綠成陰帶露香。聽徹曉天鶯百轉。卻隨飛蝶度橫塘。

初夏同桑甥世昌過鄰家

空谷舊生姪。蕭條只自嗟。妻饑嗔護筍。兒病失澆花。赤米老能飽。濁醪貧可賒。徵科幸差簡。扶杖過鄰家。

寓歎

孤生拙料事。諸老誤知人。世故幾翻覆。此身常賤貧。有書藏禹穴。無地靜胡塵。衰病今年劇。呻吟欲過旬。

春夏兩場調適頗有豐歲之望喜而有作

二十年無赤白囊。人間何地不耕桑。陂塘處處分秧遍。村落家家煮鬪忙。野老逢年知飽煖。書生隨例得猖狂。兩餘天氣初清潤。曳屣長歌出草堂。

聞虜酋遁歸漠北

幽州遺民款塞來。來者扶老攜其孩。共言單于遠逃遁。一夕荆棘生燕臺。天威在上賊膽破。捧頭鼠竄吁可哀。妄期舊穴得孳育。不知天網方恢恢。老上龍庭豈不遠。漢兵一炬成飛灰。陛下中興天所命。築壇授鉞皆雄才。煌煌九霄揭日月。浩浩萬里行風雷。虢山多獸可遊獵。汝不請命何歸哉。

初夏遊凌氏小園

水滿池塘葉滿枝。曲廊危榭愜幽期。風和海燕分泥處。日永吳蠶上簇時。閑理阮咸尋舊譜。細傾白墮賦新詩。從來夏淺勝春日。兒女紛紛豈得知。庾信詩云。夏淺卻勝春。鏡湖遊人至立夏而止。

偶得北虜金泉酒小酌

草草盃盤莫笑貧。朱櫻半酪也嘗新。燈前耳熱顛狂甚。虜酒誰言不醉人。高適詩云。胡兒十歲能騎馬。虜酒千盃不醉人。

又

逆胡萬里跨燕秦。志士悲歌淚滿巾。未履胡腸涉胡血。一樽先醉范陽春。

無題

珠鞵玉指擊箏篴。誰記山南秉燭遊。結綺詩成江令醉。麤泉夢斷沈郎愁。天涯落日孤鴻沒。鏡裏流年兩鬢秋。不用更求驅豆術。人生離合判悠悠。

戲贈

簾幕陰陰晝漏遲。鵝黃雪白絡新絲。只應笑殺東鄰女。不見鞦韆到拆時。

題少陵畫像

長安落葉紛可掃。九陌北風吹馬倒。杜公四十不成名。袖裏空餘三賦草。車聲馬聲喧客枕。三百青銅市樓飲。杯殘肉冷正悲辛。仗內鬪雞催賜錦。

閑居書事

園林綠葉一番新。桃李吹成陌上塵。玩易焚香消永日。聽琴煮茗送殘春。隱居正欲求吾志。大患元因有此身。堪笑癡人營富貴。百年贏得冢前麟。

登臺遇雨避於山亭晚霽乃歸

溽暑不堪蝸舍陋。瘦藤扶我上危臺。搏禽俊鷲橫空去。卷雨狂風掠野來。壯觀深知化工妙。幽尋卻躡夕陽回。悠然有喜君知否。屐齒留痕遍綠苔。

村居書綱目

雨霽郊原刈麥忙。風清門巷曬絲香。人饒笑語豐年樂。吏省徵科化日長。枝上花空閑蝶翅。林間甚美滑鶯吭。飽知遊宦無多味。莫恨爲農老故鄉。

訪醫

衰與病相乘。況復積憂慮。眩昏坐輒暝。疲弱行欲仆。今晨訪之醫。見語疾當去。脉來如泉源。未易測君數。盛衰當自察。信醫固多誤。養氣勿動心。生死良細故。

夏夜讀書自嘲

事業無成去日遒。只今身世付滄洲。風煙慘慘菰蒲老。星斗離離河漢流。寂寞書生學奇字。窮愁客子著春秋。白頭自苦君無笑。骨朽成塵志未休。

夏日小宴

橫吹銅笛蒼龍聲。雙奏玉笙丹鳳鳴。已判百年終醉死。要將一笑歷愁生。旋移畫舫破山影。高捲朱簾延月明。試問炎歊在何許。夜闌翻怯葛衣輕。

送紫雲女道士四明謝君



一別南充十四年。時時清夢到金泉。山陰道上秋風早。卻見神仙小自然。果州金泉山。謝自然飛昇之地。

道骨仙風凜不羣。清秋采藥到江村。自言家住雲南北。知是遺塵幾世孫。

又  
醉中夜自村市歸

村市夜騎黃犢還。卻登小閣倚闌干。銀河斜界曉天碧。璧月下入秋江寒。吾輩身閑且飲酒。人生事定須闔棺。元自胸中著雲夢。莫驚綠鬢耐悲歡。

城北夜

端居厭孤寂。偶繫北城舟。天地淒涼色。江湖汗漫遊。螢光矜暗夜。蟲語報新秋。老去功名意。青燈映布裯。

秋夜舟中作

沽酒黃葉村。炊飯紅蓼岸。居人不執何。正作漁父看。漁父我所羨。尙恐不得作。讀書端自癡。遊宦亦何樂。四顧澤茫茫。仰視天離離。長歌入雲去。月落斗未欹。

日晚散步湖上遇小雨

暮色蒼蒼日初落。寒聲策策風正作。湖邊倚杖隄上行。病起聊試遊山腳。平生出門輕萬里。老去謝客專一壺。風濤傾洞蛟鱗橫。閭闔崔嵬鬼神惡。春蕪二頃吐黃犢。老學爲農元不錯。兜整蟬冕俱掃空。兩笠香新織青綺。

安期篇

我昔遊岷峨。捫蘿千仞峯。丈人倚赤藤。恐是安期翁。贈我一丸藥。五雲出瓢中。服之未轉刻。瑩然冰雪容。素手掬山鶴。綠髮吹天風。丈人願我喜。共騎一蒼龍。蓬萊亦何求。愛此萬里空。卻來過齊州。螿垤看青嵩。

曉望海山

暮山青尙淺。曉山如黛染。開窗望海山。天清霧方斂。向來六月中。黑雲齊如截。蒼龍下曳尾。卷雨灑炎熱。造物信老手。忽作萬里秋。刻削此孤峭。巖然消客愁。豈無一布帆。寄我浩蕩意。會當駕長風。清肅遺世事。

山園草木四絕句

紫薇

鐘鼓樓前官樣花。誰令流落到天涯。少年妄想今除盡。但愛清梅浸晚霞。

黃蜀葵

開時閑淡斂時愁。蘭菊應容預勝流。剩欲持杯相領略。一庭風露不禁秋。

拒霜

滿庭黃葉舞西風。天地方收肅殺功。何事獨蒙青女力。牆頭催放數苞紅。

蓼花

十年詩酒客刀州。每爲名花秉燭遊。老作漁翁猶喜事。數枝紅蓼醉清秋。

賽神曲

叢祠千歲臨江渚。拜祝今年那可數。須晴得晴雨得雨。人意所向神輒許。嘉禾九穗持上府。廟前女巫遞歌舞。鳴歌謳坎坎鼓。香煙成雲神降語。大餅如槃牲腩肥。再拜獻精神不違。晚來人醉相扶歸。蟬聲滿廟鎖斜暉。

夜中起讀書戲作

髮已凋零齒已疎。忍飢白首臥蝸廬。風聲忽轆蓬窗過。夜半呼燈起讀書。

又

滅虜區區計本疎。水邊喬木擁茅廬。九原定發韓公笑。至老依然一束書。

秋夜出門觀月

六十衰翁適得閑。一秋無事掩柴關。雁來慘淡沙場外。月出蒼茫雲海間。飲酒已衰猶愛客。著書初畢可藏山。此生終羨漁家樂。小艇常衝夕霧還。

雨中買酒鏡湖酒樓

陰風號大澤。暮雨上高樓。愁憶新豐酒。寒思季子裘。登臨天地迥。老病歲時遒。安得急裝去。北平防盛秋。

聞虜政衰亂掃蕩有期喜成口號

正朔今年被百蠻。遙知喜色動天顏。風雷傳號臨春水。春水。虜都名。貔虎移軍過玉關。博士已成封禪草。單于將就。會朝班。孤臣老抱周南恨。壯觀空存夢想間。

又

遺虜遊魂豈足憂。漢家方運幄中籌。天開地闢逢千載。雷動風行遍九州。刁斗令嚴青海夜。旌旗色照鐵關秋。功名自是英豪事。不用君王萬戶侯。

甲辰中秋無月十七夜獨噉然達旦

老覺人間無一欣。窮閭掃軌謝紛紛。已憑白露洗明月。更遣清風收亂雲。棲鵲揀枝寒未穩。斷鴻呼伴遠猶聞。病羸慵踏梧桐影。倚柱長吟夜向分。

悲秋

病後支離不自持。湖邊蕭瑟早寒時。已驚白髮禡唐老。又起清秋宋玉悲。枕上數聲新到雁。燈前一局欲殘棋。丈夫幾許襟懷事。天地無情似不知。

農家秋晚戲詠

鞭地如鏡築我場。破礮玉粒輸官倉。九月野空天欲霜。甌中初喜新粳香。舍邊蕭蕭落葉多。野蠶出繭飛黃蛾。寒蔬種罷醉且歌。隻雞短紙賽園婆。

病中作

老鶴遼天興未窮。此身光景自匆匆。家爲逆旅相逢處。身在嚴裝欲發中。經眼尚于書有味。孤愁殊覺酒無功。揮戈草檄今誰記。歲晚江邊白髮翁。

秋夜讀書

讀書喜夜長。著書悲齒暮。平生企前哲。凜有庸人懼。吾廬大澤中。地曠北風怒。徂年凋草木。寒氣逼霜露。燈昏老眼闌。鈍馬行惡路。投枕卷未終。吾衰歎非故。

病起

頽垣破屋暗藜蒿。病起不知秋已高。晨倚山楹羣木脫。暮臨苔砌百蟲號。力殫編簡初何得。屢折塵埃只漫勞。賴有濁醪生耳熱。狂歌醉草寄吾豪。

晨起

孤夢忽自驚。小窗初送明。珍禽語庭樹。可愛不知名。向者事宦遊。塵土過半生。傳呼束帶出。整整尙殘更。山居雖自由。晨起亦有程。洗硯拂書几。一笑愜幽情。

秋夜

老病龍鍾不入城。濁醪蠹飯餓餘生。未霜村舍秋先冷。無月江天夜自明。出塞雖慙平賊手。下帷聊喜讀書生。山童睡熟青燈暗。自撥殘爐候藥釐。

雨中過東村

小雨空濛物象奇。偶扶藤杖過東陂。墊巾風度人爭看。蠟屐年光我自悲。窮鬼有靈揮不去。死魔多力到無期。歸來笑向磨門說。且了浮生一首詩。

山寺

寺門歷石危欲崩。槎牙老松挂蒼藤。風傳上方出定磬。雨暗古殿長明燈。宿林野鶻驚復起。爭栗山童呼不應。谿南聞道更幽絕。明日裂布縫行縵。

天王廣教院在叢山東麓。予年二十餘時與老僧惠迪遊。略無十日不到也。淳熙甲辰秋。觀潮海上。偶繫舟其門。曳杖再遊。恍如隔世矣。

遊山如讀書。深淺皆可樂。道邊小精舍。亦自一丘壑。淒涼四十年。始復重著腳。老僧逝已久。講座塵漠漠。當時童子輩。衰鬢亦蕭索。掃壁觀舊題。歲月真電雹。文章卑不傳。衣食窘如昨。出門意惘然。遶海渺孤鶴。

江月歌

放翁平生一釣船。秋水未落江渺然。露洗玉宇清無煙。月輪徐行萬里天。人間聲利何足捐。浩歌看月冷不眠。孤鶴掠水來翩翩。似欲駕我從此仙。我寓紅塵今幾年。俛首糧鎖常自憐。樂哉揮手過月邊。西風未凋玉井蓮。

初寒書懷

嵩雲緜月本閑人。誤落塵中白髮新。萬事看山差入眼。百年把酒獨關身。棧邊老馬行安往。牀下寒龜息自勻。藜杖一枝猶好在。未妨閑探早梅春。

歲暮

小築幽栖與拙宜。讀書寫字伴兒嬉。已無歎老嗟卑意。卻喜分冬守歲時。羹臠芳鮮新弋雁。衣襦輕暖自繅絲。農家歲暮真堪樂。說向公卿未必知。

晨興

倦枕厭寒夜。起尋殘火溫。喑喑衆雞動。耿耿一燈昏。野氣增霜力。窗光淡月痕。早朝非老事。且復灌吾園。

村飲

少年喜任俠。見酒氣已吞。一飲但計日。斗斛何足論。綠草滿雉場。紅旗植毬門。三叫落烏幘。倒瀉黃金盆。銀爐爇獸炭。狐兔紛紛燿。浩歌撼空雲。壯志排帝閭。回首今幾時。去日如車奔。朱顏辭曉鏡。白髮老孤村。鄰翁勸黍酒。稚子供魚飧。功名信已平。萬事付乾坤。

夜半讀書罷出門徙倚久之歸賦長句

浩歌曳杖出柴扉。不管三更露溼衣。擬看林梢殘月上。偶逢浦口斷雲歸。鷺鷥脫網寒相倚。飢鶻思巢夜亦飛。卻掩北窗誰晤語。聊憑香盃洗塵鞿。

曝書偶見舊稿有感

日滿晴軒理蠹魚。壯遊回首一欷歔。淒涼王粲從軍作。零落相如諫獵書。歌吹恍思登北固。弓刀誰記渡南沮。虎頭本欠功名相。歸老林間計未疎。

崑崙行

陰雲解駁朝暎紅。黃河直與崑崙通。不寫鸞鳳驂虬龍。徑躡香煙上空中。吾行忽過日月宮。下視積氣青濛濛。寒暑不分晝夜同。崦嵫九關常烈風。凜然蕭森變冲融。不慄不眩身如空。塵沙浩劫環無窮。詎須更覓安期翁。

一室

九萬笑鵬搏幽居一室寬。雨聲便早睡。酒力壓新寒。懶覺閑多味。衰知死有端。此生吾自斷。不必夢邯鄲。

得所親廣州書

音信連年恨不聞。書來細讀卻消魂。人稀野店山麴語。路僻蠻村荔子繁。毒草自搖春寂寂。瘴雲不動晝昏昏。此生相見應無日。且置青愁近一樽。

幽居戲詠

清泉遶屋竹連牆。回首微官意已忘。小瓮帶泥收洛筍。洛中冬筍貯以小瓮爲遺餉。細鱗穿柳買河魴。黃旗萬里無侯骨。紅燭千鍾有酒腸。欲起九原誰可友。蘭亭修禊晉諸王。

幽事

蕭然四壁野人家。幽事還堪對客誇。快日明窗閑試墨。寒泉古鼎自煎茶。桐凋無復吟風葉。蔬老猶殘泣露花。萬里封侯真已矣。只將高枕作生涯。

卷十七

初冬雜題

勩業文章意已闌。暮年不足是看山。江南寺寺樓堪倚。安得身如杜牧閒。

又

莫嫌風雨作新寒。一樹青楓已半丹。身在苑寬圖畫裏。小樓西角剩憑闌。

又

風橫雲低雨腳斜。一枝柔艸暮吟啞。昏昏醉臥知何處。推起船篷忽到家。

又

五斗安能解醉醒。瞢騰睡眼怯窗明。策勩賴有春芽在。臥聽山童轉磴聲。

又  
荒郊寒雨晚淒淒。四壁穿頽旋補泥。物我元須各安穩。自苦牛屋織雞棲。

又  
風雨聲豪入夢中。不知身世寄孤蓬。狐裘氎帽如龍馬。天漢西南小益東。

閉戶

屏居無一事。閉戶常經旬。勿云草舍陋。愛此油窗新。三日不作詩。幽禽語撩人。尺素雜行草。往檄江梅春。

十月四日夜記夢

四客聯轡來。我醉久不知。倒衣出迎客。媿謝前致辭。客意極踈豁。大笑軒鬚眉。禮豈爲我設。度外以相期。袞袞吐雄辯。泠泠誦新詩。共言攜酒壺。掃地臨前墀。意氣相顛喜。忽如少年時。老雞不解事。喚覺空嗟咨。涉世四十年。賢雋常追隨。爾來風俗壞。動脚隨險巖。森然義府刀。誰爲叔度陂。起作四客篇。捕影吾其疑。

西路口山店

日薄霜清十月天。馬蹄聲裏送流年。店當古路三叉處。山似孤雲兩角邊。孤雲兩角在篋中。掩泊自悲窮不醒。衰殘更著病相纏。榆關瀚海知何在。目送飛鴻入暮煙。

題海首座俠客像

趙魏胡塵千丈黃。遺民膏血飽豺狼。功名不遣斯人了。無奈和戎白面郎。

送綽姪住菴吳興山中

一盃淡粥不烹蔬。僻居山。粥飯外。菜亦不食。自占雲根結草廬。非佛非心猶坐斷。定知不看夾山書。

又

湖海相從十日留。頗哀老子鬢驚秋。目光猶射車牛背。不用殷勤舉話頭。

冬夜與傅菴主說川食戲作

唐安薏米白如玉。漢嘉楫脯美勝肉。大菓初生蠶正浴。小菓漸老麥米熟。龍鶴作羹香出釜。木魚鱸菹子盈腹。未

論索斲與鑽飯。最愛紅糟并魚粥。東來坐闕七寒暑。未嘗舉箸忘吾蜀。何時一飽與子同。更煎土茗浮甘菊。

仗錫平老自都城回見訪索怡雲堂詩

東華軟屨飛撲帽。黃金絡馬人看好。渠儂胸中誰得知。畏禍憂譏鬢先老。舉世輪與平元衡。青山白雲過一生。出門曳杖便千里。白雲不約常同行。敲門剝啄雲沒履。劇談未竟還東去。到山分我一片雲。併遺春風吹好句。

野飲

青山千載老英雄。濁酒三盃失阨窮。訪古頽垣荒塹裏。覓交屠狗賣漿中。平堤漸放春無綠。細浪遙翻夕照紅。已把殘年付天地。騎牛吹笛伴村童。

樊江觀梅

莫笑山翁老據鞍。探梅今夕到江干。半灘流水浸殘月。一夜清霜催曉寒。倚醉更教重秉燭。怕寒元自怯憑欄。誰知攜客芳華日。曾費纏頭錦百端。成都合江園芳華樓下梅最盛。

山亭觀梅

與梅歲歲有幽期。忘却如今兩鬢絲。乘淡月時和雪看。斲蒼苔地帶花移。先春瘦損應多恨。靜夜香來更一奇。醉倒欄邊君勿笑。明朝紅萼綴空枝。

射的山觀梅

射的山前雨墊巾。籬邊初見一枝新。照容盡洗驕春意。倚竹真成絕代人。餐玉元知非火食。化衣應笑走京塵。即今畫史無名手。試把清詩當寫真。

又

凌厲冰霜節愈堅。人間乃有此癯仙。坐收國士無雙價。獨立東皇太一前。此去幽尋應盡日。向來別恨動經年。花中竟是誰流輩。欲許芳蘭恐未然。

別梅

竹籬數掩傍魚磯。萬點梅花掠地飛。正喜巡簷來索笑。已悲臨水送將歸。影橫月處愁空絕。子滿枝時事更非。自



古情鍾在吾輩。每前莫怪濕沾衣。

憶梅

護酒常愁滿樹開。況無一片在蒼苔。眼高嬾爲凡花醉。腸斷驚聞暮角哀。寫向素綃時拂拭。移來幽圃自栽培。論心竟是明年事。輸與醪醑在酒盃。

新晴午枕初起信筆

閉戶日陶然。晴窗春已妍。華胥夢中國。龍漢劫初年。浩浩塵揚海。茫茫杵倚天。何妨駕孤鶴。小憩華山前。

乙巳早春

故故啼鶯傍曲廊。飛飛戲蝶度橫塘。病來對酒心雖怯。老去逢花眼尙狂。牀擁琴書供枕籍。簾通風月索平章。一丘一壑從來事。起就功名未苦忙。

小雨

細細溼春光。霏霏破夕陽。臥聞驚倦枕。起看入虛堂。映葉鶯猶囀。爭泥燕正忙。閑愁無遣處。誰與共飛觴。

南樓遇大風雨

歎息誰如造物雄。故將意氣壓衰翁。千羣鐵馬雲屯野。百尺金蛇電掣空。身羨漁蓑鳴急雨。心憐鴉陣困狂風。世間變態誰能測。歸路斜陽十里紅。

春晚至山中因訪陳道人

一春衰病集殘骸。太息流塵覆酒盃。僧鉢始知葷菜老。佛瓶初見杏花開。蘋溪小雨成幽討。松院斜陽又獨來。不爲愛閑從野叟。年來萬事學低摧。

小隱

小隱在江干。茆廬亦易安。庖廚供白小。籬落蔓黃團。蹭蹬馮唐老。飄零范叔寒。世情從迫隘。醉眼覺天寬。

春興

萬事不關身。悠然一幅巾。雖非愛酒伴。猶是別花人。杜詩走覓南隣愛酒伴。白樂天紫微花詩。不別花人不與看。

領略琴書意。掃空車馬塵。東阡與南陌。隨處夢殘春。

會仲躬見過適遇予出留小詩而去次韻二首

地僻元無俗客來。蓬門只欲爲君開。山橫翠黛供詩本。麥卷黃雲足酒材。

又

數樹山花草舍東。想公繫馬落殘紅。那知老子耶溪上。正泛朝南暮北風。

睡起

風約飛花滿曲廊。蕭然無客共焚香。瓮醅力重初投枕。鼻鼾聲豪已撼牀。栩栩夢遊心自適。昏昏起坐日方長。靜憑一几吾何恨。笑殺穿簾燕子忙。

病起

山村病起帽圍寬。春盡江南尙薄寒。志士淒涼閑處老。名花零落雨中看。斷香漠漠便支枕。芳草離離倚闌。收拾吟牋停酒椀。年來觸事動憂端。

山居戲題

海山縹渺斲雲局。掃地焚香悅性靈。嫩白半甌嘗日鑊。硬黃一卷學蘭亭。衰顏冉冉臨清鏡。華髮蕭蕭倚素屏。尊酒不空身見在。莫爭天上少微星。

又

病起清羸不自持。年光都上鬢邊絲。昏昏雨細梅黃後。漫漫秧青水滿時。曲几方牀娛永日。矮冠高屐駭羣兒。客來莫笑狂顛甚。此處那容世俗知。

芒種後經旬無日不雨偶得長句

芒種初過雨及時。紗廚睡起角中欹。凝雲不散常遮塔。野水無聲自入池。綠樹晚涼鳩語鬧。晝梁晝寂燕歸遲。閑身自喜渾無事。衣覆熏籠獨誦詩。

久雨喜晴十韻

一雨二十日。頽牆屋茆爛。扶杖出門行。四顧水瀾漫。村迥鳩爭菜。村昏雞失旦。荒庭蛙黽豪。空廡螢火亂。蠹魚敗書編。萍草黏戶半。清風忽東來。一剪兩腳斷。天青日杲杲。河白星燦燦。車轍尋舊途。船步出新岸。稍喜泥潦乾。破甑得炊爨。賤貧固多憂。長歌寄吾歎。

盆池

人生何處不見遠。一世元知孰是非。汲井埋盆擊苔破。敲針作釣得魚歸。蕭蕭菰葉風聲細。嫋嫋蘋花雨點稀。並舍老翁能喜事。爲添拳石象苔磯。盆池初成。隣人吳氏老送小石置池上。

月中過蜻蜓浦

天光水色合爲一。舟出西城猶落日。一規忽見寒壁升。萬頃坐歎溶銀溢。哀哀姑惡訴何苦。熠燿螢火光自失。葦低時見小艇過。水響遙知大魚出。銅壺玉酒我徑醉。短髮垂肩蓬不樹。緩篙翊月勿遽行。坐待湘妃鼓瑤瑟。

大峯頂里看採楊梅連日留山中

綠陰翳翳連山市。丹實纍纍照路隅。未愛滿盤堆火齊。先驚探領得驪珠。斜簪寶髻看遊舫。細織筠籠入上都。醉裏自矜豪氣在。欲乘風露摘千株。

雨中自項里夜至新塘捨舟步歸

樺炬如椽點不明。還家涼水與階平。一盃濁酒頽然睡。恍似金牛夜下程。

天如漆黑泥沒踝。老健猶能蹶蹕歸。鼻鼻爐香支枕看。終年只合掩柴扉。

夜聽竹間雨聲

解醒不用酒。聽雨神自清。治疾不用藥。聽雨體自輕。我居萬竹間。蕭瑟送此聲。焚香倚蒲團。袖手坐三更。人苦不自覺。忿怒投隙生。起敲簷間雨。更與此君盟。

泛三江海浦

鼉鼓三山碧海秋。龍驤萬斛放翁遊。少舒我輩胸中氣。一掃羣兒分外愁。醉斬長鯨倚天劍。笑凌駭浪濟川舟。悠悠

然高詠平生事。齷齪寧能老故丘。

獨酌有懷南鄒

憶從嶠冢涉南沮。茄鼓聲酣醉膽麤。投筆書生古來有。從軍樂事世間無。秋風逐虎花叱撥。夜雪射熊金僕姑。白首功名元未晚。笑人四十歎頭顱。

秋日泛鏡中憩千秋觀

病起重來理釣絲。扁舟迨及素秋時。舊交猶有青山在。幽趣唯應白鳥知。冉冉年光行老矣。茫茫世路欲何之。秦皇酒榼苔封遍。虛負霜螯左手持。湖山之間有石。號秦皇酒榼。

秋夕虹橋舟中偶賦

解纜初離小市門。放篙衝破一谿雲。露螢合散自成陣。水鳥飛鳴如覓羣。楓落荷疎秋漸老。河傾斗轉夜將分。書生老負功名志。醉裏長歌強一欣。

秋思

一徑苔侵四壁空。北窗支枕聽秋鐘。故人去後登樓怯。白髮多來覽鏡慵。狂憶射麋窮楚澤。閑思釣雪泛吳松。相如病渴年來劇。釀酒傾家長不供。

自嘲

窮途久矣歎吾衰。雙鬢新添幾縷絲。身是在家狂道士。心如退院病禪師。極知勾漏求丹藥。不及衡陽賣滸籬。習氣若爲除未盡。小軒風月又成詩。

豐年行

秋風蕭蕭秋日薄。築場穫稻方竭作。志士雖懷晚歲悲。農家自足豐年樂。撥醅白酒喚鄰曲。啄黍黃雞初束縛。長魚出網健欲飛。新兔臥盤肥可臞。躬耕辛苦四十年。一飽豈非天所酢。書生識字亦聊爾。莫作揚雄老投閣。

秋夜泊舟亭山下

逢水逢山到處留。可憐身世寄孤舟。一汀蘋露漁村晚。十里荷花野店秋。羽檄未聞傳塞外。金椎先報擊衙頭。聞

虜會行轡爲壯士所攻。幾不免。虜語謂會所在爲衝頭。煌煌太白高千丈。那得功名取次休。

初秋山中作

萬里西風吹幅巾。卽今真個是閑人。堆盤菱熟燕脂角。藉藻鱸新淡墨鱗。姥嶺蹇驢尋雪徑。娥江孤艇繫煙津。飄然樂事真當勉。遠付十年無此身。

秋夜讀書有感

久病畏長夏。枕簟如炮焚。扶持賴藥物。俛仰秋已分。清夜炷爐香。鼻裊起孤雲。靈府豁蒙滯。舊學資鉅耘。言念總角初。操瓢極艱勤。諸老頗賞識。謂可與斯文。沉痾幸鍼石。輪囷勞斧斤。可憐四十年。薄陋負所聞。白首猶著書。逝將獻吾君。太官薦玉食。野人徒笑芹。

晚涼登山亭

庭空葉飛秋。村迴鳩喚雨。新涼入巾褐。老子顛欲舞。憑高望稽山。秀色溢天宇。一鏡三百里。水落分別浦。淒涼弔禹穴。秦漢未爲古。世俗誰與歸。吾其老農圃。

夜步

市人莫笑雪蒙頭。北陌南阡信脚遊。風遞鐘聲雲外寺。水搖燈影酒家樓。鶴歸遼海逾千歲。楓落吳江又一秋。卻掩船扉耿無寐。半窗落月照清愁。

感秋

秋堂露氣清。蕭爽入毛骨。葛稠耿無寐。坐待山月沒。溼螢飛不起。熠熠依衰草。勁風西北號。落葉紛可埽。老生惜歲月。烈士志功名。登臨送將去。非復兒女情。懸知青海邊。殺氣橫千里。夏時不可失。胡行速如鬼。時聞虜會自香草。旋入秋山。蓋遠遁矣。

病中作

一病二十日。直愁難自還。殘書不成讀。長夜只供閑。風舞迎霜葉。雲昏欲雨山。臨窗忽自笑。詩思又相關。

送獻講主赴李明府姜山之招

貫花籤帙壓車轆。惟子窮探到本源。聽法鬼神環麈尾。質疑英俊集龍門。孤舟此日輕爲別。尺素何時遠見存。坐想文殊對摩詰。高談無礙九河翻。

雨中排悶

點點滴滴雨不晴。暗暗淡淡燈不明。皇天胡爲貸此老。病臥垂困今已平。卻慙向者力量淺。鼠肝蟲臂猶關情。百年終歸朝露速。一死正自秋毫輕。明朝且作山中行。青鞋已覺白雲生。豐年處處村酒好。莫教湘湖蕞菜老。附欄在蕭山縣。蕞菜絕奇。

秋夜歌

書生白首無處著。病臥空齋夜蕭索。茶鐺颺颺候湯熟。燈檠耿耿看燼落。山童喚起已復倒。顧影自笑如孤鶴。人言富貴隨駭機。一生窮愁正不惡。架上故裘破見肘。牀頭殘酒傾到腳。問君何以塞霜風。悠然臥聽山城角。

病起鏡中見白髮此去七十無十寒暑矣偶得長句

短鬢蕭條失故青。人間真似宿郵亭。正令寬作十年夢。安用更留三日醒。覆瓿書成空自苦。擊轅歌罷遣誰聽。客來苦覓衰翁處。睡起悠然倚素屏。

初寒宜坐

微火如螢度篆盤。明窗坐敗幾蒲團。羣兒誰信老懷嬾。萬事不禁醒眼看。道在簞瓢端自足。心閑天地本來寬。此生自斷君知否。不辦歸裝也掛冠。

溪行

霜落水初澄。星繁月未升。近村聞夜犬。隔浦見秋燈。多病乃如許。微寒已不勝。平生鄰曲意。移棹避漁翁。

又

疎鐘度莽蒼。遠火耿微茫。歲暮水歸壑。夜寒天貫霜。人生一蟲臂。世路幾羊腸。老大忘繩檢。狂歌盡意長。

讀書

遠遶江湖上。端居風雨中。紙新窗正白。爐煖火通紅。籤帙方重整。聲形且細窮。扶衰倘未死。更破十年功。

自嘲用前韻

殘年過六十。寂寞臥山中。病眼驚新暗。衰顏失舊紅。人譏作詩瘦。自憫著書窮。輸與封侯骨。雲臺競策功。

病中久廢遊覽。悵然有感

裘馬清狂徧兩川。十年身是地行仙。歸來訪舊半爲鬼。已矣此生休問天。不恨孟觴無藉主。但悲山水曠周旋。垂虹風月休如昨。安得青錢買釣船。

新釀熟小飲

玉船繳繳酌鵝黃。菊欲殘時抵死香。似與幽人爲醉地。清笳聲裏一天霜。

又

籬菊猶堪采落英。一尊玉盞釀初成。今宵要向中庭飲。不展華茵展月明。

題徐淵子環碧亭。亭有茶山曾先生詩

茶山丈人厭蠶諱。幅巾每訪博士家。小亭談笑不知暮。往往城上聞吹笳。興來傑作粲珠璧。歲久妙墨亡龍蛇。郎君弟子多白髮。回頭日月如奔車。徐卿赤城古仙子。十年四海推才華。覽觀諒迹喜不寐。旋補罅漏支傾斜。曲池還浸古來月。叢莽忽見當時花。重題舊句照高棟。力振風雅排煙哇。席間紵袍已散鶴。堂上講鼓初停撾。速宜力置竹葉酒。不用更淪桃花茶。桃花茶見曾公詩。

雜興

鰻井初生一縷雲。鮑郎山下雨昏昏。鱗聲嘔軋秋空曉。水際人家尙閉門。

又

孤夢初回揭短篷。橋邊曉日已曛曛。太平氣象君知否。盡在豐年笑語中。

又

古寺高樓暮倚闌。野雲不散白漫漫。好山遮盡君無恨。且作滄溟萬里看。

大豐

大雪山南見未曾。今年方始是嚴凝。巧穿簾罅如相覓。重壓林梢欲不勝。氈帳擲盧忘夜睡。金羈立馬怯晨興。此生自笑功名晚。空想黃河徹底冰。

遣興

書生不自憐。老眼付皇天。已飽三升稷。寧堆百屋錢。紅塵忙過日。青嶂醉論年。名字元虛幻。從人謗是仙。

委轡

委轡去悠悠。山窮得渡頭。白雲生碧嶽。翠木擁朱樓。野榼淵明酒。征塵季子裘。自憐詩興在。杜若滿芳洲。

雪中作

竹折松僵鳥雀愁。閉門我亦擁貂裘。已忘作賦遊梁苑。但憶銜枚入蔡州。屬國餐氈真強項。翰林煑茗自風流。明朝日暖君須記。更看青鸞玉半溝。

夢筆驛

朱扉水際亭。白塔道邊寺。扁舟幾往返。每過輒獻秋。經秋病不死。歲暮復口至。少年自喧譁。此老獨顛顛。可憐釣鰲客。終返屠羊肆。吾身行亦無。榮辱安所寄。短燈照孤愁。寒衾推殘醉。明當臨大江。一灑壯士淚。

舟中感懷三絕句呈太傅相公兼簡岳大用郎中

浪中鞚鞞雨聲寒。孤夢初回燭半殘。甲子一周胡未滅。關山還帶淚痕看。

又

兩打孤篷酒漸消。昏燈與我共無聊。功名本是無憑事。不及寒江日兩潮。

又

夢筆亭邊擁鼻吟。壯圖蹭蹬老侵尋。不眠數盡雞三唱。自笑當年起舞心。

西興泊舟

衰髮不勝白。寸心殊未降。避風留水市。岸幘倚船窗。日上金鏐海。潮來雪捲江。登臨數奇觀。未易敵吾邦。

錢清夜渡



輕舟夜絕江。天闊星磊磊。地勢下東南。壯哉水所匯。月出半天赤。轉盼離巨海。清暉流玉宇。草木盡光彩。男子志功名。徒死不容悔。坐思黃河上。橫戈被重鎧。晚途雖益困。此志願常在。一日天勝人。醜虜安足醜。

夜歸

晡時振柁離西興。錢清夜渡見月升。浮橋沽酒市嘈囂。江口過埭牛凌兢。寒釐衰窳坐茆店。小鮮供饌尋魚罾。偶逢估客問姓字。歡笑便足爲交朋。須臾一飽各散去。帆席健快如超騰。雲間戍樓鼓坎坎。山尾佛塔燈層層。夜分到家趨篝火。穉子驚起頭鬚聾。道途辛苦未暇說。一尊且復驅嚴凝。

江北莊取米到作飯香甚有感

我昔從戎清渭側。散關崢嶸下臨賊。鐵衣上馬蹴堅冰。有時三日不火食。山蕎畬粟離沙磧。黑黍黃宗如土色。飛霜掠面寒壓指。一寸赤心惟報國。即今歸臥稽山下。眼昏臂弱衰境邊。新秬炊飯香出甑。風殭爛飲何曾識。我豈農家志飽暖。閉戶惟思事耕織。征遠詔下倘可期。盾鼻猶堪試殘墨。

感興

築室真須待伯夷。起墳仍合近要離。藥來賊境靈何用。米出胡奴死不炊。下石紛紛驚俗薄。絕絃寂寂嘆吾衰。一尊且作尋春計。又見東風浩蕩時。

新春

濛濛煙雨暗江干。新歲還勝故歲寒。酒壓濁清鳴社瓮。菜分紅綠簇春盤。良辰節物元如昨。病客情懷自鮮歡。卻羨村鄰機上女。隔籬相喚祭蠶官。

新年

寄迹人間夢已長。新年脫帽始微霜。坐中使氣如秦俠。陌上行歌類楚狂。掃榻欲招貧與語。杜門聊以醉爲鄉。稽山剡曲雖堪樂。終憶祁連古戰場。

遊鏡湖

禹祠柳未黃。剡曲水已白。魴鱖來洋洋。鳧雁去拍拍。皇天亦大度。能容此狂客。挂席乘長風。未覺湖海迤。讀書五

十年自笑安所獲。昔人精微意。豈獨在簡冊。驤空萬馬羣。裘非一狐腋。超然登玉筍。及此煙月夕。玉筍峯在會稽山南。

初春晚晴

雪盡冰消斂積威。參差碧瓦帶斜暉。土膏漸釋人東作。天氣初和雁北歸。小閣金船嘗臘酒。華堂銀燭製春衣。關心雖有尋梅夢。冷蕊幽香事已非。自占歲多風雪。屢屢觀梅之集。

偶讀山谷老境五十六翁之句作六十二翁吟

三百里湖水接天。六十二翁身刺船。飯足便休慵念祿。丹成不服怕登仙。胸中浩浩了無物。世上紛紛徒可憐。但有青錢沽白酒。猶堪醉倒落梅前。

自開歲略無三日晴戲作長句

新年暗暝覺春慳。變化相乘一瞬間。雨脚稍收初見日。風花忽起又遮山。風欲作則大霧充塞。謂之風花。欲行幽園。還成阻。未脫重裘自笑屢。桃李會開君勿恨。清尊且用破衰顏。

置酒梅花下作短歌

歲月不貸人。綠髮成華顛。此生幾兩屐。念之每悽然。我本塵外客。已絕區中緣。惟當及未死。勤醉梅花前。瘦影寫微月。疎枝橫夕煙。偃蹇巖壑間。欲與松忘年。豈亦薄世俗。忽逐天風翩。吾詩不徒歌。持配湘娥弦。

梅花已過聞東村一樹盛開特往尋之慨然有感

春晚城南十里陂。亭亭獨立見奇姿。品流不落松竹後。懷抱惟應風月知。旋拂亂雲成小佇。重攜芳榼卜幽期。佳人空谷從來事。莫恨桃花笑背時。

思蜀

老子饑堪笑。珍盤憶少城。流匙抄蔗飯。加糝啜菜羹。枵笑傾筠籠。茶香出土鐺。西郊有舊隱。何日返柴荆。

書憤

早歲那知世事艱。中原北望氣如山。樓船夜雪瓜洲渡。鐵馬秋風大散關。塞上長城空自許。鏡中衰鬢已先斑。出

師一表真名世。千載誰堪伯仲間。

南窗學黃柑獨酌有感

放翁潦倒鬢成絲。也把花前酒一卮。何限人間堪恨事。黃柑丹荔不同時。

久雨驟晴山園桃李爛熳獨海棠未甚開戲作

兩鬢風和日漸長。小園尊酒答年光。直令桃李能言語。何似多情睡海棠。

臨安春雨初霽

世味年來薄似紗。誰令騎馬客京華。小樓一夜聽春雨。深巷明朝賣杏花。矮紙斜行閑作草。晴窗細乳戲分茶。素衣莫起風塵嘆。猶及清明可到家。

延和殿退朝口號

兩餘未肯放朝曦。穿仗恭承聖主恩。清蹕傳聲徐御殿。立庭中頃之。奏姓名。上乃自東廂出御座。紫衣引拜許龍門。徘徊漫結壽階戀。零落難招楚澤魂。歸去猶堪誇里巷。桐江新賜兩朱轎。

又

十年短檝樂滄波。強著朝衫棄釣蓑。才薄何堪試禹珥。恩深猶許對延和。空牆煙柳遙迎馬。輦路春恨欲踐韉。莫恨此身衰病去。同時朝士久無多。

簡楊庭秀

袞袞過白日。悠悠長自欺。未成千古事。易滿百年期。黃卷閑多味。紅塵老不宜。相逢又輕別。此恨定誰知。

飲張功父園戲題扇上

寒食清明數日中。西園春事又匆匆。梅花自避新桃李。不爲高樓一笛風。

夜泛西湖示桑甥世昌

嗟我客上都。忽已見暮春。騎馬出關門。眯眼吹紅塵。西湖商賈區。山僧多市人。誰令汚泉石。只合加冠巾。黃冠更可憎。狀與屠沽鄰。餉酒肉氣。吾輩何由親。少須一闋散。境寂鷗自馴。舉手邀素月。移舟采青蘋。鐘從南山來。殷

殷浮煙津。鶴髮隱者歟。長樂收釣繯。畏冷不竟夕。恨此老病身。明發復擾擾。吾詩其絕麟。

小舟過御園

聖主憂民罷露臺。春風別苑畫常開。盡除曼衍魚龍戲。不禁芻蕘雉兔來。水鳥避人橫翠鬣。宮花經雨委蒼苔。殘年自喜身強健。又作清都夢一回。

又

水殿西頭起砌臺。綠楊鬧處杏花開。簫韶本與人同樂。羽衛纔聞歲一來。鷁首波生涵藻荇。金鋪雨後上莓苔。遠臣侍宴應無日。目斷堯雲到晚回。

自真珠園泛舟至孤山

呼船徑截鴨頭波。岸嶺閑登瑤瑤坡。弦管未嫌鶯鷺起。塵埃無奈污花何。宦情不到漁蓑底。詩興偏於野寺多。明日一藤龍井去。誰知伴我醉行歌。

真珠園雨中作

清晨得小雨。憑閣意欣然。一掃羣兒迹。稍稀遊女船。煙波蘸山腳。溼翠到闌邊。坐誦空縑句。予懷玉局仙。

還家

富貴元須早致身。白頭豈復市朝人。數聲鶉鴉呼殘夢。一架除藤送晚春。疊嶂出雲明客眼。澄江漲雨濯京塵。逢人枉道哦詩瘦。下語今年尙未親。

又

天津橋上醉騎驢。一錦囊詩一束書。作客況當多病後。還家已過暮春初。泥深村巷人誰顧。草滿園畦手自鉏。不爲衰遲思屏迹。此心元向利名疎。

初歸偶到近村戲書

雨過一村暗。風回百草香。刺船過古埭。倚杖立新塘。醉覺乾坤大。閑知日月長。暮歸詩滿卷。雖老尙能狂。

題跨湖橋下酒家

湖水綠於染。野花紅欲燃。春當三月半。狂勝十年前。小店開新酒。平橋上畫船。翩翩幸強健。不必愧華顛。

春遊至樊江戲示坐客

江頭蕭蕭春色暮。柳陰遊魚飽飛絮。芰羹箭筍美如玉。點豉絲莼滑滌筍。銀鞍烏帽尋春客。朱戶青旗沽酒處。浮生細看纔幾時。一笑自應忘百慮。綠盃到手不肯盡。寶帶照地身何與。餘驪爛熳我欲狂。茗芋還家君勿遽。

暮春

顛顛都門白髮新。歸來一振客衣塵。啼鶯妒夢頻催曉。飛絮鍾情獨殿春。湖上風光猶淡沱。尊前懷抱頗清真。詩成絕恨知心少。自寫吳牋寄故人。

天華寺前遇縣令過避之入寺僧皆晝睡

墮絮飛花掠釣船。天華寺下賞春妍。縣多官府鳴騶過。僧少叢林避客眠。出網長魚猶鱗鱗。爭泥新燕欲翩翩。典衣剩買旗亭醉。已過旗亭六十年。

偶得海錯侑酒戲作

判無神藥斷清冥。放筋那憎海物腥。滿貯醇醪漬黃甲。密封小瓮餉紅丁。從來一飽忘南北。此去千鍾任醉醒。添雪更知憑茗椀。山童敲臼隔窗聽。

雨晴遊香山

雨打酴醾夜未拆。一晴柳岸先飄雪。我搖畫幟鏡湖中。碧水青天兩奇絕。長歌縹緲雲不動。橫笛清悲竹將裂。悠然起舞影零亂。卓爾四顧心激烈。好山可隱輕捨去。故人已貴長乖隔。肺渴生塵防酒興。眼暈成花作書厄。平生所期無一遂。獨有曠快相除折。夜歸燈火鬧湖邊。淡淡西南一鉤月。

春遊絕句

一百五日春郊行。三十六溪春水生。千秋觀裏逢急雨。射的峯前看晚晴。自秦望山而北。合三十六溪水爲若耶溪。

夜行玉筒樵風之間宿龍瑞

野店谿橋供晚餉。吟邊醉裏弄春風。馬行缺月黃昏後。鍾下亂山空翠中。名宦不辭成寂寂。歲時惟恨去匆匆。頗聞禹穴遺書在。安得高人與細窮。

聞傅氏莊紫笑花開急棹小舟觀之

日長無奈清愁處。醉裏來尋紫笑香。漫道閑人無一事。逢春也似蜜蜂忙。

遊法雲寺觀彝老新葺小園

古寺朱扉傍水開。高僧笑語共徘徊。陰陰曲徑人稀到。一一名花手自栽。竹笕引泉滋藥壚。風爐篝火試茶盃。此行自喜非生客。二百年間六世來。五世祖大保公捨園地建寺。

臧齋十韻

九月十月屋瓦霜。家人共畏畦蔬黃。小澗大甕盛滌濯。青菘綠韭謹蓄藏。天氣初寒手訣妙。吳鹽正白山泉香。挾書旁觀穉子喜。洗刀竭作廚人忙。園丁無事臥曝日。棄葉狼藉堆空廊。泥爲緘封糠作火。守護不敢非時嘗。人生各自有貴賤。百花開時促高宴。劉伶病醒相如渴。長魚大肉何由薦。凍齋此際價千金。不數狐泉槐葉麵。摩挲便腹一欣然。作歌聊續冰壺傳。

長門怨

未央宮中花月夕。歌舞稱觴天咫尺。從來所恃獨君王。一日讒興誰爲直。尺咫之天今萬里。空在長安一城裏。春風時送簫韶聲。獨掩羅巾淚如洗。淚如洗兮天不知。此生再見應無期。不如南粵匈奴使。航海梯山有到時。

遣興

莫羨朝回帶萬釘。吾曹要可草堂靈。風來弱柳搖官綠。雲破奇峯湧帝青。聽盡啼鶯春欲去。驚回夢蝶醉初醒。從教俗眼憎疎放。行矣桐江酌客星。

晨坐道室有感

一鉢青精便有餘。世間萬事總成疎。手揮絃上烏棲曲。口誦巖間鳥跡書。丹氣初升勤沐浴。芝房未熟飽耘鋤。碧霄騰舉人人事。莫戀污渠與臭帑。

晝臥

忽忽見春盡。徂年那更遷。香生帳裏霧。書積枕邊山。凌厲心猶壯。沈緜氣已孱。千秋有管葛。看鏡汗吾顏。

雨晴

久雨作我病。今朝身頓輕。花房避初旭。簾影弄新晴。漉酒綸巾折。聽琴拄杖橫。脩然又終日。未覺負平生。

宿石帆山下

卷地東風吹釣船。石帆重到又經年。放翁夜半酒初解。落月啣山聞杜鵑。

又

繫船禹廟醉如泥。投宿漁家月向低。溼翠撲人濃可掬。始知身在石帆西。

小雨泛鏡湖

吾州清絕冠三吳。天寫雲山萬幅圖。龍化廟梁飛白雨。鶴收仙箭下青蕪。菱歌嫋嫋遙相答。煙樹昏昏淡欲無。端辦一船多貯酒。敢辭送老向南湖。鏡湖一名南湖。

小憩村舍

藤梢維艇子。煙際覓人家。小婦簪新麥。羣童摘晚茶。溪雲易成雨。崖樹少開花。聊寄平生快。青鞋到若耶。

平水

水悍溪橋敗。沙頽野徑移。年華入詩卷。心事付筇竹。雨霽鶉鳩喜。春歸鶡鴒知。客庖消底物。麥飯薦菘絲。

初夏山中

又報東皇促駕歸。醉中闕賦送春詩。佛餅是處見紅藥。僧榻有時聞子規。野客款門聊倒屣。谿潭照影一軒眉。年光佳處惟初夏。兒女紛紛詎得知。

雨後

礎潤還成雨。雲收旋作晴。巖花分日發。林筍逐番生。筆硯行常具。軒窗晚更明。塵埃幸不到。那得廢詩情。

雲門溪上獨步

山路聯翩十日陰。晚晴剩喜得幽尋。殘紅猶有數枝在。縷綠真成一倍深。泉響瓊環鳴闔壑。月明珠壁散疎林。歸來寂寞鐘初動。盞向孤燈說壯心。

雲門過何山

漠漠稻滿陂。縷縷雨霑衣。林花落更新。磬鳥止復飛。我作山中行。十日未擬歸。思酒過野店。念茶叩僧扉。眠枕松下石。適意無訶譏。心廣體自舒。泰然不肉肥。念昔在官塗。萬事與願違。逢人無一欣。對食或累歎。低回三十年。竟不飽蕨薇。空將書五車。自誑腹十圍。餘日猶幾何。可復貪塵鞿。贖拾柏子香。閉門觀昨非。

明覺院

細路蟠青壁。層軒倚碧空。天香下塵世。僧梵起雲中。藤絡將頽石。松號不斷風。尤憐扶杖處。直下數飛鴻。

自雲門至上竈欲遊一二僧菴以雨不果

道遠晨炊米。風和晝減衣。花殘孔官廟。苔滿葛仙磯。剩欲尋僧話。先判秉炬歸。山昏又成雨。心事固多違。

自上竈過陶山

宿雨初收見夕陽。縱橫流水入陂塘。蠶家忌客門門閉。茶戶供官處處忙。綠樹村邊停醉帽。紫藤架底倚胡牀。不因蕭散遺塵事。那覺人間白日長。

四月

四月江南暑尙微。虛堂初換葛衣時。嬾陪陌上雍容騎。且對窗間臙膊棊。穆徑落花猶片片。拂雲新竹已離離。年來病肺疎盃酌。應接風光賴有詩。

初夏閑居即事

門巷蕭蕭日正長。方牀曲几傲羲皇。輕風忽起楊花鬧。清露初晞藥草香。對奕兩奩飛黑白。儲書千卷雜朱黃。穿簾語燕能從我。分爾湖邊一夏涼。

夜汲

酒渴起夜汲。月白天正青。銅瓶響寒泉。聞之心自醒。井邊雙梧桐。映月影離離。上有獨棲鶴。細爪握高枝。我欲登



團扇。良工不可求。三歎拊庭楮。浩然風露秋。

排悶

老去知心少。流塵鎖斷絃。尊空問字酒。囊罄作碑錢。掃葉供朝爨。和泥補漏船。胸中元浩浩。白眼望青天。

初夏夜賦

好景入新夏。幽人臥弊廬。廊腰得風透。樹罅見星疎。門掩鴉棲後。鐘鳴月上初。青燈尙堪近。起了讀殘書。

新霽城南舟中夜興

身是江湖不繫船。雨餘隨處一翛然。浮雲盡斂出青嶂。孤月徐升行碧天。收網漁歌移別浦。隔城塔影落前川。明朝閑就平州飲。巾履追涼又一年。

泊舟

蘼岸煙波樣畫船。幅巾蕭散餞流年。兩行楊柳吹晴雪。只著啼鶯未著蟬。

又

湖水無風鏡面平。巉巖倒影萬峯青。放翁眼界便疎豁。過盡蘆村泊蓼汀。

飲伯山家因留宿

小醉悠然不作醒。斷雲飛盡卻成晴。月生檐外見簾影。風下城頭聞角聲。岸嶺莎庭便髮冷。酌泉桐井覺魂清。雞號忽報明星上。夢破虛皇白玉京。

夜泛蜻蜓浦

四顧水無際。三更月未生。偶成搔櫂去。不減御風行。煙浦漁歌斷。蘆洲鬼火明。還家人已睡。小立叩柴荆。

晨起看山飲酒

愛山入骨髓。嗜酒在膏肓。跌宕風煙外。歌呼麴蘖傍。虛窗天柱曉。書堂正見天柱峯。小瓮麴泉香。家釀今年試用。鼓下麴泉麴法。垂老叨微祿。無口口口忙。

枕上偶賦

初夏暑猶薄。紗幮怯夜深。孤螢入窗罅。斜月下牆陰。靜養觀書眼。窮悲濟世心。吾衰亦久矣。徂歲苦駸駸。

自詠

射的山前一老樵。此生何敢辱旌招。繆緣學道肱三折。不遇知音尾半焦。去盡區區慙啄木。附高燁燁鄙凌霄。但令窮死心無愧。也勝鳴珂事早朝。

題齋壁

二十餘年此結茆。園公谿父日論交。風翻半浦亂荷背。雨放一林新笋梢。隔葉晚鶯啼谷口。啜花雛鴨聚塘坳。出門行罷還無事。借得丹經手自抄。

又

四顧茫茫水接天。幽居真個似乘船。月窗竹影連棲鷁。露井桐聲帶斷蟬。甘寢每憎茶作祟。清狂直以酒爲仙。形骸那得常羈束。六十年來又二年。

又

舴艋爲家一老翁。陽狂羞與俗人同。夢回菱曲漁歌裏。身寄蘋洲蓼浦中。斷簡塵埃存治道。高丘草棘閉英雄。旗亭村酒何勞醉。聊豁平生芥蒂胸。

又

稽山千載翠依然。著我山前一釣船。瓜蔓水平芳草岸。魚鱗雲襯夕陽天。出從父老觀秧馬。歸伴兒童放紙鳶。君看此翁閑適處。不應便謂世無仙。

卷十八

丙午五月大雨五日不止鏡湖渺然想見湖未廢時有感而賦

朝雨暮雨梅正黃。城南積潦入車箱。鏡湖無復鍼青秧。直浸山腳白茫茫。湖三百里漠訖厓。千載未嘗廢陂防。屹如長城限胡羌。喬夫有秩走且僵。早年灑注水何傷。越民歲歲常豐穰。汎湖誰始謀不減。使我婦子饜糟糠。陵遷

谷變亦何常。會有妙手開湖光。蒲魚自足被四方。煙艇滿目菱歌長。

遊鄞

晚雨初收旋作晴。買舟訪舊海邊城。高帆斜挂夕陽色。急瀾不聞人語聲。掠水翻翻沙鷺過。供廚片片雪鱗明。山川不與人俱老。更幾東來了此生。

泊上虞縣

鄞江久不到。乘興偶東遊。漲水崩沙岸。歸雲抱縣樓。吟餘聲混混。梳罷髮飈飈。喜見時平象。新絲入市稠。

發丈亭一作長亭

姚江乘潮潮始生。長亭卻趁落潮行。參差鄰舫一時發。臥聽滿江柔櫓聲。

又

玄雲垂天暗如漆。瀾聲嘔軋知船行。南風忽起卷雲去。江月已作金盆傾。

明州

豐年滿路笑歌聲。蠶麥俱收穀價平。村步有船銜尾泊。江橋無柱架空橫。海東估客初登岸。雲北山僧遠入城。仗錫平老出山來。迎予風物可人吾欲住。擔頭蕪菜正堪烹。

水亭獨酌十二韻

清風掃鬱蒸。爽氣生戶牖。客中淡無事。翛然一盃酒。書生拙自料。事業期不朽。少年忝朝跡。蹭蹬今白首。歷觀千載事。和我固嘗有。定襄伍原間。乃可畫地守。神州在何許。東巡已去久。煌煌一統業。謨訓共可負。太祖嘗書大宋一統字。以賜王楙。荆楚多劍客。宜潤富弩手。孰能用其長。坐使老農畝。講武幸長楊。勞軍臨細柳。中興望聖時。未死得見否。

坐客有談狄魚眼眶之笑者感歎而作

黃雀頭顱羞五鼎。狄魚眼眶參雋永。兩螯何辜蟹喪軀。一鱗可憐牛斷領。霜刀斫膾幾許痛。公子方誇醉魂醒。物生怖死與我均。堪几流丹只俄頃。哀哉堂堂七尺身。正坐舌端成業境。豪華只可誇僕妾。報應那知類形影。世間

擾擾何時了。一念超然差若穎。不妨瓦鉢飽晚菘。更汲山泉試春茗。

衰病不復能劇飲。而多不見察。戲作此詩。

平生不持面看人。寧作五湖雲水身。忍窮閉門豈自苦。是中有味敵八珍。酒盃激灑鼓吹作。我自悲吒人自樂。更  
闌坐睡不得去。如鷹在韉虎遭縛。丈夫歡樂自有時。遇酒先怯非予衰。萬騎擊胡青海岸。此時意氣令君看。

或以予辭酒為過。復作長句。

陸生酒戶如蠡。痛酒豈能堪大白。正緣一快敗萬事。往往吐茵仍墮幘。爾來人情甚不美。似欲殺我以麩麩。滿  
傾不許計性命。傍晚更復騰頰舌。醉時狂呼不復覺。醒後追思空自責。即今願與交舊約。三爵甫過當亟徹。解衣  
摩腹午窗明。茶磴無聲看霏雪。

行路難

平生結交無十人。與君契合懷抱真。春遊有時馬忘秣。夜話不覺雞報晨。極知貧賤別離苦。明日有懷就誰語。人  
無根柢似浮萍。未死相逢在何許。道邊日斜泣相持。旗亭取醉不須辭。君貴堂廚萬錢食。我勸一盃應不得。

千峯樹宴坐

蒼寒千疊擁官居。吏退憑高樂有餘。盡日煙雲窮變化。入秋草木漸凋疎。朱絃靜按新傳譜。黃卷閑披累譯書。聊  
與邦人共無事。吾僚不用笑迂疎。

喜雨

勢掠郊原飛急雪。聲搖窗戶過奔雷。坐知多稼連雲熟。不獨新涼傍枕來。

又

浙瀝簷聲枕上聞。攬衣起坐對爐熏。萬家歌舞豐年樂。未費烏龍一線雲。

五鼓

樓堞鑿鑿鼓簾櫳。煜煜燈浪各隨牒。吏實似打包僧。衰病元難強。疎慵每自憎。誰知戍邊日。秋野正呼鷹。

官居戲詠

萬里飄然似斷蓬。桐廬江上又秋風。判餘牘尾棲鴉溼。衙退庭中立雁空。燈火市樓知酒賤。歌呼村路覺年豐。誰言病守無歡意。也與他人一笑同。

又

說著功名卽自羞。暮年世味轉悠悠。一庭落葉楸梧老。萬里悲風鼓角秋。懷綬不為明日計。登樓且散異鄉愁。漁舟大似非凡子。能揀溪山勝處留。是日書所見。

又

城頭閑倚一枝藤。病起清羸不自勝。衙鼓有期催晚坐。條鈴無賴喚晨興。愛書習氣嗟猶在。寡過工夫愧未能。寂寞已無臺省夢。諸公袞袞自飛騰。

倦眼

看書澀似上半腸。得睡甘如飲蜜房。起坐藤床搔短髮。數聲畫角報斜陽。

拜旦表

一封馳奏效嵩呼。清暉何時返故都。只道建炎巡狩禮。誰知故事自祥符。

早自烏龍廟歸

殘漏聲中聽曳鈴。翩翩吹帽出郊坰。兩餘爛落雙虹白。雲合山餘一髮青。鐵馬蹴冰悲昨夢。朱顏辭鏡感頽齡。歸來獨對空齋冷。鳥迹蒼苔自滿庭。

上丁

燎火明中庭。老槐泣殘雨。白頭奉祀事。恐懼劇仰俯。三終樂在懸。再拜肉升俎。誰言千載後。恍若到鄉魯。吾國雖褊小。大社胙芻土。如何儼章綬。日夜臨篚楚。藏書如丘山。及物無一羽。吾其可憐哉。去去老農圃。

新秋

打窗落葉報秋期。病叟頽然兩鬢絲。縱酒已無年少夢。讀書仍負夜涼時。問囚損氣嗟誰念。學道剗心恐已遲。買鶴清溪歸計足。寄聲先遣故人知。

殘年

殘年迫鐘漏。病骨怯風霜。投幘早當去。強顏徒自傷。文符紛似雨。訟訴進如牆。笑殺滄浪客。微官有許忙。

休日行郡園

南山如黛照朱扉。地接官居到亦稀。寒蝶徘徊掠衰草。孤花閃淡弄斜暉。荒城歌舞難娛客。休日文書且解圍。猶勝去年窮巷底。臥聞砧杵念秋衣。

登北榭

遠城山作翠濤傾。底事文書日有程。無惱我爲揮吏散。獨登樓去看雲生。香浮鼻觀煎茶熟。喜動眉間煉句成。莫笑衰翁淡生活。它年猶得配玄英。方干有千峯榭詩。

小酌

簾外桐疎見露蟬。一壺聊醉嫩寒天。團臍磊落吳江蟹。縮項輪囷漢水鱖。此兩物近頗登盤。投老宦遊真漫爾。平生懷抱固超然。文書縛急何由耐。會向長安市上眠。

焚香作墨瀋決訟吏皆退立一丈外戲作此詩

客鬢新添幾縷絲。山城且付一官癡。空濛碧霧籠香岫。近得一石穴。窪於背。出香如雲。霏霏玄雲起墨池。判牒不妨閑作草。坐衙聊得細哦詩。吏民莫怪秋來健。漸近南山射虎時。

齋中閑詠

風號萬物作濤聲。雲截千峯似几平。多病支離仍老境。暮秋蕭瑟更山城。燕觴久罷塵痕積。庭訟全稀藓暈生。莫道齋中日無事。焚香掃地又詩成。

秋夜聞雨

香斷燈昏小幌深。不堪病裏值秋霖。驚回萬里關河夢。滴碎孤臣犬馬心。清似釣船聞急瀨。悲於靜院聽繁砧。玉峯老去情懷惡。穩受千莖雪鬢侵。韓致光詩云。不知短髮能多少。一滴秋霖白一莖。

自詠

鈍似窗間十月蠅。淡如世外一孤僧。心勞撫字雖亡補。筆判虛空却愈能。厭見文書銜客袖。但思蔬水曲吾肱。何時却宿雲門寺。靜聽霜鐘對佛燈。

秋懷

少時本願守墳墓。讀書射獵畢此生。斷蓬遇風不自覺。偶入戎幙從西征。朝看十萬閱武罷。暮馳三百巡邊行。馬蹏度隴鬣聲急。土甲照日波光明。與懷徒寄廣武歎。薄福不挂雲臺名。領鬚白盡愈落莫。始讀法律親笞榜。訟坻滿庭鬧如市。吏牘圍坐高于城。未嫌樵唱作野哭。最怕甜酒傾稀餳。平生養氣頗自許。雖老尚可吞司并。何時擁馬橫戈去。聊為君王護北平。

不寐

閏年九月已重裘。說著功名即自羞。病骨不禁霜氣峭。高風正送雁聲遒。半盃濁酒如欺老。一點青燈欲訴愁。不寐裁詩真習氣。輸它睡足向黃州。

醉中戲作

當年買酒醉新豐。豪士相期意氣中。插羽軍書立談辦。如山鐵騎一塵空。玉關久付清宵夢。笠澤今成白髮翁。堪笑燈前如意舞。尙將老健壓諸公。

頻夜夢至南鄭小益之間慨然感懷

身似菴居老病僧。罷參不復繫行縈。夢中忽在三泉驛。庭樹鳴臬鬼弄燈。

又

客枕夢遊何處所。梁州西北上危臺。雪雲不隔平安火。一點遙從駱谷來。

夜雨枕上

秋雨不肯晴。秋夜不肯明。寸心集百憂。厭此點滴聲。歲月不貸人。老病忽至此。丈夫本憂世。兒女乃畏死。

兩夜

蒼雲畫埋山。白雨夜溢渠。虛堂閃風燈。獨處誰與娛。吾生過六十。鬢髮日夜疎。出嘗飲美酒。歸當讀奇書。可憐兩

不遂兀兀如枯株。明復對胥吏。孤憤何由據。

安流亭俟客不至獨坐成詠

憶昔西征鬢未霜。拾遺陳迹吊微茫。蜀江春水千帆落。禹廟空山百草香。馬影斜陽經劍閣。鶻聲清曉下瞿唐。酒徒雲散無消息。水榭憑欄淚數行。

秋興

楸槐兩變髮。鳧雁水拍拍。曉行城南路。落葉滿阡陌。新霜上衰鬢。吾死亦已迫。那將有限身。常作未歸客。長吟側紗帽。萬里一秋色。世俗不足論。天豈無皁白。

又

朝先鳴雞興。夕殿棲鷓鴣。符檄積几案。寢飯於其間。榜笞督租賦。涉筆駢我顏。忽忽過白日。胡能慰惓惓。葉脫橫林疎。髮鬢溪南山。豈無一盃酒。吾事何時閑。

燕堂獨坐意象殊憤憤起登子城作此詩

睡魔困衰翁。白日坐兀兀。忽然振衣起。目瞭尙如鶻。憑高望中原。佳氣未消歇。逆賊稽大刑。痛憤深至骨。新霜下昌陵。草有胡馬齧。羽林百萬士。何日聞北伐。賤臣官有守。不敢叫行闕。夢中涉黃河。太行高磳砮。天河未洗兵。封豕食上國。坐令河洛間。百郡暗荆棘。夷吾非王佐。尙足救左衽。中原消息斷。吾輩何安寢。世俗苦齷齪。誰與共此功。安知無奇士。悲歌燕市中。

秋雨北榭作

秋風吹雨到江濱。小閣疎簾曉色分。津吏報增三尺水。山僧歸入萬重雲。飄零露井無桐葉。斷續煙汀有雁羣。了却文書早尋睡。檐聲偏愛枕間聞。

次韻王給事見寄

大手方司一世文。癯儒何敢望餘塵。誰知天下黃扉貴。肯記江邊白髮新。末路愈窮詩有祟。舊書渾忘筆無神。床頭周易尊中酒。猶賴渠儂不負人。



病中夜半

蕭蕭欲脫猶吟葉。耿耿微明未滅燈。夜半不眠閑倚壁。使君清似北山僧。

即事

組繡紛紛街女工。詩家於此欲途窮。語君白日飛昇法。正在焚香聽雨中。

歲晚懷故人

衰髯白盡無添處。病骨癯然欲折時。客抱琴來聊滄茗。吏封印去又哦詩。山橫城上勢如壓。角動樓頭聲正悲。零落斷鴻書不到。歲殘何以慰相思。

焉耆行

焉耆山頭暮煙紫。牛半聲嘶行人止。平沙風急捲寒蓬。天似穹廬月如水。大胡太息小胡悲。投鞍欲眠且復起。漢家詔用李輕車。萬丈戰雲來壓壘。

又

焉耆山下春雪晴。莽莽惟有殘藜生。射麋食肉飲其血。五穀自古惟聞名。樵蘇切莫近亭障。將軍臥護真長城。十年牛馬向南睡。知是中原今太平。

丙午初冬得心腹痛疾大下而愈羸耗不支方在告臥燕堂東偏聞民間前一夕被盜者慨然有感。惜惜四壁空。宛宛一室奧。兩聲靜更聞。兩氣深不到。下簾設紙屏。篝火支藥竈。勿言此幽陋。足以養衰眊。頗聞閭里間。比夕多狗盜。游徼無乃闕。鰥寡將孰告。家貧未決去。祿食當念報。臥病疇敢安。起立擲吾帽。

因王給事回使奉寄

兩昏郡郭連三日。吏報江流忽數回。江每漲。律吏輒報。日或三四至。正歎船如天上坐。那知人自日邊來。臂弓腰箭身今老。航海梯山運已開。漢虜不應常自守。期公決策畫雲臺。

病告中遇風雪作長歌排悶

風雪橫街不能出。閉戶垂帷養衰疾。黃昏臥聽打窗聲。聊挽清寒入詩律。公孫布被久有味。子敬青氈煖無匹。石

鼎開素似爪茶。霜綴旋破加拳栗。蹲踞足火微點鹽。鬚粟熬湯旋添蜜。龍蛇鱗鱗寒衝束。子母累累丹柿實。王豹試說涎已墮。石芥纔嘗酒如失。天公付汝亦已厚。飽食長謠抱雙膝。丈夫豈為口腹計。壯志常恐無時畢。伐胡疏奏端許前。腰領敢辭膏斧鉞。

冬夜戲作

賤貧百年愁。老大萬事倦。起家來牧民。竊語笑丞椽。拘攣拙徵科。儉陋省遊宴。不思返江湖。乃爾辱畿甸。斯言中吾病。有覩在其面。行當自劾去。暫寓等郵傳。十月夜正長。歲事到冰霰。膏油幸可具。更盡書一卷。

夜坐

曲几蒲團夜過分。頽然半脫鹿皮巾。驚鴻避弋鳴煙渚。斷角凌風上雪雲。仕宦愈知林下貴。窮愁方策酒中勳。扁舟東去何時辦。昔向金丹幸有聞。

又

山城意象自蕭然。況是高齋作雪天。漸暗玉蟲寒有燼。欲殘金鴨煖無煙。衰容病後如添歲。遙夜冬來抵過年。安得龍綰三丈幅。為君試寫白雲篇。

遣興

圖書雞犬共扁舟。又續人間汗漫遊。醉眼本輕千古事。釣竿新賜一灘秋。慣看浮世成陵谷。莫露神光上斗牛。老病豈堪常作客。夢尋歸路傍西疇。

登紫翠樓

水落樛聲壯。天寒山色奇。殘雲宿虛閣。馴鷺下清池。簿領消豪氣。功名負聖時。憑高不勝歎。神武迫歸期。

丙午十月十三夜夢過一大冢。傍人爲余言此荆軻墓也。按地志荆軻墓蓋在關中。感歎賦詩。

采藥遊名山。物外富真賞。秋關策蹇驢。雪峽蕩孤槳。還鄉忽十載。高興寄遐想。夢行河潼間。初日照仙掌。坡陀荆棘冢。狐兔伏榛莽。悲歌易水寒。千古見精爽。國讐久不復。驚覺泚吾頰。何時真過茲。薄醉神所饗。

病起小飲

病起新霜滿鬢蓬。憑高一笑與誰同。酒如淥靜春江水。人有鴻荒太古風。野寺鐘來夕陽外。寒山空插亂雲中。一官正爾妨人樂。只合滄浪狎釣翁。

冬夜讀書

莫笑燈檠二尺餘。老來舊學要耘鉏。寒生點滴三更雨。喜動縱橫萬卷書。本著儒冠那免此。可因吏牘頓拋渠。善和舊賜今猶在。剩采芸香辟蠹魚。

夜坐觀小兒作擬毛詩欣然有賦

北風城頭鼓統統。徂歲崢嶸正多感。老夫假寐角巾低。釋子高吟兩鬢髡。衰遲笑我藏袖手。狂率憐渠滿軀膽。旋炊粉盞裹青箬。新爇錫枝綴紅糝。未言問事漸瀾翻。且賞揮毫能果敢。嗟予疇昔如汝年。萬卷縱橫恣窺覽。卽今見汝尙權欣。此癖真同嗜昌歆。夜闌我困兒亦歸。獨與狸奴分坐毯。

郡齋偶書

白首奉魚書。蕭然一事無。吏閑晨已散。人醉莫相扶。卷野收禾黍。連江下舳舻。山城君勿謂。東北是皇都。

又

翠嶺當城起。清江擘碛流。軻峨商客編。嘈囂酒家樓。豐歲人元樂。殘年我獨愁。秦吳環萬里。感慨故貂裘。

又

江墮清笳月。霜嚴畫戟門。灘聲寒更壯。山氣旦常昏。搖落悲徂歲。羈遊憶故園。無勞空竊食。何以報君恩。

燈下閱吏牘有感

老眼今年太負渠。羲經魯史頓成疎。一爲柱後惠文吏。厭讀司空城旦書。正苦雁行須束縛。不言風輩合誅鉏。致君堯舜元無術。黃卷何辭飽蠹魚。

過放生池追懷江公民表諫議池蓋公所創也

釣臺先生諫大夫。建中初元起江湖。是非非玉座側。身可死徙志不渝。煙汀月島二十載。白髮短髭藏菰蒲。晚蒙澣洗得一障。上奏猶自稱鶻疎。公廣濟到任表云。不能軟熟。終是鶻疎。其不撓如此。此公造處直奇特。竺乾

生分半席。九州看如掌中果。天不遣爲吁可惜。徑歸斂手築陂池。也活龜魚論萬億。骨冷桐山喚不聞。停車悵望春波碧。

園中絕句

梅花重壓帽簷偏。良杖行歌意欲仙。後五百年君記取。斷無人似放翁顛。

又

溪北溪南飛白鷗。夕陽明處見漁舟。憑誰爲剪機中素。畫取天涯一片秋。

戲作浙西諸郡惟嚴無職租

歸臥元知作餓夫。宦遊依舊是癯儒。免教妻子爭杭秋。秋稼連雲一稜無。

縱筆

閑經月下白蘋洲。半脫風前紫綺裘。曾值東風謁鸞駕。却因南渡看龍舟。年光已付瞿騰醉。天宇誰從汗漫遊。莫怪又成橫笛去。故人期我玉華樓。玉華樓在青城山丈人觀。

又

東都宮闕鬱嵯峨。忍聽胡兒敕勒歌。雲隔江淮翔翠鳳。露霑荆棘沒銅駝。丹心自笑依然在。白髮將如老去何。安得鐵衣三萬騎。爲君王取舊山河。

又

行省當年駐隴頭。腐儒隨牒亦西遊。千艘衝雪魚關曉。萬竄連雲駱谷秋。天道難知胡更熾。神州未復土堪羞。會須瀝血書封事。請報天家九世讎。

病中偶得名酒小醉作此篇是夕極寒

一壺花露拆黃滕。醉夢酣酣喚不醒。屏煖半銷香鴨火。窗寒初結斫蟾冰。詩囊羞澀悲才盡。藥裹縱橫覺病增。早掛朝衣歸去是。貴人誰記接茵憑。

展讀道書

家貧悔嗜酒。年邁思學道。雖云善補過。見事恨不早。儒生守章句。忽忽遂將老。巖間得奇書。足以慰華皓。丹液下注臙。黃雲上通腦。海山行當歸。白髮何足掃。

後園獨步有懷張季長正字

斯世元知少賞音。道存何恨死山林。半生去國風埃面。一片憂時鐵石心。閑看斷雲成小立。偶穿修竹得幽尋。故人已到梁州未。尺紙東來抵萬金。

老將效唐人體

寶劍夜長鳴。金縷老未平。指弓誇野戰。抵掌說番情。已矣黑山戍。悵然青史名。和親不用武。教子作儒生。

書憤

清汴逶迤貫舊京。宮牆春草幾番生。剖心莫寫孤臣憤。抉眼終看此虜平。天地固將容小醜。犬羊自慣瀆齊盟。蓬窗老抱橫行略。未敢隨人說弭兵。

晨起

衣潤熏籠煖。燈殘漏箭長。鳴雞帶窗月。立馬怯庭霜。病骨陰晴覺。官身旦夜忙。火城那復夢。愁絕軟塵香。

雪

但苦奇寒惱病翁。豈知上瑞報年豐。一庭不埽待新月。萬壑盡平號斷鴻。茵紙欲書先研凍。羽觴纔舉已罇空。若耶溪上梅千樹。欠我今年繫短篷。

歲晚書懷

早見龍翔上太清。紹興末。游官玉牒所。即今孤宦老山城。靈丹不解換凡骨。薄命枉教生太平。積雪樓臺增壯觀。近春鳥雀有和聲。如山吏牘何時了。惆悵西窗晚照明。

晨過天慶

蘿月挂團壁。松風號急灘。孤燈經院曉。殘雪醮壇寒。賸欲閑扶杖。何妨醉墮冠。詩成興不盡。萬里跨青鸞。

冬夜

翩翩殘曆不滿紙。坎坎疊鼓無停搗。香殘未消古鼎火。燈暗尙結寒缸花。長安故人日已遠。錦江小築天之涯。拘攣動覺吏有責。幽獨更似僧無家。臥聞沙雁叫空闊。想見雪谷森槍笏。起提一筆掃足紙。入卷颯颯奔龍蛇。

比得朋舊書多索近詩戲作長句

庭下訟訴如堵牆。案上文書海茫茫。酒酸肉冷不得嘗。椎牀大叫欲發狂。故人書來索文章。豈知吏責終歲忙。寒龜但欲事縮藏。病驥敢望重騰驤。日曛稍退覺驚行。小山叢竹堂東廂。呼兒深炷銅爐香。楚騷爲我被不祥。

休日感興

宦海風波實飽經。久將人世寄郵亭。家無釵澤窮禱衍。身著襦裙老管寧。藥圃按行新蔓綠。書樓徙倚暮山青。偶然得句悲誰屬。零落交朋比曉星。

病中偶書

燈火青熒古屋深。挂冠境界已駸駸。竹枝影瘦橫殘月。藥杵聲寒續暮砧。病覺死生真大事。老知道德愧初心。經龕禪版殊當勉。嬾學苾芘事苦吟。

寒夜

脫葉爭辭木。寒雲巧護霜。羈遊少躑躅。短景極匆忙。吟苦蟲催織。鳴哀雁斷行。幽懷誰晤語。惆悵此燈光。

雪中獨酌

金尊玉盞有何好。不堪生世匆匆老。朱顏忽已謝晨鏡。白骨行看閉秋草。駭浪嵯峨風作之。蛟龍血人以為嬉。畏塗寄命三十載。賴有痛飲紓吾悲。莫驚醉眼炯如電。假鉞猶堪行督戰。指麾突騎取遼陽。雪灑轅門夜傳箭。

送客

長亭柳漸柔。送客當閑遊。江近聞津鼓。雲開見戍樓。簿書來袞袞。歲月去悠悠。閉眼尋歸路。春蕪滿故疇。

新晴

宿雨解殘雪。新春侵故年。和風拆冰鱗。淡日弄窗妍。心事綠尊裏。歲華烏帽邊。今朝我病減。隨處一欣然。

出城

翻翻烏帽出林垌。掠面風微酒半醒。戍火難尋玉關夢。衣塵空愧草堂靈。天晴山雪明城郭。水漲江流近驛亭。客鬢不如堤上柳。數枝春動又青青。

立春日送客郊外

短鬢那禁歲月催。勝邊花底又春回。雪消漸暖青鸞日。冰解初橫玉鑑梅。江驛軒窗臨古道。市樓絃管賣新醅。自憐病守無歡意。一笑常因送客來。

大雪自夜至旦欲午始晴

薄暮雪雲低。清宵氣慘悽。方聽打窗急。已報與階齊。疎箔穿飛蝶。空庭聚戲猊。新晴思訪客。愁絕滿城泥。

雪夜有感

狂膽輪囷欲滿軀。一麾誰憫滯江湖。青衫曾奏三千牘。白首猶思丈二笏。龍虎翔空瞻王氣。犬羊度躡避天誅。何時冒雪趨行殿。香案前頭進陣圖。

雪中忽起從戎之興戲作

狐裘臥載錦駝車。酒醒冰髭結亂珠。三尺馬鞭裝白玉。雪中畫字草軍書。

又

鐵馬渡河風破肉。雲梯攻壘雪平壕。獸奔鳥散何勞逐。直斬單于鬣寶刀。

又

十萬貔貅出羽林。橫空殺氣結層陰。桑乾沙土初飛雪。未到幽州一丈深。

又

羣胡束手仗天亡。棄甲縱橫滿戰場。雪中急追奔馬迹。官軍夜半入遼陽。

十二月二十七日祭風師歸道中作

虎豹生憎上九關。諸公袞袞遂難攀。面顏已老塵埃裏。精力虛捐簿領間。束帶敢言趨玉陛。橫戈猶憶戍天山。新春自笑摧頽甚。鼓吹東風拜昨還。

春晴

南陌爭牛事已非。綵山又近放燈期。風和已染柳千縷。山冷未開茶一旗。酒病況當人別後。春光偏在雪晴時。道傍笑我清狂在。馬上看山細詠詩。

丁未正月春色已粲然露坐高風堂北觀種花

苦寒不解歲崢嶸。病守兀坐憂疲氓。天風誰遣撼斗柄。便覺春色來江城。北山賽廟見殘雪。東津送客聞新鶯。衣裘漸減體殊健。簾幙乍捲眼爲明。今朝天氣更佳絕。淡日微漏雲徐行。我移胡床坐庭下。幅巾半脫筇枝橫。散關旌旗掃昨夢。少城絲竹真前生。數株桃杏亦漫種。未去與汝聊逢迎。

燕堂春夜

南樓統統下疎更。一點紗籠滿院明。映月疎梅入簾影。讀書程子隔窗聲。呻吟藥裏身寧久。汛掃胡塵意未平。草檄北征今二紀。山城仍是老書生。辦嘗爲丞相陳魯公。史魏公。樞相張魏公。草中原及西夏書檄於都堂。

早春池上作

疎嬾元嘗與世辭。殘年況近乞身期。一官空作讀書祟。五斗不供沽酒資。冰拆野塘初灑灑。雪殘芳草已離離。物華似有平生舊。不待招呼盡入詩。

感興

文章天所秘。賦予均功名。吾嘗考在昔。頗見造物情。離堆太史公。青蓮老先生。悲鳴伏櫪驥。蹭蹬失水鯨。飽以五車讀。勞以萬里行。險艱外備嘗。憤鬱中不平。山川與風俗。雜錯而交并。邦家志忠孝。人鬼參幽明。感慨發奇節。涵養出正聲。故其所述作。浩浩河流傾。豈惟配詩書。自足齊談經。我衰敢議此。長歌涕縱橫。

東齋偶書

華髮蕭蕭不滿簪。強扶衰病著朝衫。承應靜似阿蘭若。佳客少於優鉢曇。詩酒放懷窮亦樂。文移肆罵老難堪。棄官若遂飄然計。不死揚州死劍南。顧況詩云。人生只合揚州死。而余嘗有歸蜀之意。

丁未上元月色達曉如晝予齋居屬貳車領客



此夕幾年無此晴。碧天萬里月徐行。官壚賣酒傾千斛。市里行歌徹五更。壚酪獨烹僧鉢美。琉璃閑照佛龕明。頽然坐睡君無笑。寶馬香車事隔生。

自郊外歸北望讌樓

天上何年墮翠虬。屈蟠爪尾護吾州。重門兩細旌旗壓。危堞風高鼓角遒。漠漠川雲昏佛塔。涓涓野水入農疇。曠懷不耐微官縛。擬脫朝衫換釣舟。

馬上作

平橋小陌雨初收。淡日穿雲翠鬣浮。楊柳不遮春色斷。一枝紅杏出牆頭。

還舍

賸欲銜盃樂太平。新愁還續舊愁生。出門始覺春來早。處處簾櫳笑語聲。

杏花

江城開歲風雨頻。閉閣不出俄經旬。忽逢國豔帶卯酒。坐覺天地無餘春。芳敷正當晨露重。盛麗欲擅年華新。數株欹斜倚山驛。一簇深淺臨煙津。徘徊跋馬不忍去。只恐飄墮隨車塵。念當載酒醉花下。破曉啼鶯先喚人。

兩京

兩京煙柳厭胡塵。又見淳熙十四春。薄命遭回猶許國。孤忠懇款欲忘身。蘇君落魄黃金盡。褚令悲傷白髮新。曾向延和隨仗入。至今殿檻夢嶙峋。

贈表弟江參議

襄州參議真豪傑。熟視華途頰著鞭。奪得鸞篋花裏活。皎如玉樹酒中仙。才高狗監無人薦。句好雞林有客傳。江弟今居四明老。老去眼邊親舊少。津亭少爲繫歸船。

讀書

東髮論交一世豪。暮年顛顛困蓬蒿。文辭博士書贖券。職事參軍判馬曹。病裏猶須看周易。醉中亦復讀離騷。若爲可奈功名念。試覓并州快剪刀。

夜登千峯榭

夷甫諸人骨作塵。至今黃屋尙東巡。度兵大峴非無策。收泣新亭要有。人薄釀不澆胸壘塊。壯圖空負膽輪囷。危樓插斗山銜月。徙倚長歌一愴神。

旬日公事頗簡喜而有賦

社近樓臺晝已長。豐年頗減簿書忙。兩催樹綠吹簫陌。日射塵紅擊鞠場。農事漸興初浸種。吏衙早退獨焚香。晚來別有歡然處。檢教兒書又一箱。杜牧之寄小姪阿宜詩云。一日讀十紙。一月讀一卷。

聞鼓角感懷

鼓坎坎。角鳴鳴。四鼓欲盡五鼓初。老眼不寐如鯨魚。撫枕起坐涕泗濡。平生空讀萬卷書。白首不識承明廬。時多通材臣腐儒。妄懷孤忠策則疎。欲剖丹心奏公車。論罪萬死尙有餘。雷霆願復寬須臾。許臣指陳輿地圖。億萬遺民望來蘇。藝祖有命行天誅。皇明如日詎敢誣。拜手乞賜丈二笏。中原煙塵一掃除。龍舟泝汴還東都。

社日小飲

催花初過社公兩。對酒喜烹溪友魚。儘道亂山窮絕處。年華未覺異吾廬。  
又

社雨霏霏煙杏花。農家分喜到州家。蒼鵝戲處塘初滿。黃犢歸時日欲斜。

昔日

昔日從戎日。身由許國輕。陣如新月偃。箭作鉞鷓鳴。堅壁臨關守。連營並涇耕。至今悲義士。書帛報番情。予在貞元日。長安將吏以申狀至。宣撫司皆礮彈。方四五寸絹。虜中動息必具報。

新晴

雨斷歸雲急。沙乾步履輕。風花嬌作態。野水細無聲。社酒家家醉。春蕪處處耕。今朝公事少。一笑賦新晴。

倚欄

閑岸紗巾小倚欄。吳中三月尙春寒。蜂脾蜜滿花初過。燕觜泥新雨未乾。老厭簿書思屏迹。病逢節物強追歡。一

樽又動流年感。城上斜陽畫角殘。

寄徑山印禪師

市朝聲利戰方酣。眼看紛紛每不堪。但有客誇車九九。了無人問衆三三。會當身返東西蜀。要與公分上下菴。趙州有上菴菴主下菴菴主語。春枕悠然夢何許。兩枝筇杖喚魚潭。喚魚潭在眉山中巖。客至撫掌。魚輒羣出。

園中歸戲作

醉裏來尋澗上花。已飄殘雪散餘霞。麴生也解欺人老。風伯無端妬物華。不恨童心伴蜂蝶。但愁病眼厭風沙。歸來隱几東窗下。一卷黃庭送日斜。

春曉東郊送客

雨餘氣清潤。迨我送客時。翻翻車蓋風。五里城東陂。初旭斂花房。晨露流桐枝。南山卷煙翠。更覺光景奇。澄潭集魚艇。村路亞酒旗。欲歸且復留。造物成吾詩。

暮春歎

春深桃李爭時節。千團紅雲萬堆雪。東風一夜吹欲空。曲徑平池爛如纈。城門獵獵雙青旗。羲和促轡西南馳。中原未有澄清日。志士虛捐少壯時。

曉雨

平明小雨壓香塵。避舍扶疎綠漸勻。睡過花時慵著句。老來春事不關身。

又

東風吹雨送殘春。冉冉年光次第新。君看枝頭如許綠。爭教桃李不成塵。

登千峯樹

飛觀危欄縹緲中。聊將醉眼送歸鴻。一生未售屠龍技。萬里猶思汗馬功。王衍諸人寧足貴。姜維豎子自應窮。他年弔古憑高處。想見清伊照碧嵩。

晚春園中作

少逢春歸未解悲。千篇曾賦傷春詩。可堪霜點鬢髮後。更值綠暗園林時。楊花輕隨籬外影。杏子重壓闌邊枝。毬場立馬漏聲靜。綺窗語燕簷陰移。向來春事渺何許。長空鳥跡何由追。鞦韆未拆已寥寞。日暮東風吹綵旗。

北窗

小雨霏霏旋作晴。北窗清潤綠陰成。却緣政拙文書少。臥聽簾櫳燕子聲。

浮生

浮生過六十。百念已頽然。獨有耽書癖。猶同總角年。橫陳糲飯側。朗誦短檠前。不用嘲癡絕。兒曹尚可傳。

小壘

小壘荒寒外。高齋寂寞中。貧妨挂冠快。病減讀書功。橋斷春江白。雲穿夕照紅。悠然扶杖處。歲月歎惛惛。

大閩後一日作假

小院鈎簾掃落花。公餘蕭散似山家。下巖紫壁臨章草。正焙蒼龍試貢茶。塞上遠遊心尙壯。車中深閉髮先華。老來日月真堪惜。愁聽高城咽暮笳。

自嘲

貧祿忘歸祇自羞。一窗且復送悠悠。鏡明不爲人藏老。酒薄難供客散愁。正得虛名真畫餅。元非大器愧函牛。年來事業知君否。高束詩書學問囚。

曉出東城

聽徹清笳聽曉鐘。據鞍漏鼓尙寥寥。西樓落日徑三尺。北嶺亂雲生半峯。蒼磴幽尋過古寺。綠疇小駐勞春農。煙村已遠猶回首。恐有鷓鴣與伏龍。

初夏遇休日園中閑賦

青山圍女牆。細草滿毬場。虛簷搖水影。曲檻吹蘋香。房櫳寂無人。雙燕說晴涼。賜休無公事。蕭散寄一床。久苦吏役拘。更知閑味長。桑空鷓綴簇。陂滿稻吐秧。夏時動人懷。東望一慨慷。寧當戀微祿。如鼠死太倉。

小兩出西門五里至東嶽廟

埋沒文書每自憐。偷閑出郭一欣然。稻陂兩細豐年候。槐陌風清嫩暑天。心似春鴻寧久住。身如秋扇合長捐。平生士雅今亡恙。老病何由共著鞭。

初夏燕堂睡起

歌鳳平生類楚狂。山城遲暮得深藏。洗春雨過清陰合。掠水風生綠藻涼。晨几硯凹涵墨色。午窗盃面聚茶香。功名到手渾閑事。此與他年未易忘。

晡後領客僅見燭而罷戲作短歌

忍睡出坐衙。扶病起觴客。本來世味薄。況復酒戶迮。謔諤時強語。嵬昂已頽幘。燒燭不盈寸。歸臥弄書冊。我來未穫稻。客裏今食麥。悵望稽山雲。飛去無六翮。

讀宛陵先生詩

歐尹追還六籍醇。先生詩律擅雄渾。導河積石源流正。維嶽崧高氣象尊。玉磬膠膠非俗好。霜松鬱鬱有春溫。向來不導無譏評。敢保諸人未及門。

書歎

人生如春蠶。作繭自纏裹。一朝眉羽成。鑽破亦在我。少年不自珍。妄念然烈火。眼亂舞腰輕。心醉笑齒瑤。餘齡幸早悟。世味無一可。但憶喚山僧。煎茶陳餅果。

卷十九

曉出南山

久向人間觸駭機。斂收孤迹早宜歸。亡羊未恨補牢晚。搏虎深知撲臂非。明月長庚天欲曉。新桐清露暑猶微。扁舟蓑笠平生事。莫羨黃金帶十圍。

聞韓无咎下世

書劍飄然去國時。南蘭陵郡日題詩。吳波漲綠迎桃葉。穠燭堆紅按柘枝。故友去爲山下土。衰翁何恨鬢邊絲。憑

高老淚無揮處。神武衣冠挂已遲。

官居書事

早涉人間足畏塗。一麾投老向江湖。年光已上星星鬢。日力猶供急急符。本自陽狂無藉在。更堪羸病不枝梧。滅胡意氣嗟誰許。淚盡神州赤縣圖。

又

走遍人間老更窮。強尋一笑與誰同。簿書袞袞呻吟裏。歌舞紛紛困睡中。手版倒持悲末路。寒江獨釣媿高風。知心賴有譚夫子。時遣書來問放翁。比數得譚德稱書。

夏日北榭賦詩弈棋欣然有作

異事嚴州省見稀。幅巾闌角立多時。青林白鳥自成畫。急雨好風當有詩。酷信醫方逢酒怯。強驅吏牘坐衙遲。悠然笑向山僧說。又得浮生一局棋。

謁告歸臥晚登子城

此身真是抱官囚。厭見長空赤日流。齋壁曉山千嶂雪。扇紈新雁一汀秋。繫船空作清湘夢。御氣難尋太華遊。菱角藕絲還恨少。強攜玉盞醉高樓。

迂使客出郊夜歸過市樓

山川慘澹作秋霖。雲物徘徊結夕陰。手版向人慚老大。肩輿出郭當登臨。二年雪瀨繞羈思。萬里冰河歇壯心。却羨喧呼樓上客。隔簾紅燭醉更深。

秋夜登千峯樹待曉

萬里秋風夜艾時。剡川孤客不勝悲。讀書眼暗定誰許。憂國涕零客自知。欲墜高梧先策策。漸低北斗正離離。倚闌不覺雞號曉。剪燭題詩寄所思。

九月初郊行

九月吳中尚袂衣。江郊策馬踏斜暉。蒼花漫漫連山路。豆莢離離映版扉。蒼兔避鷹投磡去。黃鶴脫網傍人飛。農

家光景關心事。不爲無才也合歸。

衰病

衰病龍鍾已要扶。誰憐猶作折腰趨。世無魯國真男子。心憶高陽舊酒徒。萬里秋風吹鬢髮。百年世事歎頭顱。桐江久客無奇句。孤負君王乞左符。

書意

一鳴輒斥不鳴烹。福福元知未易評。湖海淒涼身跌宕。孟觴豪舉筆縱橫。敢希二頃成高臥。但願諸公致太平。波暖龍舟拆清汴。道邊扶杖眼猶明。

秋懷

策策桐葉風。纒纒菊花雨。空堂一燈青。幽壁百蟲語。嗟余豈願仕。老病歸無所。屈指計歲年。強半墮羈旅。荷戈北戍秦。挂席西適楚。名慚垂竹帛。文不諧律呂。所餘惟一死。忍復類兒女。金丹或可成。青霄渺輕舉。

過村店有感

細篾絡丹柿。枯籬懸碧花。炊煙生旅竈。野水漱寒沙。棲鳥爭投樹。歸牛自識家。恍然遊蜀路。搔首憶天涯。

嚴州大閱

鐵騎森森帕首紅。角聲旗影夕陽中。雖慚江左繁雄郡。自樂天詩云。魯川何寂寞。茂苑太繁雄。且看人間矍鑠翁。清渭十年真昨夢。玉關萬里又秋風。憑鞍撩動功名意。未恨猿驚蕙帳空。

後園閑步

木葉勾萌喜小春。鬢毛蕭颯媿陳人。今朝忽破簿書夢。此地暫還風月身。閑岸綸巾照清淺。却扶藤杖上嶙峋。人生要是便疎豁。金馬銀臺莫問津。

照潺湲閣下池水

平生不鏹白。霜雪滿鬢眉。照水默自笑。已迫溝壑期。慨然念歸休。不計妻子飢。渠飢亦有命。我節詎可移。自我來桐江。實無負惓惓。讒波如崩山。孤迹則已危。陸子定何人。正恐君未知。午枕夢剡曲。秋風吹釣絲。

秋郊有懷

漫漫蕎麥花。如雪覆平野。離離豆子莢。數枝忽堪把。頗憶故鄉時。屏迹謝車馬。水宿依蟹舍。泥行沒牛胯。作勞歸薄暮。濁酒傾老瓦。縷飛綠鯽膾。花簇頰鯉鮓。棄官雖未決。世念亦已已。且結歌續楚狂。幽懷欣獨寫。

又

檐頭買雙兔。市店取斗酒。還家掃北窗。歡言酌親友。家貧氣未餒。禮薄情更厚。高吟金石裂。健筆龍蛇走。酒闌起出門。孤月挂衰柳。大笑各散歸。吾輩可不朽。官身縛簡書。此樂寧復有。悵望秦稽雲。憑高一搔首。

又

楚人固多孱。妄謂秋可悲。寧知河嶽間。氣俗樂此時。壯士鳴雕弓。健馬嚼枯萁。日馳三百里。榆關赴戰期。陣雲壓龍庭。殺氣搖參旗。熾火燎狐鬼。倒瀉黃金卮。勒銘燕然石。千載鎮胡兒。安能空山裏。凍研哦清時。

又

秋山瘦益奇。秋水淺可涉。出城西風勁。拂帽吹脫葉。新霜拆栗罅。宿雨飽豆莢。枯柳無鳴蜩。寒花有穿蝶。郊行得幽曠。頗覺耳目愜。斷雲北山來。欣然與之接。挂冠易事爾。看鏡歎勳業。永懷桑乾河。夜渡擁馬鬣。

夙興

喔喔老雞催落月。丁丁殘漏伴斜河。一盃淡口寒燈下。還與山僧不校多。

聽車望馬目山

官身早暮不容閑。塵土堆胸媿滿顏。也有向人誇說處。坐衙常對水南山。

秋興

滿簪白髮不勝繁。竊祿偷安媿主恩。東館煙波秋漸瘦。北山霖雨晝多昏。功名蹭蹬身長棄。籌策瀾翻舌幸存。堪笑此生虛過盡。一秋閉閣聽啼猿。

又

孤城寂寞近江干。處處疎嗒送早寒。水落纔餘半篙綠。霜高初染一林丹。民租屢減追胥少。吏責全輕法令寬。偶



有一樽聊獨酌。強接黃菊助清歡。

久無暇近書卷。慨然有作

少年喜讀書。事業期不朽。致君頗自許。書卷常在手。白頭乞鍾釜。坐使此心負。朝衙有達午。夕坐或過酉。文符苦酬對。迎錢厭奔走。直憂先狗馬。豈但凋蒲柳。永懷簡編香。更覺冠冕醜。飢餐一簞飯。悶酌一卮酒。吟哦從所好。貧賤亦何有。余悔已莫追。寄謝故山友。

嚴州多菊。然率過重陽方開。或舉東坡先生菊花開時。即重陽之語。余謂此猶是未忘重陽者。恐此花不肯也。戲作一絕。

無人喚醒賦歸翁。滿把清香誰與同。但辦對花頻舉酒。莫橫重九在胸中。

地僻

地僻天教養散材。流年沉著鬢毛催。青山自繞孤城去。畫角常隨晚照來。几淨雙鉤摹古帖。甕香小啜試新醅。乘槎不是英纒遠。無奈先生興盡回。

吏責

吏責何時得暫停。年來減盡鬢邊青。高談正樂催迎客。笑睡方酣報掣鈴。安得雲山長在眼。便從樵牧與忘形。詩成不用頻招帳。自古籠禽例剪翎。

張時可直閣書報已得請奉祠。雲臺作長句賀之。

燈前一笑拆書開。喜見冰銜洗俗埃。丞相苦留猶不住。諸公欲挽固難回。玩鷗有約問何闊。斂版無聊歸去來。千載伏波應太息。輸君談笑上雲臺。

累日文符沓至。悵然有感

豪氣人言苦不除。固應屏迹向江湖。封侯萬里獨心在。餬口四方何事無。薄俗更堪開眼看。老翁寧辨折腰趨。鼠肝蟲臂今無擇。付與乾坤造化爐。

又

白首逢人只累秋。今雖未是昨真非。文章才盡欲焚稿。仕宦興闈當拂衣。浪出自應爲後戒。放言那計隨危機。遠天華表蒼茫裏。千載何人識令威。

又

三十年爲一世人。孤城夢斷洛陽塵。游忝朝筮。今二十有八年矣。強顏嬾復看人面。何地真堪著此身。白骨久埋金谷友。黃花尙醉葛天民。嚴光釣瀨雖亡念。除却江山萬事新。

大風

初聞颯洞怒濤翻。徐聽驂驛戰馬奔。紙帳蒲團坐清夜。恍如身在若耶村。

冬夜讀書

退食淡無事。一窗寬有餘。重尋總角夢。却對短檠書。功業雖蹉跎。光陰且破除。更須求半偈。回向此心初。

再用前韻不以次

壯心雖迫老。吏責未妨書。言議思公瑾。英雄陋本初。移燈近牀榻。聽雨落階除。回首山南戍。流年一紀餘。

思歸

短髮今年雪滿巾。一盃且醉瓮中春。定無術致長生藥。那得愁供有限身。碎枕不求名利夢。挽河盡洗簿書塵。江湖意決君知否。致主唐虞自有人。

喜小兒病愈

喜見吾家玉雪兒。今朝竹馬遶廊嬉。也知笠澤家風在。十歲能吟病起詩。律忽作病起詩一首。

又

一牀共置朝回笏。百屋常堆用剩錢。何似吾家好兒子。吟哦相伴短檠前。

初冬風雨驟寒作短歌

東園日淡雲容薄。綸巾朝暮闌干角。北風動地萬木號。不料一寒如此惡。豈惟半夜雨打窗。便恐明朝雪平壑。綠酒雖醺亦復醉。卓貂已弊猶堪著。所嗟此身老益窮。踰躄無功上麟閣。久從漁艇寄江湖。坐看胡塵暗幽朔。萬鞭

枯樹憤未平。蠶下老翁何足縛。要及今年墮指寒。夜擁雕戈度窮漠。

余年二十時嘗作菊枕詩頗傳於人。今秋偶復采菊縫枕囊。悽然有感。采得黃花作枕囊。曲屏深幌闌幽香。喚回四十三年夢。燈暗無人說斷腸。

又

少日曾題菊枕詩。蠶編殘稿鎖蛛絲。人間萬事消磨盡。只有清香似舊時。

陶淵明云三徑就荒松菊猶存。蓋以菊配松也。余讀而感之。因賦此詩。

菊花如端人。獨立凌冰霜。名紀先泰書。功標列仙方。紛紛零落中。見此數枝黃。高情守幽貞。大節凜介剛。乃知淵明意。不爲汎酒觴。折嗅三歎息。歲晚彌芬芳。

蕎麥初熟刈者滿野喜而有作

城南城北如鋪雪。原野家家種蕎麥。霜晴收斂少在家。餅餌今冬不憂窄。胡麻壓油油更香。油新餅美爭先嘗。獵歸熾火燎雉兔。相呼置酒喜欲狂。陌上行歌忘惡歲。小婦紅粧穗簪髻。詔書寬大與天通。逐熟淮南幾誤計。

有自蜀來者因感舊遊作短歌

錦城如海行不極。馬迹重重車轂擊。家住城西三十年。聞說城東未曾識。看花走馬宿中路。經月酒徒無覓處。露香風暖海棠開。碧雞坊中倘相遇。放翁顛顛鬢成絲。空有西遊千首詩。今朝雨霽上危樹。意氣頗如年少時。持盃欲作消愁計。酒未著人愁已醉。不成題句寫幽情。一幅蛟綃空寄淚。

東吳女兒曲

東吳女兒語如鶯。十三不肯學吹笙。鏡奩初喜釋蠶出。窗眼已看雙繭成。庭空日暖花自舞。簾卷巢乾燕新乳。阿弟貧書下學遲。獨揀詩章教鸚鵡。

兩女

歲早連夏秋。客袂厭塵土。欣然成一笑。愛此清夜雨。瓦檠墮燈燼。銅椀起香縷。心清病良已。境寂句欲吐。東籬久枯槁。想像素蛟舞。分喜到溝池。遊魚命儻侶。

晚遊東園

藥瓢藜杖合施行。獨往山林已啟盟。傍水斷雲含暮色。拂簷高竹借秋聲。癡人自作浮生夢。腐骨那須後世名。莫笑吟哦無闕日。老來未盡獨詩情。

小兩

小兩暗林塘。寒聲遶畫廊。事須求暫假。宜睡稱燒香。事須二字。蓋唐八公移中語也。

初寒在告有感

掃地燒香與未闌。一年佳處是初寒。銀毫地綠茶膏嫩。玉斗絲紅墨瀟寬。俗事不教來眼境。閑愁那許上眉端。數櫺留得西窗日。更取丹經展卷看。

又

豪舉當年氣吐虹。卽今顛頽一衰翁。寄懷本自俗塵外。移病何妨寒雨中。香暖候知銀葉透。酒清看似玉船空。故人吳蜀音塵斷。安得相攜一笑同。

又

橫林吹葉水生洲。身落窮山古睦州。到枕兩聲酣旅夢。背窗燈影動清愁。氣衝星斗有孤劍。力挽棟梁無萬牛。未滅匈奴身已老。此生虛負幄中籌。

馬上作

白髮憑鞍一老翁。出門漏鼓尙鏗鏗。淒涼旅思傳呼裏。零落新詩假寐中。正苦文移來陸續。何由笠釣入空濛。浮生正自少如意。付與秋風吹斷蓬。

冬夜聞角聲

嫋嫋清笳入雪雲。白頭老守臥中軍。自憐到死懷遺恨。不向居延塞外聞。

又

憶在梁州夜雪深。落梅聲裏玉關心。山城老去功名忤。臥對寒燈淚滿襟。

塞上曲

茫茫大磧吁可嗟。暮春積雪草未芽。明月如霜照白骨。惡風卷地吹黃沙。嗚呼喜見泉脈出。雁起低傍寒雲斜。窮荒萬里無斥埃。天地自古分夷華。青氈紅錦雙奚車。上有胡姬抱琵琶。犯邊殺汝不遺種。千年萬年朝漢家。

荊州歌

楚江鱗鱗綠如釀。御尾江邊繫朱舫。東征打鼓挂高帆。西上湯豬聯百丈。伏波古廟占好風。武昌白帝在眼中。倚樓女兒笑迎客。清歌未盡千觴空。沙頭巷陌三千家。煙雨冥冥開橘花。峽人住多楚人少。土鱸爭餉茱萸茶。

冬夜讀書

挑燈夜讀書。油涸意未已。亦知夜既分。未忍捨之起。人生各有好。吾癖正如此。所求衣食足。安穩住鄉里。茆屋三四間。充棟貯經史。四傍設几案。坐倦時徙倚。無聲九韶奏。有味八珍美。寢鉢籤帙間。自適以須死。豈惟畢吾身。尚可傳兒子。此心何時遂。感歎歲月駛。

寓歎

江上霜風透弊袍。區區無奈簿書勞。衰遲始憶壯遊樂。仕宦更知歸臥高。人怪半裘忘富貴。我從牛僮得賢豪。俗間問訊真成嬾。有手惟堪把蟹螯。

又

劍外歸耕夢不通。公車上疏路何從。有心求縮地。萬里無羽可朝天。九重狂誦新詩驅瘴鬼。醉吹橫笛舞神龍。明當采藥玉霄去。他日君看冰雪容。

燕堂東偏一室。頗深暖。盡日率困於吏牘。比夜乃得讀書。其間戲作

袞袞流年往。匆匆短景過。簾深上燈早。地窄貯香多。書盡還重讀。詩成更自哦。向令無此處。將奈旅愁何。

又

賦性無他好。開編喜欲迷。整整傳夜漏。喔喔待晨雞。油滅玉蟲暗。灰深紅獸低。悠然撫書歎。無術濟黔黎。

又

永夜東齋裏。人聲靜不譁。衣篝起香穗。書几落燈花。爐暖聽寒雨。窗明退曉驪。文章空自苦。白首不名家。

懷鏡中故壘

臨水依山偶占家。數間茆屋半欹斜。雲邊腰斧入秦望。雨外舞蓑歸若耶。從宦只思乘下澤。忤人常悔讀南華。病來更怯還鄉夢。頻鬪簾泉試露芽。

書感

丈夫本願脫世鞅。丹成晝日凌空飛。纓冠佩玉朝紫微。白銀宮闕瞻魏龜。不然萬里將天威。提兵直解邊城圍。首宿滿川胡馬肥。掩取不遣一騎歸。苦心文章亦未非。與此二事同一機。寥寥千載見亦稀。莊屈已死吾疇依。哀哉窮子百家衣。豈識萬斛傾珠璣。欲洗薄蝕還光輝。熟睨無力空歎歔。

對酒

新酥鵝兒黃。珍橘金彈香。天公憐寂寞。勞我以一觴。胸中萬卷書。老不施毫芒。持酒一澆之。與汝俱深藏。生當老窮巷。死埋南山岡。古來共如此。已矣庸何傷。

夢歸

老去無餘念。時時夢弊廬。細傾新釀酒。盡讀舊藏書。雲崦鉏畝粟。煙畦挽野蔬。從渠造物巧。賦芋戲羣狙。

蜀使歸寄青城上官道人

輕別青城十二年。至今客枕夢林泉。一盃松屑齋前進。兩卷丹經肘後傳。欲與公爲塵外侶。幾時身上峽中船。世間牛蟻何勞問。輸與雲窗一粲然。上官常稱病懶。對客一笑而已。

寄成都籊道人

賣藥錦城中。燒丹雪山麓。石竇取鴉管。玉床收箭鏃。紫雲晨覆鼎。白江夜穿屋。鬼神嚴厲守。沆瀣勤沐浴。此士真可人。高簡遺世俗。江頭十年別。顏色炯在目。使來每寄聲。喜我淡無欲。靈劑何必多。分餉一黍足。

寄邛州宋道人宋與余在臨邛鴨翎舖同遇異人宋俊棄官學道

鴨翎舖前遇秋雨。獨與宋生棲逆旅。坐門憶悅見老仙。劇談氣欲凌天宇。袖中出劍秋水流。血點斑斑新報仇。我

醉高歌宋生舞。洗盡人間千古愁。老仙約我遊太華。是夕嘗醉蓮峯下。語終冉冉已雲霄。萬里秋風吹鶴駕。我今伶俜踐衰境。不如宋生棄家猛。西望臨邛一慨然。青松偃盡丹爐冷。

小齋壁間張王子喬梅子真李八百許旌陽及近時得道諸仙像。每焚香對之。因賦長句。

山城作吏老堪羞。衫色塵昏鬢色秋。斂版那供新黃使。閉門聊與數公遊。至人。不死關千劫。大海無窮環九州。安得相攜從此逝。醉騎丹鳳下玄洲。

芳草曲

蜀山深處逢孤驛。缺甃頽垣芳艸碧。家在江南妻子病。離鄉半歲無消息。長安城門西去路。細靄斜陽芳草暮。尋前一曲渭城歌。馬蹄萬里交河戍。人生誤計覓封侯。芳草愁人春復秋。只願東行至滄海。路窮草斷始無愁。

烏龍廟

江邊蒼龍背負天。蟠踞千載常蜿蜒。其前橫闢爲大州。高城鼓角聲隱然。龍廟於山家於淵。世爲吾州作豐年。老守雖愧筆如椽。潔齋試賦迎神篇。

寒夜移疾

南山北山高嶙峋。朝雨暮雨斷江津。時人正作市朝夢。老子已成雲水身。希世強顏心自媿。閉門謝病客生嗔。天公何日與一飽。短艇湘湖自采蓴。湘湖在蕭山縣。產蓴絕美。

又

走過天涯白髮生。晚叨微祿臥山城。知章自識狂供奉。士季那容醉步兵。斷藥有時攜短鏡。奏書無路請長纓。此心擬說還休去。付與空堦夜雨聲。

寒夜讀書

北窗暖焰滿爐紅。夜半濤翻古檜風。老死愛書心不厭。來生恐墮蠹魚中。

又

韋編屢絕鐵硯穿。口誦手鈔那計年。不是愛書卽欲死。任從人笑作書顛。

又  
憶昨從戎出渭濱。秋風金鼓震咸秦。薦肩竟欠封侯相。三尺藥邊老此身。

有爲予言烏龍高峻不可到處。有僧巖居不知其年。予每登千峯樹望之。慨然爲作二詩。  
樵子向予說。有僧巢翠微。巖扉雲共宿。錫杖鶴同飛。日暮松明火。天寒樹葉衣。棄官從此逝。非子尙誰歸。

又

峻絕無微徑。淙潺有細流。寒巖依作屋。墮毳拾爲裘。木客求相識。毛人約共遊。百年如一瞬。塵世幾公侯。

楊庭秀寄南海集

俗子與人隔塵劫。何啻相逢風馬牛。夜讀楊卿南海句。始知天下有高流。

又

飛卿數闋嶠南曲。不許劉郎誇竹枝。四百年來無復繼。如今始有此翁詩。溫飛卿南鄉子九首。其工不減夢得竹枝。

夜坐示桑甥十韻

好詩如靈丹。不雜饘葷腸。子誠欲得之。潔齋戒不祥。食飲屑白玉。沐浴春蘭芳。蛟龍起久蟄。鴻鵠參高翔。縱橫開武庫。浩蕩發太倉。大巧謝雕琢。至剛反摧藏。一技均道妙。佻心詎能當。結纓與易簪。至死猶自強。東山七月篇。萬古真文章。天下有精識。吾言豈荒唐。

夢回

病骨便衾暖。羈懷怯夢回。鐘殘燈燼落。香冷雨聲來。老抱憂時志。狂非濟世材。明朝入冬假。燒兔薦新醅。

醉中草書因戲作此詩

賜休暫解簿書圍。醉草今年頗入微。手挹凍醪秋露重。卷翻狂墨瘦蛟飛。臨池勤苦今安有。漏壁工夫古亦稀。穉子問翁新悟處。欲言直恐泄天機。

閑步至鞠場值小雪



倒盡床頭酒半罌。笑呼筇杖共閑行。梅花照水爲誰瘦。雪片倚風如許輕。孟德遇冬思射獵。廣文垂老謝才名。歸來跨火西窗下。獨數城樓長短更。

張季長學士自興元遣人來因詢梁益間事悵然有感

長記殘春入蜀時。嘉陵江上雨霏微。垂頭驢瘦悲鈴馱。截道狐奔脫獵圍。曉度市橋花欲語。晚投山驛石能飛。杜鵑言語元無據。悔作東吳萬里歸。

東齋夜興

山城殘角伴疎鐘。擁褐頽然一病翁。紙帳燈明覺龜甲。銅瓶火熟起松風。雨來尤覺睡味美。酒後不知愁思空。忽憶江湖泊船夜。號鳴避弋鬧羣鴻。

烏龍雪

烏龍如真龍。委尾臥江磧。時時登樓望。爪尾略可識。今朝事大異。千嶂忽如失。遙知重雲外。已有雪數尺。頗念采薇人。清坐焉得食。裹飯欲問之。矯首空峭壁。念昔故山時。僵臥風雪夕。靜聞長松折。聲若裂巨石。天晴視巖澗。鳥獸死如積。清夢不可尋。撫楯三太息。

曉出東城馬上作

曉出東城數幟紅。蒙茸狐貉擁衰翁。郊墟歉歲蕭條後。風雪窮冬慘淡中。耐辱已慚非士節。端憂未辦濟民窮。誕欺成俗真當懼。誰挽天河一洗空。

與建子振孫登千峯樹觀烏龍雪

二穉慧堪憐。猶賒志學年。能拋竹屨屢。來看玉蜿蜒。百念寬身後。餘生慰眼前。善和書幸在。它日要人傳。

述懷

尺寸雖無補縣官。此心炯炯實如丹。錫胡未滅敢愛死。尊酒在前終鮮歡。亞父抱忠撞玉斗。虞人守節待皮冠。縱言老病摧頽甚。壯氣猶憑後代看。

又

謗譽紛紛笑殺儂。此身本自等虛空。大鵬境界織塵裏。曠劫年光掣電中。翻動煙霞長纜在。招呼風月一尊同。是凡是聖誰能測。試問西隣織屨翁。禪家所謂陸州陳蒲葦者。故居在郡治之西二百步。

到嚴十五晦朔郡釀不佳。求於都下。既不時。至欲借書讀之。而寓公多祕。不肯出。無以度日。殊惘惘也。桐君故隱。兩經秋。小院孤燈。夜夜愁。名酒過於求。趙璧異書。渾似借荊州。溪山勝處。身難到。風月佳時。事不休。安得連車載鄆。釀金鞭重作浣花遊。

雨中獨酌

僻郡荒山下。高齋寒雨中。微波生酒綠。短焰擁爐紅。學廢悲身老。民窮祝歲豐。廚人羞雉兔。更憶喚鄰翁。雉兔登盤。頗淺隣里。

被酒徑臥。比覺已五鼓矣。

俗事驅人挽不回。經年無地濯氛埃。酒酣稍覺客愁破。睡覺忽聞山雨來。窗外樹寒無鳥宿。壺中水暖有梅開。五更欲起。先惆悵。燭下文書已作堆。

燈下讀玄真子漁歌。因懷山陰故隱。追擬

石帆山下兩空濛。三扇香新翠箬篷。蘋葉綠。蓼花紅。回首功名一夢中。

又

晴山滴翠水接藍。聚散漁舟兩復三。橫埭北。斷橋南。側起船篷便作帆。

又

鏡湖俯仰兩青天。萬頃玻璃一葉船。拈棹舞。擁蓑眠。不作天仙作水仙。

又

湘湖煙雨長蓴絲。菰米新炊滑上匙。雲散後。月斜時。潮落舟橫醉不知。

又

長安拜免幾公卿。漁父橫眠醉未醒。煙艇小。釣車腥。遙指梅山一點青。

送客至望雲門外

冬溫頻作雨。晨冷頓摧晴。嫩日滿江驛。淡煙籠郡城。憂民懷凜凜。謀已恥營營。投檄真須疾。隣翁約耦耕。

題城南堂故人陳亦顏少僻四方晚乃卜居臨安城南因以城南名其堂屬余賦詩

山林恨與親友別。朝市不堪車馬喧。陳子調高無俗客。一廛卻要近修門。

又

借問城南老居士。新年樂事復何如。春寒催喚客嘗酒。夜靜臥聽兒讀書。

故山葛仙翁丹井有偃松覆其上天矯可愛寄題

葛翁煉丹一千年。翁去丹飛餘此泉。炯如古鏡不拂拭。俯聽缺甃時鏘然。老龍受命護泉臥。蜿蜒直恐從天墮。人言神物老愈靈。夜半聲酣風雨過。放翁還山亦何有。閉門吟歎龍爲友。客來相對聊曲肱。但酌此泉勝酌酒。

估客樂

長江浩浩蛟龍淵。浪花正白蹴半天。軻峨大扁望如豆。駭視未定已至前。帆席雲垂大隄外。纜索雷響高城邊。牛車麟麟載寶貨。磊落照市人爭傳。倡樓呼盧擲百萬。旗亭買酒價十千。公卿姓氏不曾問。安知孰秉中書權。儒生辛苦望一飽。趁起光範祈哀憐。齒搖髮脫竟莫顧。詩書滿腹身蕭然。自看賦命如紙薄。始知估客人間樂。

楚宮行

漢水方城一何壯。大路並馳車百兩。軍書插羽擁修門。楚王正醉章華上。璇題藻井窮丹青。玉笙寶瑟聲冥冥。忽聞命駕遊七澤。萬騎動地如雷霆。清晨射獵至中夜。蒼兕玄熊紛可藉。國中壯士力已殫。秦冠東來遣誰射。

妾命薄太白作此篇言長門宮事予反之

妾命薄。早入天家侍帷幄。君王勤儉省宴游。寶柱朱弦塵漠漠。日長別殿承恩稀。盱眙猶聞親萬機。宮中雖無珠玉賜。塞上不見煙塵飛。不須悲傷妾命薄。命薄卻令天下樂。

晚登千峯榭

只道文書無了日。也能擺撥上層臺。窗明山雪暮方作。露白野梅寒未開。老病真慚天下士。窮愁強覆掌中盃。兒

曹莫怪憑闌久，得句何妨乘燭回。

畫睡

書獄徵租自笑忙，暫歸聊得憩匡床。屏圍夜雨孤舟句，枕帶秋風九日香。方睡菊花枕，一卷蠹書樓倦手，數聲殘角報斜陽。清泉浴罷西窗靜，更覺茶甌氣味長。

胸次鬱鬱偶取枯筆作狂草遂成長句

酒隱人間六十年，晚途斂板自傷憐。莊周聊寄漆園吏，梅福終爲吳市仙。方外酒徒盟尚在，囊中劍術老當傳。此心鬱屈何由豁，聊遣龍蛇落蜀牋。

休日與客燕語既去聽小兒誦書因復作草數紙

賜沐家居謝掾曹，暫將蕭散慰勤勞。琅琅應節兒書熟，塵壘生風客論高。玉屑名牋來濯錦，風濤奇石出臨洮。託盟翰墨吾安敢，揮灑淋漓自足豪。張季長寄佛研，何元立寄蜀紙，皆近到新定。

青城大面山中有二隱士一曰譙先生定字天授建炎初以經行召至揚州欲留之講筵不可拜通直郎

直秘閣致仕今百三十餘歲巢居峻絕人不能到而先生數年輒一出至山前人有見之者其一曰姚太尉平仲字希晏靖康初在圍城中夜將死士攻賊營不利騎駿驟逸去建炎初所在揭榜以觀察使

召之竟不出淳熙甲午乙未間乃或見之於丈人觀道院亦年近九十紫髯長委地喜作草書蓋皆得道於山中云偶成五字二首託上官道人寄之

寄謝譙夫子。今年一出無萬緣。隨夢斷。百念與形枯。雲護巢松谷。神呵煨藥爐。憑高應念我。白首學徵租。

右寄譙先生

太尉關河傑。飛騰亦遇時。中原方蕩覆。大計易差池。素壁龍蛇字。空山熊豹姿。煙雲千萬疊。求訪固難知。

右寄姚太尉

累日多事不復能觀書感歎作此詩

我生無它長。所得靜而簡。出任三十年。不殖一金產。四方到爲家。所向不容揀。南遊極巨海。西戍掠危巖。爲州亦

可好。且復占仕版。俸不給。掉糜。況敢事酒錢。晨興坐堂上。符檄高巉巖。藏書三萬軸。一字不到眼。胸中積磊塊。歎息誰爲鏟。浮生固如此。正可付一莞。

北窗

雲開見山雪。院靜聞松風。吏去曲肱臥。疑非塵世中。

讀范文正瀟灑桐廬郡詩戲書

桐廬朝暮苦匆匆。瀟灑寧能與昔同。堆案文書生眼黑。入京車馬漲塵紅。逢迎風月貓生事。彈壓江山毛穎功。二子年來俱埽迹。頽然堪笑一衰翁。

筍中偶得去年二月都下數詩

昨佩魚符入鳳城。春風處處聽鶯聲。欲尋舊友半爲鬼。重到西湖疑隔生。浮世正如投六簿。野人何意慕三旌。嚴州戍滿真當老。猶幸爲民死太平。

感寓

人生堂堂七尺身。本與聖哲均稱人。唐虞乃可讓天下。光被萬世常如新。哀哉末俗去古遠。斲喪太朴澆全淳。豆羹簞食輒動色。攘竊乃至忘君親。錙銖必先計利害。詎肯冒死求成仁。不欺當從一念始。自古孝子爲忠臣。

征婦怨效唐人作

萬里安西久宿師。東風吹草又離離。玉壺貯滿傷春淚。錦字挑成寄遠詩。擊虜將軍方戰急。押衣敕使尙歸遲。粧臺寶鏡塵昏盡。髮似飛蓬自不知。

雪

瘴癘家家一洗無。更欣餘潤沃焦枯。花壺夜凍先除水。衣焙朝寒久覆爐。松頂積高時自墮。竹枝壓重欲相扶。雲開正值春風早。卻看晴光滿九衢。

寒夜思飲酒不果與韓同嚼藥渣魚鱸作

我老畏作病。盃酒久不持。讀書寒雨中。比夕頗思之。呼童欲洗酌。顧以病自疑。清坐歎寂寞。痛飲愁淋漓。三爵醒

辭間。此理當徐思。一掬琴高魚。且復伴吾兒。

縱筆

凍研笑臞儒。雕弓隱獵徒。不成平趙魏。且可老江湖。顛顛頭雖禿。輪困膽尙匱。咸陽呼五白。何遽不能盧。

又

故國吾宗廟。羣胡我寇讎。但應堅此念。寧假用它謀。望駕遺民老。忘兵志士憂。何時聞遣將。往護北平秋。

歲晚盤尊索然戲書

經年薄宦客桐廬。市邑蕭然一物無。名酒不來惟飲溼。長魚難覓且焚枯。支離鶴骨寒添瘦。宛轉龜腸夜自呼。更與兒曹同一笑。燈前短褐拆天吳。

立春前四日謝雪方拜天慶庭中雪復作

珮玉珊珊謁衆真。竟煩一雪慰疲民。未看舞鶴隨飛蓋。先喜飄花集拜茵。耕壟土膏千耦出。市樓酒賤萬家春。使君老去悲才盡。詩句難追節物新。

桐江行

我來桐江今幾時。面骨嶢嶢鬢如雪。怒嗔不復有端緒。讒謗何曾容辨說。十年山棲卻水食。釀桂餐芝自芳潔。作官一飽仰紅腐。坐對盤殮常嘔噎。雪晴宿戒南山遊。剝珉賦詠臨清流。將行復輟卻退坐。臺符吏牘令人愁。胸中崔嵬向誰吐。獨立憑高時自語。文章當以氣爲主。無怪今人不如古。

屢雪二麥可望喜而作歌

苦寒勿怨天雨雪。雪來遺我明年麥。三月翠浪舞東風。四月黃雲暗南陌。坐看比屋騰歡聲。已覺有司寬吏責。腰鎌丁壯傾閭里。拾穗兒童動千百。玉塵出甕飛屋梁。銀絲入釜須寬湯。寒醅發劑炊甗裂。新麻壓油寒具香。大婦下機廢晨織。小姑佐庖忘晚粧。老翁飽食笑捫腹。林下擊壤歌時康。

丁未除夕前二日休假感懷

掛冠神武莫躊躇。家具何妨載鹿車。怨謗相乘真市虎。技能已盡似黔驢。黃金散後猶耽酒。白髮生來更愛書。新

歲定尋林下約。一觴一飯未成疎。

又

夢寄梅村竹塢間。不堪客裏見春還。潮生水欲通南澗。雪霽雲猶冒北山。病思過年應小減。官身得假未全閑。變名吳市男兒事。末路低回自笑孱。

假中閉戶終日偶得絕句

兩聲滴滴暮未已。苔疊重重寒更添。知爲使君初睡起。清香一綫透疎簾。

又

老夫昔是青城客。酒肉淋漓豈本心。還我山家本來面。數拳春筍薦孤斟。仗錫山寄筍枯。一名筍兒拳。

又

官身常欠讀書債。祿米不供沽酒資。剩喜今朝寂無事。焚香閑看玉谿詩。

除夜雪

只怪重衾不禦寒。起看急雪玉花乾。遲明欲謁虛皇殿。廐馬蒙氈立夜闌。

又

北風吹雪四更初。嘉瑞天教及歲除。戊申元日卯初立春。半盞屠蘇猶未舉。燈前小草寫桃符。

戊申元日

白頭身世歎羈孤。一念兒時淚已濡。尙記爭先書鬱壘。豈知落後舉屠蘇。盃盤草草思鄰舍。車馬紛紛厭九衢。六十年非心自了。掛冠猶足補東隅。

初春感懷

關河謝遠遊。歲月迫歸休。敢恨驥伏櫪。但思狐首丘。雪明窗誤曉。霜點鬢驚秋。羈旅饒愁思。誰憐季子裘。

閉閣

閉閣孤城賸放慵。桐江清絕勝吳松。雲收忽見北山雪。月落正聞西寺鐘。世味老來無奈薄。土思病後不勝濃。尊

羹豈止方羊酪。輕許平生笑土龍。

潺湲閣小立

飽食何曾補縣官。潺湲閣上倚闌干。水紋靴襪風初緊。花色鞋紅露未乾。薄酒愁邊供醉醒。故人夢裏話悲歡。孤城正在山窮處。過社今朝尙爾寒。

睡起至園中

欲掛衣冠萬事輕。不妨小住向山城。綠尊耐久常相伴。雪鬢纔生便放行。拂枕時時覓幽夢。倚闌日日聽新鶯。夕陽更有欣然處。來看青郊雨後秧。

卷二十一

上書乞祠

上書又乞奉祠歸。夢到湖邊自叩扉。此去敢辭依馬磨。向來真慣擁牛衣。致身途遠年齡暮。報國心存氣力微。誓墓那因一懷祖。人間處處是危機。

春殘

老隨空山裏。春殘白日長。庸醫司性命。俗子議文章。燭映一池墨。風飄半篆香。箇中有佳處。袖手看人忙。

三月二十日晚酌

暫因賜沐作閑身。太息纔餘一日春。委地落花新著雨。穿簾歸燕不生人。衛青此日怪長揖。王翰當年謀卜鄰。商略晚窗須小醉。朱櫻青店正嘗新。

次前韻

烏帽紅塵過去身。荒山野水又經春。殘年欲盡初聞道。薄宦宜休不問人。一局枯棋忘日月。數斟濁酒約比鄰。石帆山下菱歌斷。未歎臨風白髮新。

北窗閑詠



陰陰綠樹雨餘香。半捲疎簾置一牀。得祿僅償賒酒券。思歸新草乞祠章。古琴百衲彈清散。名帖雙鉤搨硬黃。夜出灞亭雖跌宕。也勝歸作老馮唐。

休日留園中至暮乃歸

儘道官身屬太倉。未妨寄傲向林塘。綠波春漲羣魚樂。清露晨流蔓草香。閑試名弓來射圃。醉盤驕馬出毬場。長城萬里知誰許。看鏡空悲兩鬢霜。

北窗病起

一飢可忍萬緣輕。況復幽窗疾漸平。更事天公終賞識。欺人鬼子漫縱橫。道邊塵起頻障扇。門外波清剩濯纓。不爲褊心憎薄俗。客星祠下是歸程。

自東津泛舟至桐溪

潮生東西津。雨暗上下塔。蕭蕭亂菰蒲。拍拍起鳧鴨。吾船雖褊小。尙可著一榻。溪風吹醉頰。高枕墮紗帽。南山浮溼翠。偃蹇呼不答。安得青蓮公。傑句爲彈壓。

逕客至大浪灘上

小壘瓜蔓綠。短籬梅子黃。曉風掠水來。吹我醉面涼。平生蕭散意。未覺將迎忙。溪山供一笑。客主可相忘。寧當倒手版。聊復據胡床。太平豈無象。麥飯家家香。我歸亦何有。養氣猶軒昂。那因五斗陳。坐變百鍊剛。

郊行

小雨東郊氣象新。蕭蕭清吹爽衣巾。並谿密竹巧藏寺。夾道新麻高沒人。老厭簿書愁欲睡。病疎盃酌渴生塵。桐君山路無多遠。元自知津莫問津。

夏雨

東風吹雨溪上來。北山出雲以應之。嚴州城中三日雨。朝暮點滴無休時。向來秧底乾欲裂。白水漫漫俄盈陂。豚肩覆豆巫醉飽。龍骨挂壁蠶盡嬉。今年蠶麥收數倍。繭大如瓮麥兩岐。西成在眼又如此。還鄉鼓腹歌淳熙。待去受代纔四十日。

兩中作

礎潤雲生五月中。山城細雨晚空濛。讀書雖恨此身老，把酒尙思吾輩同。積潤畫圖昏素壁，漬香衣幘覆熏籠。新晴不用占鐘鼓，臥聽林梢漸漸風。

醉題

不學空門不學仙，清樽隨處且陶然。人情正可付一笑，生世元知無百年。白首難陪東閣客，清風自足北窗眠。歸耕只要無人問，安用文章海內傳。

有懷青城霧中道友

雪谷孤松自鬱然，紛紛朝困但堪憐。坐更拂石芥城劫，時說開皇龍漢年。淡蕪藜羹天送供，閑拖藤杖地行仙。笑看王室中興後，更約長安一醉眠。

梅雨初晴迓客東郊

霽色澄鮮已斷梅，江郊隱隱尙輕雷。層巒正對孤城落，健席遙看大艦來。幼婦髻鬟簪早稻，近村坊店賣新醅。吾行在處皆詩本，錦段雖殘試剪裁。

晚歸

暑雨初晴日，江臯欲暮天。鴉棲沙際樹，人喚渡頭船。病骨羸將折，昏眸困欲眠。市橋燈火鬧，且復喜豐年。

休日登千峯樹，遇大風雨氣象甚偉。

雨中獨坐

馬目山頭雨脚昏，龍津橋下浪花翻。年豐郡僻無公事，一炷清香畫掩門。

舊識姜邦傑於亡友韓无咎許近屢寄詩來，且以无咎平日倡和見示，讀之悵然，作此詩附卷末，須溪本

作嚴州贈姜梅山

故人玉骨已生苔，謂南籬公。邂逅逢君亦樂哉。湖寺繫舟無夢去，京塵馳騎有詩來。醉中不敢教兒輔，看處常須

浴手開。久矣世間無健筆。相期力幹萬鈞回。

釣臺見送客罷還舟熟睡至覺度寺

抽身簿書中。茲日睡頗足。縹緲桐君山。可喜忽在目。紛紛衆客散。杳杳一筇獨。昔如脫淵魚。今如走山鹿。詩情森欲動。茶鼎煎正熟。安眠簟八尺。仰看帆十幅。逍遙富春飯。放浪漁浦宿。送老水雲鄉。羹藜勿思肉。

泛富春江

雙鷗搖江疊鼓催。伯符故國喜重來。秋山斷處望漁浦。曉日昇時離釣臺。官路已悲捐歲月。客衣仍悔犯風埃。還家正及雞豚社。剩伴鄰翁笑口開。

宿漁浦

東歸剡曲只三程。旅泊還如萬里行。燈影動搖風不定。船聲鞞鞫浪初生。曳裾非復白頭事。瞑目那求青史名。歸去若爲消暮境。一蓑煙雨學春耕。

拆小江飯舟中

老作孤舟客。秋濤漲小江。林昏見飛燐。村近有驚尨。天闊三更月。篷低一尺窗。魚殮雖草草。聊喜到吾邦。

乞祠久未報

聖廟未許領叢祠。擁褐清羸不自支。鄧禹有靈應笑拙。周公無夢固知衰。得閑要及身安日。到死應無睡足時。七百日來塵滿抱。今朝漸祓有新詩。

七月十日到故山削瓜淪茗倚然自適

鏡湖清絕勝吳松。家占湖山第一峯。瓜冷霜刀開碧玉。茶香銅碾破蒼龍。壯心自笑老猶在。狂態極知人不容。擊壤窮閭歌帝力。未妨堯舜亦親逢。

曉興

亂蟬嗷新秋。老木立清曉。我亦岸綸巾。寄傲萬物表。大千藏粒粟。皓劫過飛鳥。癡子居其間。利欲自纏繞。可憐榮進意。未向蓋棺了。浮名更嚇鬼。白鷺駕丹旆。我於斯世事。看破自少小。老矣更何求。歸哉憩林沼。

憶秋

會稽八月秋始涼。梧桐葉落覆井床。月明綺樹邊鷓鴣。露下溼草啼寒蟻。丈夫行年過六十。日月雖短志意長。匣中寶劍作雷吼。神物那得終摧藏。君不見昔時東都宗大尹。義感百萬虎與狼。疾危尙念起擊賊。大呼過河身已僵。宗休霖垂死。尙部勸諸將北伐。忽大呼過河者三。國卽殞絕。

秋夜有感

候蟲何唧唧。歲晚聲出壁。不惟嫺婦驚。感此白頭客。壯年事征戍。萬里不得息。揚颿凌秋濤。策馬赴山驛。日照蛟龍涎。雪印豺虎迹。誰知七尺軀。幸脫九死厄。前年補畿郡。入對瞻玉色。報恩無死所。再拜衰淚滴。卽今故山歸。愈歎老境逼。不眠中夜起。仰視星歷歷。中原何時定。銅駝臥荆棘。滅胡恨無人。有復不易識。

五鼓入城

道旁竹樹如傾。帶睡悠悠十里行。曉色未分煙尙重。壓城樓閣已崢嶸。

飯罷忽鄰父來過戲作

旋炊香稻鬻新菰。飯飽逍遙樂有餘。茶味森森留齒頰。香煙郁郁著圖書。毛皮尙在寧知我。鱗甲深藏莫問渠。賴有鄰翁差耐久。兩畦頻喚共攜鉏。

秋夜讀書

一雨灑殘熱。秋風忽已深。青燈照空廊。重露滴高林。危坐讀周易。會我平生心。夜分徐掩卷。閑弄床上琴。簾外初斜河。屋頭已橫參。人生每如此。利欲安能侵。

夜坐忽聞村路報曉鐵牌

何人叩鐵警農耕。炊飯家家起五更。也似早朝風雪裏。遙聽官漏下宮城。

又

秋氣淒涼霧雨昏。老書生病臥孤村。五更不用元戎報。片鐵鐸鐸自過門。

白雲自西來過書葉南窗

眠山千里青未了。恨隔長江不到吳。羈雲冉冉吾舊識。安得挽之來坐隅。

贈竹十韻

放翁小築湖西偏。虛窗曲檻無炎天。人間乃有真富貴。遶舍十萬碧玉椽。連林娟娟眩清露。高枝裊裊播蒼煙。常憂俗客觸新粉。屢戒園丁傷逸鞭。涼生尊罍消午醉。聲撼窗扉驚晝眠。春殘斲土得笑茁。氣壓卿相食萬錢。爾來作吏若墮羿。每一夢到心悽然。還家再見卻愉快。塵土何地從臞仙。囊中幸藏餐玉法。欲屏萬事相周旋。更當待月出東嶽。坐石泠泠揮響泉。

雜感

自古文章與命仇。功名身外更悠悠。一從識得元無事。窮死逢人不說愁。

又

小軒幽檻兩絲絲。種竹移花及此時。客去解衣投臥榻。半醒半醉又成詩。

又

少年意氣與春爭。朱彈金鞭處處行。誰信卽今空谷裏。旋租黃犢學躬耕。

又

自洗銅壺試玉醅。小軒風月爲徘徊。此心未與年俱老。猶解逢花眼暫開。

又

側帽垂鞭小陌東。名花迎笑一枝紅。啼鶯驚斷尋春夢。惆悵新霜點鬢蓬。

入城寓榻開元

羸僮倦馬困長堤。借榻禪房日未西。熟睡覺來閒隱几。庭楸陰轉乳鴉啼。

夜出偏門還三山

月行南斗邊。人歸西郊路。水風吹葛衣。草露溼芒屨。漁歌起遠汀。鬼火出破墓。淒清醒醉魂。荒怪入詩句。到家夜已半。佇立叩蓬戶。穉子猶讀書。一笑慰遲暮。

四鼓酒醒起步庭下

酒解夜過半。出門步中庭。天高河漢白。月淡煙霧青。重滴竹杪露。疎見樹罅星。壞甃啼寒蠶。深竹明孤螢。秋晚雖未霜。蠹葉時自零。四序逝不留。慨然感頽齡。平生茅一把。不博帶萬釘。鳴澗謝拍拍。鴻路追冥冥。

感憤秋夜作

月昏當戶樹笑兀。風惡滿天雲往來。太阿匣藏不見用。孤憤書成空自哀。吾輩赤心本貫日。昔人白骨今生苔。榮河溫洛不可見。青海玉關安在哉。

反感憤明夜讀前作而悲乃復作此自解

臍臍庭樹雞初鳴。啾啾天衢雁南征。百年朝露豈長久。萬事浮雲常變更。出處有心終有愧。聖賢無命亦無成。西疇雖薄可自力。雙憤且當乘兩耕。

東齋

著脚紅塵已恨深。便應畢世住山林。貴人自作宣明面。老子曾聞正始音。議論坐狂當永棄。簿書緣病復難任。東齋幽寂憑誰畫。開幔床橫一素琴。

兩夜四鼓起坐至明

門巷冷如冰。生涯淡似僧。小窗愁夜雨。孤影怯秋燈。林鶻棲仍起。山童喚不應。悠然坐待旦。息倦倚書牀。

夜讀兵書

八月風雨夕。千載孫吳書。老病雖憊甚。壯氣頗有餘。長纓果可請。上馬不躊躇。豈惟鑿臯蘭。直欲封狼居。萬乘久巡狩。兩京盡丘墟。此實在臣子。憂愧何時據。南鄭築壇場。隆中顧草廬。邂逅未可知。旄頭方掃除。

老歎

百年逝不留。萬事本難料。夜行鐘漏迫。但取賢達笑。頗疑功名事。造物付年少。歸休莫問人。曉鏡勤自照。

秋霽

灑氣明山川。霽色滿天地。西風吹我衣。忽有萬里意。中原運當平。所要在得土。餘年猶幾何。棄置復棄置。

齋中聞急雨

一味疎慵養不才。飯蔬亦已罷銜盃。銜茆終日人聲絕。臥聽芭蕉報雨來。

老病追感壯歲讀書之樂作短歌

少年志力強。文史富三冬。但喜寒夜永。那知睡味濃。庭樹風淅淅。城樓鼓鼙鼙。自鞭不少貸。凍坐聞晨鐘。探義劇攻玉。搗文笑雕龍。落紙筆縱橫。圍坐書疊重。得意自吟詠。清悲答莎蛩。飢腸得一甞。笑如紫駝峯。俯仰五十年。干世終不逢。夜半起飯牛。頽然成老農。束書不更讀。蠹簡流塵封。世無袁伯業。太息吾何從。

閑中戲書

瀉飯從來不願餘。還山喜遂此心初。挽河盡洗彈冠念。閉戶閑讎插架書。一榼不妨從客飲。數椽也復是吾廬。少游細看猶多事。安用人間下澤車。

又

少年拜舞綴庭紳。曾見中天日月新。金印終歸妄校尉。白頭仍是斥仙人。修營香火三生願。收拾風波九死身。豈但漁樵與爭席。海邊漚鳥亦相親。

又

釣竿風月寄滄洲。醉髮髭髭荻葉秋。仕進世誰知我嬾。功名命不與人謀。衰遲更覺歲時速。疎賤空先天下憂。病骨未銷讒未已。聊須周易著牀頭。

采藥

養子編成細箬新。獨穿空翠上嶙峋。丹砂巖際朝曦日。枸杞雲間夜吠人。絡石菖蒲蒙綠髮。纏松薜荔長蒼鱗。金貂謁帝我未暇。且作人間千歲身。

過猷講主桑瀆精舍

寂寞衡門傍水開。放翁曳杖此徘徊。林疎時見釣篷過。風急忽聞菱唱來。講罷繩床懸塵柄。齋餘童子供茶盃。解衣許我閒摩腹。又作幽窗夢一回。

自桑瀆泛舟歸三山

端爲身閑覺日長。不嫌兒輩笑清狂。湖光潏潏歸舟疾。雨點霏霏醉頰涼。斷竹苔生人喚渡。孤村霜近稻登場。宦情不獨今日薄。游子從來念故鄉。

訪野人家

山入柴門窄。橋通野路長。羣童挑燕筍。幼婦采雞桑。淳古非今俗。留連到夕陽。盤飧敢辭飽。滿箸藥苗香。

塞上曲

秋風獵獵漢旗黃。曉陌霜清見太行。車載氈廬載酒。漁陽城裏作重陽。

又

將軍許國不懷歸。又見桑乾木葉飛。要識君王念征戍。新秋已報賜冬衣。

又

金鼓轟轟百里聲。繡旗寶馬照川明。王師仗義從天下。莫道南兵夜斫營。

又

老矣猶思萬里行。翩然上馬始身輕。王關去路心如鐵。把酒何妨聽渭城。

硯湖并引

余得英石。數峯環立。其中凹處。可容一龕。因以儲水代硯滴。名之曰硯湖。且爲賦詩。

羣山環一湖。湖水綠溶漾。微風掠窗過。亦解生細浪。餘流浸翠麓。倒影寫青嶂。自然出天工。豈復煩巧匠。病夫屏盃酌。不遣運酒舫。時時挹清泚。筆墨助豪宕。帖成龍蛇走。詩出雷雨壯。從今几硯旁。一掃蟾蜍樣。

泛湖

筆牀茶甕釣魚竿。潏潏平湖淡淡山。浪說枕戈心萬里。此身常在水雲間。

寓蓬萊館

桐葉吹殘蕉葉黃。驛窗微雨送淒涼。長安許史無平素。莫恨樓棲立路旁。



又

古驛蕭蕭獨倚闌。角聲催晚雨催寒。殘年遇合應無日。猶說新豐強自寬。

夜還驛舍

樓上寥寥初發更。斷雲收雨旋成晴。市橋新漲搖燈影。驛路殘泥壯屐聲。關關變遷非曩日。情懷牢落感餘生。高秋病起猶能醉。剩買官醅樂太平。

舟中大醉偶賦長句

過江何敢號高流。偶與俗人風馬牛。畫楫新搖嚴瀨月。清尊又醉戴溪秋。壯心無復在千里。老氣尙能橫九州。古寺試求三大壁。爲君驅筆戰蛟虬。

行飯至新塘夜歸

門前徙倚尙餘霞。湖上歸來月滿沙。雲溼一聲新到雁。林昏數點後棲鴉。淒迷籬落開寒菊。鄭重比鄰設夜茶。早議挂冠君會否。暮年心念不容差。

雲門感舊

總角來遊老未忘。背人歲月去堂堂。樺松看到偃霜蓋。廢寺憶曾開寶坊。佛几古燈寒焰短。齋廚新粟午炊香。興闌未忍登車去。更倚溪橋立夕陽。

若耶溪上

微官元不直鱸魚。何況人間足長途。今日溪頭慰心處。自尋白石養菖蒲。

又

九月霜風吹客衣。溪頭紅葉傍人飛。村場酒薄何妨醉。菰正堪烹蟹正肥。

秋雨頓寒偶書

羈懷不醉自昏昏。臥對青燈燭掩門。沙雁帶寒來古澤。林鳩催雨暗孤村。數椽蟹舍償初志。九陌塵衣洗舊痕。自歎一生書裏活。暮年無力濟黎元。

新晴泛舟至近村偶得雙鰕而歸

秋風一夜老汀蘋。剡曲稽山發興新。青嶂會爲身後塚。扁舟聊作畫中人。園林搖落知寒早。父老逢迎覺意真。歸舍不妨成小醉。眼明細柳貫霜鱗。

上書乞祠輒述鄙懷

千祿本代耕。窮達敢自必。早遇高皇帝。九品對宣室。妄懷犬馬心。整緯不暇恤。上恩等天地。腰領免斧鑕。旋屬紹興末。賜谷瞻出日。賤臣復何幸。便殿首造膝。煌煌帝堯典。推擇首秉筆。愚忠雖懇款。野性實坦率。飄然去周行。湖海抱沉疾。遠遊客窮塞。亭障秋蕭瑟。聖君終記省。萬里忽乘駟。同朝久凋謝。存者不十一。造廷故抱暗。下殿衰涕盜。蹉跎又十載。憂患豈易述。流年不貸人。白髮日夜密。冠雖未即挂。馭已不容叱。尙覬公朝恩。養老霑散秩。閉門教子孫。志願真永畢。

泛湖上雲門

三百里湖秋渺然。是間可以著釣船。浩歌莫過石帆下。爛醉夜泊樵風邊。樵風溼在若耶溪。鏡湖之間。茫茫沙月忽側墮。裊裊山氣時孤鶩。冥鴻遠舉謝斯世。白鷗自放全其天。幽棲幸脫市朝械。捷徑那著功名鞭。人生各自適意耳。稷禹巢許知誰賢。

書歎

世態秦欺楚。交情越視秦。寧教待羝乳。不耐望車塵。書積高圍坐。花繁亂插巾。那須散人號。已是葛天民。

枕上作

寒夜臥林廬。蕭然適有餘。蟲悲號壞壁。燈暗守殘書。養拙天知我。安貧老似初。雖非漆園吏。也作蝶蘧蘧。

老病無復宦情或者疑焉作此示之

病思蕭條豈獨今。十年前已鬢霜侵。舊交略盡形吊影。薄宦宜休口語心。老驥已甘當伏櫪。窮猿況是急投林。別君徑入亂雲去。後日相思何處尋。

拄杖

放翁拄杖具神通。蜀棧吳山興未窮。昨夜夢中行萬里。蓮華峯上聽松風。

北望

北望中原猴滿巾。黃旗空想渡河津。丈夫窮死由來事。要是江南有此人。

歲晚感懷

利名爭奪兩皆非。生世寧殊露易晞。老冉冉來誰獨免。冢壘壘處會同歸。聽歌莫惜終三疊。縱獵何妨更一圍。醉臥日高呼不醒。笑人霜曉束朝衣。

大雨中作

北風撼山勢岌岌。老夫倚杖檐前立。貪看白雨掠地風。飄灑不知衣盡溼。當年入朝甫三十。十丈胡塵叩江急。屬聞蠟彈遣檄書。亟壞布裳縫袴褶。卽今白髮不可數。破屋頽垣窘風雨。汝生汝死問者誰。人雖不問心自悲。

繫舟平水步

舟尾參差野岸橫。屐聲穿市得閑行。兩昏茆店炊煙煙。人語蓬窗續火明。枝上橙香初受摘。擔頭菰脆正堪烹。漁樵自是平生意。不爲衰遲薄宦情。

初到行在

六十之年又四年。也騎瘦馬趁朝天。首陽柱下孰工拙。從事督郵俱聖賢。筆墨有時閑作戲。功名到底是無緣。都城處處園林好。不許山翁醉放顛。

還都

平生薄名宦。所願得早休。奔走三十年。鏡中霜鬢秋。歸踏長安道。恍然皆舊遊。處處見題名。始驚歲月遒。西湖隔城門。放浪輸白鷗。當時見種柳。已足繫巨舟。挂冠當自決。安用從人謀。勿以有限身。常供無盡愁。

宿監中偶作

流落歸來兩鬢絲。此生真媿北山移。數殘宮漏寒無寐。開盡梅花病不知。同舍破甘醒宿酒。故人折簡索新詩。生涯可笑清如許。枉是京塵撲馬時。譚德稱有簡催和詩。

四鼓出嘉會門赴南郊齋宮

空遊樂益半吾生。不死還能見太平。初喜夢魂朝帝所。更驚老眼看都城。九重宮闕晨霜冷。十里樓臺落月明。白髮蒼顏君勿笑。少年慣聽舜韶聲。

題張野夫監簿大招圖

此生只合老漁樵。扶病誰令趁早朝。開卷未終三太息。羈魂零落恐難招。

簡譚德稱監丞

廣春江上送舟行。淚灑春風別少城。冉冉幾經新歲律。依依猶有舊交情。塵冠當挂彈何用。革帶頻移瘦自驚。剩欲約公風雨夜。一燈相對話平生。

致齋監中夜與同官縱談鬼神效空陵先生體

五客圍一榻。夜語窳幻怪。或誇雷可斫。或笑鬼可賣。或陳混沌初。或及世界壞。或言修羅戰。百萬起睚眦。餘談恣搜抉。所出雜細大。風雲隨皮帳。幽坎窅鐵城。羣號起古聚。孤泣出空廓。妖狐冠調樓。搗袂弄姿態。空轉伏逸囚。夜半出窳塚。雖云多同益。願犯綺語戒。不如姑置之。投枕休困憊。明當掛衲衣。僕僕愁巫拜。

夜歸

飲酒不盡。輒甚不竟局。索馬踏街鼓。卻視月挂木。疾馳沿河隄。不記幾坊曲。到家四鄰寂。往往睡已熟。天香餘鼻莫。佛燈倚燈炷。中庭雖一席。緩步意亦足。寒犬吠荆籬。樓鶴起叢竹。市聲從北來。始覺非林谷。卻尋西窗書。開卷剪殘燭。官閣居更遠。一笑謝羈束。

次韻鄭唐老

宦遊早日闕相聞。一面那知乃爾勤。秋釣清灘方入夢。曉穿細仗又逢君。驟看落筆驚風雨。便擬同舟臥水雲。作意歸休還會否。暮年無力起斯文。

五鼓赴太社臘祭

霜寒裂屋瓦。月白射坊門。病骨愁看影。孤吟怯斷魂。飢鷹掣羈縲。老馬伏車轅。不奈清宵夢。殘蕪滿故園。

己酉元日

夜雨解殘雪。朝陽開積陰。桃符呵筆寫。椒酒過花斟。巷柳搖風早。街泥濺馬深。行宮放朝賀。共識慕堯心。以亮陰免賀禮。

送潘德久使薊門

崑崙東分一枝渾。奔蹴砥柱經龍門。羲皇受圖撫上古。神禹治水開中原。三靈實扶藝祖業。萬國共仰東都尊。羣兒撞壤吁可歎。願使殘虜今遊魂。因君試求出師路。孟津白馬應如故。不須更議繫河橋。北風正可乘冰渡。頗聞盧龍已數盡。復道飛狐合屯戍。轅門倘駐拂雲祠。烽火應過明妃墓。君歸解鞍藉芳草。細談塞北忘予老。讀書飲酒待賊平。萬丈旄頭方下掃。

我夢

我夢入煙海。初日如金鏑。赤手騎怒鯨。橫身當渴龍。百日京塵中。詩料頗闕供。此夕復何夕。老狂洗衰慵。夢覺坐歎息。杳杳三茄鍾。車馬動曉陌。不竟睡味濃。平生擊虜意。裂皆髮上衝。尚可乘一障。憑堞觀傳烽。

晨起有感

痛飲可以豪。謝病可以高。計之顧不審。老與世俗壘。丈夫本自許。四十擁旌旄。上馬不回顧。賊穴窮腥臊。擘橋恥未雪。孰謂弓可棄。此志竟悠悠。徂歲行滔滔。一官客長安。燭下束弊袍。豈准歎龍鍾。行恐悲燕蒿。吾曹議古人。後亦觀吾曹。浮雲易變滅。公議終堅牢。

南省宿直

檐角參差散暮霞。重門鎖斷市聲譁。風經綠樹鴉棲穩。月入空廊柱影斜。藤紙靜臨新獲帖。銅瓶寒浸欲開花。誰知今夕幽窗夢。又撈扁舟上若耶。

又

頽然靜對北窗燈。識字農夫有髮僧。但遣奚奴持古錦。何須侍史護青絳。塵埃奔走無由息。疾病侵陵不自勝。猶喜眼中多壯觀。時看雲海化鯤鵬。

